


Nuevo Testamento en
mixteco



New Testament in Mixtec, Atatláhuca (MX:mib:Mixtec,
Atatláhuca)

Nuevo Testamento en mixteco
New Testament in Mixtec, Atláhuca (MX:mib:Mixtec, Atláhuca)

copyright © 1973 Wycliffe Bible Translators, Inc.

Language: Mixtec, Atláhuca

Translation by: Wycliffe Bible Translators, Inc.

Mixteco, Atláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	51
SAN LUCAS	82
SAN JUAN	134
HECHOS	173
ROMANOS	223
1 CORINTIOS	244
2 CORINTIOS	263
GÁLATAS	276
EFESIOS	284
FILIPENSES	291
COLOSENSES	296
1 TESALONICENSES	301
2 TESALONICENSES	305
1 TIMOTEO	308
2 TIMOTEO	314
TITO	318
FILEMÓN	321
HEBREOS	323
SANTIAGO	338
1 PEDRO	343
2 PEDRO	349
1 JUAN	353
2 JUAN	358
3 JUAN	359
JUDAS	360
APOCALIPSIS	362

JNUHUN VAHA NI TEE SAN MATEO

*Lista ñayuu yucūn jeē ní quiji Jesu-
cristo*

(Lc. 3.23-38)

¹ Yāha cúu lista ñayuu yucūn jeē ní quiji Jesucristo. Te máá yá ní quiji nuū yucūn rey David, te David ní quiji nuū yucūn Abraham.

² Abraham ní cuu de tátá Isaac, te Isaac ní cuu de tátá Jacob, te Jacob ní cuu de tátá Judá jíin táca ñani i. ³ Te Judá ní cuu de tátá Fares jíin Zara, te náná ndindúú i ní cuu Tamar. Te Fares ní cuu de tátá Esrom, te Esrom ní cuu de tátá Aram. ⁴ Te Aram ní cuu de tátá Aminadab, te Aminadab ní cuu de tátá Naasón, te Naasón ní cuu de tátá Salmón. ⁵ Te Salmón ní cuu de tátá Booz, te náná i ní cuu Rahab. Te Booz ní cuu de tátá Obed, te náná i ní cuu Rut. Te Obed ní cuu de tátá Isaí. ⁶ Te Isaí ní cuu de tátá David, tēe ní cuu rey. Te rey David ní cuu de tátá Salomón, te náná i, xīhna gā ní cuu ña ñasihí Urías.

⁷ Te Salomón ní cuu de tátá Roboam, te Roboam ní cuu de tátá Abías, te Abías ní cuu de tátá Asa. ⁸ Te Asa ní cuu de tátá Josafat, te Josafat ní cuu de tátá Joram, te Joram ní cuu de tátá Uzías. ⁹ Te Uzías ní cuu de tátá Jotam, te Jotam ní cuu de tátá Acáz, te Acáz ní cuu de tátá Ezequías. ¹⁰ Te Ezequías ní cuu de tátá Manasés, te Manasés ní cuu de tátá Amón, te Amón ní cuu de tátá Josías. ¹¹ Te Josías ní cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

¹² Te náa cáyucú i yūcuán, te Jeconías ní cuu de tátá Salatiel. Te Salatiel ní cuu de tátá Zorobabel. ¹³ Te Zorobabel ní cuu de tátá Abiud, te Abiud ní cuu de tátá Eliaquim, te Eliaquim ní cuu de tátá Azor. ¹⁴ Te Azor ní cuu de tátá Sadoc, te Sadoc ní cuu de tátá Aquim, te Aquim ní cuu de tátá Eliud. ¹⁵ Te Eliud ní cuu de tátá Eleazar, te Eleazar ní cuu de tátá Matán, te Matán ní cuu de tátá Jacob.

¹⁶ Te Jacob ní cuu de tátá José, tēe ní cuu yí María. Te María ní cuu ña náná Jesús, Yāa naní Cristo.

¹⁷ Te nde Abraham te nde David ní iyo uxí cuūn yucūn. Te nde David te nde náa cuángoo ñayuu Israel preso ñuu Babilonia ní iyo inga uxí cuūn yucūn. Te nde ná ní jengoo i preso te nde ní cacu Cristo, suni ní iyo inga uxí cuūn yucūn.

Jeē ní cacu Jesucristo

(Lc. 2.1-7)

¹⁸ Te jeē ní cacu Jesucristo, súcuan ní cuu: Náná yā María, je ní cundaā jeē quijnáhan ña jíin José. Te nde ná tu quijnáhan ña jíin de, te ní jecūhun séhe ña ní sáha Espíritu Santo. ¹⁹ Te José, tēe quijnáhan ña jíin, chí tēe ndaā cúu de. Te tu ní cúní de cuāha de jnūhun canu ña, chí sa cúní de jeē na jécuiñí sāhi jēe ma quijnáhan de jíin ña. ²⁰ Te níní súcuan nácani ní de, te jíin jéni ní quee-ni ñn ndajéhé maá Jítoho yō Yāa Dios nuū de, te ní cahān yā jíin de:

José, sēhe yucūn David, ma yūhu ró cueca ró ñasihí ró María, chí sēhe jeē scácu ña, vēji i nde nuū maá Espíritu Santo. ²¹ Te scácu ña ñn sēhe yí. Te snání ró i Jesús, chí máá i cúu Yāa jnama ñayuu nuū cuéchi i, áchí ndajéhé.

²² Súcuan ní cuu tācá jniñu yáha, návāha squícu jnūhun Jítoho yō Yāa Dios jeē ní cahān tēe ní nacani jnūhun ya nde jenahán. Te suhva ní cahān de:

²³ Coó ñn sūchi síhí, te nihīn séhe i, te scácu i ñn sēhe yí, te conaní sūchí un Emanuel. Achí tutu. Te síhví yáha cúní cahān: Yāa Dios ndeé yá jíin yó.

²⁴ Te ní natahū ní José, te ní sáha de nájñūhun ní cahān ndajéhé Jítoho yō jíin de. Te ní jeca de María ní cuu ña ñasihí de. ²⁵ Te tu ní quíxí de jíin ña, chí nde ní scácu ña sēhe yí núú ña. Te ní snaní de i Jesús.

Jeē ní quijicoo tēe mago nuū yā

2

¹ Te ná ní cacu Jesús ini ñuu Belén ndañūú Judea, te tiempo un ndácu

rey Herodes jniñu. Yūcuán na te jecu tēe ndíchí jēe cascuáha siquī quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén.

² Te ni cacajñuhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi núū cáne niāndii ni cajito ná ñn quími cáhnu jeē cúu seña jeē ní cacu í. Te vējicoo ná chiñúhún ná í, áchí de.

³ Te rey Herodes, ná ni jini de jñuhun yáha, te ni cunéé ni de, nde jíin táca ñáyuu ñuu Jerusalén. ⁴ Te ni nastútú de táca sūtú cácujeñnu jíin tée cástéén tutu ley Yaā Dios nuū ñáyuu. Te ni cajñuhún de tēe un ndé nuū cacu Cristo achí tutu. ⁵ Te ni cacachi nuū de:

Ini ñuu Belén ndañúu Judea. Chi suhva cáhán nuū tútu ni tee tēe ni nacani jñuhun ya nde jenahán:

⁶ Te róhó ñáyuu ñuu Belén ndañúu Judá,

cújeñnu ga ñuu rō vēsú táca gá jeē cújeñnu ini Judá.

Chi suu ini ñuu rō quenda ñn Yaā ndacu jniñu,

te coto ya ñayuu maá rí Israel, achí Yaā Dios.

Achí tutu.

⁷ Yūcuán na te Herodes ni cana sáhi de táca tēe ndíchí un jēe naní mago. Te ni cajñuhun yúcún de ndé quíví ní cane quími ún. ⁸ Te ni tají de tēe un quíngoo de ñuu Belén. Te ni cahán de:

Cuángoo ní te cajñuhun yúcún ní ndé nuū íne sūchi lúlí un. Te núu ni naniñn ní í, te quijicoo ní castūhun ní nuū ná, návāha suni máá ná quichiñúhún ná í, áchí rey.

⁹ Te jeē ní cajini de jñuhun ni cahán rey, te cuangoo de. Te máá quími cáhnu jeē ní cajito de ichi núū cáne niāndii, yósnúu núū de cuahán nde ni jinū nuū íne sūchi lúlí un, te yūcuan ní jecuiñi. ¹⁰ Te ná ni cajito de jeē ní jecuiñi quími ún, te yōhyo ni cacusiñi de. ¹¹ Te ni jinūcoo de ni quívicoo de ini vehe, te ni cajito de nuū sūchi lúlí un jíin náná í María. Te ni cajecuiñi yití de nuū í, te ni cachiñúhún de í. Te ni canune de yejnū de, te ni casocō de oro jíin súde cútú jíin súde uvuā nuū

i. ¹² Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

Jeē ní jinu José cuangoo de nación Egipto

¹³ Te náa cuánuhun táca tēe mago, te ni scóto jēni José jeē ñn ndajéhé maá Jitoho yō Yaā Dios ni cahán yā jíin de:

Ndocuiñi te cunu ró quíngoo ró jíin sūchi lúlí jíin náná í nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúlí jíin jeē cáhni de í. Achí yá.

¹⁴ Te ni natahū ni José. Te cuangoo de jíin sūchi lúlí jíin náná í, te ñuú ní cajica de cuangoo de nación Egipto.

¹⁵ Te ni coyúcú de yūcuan ndé ni jihī Herodes. Te súcuan ni cuu návāha squícu jñuhun Jitoho yō Yaā Dios jeē ní cahán tēe ni nacani jñuhun ya nde jenahán: Nde nación Egipto ni cana ri Sēhe ri vēji í, áchí Yaā Dios, achí tutu.

Jeē ní ndacu Herodes jniñu jeē na cúu táca sūchi yí lúlí

¹⁶ Yūcuán na te Herodes ni jini de jeē súcuan ni castáhú tēe mago un de, te yōhyo ni quití ni de. Te ni tají de soldado cuangoo, te ni cajehni táca sūchi yí lúlí jēe uú cuiyā jíin jēe yiquín gá jeē cáyúcú ini ñuu Belén jíin táca ñuu yajni. Chi je ni cajñuhun yúcún de táca tēe mago un nasaa tiempo ni cuu jeē ní cacu Jesús. ¹⁷ Te súcuan ni squícu jñuhun ni cahán Jeremías, tēe ni nacani jñuhun Yaā Dios nde jenahán, chi ni cahán de:

¹⁸ Ini región Ramá ni jini sōho ri jeē cándahyū te cándahyū cohó.

Chi ñahan cácuu yucūn Raquel, cándahyū ña jehē séhe ña, te tu cácuni ña ndusiñi ni ña, chi ni cajihí í.

Achí tutu.

¹⁹ Yūcuán na te ni jihī Herodes. Te ni scóto jēni José jeē ñn ndajéhé Jitoho yō Yaā Dios ni cahán yā jíin de nuū ndeé de nación Egipto. ²⁰ Te ni cahán yā jíin de:

Ndocuiñi te nuhun rō ñuu rō Israel jíin sūchi lúlí jíin náná í. Chi je ni cajihí

tēe cánducú cahni sūchi lúli jíñā nuú. Achí ndajéhé.

²¹ Yūcuán na te ni ndocuiñī de, te cuanuhun de nación Israel jíñ sūchi lúli jíñ náná i. ²² Te ni nihīn de jñuhun jeē Arquelao ni nucuiñī de nuú tatá de Herodes, te máá de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quihín de región Galilea, te cuangoo de. ²³ Te ni jinū de yūcuán, te ni coyūcú de ñuu naní Nazaret. Súcuan ni cuu návāha squícu jñuhun ni cacahān tēe ni canacani jñuhun Yaā Dios nde jenahán. Chi ni cacachi de jeē cahān ñayuu jeē téē ñuu Nazaret cúu Jesús.

Jñuhun Juan tēe scuándute
(Mr. 1.1-8; Lc. 3.1-9, 15-17;
Jn. 1.19-28)

3

¹ Te ni yāha tiempo, te ni jinū Juan tēe scuándute nde nuú ñuhun téhé ndañū Judea, nácani de jñuhun suhva:

² Nacani ni rō jijnáhan ró jēē stóo ró cuéchi ró, chi je ni cuyajni Yaā ndeé andiví jēē ndacu ya jniñu nuú rō. Achí de.

³ Te Isaías, tēe ni nacani jñuhun Yaā Dios nde jenahán, suhva ni tee de jñuhun Juan nuú tútu:

Coo ñn tēe cana jee nde nuú ñuhun téhé:
Sátuhva ró máá ró jijnáhan ró, chi quee máá Jítoho yō.

Te sáha ró jniñu ndaā, chi vēji ya, achi de.

Achí Isaías.

⁴ Te sahma ñuhun Juan cúu ixi quití nání camello, te núhni ñn cinturón ññi chíji de. Te jeē técu de cúu tíca ndicuéhyí jíñ ndúxi yocō. ⁵ Te ñayuu ñuu Jerusalén jíñ táca ñayuu región Judea jíñ ñayuu yúcu yajni yuyúte Jordán, ni quijicoo i nuú de. ⁶ Te ni canacani ndaā i cuéchi i nuú Yaā Dios, te ni scuándute de i ini yūte Jordán.

⁷ Te ná ni jito de jeē véjicoo cuehē tēe grupo fariseo jíñ téē grupo saduceo nuú scuándute de, te ni cahān de jíñ:

Va sēhe coō cácuu ró, chi xeēn rō nájñuhun coō. ¿A cájeni ni rō jeē cuu cunu ró cācu ró nuú castigo xeēn jeē quíji? ⁸ Núu súcuan te sáha ró jniñu váha, te súcuan stéén rō jeē ní canacani ndije ni rō jeē stóo ró cuéchi ró. ⁹ Te ma cáni ni rō cahān rō jeē cuu cācu ró síquī jeē cácuu ró yúcūn Abraham. Chi cáhān rī jíñ ró jeē cuu sáha Yaā Dios jeē tāca yūu yáha nduu sēhe Abraham jeē candíje váha, te núu cúni yā. ¹⁰ Te cácuu ró nájñuhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñuhun je íyó túhva ññ cāa jeē cahnde nde yoho yujnu. Núu súcuan te sáha ya jíñ ró nájñuhun jíñ táca yujnu jeē tu cúun ndehē váha, jeē tahndé te cayū nuú ñuhún. ¹¹ Te ruhū chi jíñ ndute scuándute ri rohó, te yūcuan cúu jeē steén rō jeē ní canacani ni rō jeē stóo ró cuéchi ró. Te Yaā jeē quíji, chi nájñuhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñuhun ñuhún. Te Yaā quiji chi cújéhnu ndasí yá. Chi tú na vé jéhnu cuítí cúu ri nuú yā, ni jeē cuajniñu ri nuú yā vēsú ññ jniñu lúli gá nájñuhun jeē quénehen ri ndijēn yā. ¹² Te sáha ya nájñuhun sáha tēe scánda trigo, chi sásñn ya ñayuu váha jíñ ñayuu cunéé, nájñuhun cúndoo trigo jeē quénda sñn paja. Te nastútú yá trigo yā ndiví ini yacā yā. Te paja chi jnaa yā nuú ñuhún jeē ma ndahvá cuítí. Achí Juan.

Jeē ní jendute Jesús

(Mr. 1.9-11; Lc. 3.21-22)

¹³ Yūcuán na te ni quenda Jesús región Galilea, te ni quee yā yūte Jordán nuú íne Juan, návāha scuándute de ya. ¹⁴ Te tu ní cúni Juan scuándute de ya, chi ni cahān de jíñ yá:

Sa suhva cánuú jeē scuándute máá ní sãñá, ¿te ndese cúu jeē sa nuú ná vēji ní? áchí de.

¹⁵ Te ni cahān Jesús jíñ de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya.
 16 Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cúun Espíritu Yaā Dios vēji, te cáa nájñuhun ñn paloma, te ni quee xinī yā. 17 Te ichi ándiví ni cahān ñn jñuhun:

Yāha cúu Sēhe rī jeē maní ndasí rī jíin, te yōhyo cúsiñ nī rī jíin, áchí.

*Jeē ní jito ndee jexeén Jesús
 (Mr. 1.12-13; Lc. 4.1-13)*

4

1 Yūcuán na te ni jíin Jesús nde nuū ññuhun téhé ní sáha Espíritu Santo. Te yūcuán coto ndee jexeén yā, chi cúni jeē sáha ya cuēchi.

2 Te ni iyo ndite ni yā uū xico nduú uū xico ñuú, sáa te jíi yā sōco. 3 Te ni quee maá jexeén jeē cóto ndee un yá, te ni cahān jíin yá:

Núu máa ró cúu Sēhe Yaā Dios, te cahān rō jeē yuū yúcu yāha na ndúu staā caji rō, achí.

4 Te ni cahān yā jíin:

Tuú chi yósó núu tútu i: Nasūu máni máa jíin stāa cátecu ñayuu, chi suni jíin táca jñuhun cáhān Yaā Dios, achí yá.

5 Yūcuán na te cuahān jexeén un jíin yá nde ñuu i Jerusalén. Te ni jeni ya xinī torre templo. 6 Te ni cahān jíin yá:

Te núu Sēhe Yaā Dios cúu ró, te síngava ró máa ró nde nuū ññuhun, chi jnama ya rohó. Chi yósó núu tútu: Tejniñu ya ndajéhé yā quijicoo coto rohó.

Te cunundee yā rohó jíināhan ya, návāha ma cáchihi ró jéhē rō nuū yuú. Achí tutu. Achí jexeén.

7 Te ni cahān Jesús:

Tuú chi suni yósó núu tútu jeē ma cóto ndee ñayuu Jitoho i Yaā Dios, núu jnama ya i chí tuú, áchí yá.

8 Te jexeén un ní jeca tucu ya cuahān jíin yá nde xinī ñn yucu súcún ndasí. Te ni steén táca nación ññ cáhnu ñayivi núu yā, te yōhyo luu cáa ndihí. 9 Te ni cahān jíin yá:

Tāca ñuu yāha cuáha rī nuū rō, te núu cuiñi yítí ró chiññuhún ró ruhū, achí.

10 Yūcuán na te ni cahān Jesús nuū jexeén:

Satanás, cujiyo quihñ rō, chi yósó núu tútu jeē chiññuhún ñayuu maá Jitoho i Yaā Dios, te nuū maá-ni ya cuajniñu i. Achí yá.

11 Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejniñu nuū yā.

*Jeē ní quejéé Jesús nácani ya jñuhun
 región Galilea*

(Mr. 1.14-15; Lc. 4.14-15)

12 Te ná ni nihñ Jesús jñuhun jeē íne Juan vecāa, te cuanuhun yā región Galilea. 13 Te tu ní cóndee yā ñuu Nazaret, chi ni jehēn yā ni condee yā ñuu Capernaum. Te ñuu un íne yumar, máa región Zabulón jíin Neftalí. 14 Te súcuan ni squícu jñuhun ni tee Isaías, tēe ni nacani jñuhun Yaā Dios nde jenahān:

15 Región Zabulón jíin Neftalí, ichi jeē yíhi yumar, lado yūte Jordán nuū cáne niāndii, jíin región Galilea nuū cáyūcú ñayuu táca nación tu jíni jñuhun ya.

16 Ñayuu ún chi nájñuhun cáyūcú i nuū néē,

te coto i nájñuhun ñn luz cáhnu. Te ñayuu je yajni naa, nihñ i jñuhun váha ndasí, suu jñuhun jeē jnama ya anuá i.

Achí Isaías.

17 Te nde quiví yúcuán ní quejéé Jesús nácani ya jñuhun, te ni cahān yā suhva:

Nacani ni rō jíināhan ró jéē stóo ró cuéchi ró, chi je ni cuyajni Yaā ndeé andiví jéé ndacu ya jniñu nuū rō, achí yá.

Jeē ní cana ya cuñ tēe jññ chācá

(Mr. 1.16-20; Lc. 5.1-11)

18 Te jíca Jesús yumar Galilea cuahān yā. Te ni jito ya nuū uú jñāhan ñani. Te ñn de cúu Simón jeē suni nání Pedro, te inga de cúu Andrés. Te tēe cájni chācá cácuu de, te cásiंगा de ñunu de ini mar. 19 Te ni cahān yā jíin de:

Condiquñ ruhū na quihñ yō, te nasáha rī rohó tēe nihñ cuehē ñayuu

candíje ruhū, nájñuhun cániñ rō chācá, áchí yá.

²⁰ Yūcuán na te ni castóo-ni de ñunu de, te ni candiquín de ya.

²¹ Te ni jica ya jecu gā, te ni jito ya nuū inga uū jñáhan ñani. Te cácuu de Jacobo jíin Juan, sēhe Zebedeo. Te cáyūcú de ini barco jíin tátá de Zebedeo, cánachijnñ de ñunu de. Te suni ni cana ya de jeē cóndiquín de ya. ²² Te ni castóo-ni de tátá de jíin barco, te ni candiquín de ya cuango de.

*Jeē ni stéén yā nuū cuehē ñayuu
(Lc. 6.17-19)*

²³ Te ni jica cuu Jesús ñí región Galilea, ni steén yā jñuhun ini tācá vehe iñ jeē cúu sinagoga. Te ni nacani ya jñuhun vāha ndese ndácu Yaā Dios jñiñu. Te ni nasávāha ya ñayuu cácuñ tācá-ni cuehyí. ²⁴ Te ni jitē núu jñuhun ya cuahān ñí región Siria. Te nuū yā ni caquindeca i tāca ñáyuu cácuñ, ñayuu cándoho tijni nuū cuehyí, jíin jéé jetú, jíin jéé ñuhun tachí ini, jíin jéé jihí yñí, jíin jéé ni íjin. Te ni nasávāha ya i jíināhan i. ²⁵ Te cuehē ñayuu región Galilea jíin Decápolis, jíin ñáyuu ñuu Jerusalén jíin región Judea, jíin tāca ñuu ichi núu cáne niāndii yūte Jordán, ni cacondiquín i ya.

Jeē ní nacani ya jñuhun nde nuū yūcu

5

¹ Te ni jito Jesús nuū ñáyuu cuehē. Te ni caa ya yucu cuahān yā, te ni cucōo ya. Te tēe cáscuáha jíin yá, ni jinūcoo de nuū yā yūcuán. ² Te ni quejéé yá ni steén yā tāca jñuhun yáha nuū de:

*Jñuhun yōhyo ndetū
(Lc. 6.20-23)*

³ Yōhyo ndetū ñayuu jeē cánacuni i jeē tu iyó váha ánuá i síquī cuéchi i, chi je ni quivicoo i ndaha Yaā andiví jéé ndácu ya jñiñu nuū i.

⁴ Yōhyo ndetū ñayuu cácuñyá ni, chi ndusñ ni i sáha Yaā Dios.

⁵ Yōhyo ndetū ñayuu cáñyo vitá suchí ini, chi ni jeñuhun ya jeē cu-tahū i ñayiví.

⁶ Yōhyo ndetū ñayuu jeē nájñuhun jeē cáñi i sōco cáñichí i, súcuan jñáa i sáha i jñiñu ndaā, chi máa yá chindéé ñáhán yá i jeē cuu sáha i.

⁷ Yōhyo ndetū ñayuu cácuñyá ni jñáhan, chi suni cundáhú ni Yaā Dios i.

⁸ Yōhyo ndetū ñayuu cáñyo ndoo ini anuá, chi coto i nuū Yaā Dios.

⁹ Yōhyo ndetū ñayuu cánasámaní jñáhan, chi cahān Yaā Dios jeē sēhe ya cácuu i.

¹⁰ Yōhyo ndetū ñayuu jeē cáñito xeēn inga ñayuu i síquī jeē casáha i jñiñu ndaā, chi je ni quivicoo i ndaha Yaā andiví jéé ndácu ya jñiñu nuū i.

¹¹ Yōhyo ndetū maá ró jíināhan ró núu cácahān neé i nuū rō jeē síquī ruhū, te coto xeēn i rōhó, te stáú yáhu i rōhó, vésú tú cuéchi ró. ¹² Na cúñi ni ró jíināhan ró núu súcuan, te sa víhyá gā cusñ ni ró, chi cáhnu ndasí coo tahū rō nde andiví. Chi suni súcuan ni cajito xeēn i tāca tēe ni canacani jñuhun Yaā Dios jeē ní quivicoo xñha gā vésú rohó.

*Jñuhun yátá síquī ññ jíin síquī luz
(Mr. 9.50; Lc. 14.34-35)*

¹³ Máa ró jíināhan ró cájeñiñu ró ini ñayiví nájñuhun jéñiñu ññ nuū cúñu návāha tú tehyū. Te núu ññ ún na náa jeē uhvuá, ¿te ndese nduu uhvuá tucu? Tuá cuajniñu cuiti gā, chi sa cate ñayuu te cueñu i síquī.

¹⁴ Máa ró cácuu nájñuhun luz jeē steén ini anuá ñayuu ñayiví. Te cácuu ró nájñuhun ññ ñuu íne xiní yūcu, jeē ma cúu quisáhi. ¹⁵ Te ni tu nástññ ñayuu ññ lámpara te chune i chíji cajón, chí sa suhva jéni i nuū sucún, návāha cundijin nuū tāca jéé cáyūcú ini vehe. ¹⁶ Te suni súcuan na steén rō luz maá ró nuū tāca ñáyuu, te suu cúu jeē cúni i jñiñu váha casáha ró, te cahān i jeē yóhyo váha Yaā cúu Tátá rō jeē ndeé yá andiví.

Jeē ni stéén yā síquī ley Yaā Dios

¹⁷ Ma cáni ni ró jíināhan ró jéé véji ri snáa rī ley jeē ni jéhe Yaā Dios nuū Moisés, jíin jéé snáa rī tāca jñuhun ni cacahān tēe ni canacani jñuhun ya jenahán. Tú véji ri jeē snáa rī, chi sa

suhva jeē steén cají rí jnūhun ndíso. ¹⁸ Chi jendaá cahán rī jín ró jeē núu níní íyó andiví jín ñáyiví, te ma náa cuiti ni ñn punto ni ñn letra nuū tútu ley yā, chi nde na squícu tãcá ndihi jnūhun jeē cahán. ¹⁹ Núu súcuan te núu ñn ñayuu tu squícu i ñn jnūhun yáha jeē ndácu ley yā, vésú ñn jnūhun lulí gá cúu, te núu steén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ñn ñayuu squícu i te steén i jeē squícu ñayuu, yūcuán na te cujéhu i ichi andiví nuū ndácu Yaā Dios jniñu. ²⁰ Chi cáhán rī jín ró jeē núu tú coo ndaā gā jniñu cásáha ró vésú jniñu cásáha tēe cásteén tutu ley yā jín tēe grupo fariseo, te ma quívicoo cuiti rō ndaha Yaā andiví jéē ndacu ya jniñu nuū rō.

*Jeē ni steén yā jeē ma quití ni yō
(Lc. 12.57-59)*

²¹ 'Je ni cajini ró jnúhun ni cacahān jín ñayuu jenahán, jeē ma cáhni i ndiyi, te na-ni ñayuu núu cahni i ndiyi, te cundaā cuéchi i nuū tãca tóhō, achí. ²² Te ruhū chi cáhán rī jín ró, vésú núu máá jéē quití ni ñn ñayuu jito i jnahan i, suni cundaā siquī cuéchi i ún. Te núu ñn ñayuu cahān neé i nuū jnahan i, núu súcuan te cundaā cuéchi i un núu justicia cujéhu ga. Te núu ñn ñayuu cahān i nuū jnahan i: Róhó jéē canéé íí, achi i, núu súcuan te quívi i nuū ñuhún infierno te núu ma nácani ni i.

²³ 'Jeē yúcuan te núu ni jinū rō nuū altar jín jéē socó rō nuū Yaā Dios, te núu ni nucūhun ni rō jeē ni sáha ró cuéchi siquī jnahan ró, ²⁴ núu súcuan te squéndōo ró jéē socó rō ún xiin altar, te xihna gā quihín rō ndumanī rō jín jnahan ró. Yūcuán na te nandicó ró socó rō.

²⁵ 'Te núu ñn ñayuu quihín i jín ró nuū tohó jeē cacān i cuéchi siquī rō, núu súcuan te níní cuáhán rō jín i ichi te sándaā maá ró jín i, návāha ma squívi i róhó núu juez. Chi juez siáha de róhó núu policía, te chune de róhó vecāa. ²⁶ Te jendaá cahán rī jín ró jeē ma quénda cuiti rō yūcuán, chi nde

chunaa rō ndihi cuiti xūhun jéē cájicān de.

Jeē ni steén yā jeē ma cósiquí ndéē jnahan

²⁷ 'Ni cajini ró jnúhun ni cacahān jenahán jeē ma cósiquí ndéē jnahan ñayuu. ²⁸ Te ruhū chi cáhán rī jín ró jeē núu ñn tēe ndéhe de nuū ñn ñahan jeē ndíyo ni de ña, yūcuán na te je ni casíquí ndéē de ñahan ún ini anuá de.

²⁹ 'Núu súcuan te núu tinūu lado váha ró sáha jeē quívi ró cuéchi, váha ga quenehen ró te scáne ró, návāha tuá sáha ró cuéchi. Chi váha gā jeē náa ñn tinūu ró vésú jeē cóo ndihi yiqui cúñu rō te quihín rō infierno. ³⁰ Te núu ndaha váha ró sáha jeē quívi ró cuéchi, váha ga cahnde rō te scáne ró, návāha tuá sáha ró cuéchi. Chi váha ga jeē náa ñn ndaha ró vésú jeē cóo ndihi yiqui cúñu rō te quihín rō infierno.

*Jeē ni steén yā jeē ma ndusñn jnahan
(Mt. 19.9; Mr. 10.11-12; Lc. 16.18)*

³¹ 'Te suni ni cacahān nde jenahán: Núu ndé ñn cúní stóo ñasihí, te na cuáha acta nuū ña jeē ndusñn jín ña. ³² Te ruhū chi sa cáhán rī jín ró jeē núu ñn tēe stóo de ñasihí de, te núu nasūu jéē tíjni ni ña, núu súcuan te sáha de jeē casíquí ndéē ña de, chi condee ña jín inga tēe. Te núu ñn tēe condeca de ñahan ní ndusñn, suni cásíquí ndéē de ña.

Jeē ni steén yā siquī jnúhun jéjnūhun téyí

³³ 'Te suni ni cajini ró jnúhun jeē ni cáhán jín ñayuu nde jenahán: Núu ni jéjnūhun téyí ró jeē squícu ró, jito jínúu Yaā Dios, núu súcuan te cánuú squícu ró jéē ni cáhán teyí ró un, achí. ³⁴ Te ruhū chi cáhán rī jín ró jijnahan ró jeē ní ñn siquī jniñu ma cahán teyí ró nde jín sñhví Yaā Dios, ni ma cahán teyí ró jeē jito jínúu yā. Te núu jéjnūhun téyí ró te tú váha jeē ndácunehen ró andiví ni ñayiví. Chi andiví cúu nuū ín mesa nuū ndácu Yaā Dios jniñu. ³⁵ Te ñayiví cúu nájnūhun teyū nuū ín jehē yā. Te ni ma ndácunehen ró ñuu Jerusalén, chi suu cúu ñuu maá Yáa cúu Rey cujéhu. ³⁶ Ni ma cahán

rō jeē na cóndee cuēchi siquī rō núu tu squícu ró. Ma cahán rō súcuan, chi ma cúu cuiṭi sáha ró jéē ni ñn ixi xíní rō nducuíjín chí ndujnúú. ³⁷ Chi suhva-ni cahán rō: Cuu, achi rō. Tuú, achi rō. Chi núu chisóó gá rō jnūhun cahán rō, te nuū jexeén vēji.

Jeē ni stéén yā jeē ma cuáha yó jéē ndútahū ñayuu

(Lc. 6.29-30)

³⁸ 'Ni cajini ró jnúhun jeē ni cáhān jíin ñayuu jenahán: Núu ñn tē ndahva de tinūu jnáhan de, suni súcuan na ndáhva tinúú de. Te núu ñn tē stáva de jnūhun jnáhan de, suni súcuan na stáva jnūhun de, áchí.

³⁹ Te ruhū chi sa cáhān rī jíin ró: Ma nácuāha ró jéē ndútahū tē sáha ndevāha jíin ró. Chi sa núu ndé tē caní de yiqui núú lado váha ró, te vāha ga suni cuāha ró inga lado caní de, vēsú jeē nácuāha ró jéē ndútahū de.

⁴⁰ Te núu ndé tē stáú yáhu de róhó te quénde de camisa rō, suni cuāha ró jnúhun jeē na quíhín de jíin ndé ticāchi ró. ⁴¹ Te núu ndé tē scāca de róhó jéē condiso ró ndajníñu de ñn kilómetro, te caca ró úu kilómetro jíin de. ⁴² Te na-ni ñayuu núu jícan i ndajníñu ró, te cuāha ró núu i. Te ñayuu jícan núu ndajníñu nuū rō, ma sasáhán ró cuāha ró núu i.

Jnūhun jeē cundáhú ni yō ñayuu cájito uhū yohó

(Lc. 6.27-28, 32-36)

⁴³ 'Te suni ni cajini ró jnúhun jeē ni cáhān nde jenahán: Cundáhú ni rō ñayuu cáhīyo maní jíin ró, te coto uhū rō ñayuu cájito uhū rohó, áchí. ⁴⁴ Te ruhū chi sa cáhān rī jíin ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha siquī rō. Te sáha vāha ró jíin ñayuu cáquiti ni nuū rō. Te cacān tahú rō jehē ñayuu cácahān neé núu rō te cájito xeēn i róhó. ⁴⁵ Te súcuan stéén rō jeē cácuu ró séhe máá Tátá rō, Yāā ndeé andiví, chí máá yá jéhe niāndii cúndijin nuū ñayuu cunéé jíin ñayuu váha. Te jéhe ya saū nuū ñayuu casáha jniñu ndaā jíin núu ñayuu casáha jniñu

neé. ⁴⁶ Chi núu íyó maní rō jíin máá-ni ñayuu jeē maní jíin ró, te tú na tahū nihīn rō nuū yā. Chi nde tēe cástútú xúhun renta jeē castáhú, suni súcuan casáha de. ⁴⁷ Te núu máni jnáhan ró cáhān yñúhún ró jíin, ¿te na vé jeē váha ga sáha ró núu súcuan? Chi nde ñayuu tu cácañdije Yāā Dios, suni súcuan casáha i. ⁴⁸ Núu súcuan te ndaā na cóo ndihí jeē sáha ró, nájñūhun íyó ndaā ndihí jeē sáha Tátá rō, Yāā ndeé andiví.

Jeē ni stéén yā ndese sáha yó jniñu váha

6

¹ 'Te jeē sáha ró táca jniñu váha nuū Yāā Dios, coto ró jéē ma sáha ró máá siquī jeē cúni ñayuu te cuajnúhún i róhó. Chi núu súcuan sáha ró, te tú na tahū rō cuāha máá Tátá rō, Yāā ndeé andiví. ² Jeē yúcuan te jeē sáha ró caridad, te ma sáha ró jéē cúni táca ñayuu, nájñūhun casáha tēe stáhú-ni, cáhīn de nuū cúchitú ñayuu ini táca vehe i sinagoga jíin núu yáhu. Chi súcuan casáha de návāha cuajnúhún ñayuu de jeē váha casáha de. Jendaá cahán rī jíin ró jeē tahū de cúu jeē jnúhún ñayuu de. ³ Te róhó jíjnahán ró, núu casáha ró caridad, te sáha yuhu rō, návāha nde amigo vāha ró tú cuni jeē sáha ró. ⁴ Súcuan na sáha yuhu rō caridad. Te máá Tátá rō jeē jíto ya jeē sáha yuhu rō, ñn quiví te cuāha ya tahū cuu ró.

Jeē ni stéén yā ndese cacān tahú yō

(Lc. 11.2-4)

⁵ 'Te jeē cájicān tahú rō, te ma sáha ró nájñūhun casáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini táca vehe i sinagoga jíin táca yiqui yáhu, návāha cuni ñayuu te cuajnúhún i de. Jendaá cahán rī jíin ró jeē máá yúcuan-ni cúu tahū jeē nihín de, suu jeē jejnúhún ñayuu de. ⁶ Te róhó jíjnahán ró, núu cájicān tahú rō, te ndiví ró ini vehe ró te casi rō yehyí. Te cacān tahú rō nuū máá Tátá rō, Yāā ndeé yuhu jíin ró. Yūcuán na te máá Tátá rō jeē jíto ya jeē

súcuan sáha yuhu rō, sáha ya jeē jicán rō.

⁷ Te jeē cájicān tahu rō, te ma cahán saá-ni ró jnúhun jeē tu cájecūhun ni rō, nájnūhun cásáha ñayuu tu cájini jnúhun Yaā Dios. Chi cájeni ni i jeē núu cuehē jnúhun súcuan cahán i, te sáa te cuni sōho ya, te tuú. ⁸ Núu súcuan te ma sáha ró nájnūhun cásáha máá i. Chi máá Tátá rō, je jíni yā na vé cájini ñúhún ró nde ná tu cacān rō nuū yā.

⁹ Núu súcuan te suhva cacān tahu rō: Tátá maá ná jijnáhan ná jēē ndeé ní andiví,

níní na cóo yíñúhún ná nuū ní, chi Yaā íi cúu ní.

¹⁰ Te ñúhun ni na jēē yachī quiji quiví ndacu ní jniñu ní ñáyiví yáha.

Te na cóo táca jniñu nújnahan ni ní, nájnūhun íyó ini andiví, súcuan na cóo ini ñáyiví.

¹¹ Staā jeē cátecu na táca quiví, cuāha ní núu ná vijna.

¹² Te cone cahnu ni ni núu táca cuéchi cásáha ná núu ní, nájnūhun cáhine cáhnu ni na núu ñáyuu casáha cuéchi nuū ná.

¹³ Te ma cuāha ni jnúhun jeē coto ndee jexeén sáña, chi sa suhva jnama ní sáña núu táca jēē neé.

Chi máá ní cúu Yaā ndácu jniñu, te jni ní poder,

te yōhyo luu cújéhu ní ní cáni. Súcuan na cóo. Amén.

Achi rō jijnáhan ró.

¹⁴ Chi núu cone cáhnu ni rō nuū ñáyuu casáha cuéchi nuū rō, te suni súcuan cone cáhnu ni maá Tátá rō andiví nuū cuéchi ró. ¹⁵ Te núu ma cóne cáhnu ni rō nuū ñáyuu casáha cuéchi nuū rō, te suni súcuan ma cóne cáhnu ni maá Tátá rō nuū cuéchi ró jijnáhan ró.

Jeē ni stéén yā siquí jnúhun condite ni

¹⁶ Te núu condite ni rō jeē chiñúhún ró Yaā Dios, te ma sáha ró nájnūhun cásáha tēe stáhú-ni. Chi cásáha de jeē coto xií de, te súcuan stéén de nuū ñayuu jeē íyó ndite ni de, návāha cuajnúhún i de. Jendaá cahán rī jíni ró jeē maá yúcuan-ni cúu

tahū jeē nihín de, suu jeē jejnúhún ñayuu de. ¹⁷ Te máá ró jijnáhan ró, núu íyó ndite ni rō, te sa chuhun vāha ró xíní rō te nandahá núu rō, ¹⁸ návāha ma cúni ñayuu jeē íyó ndite ni rō. Chi máá-ni Tátá rō jeē ndeé yuhu yā jíni ró, cuni yā, te ñin quiví te cuāha ya tahū cuu ró.

Ndese coo cúcá yó nde andiví (Lc. 12.33-34)

¹⁹ Ma cóndihvī ni rō caya rō nda-jniñu cúcá ini ñáyiví yáha, chi quiví tiquíxin, te cáne xehyu, te tívi. Te suni quívicoo ñacuíhná te sácuíhná.

²⁰ Chi sa suhva sáha ró táca jniñu vāha návāha cayā tahu rō nde andiví. Chi yúcuan má quiví tiquíxin ni ma cáne xehyu jeē tívi. Ni ma cúu quiví ñacuíhna sácuíhná. ²¹ Chi nde nuū nihín ró tahu vāha ró, yúcuan cúu nuū cóndihvī ni rō siquí.

Tinūu cúu lámpara yiquí cúñu (Lc. 11.34-36)

²² Tinūu ró cúu nájnūhun lámpara nuū yiquí cúñu rō. Núu súcuan te núu tinūu ró íyó ndijin, te ní-ni yiquí cúñu rō cúndijin. ²³ Te núu tinūu ró tu íyó ndijin, te ní-ni yiquí cúñu rō íyó nee. Te suni súcuan cúu ánuá rō, chi núu máni jeē jéni neé ni rō, te nacā jeē nee gā íyó ini anuá rō núu súcuan.

Jeē ma cóndihvī ni yō siquí xúhun (Lc. 16.13)

²⁴ Ni ñin mozo ma cúu cuajniñu de nuū uū patrón. Chi quití ní de nuū ñin te coo maní de jíni inga, chí squícu vāha de nuū ñin te sájéé ní de nuū inga. Te suni súcuan ma cúu cuajniñu ró núu Yaā Dios te núu máni siquí xúhun ndíhví ni rō.

Yaā Dios ndíto ya yohó (Lc. 12.22-31)

²⁵ Núu súcuan te cáhán rī jíni ró jijnáhan ró: Ma nácani ndasí ní rō siquí jeē cótecu rō, núu ndese caji ró coho ró, ni siquí sahma, núu ndese cuhun ró. Chi Yaā Dios ni sáha ya jeē técu rō jíni yiquí cúñu rō, te nagā ni cuu jeē ma cuāha ya jeē cáji ró jíni jēe cúhun ró. ²⁶ Condēhe ró ndese cátecu saa, chi tu cátaji tí, ní tu cánastútú tí

jeē chūvāha tī, ni tú yacā tī. Te vēsú sūcuan te máá Tátá rō andiví scáji yā tī. Te cánuú ndasí gá rō jijnáhan rō vēsú tācá saa ún. ²⁷ ¿Te ndé ñn rō, á cuu scuéhnu rō máá rō sava metro gā, vēsú na nácani ndasí ni rō?

²⁸ ¿Te najehē cáncani ndasí ni rō jeē ma nihín rō sahma? Condēhe jijnáhan rō ndese jée ita tāca yúcū. Chi tu sájniñu, ni tu táú. ²⁹ Te cáhán rī jín rō jeē ni rey Salomón, quiñvī ní ñúhun de sahma váha ndasí, tu ní ñúhun de sahma lúu sūcuan nájñuhun ita ún. ³⁰ Te núu sūcuan jéhe Yaā Dios sahma lúu ita un jéē jée vijna te sajnē cayū nuū ñuhún, te nagā ni cuu rōhó jijnáhan rō jéē ma sáha ya jeē nihín rō sahma. ¿Te naun tu cáncandíje ñihin rō jéē ndító ya rohó? ³¹ Núu sūcuan te ma nácani ndasí ni rō siquī jeē cáji rō, jeē coho rō, jeē cuhun rō. ³² Chi tāca ñáyuu ñayiví jéē tu cáncandíje cúu jeē máni siquī jeē yáha cándihvī ni i. Te máá rō jijnáhan rō, chi iyó Tátá rō andiví, te jíní yā jeē cájini ñuhún rō tāca jéē yáha. ³³ Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō, jín siquī jeē sáha rō jniñu ndaā jeē nújnahan ni yā. Yūcuán na te sáha ya jeē nihín rō tāca jéē yáha. ³⁴ Núu sūcuan te ma nácani ni rō siquī jeē cóo sajnē, chi vijna cúu vijna te sajnē cúu sajnē. Chi caní ni rō siquī jnúndóho jeē iyó ná ñn ná ñn-ni quiñvī.

Jeē ma cahán yō siquī cuéchi jnáhan yó
(Lc. 6.37-38, 41-42)

7

¹ Ma cahán rō siquī ñayuu ndese sáha i, návāha suni ma cahán Yaā Dios cuéchi siquī maá rō jeē casáha rō sūcuan. ² Chi nájñuhun cácahān rō siquī cuéchi ñayuu, suni sūcuan cahán yā siquī cuéchi rō. Te cūhva jeē cándihvī ni rō siquī i, suni cūhva yúcuan sáha ya jín rō. ³ Chi cuéchi jnáhan rō cúu nájñuhun jeē íne ñn yāca lúli tinūú i. ¿Te naun casáha rō cuenta jeē sūcuan, te tu casáha rō cuenta cuéchi máá rō jeē cúu nájñuhun jeē íne ñn nduhu tinūu máá rō? ⁴ ¿Te naun

cácahān rō jín jnáhan rō: Na táva rī yāca íne tinūu rō, te tu cáncani ni rō jeē íne ñn nduhu tinūu máá rō? ⁵ Tēe stáhú-ni cácuu rō núu sūcuan. Xíhna gā tinūu máá rō tava rō nduhu, te yūcuán na te cuu condēhe váha rō jéē táva rō yāca tinūu jnáhan rō.

⁶ Ma sáha fuerza rō ñayuu cunéé quívicoo i nuū jnúhun iñ yā núu tu cúní i. Chi ndonda i siquī rō nájñuhun ina jeē cáyihí tī rohó. Te ma nácani rō jnúhun ya nuū ñáyuu jeē tu cúní cuiti cuajnúhún. Chi cándāa i nájñuhun quiñvī jeē jeñú tī siquī perla jeē ndeé yahu ga.

Cacān yō nuū yā te nihín yō
(Lc. 11.9-13; 6.31)

⁷ Cacān rō nuū Yaā Dios, te cuāha ya nuū rō. Te nducú rō tāca jéē váha iyó núu yā, te nihín rō sáha ya. Te cacān tahu rō nde nihín rō, nájñuhun sáha ñayuu cahán yehyí ndé nune quiñvī i. ⁸ Chi tāca ñáyuu jicán, cuāha ya nuū i. Te ñayuu nducú, suni nihín i. Te ñayuu cahán, nune ya ichi nihín i jeē cuní i.

⁹ ¿Te ndé ñn rōhó núu sēhe rō jicán i staā nuū rō, te á cuāha rō ñn yuū nuū i? ¹⁰ ¿Te núu jicán i ñn chācá, te á cuāha rō ñn coō nuū i? Tú cuiti sūcuan. ¹¹ Núu sūcuan te máá rō jijnáhan rō, vēsú ñayuu iyó cuéchi cácuu rō, te cájini rō cuāha rō jéē váha nuū séhe rō. Te nagā ni cuu máá Tátá rō andiví jéē ma cuāha ya jeē váha nuū ñáyuu jicán nuū yā.

¹² Te nájñuhun cúní rō jeē sáha váha ñayuu jín rō, suni sūcuan na sáha váha rō jín i. Chi tutu ley Moisés sūcuan ndácu jniñu, jín táca tutu tēe ni canacani jñuhun Yaā Dios.

Siquī jeē quiñvī yó yéhyí túū
(Lc. 13.24)

¹³ Condihvī ni rō quiñvīcoo rō ndaha Yaā Dios. Chi cúu nájñuhun ñn yéhyí túū. Chi yéhyí jín ichi jeē cuahán nuū jnahnú ndetū ñayuu, jité te cáhnu, te cuehē i quiñvīcoo yūcuán. ¹⁴ Te yéhyí jín ichi jeē cuahán nuū nihín tahu i cotecu i, chi tuū yehyí te cuñi ichi, te jecu-ni i cánihín i.

Jíin jniñu cásáha ñayuu te nácuni yō ndese ñayuu cácuu i

(Lc. 6.43-44)

¹⁵ Te ma cándíje cuiṭi rō tēe stáhú jéē cácahān de jeē jnúhun Yaā Dios cánacani de. Chi nájnūhun lanchi, quiṭi tú xeēn, súcuan cásáha de vējicoo de nuū rō. Te ini anuá de chi cácuu de nájnūhun yihī, quiṭi xéén. ¹⁶ Jíin jniñu cásáha de te nacuni rō de ndese tēe cácuu de. Chi cúu nájnūhun jeē tu scóyo ró ndehē uva xinī iñu, ni tu scóyo ró higo xinī iñu yóquin. ¹⁷ Te tācá yujnu váha chi jéhe ndehē váha, te yujnu néé chi cúun ndehē neé. ¹⁸ ñin yujnu váha ma cúun ndehē neé, te ni ñin yujnu néé ma cuáha ndehē váha. ¹⁹ Te tācá yujnu jeē tu jéhe ndehē váha, chi tahndē te cayū nuū ñuhún. ²⁰ Te suni súcuan cácuu tēe ún, chi jíin jniñu cásáha de te nácuni rō ndese tēe cácuu de.

Nasūú ndihī ñayuu quīvicoo andiví
(Lc. 13.25-27)

²¹ 'Nasūú ndihī ñayuu jeē cahán i Jitoho i ruhū cúu jeē quīvicoo nuū ndácu Tátá rī jniñu nde andiví. Chi quīvicoo máá nene ñayuu jeē squícu jniñu cúní Tatá rī andiví. ²² Te quīvī jeē sándaā rī jniñu ñayuu, te cuehē i cahán jíin rí: Jitoho na jíin náhan ná, ni canacani ná jnúhun jíin síhví ní, te ni caquenehen ná táchī jíin síhví ní, te ni casáha ná cuehē jniñu jéhnú jíin síhví ní jeē náā ni ñayuu sáha. Achi i. ²³ Yūcuán na te cahán rī jíin ñáyuu ún: Tu jíin cuiṭi rī rohó. Cujiyo quingoo ró, chi ñayuu casáha jniñu néé cácuu ró, achi rī.

Siquī uú vehe

(Lc. 6.47-49; Mr. 1.22)

²⁴ 'Núu súcuan te tāca ñáyuu jeē cájini sōho jnúhun cáhán rī te squícu i, cácuu i nájnūhun ñin tēe ni nacani váha ni, te ni jeni de vehe de siquī cáva. ²⁵ Te ni cuun saū, te ni ndaa yūte, te ni quee tachī xeén, te ni cachundahá vehe ún. Te tu ní cótúú, chi siquī cáva ndéé. ²⁶ Te tāca ñáyuu jeē cájini sōho jnúhun cáhán rī te tu squícu i, cácuu i nájnūhun ñin tēe cánéé jeē ní jeni de vehe de

nuū ñíṭi. ²⁷ Te ni cuun saū, te ni quiṭi ndute ñuhún cuehē, te ni quee tachī xeén, te ni cachundahá vehe ún. Te ni cótúú-ni, te ni naa iñ-ni. Achi yá jíin i jíin náhan i.

²⁸ Te ná ni jíinu ni cahán Jesús tāca jnúhun yáha, te ñayuu cuehē un ní canaa ní i ni cajini i jnúhun ni steén yā. ²⁹ Chi ni steén váha ya nuū i, chi máá yá cúu jeē ndíso jniñu siquī ndihī. Te tēe cástéén tutu ley Yaā Dios, tu súcuan cástéén de.

Jeē ní nasávāha ya ñin tēe ndóho cuehyī stehyú

(Mr. 1.40-45; Lc. 5.12-16)

8

¹ Te ni nanuu Jesús yucu ún, te cuehē ñayuu cándiquín i ya. ² Te ñin tēe ndóho cuehyī stehyú, ni quee de nuū yā. Te ni jecuiñī yití de nuū yā, te ni cahán de jíin yá:

Jíin na jéé cuu sáha ní jéé nduvāha ná, te núu cúní ní, áchí de.

³ Te Jesús ni soó yá ndaha ya siquī de, te ni cahán yā:

Cúní rī. Te na ndúvāha ró, áchí yá.

Te ná ni cahán yā súcuan, te ni nduvāha-ni tēe ndóho cuehyī stehyú un. ⁴ Yūcuán na te ni cahán Jesús jíin de:

Ma cáchi cuiṭi rō nuū ní ñin. Chi quisteén rō maá ró nuū sutú, te condahá ró jeē socó ró nuū Yaā Dios, nájnūhun ni ndacu Moisés jniñu jenahán, návāha cuni ñayuu jeē ní nduvāha ró. Achi yá.

Jeē ní nasávāha ya mozo capitán

(Lc. 7.1-10)

⁵ Te ni quīvī Jesús ñuu Capernaum. Te ñin tēe nación Roma jeē cúu capitán, ni quee de nuū yā, te ni cahán ndahú de jíin yá:

⁶ Mozo na cátú i vehe ná, chi ni ñin i te ndóho xeén i, áchí de.

⁷ Te ni cahán Jesús:

Quihín rī nasávāha ri i núu súcuan, áchí yá.

⁸ Te ni cahán capitán jíin yá:

Tu cújéhnú ná jéé quihín ní quīvī ní vehe ná. Chi máá jéé cahán-ni ní, te na ndúvāha-ni mozo na. ⁹ Chi máá

ná suni ndíso jniñu ná ní casáha tēe cácujuhnu ga. Te cújuhnu ná núu tãcá soldado na. Te núu cáhán na jíin ñin de jeē na quíhín de, te cuahán de. Te núu cáhán na jíin inga de jeē na quíji de, te quíji de. Te núu ndácu ná ñin jniñu nuū mozo na, te sáha i. Achí de.

¹⁰ Te jeē ní jini Jesús jnūhun yáha, te ni naa ni yā. Te ni cahān yā jíin ñayuu cándiquin yā ún:

Jendaá cahán rī jíin ró jeē ni nación yō Israel tu ní níhín rī ni ñin ñayuu cándíje níhin súcuan, nájnūhun cándíje tēe yáha, vēsú tēe nación tu jíin jnūhun Yaā Dios cúu de. ¹¹ Te cáhán rī jíin ró jeē quíjicoo cuehē ñayuu ichi núu cáne niāndii jíin ichi núu quée niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andiví. ¹² Te sava ñayuu nación Israel jeē maá i quívicoo núu, te sa quenehen ya i quihín i nuū néé, chi tu ní cácandíje i. Te yūcuan ndáhyū i te nacayihí yuhu i jeē ndoho xeēn i. Achí yá.

¹³ Yūcuán na te ni cahān yā jíin tēe cúu capitán:

Cuánuhun vehe ró, chi sáha ri nájnūhun cándíje ró jéē sáha ri.

Te mozo de un ní nduvāha-ni i máá hora un.

Jeē ní nasávāha ya naná chíso Pedro
(Mr. 1.29-31; Lc. 4.38-39)

¹⁴ Te ni jehēn Jesús vehe Pedro. Te ni jito ya naná chíso de jeē catú ña yhi quíji ña. ¹⁵ Te ni jniñi ya ndaha ña, te ni quenda-ni quíji ún ña. Te ni ndocuñiñi ña, te ni sáha ña jeē ní cayeji de jíin yá.

Jeē ní nasávāha ya cuehē ñayuu
(Mr. 1.32-34; Lc. 4.40-41)

¹⁶ Te jeē ní cuaa ni quecoo ñayuu jíin cuéhē ñayuu jeē ñūhun tachí ini i. Te ni quenehen ya tachí un cuángoo jíin jnūhun cáhán-ni ya. Te suni ni nasávāha ya tãca ñayuu cácuñu. ¹⁷ Te súcuan ni cuu návāha cundaā jnūhun ni cahān Isaías, tēe ni nacani jnūhun Yaā Dios jenahán: Máá yá ni tejiyo ndinuū cuehyi cándoho yó, achí Isaías.

Siquiñayuu jeē cácuñi i condiquin i ya
(Lc. 9.57-62)

¹⁸ Te ni jito Jesús jeē ní ndicó ndúu cuehē ñayuu yā. Te ni cahān yā jíin tēe cácuáha jíin yá jeē na yáha de jíin yá inga lado mar. ¹⁹ Te ñin tēe stéén tutu ley Yaā Dios, ni quee de nuū yā, te ni cahān de:

Maestro, condiquin na níhín quíhín yō ndé-ni cúu-ni nuū quihín ní, achí de.

²⁰ Te ni cahān Jesús jíin de:

Tãca ñúcuii, iyó yāu cava cáñuhun ti. Te suni saa, iyó tãcā tī. Te ruhū, Yaā ní nduu tēe, tuú nuū cusú rī, achí yá.

²¹ Te inga tēe ni cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xihna gā. Yūcuán na te condiquin na níhín, achí de.

²² Te ni cahān Jesús jíin de:

Condiquin ruhū na quíhín yō. Te stóo tãca ndíyi na chíndūji jnāhan ndíyi, chi ndíyi cácuu ñayuu tu cácandíje. Achí yá.

Jeē ní jecuñiñi tachí níhin jíin mar ni sáha ya

(Mr. 4.35-41; Lc. 8.22-25)

²³ Yūcuán na te ni quívi Jesús ini barco, te tēe cácuáha jíin yá ni quívicoo de cuahān de jíin yá. ²⁴ Te nuū mar ni jequihí ñin tachí níhin, te ni stónnda ndute mar, ni quívi ini barco un. Te Jesús chi quíxi yā. ²⁵ Te tēe cácuáha jíin yá ni castónnda de ya, te ni cacahān de:

Jnama ní yóhó, chi je quée yó chíji ndute, achí de.

²⁶ Te ni cahān yā jíin de:

¿Naun cáyūhú ndasí ró? Te tu cácandíje níhin ró jéē cácu ró sáha ri, achí yá.

Yūcuán na te ni ndocuñiñi yā, te ni cahān yā nuū tachí níhin un jíin núu mar. Te ni cuu nayúú í-ni. ²⁷ Te ni canaa ni de jíināhan de, te ni cacahān de:

¿Ndé ñin ga cúu tēe yáha, jéē ndé tachí níhin jíin mar cájetáhú jéē cahán de? achí de.

Tēe Gadara jeē cándoho tachí

(Mr. 5.1-20; Lc. 8.26-39)

²⁸ Te ni jinū yā inga lado mar, máá región ñayuu Gadara. Te uū tēe ni

quendacoo de nde nuū yíndūji ndīyi, ni quijnahan de ya. Te cáñuhun tachī ini de, te siquī jeē yóhyo xeēn tachī ún, te ni ñin ñayuu tu cúu yāha i ichi yúcuan. ²⁹ Te ni cacana cóhó de ni casáha tachī:

¿Naun vēji ní núu ná, Jesús Sēhe Yaā Dios? ¿A véji ní yāha jeē stóho ní sáña ndé ná tu quee maá quívī? áchí.

³⁰ Te nde jicá jecu cáhīn cuehē quinī cájitu tī. ³¹ Te tachī jeē cáñuhun ini tēe un ní cacahān ndahú jíin yá:

Núu quenehen ní sáña, te cuāha ni jnūhun na quívīcoo ná ini quinī cáhīn yūcuán, áchí.

³² Te ni cahān yā jíin:

Cuángoo núu súcuan.

Te ni quendacoo tachī ún ini tēe ún, te ni quívīcoo ini quinī. Te quinī un ní cajinu tī ni caningava tī ñin yucáva, te ni ndaquīhī tī ndute mar, ni cajihī tī.

³³ Te tēe cándito tī ni cajinu de cuangoo de jeē ní cayūhú de. Te ni najinūcoo de ñuu. Te ni cacastūhún de tēcá jniñu yúcuan, jíin ndese ni cuu jeē ní quendacoo tachī ini ndíndúú tēe ún. ³⁴ Yūcuán na te ndívī ñayuu ñuu un, ní quendacoo i cuacondēhé i Jesús. Te ná ni jinūcoo i nuū íne ya, te ni cacahān ndahú i jíin yá jeē na quēnda ya región yúcuan quíhīn yā.

Jeē ní nasávāha ya ñin tēe ndóho cuehyī ní íjin
(Mr. 2.1-12; Lc. 5.17-26)

9

¹ Yūcuán na te ni ndīvi Jesús ini barco. Te ni nayāha ya cuahān yā inga lado mar, te ni najinū yā ñuu maá yá. ² Te ni caquindeca ñayuu ñin tēe ndóho cuehyī ní íjin, cátú de nuū ñin camilla. Te ni jini Jesús jeē cácdíje i jeē cúu nasávāha ya tēe ní íjin ún. Te ni cahān yā jíin de:

Na ndúndeyí ní rō séhē, chi je íne cáhnu ní rī nuū tāca cuéchi ró, áchí yá.

³ Yūcuán na te jecu tēe cástéén tutu ley Yaā Dios, ni cajeni ni de siquī yā: Jeē cahán tēe yāha súcuan, chi cáhán de jnūhun ndevāha jeē quití ní Yaā

Dios. ⁴ Te ni jini Jesús jeē súcuan cájeni ni de, te ni cahān yā jíin de:

¿Naun cájeni ní rō jeē cahán ndevāha ri? ⁵ Jeē uú jnūhun yāha, ¿ndé ñin yí gá cáa? ¿A jēē cahán rī jíin tēe cúhú: Je íne cáhnu ní rī nuū tāca cuéchi ró? ¿Chí yí gá jeē cahān rī: Ndocuñī te caca ró, chí je ni nduvāha ró, achi rī? ⁶ Te vijna te na stéén rī jeē maá rí, Yaā ní nduu tēe, ndíso jniñu ri ini ñayīvi yāha jēē cóne cáhnu ní rī nuū cuéchi.

Yūcuán na te ni cahān yā jíin tēe ní íjin ún:

Ndocuñī te naquihin ró camilla rō te quinhun rō vehe ró, áchí yá jíin de.

⁷ Yūcuán na te ni ndocuñī-ni tēe ún, te cuanhun de vehe de. ⁸ Te ná ni cajito ñayuu un jēē súcuan ní sáha ya, te ni cayūhú i. Te ni cacahān i jeē yóhyo vāha Yaā cúu Yaā Dios jeē súcuan ní jēhe ya poder nuū ñin tēe jeē cúu nasávāha de ñayuu, achí i cájito i Jesús.

Jeē ní cana ya Mateo

(Mr. 2.13-17; Lc. 5.27-32)

⁹ Te ni quenda Jesús yūcuán cuahān yā. Te ni jito ya nuū ñin tēe nání Mateo, néne de nuū cutútú xúhun renta. Te ni cahān yā jíin de:

Condiquīn ruhū na quíhīn yō.

Te ni ndocuñī de, te cuahān de jíin yá.

¹⁰ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cása ha cuéchi, suni cáyúcú de cáyeji de staā jíin Jesús jíin tēe cáscuáha jíin yá. ¹¹ Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe cása ha cuéchi? áchí de.

¹² Te ni jini Jesús, te ni cahān yatá yá jíin de:

Ñayuu cáhīyo vāha, tu jíini ñúhún i tēe tájná, chí ñayuu cácu hū cúu jeē jíini ñúhún. ¹³ Cuahán jíjnahan ró núu súcuan, te nacani ní rō na vé cúu jeē cahán jnūhun yāha jēē yosó núu tútu i: Cúni rī jeē na cúndahú ní rō jnahan ró, nasūu jēē socó rō quití nuū rī, achí Yaā

Dios nde jenahán. Te ruhū nasūu jéē véji ri cana ri ñayuu tú cuēchi, jeē cúu i nájñūhun ñayuu cáhīyo vāha, chi sa suhva véji ri cana ri ñayuu iyó cuéchi, jeē na nácani ni i te stóo i cuēchi i. Achí yá.

Jeē ní cacajñūhún de ya síquī jeē cóndite ni

(Mr. 2.18-22; Lc. 5.33-39)

¹⁴Yūcuán na te tēe cáscuáha jíin Juan tēe scuándute, ni quecoo de nuū Jesús. Te ni cacahān de jíin yá:

Sāña jíin tēe grupo fariseo, tijni jínu cáhīyo ndite ni na núu Yaā Dios. Te tēe cáscuáha jíin máá ní, ¿naun tu cása ha de súcuan?

¹⁵Te ni cahān Jesús jíin de:

¿A cuu condite ni de níní jéē iyó rí jíin de? ¿A cuu cucuíhyá ni ñayuu cáhīin vico nándāha, te núu níní néne tēe nándāha? Te quee quivī jeē cújiyo tēe nándāha, te quivī ún chi condite ni i.

¹⁶Te ni cahān yā uū jñūhun yátá síquī jeē tu quíjnāhan jñūhun jeé jéē steén yā jíin táca jñūhun jenahán. Achí yá:

Ni ñin tu náchuhun ñin pedazo sahma jéé núu ñin sahma túhú. Chi núu súcuan te ndiyi pedazo jeé un, te tahndē gā jeē tuhú un, te nducáhnuga nuū catáhdé un. ¹⁷Te suni tu cáchuhun vino jeé ini ññi túhú. Chi núu súcuan te ndatā ññi ún, te naa vino jíin ññi. Chi cánuú jéē chúhun i vino jeé ini ññi jéé, te súcuan te quéndōo vāha ndindúú. Achí yá.

Jñūhun sēhe síhí Jairo jíin ñahan ní quehé yusáhmayā

(Mr. 5.21-43; Lc. 8.40-56)

¹⁸Te níní cáhān Jesús táca jñūhun yáha, te ñin tēe cújéhnū nuū ñáyuu hebreo, ni quee de nuū yā. Te ni jecuíñi yití de nuū yā, te ni cahān de:

Sēhe síhí ná sá ní jihī i. Te núu na quíhín yō soó ní ndaha ní síquī i, te natecu i. Achí de.

¹⁹Te ni ndocuíñi Jesús, te cuahān yā jíin de, te suni cuango tēe cáscuáha jíin yá. ²⁰Te mēhñu ñáyuu cuango jíin yá ni quee ñin ñahan, te je ni cuu

uxī uū cuiyā ndóho ña cuehyī niñi. Te ni quee ña ichi yátá yā, te ni quehé ña yusáhmayā. ²¹Chi ni jeni ni ña: Vēsú maá sahmayā na níhín rī quehé rí, te nduvāha ri, jéni ni ña. ²²Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje ró jéē cuu nasávāha ri rohó, te jeé yúcuan ní nduvāha ró, achí yá.

Te ni nduvāha ña máá hora un.

²³Te ná ni jinū Jesús vehe tēe cújéhnū ún, te ni jito ya nuū tēe cácuu músico jeē quíchindūji de i, jíin núu ñáyuu cuehē, cása vā i. ²⁴Te ni cahān yā jíin i:

Cujiyo jíjnāhan ró, chi sūchi síhí yáha, tu ní jihí i chi quíxí-ni i, achí yá.

Te ni cajecū catá i jeē ni cáhān yā.

²⁵Te ni quenehen ya ñayuu cuehē ún, te ni quivī ya ini vehe. Te ni jñi ya ndaha sūchi síhí ní jihī ún, te ni ndocuíñi-ni i. ²⁶Te ní región yúcuan ní jitē núu jñūhun jñiñu jéhnū ní sáha ya ún.

Jeē ní nasávāha ya uū tēe cuáá

²⁷Te ni quenda Jesús yúcuan cuáhān yā. Te uū tēe cuáá cuángoo de yatā yā, cácana jee de:

Máá ní jeé cúu ní Sēhe yucūn David, cundáhú ni ní sáña víi, achí de.

²⁸Te ná ni jinū yā vehe, te ni jinūcoo tēe cuáá un núu yā. Te ni cahān yā jíin de:

¿A cá candíje ró jéē cúu nanune ri tinūu ró? achí yá.

Te ni cacahān de:

Cá candíje ná, achí de.

²⁹Yūcuán na te ni tee ya ndaha ya tinūú de, te ni cahān yā:

Na sáha ri nájñūhun cá candíje ró, achí yá.

³⁰Te ni cananune-ni tinūú de. Te Jesús ni cahān níhin ya jíin de:

Ma cáchi cuiñi rō nuū ni ñin, achí yá.

³¹Te máá de chi ni quendacoo de, te ni cajete-ni de jñūhun ní región yúcuan jéē súcuan ní sáha ya jíin de.

Jeē ní nasávāha ya ñin tēe ñíhín

³²Te nuū ní quendacoo tēe un cuángoo de, te ni quecoo ñayuu jíin

ɨn tēe ñihín, jeē ñuhun tachī ini de. ³³Te ni quenehen ya tachī un cuáhān. Te tēe ñihín un ní nacañān de. Te ni canaa ni ñayuu ni cajito i, te ni cacahān i:

Ná tu cuni cuiti yō ni ɨn jniñu súcuan ini ñuu Israel, achí i.

³⁴Te tēe grupo fariseo chi ni cacahān de:

Tēe yáha chi quenehen de tachī jíin fuerza maá jexeén jeē cujéñnu nuū tachī, achí de.

Jeē cundáhu ni yā ñayuu cuehē

³⁵Te ni jica cuu Jesús taca ñuu jíin rancho, te ni steén yā jñuhun ini taca vehe i sinagoga. Te ni nacani ya jñuhun vāha ndese ndácu Yaā Dios jniñu. Te ni nasávāha ya ñayuu cácuñu na-ni cuehyī cándoho i. ³⁶Te cundáhu ni yā jíto ya nuū ñayuu cuehē ún. Chi cándoho i te cácuñihyá ni i, chi cácuu i nájnūhun lanchi jeē tú jitoño tī, chi tu ndíquin i Yaā cúu Jitoño i. ³⁷Yūcuán na te ni cahān yā jíin tēe cáscuáha jíin yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. ³⁸Núu súcuan te cacān tahu rō nuū maá jítoño rō Yaā Dios jeē na táji yá cuehē tēe na quíngoo de cahnde de trigo, cúu jeē nacani de jñuhun ya nuū ñayuu. Achí yá.

Jeē ní nacāji ya uxī uū tēe apóstol (Mr 3.13-19; Lc. 6.12-16)

10

¹Yūcuán na te ni cana ya uxī uū tēe jeē scuáha de jíin yá. Te ni jēhe ya poder nuū de jeē quenehen de tachī ini ñayuu, jíin jēe nasávāha de ñayuu cácuñu taca ndinuū cuehyī.

²Te yāha cúu síhvī ndihúxí uū tēe apóstol un: Tēe ɨn cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan. ³Yūcuán na te Felipe, Bartolomé, Tomás, Mateo tēe ni stútú xuhun renta, Jacobo sēhe Alfeo, jíin Lebeo jeē suni nání Tadeo, ⁴jíin Simón tēe grupo cananista, jíin Judas Iscariote, tēe jeē ní nastúu de ya.

Jeē ní táji yá ndihúxí uū de quinacani de jñuhun

(Mr 6.7-13; Lc. 9.1-6)

⁵Te ni táji Jesús ndihúxí uū tēe yáha jeē quíngoo de. Te ni ndacu ya jniñu nuū de ndese sáha de:

Ma quíngoo rō núu ñayuu jeē násūu ñayuu hebreo cácuu i, ni ma quívicoo rō táca ñuu ñayuu Samaria. ⁶Chi nuū maá-ni ñayuu nación yō Israel quíngoo rō, chi cácuu i nájnūhun lanchi jeē ní sana. ⁷Te jeē quíngoo rō te suhva nacani rō jñuhun: Je ni cuyajni Yaā ndeé andiví jeē ndacu ya jniñu nuū rō, achi rō. ⁸Te nasávāha rō ñayuu cándoho cuehyī stehyú jíin ñayuu cándoho taca gá cuehyī, te nastécu rō ndīyī te quenehen rō táchī ini ñayuu. Te súcuan-ni ni jēhe ri poder nuū rō jeē sáha rō, te suni súcuan-ni sáha rō jíin i.

⁹Te ma cóndiso rō xuhun oro, ni xuhun plata, ni centavo cuechí. ¹⁰Ni ma cóndiso rō ñunu stáa caji rō ichi, ni inga camisa, ni ndijēn, ni vara. Chi siquī jniñu jeē nacani rō jñuhun nuū ñayuu, te cánuú coto i rōhó.

¹¹Te na-ni ñuu chí rancho núu ni jinūcoo rō, te yūcuán nducú rō ɨn ñayuu vāha, te coyūcu rō vehe i nde quíngoo tucu rō. ¹²Te jeē quívī rō vehe ñayuu ún, te cahān rō jeē na quíji jñuhun ndeyí jñuhun siñ ní nuū i. ¹³Te núu ñayuu vāha cácuu i, te jñuhun ndeyí ní cahān rō quendōo siquī i. Te núu násūu ñayuu vāha cácuu i, te jñuhun ndeyí ní cahān rō ma quendōo siquī i. ¹⁴Te núu iyó ñayuu jeē tu cájetáhu i rōhó, ni tu cúní i cuni nahín i jñuhun cahān rō, yūcuán na te quendacoo rō vehe un chí ñuu ún, te scóyo rō tícachā jehē rō, te súcuan steén rō jeē iyó cuéchi i jeē tu ní cájetáhu i. ¹⁵Jendaá cahān rī jíin rō jeē quívī juicio te xeēn gā coo castigo siquī ñuu casáha súcuan vēsú siquī ñuu Sodoma jíin ñuu Gomorra nuū ní casáha ndasí ñayuu cuéchi.

Jeē coto xeēn ñayuu de jíināhan de

¹⁶Cuni sōho rō, chi táji rí rohó quíngoo rō nájnūhun lanchi mēñu

yíhī. Núu súcuan te coo listo rō nájñuhun coō, te coo vītá ni rō nájñuhun paloma. ¹⁷ Te condito ró máá ró nuū ñáyuu, chi quee quiví jeē quíndeca i rōhó núu tohó, te caní i rōhó ini tǎcá vehe ñi sinagoga. ¹⁸ Te suni nde nuū tǎcá gobernador jíin rey quíndeca i rōhó jéē síquí ruhū. Te súcuan te nune ichi jeē nacani ndaā rō jñuhun ri nuū de jíin núu ñáyuu tǎcá nación jeē tu jíin jñuhun Yaā Dios. ¹⁹ Te núu ni jendeca i rōhó núu tǎca tée ún, ma nǎcani ndasí ni rō ndese cahān rō. Chi máá hora un te máá yá steén nuū rō ndese cahān rō. ²⁰ Chi nasūu máá ró cúu jeē cahán, chi Espíritu maá Tátá rō cúu jeē cahán jíin yuhu ró.

²¹ Te sava ñayuu tu cáccandíje, nastúu i ñani i jeē na cúu. Te tátá nastúu sēhe. Te sēhe ndonda síquí tatá jíin náná jeē na cúu. ²² Te ndihí ñayuu quití ni i nuū rō jeē síquí ruhū. Te ñayuu jeē cuiñi ñihin nde jeē jíinu jñúndóho, ñayuu ún chi cācu ánuá i. ²³ Te núu cájito xeēn i rōhó ñi ñuu, te cunu ró quíhīn rō inga ñuu. Chi jendaá cahán rī jíin ró jeē ma ndécāva ró caca cuu ró ndihí nación yō Israel te ndiji-ni máá rí, Yaā ní nduu tēe.

²⁴ Ñin tēe scuáha, tu cújéhnu de nuū maestro de. Ni tēe cúu mozo, tu cújéhnu de nuū patrón de. ²⁵ Tēe scuáha chi nájñuhun ndóho maestro de suni súcuan ndoho nahín máá de, te tēe cúu mozo suni ndoho de nájñuhun ndóho patrón de. Núu súcuan te núu ruhū cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

Jeē ní cachi yā ndé ñi cúu jeē yūhu yó
(Lc. 12.2-9)

²⁶ Núu súcuan te ma yūhu ró coto ró ñáyuu. Chi tǎca jñuhun cácahān sǎhí i ma quéndōo sǎhí cuiñi, chi ndihí natūu ndijin, te cuni ñayuu. ²⁷ Jñuhun ní cahān rī jíin ró jeē tu ní jíin ñáyuu, na nǎcastūhun cájí ró nuū i. Te jñuhun ní nacani sǎhi rí nuū rō, na nǎcani jee ró yátá tǎcá vehe. ²⁸ Te ma yūhu ró coto ró ñáyuu cahni yíqui cúñu rō, chi ma cúu cahni i ánuá rō. Chi sa suhva yūhu

ró jéē ma stívi ró núu Yaā Dios, chi cuu snáhnú ndetū yā rohó jéē quívi ánuá rō jíin yíqui cúñu rō infierno.

²⁹ Te tǎcá saa chi tú yahu ndéé tī, chi nde uū tī jeē ñi centavo lulí. Te ni ñi tī tu nínga nuū ñuhun te núu tu jéhe Tátá rō jñuhun, chi ndíto ya tī. ³⁰ Te nagā ni cuu rōhó jíinahan ró, chi nde ndihí ixi xíní rō je ni cahu ya. ³¹ Núu súcuan te ma yūhu ró jíinahan ró, chi cánuu ndasí gá rō nuū yā vésú cuehē tǎcá saa.

Ñayuu jejnúhún Jesucristo nuū inga ñayuu

(Lc. 12.8-9)

³² Te tǎca ñáyuu jeē cuajnúhún rúhū nuū inga ñayuu, suni súcuan cuajnúhún rí i nuū Tátá rī, Yaā ndeé andiví. ³³ Te tǎca ñáyuu jeē ma cuajnúhún rúhū nuū inga ñayuu, suni súcuan ma cuajnúhún rí i nuū Tátá rī, Yaā ndeé andiví.

Jeē síquí Jesús te cusñi ini ñayuu

(Lc. 12.51-53; 14.26-27)

³⁴ Ma cáni ni rō jíinahan ró jéē véji ri jeē cóyūcu mǎnī ñayuu ñayiví. Tú véji ri jeē cóyūcu mǎnī ñayuu, chi sa suhva cuajnáhan i jeē síquí ruhū. ³⁵ Chi jeē síquí ruhū te cusñi ini sēhe yí jíin tátá, te sēhe síhí jíin náná, te sēhe jēnu jíin náná chísó. ³⁶ Chi tǎca ñáyuu candíje ruhū, chi jnáhan vehe i cúu jeē quití ni nuū i.

³⁷ Te núu ndé ñi ñayuu maní gā i jíin tátá i chí jíin náná i vésú jíin rúhū, nasūu ñáyuu vāha cúu i jeē cóndiquín i ruhū. Te núu ndé ñi ñayuu maní gā i jíin séhe yí i chí jíin séhe síhí i vésú jíin rúhū, te suni nasūu ñáyuu vāha cúu i jeē cóndiquín i ruhū. ³⁸ Te na-ni ñayuu núu tu jéhe i jñuhun ndoho i jñúndóho vésú nde cuu i jeē síquí jeē cóndiquín i ruhū, nasūu ñáyuu vāha cúu i jeē cóndiquín i ruhū. ³⁹ Te núu ndé ñáyuu cúní i cācu i nuū jñúndóho quiñi nuū i jeē síquí ruhū, núu súcuan te jnahñú ndetū i ní cáni. Te núu ndé ñi ñayuu vésú na cúu i jeē síquí ruhū, te cotecu i ní cáni.

Jeē iyó táhū yō nuū Yaā Dios

(Mr. 9.41)

40 "Te ñayuu cuatáhú róhó jijnáhan ró, núu súcuan te ruhū cájetáhú i. Te ñayuu cájetáhú ruhū, cájetáhú i Yaā ní tají ruhū vēji ri. 41 Núu na-ni ñayuu cuatáhú i ñn tēe nácani jnūhun Yaā Dios, siquī jeē jíca de jniñu Yaā Dios, núu súcuan te inuú-ni coo tahū de nuū Yaā Dios jíin tēe nácani jnūhun Yaā Dios. Te núu na-ni ñayuu cuatáhú i ñn tēe ndaā, siquī jeē tēe ndaā cúu de, núu súcuan te inuú-ni coo tahū de nuū Yaā Dios jíin tēe ndaā. 42 Te núu ndé ñáyuu cuāha i vēsú ñn ñajin ndute míjin coho ñn sūchi yáha, siquī jeē cúu i sūchi cándíje ruhū, ndaā ndije cúu jeē nihín i tahū i. Achí yá.

*Jeē ní tají Juan uū tēe nuū yā
(Lc. 7.18-35)*

11

1 Te ná ni jīnu ni ndacu Jesús jniñu nuū ndihúxí uū tēe cáscuáha jíin yá, te ni quenda ya yūcuan cuáhān yā jeē steén yā te nacani ya jnūhun tācá ñnu región yūcuán.

2 Te íne Juan vecāa. Te ni nihīn de jnūhun tācá jniñu sáha Cristo. Te ni tají de uū tēe cáscuáha jíin de, 3 cuacajñuhún de ya:

¿A máá ní cúu Cristo jeē achí tutu jeē quiji, chí condetu yó inga tēe quiji? áchí de.

4 Te ni cahān yā jíin de:

Cuángoo te castūhun ró nuū Juan tācá jniñu cájito ró jíin jnūhun cájini ró. 5 Te cachi ró nuū de jeē ñáyuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú jéē jnama Yaā Dios i. 6 Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi ró nuū Juan. Achí yá jíin de.

7 Te náa cuanuhun ndindúú tēe ún, te ni quejéé Jesús cahān yā jnūhun Juan jíin ñáyuu:

¿Na vé ni jécondēhe ró jijnáhan ró nde nuū ñúhun téhé? ¿A ñn tēe jéni ñn jéni uū ni, nájnūhun ite jeē cánda sáha tachī? 8 Te núu tuú, ¿te na

vé ni jécondēhe ró núu súcuan? ¿A ñn tēe cúni cujéhu jeē ñúhun sahma lúu? Tuú chi cájini ró jeē tēe cáñuhun sahma lúu, máni ini vehe rey cáyūcú de. 9 ¿Te na vé ni jécondēhe ró núu súcuan? ¿A ñn tēe nácani jnūhun Yaā Dios? Cáhān rī jíin ró jeē suu ni jécondēhe ró, te cújéhu ga Juan yáha vēsú tāca gá tēe ni canacani jnūhun Yaā Dios. 10 Chi jnūhun Juan cúu jeē ni cáhān Yaā Dios jeē yosó núu tútu i: Tají rí tēe nacani jnūhun ri cosnūú de ichi núu Cristo,

návāha coo tūhva ñayuu jeē jinú yā. Achí Yaā Dios, achí tutu. 11 Te jendaá cahān rī jíin ró jeē ini ñayīví yáha cújéhu ga Juan tēe scuándute vēsú tāca gá tēe jeē ni íyo ini ñayīví. Te vēsú súcuan te tāca tēe núu ga ini ñnu nuū ndácu Yaā andiví jniñu, cújéhu ga de vēsú Juan.

12 "Te nde quiví ní quee Juan tēe scuándute, te nde vijna, chi cánducú ndéyí ñáyuu quivícoo i ndaha Yaā andiví jéē ndácu ya jniñu nuū i. Te nde ñayuu xeēn cánducú ndéyí i siquī. 13 Chi nde ná tu quiji Juan, te ni íyo máá ley Moisés, te suni ni íyo tāca tēe ni canacani jnūhun Yaā Dios. Te ni cacastūhún de ndese coo jeē ndacu Yaā Dios jniñu. 14 Te ni cacahān de jeē ndíji Elías. Te núu cáconi ró cuatáhú ró jnūhun, te jíin ró jeē máá Juan cúu tēe jeē ní cachi tutu jeē quiji, chí cúu de nájnūhun Elías. 15 Tāca róhó jéē jíin sōho, na chúsóhó ró.

16 'Yáhá cachi rī ñn jnūhun yátá návāha na cúni ró ndese cúu ñayuu tiempo vijna. Cúu i nájnūhun sūchi lúlí cáhīn nuū yáhu cácasíquí i. Te cácana ndee i xinī jnāhan i: 17 Ni cativí rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū ró, achí i. Te nájnūhun cándāa sūchi lúlí un jéē tu ní nújnahan ni i ni ñn, súcuan cándāa ró. 18 Chi ni quiji Juan te cuehē jínu ni íyo ndite ni de, tu ní yéji de ni tu ní jíhi de. Te tu ní cánujnahan ni ró, chí ni cacahān ró jeē ñúhun tachī ini de. 19 Yūcuán na te ni quee maá rí, Yaā ní nduu tēe, te yéji rī jíhi ri, te tu cánujnahan ni ró, te chísóo

jnúhun ró cácahān rō jeē máni máá jéē yéji rī jíhi ri vino. Te quíjnáhan ri jíin téē cástútú xúhun renta jíin táca gá tēē cása ha cuēchi, áchí ró. Te núu cundíchi ìn tēē jíin jnúhun Yaā Dios, te jíin jniñu sáha de te nátūu jeē téē ndíchi cúu de. Achí yá.

Jeē ní cuxeēn yā nuū sava ñuu nñhi ni
(Lc. 10.13-15)

²⁰ Yūcuán na te ni quejéé yá cuxeēn yā nuū táca ñuu nuū ni sáha ya cuehē jniñu jéhnū, chí tu ní cánacani ni i jeē stóo i cuēchi i. Te ni cahān yā:

²¹ Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chí núu ini ñuu Tiro jíin ñuu Sidón ni sáha ri jniñu jéhnū jeē ni sáha ri ini ñuu maá ró, te yachī nacani ni ñáyuu ñuu un jéē stóo i cuēchi i núú. Te sáha i seña jeē steén jeē nácani ni i síquī cuéchi i, chí cuhun i sahma jnúú te chuhun i yaā xīnī i núú. ²² Núu súcuan te cáhān rī jíin ró jeē quivī coo juicio te xeēn gā coo castigo síquī rō jíjnáhan ró vēsú jeē ni íyo síquī ñuu Tiro jíin ñuu Sidón. ²³ Te rōhó ñáyuu ñuu Capernaum, ¿á cájeni ni rō jeē cujéhnū ró nájnūhun ìn jeē cáa cuahān ichi ándiví? Tuú chí sa nanuu ró ndé lugar nuū cáyūcu ánuá ndiyí. Chí núu ini ñuu Sodoma ni sáha ri jniñu jéhnū jeē ni sáha ri nuū maá ró, te coo ñuu yúcuan ndé vijna núú. ²⁴ Núu súcuan te cáhān rī jíin ró jeē quivī coo juicio te xeēn gā coo castigo síquī rō vēsú jeē ni íyo síquī ñáyuu ñuu Sodoma. Achí yá.

Nehen nuū rī ndetātu ró, achí yá
(Lc. 10.21-22)

²⁵ Te suni quivī un ní cahān Jesús:

Na cútahū na núu ni Tātā, Jitoho andiví jíin ñáyiví. Chí ni jesí ní táca jnúhun ndíchi ní, jeē ma cúni ñáyuu ndíchi jíin ñáyuu tūhva cuenta ñáyiví yáha. Te ni steén ni núu ñáyuu cácuu nájnūhun sūchi lúlí. ²⁶ Chí súcuan ni nujnahan ni ni Tātā, achí yá.

²⁷ Te ni cahān gā yā:

Ndivii ni jēhe Tātā rī nuū rī. Te tu cájini ñáyuu ndé ìn cúu ruhū, Sēhe Yaā

Dios, chí máá-ni Tātā rī cúu jeē jiní yā ruhū. Ni tu cájini ñáyuu ndese Yaā cúu máá Tātā, chí máá-ni Sēhe cúu jeē jiní. Te íyo ñáyuu jeē cuní maá Sēhe steén yā nuū i ndese Yaā cúu Tātā yā, te máá i suni cuni i. ²⁸ Táca ró jéē ni cuíta ró jíin táca jniñu jíin ley jeē yí sáha jíin ró, nehen quivīcoo ró ndaha ri, te ndetātu ró sáha ri. ²⁹ Quivī ró núu jniñu ndácu máá rí, te scuáha ró coo ró nájnūhun íyo máá rí. Chí vītá ni rī te suchí ni rī. Te súcuan te ndetātu ró jíin ánuá rō sáha ri. ³⁰ Chí tú yí jéē cuandetū rō nuū rī, ni tú yí jéē squícu ró jniñu ndácu ri. Achí yá.

Jeē ní cataxín de yoco trigo quivī ndetátú
(Mr. 2.23-28; Lc. 6.1-5)

12

¹ Te ìn quivī ndetātu ní yáha Jesús cuahān yā nuū cáa trigo. Te tēē cáscuáha jíin yá, cájii de sōco. Te ni quejéé de cátaxín de yoco trigo cáyeji de. ² Te ni cajito tēē grupo fariseo, te ni cacahān de jíin yá:

Condēhé, chí tēē cáscuáha jíin ró casáha de jniñu jeē tu íyo váha sáha yó quivī ndetátú, áchí ley Moisés.

³ Te ni cahān maá yá jíin de:

¿A tu ní cácahu ró tutu ndese ni sáha David, ìn quivī jeē ni jíi de sōco jíin téē cáhīin jíin de? ⁴ Te ni quivī de ini vehe Yaā Dios. Te ni yeji de pan ìi jeē yosó ndijin nuū Yaā Dios. Te tú na ley jeē cáji de, ni tēē cáhīin jíin de, chí máá-ni sutū cuu caji. Te vēsú súcuan te tú na cuēchi ní íyo síquī de. ⁵ ¿Te á tu ní cácahu ró tutu ley Moisés, ndese cásjniñu sutū ini templo, vēsú quivī ndetātu cúu? Te tú na cuēchi íyo síquī de, vēsú quivī ndetātu cásjniñu de jniñu jeē cácuu de sutū. ⁶ Te cáhān rī jíin ró jeē maá rí jeē íyo yáha, cújéhnū ga rī vēsú templo. ⁷ Te tu cájecūhun ni rō jíjnáhan ró jnúhun yáha jeē yosó núu tútu ìi jeē ni cáhān Yaā Dios: Jeē cuní gā rī cúu jeē cundáhú ni rō jnáhan ró, vēsú jeē socó rō quiti nuū rī, achí yá. Te núu jeē ní cajecūhun ni rō jnúhun yáha, te ma cáhān rō súcuan síquī téē jeē tú na cuēchi núú. ⁸ Chí

ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quiṽi ndétátú, áchí yá.

Jeē ní nduvāha tēe ni ichī ndaha
(Mr. 3.1-6; Lc. 6.6-11)

⁹ Yūcuán na te cuahān Jesús, te ni quiṽi ya ini vehe iī sinagoga. ¹⁰ Te yūcuan íne ñn tēe ni ichī ñn ndaha de. Te cácu ni tēe grupo fariseo jeē nihīn de cuēchi siquī yā, te ni cacajñuhún de ya:

¿A íyó ley jeē cuu nasávāha yó ñayuu huhú quiṽi ndétátú? áchí de.

¹¹ Te ni cahān yā jíin de:

¿Ndé ñn róhó, núu névāha ró ñn lanchi, te núu ñnga ti ini ñn yaū quiṽi ndétátú, te á tu jéhén rō natava rō tī, chí naún? ¹² ¿Te á tu cánuú ndasí gá ñn tēe vésú ñn lanchi? Núu súcuan te vetū-ni sáha yó jniñu váha quiṽi ndétátú, áchí yá.

¹³ Yūcuán na te ni cahān yā jíin tēe ni ichī ndaha ún:

Scaá ndaha ró.

Te ni scaá de, te ni nduvāha-ni nájñuhun íyó inga. ¹⁴ Yūcuán na te ni quendacoo tēe grupo fariseo, te ni candajñuhún de siquī Jesús, ndese cahni de ya.

Jñuhun Jesús jeē ni cáhān Isaías nde jenhán

¹⁵ Te ni jini Jesús jeē súcuan cájeni ni de, te ni quenda ya yūcuan cuahān yā. Te cuehē ñayuu cándiquīn i ya. Te ni nasávāha ya ndihi ñayuu huhú. ¹⁶ Te ni ndacu ya jniñu nuū i jeē ma stéén i ya. ¹⁷ Te súcuan ni cuu návāha squícu jñuhun ni cahān Yaā Dios siquī Jesús, te ni nacani Isaías jñuhun ya un ndé jenhán:

¹⁸ Yāha cúu mozo rī jeē ní nacāji ri, te manī rī jíin yá, te cúsi ni rī jíin yá. Te cuāha rī Espíritu rī coo jíin yá. Te máá yá sándaā jniñu ñayuu tēcá nación.

¹⁹ Ma tejñáhan ya, ni ma cána jee ya, te ni ma cahán jee ya ichi jeē cúni ñayuu.

²⁰ Ma sáha xeēn yā jíin ñáyuu ni cunihin jñundóho siquī, ni ma snáā yā ñayuu jeē maá lulí-ni cácandíje.

Chi cujéhnú ya siquī ndihi, te ndaā ndacu ya jniñu.

²¹ Te ñayuu tēcá nación cocuhun ni i jeē jnáma ya i.

Achí Yaā Dios, achí Isaías nde jenhán.

Jeē ní cacahān de jeē jejniñu ya fuerza Satanás

(Mr. 3.19-30; Lc. 11.14-23; 12.10)

²² Yūcuán na te ni caquindeca i nuū yā ñn tēe cuáá ññhín, chí ññhun tachī ini de. Te ni nasávāha ya de. Te ni ndundijin tinúu de te ni nacahān de.

²³ Te ndihi ñayuu cuehē un ní canaa ni i cájito i, te ni cacahān i:

¿A tēe yáha cúu jeē ni cáhān Yaā Dios jeē cacu nuū yucūn David? áchí i.

²⁴ Te tēe grupo fariseo, ni cajini de jeē súcuan cacahān i. Te ni cacahān de:

Tēe yáha ma cúu quenehen de tachī núu jeē tu sáha de jíin fuerza Satanás jeē cujéhnú nuū tachí, áchí de.

²⁵ Te Jesús ni jini yā jeē súcuan cájeni ni de, te ni cahān yā jíin de:

Tēcá nación jeē casásñn máá te cájejnáhan máá, núu súcuan te snáā jeē iyó váha máá. Te núu ñn ñuu chí ñn vehe casásñn máá te cájejnáhan máá, te ma cúu ga coyūcu cáhnu. ²⁶ Te suni súcuan Satanás núu quenehen jnáhan tachī, núu súcuan te sásñn máá. ¿Te ndese cuiñi ñhin Satanás jeē ndácu jniñu núu súcuan? ²⁷ Chi cacahān rō jeē jíin fuerza Satanás quenehen ri tachī. Te núu súcuan cúu núu, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jijnáhan i cachi jeē ní castívi ndasí suhva ró ni cacahān rō jeē cáquenehen ri tachī jíin fuerza Satanás. ²⁸ Te tuú chí sa jíin Espíritu Yaā Dios cúu jeē quenehen ri tachī. Núu súcuan te je ndéé Yaā Dios mēhñu ró jeē ndácu ya jniñu.

²⁹ ¿Chi ndese cuu quiṽi ñn tēe ini vehe tēe ndacuī jeē quenehen de ndajniñu de? Chi cánuú jeē xihna gā cuhni de tēe ndacuī ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quenehen ri tachī.

³⁰ 'Te ñayuu tu íyó mánī jín rí, núu súcuan te jító uhū i ruhū. Te ñayuu tu nástútú jín rí, núu súcuan te sa jéte núu i ñayuu vējicoo nuū rī.

³¹ 'Jeē yúcuan cáhán rī jín ró: Iyó modo coo jñūhun cáhnu ni nuū tāca cuēchi cásáha ñayuu, jín nuū tāca jñūhun néé cácahān i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i. ³² Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayīvi yáha, ni ní tiempo quíji.

Jñūhun yujnu váha jín yujnu néé
(Lc. 6.43-45)

³³ 'Núu yujnu váha, te vāha ndehē, te núu yujnu néé, te cánéé ndehē. Chi jín ndéhē te jíní yō ndese yujnu cúu. Te suni súcuan ñayuu. ³⁴ Va sēhe coō cácuu ró, chi xeēn rō nájñūhun coō. ¿Ndese cuu cahān rō jñūhun vāha, chi ñayuu cásáha néé cácuu ró? Chi jniñu jeē jéni ni anuá ñayuu, máni yúcuan cáhán i. ³⁵ Tēe vāha cáhán de jñūhun vāha, chi íyó ndāā anuá de. Te tēe sáha néé cáhán de jñūhun néé, chi cánéé ánuá de. ³⁶ Te cáhán rī jín ró jeē tāca na-ni jñūhun cácahān ñayuu, nacuāha i cuenta jñūhun un quívi coo juicio. ³⁷ Chi jín jñūhun ni cahān rō sándaā yā siquī rō, núu jeē quéndōo ndaā rō chí jéé cóndee cuēchi siquī rō. Achí yá.

Jeē ní cajicān ñayuu tu cácañdije in jniñu jénu
(Mr. 8.12; Lc. 11.29-32)

³⁸ Yūcuán na te jecu tēe grupo fariseo jín tēe cástéén tutu ley Yaā Dios, ni cacahān de jín yá:

Maestro, cácu ni na jéé sáha ní in jniñu jénu jeē steén núu máá ní cúu Yaā ní tají Yaā Dios, achí de.

³⁹ Te ni cahān yā jín de:

Ñayuu yáha jeē casáha jniñu néé, tu cájetáhu cuiti i Yaā Dios. Te cajicān i in jniñu jénu jeē steén núu Yaā ní tají Yaā Dios cúu rī. Te tuá na inga jniñu jénu steén rī nuū i, chi máá-ni jniñu jénu nájñūhun ni cuu

jín Jonás, tēe ni nacani jñūhun Yaā Dios. ⁴⁰ Chi nájñūhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone rī chíji ñūhun unī nduú unī ñuú, te sáá te natecu rī. ⁴¹ Te tāca ñáyuu ñuu Nínive nuū ní nacani Jonás jñūhun, natecu i jín ñáyuu tiempo yáha, quívi juicio jeē sándaā yā cuēchi, te cahān i cuēchi siquī ñáyuu yáha. Chi máá i ni canacani ni i ni castóo i cuēchi i quívi ní nacani Jonás jñūhun nuū i. Te vijna chi cújénu ga ruhū Yaā íne yáhá vésú Jonás, te tu cácañdije ró rúhū. ⁴² Te reina jeē ní cújénu nación ichi sur, natecu ña jín ñáyuu tiempo yáha, quívi juicio jeē sándaā yā cuēchi, te cahān ña cuēchi siquī i. Chi nde jicá téyí ní quíji ña ni jini nahín ña jñūhun ndíchí ní cahān rey Salomón. Te vijna chí cújénu ga ruhū, Yaā íne yáhá vésú Salomón, te tu cácañdije ró rúhū.

Tachī jeē nastútú jnáhan ndívi ini ñayuu

(Lc. 11.24-26)

⁴³ 'Núu ni quenda in tachī ini in tēe tu cácañdije, te jica cuu nuū ñūhun téhé, ndúcú nuū ndétátú, te tu níhín, yūcuán na te jéni ni maá: ⁴⁴ Na quínūhun rī vehe nuū ní quenda rī. Te núu ni ndee tucu, te jító jeē tēe tu cácañdije ún, cúu de nájñūhun in vehe íyú te ni ndundoo. ⁴⁵ Yūcuán na te jéquihin uxā gā tachī neé gá vésú maá. Te quívi:coo ini tēe un jéé cóyūcu yúcuan. Núu súcuan te xeēn gā ndoho tēe un jéé sácañdijí vésú jeé xíhna ñúhún. Te suni súcuan ndoho ñayuu tiempo yáha jeē casáha néé. Achí yá.

Naná yā jín ñani yā

(Mr. 3.31-35; Lc. 8.19-21)

⁴⁶ Te níni súcuan cáhán yā jín ñáyuu ún, te ni quee naná yā jín táca ñani yā, ín ña nuū quéhe, te cúní ña cahān ña jín yá. ⁴⁷ Te ni cachi in tēe nuū yā:

Naná ni jín táca ñani ni cáhín nuū quéhe, te cácu ni cahān jín ní, achí de.

⁴⁸ Te ni cahān yā jín tēe ni cahān súcuan jín yá:

¿Ndé in cúu naná rī, te ndé in cácu ñani rī? Achí yá.

⁴⁹ Te ni steén ndaha yá nde nuū cáyūcu tée cáscuáha jíin yá. Te ni cahān yā:

Suni náná rī jíin ñani rī cácuu tāca jéē yáha. ⁵⁰ Chi tāca ñáyuu casquícu jniñu cúní maá Tátá rī, Yaā ndeé andiví, suu cácuu ñani rī, cuāha rī, náná rī. Achí yá.

Jnūhun yátá síquī tēe jéte trigo
(Mr. 4.1-9; Lc. 8.4-8)

13

¹ Te quiví un ní quenda Jesús vehe cuahān yā, te ni jinū yā ni cucōo ya yumar. ² Te ni cutútú cuéhē ndasí ñayuu nuū yā. Te ni quiví ya ini ñn barco, ni cucōo ya. Te tāca ñáyuu un cáyūcú i yumar. ³ Te jíin jnúhun yátá ni cahān yā cuehē jnūhun nuū i, te súcuan ni cahān yā:

Ñn tēe cate trigo, ni quenda de jeē cáte de. ⁴ Te ná ni quejéé de jéte de, te jecu trigo ni jité yuhíchi. Te ni quecoo saa, ni cayejí tī. ⁵ Te jecu gā trigo ni jité nuū ñúhun yuū, nuū tú cuehē ñuhun. Te yachī-ni ni cane, chi tu cóquin ñuhun. ⁶ Te nuū ní cane niāndii, te ni ichī-ni, te ni casun, chi tu ní níhín nuū quihín yoho. ⁷ Te jecu gā trigo ni jité nuū náne iñu. Te ni jehnu iñu ún, te ni jesi nuū. ⁸ Te jecu ni jité nuū ñúhun váha, te ni jēhe cuehē nunī. Sava ni jēhe ciento jeē ñn ñn, te sava ni jēhe unī xico, te sava ga ni jēhe ocō uxī. ⁹ Tāca rōhó jéē jíni sōho, na chúsóhó ró. Achí yá.

Najehē cahān yā máni jnūhun yátá
(Mr. 4.10-12; Lc. 8.9-10)

¹⁰ Yūcuán na te tēe cáscuáha jíin yá un ní quecoo de nde nuū yā, te ni cacajnúhún de ya:

¿Najehē cúu jeē máni jnūhun yátá cahān ni jíin ñáyuu? achí de.

¹¹ Te ni cahān yā jíin de:

Róhó jíināhan ró chi sáha ya jeē cájecūhun ni rō jnūhun ni yisāhi yáha, ndese quivícoo ñayuu ndaha Yaā andiví jeē ndacu ya jniñu nuū i. Te ñayuu yáha jéē tu cáscandíje, chi ma jécūhun ni i. ¹² Chi ñayuu je jécūhun ni, chi stéén gā yā nuū i, te víhyá gā

cuni i. Te ñayuu tu cándíje, sa suhva naa jecu jeē je jíin i ún. ¹³ Jeē yúcuan cáhán rī jnūhun yátá jíin i. Chi vésú cájito i, te quendōo i nájnūhun jeē tú na vé ni cájito i. Te vésú cájini sōho i, te ma jécūhun ni i, te quendōo i nájnūhun jeē tú na vé ni cájini i. ¹⁴ Ñayuu yáha chi squícu síquī i jnūhun ni cahān Yaā Dios jeē ní nacani Isaías, tēe ni nacani jnūhun nde jenahán:

Vésú cuni nahín ró, te ma jécūhun ni rō,

te vésú coto ró, te ma nácuni rō.

¹⁵ Chi ñayuu yáha yōhyo ni ndunīhni ni i,

te yōhyo uhū chusóhó i,

te nájnūhun cájesi i tinūú i,

návāha coo nájnūhun jeē tu cájito i,

ni tu cájini nahín i,

te ni ma jécūhun ni i,

ni ma násāma ini i quivícoo i nuū rī

jeē nasávāha rī anuá i nuū cuéchi i.

Achí Yaā Dios, achí tutu.

¹⁶ Te máá ró jíināhan ró, yōhyo ndetū rō, chi cájito ró jíin tinūú ró, te cájini nahín ró jíin sōho ró. ¹⁷ Chi jendaá cahān rī jíin ró jeē cuehē tēe ni canacani jnūhun Yaā Dios jíin cuéhē tēe ndaā, ni cacuni de coto de jeē cájito máá ró, te tu ní cájito de. Te suni ní cacuni de cuni sōho de jeē cájini sōho máá ró, te tu ní cájini de. Achí yá.

Jeē ní castūhun cájí yá jnūhun yátá tēe jéte trigo

(Mr. 4.13-20; Lc. 8.11-15)

¹⁸ Núu súcuan te cuni nahín jíināhan ró na vé cuni cahān jnūhun yátá tēe jéte trigo: Trigo un cúu jnūhun Yaā Dios. ¹⁹ Te ñayuu cájini sōho jnūhun ndese ndácu Yaā andiví jniñu, núu tu cájecūhun ni i te cácuu i nájnūhun trigo jeē ni jité yuhíchi. Yūcuán na te quíji jexeén te quénde-ni jnūhun ini anuá i.

²⁰ Te trigo jeē ni jité nuū ñúhun yuū cúu nájnūhun ñayuu cájini sōho jnūhun, te yachī-ni cájetáhú i te cácusí ni i jíin.

²¹ Te tu cúcutú jnúhun ún ini anuá i, te jecu-ni quiví cájetáhú i. Te núu ni quejéé jnúndóho, chí jíto xeēn ñayuu i síquī jnúhun ún, te quéjéé nácuni yátá ni i. ²² Te jeē ni jité nuū náne iñu cúu

ñayuu cájini nahín jnúhun, te cándihvī ni i síquī jeē iyó ini ñayīvī yáha, te cúní i cucúca i, te stáhú un i cujnéñu i jíin. Te ndihí jeē yáha jési nuū jnúhun ya, te tu ije i jíin jnúhun ya. ²³ Te trigo jeē ní jítē nuū ñúhun váha cúu nájnūhun ñayuu cájini nahín jnúhun, te cájecūhun ni i, te cáhije i jíin jnúhun ya. Te sava i cúu nájnūhun nunī jeē jéhe ciento jeē ñin ñin, te sava ga i jéhe unī xico, te sava ga i jéhe ocō uxī. Achí yá.

Jnúhun yátá síquī ite lasú

²⁴ Te ni cahān yā inga jnúhun yátá jíin de:

Jeē ndácu Yaā andiví jniñu cúu nájnūhun ñin tēe jeē ní jete de trigo váha nuū ñúhun de. ²⁵ Te iyó ñin tēe jító uhū de tēe chíí trigo. Te náa cáquixī tēe chíí trigo jíin táca jnáhan de, te ni jehēn ni jete ndiquin lású nuū trigo de, te cuahān. ²⁶ Te nuū ní cane trigo ún, te ni cane yoco i, te suni súcuan ni jehnu ite lasú un. ²⁷ Yūcuán na te ni jengoo mozo ni cacahān i jíin patrón i: ¿A násūu trigo váha ní jéte ní nuū ñúhun ní? ¿Te ndese cúu jeē ní canecoo ite lasú nuū? ²⁸ Te ni cahān de jíin i: ñin tēe jító uhū ruhū ni sáha jeē yáha. Te ni cacahān mozo un jíin de: ¿Núu súcuan te á cúní ni jéē na quíngoo ná te jnuhun ná? áchí i. ²⁹ Te ni cahān de: Tuú, chi núu jnuhun ró lású un te sanaa te jnuhun ró ndé jíin trigo. ³⁰ Váha ga na cuéhnu máá ndé quivī tahndé. Te quivī un cahān rī jíin tēe cahnde jeē xīhna gā ite lasú cahnde de, te chucú tūtú de návāha cahmu yó. Yūcuán na te trigo chi cahnde de ndiví ini yacā rī, achí de. Achí yá.

Jnúhun yátá síquī ndiquin mostaza (Mr. 4.30-32; Lc. 13.18-19)

³¹ Te suni ni cahān yā inga jnúhun yátá jéē steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájnūhun jéhnu ñin ndiquin mostaza jeē ní jequin ñin tēe nuū ñúhun de. ³² Te jendaá jeē ñin ndiquin lúlí gá cúu vésú táca gá ndiquin. Te núu ni jehnu, te cúu cáhnu ga vésú táca gá yucū, chi ndúu

nájnūhun ñin yujnu. Te quíjicoo saa, te cásáha tī tacā tī chíji ndaha ún. Achí yá.

Jnúhun yátá síquī levadura

(Lc. 13.20-21)

³³ Te inga jnúhun yátá ní cahān yā jíin de:

Jeē ndácu Yaā andiví jniñu nuū ñayuu cúu nájnūhun levadura jeē ní quihín ñin ñahan. Te ni saca ña jíin únī kilo harina, nde ni ndaa ndihí ñujen ni sáha. Achí yá.

Jeē máni jnúhun yátá cahán yā jíin i

(Mr. 4.33-34)

³⁴ Táca jnúhun yáha ní cahān Jesús jíin ñayuu cuehē ún. Te táca jéē ní steén yā, máni jnúhun yátá ní cahān yā jíin i. ³⁵ Súcuan ni sáha ya návāha squícu jnúhun ni cahān tēe ni nacani jnúhun Yaā Dios nde jenahán:

Cahān rī táca jnúhun yátá jíin ñayuu, te cachi rī táca jnúhun yísahí ndé quivī ní jecōo ñayīvī.

Achí tutu, áchí yá.

Jeē ní castūhun cájí yá jnúhun ite lasú

³⁶ Yūcuán na te ni nacuatáhu Jesús nuū ñayuu. Te ni ndiví ya ini vehe. Te tēe cáscuáha un ní jinūcoo de nuū yā, te ni cacahān de jíin yá:

Nacani cájí ní jnúhun yátá ite lasú nuū ná, áchí de.

³⁷ Te ni cahān yā jíin de:

Jeē jéte trigo váha un cúu máá rí, Yaā ní nduu tēe. ³⁸ Te ñuhun un cúu ñayīvī. Te trigo váha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén. ³⁹ Te tēe jító uhū jeē ní jete lasú un cúu máá jexeén. Te quivī tahndé cúu quivī jínu ñayīvī. Te tēe cahnde un cácuu ndajéhé Yaā Dios. ⁴⁰ Te nájnūhun tahndé ite lasú te cayū nuū ñuhún, súcuan coo quivī jínu ñayīvī. ⁴¹ Chi máá rí, Yaā ní nduu tēe, tají rí ndajéhé rī quingoo. Te nastútú yá táca ñayuu casquíví jnáhan nuū cuéchi, jíin ñayuu casáha jniñu néé, quenehen ya i mēhñu ñayuu ndácu rí jniñu nuū. ⁴² Te jnaa ya i cayū i nuū ñuhún. Te yūcuán ndáhyū i te nacayihí

yuhu i jeē ndoho xeēn i. ⁴³ Yūcuán na te ñayuu squícu nuū yā chi ndindēé i nájñuhun niāndii, te coyūcú i nuū ndácu máá Tátá i jniñu. Tāca rōhó jēē jīni sōho, na chūsóhó ró.

Jñuhun yátá síquī yejnū xūhún jeē yísāhí

⁴⁴ Te jeē ndácu Yaā andiví jniñu nuū ñáyuu, suni cúu nájñuhun ññ yejnū xūhún jeē yísāhí chíji ññ ñuhun. Te ni nanihñ ññ tēe, te ni nacasi tucu de síquī. Te jeē cúsiñi de jín, te ni jehēn de ni xícó ndihí de jeē névāha de, te ni jeen de ñuhun ún.

Jñuhun yátá síquī perla jeē ndeé yahu

⁴⁵ Te jeē ndácu Yaā andiví jniñu nuū ñáyuu, suni cúu nájñuhun ññ tēe jēen xícó, te ndúcú de perla váha. ⁴⁶ Te ni jini de ññ perla jeē yáhu ndasí, te ni jehēn de ni xícó ndihí de jeē névāha de, te ni jeen de perla un.

Jñuhun yátá síquī ñunu jñá chācá

⁴⁷ Te jeē ndácu Yaā andiví jniñu nuū ñáyuu, suni cúu nájñuhun ññ ñunu jeē cásingava de ini mar, te quívicoo ndinuū chācá. ⁴⁸ Te núu ni chitú ñunu ún, te cánatava de yundúte. Te cácucoo de cáncāji de chācá. Te chācá váha cájnaa de ini jīca, te chācá tú váha cáscāne de. ⁴⁹ Te suni súcuan coo quíví jínu ñayíví. Chi quijicoo ndajéhé yā, te sásñn ya ñayuu casáha jniñu néé méhñu ñáyuu casáha jniñu váha. ⁵⁰ Te ñayuu cunéé chí jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

Jñuhun yátá síquī ndajniñu ndeé yahu

⁵¹ Te ni cajñuhun yá de jijnáhan de: ¿A ní cajecūhun ni rō tāca jñuhun yáha, chí tuú? áchí yá.

Te ni cacahān de jín yá:

Ni cajecūhun ni ná, áchí de.

⁵² Te ni cahān yā jín de:

Iyó váha núu súcuan. Te ññ tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jñuhun síquī ún. Chi cúu de nájñuhun ññ tēe chí vehe. Te ini

yejnū de táva de ndajniñu ndeé yahu, sava jeē jeé jín sava jeē je ni cunahān íyó. Achí yá.

Jeē cuánuhun yā ñuu Nazaret

(Mr. 6.1-6; Lc. 4.16-30)

⁵³ Te ná ni ndihí ni cahān Jesús tāca jñuhun yátá yáha, te ni quenda ya yūcuan cuáhān yā. ⁵⁴ Te ni najinū yā ñuu yā Nazaret. Te ni steén yā jñuhun ini vehe ññ sinagoga yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jñuhun ndíchí? ¿Te ndese cúu sáha de tācá jniñu jéhu yāhá? ⁵⁵ Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jín Judas. ⁵⁶ Te suni cáyūcu cuáha de jín yó yāhá. ¿Te ndese jín de tāca jñuhun yáha núu súcuan? Achí ñayuu.

⁵⁷ Te súcuan ni cacujéē ni i nuū Jesús. Te ni cahān yā jín i:

Tāca tēe nácani jñuhun Yaā Dios, íyó yíñuhún ñayuu jín de, te máni ñayuu ñuu maá de jín ñáyuu vehe máá de cúu jeē tu íyó yíñuhún jín de. Achí yá.

⁵⁸ Te tu ní sáha ya cuehē jniñu jéhu yūcuán, chí tu cáncandíje i ya.

Jeē ni jñí Juan tēe scuándute

(Mr. 6.14-29; Lc. 9.7-9)

14

¹ Te tiempo yúcuán te Herodes, tēe ndácu jniñu región Galilea, ni jini jñuhun de jñuhun Jesús. ² Te ni cahān de jín ñáyuu cáhñn jín de:

Tēe yúcuán cúu Juan tēe ni scuándute, te ni natecu de. Jeē yúcuán íyó poder de sáha de jniñu jéhu. Achí de.

³ Chi Herodes, je ni ndacu de jniñu jeē na quíví Juan vecāa, jín jēē na cónuhñ de jín cadena. Súcuan ni sáha de jeē síquí Herodías, ñasihí ñani de Felipe. ⁴ Chi Juan ni cahān de nuū Herodes:

Tu íyó ley condeca ró ña, áchí de.

⁵ Te jeē yúcuán ní cuni Herodes cahni de Juan. Te yúhú de jeē quití ni ñayuu, chí ndihí i jéni ndije ni i jeē ññ

tēe nácani jnūhun Yaā Dios cúu Juan.
⁶ Te ñn quivī ni sáha Herodes ñn vico quivī ní cacu de. Te sēhe síhí Herodías ni quivī i ni jita jéhé i nuū ñáyuu ní cana de ún. Te ni cusī ni Herodes ni sáha i. ⁷ Te ni jejnūhun téyí de jeē cuáha de núu na vé cacān i nuū de. ⁸ Te ni jehēn i ni cajnūhún i náná i na vé cacān i. Te ni ndivī i nuū Herodes, te ni cahān i:

Cuāha ní xínī Juan tēe scuándute, cone nuū ñn cohō, achí i.

⁹ Yūcuán na te rey Herodes ni cucuhyá ni de. Te siquī jeē ni jéjnūhun téyí de, jíin jeē ní cajini sōho tēe cáyeji staā jíin de, jeē yúcuan ní ndacu de jniñu jeē na cuáha nuū i. ¹⁰ Te ni tají de soldado jeē na quícahnde xini Juan ini vecāa. ¹¹ Te ni quee soldado un jíin xínī Juan, íne nuū ñn cohō, te ni jēhe nuū súchi síhí un. Te máá i ni jendeca i nuū naná i.

¹² Yūcuán na te ni jengoo tēe cáscuáha jíin Juan, te ni candonehen de yiqui cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

Jeē ni scáji yā uhūn mil tēe

(Mr. 6.30-44; Lc. 9.10-17; Jn. 6.1-14)

¹³ Te ná ni jini Jesús jnūhun, te ni cujiyo ya yūcuan cuáhān yā jíin barco, jeē cóne sñn ya ñn lugar nuū tú ñayuu. Te ni cajini ñayuu jeē cuahán yā. Te tācá ñuu ni quendacoo i cájica jéhé i, cuajnahān i ya. ¹⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya tāca ñáyuu cácuñu jeē véjicoo i jíin. ¹⁵ Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. Núu súcuan te tají ní ñayuu na quíngoo i tācá ñuu, te cuaan i jeē cáji i.

¹⁶ Te ni cahān Jesús jíin de:

Tu jíini ñúhún quíngoo i, chi cuāha máá ró jeē cáji i, achí yá.

¹⁷ Te ni cacahān de jíin yá:

Tú na vé cánevāha ná yāha, chi uhūn-ni staā jíin úu-ni chācá, achí de.

¹⁸ Te ni cahān yā jíin de:

Cuāha na quíji, achí yá.

¹⁹ Te ni cahān yā jíin ñáyuu un jēe na cúcōo i nuū íte. Te ni quihin ya ndihúhún staā jíin úu chācá un. Te ni ndacoto ya ichi ándiví, te ni nacuatáhú yá. Te ni tahu cuéchí yá staā ún, te ni jēhe ya nuū tēe cáscuáha jíin yá. Te máá de ni casaja de nuū ñáyuu cuehē ún. ²⁰ Te ndivii i ni cayeji, te ni candutú chíji i. Te ni canastútú de pedazo jeē ní quendōo, te ni chitú úxī uū jīca. ²¹ Te tēe ni cayeji un cúu nájnūhun uhūn mil, te sñn ga cúu ñahan jíin súchi lúli.

Jeē ní jica jéhé yá nuū mar

(Mr. 6.45-52; Jn. 6.16-21)

²² Yūcuán na te ni cahān-ni Jesús jíin tēe cáscuáha jíin yá jeē na quívicoo de barco, te cosnúu de quingoo de nde inga lado mar, níni jēe nátají yá ñayuu un quíngoo i. ²³ Te nuū ní cuu ni nacuatáhú yá nuū i, te máñúhún-ni ya ni caa ya yucu, cuacacān tahu yā. Te ni cuaa, te íne máñúhún yá yūcuán. ²⁴ Te barco un, je ni cuu sava nuū mar cuahān. Te ndute mar un nátundahá níhin barco, chi vēji tachí ichi núu de. ²⁵ Te jeē yínee gā ni quee Jesús nuū de, jīca jéhé yá nuū mar. ²⁶ Te tēe cáscuáha ún, ni cajito de ya jeē jíca ya nuū mar. Te ni candondava de, te ni cacana cóhó de jeē cáyuhú de.

Jíhná cúu, achí de.

²⁷ Te ni cahān-ni Jesús jíin de:

Ndeyí coo ni rō, te ma yūhu ró, chi máá rí cúu, achí yá.

²⁸ Yūcuán na te ni cahān Pedro jíin yá:

Núu máá ní cúu, te cahān ni jíin ná jēe na cáca jéhé ná nuū mar te jeē na núu ní, achí de.

²⁹ Te ni cahān yā:

Nehen núu súcuan, achí yá.

Te ni quenda Pedro ini barco, te ni jica de nuū ndute cuahān de nuū Jesús. ³⁰ Te nuū ní jini de jeē níhin yáhi tachí, te ni yūhú de. Te ni quejé de quée de chíji ndute. Te ni cana cóhó de:

Jnama ní sáña, achí de.

³¹ Te Jesús ni jnī-ni ya ndaha de. Te ni cahān yā jín de:

Tēe tu cándije nīhin cúu ró. ¿Naun ni nayūhu ró? Achí yá.

³² Te ni quiv̄i ya ini barco un jín de, te ni jecuiñ̄i-ni tach̄i. ³³ Yūcuán na te tēe cáh̄iin ini barco un, ni cajecuiñ̄i yit̄i de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

Jeē ní nasávāha ya ñayuu cácuñ̄i región Genesaret

(Mr. 6.53-56)

³⁴ Te ni quenda jíyo ya jín de nuū mar un, ní jinū yā región Genesaret.

³⁵ Te ñayuu yūcuan ní canacuni i ya. Te ni cascáca i jñūhun t̄acá ndañūū yūcuan jēē ni jínū yā. Te ñayuu ni caquindeca i ñayuu cácuñ̄i nuū yā.

³⁶ Te ni cacahān ndahú i jín yá jeē na quéhé i v̄esú yusáhma ya. Te t̄aca ñayuu jeē ní caquehé sahma ya, ni canduvāha i.

Siqūi ndese cújnehén ñayuu

(Mr. 7.1-23)

15

¹ Yūcuán na te jecu tēe grupo fariseo jín tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jín yá:

² Tēe cáscuáha jín ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staā. Achí de.

³ Te Jesús ni cajñūhun yá de:

Te máá ró jijnáhan ró, ¿suni naun cástívi ró jniñū ní ndacu Yaā Dios nuū rō? Chi sa costumbre máá ró cúu jeē casquicu ró. ⁴ Chi ni cahān Yaā Dios: Coo yñūhún ró jín tátá rō jín náná rō. Te núu ndé ñn cahān siqūi tátá chí siqūi naná, na cúu nahín, áchí Yaā Dios. ⁵ Te máá ró chi cácahān rō jeē cuu cahān ñn tēe jín tátá de jín náná de: Ma cúu chindéé ñáhán ná níhín cuáha na jēē caji ni jēē cúhun ní, chi ndih̄i jeē névāha ná, je ni socō na núu Yaā Dios. ⁶ Te tēe cahān súcuan, tuá cánuú chindéé ñáhán de tátá de

náná de, áchí ró jijnáhan ró. Te súcuan cástívi ró jniñū ní ndacu Yaā Dios, jeē siqūi costumbre ni cajequin máá ró. ⁷ Tēe stáhú-ni cácuu ró. Ndaā ni nacani Isaiás jñūhun siqūi rō nde jenahán, yósó núu tútu ñi jeē ni cáhān Yaā Dios:

⁸ Ñayuu yáha chi máá yuhu-ni i cájetáhú i ruhū,

te nasūu ndé jín ini jín ánuá i.

⁹ Te cáchiñūhún sáa-ni i ruhū, chi jñūhun cástéén i cúu jniñū ní candacu tēe,

te nasūu jēē ní ndacu máá rí cúu.

Achí Yaā Dios. Achí yá.

¹⁰ Te ni cana ya ñayuu cuehē ún, te ni cahān yā jín i:

Cuni sōho vāha jijnáhan ró, te chuhun ni rō: ¹¹ Nasūu jēē quiv̄i ini yuhu ñayuu cujnehén i sáha. Chi jñūhun jeē quenda yuhu i, yūcuan cúu jeē cujnehén i sáha, áchí yá.

¹² Yūcuán na te tēe cáscuáha jín yá, ni quecoo de nuū yā, te ni cacahān de:

¿A jíní ni jēē ní caquit̄i ni tēe fariseo jeē ní cajini sōho de jñūhun ni cahān ní? áchí de.

¹³ Te ni cahān maá yá:

Cácuu de nájnūhun yujnu jeē tu ní náchuhun Tátá r̄i, Yaā ndeé andiv̄i, te ñn quiv̄i te jñuhun ya quih̄n.

¹⁴ Na quíngoo máá de. Chi cácuu de nájnūhun tēe cuáá cástéén ichi nuū ñnga tēe cuáá. Chi núu ñn tēe cuáá stéén de ichi nuū ñnga tēe cuáá, te ndindúú de ñnga de xehvā. Achí yá.

¹⁵ Te ni cahān Pedro jín yá:

Castūhun cájí ní jñūhun yátá yáha nuū na jijnáhan ná, áchí de.

¹⁶ Te ni cahān Jesús:

¿Te á suni máá ró ná tu jecūhun ni rō chí naún? ¹⁷ ¿A tu cájecūhun ni rō jeē t̄aca jēē yéji ñayuu, chi quiv̄i chíji i, te quenda-ni cuahān? ¹⁸ Te jñūhun jeē quenda yuhu ñayuu, chi nde ini ánuá i v̄eji, te yūcuan cúu jeē cujnehén i sáha. ¹⁹ Chi nde ini ánuá ñayuu quenda jeē jéni néé ni, jeē jéhni nd̄iyi, jeē casiqūi ndéē jnáhan, jeē jíca jnéni, jeē sacuíhná, jeē cahán jñūhun stáhú, jeē cahán yā siqūi jnáhan. ²⁰ T̄aca jēē yáha cúu jeē cujnehén ñayuu sáha. Te

núu tu squícu i costumbre jeē nándahá i te caji i staā, tu cúnéhén i sáha. Achí yá.

Ñahan inga nación jeē ní candíje nīhin
(Mr. 7.24-30)

²¹ Te ni quenda Jesús yūcuan cuáhān yā región Tiro jíin Sidón. ²² Te ññahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ní sáña víi. Chi sēhe síhí ná, ñúhun tachī ini i, te yōhyo xeēn ndóho i, achí ña jíin yá.

²³ Te tu ní cáhān cuiṭi yā jeē ni cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quíhín ña, chi cána jee ña vēji ña yatā yō, achí de.

²⁴ Te ni cahān yā jíin ña:

Nuū maá-ni ñayuu nación Israel ni tají Yaā Dios sáña véji ná, chi cácuu i nájnūhun lanchi, quiṭi ní sana.

²⁵ Te ññahan ún chi ni quee ña, te ni jecuiñī yīṭi ña nuū yā, te ni cahān ña:

Tátā, chindéé ñáhán ní sáña víi, achí ña.

²⁶ Te ni cahān yatá yá jíin ña:

Tu íyó váha jeē quénde yō staā sēhe, te cuāha yó núu ina, achí yá.

²⁷ Te ni cahān ña:

Jendaá cahān ni Tátā, te chindéé ñáhán ní sáña vēsú cúu ná nájnūhun ina. Chi suni máá ṭí cánihīn nahín ṭí pedazo staā cuechí jéē cóyo chíji mesa jitoḥo ṭí cáyeji ṭí, achí ña jíin yá.

²⁸ Yūcuán na te ni cahān Jesús:

Yōhyo váha jeē cándíje nīhin ní súcuan, nánā. Te na sáha ná jéē cuní ni, achí yá.

Te máá hora un ní nduvāha-ni sēhe síhí ña.

Jeē ní nasávāha ya cuehē ñayuu cácuḥū

²⁹ Te ni quenda Jesús cuahān yā yūcuán, te ni yāha ya yumar Galilea. Te ni caa ya ññ yucu, te yūcuan ní cucōo ya. ³⁰ Te cuehē ñayuu ni quecoo i nuū yā, te cándeca i tāca jéē cájica chácuaá, jeē cuaá, jeē ññhín, jeē cacúhndú, jíin cuéhē gā ñayuu cácuḥū.

Te ni cajequin i nuū jehé Jesús. Te ni nasávāha ya i jíināhan i. ³¹ Te ni canaa ni ñayuu un cájito i jeē nácahān ñayuu ññhín, ndúvāha ñayuu cuhndú, náccaca váha ñayuu chacuá, nánune tinūu ñáyuu cuaá. Te ni cacahān i jeē yóhyo váha Yaā cúu Yaā Dios ñuu i Israel.

Jeē ni scáji yā cuūn mil tēe
(Mr. 8.1-10)

³² Yūcuán na te ni cana Jesús tēe cáscuáha jíin yá, te ni cahān yā jíin de:

Cúndáhú ni rī ñayuu cuehē yāhá, chi je ni cuu unī quiṭi cáyūcú i jíin rí, te tuá na vé caji i. Te tu cuní rī natajī rí i nuhun ndite i, chi núu súcuan te sava ichi te cuīta lí i. Achí yá.

³³ Te ni cacahān tēe cáscuáha jíin yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yúcu, achí de.

³⁴ Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúli, achí de.

³⁵ Yūcuán na te ni cahān yā jíin ñáyuu cuehē un jéē na cúcōo i. ³⁶ Te ni quihin ya ndihúxá staā jíin cháca ún, te ni nacuatáhú yá nuū Yaā Dios. Te ni tahú cuéchí yá, te ni jēhe ya nuū tēe cáscuáha jíin yá, te máá de ni casaja nuū ñáyuu. ³⁷ Te ndihí i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jíca. ³⁸ Te tēe ni cayeji ún, nde cuūn mil de cúu, te síñ ga cúu ññahan jíin súchi lúli. ³⁹ Yūcuán na te ni nacuatáhú yá nuū ñáyuu ún, te cuanungoo i. Te ni ndīvi ya ini barco, te cuahān yā región Magdala.

Jeē cájicān de ññ jniñu jéhnú nuū yā
(Mr. 8.11-13; Lc. 12.54-56)

16

¹ Te ni quecoo tēe grupo fariseo jíin tēe grupo saduceo nuū yā. Chi cácuñi de coto ndee de ya, te ni cajicān de jeē na sáha ya ññ jniñu jéhnú jeē coo ññ seña ichi ándiví. ² Te máá yá ni cahān yā jíin de:

Núu ni ini, te cácahān rō: Nandii, chi ni nasácuéhé i andiví, áchí ró. ³ Te jenéhen chi cácahān rō: Vijna te cuun saū, chi ni nasácuéhé i andiví, áchí ró. Tēe stáhú-ni cácuu ró. Chi cájecūhun ni rō ndese stéén seña andiví, te tu cájecūhun ni rō ndese stéén tācá jniñu jéhnú sáha ri tiempo yáha. ⁴ Ñayuu yáha jeē casáha jniñu néé, tu cájetáhú cuiti i Yaā Dios. Te cájicān i jeē sáha ri ñn jniñu jéhnú jeē coo ñn seña andiví. Te tuá na inga jniñu jéhnú stéén rī nuū i, chi máá-ni jniñu jéhnú nájnūhun ni cuu jíin Jonás, tēe ni nacani jnūhun Yaā Dios nde jenahán. Achí yá.

Te ni stóo ya de jíjnāhan de, te cuahān yā.

Jnūhun levadura tēe fariseo
(Mr. 8.14-21)

⁵ Te tēe cáscuáha jíin yá ni canaa ni de condiso de staā náa cuangoo de jíin barco inga lado mar. ⁶ Te ni cahān Jesús jíin de:

Coto má candíje ró levadura tēe grupo fariseo jíin tēe grupo saduceo, achí yá.

⁷ Te tēe cáscuáha un ní cacahān maá de:

Va siquī jeē tú na staā ndíso yó, jeē yúcuān cáhān yā súcuān, áchí de.

⁸ Te ni jini Jesús, te ni cahān yā:

¿Najehē cácahān rō jeē ni cáhān rī súcuān siquī jeē tú na staā cándiso ró? Tēe tu cándíje ñihin cácuu ró. ⁹ ¿A ná tu jecūhun ni rō jeē tu ní cáhān rī súcuān siquī jeē tu ndíso ró stáá? ¿A tu cánucūhun ni rō jeē ní tahú cuéchí rí uhūn staā ni cayejí uhūn mil tēe, te nasaa jíca ni canastútú ró jeē ni quéndōo? ¹⁰ ¿Te á tu cánucūhun ni rō jeē ní tahú cuéchí rí uxā staā ni cayejí cuūn mil tēe, te nasaa jíca ni canastútú tucu ró? ¹¹ ¿Te najehē tu cájecūhun ni rō jeē násūu siquī staā ni cahān rī jíin ró jeē ni cáhān rī jeē coto má candíje ró levadura tēe fariseo jíin tēe saduceo? Achí yá jíin de.

¹² Yūcuán na te ni cajecūhun ni de jeē tu ní cáhān yā jeē coto de jeē ma cáji de pan jeē yáhi levadura, chi sa suhva ni cahān yatá yá jeē ma cándíje

de jnūhun stáhú cástéén tēe fariseo jíin tēe saduceo.

Jeē ni cáhān Pedro jeē Jesús cúu Cristo

(Mr. 8.27-30; Lc. 9.18-21)

¹³ Te nuū ni jíin Jesús región Cesarea Filipino jíin tēe cáscuáha jíin yá, te ni cajnūhun yá de:

Ruhū, Yaā ní nduu tēe, ¿ndé ñn cúu ri cácahān ñayuu?

¹⁴ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē Jeremías chí inga tēe ni nacani jnūhun Yaā Dios cúu ní. Achí de.

¹⁵ Te ni cahān yā jíin de:

Te máá ró, ¿ndé ñn cúu ri cácahān rō? achí yá.

¹⁶ Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, áchí de.

¹⁷ Te ni cahān Jesús:

Yōhyo ndetū rō, Simón sēhe Jonás, chi nasūu ñn ñayuu ni steén jnūhun yáha nuū rō, chi sa suhva máá Tátá rī, Yaā ndeé andiví, ní steén yā nuū rō. ¹⁸ Te ruhū suni cáhān rī jíin ró jeē maá ró cúu Pedro, jeē cuní cahān: yuū. Te jnūhun ndaā jeē ni cáhān rō jeē maá rí cúu Cristo, suu cúu nájnūhun ñn yuū cáhnu. Te siquī yuū cáhnu yáha sáha ri jeē quítuu vehe, te vehe un cúu ñayuu cácañíje ruhū. Te tu ndé vé cundeyí cuiti siquī i, ni jnūhun xeēn jeē cájihī i, tuá na vé cúu sáha jíin ánuá i. ¹⁹ Te máá ró condiso jniñu ró sáha ró jéé quívicoo ñayuu ndaha Yaā andiví jeē ndacu ya jniñu nuū i. Te tāca jéé cási rō jeē ma sáha ñayuu ini ñayiví yáha, suni casi jeē cáyucú nde andiví. Te tāca jéé cuáha ró jnūhun sáha i ini ñayiví yáha, suni jeē cáyucú nde andiví cuáha jnūhun. Achí yá.

²⁰ Yūcuán na te ni ndacu ya jniñu nuū tēe cáscuáha jíin yá, jeē ma cáchi de nuū ní ñn ñayuu jeē cúu ya Cristo.

Jeē ní castūhún Jesús jeē cúu yā
(Mr. 8.31-9.1; Lc. 9.22-27)

21 Te nde saá ní quejéé Jesús cástūhun cájí yá nuū téé cáscuáha jíin yá jeē jíni ñúhún quihīn yā ñuu Jerusalén. Te tāca téé jéhnū jíin sūtū cácujuhnu jíin téé cástéén tutu ley, stóho ndasí de ya. Te cahni de ya, te nuū uní quivī te natecu yā, achí yá. 22 Yūcuán na te Pedro, ni cana máñuhún de ya, te ni quejéé de cáhán de nuū yā:

¿Naun cáhán ni súcuan? Chi tu cúní Yaā Dios jeē cuu súcuan. Tu jíni ñúhún cuiti ndoho ní jnúndóho yáha, achí de.

23 Te ni ndió cóto ya nuū Pedro, te ni cahān yā jíin de:

Cujiyo quihīn rō, chi cáhán rō ná cáhán Satanás. Chi tēe ndúcú stívi ruhū cúu rō. Te tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu. Achí yá.

24 Yūcuán na te ni cahān yā jíin téé cáscuáha jíin yá:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuāha i jnūhun ndoho i jnúndóho jeē siquí rī, vēsú na cúu i. 25 Chi núu ndé ñáyuu cuní i cācu i nuū jnúndóho quiiji nuū i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē siquí ruhū, te cotecu i ní cáni. 26 ¿Chi ndé cuajniñu vēsú na cúndeyí ñáyuu nihīn i ní ñáyiví, te núu quivī i nuū jnahnū ndetū i? Chi tú na jíin cuiti chunaa ñayuu jeē cácu ánuá i. 27 Chi ruhū, Yaā ní nduu tēe, ndiji ri jíin táca ndajéhé rī, te yōhyo luu cujéhnū ri nájnūhun cújéhnū Tátá rī. Yūcuán na te cuāha ri tahū nuū ñn ñn ñayuu núu ndese jniñu ni casáha i. 28 Te jendaá cahán rī jíin ró jeē sava tēe cáhīn yāhá, ma cúu de chi nde cuní de jeē maá rí, Yaā ní nduu tēe, ndácu ri jniñu jíin poder rī.

*Jeē tucu ni nduu ya
(Mr. 9.2-13; Lc. 9.28-36)*

17

1 Yūcuán na te nuū iñú quivī te Jesús ni jeca ya Pedro jíin Jacobo jíin Juan ñani Jacobo, cuahān sīn ya jíin de ñn yucu súcún. 2 Te yūcuán, tucu

ni nduu ya nuū de. Chi ni ndindēe núu yā nájnūhun niāndii. Te sahma ya ni nducujín quiyi ndasí, nájnūhun nduva luz. 3 Te ni cajito-ni de jeē Moisés jíin Elías, tēe ni cahīyo jenahán, cándajnūhún de jíin yá. 4 Te ni cahān Pedro jíin yá:

Nacā jeē váha jeē cáhīn ná yáha. Te núu cúní ni te na sáha ná uní vehe ramada, ñn cuu maá ní, inga cuu Moisés, te inga cuu Elías, achí de.

5 Te níni cáhán gā de, te ni quiiji vicō nūhun jēe yaa ndasí, ni jesi-ni nuū de. Te nuū vicó un ní cahān ñn jnūhun:

Yāha cúu Sēhe ri jeē maní ndasí rí jíin, te cúsi ni rī jíin. Na cúní nahín ró jnūhun cáhán yā. Achí.

6 Te jeē súcuan ni cajini sōho tēe cáscuáha ún, te ni cajecava ndeyi de, chi yōhyo ni cayūhú de. 7 Yūcuán na te ni quee Jesús, te ni soó yá ndaha ya siquí de. Te ni cahān yā:

Ndocuñi, te ma yūhu ró jijnáhan ró, achí yá.

8 Te ni candacoto de, te tuá tēe un ní cájito de, chi maá ñn na Jesús.

9 Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní ñn jeē súcuan ni cajito ró, chi nde na nátecu maá rí, Yaā ní nduu tēe, achí yá.

10 Yūcuán na te tēe cáscuáha jíin yá, ni cacajnūhún de ya:

Núu súcuan te tēe cástéén tutu ley Yaā Dios, ¿najehē cácahān de jeē cánuú ndiji Elías xīhna gā, te sáa te quiiji Yaā cúu Cristo? achí de.

11 Te ni cahān Jesús jíin de:

Jendaá cúu jeē xīhna gā quiiji ñn tēe cuu nájnūhun Elías, te sátūhva de ndihí, achí tutu. 12 Te cáhán rī jíin ró jeē jé ni quiiji tēe ni cuu nájnūhun Elías, te tu ní jíni ñayuu jeē suu de cúu. Te ni casáha ndevāha ñayuu jíin de ndihí jeē ní cacuu ni maá i. Te suní súcuan stóho i ruhū, Yaā ní nduu tēe. Achí yá.

13 Yūcuán na te tēe cáscuáha un, ní cajecūhun ni de jeē cahán yā jeē Juan tēe scuándute, ni cuu de nájnūhun Elías.

*Jeē ní nasávāha ya ñn sūchi jíhí yíhí
(Mr. 9.14-29; Lc. 9.37-43)*

¹⁴ Te ni najinū yā jíin de nuū ñáyuu cuehē ún. Te ni quee ñn tēe, ni jecuiñī yítí de nuū yā, te ni cahān de:

¹⁵ Cundáhú ni ni séhe yí ná, chi yōhyo xeēn ndóho i cuehyí jíhí yíhí. Te je ni cuu cuehē jínu cótúú i nuū ñuhún jíin núu ndúte. ¹⁶ Te ni quindecā ná i nuū tēe cáscuáha jíin ní, te tu ní cúu sávāha de i, áchí de.

¹⁷ Te ni cahān Jesús:

Ñáyuu yōhyo nīhni ni cácuu ró chi tu cácandíje ró jēe cuu nduvāha i. ¿Nasaa ga quiví condee rī jíin ró? ¿Te nasaa ga quiví cuandeyí ni rī jíin ró? Cuáquihin sūchí un na quíji i, áchí yá.

¹⁸ Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

¹⁹ Yūcuán na te tēe cáscuáha un, ní cacajñūhun sīn de ya:

¿Najehē tu ní cúu quenehen ná tachí un jíināhan ná? áchí de.

²⁰ Te ni cahān yā:

Siquí jeē tu cácandíje nīhin ró jēe cuu sáha ró. Chi jendaá cahán rī jíin ró, jeē núu candíje ró vésú ñn tíhlí-ni, cūhva nájnūhun ñn ndiquin mostaza, te cuu sáha ró táca-ni jniñu yí. Chi cuu cahān rō jeē na cújiyo yucu yáha quihīn inga lado, te cujiyo-ni. Te táca-ni jniñu chi cuu sáha ró, te núu candíje nīhin ró jēe cúu. ²¹ Te ñn tachí súcuan chi ma quenda cuítí quihīn, te núu tu cacān tahú rō te coo ndite ni rō. Achí yá.

*Jeē ni cahān tucu ya jeē cúu yā
(Mr. 9.30-32; Lc. 9.43-45)*

²² Te jíca cuu Jesús jíin de jíināhan de región Galilea, te ni cahān yā jíin de:

Máá rí, Yaā ní nduu tēe, nastúu i ruhū nuū táca tēe xeēn. ²³ Te cahni de ruhū, te nuū uní quiví te natecu rī, áchí yá.

Te ni canducuíhyá ndasí ni de jeē ni cahān yā jnūhun yáha.

Siquí xūhun cuajniñu ini templo

²⁴ Te ni jinū yā ñuu Capernaum jíin tēe cáscuáha jíin yá. Te tēe cástútú xūhun templo ni quecoo de, te ni cacajñūhún de Pedro:

Te maestro maá ró jíināhan ró, ¿á tú cuāha de xūhún cuajniñu ini templo, chí naún? áchí de.

²⁵ Te ni cahān Pedro:

Cuu, áchí de.

Te ná ni quiví de ini vehe, te xīhna gā Jesús ni cahān yā jíin de:

¿Ndese jéni ni rō, Simón? Tāca tēe cácuu rey ini ñayiví yáha, ¿ndé núu cájicān de xūhun renta jíin xūhun cuajniñu ñuu? ¿A núu séhe de chí núu ñáyuu sīn vehe? áchí yá.

²⁶ Te ni cahān Pedro:

Nuū ñáyuu sīn vehe, áchí de.

Te ni cahān Jesús:

Núu súcuan te tú na inga cujéhnu nuū séhe rey jeē cacān xūhún un núu i.

Súcuan ni cahān yā jeē cujéhnu ya cúu ya Sēhe Yaā Dios. Te ni cahān yā:

²⁷ Te na chúnaa yō, návāha tu squítí ni yō de. Núu súcuan te cuáhán ndé yumar, te scāne ró gancho jeē jnī chācá, te tava rō chācá jēe jnī xīhna gā. Te ndica rō yuhu ti, te yūcuan níhīn rō ñn xūhun jēe cánda chunaa rō jeē cájicān de. Te quindēca ró núu de jeē cúu ruhū jíin rōhó. Achí yá.

*Ndé ñáyuu cúu jeē cujéhnu ga
(Mr. 9.33-37; Lc. 9.46-48)*

18

¹ Te suni quiví un ní quecoo tēe cáscuáha un núu yā, te ni cacajñūhún de ya:

¿Ndé ñn cújéhnu ga nuū ñáyuu jeē ndácu Yaā andiví jniñu nuū? áchí de.

² Te ni cana ya ñn sūchi lúlí, te ni jeni ya i mēhñú de. ³ Te ni cahān yā:

Jendaá cahán rī jíin ró, núu tú nandió cóo ni rō te cani ni rō nájnūhun ñn sūchi lúlí, ma quiví cuítí rō ndaha Yaā andiví jēe ndacu ya jniñu nuū rō. ⁴ Núu súcuan te ñayuu jeē jéni ni i jeē tu cújéhnu i, nájnūhun jéni ni sūchi lúlí yáha, suu i cújéhnu ga nuū ñáyuu jeē ndácu Yaā andiví jniñu nuū. ⁵ Te na-ni ñayuu núu jeē siquí ruhū jetáhú i ñn sūchi lúlí nájnūhun sūchi yáha, te ruhū jetáhú i. Achí yá.

Xeēn coo siquī ñáyuu quívi nuū cuéchi

(Mr. 9.42-48; Lc. 17.1-2)

⁶ 'Te núu ñin sūchi lúli yáha cándije i ruhū, te núu quívi i cuéchi sáha na-ni ñayuu, te vāha ga núu ni conuhnī ñin yōso cáhnu sucūn ñayuu ún, te quēe i chíji ndute mar nuū. ⁷ Nacā xeēn cúu jíin ñáyuu ñayívi, chí máni íyó jēe nducú squívi ñayuu nuū cuéchi. Te máni súcuan coo ini ñayívi. Te nacā xeēn ndoho ñayuu jeē squívi jnáhan nuū cuéchi.

⁸ 'Núu súcuan te núu ndaha ró chí jéhē rō sáha jeē quívi ró cuéchi, vāha ga cahnde rō te scáne ró na quíhín, návāha tuá sáha ró cuéchi. Chí vāha ga jeē coo chácuá ró chí coo tícúhndu ró te quívi ró núu cotecu rō ní cáni, vēsú jeē cóndee ndindúú ndaha ró jéhē rō te quívi ró núu ñuhún jeē cayú ní cáni. ⁹ Te núu tinūu ró sáha jeē quívi ró cuéchi, vāha ga tava rō te scáne ró na quíhín, návāha tuá sáha ró cuéchi. Chí vāha ga jeē coo ñin-ni tinūu ró te quívi ró núu cotecu rō ní cáni, vēsú jeē cóndee ndindúú tinūu ró te quívi ró núu ñuhún infierno.

Jnūhun yátá síquī lanchi jeē ní sana
(Lc. 15.3-7)

¹⁰ 'Coto ma sájēe ni rō nuū ní ñin sūchi lúli yáha. Chí cáhán rī jíin ró jeē tēcá ndajéhé andívi jēe ndító ya i, níni cáhín ya nuū maá Tátá rī andívi. ¹¹ Chí ruhū, Yaā ní nduu tēe, vēji ri jeē jnáma ri ñayuu jeē ní sana i nuū Yaā Dios.

¹² '¿Te ndese cájeni ni rō? Núu ñin tēe ndéca de ñin ciento lanchi, te núu sana ñin tí, ¿á tu stóo de cuūn xico xahūn cuūn gā tī yucu, te ndicó de quinanducú de quíti ní sana ún? ¹³ Te núu ni nanihín de tí, te ndaā jeē yóhyo ga cúsi ni de jíin quíti ún vēsú jíin cúūn xico xahūn cuūn gā quíti jeē tu ní sana. ¹⁴ Te suni súcuan maá Tátá rō, Yaā ndeé andívi, tu cúní yā jeē jnahnú ndetū ni ñin sūchi lúli yáha.

Siquī jeē cóne cáhnu ni yō nuū jnáhan yó
(Lc. 17.3)

¹⁵ 'Te núu jnáhan ró ní sáha de cuéchi siquī rō, núu súcuan te castūhun ró nuū mañúhún-ni de jeē ni sáha de cuéchi siquī rō. Te núu ni jetáhú de jnūhun ni cahān rō jíin de, núu súcuan te je ni ndumanī de jíin ró ni sáha ró.

¹⁶ Te núu tu ní jétáhú de jnūhun cáhán rō, te quicāna ró ñin chí úu gā ñayuu quihín rō jíin núu de, cuu i testigo jíin ró, te cundaā cuéchi de te ndumanī de jíin ró. ¹⁷ Te núu tu ní jétáhú tucu de jnūhun cácahān tēe ún, yūcuán na te castūhun ró nuū ñáyuu cácaandije. Te núu tu ní jétáhú tucu de jnūhun cahān ñayuu cácaandije ún, te siáá rō de na cóo de nájnūhun ñin tēe tu cándije nuū Yaā Dios chí tēe stútú xūhun renta.

¹⁸ 'Jendaá cahān rī jíin ró jēe tāca jēe cási rō jeē ma sáha ñayuu ini ñayívi yáha, suni casi jeē cáyucú nde andívi. Te tāca jēe cuáha ró jnūhun sáha i ini ñayívi yáha, suni jeē cáyucú nde andívi cuáha jnūhun.

¹⁹ 'Te suni cáhán rī jíin ró, núu uū jnáhan ró ini ñayívi yáha, ñnuú caní ni rō siquī ñin jeē cacán tahu rō, núu súcuan te maá Tátá rī andívi cuáha ya jeē cájicān rō. ²⁰ Chí núu ndé mí ndútútú úu chí úní ñayuu jeē cáchiñúhún i ruhū, te yūcuán íne ri jíin i, áchí yá.

²¹ Yūcuán na te ni quee Pedro nuū yā, te ni cajnūhún de ya:

¿Nasaa jínu cone cáhnu ni na núu jnáhan ná jēe sáha de cuéchi siquī ná? ¿A ndé uxā jínu chí naún? áchí de.

²² Te ni cahān Jesús:

Tu cáhán rī jíin ró jeē maá úxā jínu, chí nde uxā jínu jeē uní xico uxí.

Jnūhun yátá síquī mozo jeē tu ní íne cáhnu ni

²³ 'Núu súcuan te Yaā ndeé andívi, suhva cúu jeē íne cáhnu ni yā nuū ñáyuu ndácu ya jniñu nuū: Cúu nájnūhun ñin rey jeē cuní de sándaā de jíin mozo de jeē cátaū nuū de. ²⁴ Te ni quejé de sándaā de jíin i. Te ni caquindeca i ñin mozo jeē taú tijni millón peso nuū de. ²⁵ Te tú na vé névāha mozo un chunaa nuū de. Te ni ndacu de jniñu jeē na cúyāhu mozo un jíin ñasihí jíin séhe jíin táca ndajniñu,

te nucūnaa xūhun táú. ²⁶ Yūcuán na te ni jecuiñi yití mozo un, te ni cahān ndahú de jín patrón de ún: Condetu ní, te na chúnaa ndihí ná xūhun ní, áchí de. ²⁷ Te máá patrón ni cundáhú ni de mozo de. Te ni ine cáhnu ni de jeē taú mozo de ún, te ni siaá de jeē ma chúnaa gā. ²⁸ Te ni quenda mozo un cuáhān de, te ni najnáhan-ni de jín ñn jnáhan mozo de jeē taú jecu peso nuū de. Te ni jñi de tēe ún, te ni quitu de sucūn, te ni cahān de: Chuna jeē taú rō nuū rī, achí de. ²⁹ Te jnáhan mozo de un ní jecuiñi yití núū de, te ni cahān ndahú jín de: Condetu te na chúnaa ndihí ri xūhun ró, achí. ³⁰ Te máá de tu ní cúní de, chi ni chune de tēe un vécaā nde quiví nachunaa jeē taú nuū de. ³¹ Te tāca jnáhan mozo de ni cajito jeē súcuan ni sáha de, te ni cajnahuhū ndasí ni de. Te cuango de nuū patrón de, te ni cacachi de ndihí ndese ni cuu. ³² Yūcuán na te patrón un ní nacana de mozo un, te ni cahān de jín: Mozo ndevāha cúu ró. Chi ni ine cáhnu ni rī ndihí jeē taú rō nuū rī, chi ni cahān ndahú ró jín rí. ³³ Te nájnūhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuú, achí de. ³⁴ Te ni quití ndasí ni patrón, te ni ndacu de jniñu jeē na quiví vecāa nde nachunaa ndihí jeē taú nuū de.

³⁵ Te ni jñu ni cahān yā, te achí yá:

Nájnūhun ni sáha rey un jín mozo de, suni súcuan sáha máá Tátá rī andiví jín táca röhó núu tu cone cáhnu ni rō nuū jnáhan ró nde jín ini jín ánuá rō, núu na-ni cuēchi sáha i nuū rō. Achí yá jín de jínáhan de.

Siquí jeē ma stóo jnáhan tēe jín ñahan (Mr. 10.1-12; Lc. 16.18)

19

¹ Te nuū ní ndihí ni cahān Jesús tāca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núū cáne niāndii. ² Te cuehē ñayuu ni candiquīn i ya, te yūcuan ní nasávāha ya ñayuu cácuñū.

³ Yūcuán na te ni quecoo jecu tēe grupo fariseo nuū yā, chi cácuñi de coto ndee de ya núu ndese cahān yā. Te ni cacajnūhún de ya:

¿A íyó ley jeē cuu ndusñn ñn tēe jín ñasihí de núu na-ni siquí cúu, chí naún? áchí de.

⁴ Te ni cahān yā:

¿A tu ní cácahu ró tutu ñi ndese ni sáha Yaā Dios ñayuu nde xihna ñúhún? Chi tēe jín ñahan ni sáha ya, achí. ⁵ Te suni ni cahān Yaā Dios: Jeē yūcuan cúu jeē stóo tēe tátá de náná de, te qui-jnáhan de jín ñasihí de, te ñn na cuu ndindúú de, achí Yaā Dios, achí tutu. ⁶ Núu súcuan te tuá cúu uū jnáhan de, chi ñn na cúu. Jeē yūcuan tu íyó váha jeē stóo jnáhan, chí jeē ni squíjñahan Yaā Dios cúu, achí yá.

⁷ Te ni cacajnūhún de ya:

Núu súcuan ¿te naun ni ndacu Moisés jniñu jenahán jeē núu stóo ñn tēe ñasihí de, te na cúvāha acta jeē ndusñn de jín ña? áchí de.

⁸ Te ni cahān yā jín de:

Siquí jeē níhni ni rō jijnáhan ró, jeē yūcuan ní jēhe Moisés jnūhun jeē stóo ró ñasihí ró. Te nde xihna ñúhún chí nasūu súcuan ní cuu. ⁹ Te ruhū chí cáhán rī jín ró, núu ñn tēe stóo de ñasihí de, te núu nasūu jēe tñni ni ña, te quijñahan de jín inga ñahan, núu súcuan te cásiquí ndeē de ña. Te núu ñn tēe condeca de ñahan ní ndusñn, suni cásiquí ndeē de ña, achí yá.

¹⁰ Yūcuán na te ni cacahān tēe cáscuáha jín yá:

Te núu ma cúu stóo tēe ñasihí de, núu súcuan te vāha ga ma condeca de ñahan, achí de.

¹¹ Te ni cahān yā jín de:

Jnūhun ni cahān rō yāhá, tu níhín jniñu nuū ndihí tēe, chí máá nene tēe jeē ni sáha Yaā Dios jeē níhín jniñu nuū. ¹² Chi íyó tñni siquí jeē jési jeē ma condeca tēe ñahan. Chí sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma condeca de ñahan siquí jeē ndihví ni de jín jniñu jeē ndacu Yaā andiví nuū de. Tēe jeē cúu cuatáhú jnúhun jeē ma condeca

de ñahan, na cuátáhu de núu súcuan. Achí yá.

*Jeē ni jícān tahu Jesús jehē sūchi lúlí
(Mr. 10.13-16; Lc. 18.15-17)*

¹³ Yūcuán na te ni quecoo ñayuu jíin sūchi lúlí, jēē na sóo yá ndaha ya xinī i te cacān tahu yā jehē i. Te tēe cáscuáha jíin yá, ni cacahān de nuū ñáyuu vējicoo jíin i. ¹⁴ Te ni cahān Jesús:

Cuāha jnūhun na quíjicoo sūchi lúlí jíinā nuū rī, te ma cási rō jeē quíjicoo i. Chi ñayuu jeē ndió cóo ni i canī ni i nájñūhun sūchi yáha, suu i quívi ndaha Yaā andiví jēē ndacu ya jniñu nuū i, áchí yá.

¹⁵ Te ni sóo yá ndaha ya xinī i jíināhan i. Te ni quenda ya yūcuan cuáhān yā.

*Jnūhun tēe cúca
(Mr. 10.17-31; Lc. 18.18-30)*

¹⁶ Te ñin tēe suchí ní quee de nuū Jesús, te ni cajñūhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihīn tahu na cotecu na ní cáni andiví? áchí de.

¹⁷ Te ni cahān yā jíin de:

¿Naun cáhān rō jeē tēe vāha cúu rī? Tú ni ñin tēe vāha íyó, chí máá ñin-ni Yaā Dios. Te núu cúní rō cotecu rō ní cáni, te squícu ró jniñu ní ndacu ya. Achí yá.

¹⁸ Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndīyí. Ma cosíquí ndēē jnāhan ró. Ma sacuíhná ró. Ma sajnūhún ró. ¹⁹ Cuatáhu ró nuū tatá rō nuū naná rō. Te cundáhu ni rō jnāhan ró nájñūhun cundáhu ni rō maá ró, achí yá.

²⁰ Te ni cahān tēe suchí un:

Tācá jniñu yáha je ni squícu ná ndé ná lúlí ná. ¿Te na vé cúmanī gā sáha ná núu súcuan?

²¹ Te ni cahān Jesús:

Núu cúní rō squícu ndihī ró, cuáhān te xīco ró ndihī jeē névāha ró, te cuāha ró núu ñáyuu ndahú. Te nde andiví cuāha ya jeē ndetū ndasí coo ró. Yūcuán na te quiji ró condiquīn rō ruhū quihīn yō, achí yá.

²² Te tēe suchí un, ná ni jini sōho de jnūhun yáha, te ni cucuíhyá ni de te cuahān de, chí cúca ndasí de.

²³ Yūcuán na te ni cahān Jesús jíin tēe cáscuáha jíin yá:

Jendaá cahān rī jíin ró, tēe cúca chí yōhyo yí quívicoo de ndaha Yaā andiví jēē ndacu ya jniñu nuū de. ²⁴ Te cáhān tucu rī jíin ró jeē yachī gā yāha ñin camello yaū yutícuí, vēsú jeē quívi ñin ñayuu cucá ndaha Yaā Dios jeē ndacu ya jniñu nuū i, áchí yá.

²⁵ Te tēe cáscuáha jíin yá, yōhyo ni canaa ni de jeē ní cajini de jnūhun yáha, te ni cacajñūhun jnāhan de:

¿Ndé ñáyuu cúu jeē cácu núu súcuan?

²⁶ Te ni ndacoto Jesús nuū de, te ni cahān yā:

Ñayuu chí ma cúu squívi i máá i ndaha Yaā Dios, te máá yá chí ndihī-ni cuu sáha ya, achí yá.

²⁷ Yūcuán na te ni cahān Pedro:

Sāña jíināhan ná ní castóo ná ndihī jeē cánevāha ná, te cándiquīn na níhīn. ¿Te na vé nihīn na núu súcuan? áchí de.

²⁸ Te ni cahān Jesús jíin de:

Ruhū, Yaā ní nduu tēe, jendaá cahān rī jíin ró jíināhan ró jēē ñin quívi conene rī mesa ndacu rī jniñu, te yōhyo luu cujéhnū rī ini ñayívi jéé. Te quívi ún te máá ró jeē ní cacondiquīn rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxí uū yucūn ñayuu Israel.

²⁹ Te tāca ñáyuu jeē ní stóo vehe, chí ñani, chí cuāha, chí tátá, chí náná, chí ñasihí, chí séhe, chí ñuhun, síquī jeē cóndiquīn i ruhū, te nanihīn i ñin ciento gā jeē súcuan. Te suni nihīn tahu i cotecu i ní cáni. ³⁰ Te cuehē ñayuu jeē vijna cácuu i nuū, nduu i sandīhí. Te ñayuu jeē vijna cácuu i sandīhí, nduu i nuū. Achí yá.

Jnūhun yátá síquī tēe cásjniñu

20

¹ Te suhva cúu jeē ndácu Yaā andiví jniñu nuū ñáyuu: Cúu nájñūhun ñin tēe chí ñuhun. Te ñin nehen ni quenda de, ndúcú de tijnī mozo jeē taxín ndéhē uva de. ² Te ni sándaā de jíin mozo

un jēē chúnāa de ñn denario jeē quiví. Te ni tají de tēe un cuángoo jeē taxín uva de. ³Yūcuán na te ni quenda tucu de nájnūhun cahñn. Te ni jito de nuū sava ga tēe cáyūcu sáa-ni de nuū yáhu. ⁴Te ni cahān de jíin: Róhó jíináhan ró, cuángoo taxín ró uva rī, te chunaa vāha ri yāhu ró, áchí de. Te tēe un cuángoo de. ⁵Te ni quenda tucu de jeē cuácuu cahuxī uū jíin jēē cuácuu cahunī, te suni súcuan ni nihñn tucu de mozo. ⁶Te jeē cuácuu cahuhñn ni quenda tucu de. Te ni nihñn tucu de jecu gā tēe cáyūcu sáa-ni nuū yáhu. Te ni cahān de jíin: ¿Najehē cáhñn sáa-ni ró yáha ná ndiáca? áchí de. ⁷Te ni cacahān tēe ún: Siquī jeē tú ni ñn ní cána sáña jēē sájññu ná. Te ni cahān de jíin tēe ún: Núu súcuan te suni máá ró quingoo ró taxín ró ndehē uva rī, chi chunaa vāha ri yāhu ró, áchí de. ⁸Te nuū ní ini, te tēe chíí ñuhun ni cahān de jíin tēe cújēhnu nuū mozo de: Cana xinī tēe cásájññu te chunaa rō yāhu de, te xīhna gā tēe ni quivícoo sandñhí, te sáa te tēe ni quivícoo xīhna ñuhñn, áchí de. ⁹Te ni quecoo tēe jeē ni quivícoo cahuhñn. Te ñn denario ni caquihin ñn ñn de. ¹⁰Yūcuán na te ni quecoo tēe jeē ni quivícoo xīhna ñuhñn. Te cájeni ni de jeē cuehē gā quiyāhu de. Te ñn-ni denario ni caquihin ñn ñn de. ¹¹Te nuū ní caquihin de, te ni caquejéé de cácahān sōó de siquī tēe chíí ñuhun, áchí de: ¹²Máá ná jíináhan ná, ndiáca ni casájññu ná, te ni candoho ná jēē jihní. Te tēe yáha jēē ni quivícoo sandñhí, chi máá ñn hora-ni ni casájññu de. Te inuú-ni ni chiyāhu ní sáña jíin de, áchí de. ¹³Te tēe chíí ñuhun ni cahān jíin ñn de: Amigo, nasūu jēē tú vāha sáha ri jíin ró. ¿A tu ní sándaā yō jeē ñn denario quiyāhu ró, chí naún? ¹⁴Núu súcuan te quihin yāhu ró te quinhun rō. Chi cúní rī jeē tēe ni quivícoo sandñhí yáha, inuú quiyāhu de jíin máá ró. ¹⁵¿Te á tu cuu sáha ri ndese cúní rī jíin xuhun máá rí? ¿Te chí cúcuésún ni rō jeē ní chiyāhu vāha ri de jíináhan de siquī jeē vāha ni rī? áchí de. ¹⁶Te

nájñūhun ni sáha tēe chíí ñuhun, suni súcuan sáha Yaā Dios. Chi ñayuu cácuu sandñhí, nduu i nuū. Te ñayuu cácuu nuū, nduu i sandñhí. Chi cuehē ñayuu cána ya jeē candije i ya. Te jecu-ni i cándije, te nácāji ya maá i jeē ndúu i sēhe ya. Achí yá.

*Jeē ni cáhān tucu Jesús jeē cúu yā
(Mr. 10.32-34; Lc. 18.31-34)*

¹⁷Yūcuán na te ná ni quihin Jesús ichi cuahān yā ñuu Jerusalén, te ni cana sñn ya ndihúxí uū tēe cáscuáha jíin yá. Te ni cahān yā jíin de:

¹⁸Cuni sōho ró, chi je cuángoo yō ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujeñnu jíin núu tēe cástéén tutu ley. Te ndonda de siquī rī jeē cúu rī. ¹⁹Te squíví de ruhū nuū tēe nación Roma jeē cáyūcú Jerusalén cándacu jññu. Te tāca tēe un sácatā de nuū rī. Te caní de ruhū, te sáa te cahni de ruhū jicā cruz. Te nuū uní quiví te natecu rī. Achí yá.

*Jeē ni jícān naná Jacobo jíin Juan ñn favor nuū yā
(Mr. 10.35-45)*

²⁰Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuiññi yití ña nuū yā, jícān ña ñn favor nuū yā. ²¹Te ni cajñūhun yá ña:

¿Na vé cuní rō?

Te ni cahān ña:

Cuāha ní jñūhun jeē quiví ndácu ní jññu te conēne ndíndúú séhe ná yáha xiin ní, ñn i lado vāha ní, te inga i lado jecó ní, achí ña.

²²Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jñúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho rí? Achí yá.

Te ni cacahān de:

Cuu sáha ná.

²³Te ni cahān yā jíin de:

Jendaá jeē ndoho ró jñúndóho nájnūhun jeē quíji siquī rī, te ndoho xeēn rō nájnūhun ndoho rí. Te jeē cónēne ró lado vāha ri jíin lado jecó rí,

nasūu rúhū cúu jeē cuáha jnūhun. Chi je íyó túhva cuu tāca tée jeē ní nacāji Tátá rī, te tēe un níhīn. Achí yá.

²⁴ Te uxī gā tēe cáscuáha jíin yá ní cajini de jnūhun yáha. Te ni caquitī ni de nuū uú ñani ún. ²⁵ Te Jesús ni cana ya de, te ni cahān yā jíin de:

Cájini rō ndese cásáha tēe cácujeñhu nuū ñáyuu tācá nación. Chi cándacu níhin de jniñu nuū i, te máá de cáchí ndese coo. ²⁶ Te máá ró jijnáhan ró, chi ma sáha ró súcuan. Chi núu ndé ñn ró cúní cujéñhu, sa suhva cuajniñu ró núu jnáhan ró. ²⁷ Te núu ndé ñn ró cúní cuu nuū, sa suhva sáha ró máá ró mozo nuū jnáhan ró. ²⁸ Chi suni súcuan sáha ruhū, Yaā ní nduu tēe, chi nasūu jéē véji ri jeē cuajniñu ñayuu nuū rī, chi sa suhva véji ri jeē cuajniñu ri nuū ñáyuu. Te cuáha ri maá rí cuu rī návāha jnama ri cuehē ñayuu, achí yá.

*Jeē ní nasávāha ya uū tēe cuáá
(Mr. 10.46-52; Lc. 18.35-43)*

²⁹ Yūcuán na te ni quenda ya jíin de ñuu Jericó. Te cuehē ndasí ñáyuu ni candiquīn i ya. ³⁰ Te yuhíchi un cáyūcu uū tēe cuáá. Te ni cajini de jnūhun jeē yáha Jesús cuahān yā, te ni cacana jee de:

Máá ní jeē cúu ní Séhe yucūn David, cundáhú ni ni sáña, achí de.

³¹ Te ñayuu un ní cacahān i nuū de jeē na cásí de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ni sáña víi, achí de.

³² Te ni jecuiñi Jesús, te ni cana ya ndíndúú tée cuáá un, te ni cajnūhun yá de:

¿Na vé sáha ri jíin ró cáculi rō?

³³ Te ni cacahān de jíin yá:

Jeē na ndúndijin tinūu ná cáculi ná, achí de.

³⁴ Te ni cundáhú ni yā de. Te ni tee ya ndaha ya tinūú de. Te ni candundi-jin-ni tinūú de. Te ni candiquīn de ya cuango de jíin yá.

*Jeē ni quívi Jesús ñuu Jerusalén
(Mr. 11.1-11; Lc. 19.28-40; Jn. 12.12-19)*

21

¹ Te nuū cuácuyajni ya ñuu Jerusalén, te ni jinū yā jíin tée cáscuáha jíin yá ñuu Betfagé, jeē íne jehē yucu Olivos. Te ni taji yá uū tēe cáscuáha jíin yá jeē quíngoo de. ² Te áchí yá jíin de:

Cuáhán ñuu lulí íne ichi núú. Te yūcuán níhīn rō ñn burra, núhni tī jíin ñn burro lulí. Te ndají ró tī, quijicoo ró jíin tī nuū rī. ³ Te núu ndé ñn cahān jíin ró, te cachi rō nuū: Máá Jítoho yō jini ñúhún yá tī, achí rō. Yūcuán na te siáá-ni i tī, quiji ró jíin tī, achí yá.

⁴ Te súcuan ni cuu tācá jniñu yáha návāha squícu jnūhun ni cahān tēe ni nacani jnūhun Yaā Dios nde jenahán, yósó núu tútu:

⁵ Cachi rō nuū ñáyuu ñuu Jerusalén jeē naní ñuu Sión:
Yáhá condēhe ró jeē véji Rey rō.
Tu sájéñhu ya maá yá, chi máá burra-ni yósó yá,
jíin burrito, sēhe quitī ndíso.
Achí tutu.

⁶ Yūcuán na te tēe cáscuáha un cuángoo de, te ni casáha de nájñūhun ni ndacu Jesús jniñu nuū de. ⁷ Te ndéca de burra jíin séhe tī, ni ndeco de nuū yā. Te ni casoó de sahma de síquī tī, te ni jecosō yā tī. ⁸ Te cáhīn cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi. ⁹ Te ñayuu cuango ichi núú jíin ñáyuu cuango ichi yátá, cáculi jee i:

Yōhyo cújéñhu Yaā cúu Séhe yucūn rey David. Yōhyo vāha Yaā cúu Yaā jeē véji jíin jniñu máá Jítoho yō Yaā Dios. Te yōhyo cújéñhu máá Yaā Dios. Achí i.

¹⁰ Te nuū ni quívi ya ñuu Jerusalén, te ndíhi ñayuu ñuu un ní cacuvaā i, te cuehē i cájnūhun jnáhan:

¿Ndé tée cúu tēe yáha? achí i.

¹¹ Te ni cacahān ñayuu vejicoo jíin yá:

Yāha cúu Jesús jeē nácani jnūhun Yaā Dios, jeē véji nde ñuu Nazaret ndaíñū Galilea. Achí i.

*Jeē ní quenehen ya ñayuu ini templo
(Mr. 11.15-19; Lc. 19.45-48; Jn. 2.13-22)*

12 Yūcuán na te ni quīvī Jesús ini templo cáhnu Yaā Dios. Te ni quenehen ya tāca ñáyuu cájeen quitī te cánaxīco núu ñáyuu jeē socō i. Te ni scotúú ndeyī ya tāca mesa tēe cástáyī xūhún, jíin silla tēe cáxīco paloma.

13 Te áchí yá jíin i:

Yósó núu tútu īi jeē cahán Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jijnáhan ró, chi nájnūhun yaū cava ñacuīhná ni canasáha ró. Achí yá.

14 Yūcuán na te sava ñayuu cuaá jíin ñáyuu chacuá ni quecoo i nuū yā ini templo un. Te ni nasávāha ya i. 15 Te sutū cácujeéhnū jíin tēe cástéén tutu ley Yaā Dios, ni cajito de tācá jniñū jéhnū sáha ya, te ni cajini de jeē cácana jee sūchi lúli ini templo: Yōhyo cújéhnū Yaā cúu Sēhe yucūn rey David, achí i. Te ni caquitī ni de. 16 Te ni cacahān de jíin yá:

¿A tu jíni ró jēe súcuan cácahān sūchi yáha? áchí de.

Te ni cahān Jesús jíin de:

Jíni ri. ¿Te á ná tu cahu ró jēe yosó núu tútu īi jeē suhva cáhān ĩn tēe jíin Yaā Dios? Sáha ní jēe tāca sūchi lúli jíin sūchi cájexin, vāha ndasí cáhān i jeē Yaā cujéhnū cúu Cristo. Achí.

17 Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuáá ún.

Jeē ni cáhān yā nuū yújnu higo
(Mr. 11.12-14, 20-26)

18 Te jenéhen inga quīvī cuanuhun yā ñuu Jerusalén, te jíi yā sōco. 19 Te ni jito ya ĩn nundēhe higo, ín yuhíchi. Te ni jehēn yā jehē. Te tú na ndehē ni níhín yā, chí máá ndaha-ni ín. Te ni cahān yā jíin:

Vijna te ma cúun cuítī gā ndehē xinī rō, achí yá.

Te ni ichī-ni yujnu higo ún. 20 Te tēe cáscuáha jíin yá, ni canaa ni de cájito de. Te ni cacajñūhún de ya:

¿Ndese ni sáha ní jēe yachí-ni ni ichī yujnu higo? achí de.

21 Te ni cahān yā jíin de:

Jendaá cahān rī jíin ró, núu candíje ró te tú cani siquí ni rō, te cuu sáha ró jniñū jéhnū nájnūhun ni sáha ri jíin yujnu higo. Te nde jniñū jéhnū ga cuu sáha ró, chí nde cuu cahān rō jeē cújiyo yucu yáha, quihīn nuū mar, te sáha nájnūhun cahān rō. 22 Te tāca jēe cacān tahu rō jijnáhan ró, te núu candíje ró jēe níhín rō, te níhín rō. Achí yá.

Siquí jeē ndíso jniñū Jesús
(Mr. 11.27-33; Lc. 20.1-8)

23 Te ni quīvī tucu ya ini templo cáhnu. Te níni stéén yā jñūhun, te sutū cácujeéhnū jíin tāca tēe jéhnū jeē cándacu jniñū nuū ñáyuu hebreo, ni quecoo de nuū yā. Te ni cacajñūhún de ya:

¿Ndé ní níhín jniñū ró jēe sáha ró jniñū yáha? ¿Te ndé ĩn ni tee jniñū siquí rō jeē sáha ró súcuan? Achí de.

24 Te ni cahān Jesús:

Suni ruhū, cajñūhun rī rohó ĩn jñūhun jijnáhan ró, te núu cuu stío cuíñí rō, yūcuán na te cachi rī nuū rō ndé ní níhín jniñū ri jeē sáha ri jniñū yáha. 25 ¿Ndé ĩn ni tee jniñū siquí Juan jeē ni scuándute de? ¿A Yaā Dios chí tāca tēe? áchí yá jíin de.

Yūcuán na te ni candajñūhun máa de:

Núu cahān yō jeē Yaā Dios ni tee ya jniñū un siquí Juan, te cahān de jíin yó: Núu súcuan ¿te najehē tu ní cácandíje ró de? 26 Te núu cahān yō jeē ñáyuu ni catee jniñū un siquí de, te cáyūhu yó ñayuu, chí ndivii i cácandíje i jeē tēe ni nacani jñūhun Yaā Dios ni cuu ndije Juan. Achí de cácahān máa de.

27 Te ni cacahān de jíin Jesús:

Tu cájini rī, achí de.

Yūcuán na te ni cahān yā jíin de:

Ni ruhū, suni ma cachi rī nuū rō ndé ĩn ni tee jniñū siquí rī sáha ri jniñū yáha, achí yá.

Jñūhun yátá siquí uú sēhe yí

28 Te ni cahān gā yā jíin de:

Cuni nahín ró jñūhun yátá yáha: ĩn tēe ni ĩyo uú sēhe yí de. Te ni cahān de jíin ĩn i: Séhē, quihīn rō taxín ró

ndehē uva rī vijna, áchí de. ²⁹ Te ni cahān i: Ma quihín na, áchí i. Te ni cunúu, te ni nacani ni i, te cuahān i nuū jniñu ún. ³⁰ Te tēe un ní jehēn de nuū inga sēhe de, te suni súcuan ni cahān de jíin i. Te ni cahān i: Cuu núu súcuan, te quihín na, áchí i. Te tu ní jéhén i. ³¹ ¿Te ndese cájeni ni rō? Jeē ndíndúú i, ¿ndé ñn i ni squícu jniñu cúní tatá i? áchí yá.

Te ni cacahān de:

Sūchi jēē ni cahān de jíin xihna gā, achí de.

Te ni cahān Jesús jíin de:

Súcuan cúu, te jendaá cahán rī jíin ró jeē tēe cástútú xúhun renta jíin ñahan cájica jnéni, yachí canacani ni i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te máá ró jijnáhan ró chi ma quíví ró. ³² Chi ni quiji Juan, ni steén de ndese condiquín rō jnūhun ndaā, te tu ní cá candíje ró jnúhun ni cahān de. Te sa suhva tēe cástútú xúhun renta jíin ñahan cájica jnéni, ni cacandíje i jnūhun ni cahān de. Te máá ró, vésú ni cajito ró jēē ní cacandíje i, te tu ní canacani cuítí ni rō jeē candíje ró. Achí yá.

Jnūhun yátá síquī tēe néé cájajniñu nuū uva

(Mr. 12.1-12; Lc. 20.9-19)

³³ 'Cuni sōho inga jnūhun yátá jíin náhan ró: Ni iyo ñn tēe chíí ñuhun. Te ni nachuhun de cuehē ndehē uva. Te ni jesi de corral, te ni sáha de ñn nuū cúhun ndehē un táxín. Te ni jeni de ñn vehe súcún návāha cuu coto de níí cáhnu.

'Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de. ³⁴ Te máá tiempo ndutútú uva, te ni tají de jecu mozo cuanuquihin sava uva nuū tēe cájajniñu ún. ³⁵ Te tēe un ní cajniñi de mozo un. Te ñn i ni cacani de, te inga i ni cajehni de, te inga i ni cajēhe de yuū xiní. ³⁶ Te tēe chíí uva ni tají tucu de jecu gā mozo cuangoo, cuehē gā vésú jeē xihna ñúhún. Te suni súcuan ni casáha tēe un jíin ndihí mozo un.

³⁷ 'Te jeē sándihí na te ni tají de sēhe de cuahān. Te jéni ni de: Tēe ún chi cuatáhú de jíin náhan de nuū sēhe ri. ³⁸ Te tēe cájajniñu ún, núu ní cajito de nuū sēhe tēe chíí uva, te ni cacahān maá: Tēe chíí táhū cúu jeē yáha. Na cáhni yō de, te ndōo tahū de cuu yó, áchí. ³⁹ Te ni cajniñi de i, te ni caquenehen de i inga lado, te ni cajehni de i. Achí yá.

⁴⁰ Yūcuán na te ni cajnūhun yá de:

Núu súcuan te núu na quíji tēe chíí uva un, ¿te ndese sáha de jíin tēe cájajniñu ún? áchí yá.

⁴¹ Te ni cacahān de jíin yá:

Ma cundáhú cuítí ni de tāca tēe cáháha jniñu néé un, chi cahni de. Te cuāha de ñuhun cáá uva un núu inga sava tēe sájniñu nuū, cuu sava de ndehē jíin. Te quíví ndutútú ndehē, te tēe ún nacuāha de sava ndehē nuū tēe chíí uva. Achí de.

⁴² Te ni cahān Jesús jíin de:

¿Te á ná tu cahu ró jnúhun yáha jeē yosó núu tútu ií, jeē ruhū cúu nájnūhun ñn yuū? Chi áchí tutu:

Yuū jeē ní casquéhichí tēe cájeni vehe, yuū yáha nduu jeē quítuu vehe.

Máá Jítóho yō Yaā Dios ni sáha ya súcuan,

te cánaa ni yō jító yó jniñu yáha.

Achí tutu. ⁴³ Núu súcuan te cáhán rī jíin ró jeē cujiyo-ni jeē ndácu Yaā Dios jniñu nuū rō jijnáhan ró, te nacuāha ya jniñu un núu inga ñayuu jeē squícu váha i jniñu ndácu ya nájnūhun cúní yā. ⁴⁴ Te ñayuu tu cá candíje, ndoho i nájnūhun ndóho ñayuu jeē cotúú síquī yuū te jnáhnú i. Te quíví sándaā Yaā Dios cuēchi, te ñayuu tu cá candíje, ndoho i nájnūhun ndóho ñayuu jeē níinga yuū síquī i te cundihí i sáha. Achí yá.

⁴⁵ Te sutū cácujeñnu jíin tēe grupo fariseo ni cajini sōho de tāca jnúhun yátá ní cahān yā. Te ni cajecūhun ni de jeē síquī maá de cúu jnūhun yátá ní cahān yā síquī tēe cájajniñu nuū uva jíin tēe cájeni vehe. ⁴⁶ Te ni canducú de modo jniñi de ya. Te cáyūhú de jeē quítí ni ñayuu, chi cájeni ni i jeē tēe nácani jnūhun Yaā Dios cúu ya.

Jnūhun yátá síquī vico nándāha

22

¹ Yūcuán na te ni cahān tucu Jesús inga jnūhun yátá jíin de jíjnáhan de:

² Súcuan cúu jeē ndácu Yaā andiví jniñu nuū ñáyuu: Cúu nájnūhun ñin rey jeē sáha de ñin vico jeē nándāha sēhe yí de. ³ Te ni tají de tāca mozo de cuacana ñayuu jeē ni cáhān de jíin jéē quíjicoo. Te ñayuu ún tu ní cácu ni quíjicoo i. ⁴ Te ni tají tucu de jecu gā mozo quingoo, te áchí de jíin: Cahān jíin ñáyuu ní cana ri un jéē iyó túhva ndeyu. Chi je ni jehni rī stiquí rī jíin táca gá quití ní nduu, te ndíhi je iyó túhva. Nehen jíjnáhan ró vico nándāha. Achi rō jíin i. Achí de. ⁵ Te ñayuu ní cana de ún tu ní cása ha i cuenta. Chi ñin i cuahān nuū ítu i, te inga i cuahān nuū jniñu sáha i. ⁶ Te sava ga i ni cajni i tāca mozo rey, te ni casacatā i nuū, te ni cajehni i. ⁷ Yūcuán na te yōhyo ni quití ni rey. Te ni tají de soldado de ni jengoo, ni cajehni de ñayuu ní cajehni ndíyi ún, te ni cajehmu de ñuu i. ⁸ Yūcuán na te ni cahān de jíin sava ga mozo de: Ndihi je iyó túhva jeē cóo vico nándāha. Te ñayuu ní cana ri ún, tu iyó váha jeē quíjicoo i chi nasūu ñáyuu váha cácuu i. ⁹ Núu súcuan te cuahān jíjnáhan ró táca núu náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de. ¹⁰ Te ni quendacoo mozo un cuángoo tācá ichi. Te ni castútú de ndíhi ñayuu ní canihīn de, cúu ñayuu cunéé, cúu ñayuu váha. Te súcuan te ni chitú ñáyuu ini vehe nuū iyó vico nándāha.

¹¹ Te ni quívi rey ini vehe jeē cahán de jíin ñáyuu ni cutútú. Te ni jito de nuū ñin tēe jeē tu ñūhun sahma jeē ni jéhe de cuhun ñayuu quíjicoo vico nándāha. ¹² Te ni cahān de jíin tēe ún: Amigo, ¿ndese ni quívi ró yáha jéē tu ñūhun ró sahma vico nándāha? áchí de. Te máá tēe ún tu ní cáhān cuítí de. ¹³ Yūcuán na te ni cahān rey jíin tēe cájeni cohō: Jni de te cuhni rō ndaha de jehē de, te quenehen ró de na quíhín de nuū quéhe nuū néē. Te yūcuán ndáhyū de te nacayíhi yuhu de jeē ndóho xeēn de. Achí rey.

¹⁴ Chi cána Yaā Dios cuehē ñayuu jeē na cándíje i. Te jecu-ni i candíje, te máá i nacāji ya jeē ndúu i sēhe ya. Achí Jesús.

Siquí xūhun renta

(Mr. 12.13-17; Lc. 20.20-26)

¹⁵ Yūcuán na te cuangoo tēe grupo fariseo. Te ni candajnūhún de núu ndese sáha de návāha cahān yā ñin jnūhun jeē nihín de cuēchi siquí yā.

¹⁶ Te ni catajé de jecu tēe cáscuáha jíin máá de jíin tēe grupo Herodes cuangoo de. Te ni cacahān de jíin yá:

Maestro, cájini na jéē tēe cáhān ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ni ñin ñayuu siquí ní, chi tu sáha ní cuenta ndese cúu ñin ñin i, chi inuú-ni sáha ní jíin i. ¹⁷ Núu súcuan te cahān ní ndese jéni ni ní: ¿A iyó váha jeē chúnaa yō renta nuū rey nación Roma jeē jni nación yō, chí tuú? áchí de.

¹⁸ Te ni jini Jesús jeē cájito ndee de ya. Te ni cahān yā jíin de:

Tēe stáhú-ni cácuu ró. ¿Najehē cájito ndee rō ruhū? ¹⁹ Stéén xūhun jéé jéconaa renta na cóto ri, achí yá.

Te ni castéén de ñin denario nuū yā. ²⁰ Te ni jito ya, te ni cajnūhun yá de: ¿Ndé ñin nuū cúu jeē ndeé nuū xūhun yáha, te ndé síhví cúu jeē ndeé yāhá?

²¹ Te ni cacahān de jíin yá:

Nuū jíin síhví rey un cúu, áchí de.

Yūcuán na te ni cahān yā jíin de:

Núu súcuan te nacuāha ró núu rey un jéé yíhi cuenta nuū de, te nacuāha ró núu Yaā Dios tāca jéé yíhi cuenta nuū maá yá, achí yá.

²² Te nuū ní cajini de jeē ndichí ní cahān yā jnūhun yáha, te ni canaa ni de, te ni castóo de ya, te cuangoo de.

Jeē ní cacajnūhún de siquí jeē nátecu ndíyi

(Mr. 12.18-27; Lc. 20.27-40)

²³ Te suni quívi un ní quecoo jecu tēe grupo saduceo nuū yā. Te tēe un cácahān jeē tu nátecu cuítí ndíyi. Te ni cacahān de jíin yá siquí ñin jnūhun, áchí de:

²⁴ Maestro, Moisés ni cahān de jeē nūu ñn tēe cuu de, te ndōo ñasihí de, te nūu tú sēhe de ní íyo jíin ña, nūu súcuan te cánuú jeē ñani de naquihin ñasihí de, te sēhe de jeē cácu jíin ña nucuiñi nuū ndíyi ñani de. Achí Moisés. ²⁵ Te ñuu na ní íyo uxā ñani. Te tēe nūu ní quijnáhan de jíin ñahan. Te ni jihí de. Te jeē tú sēhe de ní íyo, te ni ndōo ñasihí de nuū ñani de. ²⁶ Te tēe ún suni ni jihí de, te tú na sēhe de ní íyo tucu. Te suni súcuan tēe unī, nde jíin ndihúxá de. ²⁷ Te nuū ní ndihí de ni cajihí, te suni ni jihí ñahan ún. ²⁸ Nūu súcuan te quiví nátecu ndíyi, ¿ndé ñn de cuu ña ñasihí de? Chi ndihúxá de ni condeca de ña. Achí de jíin yá.

²⁹ Yūcuán na te ni cahān yā jíin de:

Yōhyo cástívi ró jnūhun siquī jeē tu cájecūhun ni rō jeē cahán tutu ñi, ni tu cájini rō jeē iyó poder Yaā Dios jeē nastécu yā ndíyi. ³⁰ Chi quiví nátecu ndíyi, te tuá na jnūhun quijnáhan tēe jíin ñahan coo. Chi coo i nájnūhun ndajéhé Yaā Dios andiví. ³¹ Te siquī jeē nátecu ndíyi, ¿á tu ní cácahu ró tutu jnūhun jeē cahán Yaā Dios jíin ró? ³² Máá rí cúu Yaā Dios Abraham jíin Isaac jíin Jacob, achí Yaā Dios. Chi vēsú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu ñí cáni. Achí yá jíin de.

³³ Te ñayuu un ní canaa ni i cájini nahín i jnūhun stéén yā.

Jniñu cánuú ndasí gá jeē ní ndacu Yaā Dios

(Mr. 12.28-34)

³⁴ Yūcuán na te tēe grupo fariseo ni cajini de jeē ní cajesi tēe saduceo yuhu de ni sáha ya. Te ni candutútú de nuū yā. ³⁵ Te ñn de jeē cúu tēe stéén tutu ley Yaā Dios, ni cajnūhún de ya, chi coto ndee de ya cuní de:

³⁶ Maestro, ¿ndé ñn cúu jnūhun ndácu jniñu cánuú ndasí gá nuū tútu ley? achí de.

³⁷ Te ni cahān Jesús jíin de:

Coo manī ndasí ró jíin máá Jítoho rō Yaā Dios, nde jnāā ndasí ró sáha ró ndihí jeē cúsi ni yā, nde jíin ini jíin ánuá rō, jíin ñí jéē níjnūní rō, achí tutu. ³⁸ Yáha cúu jniñu ndácu

ya jeē cujéhu ga te cánuú ndasí gá.

³⁹ Te jniñu uū jeē ní ndacu ya, suni súcuan cáhan: Cundáhú ni rō jnāhan ró nájnūhun cundáhú ni rō maá ró.

⁴⁰ Te chíji ndíndúú jnūhun yáha ní quenda ndihí ley jeē ní tee Moisés, jíin ndihí jeē ní castéén tēe ni canacani jnūhun Yaā Dios, achí yá.

Siquī jeē cúu Cristo sēhe yucūn David

(Mr. 12.35-37; Lc. 20.41-44)

⁴¹ Te níni cáyūcu tútu gá tēe fariseo un, te Jesús ni cajnūhun yá de:

⁴² ¿Ndese cájeni ni rō siquī Cristo? ¿Sēhe ndé yucūn cúu ya?

Te ni cacahān de:

Sēhe yucūn David, achí de.

⁴³ Te ni cahān yā jíin de:

Nūu súcuan ¿te ndese cúu jeē David ni cahān de Jítoho de ya, ni sáha Espíritu Santo nde jenahán? Chi ni cahān de:

⁴⁴ Máá Jítoho yō Yaā Dios ni cahān yā jíin Jítoho rí, Yaā quiji:

Cucōo ró lado váha ri nuū cujéhu ró, te na sáha ri jeē quende rō poder táca jéé cájito uhū rohó.

Achí Yaā Dios. Achí David. ⁴⁵ Te nūu sēhe yucūn David cúu Cristo, ¿te ndese cúu jeē ni cahān de jeē Jítoho de cúu ya? áchí yá.

⁴⁶ Te ni ñn de tu ní cúu stió cuiñí cuiñí de jnūhun nuū yā. Te nde quiví ún tuá ni ñn de ní chūndeyí ni de cajnūhún de ya.

Jeē ni cahān yā jeē iyó cuéchi de jíjnáhan de

(Mr. 12.38-40; Lc. 11.37-54; 20.45-47)

23

¹ Yūcuán na te ni cahān Jesús jíin ñáyuu jíin tēe cáscuáha jíin yá:

² Tēe cástéén tutu ley Yaā Dios jíin tēe grupo fariseo, cájeni ni de jeē ndíso jniñu de jeē stéén de ley jeē ni jéhe ya nuū Moisés. ³ Nūu súcuan te cuatáhú ró te squícu ró táca jéé cándacu de nuū rō. Te ma sáha ró nájnūhun cásáha máá de. Chi cácahān-ni de, te tu cásquícu de. ⁴ Chi suni cástéén de táca ley ni catava maá de jeē yí sáha, te cátee de siquī ñáyuu, te tu cácundeyí

i squícu i. Te máá de jijnáhan de, chi ni ñn xinī ndáha de tu cáscánda de jeē squícu de. ⁵ Te máni siquī jeē na cuájnuhún ñáyuu de cúu ndihi jeē casáha de. Chi cánujnahan ni de cuhni de cuehē jnūhun tutu iī jneē de jíin ndaha de. Te suni cásacáni ga de yuhvā yusáhma de jeē steén jeē cácujeñnu ga de vēsú inga ñayuu. ⁶ Te cánujnahan ni de cucōo de nuū silla yñúhún gá nuū cáyeji ñayuu vico, jíin silla yñúhún gá ini vehe iī sinagoga. ⁷ Te suni cánujnahan ni de jeē cahán yñúhún ñáyuu jíin de nuū calle, jíin jéē cahán i maestro jíin de.

⁸ Te máá ró jijnáhan ró, ma cuáha ró jnúhun jeē cahán ñayuu maestro jíin ró. Chi inuú cácuu ndihi ró jéē cácuu ró hermano, te íyó ñn-ni Maestro ró jeē cúu ruhū, Cristo. ⁹ Te ma chiñúhún ró ni ñn tēe ñayivi yáha jeē cahán ró padre jíin de. Chi íyó ñn-ni Tátá ró jijnáhan ró, Yaā ndeé andiví. ¹⁰ Te suni ma cuáha ró jnúhun jeē cahán i jitoho jíin ró. Chi íyó ñn-ni Jitoho ró, te suu cúu ruhū, Cristo. ¹¹ Te tēe mēñnu ró jijnáhan ró jeē jejniñu nuū jnáhan, suu de cúu jeē cujéñnu ga. ¹² Chi tēe jeē sajeñnu de máá de, sa ndululí de. Te tēe jeē sálulí de máá de, sa ndujéñnu de.

¹³ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cájesi ró jeē quívi ñayuu ndaha Yaā andiví jéē ndacu ya jniñu nuū i. Chi tu quívicoo máá ró, ni tu cájēhe ro jnúhun quívicoo ñayuu nducú quívi.

¹⁴ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cáquende ró vehe ñahan ní caquendōo ndáhú. Yūcuán na te cájicān tahu nahán ró návāha cani ni ñayuu jeē tú na cuēchi ró. Jeē yūcuán xeēn gā ndoho ró castigo.

¹⁵ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi níñuhun íchi jíin ní mar cájica cuu ró cánducú ró ñn ñayuu scandíje ró sáhān maá ró. Te núu ni candíje i, te cásáha ró

jéē vihyá gā cúu cuēchi i jeē quihín i infierno vēsú maá ró.

¹⁶ 'Nacā xeēn ndoho ró, chi cácuu ró nájnūhun tēe cuáá jéē steén ichi nuū ñáyuu. Chi cácahān rō: Núu ndé tēe jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō. ¹⁷ Tēe cánéé tēe cuáá cácuu ró jéē castívi ró jnūhun cácahān rō. ¿Ndé ñn cúu jeē cujéñnu ga, á oro un chí Yaā Dios jeē ndeé ini templo jeē sáhií oro un? ¹⁸ Te suni cácahān rō: Núu ndé tēe jéjnūhun téyí de, te núu cahān de jeē Yaā Dios jeē chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí ndajniñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. ¹⁹ Tēe cánéé tēe cuáá cácuu ró jéē castívi ró jnūhun cácahān rō. ¿Ndé ñn cúu jeē cujéñnu ga, á ndajniñu yúcu nuū altar, chí Yaā Dios jeē sáhií yā ndajniñu ún? ²⁰ Núu súcuán te tēe jéjnūhun téyí, te núu ndácunehen de Yaā Dios jeē chíí altar, núu súcuán te nde jíin ndajniñu yúcu nuū altar ndácunehen de. ²¹ Te tēe jeē jéjnūhun téyí, te núu ndácunehen de templo, núu súcuán te nde jíin Yaā Dios jeē ndeé ini templo ndácunehen de. ²² Te tēe jéjnūhun téyí, te núu ndácunehen de andiví, núu súcuán te suni ndácunehen de mesa Yaā Dios te nde jíin máá Yaā Dios jeē ndeé nuū mesa un.

²³ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cásáha ró úxī uxī nuhnī tamínú jíin yucū anís jíin yucū comino, te cásocō ró ñn ñn siquī tāca úxī un núu Yaā Dios. Te cástóo ró jnúhun cánuú ndasí gá nuū ley, suu jeē cáca ndaā rō, jíin jéē cundáhú ni rō jnáhan ró, jíin jéē candíje ró. Tāca jéē yáha cánuú sáha ró núu, te suni ma stóo ró jéē socó

rō tāca yūcū ún. ²⁴ Cácuu ró nájñūhun tēe cuáá jēē steén ichi nuū ñayuu. Chi cásquicu ró ñin jeē lulí gá un, te cástoo ró jēē cánuú gá. Te suu cúu nájñūhun jeē cátava rō chūcún ndíhī jeē ñūhun nuū ndúxi, te cácocó ró ñin quiti cáhnu jeē naní camello.

²⁵ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi nájñūhun jeē cánacate ró yátā vaso jíin yátā cohó. Te ichi íni rō chi ñūhun máni máá jñūhun cuíhná jíin jñūhun ndíyo ni. ²⁶ Tēe cuáá cácuu ró, fariseo. Xihna gā sáha ró jēē coo ndoo ini anuá rō, te yūcuán na te suni coo ndoo tāca jēē casáha ró jēē cájito ñayuu nuū.

²⁷ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cándāa ró nájñūhun vehe ndíyi nuū panteón jeē cáyaa. Chi ichi yátā jíto luu, te ichi íni ñūhun chitú yiqui ndíyi jíin táca jēē tehyú. ²⁸ Te súcuan cácuu máá ró, chi ichi yátā rō casáha ró jeē tēe ndaā cácuu ró núū ñayuu. Te ichi íni rō ñūhun chitú jñūhun stáhú-ni jíin jñūhun néé.

²⁹ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi casáha ró vehe siquī nuū yíndūji ndíyi jíi rō, tēe ni canacani jñūhun Yaā Dios nde jenahán. Te casáha luu ró vehe siquī nuū yíndūji tāca tēe ni iyo ndaā. ³⁰ Te cácahān rō: Núu jeē suni yúcu yó tiempo jeē ní cotecu ndíyi jíi yō, te ma squívī nduu yō jíin de jeē cáhni yō tēe ni canacani jñūhun Yaā Dios, achí ró. ³¹ Te súcuan cácahān ndaā rō jeē máá ró cácuu yucūn ñayuu ni cajehni tēe ni canacani jñūhun ya. ³² Núu súcuan te tāca cuéchi jeē ní casquéjéé ndíyi jíi rō, máni un casáha ga máá ró.

³³ 'Va sēhe coō cácuu ró, chi xeēn rō nájñūhun coō. ¿Nde se cácu ró jēē ma jnahnú ndetū rō quingoo ró infierno?

³⁴ Núu súcuan te tají rí tāca tēe nacani jñūhun Yaā Dios nuū rō, jíin táca tēe ndíchí jēē castéén jñūhun ya. Te sava de cahni rō, te sava de cata caa ró jicā cruz. Te sava ga de cani ró de

ini tācá vehe ñi sinagoga, te scúnu ró de quingoo de tācá ñuu. ³⁵ Te súcuan te condee cuéchi siquī maá ró jeē ní cajehni jíi rō tāca tēe ndaā, xihna gā nde Abel tēe ndaā, te nde Zacarías sēhe Berequías, tēe ni cajehni de ini templo sava mēhñu cuarto ñi jíin altar. ³⁶ Jendaá cahán rī jíin ró jeē tāca cuéchi yáha condee siquī ñayuu iyó vijna.

Jeē cucuíhyá ni yā jíto ya ñuu Jerusalén

(Lc. 13.34-35)

³⁷ 'Róhó ñuu Jerusalén, jéhni rō tēe cánacani jñūhun Yaā Dios, te jēhe ro yúu xinī tēe tají Yaā Dios vējicoo nuū rō. Te cuehē jínu ni cuni rī nastútú rí sēhe ró, nájñūhun ndují jēē nastútú tí sēhe tí chíji ndijēn tí, te tu ní cúní rō. ³⁸ Núu súcuan te vijna te stóo uun na ri rohó jíin sēhe ró. ³⁹ Chi cáhān rī jíin ró jēē ndé vijna te ma cóto cuíti gā rō nuū rī, chi nde quiji quívī jeē cahán sēhe ró: Yōhyo vāha Yaā cúu Yaā véndiji jíin jniñu máá Jítoho yō Yaā Dios, achí i. Achí yá.

Jeē ní cachi yā jeē náā templo
(Mr. 13.1-2; Lc. 21.5-6)

24

¹ Te ni quenda Jesús ini templo cáhnu cuahān yā. Te ni quecoo tēe cáscuáha jíin yá, te ni cacahān de jíin yá siquī tācá vehe jeē ndejnáhan jeē cúu máá templo un. ² Te ni cahān yā jíin de:

Tāca jēē cájito ró yáha, jendaá cahán rī jíin ró jeē quiji quívī jeē ma cóso jnáhan ga ni ñin yuū, chi ndíhi jnanū. Achí yá.

Na seña coo nuū cuácuyajni ndíhi ñayívī

(Mr. 13.3-23; Lc. 21.7-24; 17.22-24)

³ Te ni jehēn yā jíin tēe cáscuáha jíin yá nde yucu Olivos, te ni cucōo ya yūcuán. Te ni quecoo de nuū yā, te ni cacajñūhun sín de ya:

Castūhun ní ndé quívī coo tāca jēē ní cachi ní jēē coo. ¿Te na seña coo núu ni cuyajni quívī ndíji ní jíin jēē jínu ñayívī? áchí de.

⁴ Te ni cahān Jesús:

Coto ró jéē ma stahú ni ñn de róhó. ⁵ Chi quiijicoo cuehē tēe jeē stahú jín sáhví rí. Máá rí cúu Cristo, achi de. Te súcuan stahú de cuehē ñayuu. ⁶ Te nihīn rō jnūhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quivī ndihī ñayīví. ⁷ Chi ndonda nación siquī inga nación, te ndonda ñuu siquī inga ñuu jeē cua-jnáhan. Te coo jnamā jín cuéhyī xeēn. Te cháha chúcuan jnáa. ⁸ Te tāca jéē yáha cácuu jnūndóho quejéé xíhna ñúhún gá.

⁹ Yūcuán na te nastúu i róhó jínáhan ró jéē stóho i róhó te cahni i róhó. Te ndihī ñayuu quitī ni i nuū rō jeē siquī ruhū. ¹⁰ Te quivī ún chi cuehē ñayuu candíje caca yátá i, te quitī ni i nuū jnáhan i, te nastúu jnáhan i. ¹¹ Te canecoo cuehē tēe stahú, te cahān de jeē jnūhun Yaā Dios cáncani de, te stahú de cuehē ñayuu. ¹² Te nducuehē jniñu néé, te jeē yúcuan cuehē i ma cóo manī gā i. ¹³ Te ñayuu cuiñi nihīn jín jnūhun ri nde quivī jínu, ñayuu ún chi cácu. ¹⁴ Te jnūhun yáha siquī ndese ndácu Yaā Dios jniñu, cuitē núu ní cáhnu ñayīví, návāha cuni ñayuu tāca nación. Yūcuán na te jīnu ñayīví.

¹⁵ Te Daniel, tēe ni nacani jnūhun Yaā Dios, ni tee de jnūhun ñn tēe néé jéē quiji. Te róhó jéē cácahu tutu ún, na jécūhun ni rō. Chi ñn quivī te cuni rō jeē sáha ndevāha de jeē stívi de tāca ndajniñu iñ ini templo, te cuiñi de ini lugar i. ¹⁶ Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. ¹⁷ Te ñayuu cáyūcu núu quéhe, ma ndívi i ini vehe jeē quénehen i ndajniñu i, chí cánuú cunu yachī i návāha cácu i. ¹⁸ Te ñayuu cáhīn nuū ítu, ma ndíji i vehe jeē quihīn i sahma i. ¹⁹ Te quivī ún nacā jeē ndahú ñahan cáñuhun sēhe jín ñahan cándeca yiquín, chí ma cúnihīn ña cunu yachī ña. ²⁰ Te cacān tahu rō jeē ma quiji jnūndóho un jéē cunu ró máá tiempo cúun yuhvā ni quivī ndétátú. ²¹ Chi jeē quejéé un te coo

cuehē jnūndóho xeēn, jeē ná tu coo súcuan nde quivī ní jecōo ñayīví te nde vijna. Te jeē ndihī jnūndóho ún te ni ma cóo ga jeē súcuan. ²² Te núu tú nastívi Yaā Dios tiempo jnūndóho ún, te ni ñn ñayuu ma cácu cuiti i. Te jeē siquī ñayuu cáncandíje jeē ní nacāji ya, jeē yúcuan nastívi ya tiempo un.

²³ Núu súcuan te núu ñn ñayuu cahān jín ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéē cahān i. ²⁴ Chi canecoo tēe cástahú jéē achi de jeē Cristo cúu de, chí achi de jeē tēe nácani jnūhun Yaā Dios cúu de. Te sáha de jniñu jéhu jeē naa ni ñayuu coto i, návāha stahú de nde maá ñayuu ní nacāji ya, te núu na cúu. ²⁵ Je ni castūhun rí nuū rō vijna nde ná tu coo. ²⁶ Núu súcuan te núu cahān ñayuu jín ró: Cuácondēhe ró, chí nde nuū ñúhun téhé íne ya, achi i, te ma quihīn rō condēhe ró. Chí núu cahān i: Nehen condēhe ró, chí ini vehe yāha íne ya, achi i, te ma candíje ró jínáhan ró. ²⁷ Chi nájnūhun jeē ndíndēe sáha taja te cúndijin nde ichi núu cáne niāndii jín ndé ichi núu quéé niāndii, suni súcuan coo quivī ndiji ruhū, Yaā ní nduu tēe, chí ndihī ñayuu coto. ²⁸ Te nájnūhun jeē cutútú téji ndé-ni cúu nuū catú quitī ní jihī, suni súcuan coo tāca jéē ni cáhān rī ndé-ni cúu-ni nuū cáhīyo ñayuu.

Ndese coo quivī ndiji Yaā ní nduu tēe
(Mr. 13.24-37; Lc. 21.25-33; 17.26-30, 34-36)

²⁹ Yūcuán na te núu ni ndihī tāca jnūndóho quivī ún, te cojnúu niāndii, te yoō ma ndí gā. Te níngoo quimī andívi. Te tāca jéē íin andívi chí quisi i. ³⁰ Yūcuán na te coto ñayuu nuū maá rí, Yaā ní nduu tēe, ndíji ri ichi andívi. Te ndahyū ñayuu tāca nación ní cáhnu ñayīví. Te coto i nuū ruhū, Yaā ní nduu tēe, ndíji ri jín vícō andívi, te condiso ri cuehē poder, te yōhoyo luu kujéhu ri. ³¹ Te tají rí ndajéhé rī quingoo, te tivī nihīn ya trompeta. Te quinastútú yá ñayuu ní

nacāji ri ndicúún lado ñayīví, nde ñn lado ñayīví jíin ndé inga lado.

³² 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē je ni cuyajni tiempo jihní. ³³ Te suni súcuan núu ni cajini rō jeē ní quejéé cúu tǎcá jniñu jeē ni cáhān rī, yūcuán na te na jécūhun ni rō jeē ní cuyajni quivī ndiji ri, te yachī coo. ³⁴ Jendaá cahán rī jíin ró jeē ma cúu ndihī ñayuu jeē cóto jnūndóho ún, chi nde squícu ndihī jniñu ún. ³⁵ Andiví jíin ñáyīví chi naa, te tǎca jnúhun cáhān rī chi ma náā, chi ndihī squícu.

³⁶ 'Te quivī jíin hora jeē ndíji ri, tú ni ñn ñayuu jiní, ni máá ndajéhé cáhīyo andiví, ni máá rí, Sēhe Yaā Dios. Chi máá ñn ni Tátá rī Yaā Dios cúu jeē jiní.

³⁷ 'Chi nájnūhun ni cuu quivī ni íyo Noé, suni súcuan coo quivī ndiji ruhū, Yaā ní nduu tēe. ³⁸ Chi quivī ún, nde ná tu cuun saū xeén, te cáyeji i cájihi i, cándāha i, te cájēhe i sēhe síhí i jeē nándāha, nde ni jinū quivī jeē ni quiví Noé ini barco cáhnu jeē naní arca. ³⁹ Te tu ní cácandíje ñayuu jeē cuun saū xeén, te ni cuun, te ni ndaa ndute ni cajihī ndihī i. Te suni súcuan coo núu na ndíji ruhū, Yaā ní nduu tēe. ⁴⁰ Te quivī ún cone uū tēe sájniñu nuū ítu. Te ñn de naquihin ri, te inga de ndōo. ⁴¹ Te coo uū ñahan jeē ndíco cáhnu, te ñn ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chi tu ní cácandíje i.

⁴² 'Núu súcuan te ndito na cóo ni rō, chi tu cájini rō na quivī ndiji Jitoho rō. ⁴³ Te na chúhun ni rō jeē cahán jnūhun yátá yáha: Tēe chíí vehe, núu jeē jiní de na hora quiji ñacuīhná, te condito de, te ma cuáha de jnūhun sácuihná ndajniñu vehe de núu. ⁴⁴ Te róhó jíjnáhan ró, suni súcuan coo tūhva ró, chi máá hora jeē tú na vé cájeni ni rō, te ndiji ruhū, Yaā ní nduu tēe.

Jnūhun yátá síquī mozo
(Lc. 12.41-48)

⁴⁵ 'Núu súcuan te coo ró nájnūhun ñn mozo jeē ndíto xinī te squícu vāha. Te máá patrón ni jeni de mozo un jéē

cóto i ñayuu vehe de, návāha scáji i máá hora. ⁴⁶ Te yōhyo ndetū mozo un jéē núu ni ndee patrón, te cuni de jeē súcuan squícu vāha i. ⁴⁷ Jendaá cahán rī jíin ró jeē cani de mozo un jéē cóto i ndihī ndajniñu de. ⁴⁸ Te núu mozo sáha néé cúu i, te jéni ni i jeē ma ndíji yachī patrón i, ⁴⁹ te quejéé i cani i jnáhan mozo i, te caji i coho i jíin tēe cánajīni, ⁵⁰ núu súcuan te ndee-ni patrón quivī jeē tu ndétu i jíin hora jeē tú na vé jéni ni i. ⁵¹ Te stóho xeén de i, te squiví de i nuū cáhīn tēe stáhú-ni. Te yūcuan ndáhyū i te nacayihí yuhu i jeē ndoho xeén i. Achí yá.

Jnūhun yátá síquī uxī sūchi síhí

25

¹ 'Te suhva cúu jeē ndácu Yaā andiví jniñu nuū ñayuu: Cúu nájnūhun ñn vico nándāha. Te ni íyo uxī sūchi síhí jeē ní caquihin i linterna cándaha i, te ni quendacoo i cuajnahan i ñn tēe nándāha. ² Te uhūn i chi tú ndito xinī i, te uhūn i chi ndito xinī i. ³ Te sūchi tú ndito xinī, cándaha i linterna i, te tu cándaha i petróleo jeē náchuhun i. ⁴ Te sūchí ndito xinī, chi cándaha i botella petróleo jíin linterna i. ⁵ Te níní cúcuéé quiji tēe nándāha ún, te ni quee māhná, te ni caquixī ndihī i. ⁶ Te nuū ní cuu sava ñuú, te ni cajini i jeē cácana jee: Je vēji tēe nándāha. Cuángoo quijnahan rō de jíjnáhan ró, áchí. ⁷ Yūcuán na te tǎca sūchi síhí un ní candonda i, te ni casátūhva i linterna i. ⁸ Te sūchi tú ndito xinī, ni cacahān i jíin sūchi ndito xinī: Cuāha jecu petróleo nuū rī jíjnáhan ró, chi cuandahvā linterna rī, achí i. ⁹ Te ni cacahān sūchí ndito xinī: Ma cúu, chi ma cánda jeē cúu máá rí jíin máá ró. Vāha ga quingoo ró núu cúyāhu, te cuaan ró jéē cúu máá ró. Achí i. ¹⁰ Te níní cuángoo i cuaan i, te ni quee-ni tēe nándāha. Te sūchi cáhīyo tūhva un, ní quivícoo i jíin de vico nándāha de. Te ni ndihyū yehyí. ¹¹ Te ni cunúu, te ni quecoo uhūn gā sūchi síhí un. Te ni cacahān i jíin tēe nándāha: Nune ní yéhyí na quivícoo ná, achí i. ¹² Te ni

cahān maá de: ¿Ndé nuū véjicoo ró? Chi tu jíni rī rohó, áchí de. Achí yá.

¹³ Yūcuán na te ni cahān yā:

Núu súcuan te ndito coo ni rō, chi tu cájini rō na quivī na hora ndiji ruhū, Yāā ní nduu tēe. Achí yá.

Jnūhun yátá síquī tée ní jēhe núu xūhun núu tāca mozo

¹⁴ 'Te suhva cúu jeē ndácu Yāā andivī jniñu nuū ñáyuu: Cúu nájnūhun ñn tēe jeē quihīn jicá de inga ñuu. Te nde ná tu quihīn de te ni cana de mozo de jíjnáhan, te ni jēhe núu de xūhún de nuū i, jeē na sájniñu i jíin návāha nducuehē.

¹⁵ 'Te nuū ñn i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñn mil. Súcuan ni jēhe de, chi jíni de nasaa canda ñn ñn i sájniñu i jíin. Yūcuán na te ni quihīn de ichi cuahān jicá de. ¹⁶ Te mozo jeē ní quihīn uhūn mil xūhún, ni sájniñu de jíin. Te ni nihīn de uhūn gā mil síquī. ¹⁷ Te mozo jeē ní quihīn uū mil xūhún, suni ni nihīn de uū gā mil síquī. ¹⁸ Te mozo jeē ní quihīn ñn mil xūhún, ni jehēn de ni jete de yaū, te ni chisāhí de xūhún patrón de.

¹⁹ 'Te ni yāha cuehē tiempo, te ni ndee patrón mozo un jíjnáhan. Te ni nandacān de cuenta nuū i. ²⁰ Te ni quee mozo jeē ní quihīn uhūn mil xūhún un, te ni nacuāha de xūhún un núu patrón de jíin úhūn gā mil jeē ni nihīn de síquī. Te ni cahān de: Ni jēhe ní úhūn mil nuū ná, te yāha íyó úhūn gā mil jeē ni nihīn na síquī. Achí de. ²¹ Te ni cahān patrón jíin de: Iyó váha núu súcuan. Yōhoyo váha mozo cúu ró jéē squícu váha ró. Chi váha ni squícu ró ñn jniñu lúli-ni, te vijna te cuāha ri jniñu jéhu ndacu ró. Te quivī ró núu cusī ni rō jíin rí. Achí de. ²² Yūcuán na te ni quee mozo jeē ní quihīn uū mil xūhún un. Te ni cahān de: Ni jēhe ní uū mil nuū ná, te yāha íyó uū gā mil jeē ni nihīn na síquī. Achí de. ²³ Te ni cahān patrón jíin de: Iyó váha núu súcuan. Yōhoyo váha mozo cúu ró jéē squícu váha ró. Chi váha ni squícu ró

ñn jniñu lúli-ni, te vijna te cuāha ri jniñu jéhu ndacu ró. Te quivī ró núu cusī ni rō jíin rí. Achí de. ²⁴ Te ni quee mozo jeē ní quihīn ñn mil xūhún un, te ni cahān de jíin patrón: Je jíni na níhín jéē tēe xeēn cúu ní. Chi cuehē gā cuní ni vēsú jeē cúu sáha mozo ni, te cuehē gā nándacān ní vēsú jeē ni jēhe ní. ²⁵ Te jeē yúcuan ní yūhu ná, te ni jehēn na ní chisāhi ná xūhun ní chíji ñuhun. Te yāhá na nácuāha na xūhun ní. Achí de. ²⁶ Te ni cahān patrón jíin de: Mozo cuxí cúu ró te máni jniñu néé sáha ró. Chi jéni ni rō jeē cuehē gā cuní rī vēsú jeē cuu sáha mozo rī, te cuehē gā nándacān rī vēsú jeē ni jēhe rī. ²⁷ Núu jeē ni chúne ró xūhun rí nuū banco nuú, te jeē ní ndee rī te naquihīn ri xūhun rí nde jíin séhe xūhun núu. Achí de jíin i. ²⁸ Te ni cahān de jíin táca gá mozo de: Núu súcuan te quende rō mil xūhun jíin nuū i, te cuāha ro núu mozo névāha uxī mil. ²⁹ Chi ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ni vēsú jecu jeē névāha i. ³⁰ Te mozo yáha jéē tu sájniñu váha, quenehen ró i na quihīn i nuū quéhe nuū néé. Te yúcuan ndáhyū i te nacayihí yuhu i jeē ndoho xeēn i. Achí patrón un.

Síquī jeē cóo juicio tāca nación

³¹ Te ni cahān gā yā:

ñn quivī te ndiji máa Yāā ní nduu tēe, te cuu ya Rey nuū ñáyuu. Te tāca ndajéhe yā cuiñi ní xiin ya. Te cucōo ya mesa nuū ndácu ya jniñu, te yōhoyo luu kujéhu ya. ³² Te ndutútú ñayuu tāca nación nuū yā. Te sásin ya i jíjnáhan i, nájnūhun cúsin lanchi jíin ndixúhú sáha tēe ndito ti. ³³ Te ñayuu váha jeē cúu nájnūhun lanchi, chucú yá i lado váha ya. Te ñayuu néé jeē cúu nájnūhun ndixúhú, chucú yá i lado jecó yá. ³⁴ Yūcuán na te cahān Rey jíin ñáyuu cáhīn lado váha ya: Nacā ndetū rō jeē ni sáha Tátá rī jíin ró. Nehen quivīcoo ró núu ndácu ró jniñu. Chi nde quivī ní jecōo ñayiví te je ni sátūhva ya nuū ndacu ró jniñu. ³⁵ Chi ni jíi rī sōco, te ni cajēhe ro jéē

ní yeji rī. Ni jichī rī ndute, te ni cajēhe ró jēē ní jihī ri. Ni quiji ri nde ñuu jicá, te ni cajēhe núú ró vehe ni ndōo ri. ³⁶ Ni cumanī sahma ri, te ni cajēhe ró. Ni cocuhū rī, te ni jecondēhe ró ruhū. Ni ine ri vecāa, te suni ni jecondēhe ró ruhū. Súcuān cahān yā jīn ñáyuu cáhīn lado váha ya. ³⁷ Yūcuān na te cahān ñáyuu váha un jīn yá: ¿Na quiṽí ní cajito ná níhín jēē jíi ní sóco, te ni cajēhe na jēē ní yeji ní, chí jēē jichī ni ndute, te ni cajēhe ná ní jihī ní? ³⁸ ¿Te na quiṽí ní cajito ná jēē ní quiji ní ndé ñuu jicá, te ni cajēhe núú ná vehe ni ndōo ní, chí jēē cúmanī sahma ní, te ni cajēhe ná? ³⁹ ¿Te na quiṽí ní cajito ná jēē cuhú ni, chí jēē íne ní vecāa, te ni jecondēhe ná níhín? achi i. ⁴⁰ Yūcuān na te cahān Rey jīn i: Jendaá cahān rī jīn ró jēē ná ni casáha ró súcuān jīn ñn táca hermano rī jeē cácañdije, vēsú ñáyuu núu ga cúu i, te nuū maá rí ni casáha ró.

⁴¹ Yūcuān na te suni cahān Rey jīn ñáyuu cáhīn lado jecó yá: Ñáyuu jnahnū ndetū cácuu ró. Cuijiyo quingoo ró núu ñuhún jeē cayú ní cáni, nuū iyó túhva cone jexeén jīn táca táchī jeē cájeñíñu nuū. ⁴² Chi ni jīi rī sōco, te tu ní cájēhe ro jēē cáji rī. Ni jichī rī ndute, te tu ní cájēhe ro jēē coho ri. ⁴³ Ni quiji ri nde ñuu jicá, te tu ní cájēhe núú ró vehe ndōo ri. Ni cumanī sahma ri, te tu ní cájēhe ró. Ni cocuhū rī, ni ine ri vecāa, te tu ní jecondēhe ró ruhū. Súcuān cahān yā jīn ñáyuu cáhīn lado jecó yá. ⁴⁴ Yūcuān na te cahān ñáyuu un jīn yá: ¿Na quiṽí ní cajito na níhín jēē jíi ní sóco, chí jēē jichī ni ndute, chí jēē ní quiji ní ndé ñuu jicá, chí jēē cúmanī sahma ní, chí jēē cuhú ni, chí jēē íne ní vecāa, te tu ní cájēhe na jēē cúmanī nuū ní? Achi i. ⁴⁵ Yūcuān na te cahān yā jīn i: Jendaá cahān rī jīn ró, jeē tu ní casáha ró súcuān jīn ni ñn táca hermano rī jeē cácañdije, vēsú ñáyuu núu ga cúu i. Núu súcuān te suni nuū maá rí cúu jeē tu ní casáha ró, achi yā. ⁴⁶ Yūcuān na te quingoo ñáyuu un núu ndóho i ní cáni. Te ñáyuu váha un quiṽicoo i nuū cótecu i ní cáni. Achi

Jesús.

Jeē ní casquijnáhan de jñūhun jeē jñi de Jesús

(Mr. 14.1-2; Lc. 22.1-2; Jn. 11.45-53)

26

¹ Te nuū ní ndihī ni cahān Jesús tāca jñūhun yáha, te ni cahān yā jīn té ca SCUÁHA jīn yá:

² Je cájini rō jeē uū na quiṽí te coo vico pascua. Te ruhū, Yaā ní nduu tēe, nastúu i ruhū jeē cúu rī jicá cruz, achi yá.

³ Yūcuān na te sutū cácujeñnu, jīn té ca stéén tutu ley, jīn táca té ca jéñnu jeē cándacu jniñu nuū ñáyuu hebreo, ni candutútú de ini patio vehe palacio maá sūtū cujeñnu ga jeē naní Caifás. ⁴ Te ni candajnūhún de ndese jñi de Jesús jīn jñūhun stáhú, te cahni de ya. ⁵ Te ni cacahān de:

Ma jñi yó de máa quiṽí vico, chi ndonda ñáyuu siquī yō, achi de.

Jñūhun ñahan jeē ní chuhun perfume xinī yā

(Mr. 14.3-9; Jn. 12.1-8)

⁶ Te íne Jesús ñuu Betania vehe Simón, tēe ni ndoho cuehyī stehyū.

⁷ Te ni quee ñn ñahan nuū yā, ndáhá ña ñn frasco yuū luu jeē ñūhun aceite perfume jeē yóhyo yahu ndéé. Te ni chuhun ña xinī yā ní ní jēē yéji yā staā.

⁸ Te ni cajito tēe ca SCUÁHA jīn yá, te ni caquitī ní de, te ni cacahān de:

¿Najehē cúu jeē náa saá-ni perfume jñiñā? ⁹ Chi cuu xicó yahu yó núu, te cuāha yo xūhun núu ñáyuu ndahú. Achi de.

¹⁰ Te ni jini Jesús jñūhun cácahān de. Te ni cahān yā jīn de:

¿Naun casáha ró jēē nácani uhū ni ñahan yáha? Chi ñn jniñu váha cúu jeē ní sáha ña jīn rí. ¹¹ Chi ní ní coyūcu ñáyuu ndahú jīn ró, te ruhū chí tuá condee rī jīn ró. ¹² Chi jeē ní chuhun ña perfume yáha ruhū, suu cúu jeē ní sátūhva ña ruhū nde quiṽí quíndūji rí.

¹³ Jendaá cahān rī jīn ró jeē ní cáhnu ñayṽi ndé-ni cúu nuū cuité jñūhun yáha jēē jnáma ri ñáyuu, suni nacani i

jnūhun jeē ni sāha ñahan yáha, návāha cocuhun ni ñayuu ña, áchí yá.

Jeē ní nastúu Judas yā
(Mr. 14.10-11; Lc. 22.3-6)

¹⁴Yūcuán na te ñin jeē ndihúxí uū tēe cáscuáha ún, nání de Judas Iscariote, ni jehēn de nuū sutú cácujuhnu. ¹⁵Te ni cahān de jíin:

¿Nasaa cuāha ní nuū ná, te na nástúu ná de nuū ní? áchí de.

Te ni cajēhe ocō uxī xūhun plata nuū de. ¹⁶Yūcuán na te nde quivī un ní quejéé de ndúcú de modo ndese nastúu de ya nuū sutú jijnáhan.

Jeē ní jequin yā Cena yā
(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷Te máá quivī jeē quejéé vico jeē cáyeji ñayuu pan jeē tú na levadura yáhi, te ni quijicoo tēe cáscuáha un núu Jesús. Te ni cacahān de jíin yá:

¿Nde nuū cuní ni jēe quísatūhva ná cuxíni ní vico pascua? áchí de.

¹⁸Te ni cahān yā:

Cuángoo nde ñuu, vehe tēe jeē jé ni cacahān yō, te cahān rō jíin de: Achí máá Maestro jeē ní cuyajni quivī cuu yā. Te vijna te caji yā vico pascua ini vehe ní jíin tēe cáscuáha jíin yá, achí rō. Achí yá.

¹⁹Te tēe cáscuáha jíin yá, ni casáha de nájñūhun ni ndacu Jesús jniñu nuū de, te ni casátūhva de jeē cuxíni ya vico pascua.

²⁰Te jeē cuácuaa, te ni quee yā, te ni cucōo ya mesa jíin ndihúxí uū tēe cáscuáha jíin yá. ²¹Te níni yéji yā jíin de te ni cahān yā:

Jendaá cahán rī jíin ró jeē ñin róhó nastúu ruhū vijna, áchí yá.

²²Te ni cacucuíhyá ndasí ni de. Te ná ñin ná ñin de ni cacajñūhún de ya:

¿A sáña cúu? áchí de.

²³Te ni cahān yā:

Ñin róhó jēe cáyeji cáhnu jíin rí ñin cohō, suu ró nastúu ruhū. ²⁴Te ruhū, Yaā ní nduu tēe, jendaá cúu jeē quihín rī cuu rī, nájñūhun yósó jnúhun rī nuū tútu ñi. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

²⁵Yūcuán na te ni cahān Judas, tēe nastúu ya:

¿A sáña cúu, Maestro? achí de.

Te ni cahān yā jíin de:

Suu ró cúu, áchí yá.

²⁶Te níni jēe cáyeji de jíin yá, te ni quihin ya pan, te ni nacuatáhú yá, te ni tahú cuéchi yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chí yāha cúu yiquí cúñu rī, achí yá.

²⁷Yūcuán na te ni quihin ya ñin copa ndūxi uva, te ni nacuatáhú yá, te ni jēhe ya nuū de. Te ni cahān yā:

Coho jijnáhan ró. ²⁸Chí yāha cúu ñiñi rī jeē cuáha rī jeē cúu contrato jeé, te cati jeē ndundoo cuēchi cuehē ñayuu, te coo jñūhun cáhnu ni nuū cuéchi i. ²⁹Te cáhán rī jíin ró jeē ndé vijna te ma cóho ga rī ndūxi ndehē uva yāhá, chí nde quiji quivī ndacu Tátá rī jniñu ní ñayiví, te sáa te coho tucu rī jíin ró jijnáhan ró. Achí yá.

Jeē ní cachi yā jeē yūhu Pedro cahān de jeē jíin de ya
(Mr. 14.26-31; Lc. 22.31-34; Jn. 13.36-38)

³⁰Te ni jita ya ñin yaa ñi jíin de jijnáhan de. Te ni quenda ya cuahān yā jíin de nde yucu Olivos. ³¹Yūcuán na te ni cahān yā:

Ndivii rō nayūhu ró jeē siquí ruhū jecuáa vijna. Chí suhva je yósó jnúhun rī nuū tútu ñi, ni cahān Yaā Dios: Cuāha rī jñūhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, achí. ³²Te jeē nátecu rī, te xīhna ruhū cosnūu rí quihín rī región Galilea, te sáa te najinūcoo ró, áchí yá.

³³Yūcuán na te ni cahān Pedro:

Vēsú ndihi de na náyūhú de, te máá ná chí ma náyūhú cuítē ná, áchí de jíin yá.

³⁴Te ni cahān yā jíin de:

Jendaá cahán rī jíin ró jeē jecuáa vijna, nde ná tu cana líhli, te yūhu ró jeē jñi ñayuu rohó, te uní jínu cahān rō jeē tu jíin ró ruhū, achí yá.

³⁵Te ni cahān Pedro jíin yá:

Vēsú núu cuu na jíin ní, te ma cahán cuítē na jēe tu jíin na níhín, áchí de.

Te suni súcuan ni cacahān ndīhi tēe cáscuáha jíin yá.

Jeē ni jicān tahu yā nuū huerto Getsemaní

(Mr. 14.32-42; Lc. 22.39-46)

³⁶ Yūcuán na te ni jinū Jesús jíin tēe cáscuáha jíin yá ñn lugar nuū naní Getsemaní. Te ni cahān yā jíin de:

Yāhá-ni cucōo ró, te na quihín rī yūcuan cácan tahu rī, achí yá.

³⁷ Te ni jeca ya Pedro jíin ndindúú séhe Zebedeo cuahān yā jíin de. Te ni quejéé yá cucuíhyá ndasí ni yā te cúxíí ni yā jeē quíji jnūndóho siquī yā.

³⁸ Yūcuán na te ni cahān yā jíin de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró jíin rí.

³⁹ Te ni jica ya jecu gā, te ni jecuiñí yití yá ni jequin ya nuū yā nuū ñúhun, te ni jicān tahu yā suhva nuū Yāā Dios:

Tátá maá ná, núu cuu te tejiyo ní jnūndóho yáha jéē ma quíji siquī ná. Te nasūu jéé cuní maá ná, chí jeē cuní maá ní na cóo, achí yá.

⁴⁰ Yūcuán na te ni ndee yā nuū ndinúní tēe cáscuáha jíin yá, te ni jito ya jeē cáquixí de. Te ni cahān yā jíin Pedro:

¿A tu ní cánda ró condito ró jíin rí vésú ñn hora? ⁴¹ Coó ndito ní ró te cacān tahu ró jeē chindéé ñáhán yá rohó jéē ma sáha ró cuéchi jeē coto ndee jeneé rohó. Chí cuní ndije ánuá ró squícu vāha ró, te yiqui cúñu ró chí tu fuerza, achí yá.

⁴² Te ni jehēn tucu ya vuelta uū, te suhva ni jicān tahu yā:

Tátá maá ná, te núu ma cúu cujiyo jnūndóho yáha jeē ma ndóho ná, te na cóo jeē cuní maá ní núu súcuan, achí yá.

⁴³ Te ni ndee tucu ya nuū de, te ni jito ya jeē cáquixí tucu de, chí yōhyo cájii de máhná. ⁴⁴ Te ni stóo ya de, te cuahān tucu ya cuacacān tahu yā vuelta unī. Te suni jnūhun yūcuan ní cahān yā. ⁴⁵ Yūcuán na te ni ndee tucu ya nuū de jíjnáhan de, te ni cahān yā jíin de:

Vijna te cusū ró te ndetātu ró. Te je ni quee hora, te ruhū, Yāā ní nduu tēe, natūu ri te jñi tēe cáhīyo cuēchi ruhū. ⁴⁶ Ndocuiñí jíjnáhan ró, chí je vēji tēe nastúu ruhū, te quihín yō jíin de, achí yá.

Jeē ní cajñi de Jesús

(Mr. 14.43-50; Lc. 22.47-53; Jn. 18.2-11)

⁴⁷ Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chí sutū cácujuhnu jíin táca tēe jéhnú cándacu jniñu nuū ñáyuu hebreo, ni catajii tēe ún. ⁴⁸ Te Judas, tēe nastúu ya ún, je ni jēhe de ñn seña nuū tēe un jíjnáhan, chí ni achi de:

Tēe jeē téchūhu rí un cúu. Te jñi ró jíjnáhan ró, achí de.

⁴⁹ Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya. ⁵⁰ Te ni cahān Jesús jíin de:

Amigo, ¿na jniñu vēji ró? achí yá.

Yūcuán na te ni jinūcoo tāca gá tēe ún, te ni cajñi de Jesús.

⁵¹ Te ñn tēe jeē cáhīn jíin Jesús, ni tava de espada de, te ni jehnde de sōho ñn mozo maá sūtū cujuhnu ga.

⁵² Yūcuán na te ni cahān Jesús jíin de:

Nachuvāha espada ró, chí tāca jéē cájejnáhan jíin espada, suni jíin espada cuu. ⁵³ ¿Te á tu cájini ró jeē cuu cacān tahu rī nuū Tatá rī, te vijna ñúhún tají yá víhyá gā uxí uū mil ndajéhé andiví jeē jnama ruhū?

⁵⁴ Te núu súcuan, ¿te ndese cuu squícu jnūhun cáhán tutu ñi jeē cánuú ndoho ri súcuan? achí yá.

⁵⁵ Yūcuán na te ni cahān yā jíin ñáyuu cuehē ún:

¿Te va tēe cuíhná cúu ri jeē véjicoo ró jíin espada jíin yujnu jeē jñi ró rúhū jeē súcuan. Tāca quíví ni cucōo ri jíin ró jíjnáhan ró ini templo cáhnu, ni steén rī jnūhun, te tu ní cájñi ró rúhū. ⁵⁶ Te súcuan cása ha ró návaha na squícu jeē cáhán tutu ñi jeē ní catee tēe ni canacani jnūhun Yāā Dios, achí yá.

Yūcuán na te ndihi tēe cáscuáha jín yá, ni castoo de ya, ni cajinu de cuango de.

Jeē ní indichi Jesús nuū junta tēe cáscujéhnū ga

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Te tēe ni cajni Jesús, cuango de jín yá nuū Caifás, tēe cúu sutū cujéhnū ga. Te yūcuán cáhīn tūtú tēe cástéén tutu ley jín táca tēe jéhnū cándacu jniñu. ⁵⁸ Te Pedro chi jícá-ni ndíquín de ya, te ni jinū de patio sutū cujéhnū ga. Te ni quiví de ini patio, te ni cucōo de jín táca policía, návāha coto de ndese coo síquī yā.

⁵⁹ Te sutū cáscujéhnū jín táca tēe jéhnū jín ndihi tēe cáscuáha junta cujéhnū ga, ni canducú de tēe cahān jnūhun yáá síquī Jesús, chi cahni de ya cáscuni de. ⁶⁰ Te vésú ni quecoo cuehē ñayuu cáscahān yaá, te tu ní cánihīn de cuēchi síquī yā jeē cáhni de ya. Te jeē sándihí te ni quecoo uū testigo jeē cahān yaá síquī yā. ⁶¹ Te áchí:

Tēe yáha ní cahān de jeē cuu canu de templo Yaā Dios, te nuū uní-ni quiví te nucondichi sáha de, áchí.

⁶² Yūcuán na te ni ndocuñī maá sutū cujéhnū ga, te ni cahān de jín yá: ¿Naun tu cáhān cuiti rō? ¿A íyó ndáā jeē cáscahān tēe yáha síquī rō? Achí de.

⁶³ Te Jesús tu ní cáhān cuiti yā. Te ni cahān maá sutū cujéhnū ga:

Ndácu ri jniñu nuū rō jeē cahān ndaā rō cuni nahín maá Yaā Dios, Yaā técu. Cachi cají te núu maá ró cúu Cristo, Sēhe Yaā Dios, achí de jín yá.

⁶⁴ Te ni cahān yā:

Suu ri cúu, nájñūhun cáhān rō. Te na cástūhun rí nuū rō jijnáhan ró jēe táca quiví jeē quíji te coto ró rúhū, Yaā ní nduu tēe, condee rī lado váha Yaā iyó poder. Te coto ró jēe ndíji ri ichi ándiví jín vícō. Achí yá.

⁶⁵ Yūcuán na te sutū cujéhnū ga ni jehnde de sahma de jeē quití ndasí ni de, te ni cahān de:

Tēe yáha chi cáhān de jnūhun ndevāha jeē quití ni Yaā Dios, chi sáha de maá de Sēhe Yaā Dios. ¿Ndé jini

ñúhún gá yō testigo núu súcuán? Chi je ni cajini ró jnūhun ndevāha cáhān de. ⁶⁶ ¿Te ndese cájeni ni rō? achí de.

Te ni cacahān tēe cuehē ún:

Cuēchi cúu jeē cahān de súcuán, te jini ñúhún cuu de, áchí.

⁶⁷ Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā. ⁶⁸ Te ni cacahān de:

Te núu Cristo cúu ró, te cachi rō ndé ññ cúu jeē ní cani rōhó, áchí de.

Jeē ní cachi Pedro jeē tu jíní de ya
(Mr. 14.66-72; Lc. 22.56-62; Jn. 18.15-18, 25-27)

⁶⁹ Te níni jēe súcuán cúu, te Pedro néne de nuū quéhe ini patio. Te ni quee ññ ñahan jéjñíñu vehe ún, te ni cahān ña jín de:

Róhó chi suni ni jica ró jín Jesús tēe Galilea, achí ña.

⁷⁰ Te máá de tu ní cáchi de, chi ni cahān de ni cajini ndihi ñayuu:

Tu jíní rī na jnūhun cáhān rō, achí de.

⁷¹ Te ni quenda de yéhyí núu quéhe, te ni jito ñnga ñahan nuū de. Te ni cahān ña jín ñayuu cáhīn yūcuán:

Tēe yáha chi suni ni jica de jín Jesús, tēe ñuu Nazaret, achí ña.

⁷² Te ñnga jínu tu ní cáchi tucu de, chi sa ni cahān teyí de:

Tu jíní rī tēe ún, áchí de.

⁷³ Te ni cunúu jecu gā, te ñayuu cáhīn yūcuán ní quecoo i nuū Pedro, te ni cacahān i:

Jendaá ndije jeē suni jnáhan tēe un cúu ró, chi ndijin cahān rō jeē tēe Galilea cúu ró, áchí i.

⁷⁴ Yūcuán na te ni quejéé de cáhān teyí de jeē na cóndee cuēchi síquī de núu tu cáhān ndaā de:

Tu jíní cuiti rī tēe ún, áchí de.

Te ni cana-ni líhli. ⁷⁵ Te ni nucūhun ni de jnūhun ni cahān Jesús jín de: Nde ná tu cana líhli, te yūhu ró te cahān rō uní jínu jeē tu jíní rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

Jeē cuángoo de jín yá nuū Pilato
(Mr. 15.1; Lc. 23.1-2; Jn. 18.28-32)

27

¹ Yūcuán na te ni cundijin. Te tāca sūtū cácujuhnu jíin táca téé jéhu jeē cándacu jniñu nuū ñáyuu hebreo, ni casquijnáhan de jnūhun ndese sáha de jeē cuu Jesús. ² Te ni cajihni de ya, te cuango de jíin yá nuū Poncio Pilato, téé cúu gobernador.

Jeē ni jíih Judas

³ Yūcuán na te Judas, téé ni nastúu ya un, ní jito de jeē ní cunihin siquī yā jeē cúu yā. Te ni jnahuhū ni de, te ni nacūaha de ocō uxī xūhun plata jeē ni níhin de nuū sūtū cácujuhnu jíin núu tāca téé jéhu. ⁴ Te ni cahān de jíin:

Cuēchi ni sáha ná jéé ní nastúu ná ñn téé cuu de, te tú na cuēchi de.

Te máá sūtū un ní cacahān de:
¿Vé jítú ni ruhū? Cuēchi máá ró cúu. Achí de.

⁵ Te ni scāne Judas xūhún un ini templo. Te ni quenda de cuahān de, te ni scuéhne de máá de.

⁶ Te sūtū cácujuhnu ni canastútú de xūhún un, te ni cacahān de:

Ma cúu chuhun yó xūhun yáha ini yejnū nuū cásocō ñayuu, chí xūhun jéé ni jéconaā jeē cúu ñn téé cúu, achí de.

⁷ Yūcuán na te ni casāndaā de jeē xūhun yúcuan cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá. ⁸ Jeē yúcuan cúu jeē ndé vijna naní ñuhun ún Lugar Ñuhun Niñí. ⁹ Te súcuan ni squícu jnūhun ni cahān Jeremías, téé ni nacani jnūhun Yaā Dios nde jehān: Ni caquihin de ndihóco uxī xūhun plata, te súcuan-ni cúu ñn yāhu jeē ní casáha ñayuu Israel cuenta jeē ndeé yā nuū i. ¹⁰ Te jíin xūhun un ní cajeen de ñuhun quíxin, nájnūhun ni ndacu máá Jítóho yō Yaā Dios jniñu nuū rī. Achí Jeremías.

Jeē ní indichi Jesús nuū Pilato

(Mr. 15.2-5; Lc. 23.3-5; Jn. 18.33-38)

¹¹ Te nuū ní jinūcoo de jíin Jesús nuū gobernador, téé cúu Pilato, te ni cajnūhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájnūhun cáhán rō.

¹² Te sūtū cácujuhnu jíin téé jéhu cándacu jniñu, ni cacahān de cuēchi siquī yā. Te tú na vé ni cáhán cuiti yā.

¹³ Yūcuán na te ni cahān Pilato jíin yá:
¿A tu jíini ró jéé cacahān de cuehē cuēchi siquī rō? achí de.

¹⁴ Te tu ní cáhán cuiti yā ni ñn jnūhun jíin de. Te nahān ní naa ni gobernador jeē tú na vé ni cáhán yā jíin de.

Jeē ní cundaā jeē cúu yā

(Mr. 15.6-20; Lc. 23.13-25; Jn. 18.38-19.16)

¹⁵ Te íyó costumbre gobernador jeē quivī víco un siáá de ñn téé íne vecāa, núu na-ni téé cácuni ñayuu. ¹⁶ Te suu quivī un íyó ñn téé íne vecāa, naní de Barrabás, te je ni jité núu jnūhun jeē ni sáha de cuēchi xeēn. ¹⁷ Te nuū ní candutútú ñayuu, te ni cahān Pilato jíin i:

¿Ndé téé cácuni rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

¹⁸ Súcuan ni cahān de chí cúní de siáá de Jesús. Chí je ni jecūhun ni de jeē ní cacucuésún ni tāca sūtū un cájito de ya, te jeē yúcuan ní quijicoo jíin yá nuū de.

¹⁹ Te níni jéé néne Pilato silla nuū sāndaā de jniñu, te ñasihí de ni tají ña jnūhun nuū de: Ma quivī nduu rō jíin ñáyuu siquī téé ndaā jiñā, chí yōhyo ni siūhu jéni ruhū cuni jeē siquí de, achí ña.

²⁰ Te sūtū cácujuhnu jíin táca téé jéhu, ni cascáhan de ñayuu jeē na cácan i jeē siaá de Barrabás, te na cúu Jesús. ²¹ Yūcuán na te ni cajnūhún tucu gobernador:

Jeē uú de, ¿ndé ñn de cácuni rō jeē siaá rī? achí de.

Te ni cacahān i:

Siáá ni Barrabás, achí i.

²² Te ni cajnūhún Pilato:

Núu súcuan te ¿ndese cácuni rō jeē sáha ri jíin Jesús, téé cúu Cristo? achí de.

Te ni cacahān ndihí i:

Cata caa ní de jicā cruz, na cúu de, achí i.

²³ Yūcuán na te ni cahān Pilato:

¿Na cuēchi ni sáha de núu súcuan? áchí de.

Te ñayuu un ní cacana jee ndasí i:

Cata caa ní de jicā cruz, na cúu de, áchí i.

²⁴ Te ni jini Pilato jeē tu cúndeyí de jíin ñayuu, chi sa víhyá gā cácuvaā i. Te ni ndacu de jniñu jeē na quíji ndute, te ni nandahá de nuū ñayuu cuehē ún. Te ni cahān de:

Jeē nándahá rí yāha cúu seña jeē tú na cuēchi condee siquī rī jeē cúu tēe vāha yāhá. Chi siquī maá ró jíjnáhan ró na cóndee. Achí de.

²⁵ Te ni cacahān ndihi ñayuu:

Suu siquī maá ná jíin siquī séhe ná na cóndee cuēchi jeē cúu de, áchí i.

²⁶ Yūcuán na te ni siaá de Barrabás. Te ni ndacu de jniñu jeē na cáni tēcá soldado un Jesús, jíin jéē cáta caa de ya jicā cruz.

²⁷ Yūcuán na te soldado un cuango de jíin Jesús ini palacio. Te ni cacana de ndihi jnáhan de ni candutútú núu yā. ²⁸ Te ni caquenehen de sahma ya, te ni cachuhun de ya ñin sahma cuehé jeē cúu sahma rey. ²⁹ Te ni casáha de ñin corona iñu, ni cachuhun de xinī yā. Te ni cachihí de ndaha váha ya ñin yujnu jeē nájnūhun bastón. Te ni casacatā de nuū yā, chi ni cajecuiñī yití de, casáha de jeē chiñúhún de ya.

Nacā jeē váha rey cúu Rey ñayuu hebreo, achí de.

³⁰ Te ni catesihí de nuū yā. Te ni caquihin de yujnu jeē ní cachihí de ndaha ya, te ni cacani de xinī yā. ³¹ Te nuū ní cuu ni casacatā de nuū yā, te ni catava de sahma cuehé un, te ni canachuhun de ya sahma máá yá. Te cuango de jíin yá jeē cata caa de ya jicā cruz.

Jeē ní cacata caa de ya jicā cruz

(Mr. 15.21-32; Lc. 23.26-43; Jn. 19.17-27)

³² Te nuū ní quendacoo soldado un jíin yá, te ni canajnáhan de jíin ñin tēe ñuu Cirene, naní de Simón. Te ni catejniñu de tēe un jéē cóndiso de cruz yā.

³³ Te ni jinūcoo de ñin lugar nuū naní Gólgota, jeē cuní cahān Lugar Yiqui Xíní. ³⁴ Te ni cajēhe de vino jeē ni sácā

núu jíin ñin jeē uvuá jeē cóho ya. Te nuū ní jito ndee ya, te tu ní cuní yā coho ya.

³⁵ Te nuū ní cuu ni cacata caa de ya jicā cruz, te ni casáha de sorteo jeē siquí ndese nihīn ñin ñin de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquī ndese nihīn ñin ñin de sahma ri, achí yā, achí tutu.

³⁶ Yūcuán na te ni cacucōo de yūcuan jéē cóto de nde cuu yā. ³⁷ Te ni catee de ñin jnūhun xinī cruz yā jeē cahán na siquī ni jíhī yā: Yāha cúu Jesús, Rey ñayuu hebreo, achí.

³⁸ Te suni ni cacata caa de uū tēe cuíhná núu uū gā cruz, ñin de lado váha ya, te inga de lado jecó yá. ³⁹ Te ñayuu cáyāha yūcuan cáscuicó i xinī i, te cacahān neé i:

⁴⁰ Róhó chi cáhán rō jeē cánu rō templo cáhnu, te nuū uní quivī te nacani ró. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jicā cruz viī, achí i.

⁴¹ Te sutū cácujuhnu, jíin tēe cástéén tutu ley, jíin tēe grupo fariseo, jíin tēe jéhnū jíjnáhan de, suni súcuan ni cacahān catá de, te áchí de cacahān maá de:

⁴² Núu inga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de.

⁴³ Ni candíje de Yaā Dios, te na jnáma ya de vijna te núu cúndáhú ni yā de, chi ni cahān de jeē cúu de Sēhe ya. Achí de jíjnáhan de.

⁴⁴ Te tēe cuíhná jeē cándita caa xiin ya, suni súcuan ni cacahān neé de.

Jeē ni jíhī Jesús

(Mr. 15.33-41; Lc. 23.44-49; Jn. 19.28-30)

⁴⁵ Te nuū ní cuu cahuxī uū, te ni cunee ní cáhnu nde cahunī. ⁴⁶ Te nájnūhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cuní cahān: Yaā Dios maá ná, Yaā Dios maá ná, ¿naun ni stóo ní sáña?

⁴⁷ Te sava ñayuu cáhīn yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, áchí i.

⁴⁸ Te ni jinu-ni ñn tēe, ni jequihin de ñn cachí, te ni chundaji de nuū vina-gre iyá. Te ni tee de xinī ñn yujnu, te ni tee de yuhu ya jeē coho ya. ⁴⁹ Te sava ga de ni cacahān:

Condetu ró, na cóndēhe yó núu quiiji Elías jnama de chí tuú, áchí de.

⁵⁰ Te Jesús ni cana jee ya inga jínu, te ni jihí-ni ya. ⁵¹ Te sahma ndíta caa jeē ndihyú cuarto ñi ini templo cáhnu, ni ndatā-ni sava sava nde xinī te nde nuū jehé. Te ni jnāa, te ni catahū sáva toto. ⁵² Te ni cananune yaū nuū yíndūji ndīyí. Te cuehē ndīyí jeē ní ca-candíje i Yaā Dios, ni canatecu i. ⁵³ Te nuū ní natecu Jesús, te ni quendacoo i nuū yíndūji i. Te ni ndīvícoo i ini ñuu ñi Jerusalén, te cuehē ñayuu ni cajito nuū i.

⁵⁴ Te ná ni jihí Jesús, te tēe cúu capitán jíin tēe cáhīin jíin de jeē cándito de nde cuu yā, ni cajini de jeē ni jnāa, jíin táca gá jniñu ní cuu. Te yōhyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yáha, áchí de.

⁵⁵ Te yūcuan cáhīin cuehē ñahan, cándēhe jíca ña. Te suu ñahan un ní candiquīn ña Jesús nde Galilea, vējicoo ña cájejniñu ña nuū yā. ⁵⁶ Te uní ñahan un cácuu María ñuu Magdala, jíin María naná Jacobo jíin José, jíin naná ndíndúú séhe Zebedeo.

Jeē ní quindūji Jesús

(Mr. 15.42-47; Lc. 23.50-56; Jn. 19.38-42)

⁵⁷ Te nuū ní ini quiví ún, te ni quee ñn tēe cúca, nání de José, te tēe ñuu Arimatea cúu de. Te suni tēe ni scuáha jíin Jesús cúu de. ⁵⁸ Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de. ⁵⁹ Te José ni quihin de yiqui cúñu yā, te ni chusúcún de ñn sahma cuitá iyó ndoo. ⁶⁰ Te névaha de ñn yaū jeē ní caan jeé jíca ñn cava, nuū ná tu quindūji ndīyí. Te yūcuan ní chindūji de ya. Te ni jesi de ñn yuū cáhnu yuhu yáú un, te cuahān de. ⁶¹ Te María ñuu Magdala, jíin inga

María, cáyūcú ña ichi núu nuū yíndūji ya.

Jeē ní cacondito soldado nuū yíndūji ya

⁶² Te ni cuu tācá jniñu yáha máa quiví jeē casátūhva ñayuu jeē quiiji quiví ndétátú. Yūcuán na te ni cundijin máa quiví ndétátú. Te sutū cácujeñnu jíin tēe grupo fariseo ni jengoo de nuū Pilato. ⁶³ Te ni cacahān de:

Cánucūhun ni na jéē nde na técu tēe stáhú néé un te ni cahān de jeē nátecu de nuū uní quiví. ⁶⁴ Núu súcuan te ndacu ní jniñu na cóto vāha tācá soldado yuhu yáú un nde núu ni yāha uní quiví. Chi núu tuú te sanaa te quijicoo tēe ni cascuáha jíin de, te tava cuihná de ndīyí ún jecuáa, quingoo de jíin. Yūcuán na te cachí de nuū ñayuu jeē ní natecu tēe ún. Te cáhú gá cuu jnūhun stáhú yūcuan vēsú jeē xíhna ñúhún. Achí de.

⁶⁵ Te ni cahān Pilato:

Yāha cáhīyo soldado. Cuángoo jíin de, te sácutú vāha ró yuhu yáú un, te coto vāha ró, núu ndese vāha ga cuu sáha ró. Achí de.

⁶⁶ Te cuangoo de, te ni casácutú de yuū jeē ndihyú yuhu yáú nuū yíndūji ya, te ni castín nīhin de. Te ni castóo de tācá soldado un cándito.

Jeē ní natecu Jesús

(Mr. 16.1-8; Lc. 24.1-12; Jn. 20.1-10)

28

¹ Te ni yāha quiví ndétátú un, te cundijin quiví domingo. Te María ñuu Magdala jíin inga María un, ní jecondēhé ña nuū ní yíndūji Jesús.

² Yūcuán na te ñn sanaa-ni te ni jnāa nīhin ndasí. Chi ñn ndajéhé maá Jítoho yō Yaā Dios ni cuun ya ichi ándiví, ni quee ya nuū ní yíndūji Jesús. Te ni stāa ya yuū ndihyú yuhu yáú un, te ni cucōo ya síquí. ³ Te ndíndēe núu yā nájñūhun taja, te sahma ñúhūn ya yaa quiyi nájñūhun yuhvā volcán. ⁴ Te soldado cándito yūcuan ní quisí i de jeē cáyūhú de cájito de ya. Te ni cacuu ndīyí de. ⁵ Te ni cahān ndajéhé jíin ndíndúú ñahan ún:

Ma yūhu ró, chi jíni rī jeē vécondēhe ró Jesús, Yaā ni jíhī jicā cruz. ⁶ Tuá yā yāhá, chi je ni natecu yā, nájnūhun ni cahān yā. Nehen condēhe ró nuū ní cachindūji de ya. ⁷ Te yachī quingoo ró, te cachi rō nuū téé cáscuáha jíin yá jeē ní natecu yā. Te xīhna gā maá yá jinū Galilea, te sáá te najinūcoo de. Te yūcuán coto de nuū yā. Achi rō na cúni de. Je ni castūhun rí nuū rō, achí ndajéhé.

⁸ Te ni quendacoo ña nuū ní yindūji ya, te yachī cuangoo ña. Te cáyūhú ña, te suni yōhyo cácusī ña. Te ni cajinu ña cuacastūhún ña nuū téé cáscuáha jíin yá. ⁹ Te níni cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya. ¹⁰ Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tācá hermano rī, tēe ni cascuáha jíin rí, jeē na núngoo de nde Galilea, te yūcuán coto de nuū rī. Achí yá.

Jnūhun ní cacahān soldado

¹¹ Te níni cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu tācá jniñu jeē ní cuu. ¹² Te sutú cácujuhnu ni candutútú de nuū táca téé jéhnú cándacu jniñu, te ni casquijnáhan de jnūhun. Yūcuán na te ni cajēhe de cuehē xūhun núū soldado jijnáhan. ¹³ Te ni cacahān de jíin:

Cahān rō jijnáhan ró jēé téé cáscuáha jíin de ni quijicoo jecuáā, te ni catava cuīhna ndíyí un níni cáquixī rō, achí rō. ¹⁴ Te núu na cúni gobernador jnūhun yáha, te máá rí quiscahán rī de, návaha tú nihīn rō castigo jijnáhan ró. Achí de.

¹⁵ Te soldado un ní caquihin de xūhún un, te ni cacachi de nájnūhun ni cacahān jíin de. Te nde vijna chi súcuan cácahān ñayuu hebreo nájnūhun ni cacahān soldado un.

Jeē ní tejníñu ya de nacani de jnūhun
(Mr. 16.14-18; Lc. 24.36-49; Jn. 20.19-23)

¹⁶ Te ndihúxí ñn tēe ni cascuáha un cuánungoo de nde Galilea, nde yucu nuū ní cachi Jesús jeē quíngoo de. ¹⁷ Te nuū ní cajito de nuū yā, te ni cachiñúhún de ya. Te sava de tu cácadíje vāha de jeē maá yá cúu. ¹⁸ Te ni quee ya nde nuū de, ni cahān yā jíin de:

Je ni jēhe Tátá rī ndihí poder nuū rī jeē ndácu rí jniñu andiví jíin ñáyiví. ¹⁹ Núu súcuan te cuángoo nuū ñayuu tācá nación, te stéén rō jnūhun rí nuū i návaha na cándíje i. Te scuándute ró i jeē ní cacandíje i máá Tátá jíin Séhe jíin Espíritu Santo. ²⁰ Te stéén rō nuū i jeē na cuátáhú i tācá jniñu ní ndacu rí nuū rō. Te cocuhun ni rō jeē maá rí íne rí jíin ró ní cáni nde quiví jínu ñayiví. Achí yá. Te ni cuu. Amén.

JNUHUN VAHA NI TEE SAN MARCOS

Jnūhun Juan tēe scuándute
(Mt. 3.1-12; Lc. 3.1-9, 15-17;
Jn. 1.19-28)

¹ Yāha quejéé jnūhun vāha máá Jesu-
cristo Sēhe Yaā Dios, jeē ní quiji ya jeē
jnama ya yohó.

² Isaías, tēe ni nacani jnūhun Yaā
Dios nde jenahán, súcuan ni tee de
jnūhun Juan nuū tútu:

Tají rí tēe nacani jnūhun ri cosnūú de
ichi núú rō,
návāha coo tūhva ñayuu jeē jinú rō,
achí Yaā Dios jíin Cristo.

³ Te tēe ún cana jee de nde nuū ñūhun
téhé:

Sátūhva rō máá rō jijnáhan rō, chi
quee máá Jítoho yō.

Te sáha rō jniñu ndaā, chi vēji ya, achi
de.

Achí Isaías. ⁴ Te Juan ni jinū de nde
nuū ñūhun téhé, scuándute de ñayuu.
Te cáhán de jíin i jeē na nácani ni i jeē
stóo i cuēchi i te cuandute i, návāha
cone cáhnu ni Yaā Dios nuū cuéchi i.

⁵ Te tāca ñayuu región Judea jíin ñayuu
ñuu Jerusalén, ni quijicoo i nuū de.
Te ni canacani ndaā i cuēchi i nuū
Yaā Dios, te ni scuándute de i ini yūte
Jordán.

⁶ Te sahma ñūhun Juan cúu ixi
camello, te núhni ñn cinturón ññ chīji
de. Te jeē técu de cúu tíca ndicuéhyí
jíin ndúxi yocō. ⁷ Te suhva ni nacani
de jnūhun:

Quiji máá Yaā cujéhnu ndasí. Chi tú
na vé jéhnu cuiúti cúu ri nuū yā, ni jeē
cuajníñu ri nuū yā vésú ñn jniñu lúli
gá nájñūhun jeē cuíta ndeyi ri ndají rí
correa ndijēn yā. ⁸ Te ruhū chi jíin
ndute scuándute ri rohó jíjnáhan rō, te
Yaā ún chi nájñūhun jeē scuándute ya
rohó cúu jeē cuáha ya Espíritu Santo
condee ini anuá rō, achí Juan.

Jeē ní jendute Jesús
(Mt. 3.13-17; Lc. 3.21-22)

⁹ Te ni cuu jecu quiví, te Jesús
ni quenda ya ñuu Nazaret ndañúu

Galilea, te Juan ni scuándute de ya
ini yūte Jordán. ¹⁰ Te ná ni quenda
ya nuū ndúte, te ni jito ya jeē ní
nune-ni andiví, te ni cuun Espíritu
Santo ni quee xiní yā, te cáa nájñūhun
ñn paloma. ¹¹ Te ichi ándiví ní cahān
ñn jnūhun:

Máá rō cúu Sēhe ri jeē maní ndasí rí
jíin, te yōhoyo cúsiñ ni rí jíin rō, achí.

Jeē ní jito ndee jexeén Jesús
(Mt. 4.1-11; Lc. 4.1-13)

¹² Yūcuán na te ni jinū Jesús nde
nuū ñūhun téhé ní sáha Espíritu Santo.

¹³ Te uū xico quiví ni condee yā nuū
ñūhun téhé un núú íin quiúti yúcu. Te
ni jito ndee Satanás yā, chi cúní jeē
sáha ya cuēchi. Te nuū ní cujiyo Sa-
tanás cuahān, te ni quecoo ndajéhe
Yaā Dios, ni cajejníñu nuū yā.

Jeē ní quejéé Jesús nácani ya jnūhun
(Mt. 4.12-17; Lc. 4.14-15)

¹⁴ Yūcuán na te ná ni cachune de
Juan vecā, te ni jinū Jesús región
Galilea, nácani ya jnūhun vāha ndese
ndácu Yaā Dios jniñu. ¹⁵ Te ni cahān
yā:

Je ni jinū quiví, te je ni cuyajni jeē
ndácu Yaā Dios jniñu nuū rō. Nacani
ni rō jeē stóo rō cuéchi rō jíjnáhan rō,
te candíje rō jnūhun jeē jnama ya rohó.
Achí yá.

Jeē ní cana ya cuūn tēe jñā chācá
(Mt. 4.18-22; Lc. 5.1-11)

¹⁶ Te jíca Jesús yumar Galilea
cuahān yā. Te ni jito ya nuū Simón
jíin ñani de Andrés. Te tēe cájññ chācá
cácuu de, te cásiñga de ñunu de ini
mar. ¹⁷ Te ni cahān yā jíin de:

Condiquñ ruhū na quíhín yō, te
nasáha ri rohó téé nihñ cuehē ñayuu
candíje ruhū, nájñūhun cánihñ rō
chācá, achí yá.

¹⁸ Yūcuán na te ni castóo-ni de ñunu
de, te ni candiquñ de ya.

¹⁹ Te ni jíca ya jecu gā, te ni jito
ya nuū Jacobo jíin ñani de Juan, sēhe
Zebedeo, suni cáyúcu de ini barco de,
cánachijññ de ñunu de. ²⁰ Te suni ni
cana ya de jeē cóndiquñ de ya. Te ni
castóo-ni de tátá de Zebedeo ini barco

un jíin mozo de, te ni candiquín de ya cuango de.

Jeē ní quenehen ya tachī ini #n tēe
(Lc. 4.31-37)

²¹ Te ni jinū yā jíin de ñuu Capernaum. Te quivī ndétātu ní quivī ya ini vehe iī sinagoga, te ni steén yā jnūhun. ²² Te ni canaa ni ñayuu ni cajini i jnūhun stéén yā. Chi ni steén vāha ya nuū i, chi máá yá cúu jeē ndíso jniñu siquī ndihi. Te tēe cástéén tutu ley Yaā Dios, tu súcuan cástéén de. ²³ Te ini vehe iī sinagoga ñuu un íne #n tēe jeē ñūhun tachī ini. Te ni cana cóhó de:

²⁴ ¿Naun vēji ní núū na jíjnáhan ná, Jesús ñuu Nazaret? ¿A vēji ní jéē snáa ni sáña, chí naún? Je jíni na ndé #n cúu ní, chí Sēhe iī Yaā Dios cúu ní. Achí de.

²⁵ Te Jesús ni cahān xeēn yā jíin táchī ún:

Casi yuhu ró te quenda ró ini de, achí yá.

²⁶ Te tachī ún xeēn ni jehni yíhí tēe ún. Te ni cana cóhó, te ni quenda ini de cuahān. ²⁷ Te ndihi ñayuu ni cayūhú i, te cácajnūhun jnáhan i:

¿Na vé cúu jeē yáha? ¿A #n jnūhun jéé cúu jeē yáha? Chi tēe yáha cújéhnu de jeē ndácu de jniñu nde nuū tachī te quéndacoo, achí i.

²⁸ Te yachī ni jitē núu jnūhun Jesús cuahān ní cáhnu región Galilea.

Jeē ní nasávāha ya naná chíso Simón Pedro
(Mt. 8.14-15; Lc. 4.38-39)

²⁹ Te ni quenda ya jíin de jíjnáhan de ini vehe iī sinagoga. Te Jesús ni jehēn yā jíin Jacobo jíin Juan nde vehe Simón jíin Andrés. ³⁰ Te náná chíso Simón, cáttú ña yíhi quíji ña. Te ni cacastūhún de nuū yā jeē cuhú ña. ³¹ Yūcuán na te ni quindehe ya nuū catú ña, te ni jniñi ya ndaha ña, te ni ndonehen ya ña. Te ni quenda-ni quíji ún ña, te ni sáha ña jeē ní cayejí de jíin yá.

Jeē ní nasávāha ya cuehē ñayuu
(Mt. 8.16-17; Lc. 4.40-41)

³² Te ni quēe niāndii te ni cuaa. Te ni quecoo ñayuu jíin táca ñayuu

cácuñu jíin jéē ñūhun tachī ini. ³³ Te táca ñáyuu ñuu un ní cacutútú i yéhyí un. ³⁴ Te ni nasávāha ya cuehē ñayuu cácuñu tijni nuū cuehyí, te ni quenehen ya cuehē tachī un cuango. Te tachī chi je cájini un yá, te tu ní jéhe ya jnūhun jeē cástūhun ndé #n cúu ya.

Jeē ní nacani ya jnūhun región Galilea
(Lc. 4.42-44)

³⁵ Te nehen ndasí ní ndonda ya, nde yínee gā. Te ni quenda ya cuahān sún ya yatā ñūū nuū tú ñayuu, te yūcuan ní jicān tahú yā. ³⁶ Te Simón jíin tēe cáhīn jíin de, ni jenanducú de ya. ³⁷ Te ni cananihīn de ya, te ni cacahān de jíin yá:

Tāca ñáyuu cánanducú i níhīn, achí de.

³⁸ Te máá yá ni cahān yā:

Sa suhva na quíhīn yō tāca gā ñuu íne yajni, návāha suni nacani ri jnūhun nuū i, chí jeē yūcuan ní quee ri. Achí yá.

³⁹ Te súcuan te ni jica cuu ya ní región Galilea, ni nacani ya jnūhun ini vehe iī sinagoga táca ñuu, te ni quenehen ya tachī ini ñayuu.

Jeē ní nasávāha ya #n tēe ndóho cuehyí stehyú

(Mt. 8.1-4; Lc. 5.12-16)

⁴⁰ Te #n tēe ndóho cuehyí stehyú, ni quee de ni jecuiñi yití de nuū yā, te ni cahān de jíin yá:

Jíni na jeē cuu sáha ní jéē nduvāha ná, te núu cúni ní, achí de.

⁴¹ Te Jesús ni cundáhú ni yā de, te ni soó yá ndaha ya siquī de, te ni cahān yā:

Cúni ri. Te na nduvāha ró, achí yá.

⁴² Te ná ni cahān yā súcuan, te ni nduvāha-ni tēe ndóho cuehyí stehyú un. ⁴³ Yūcuán na te nátají yá de quinhun de, te ni cahān níhin ya jíin de:

⁴⁴ Ma cáchi cuíti rō nuū ní #n. Chí quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájnūhun ni ndacu Moisés jniñu jenahān. Te súcuan te cuni ñayuu jeē ní nduvāha ró. Achí yá.

⁴⁵ Te ni quenda de cuahān de, te ni quejéé de nácani de jnūhun nuū ndihi ñayuu ndese ni nduvāha de. Te siquī yūcuan tuá ni cúu quīvī Jesús tēcá ñuu, chi cúchitú ndasí ñayuu nuū yā. Te ni jica ya yatā tēcá ñuu nuū tu cúchitú ñayuu. Te tēcá lado ni quiijicoo ñayuu nuū yā.

Jeē ní nasávāha ya ñn tēe ndóho cuehyī ni íjin

(Mt. 9.1-8; Lc. 5.17-26)

2

¹ Te ni cuu jecu quīvī, te ni quīvī tucu Jesús ñuu Capernaum. Te ni cajini ñayuu jeē néne ya vehe. ² Te ni cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jnūhun Yaā Dios nuū i. ³ Yūcuán na te ni quecoo cuūn tēe nuū yā, cándiso de ñn tēe ndóho cuehyī ni íjin. ⁴ Te tu ní cúu quīvīcoo de nuū yā siquī jeē chitú ñayuu. Te ni cacoo de siquī véhe, te ni canune de ndaā nuū ín ya, te yaū un ní cascúun de tēe cúhú, cátú de nuū ñn camilla. ⁵ Te ni jini Jesús jeē cáandíje de jeē cúu nasávāha ya tēe cúhú un. Te ni cahān yā jíin tēe cúhú un:

Séhē, je íne cáhnu ni rī nuū tēcá cuéchi ró, áchí yá.

⁶ Te yūcuan cáyūcú jecu tēe cástéén tutu ley Yaā Dios, te tēe un ní cajeni ni de siquī yā: ⁷ ¿Naun cáhán tēe yáha súcuan? Cáhán de jnūhun ndevāha jeē quití ni Yaā Dios, chi nasūu Yáā Dios cúu de jeē cóne cáhnu ni de nuū cuéchi. ⁸ Te ni jini Jesús jeē súcuan cájени ni de, te ni cahān yā jíin de:

¿Naun cájени ni rō jeē cahān ndevāha rī? ⁹ Jeē uú jnūhun yáha, ¿ndé ñn yí gá cáa? ¿A jēe cahān rī jíin tēe cúhú: Je íne cáhnu ni rī nuū tēcá cuéchi ró? ¿Chí yí gá jeē cahān rī: Ndocuññi te naquihin ró camilla rō, te caca ró, achi rī? ¹⁰ Te vijna te na stéén rī jeē maá rí, Yaā ní nduu tēe, ndíso jniñu rī ini ñayīvī yáha jēe cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

¹¹ Cáhán rī jíin ró, ndocuññi te naquihin ró camilla rō, te quinhun rō vehe ró, áchí yá jíin de.

¹² Yūcuán na te ni ndocuññi-ni tēe ún, te ni naquihin de camilla de, te ni quenda de cuahān de, jito jínúu ndihi ñayuu. Te ndivii i ni canaa ni i cájito i, te ni cacahān i jeē yóhoyo vāha Yaā cúu Yaā Dios. Te áchí i:

Ná tu coto cuiti yō ni ñn jniñu súcuan, áchí i.

Jeē ní cana ya Leví

(Mt. 9.9-13; Lc. 5.27-32)

¹³ Te ni quenda tucu ya cuahān yā nde yumar. Te tēcá ñayuu ni jinūcoo i nuū yā, te ni steén yā jnūhun nuū i. ¹⁴ Yūcuán na te ni yāha ya cuahān yā, te ni jito ya nuū Leví sēhe Alfeo, néne de nuū cutútú xúhun renta. Te ni cahān yā jíin de:

Condiquñ ruhū na quíhín yō.

Te ni ndocuññi de, te cuahān de jíin yá.

¹⁵ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásaaha cuéchi, suni cáyūcú de cáyeji de staā jíin Jesús jíin tēe cáscuáha jíin yá, chi íyó cuéhe de jeē cándiquñ de ya. ¹⁶ Te tēe cástéén tutu ley Yaā Dios jíin tēe grupo fariseo, ni cajito de jeē yéji yā staā jíin ndihi tēcá tēe ún. Te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe cásaaha cuéchi? áchí de.

¹⁷ Te ni jini Jesús, te ni cahān yā jíin de:

Ñayuu cáhīyo váha, tu jini ñúhún i tēe tájné, chi ñayuu cácuñú cúu jeē jini ñúhún. Te ruhū nasūu jēe véji rī cana rī ñayuu tú cuéchi, jeē cúu i nájnūhun ñayuu cáhīyo vāha. Chi sa suhva véji rī cana rī ñayuu cáhīyo cuéchi, jeē na nácani ni i te stóo i cuéchi i. Áchí yá.

Jeē ní cacajñúhún de ya siquī jeē cóndite ni

(Mt. 9.14-17; Lc. 5.33-39)

¹⁸ Te ni cuu ñn quīvī jeē cáhīyo ndite ni tēe cáscuáha jíin Juan, jíin tēe cáscuáha jíin grupo fariseo. Te ni quecoo jecu tēe, ni cacahān de jíin Jesús:

Tēe cáscuáha jíin Juan jíin jéē cascuáha jíin grupo fariseo, tijní jínu cáhíyo ndite ni de. Te tēe cáscuáha jíin máá ní, ¿naun tu casáha de súcuan?

¹⁹ Te ni cahān Jesús jíin de:

¿A cuu condite ni de níní jéē iyó rí jíin de? ¿A cuu condite ni ñayuu cáhīn vico nándāha, te núu níní néne tēe nándāha? Chi núu néne tēe nándāha, te ma cúu condite ni i. ²⁰ Te quee quivī jeē cújiyo tēe nándāha, te quivī ún chi condite ni i.

²¹ Te ni cahān yā uū jnūhun yátá síquī jeē tu quíjnáhan jnūhun jeé jéē steén yā jíin táca jnūhun jenahán. Achí yá:

Ni ñin tu náchuhun ñin pedazo sahma jéé núu ñin sahma túhú. Chi núu súcuan te ndiyi pedazo jeé un, te tahndē gā jeē tuhú un, te nducáhnu ga nuū cátáhdé un. ²² Te suni tu cáchuhun vino jeé ini ñin túhú. Chi núu súcuan te vino jeé un ndatá ñin ún, te naa vino jíin ñin. Jeē yúcuan cánuú jéé chūhun i vino jeé ini ñin jéé.

Jeē ní cataxín de yoco trigo quivī ndétátú

(Mt. 12.1-8; Lc. 6.1-5)

²³ Te ñin quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá, cájica de cuahān de, te ni quejéé de cátaxín de yoco trigo cáyeji de. ²⁴ Yūcuán na te tēe grupo fariseo ni cacahān de jíin yá:

Condēhé. ¿Najehē casáha tēe cáscuáha jíin ró súcuan? Chi achí ley Moisés jeē ma cúu sáha yó ni ñin jniñu quivī ndétátú. Achí de.

²⁵ Te ni cahān maá yá jíin de:

¿A tu ní cácahu cuiti rō tutu ndese ni sáha David, ñin quivī ní cumanī jeé cáji de, te ni jíi de sōco jíin tēe cáhīn jíin de? ²⁶ Te ni quivī de ini vehe Yaā Dios. Te Abiatar ni cuu sutū kujéhnu ga. Te ni yeji de pan ñi jeē yosó ndijin nuū Yaā Dios. Te tú na ley jeé cáji ni ñin tēe, chi máá-ni sutū cuu caji. Te suni ni jēhe de ni cayeyi tēe cáhīn jíin de. Te tú na cuēchi ní íyo síquī de. Achí yá.

²⁷ Te suni ni cahān yā jíin de jíjnáhan de:

Tu ní jéconā ñayuu jeē ndóho i nuū quivī ndétátú, chi ni jeconā quivī un jéē ndétátú i. ²⁸ Núu súcuan te ruhū, Yaā ní nduu tēe, máá rí cúu jeē ndácu jniñu síquī ndese sáha ñayuu quivī ndétátú, achí yá.

Jeē ní nduvāha tēe ni ichī ndaha
(Mt. 12.9-14; Lc. 6.6-11)

3

¹ Te ni quivī tucu Jesús ini vehe ñi sinagoga. Te yūcuan íne ñin tēe ni ichī ñin ndaha de. ² Te tēe grupo fariseo cájito yuhu de ya núu nasávāha ya tēe un quivī ndétátú, návāha nihīn de cuēchi síquī yā. ³ Yūcuán na te ni cahān yā jíin tēe ni ichī ndaha ún:

Ndocuñi te condichi rō mēhñu yáha, achí yá.

⁴ Te ni cajnūhun yá de jíjnáhan de:

¿Ndese cáhān ley síquī quivī ndétátú? ¿A jéē sáha vāha yó, chí sáha néé yó? ¿A jéē nasávāha yó ñayuu je yajni cuu, chí sáha yó jéé cúu i? achí yá.

Te máá de tú na vé ni cacahān de. ⁵ Te ni quitī ni yā ni jito ya nuū de jíjnáhan de, te ni cucuíhyá ni yā jeé níhni ni de. Te ni cahān yā jíin tēe ni ichī ndaha:

Scáá ndaha ró.

Te ni scaá de, te ni nduvāha-ni ndaha de. ⁶ Yūcuán na te ni quendacoo tēe grupo fariseo, te ni casquíjnáhan de jnūhun jíin tēe grupo Herodes síquī yā, ndese cahni de ya.

Jeē ní quecoo cuehē ñayuu nuū yā yumar

⁷ Te Jesús cuahān yā nde yumar jíin tēe cáscuáha jíin yá. Te cuehē ñayuu región Galilea ni candiquñ i ya. ⁸ Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi núu cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jnūhun i jniñu jéhnu ni sáha ya, te ni quecoo i nuū yā. ⁹ Te ni cahān yā jíin tēe cáscuáha jíin yá jeē na cóo tūhva ñin barco quivī ya, návāha ma chitú níhin ñayuu cuehē ún xiin ya. ¹⁰ Chi cuehē ñayuu je ni nasávāha ya, te jeé

yúcuán vējicoo cuehē gā ñayuu cándoho tāca núu cuehyī, te chítú níhin i xiin ya jeē quehé i ya cáculi i. ¹¹ Te ñayuu cáñuhun tachī ini, núu ni cajito nuū yā, te cájecuiñī yití núu yā, te cácana cóhó:

Máá ní cúu Sēhe Yaā Dios, achí.

¹² Te ni ndacu níhin ya nuū tachí un jēē ma cáhán gā jeē cúu ya Sēhe Yaā Dios.

*Jeē ní nacāji ya uxī uū tēe apóstol
(Mt. 10.1-4; Lc. 6.12-16)*

¹³ Yūcuán na te ni caa ya cuahān yā ñin yucu. Te ni cana ya tāca tēe jeē cuní maá yá caca jíin yá, te ni quecoo de nuū yā. ¹⁴ Te ni jeni ya uxī uū de jeē cuiñi de jíin yá, te tají yá de quingoo de nacani de jñuhun. ¹⁵ Te ni sáha ya jeē cóndiso jñiñu de nasávāha de ñayuu cuhú te quenehen de tachī ini ñayuu. ¹⁶ Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro. ¹⁷ Te Jacobo jíin ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēe yāhi fuerza nacani jñuhun, nájñuhun yāhi fuerza taja. ¹⁸ Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, ¹⁹ jíin Judas Iscariote, tēe jeē ní nastúu de ya.

Jeē ní cacahān ñayuu jeē jejniñu ya fuerza Satanás

(Mt. 12.22-32; Lc. 11.14-23; 12.10)

Yūcuán na te ni quīvi ya ñin vehe jíin tēe cáscuáha jíin yá un. ²⁰ Te ni ndutútú tucu cuehē ñayuu, te ni tuá ni cúu caji yā staā jíin de. ²¹ Te tāca jñáhan vehe ya ni cajini jñuhun jeē súcuán cúu. Te ni quecoo de venūquihin de ya. Chi cácahān de jeē ní sana xinī yā.

²² Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yāha ñuhun Satanás ini de, jeē cujéhnu nuū tachí. Te jíin fuerza un quenehen de tachí, achí de.

²³ Te ni cana ya de jíjñáhan de, te ni cahān yā ñin jñuhun yátá jíin de:

¿Ndese cuu quenehen Satanás maá?

²⁴ Chi núu ñin nación sásñin maá te cuajnáhan maá, nación un má cúu ga coyūcu cáhnu. ²⁵ Te núu ñayuu ñin vehe sásñin maá te cuajnáhan maá, ñayuu un má cúu ga coyūcu cáhnu. ²⁶ Te suni súcuán Satanás jíin jñáhan tachí, chi núu sásñin maá te cuajnáhan maá, núu súcuán te ma cóo ga, chi sa suhva naa.

²⁷ Te ni ñin tēe ma cúu quīvi de ini vehe tēe ndacuī jeē quenehen de ndajniñu de. Chi canuú jeē xihna gā cuhni de tēe ndacuī ún. Te suni súcuán cúu jeē jíhni rī Satanás te quenehen rī tachí.

²⁸ Te jendaá cahān rī jíin ró jeē iyó modo coo jñuhun cáhnu ni nuū tāca cuéchi cásaáha ñayuu, te suni nuū tāca jñuhun néé cácahān i. ²⁹ Te núu cahān ndevāha i siquī Espíritu Santo, te ma cóne cáhnu ni Yaā Dios nuū i, chi sa suhva condee cuéchi siquī i ní cáni, achí yá.

³⁰ Súcuán ni cahān yā, chi ni cacahān i jeē quenehen ya tachí jíin fuerza Satanás.

Náná yā jíin ñani yā

(Mt. 12.46-50; Lc. 8.19-21)

³¹ Yūcuán na te ni quee naná yā jíin táca ñani yā. Te ín ña nuū quehe, te ni tají ña jñuhun cuahān nuū yā jeē cána ña ya. ³² Te ñayuu cáyūcu ní xiin ya, ni cacahān i jíin yá:

Náná ni jíin táca ñani ni cáhlin nuū quehe, te cáculi cahān jíin ní, achí i.

³³ Te ni cahān maá yá:

¿Ndé ñin cúu náná rī jíin ñani rī? achí yá.

³⁴ Yūcuán na te ni ndacoto ya nuū ñayuu cáyūcú xiin ya ún, te ni cahān yā:

Suni náná rī jíin ñani rī cácuu tāca ñayuu yáha. ³⁵ Chi táca ñayuu casquícu jniñu cuní Yaā Dios, suu cácuu ñani rī, cuāha rī, náná rī, achí yá.

Jñuhun yátá síquī tēe jete trigo

(Mt. 13.1-9; Lc. 8.4-8)

4

¹ Te yumar ni quejéé tucu Jesús steén yā jñuhun. Te ni cutútú cuéhē ndasí ñayuu nuū yā, te jeē yúcuán ní

quĩvĩ ya ni cucōo ya ini ñn barco nuũ mar. Te tãca ñayuu un cáyucú i yumar. ² Te jíin jnúhun yátá ni steén yã cuehẽ jnúhun nuũ i, te súcuan ni cahãn yã:

³ Cuni nahín jíinãhan ró: ñn tẽe cate trigo, ni quenda de jeẽ cáte de. ⁴ Te ná ni quejéẽ de jéte de, te jecu trigo ni jítẽ yuhíchi. Te ni quecoo saa, ni cayeji tĩ. ⁵ Te jecu gã trigo ni jítẽ nuũ ñúhun yuũ, nuũ tú cuehẽ ñuhun. Te yachĩ-ni ni cane, chi tu cóquin ñuhun. ⁶ Te nuũ ní cane niãndii, te ni ichĩ-ni, te ni casun, chi tu ní níhín nuũ quihín yoho. ⁷ Te jecu gã trigo ni jítẽ nuũ náne iñu. Te ni jehnu iñu ún, te ni jesĩ nuũ, te tu ní jéhe nunĩ. ⁸ Te jecu ni jítẽ nuũ ñúhun váha. Te ni cane, te ni jehnu, te ni jéhe cuehẽ nunĩ. Sava ni jéhe ocō uxĩ jeẽ ñn ñn nunĩ, te sava ga ni jéhe unĩ xico, te sava ga ni jéhe ciento. Achí yá.

⁹ Yũcuán na te ni cahãn yã jíin de:

Tãca róhó jéẽ jíini sōho, na chúsóhó ró. Achí yá.

Najehẽ cahãn yã máni jnúhun yátá
(Mt. 13.10-17; Lc. 8.9-10)

¹⁰ Yũcuán na te ni quendōo máa na yã, jíin ndihúxí uũ tẽe cáscuáha jíin yá, jíin jecu gã ñayuu cáhĩin jíin de. Te ni cacajnúhún de ya na vé cuní cahãn jnúhun yátá un. ¹¹ Te ni cahãn yã jíin de:

Róhó, chi sáha Yaã Dios jeẽ cájecũhun ni rō jnúhun ni yisãhi yáha, ndese quívicoo ñayuu ndaha ya ndacu ya jniñu nuũ i. Te ñayuu jeẽ cáhĩin sñn síquĩ, chi máni jíin jnúhun yátá cáhãn rĩ tãca jnúhun jíin i. ¹² Súcuan cáhãn rĩ návãha vēsú cájito i, te quendōo i nájnhun jeẽ tú na vé ni cájito i. Te vēsú cájini sōho i, te ma jécũhun ni i, te ma násãma ini i quívicoo i nuũ rĩ, te ma cóo jnúhun cáhnu ni nuũ cuéchi i, achí yá.

Jeẽ ní castũhun cájí yá jnúhun yátá
té jéte trigo

(Mt. 13.18-23; Lc. 8.11-15)

¹³ Te ni cahãn gã yã jíin de jíinãhan de:

Núu tu cájecũhun ni rō jnúhun yátá yáha, ¿te ndese jecũhun ni rō tãca gã jnúhun yátá núu súcuan? ¹⁴ Tẽe jéte trigo cúu tẽe scuítẽ núu jnúhun Yaã Dios. ¹⁵ Te trigo jeẽ ni jítẽ yuhíchi cúu nájnhun ánuá sava ñayuu. Chi cájini nahín i jnúhun ya, te ná ni cajini i, te quíji-ni Satanás te quẽde-ni jnúhun ini anuá i. ¹⁶ Te trigo jeẽ ni jítẽ nuũ ñúhun yuũ, chi cúu nájnhun ánuá sava ñayuu cájini nahín jnúhun, te yachĩ-ni cájetáhú i te cácusĩ ni i jíin. ¹⁷ Te tu cúcutú jnúhun ún ini anuá i, te jecu-ni quĩvĩ cájetáhú i. Te núu ni quejéẽ jnúndóho, chí jíto xeẽ ñayuu i síquĩ jnúhun ún, te quejéẽ nácani yátá ni i. ¹⁸ Te jeẽ ni jítẽ nuũ náne iñu cúu nájnhun jecu gã ñayuu. Chi vēsú ni cajini sōho i, ¹⁹ te cándihvĩ ni i síquĩ jeẽ iyó ini ñayĩvĩ yáha. Te cáconi i cucúcá i, te stáhú un i jeẽ cutóo ni i síquĩ tãca ndajniñu. Te ndihĩ jeẽ yáha cácuñéñu i jíin, te jesĩ nuũ jnúhun ya, te tu íje i jíin jnúhun ya. ²⁰ Te trigo jeẽ ni jítẽ nuũ ñúhun váha cúu nájnhun ñayuu cájini nahín jnúhun, te cájetáhú i, te cáhije i jíin jnúhun ya. Te sava i cúu nájnhun nunĩ jeẽ jéhe ocō uxĩ jeẽ ñn ñn, te sava i jéhe unĩ xico, te sava ga i jéhe ciento. Achí yá.

Jnúhun yátá síquĩ lámpara
(Lc. 8.16-18)

²¹ Suni ni cahãn yã jíin de:

Núu nástĩn ñayuu ñn lámpara, ¿a chũne i chíji ñn cajón chí chíji jíto? Tuú, chi jéni i nuũ sucún návãha cundijin. ²² Te suni súcuan, tu íyó ni ñn jnúhun sãhi jéẽ ma cúni ñayuu, chi ndihĩ tãca jnúhun natũu ndijin te cuni ñayuu. ²³ Tãca róhó jéẽ jíini sōho, na chúsóhó ró, achí yá.

²⁴ Te suni ni cahãn yã jíin i:

Cuni sōho vãha ró. Chi cũhva jeẽ chusóhó ró jnúhun Yaã Dios, suni cũhva un cuáha ya nuũ rō, te víhyá gã cuáha ya nuũ maá ró jeẽ chusóhó váha ró. ²⁵ Chi ñayuu je jécũhun ni, steén gã yã nuũ i. Te ñayuu tu cándíje, máa jecu jeẽ jiní i ún, sa suhva naa. Achí yá.

Jnūhun yátá síquī trigo jeē jéhnū

²⁶ Te ni cahān gā yā:

Súcuan cúu jeē ndácu Yaā Dios jniñū nuū ñáyuu: Cúu nájñūhun trigo jeē ní jete ñin tēe. ²⁷ Yūcuán na te quíxí de te ndónnda de, te súcuan jíca quíví cuahān. Te trigo un cáne te jéhnū. Te máá de tu jíni de ndese cúu jeē jéhnū. ²⁸ Chi máá ñūhun sáha jeē jéhnū trigo, xīhna gā yucū, sáá te cáne yoco, yūcuán na te íje máá núnī. ²⁹ Te núu ni cuaan trigo un, te quéjéé ñáyuu cájehnde i, chi je ni jinū quíví tahndé. Achí yá.

Jnūhun yátá síquī ndiquin mostaza (Mt. 13.31-32; Lc. 13.18-19)

³⁰ Te suni ni cahān yā:

Na cáhán rī ñin jnūhun yátá návāha cuni rō ndese ndúcuehē ñayuu jeē ndácu Yaā Dios jniñū nuū. ³¹ Ndúcuehē i nájñūhun jéhnū ñin ndiquin mostaza jeē jéquin i nuū ñūhun. Te yūcuan cúu ñin ndiquin lúli gá vésú tācá ndiquin jeē iyó. ³² Te ná ni jequin i, te cáne te jéhnū ga vésú tāca gá yucū, te cúnáhnū ndaha. Te tācá saa chi sáha tī tacā tī nuū cuándahú xinī ún. Achí yá.

Jeē máni jnūhun yátá cáhán yā jíni i (Mt. 13.34-35)

³³ Te cuehē jnūhun yátá súcuan ni cahān yā jíni ñáyuu, núu nasaa cánda i jecūhun ni i. ³⁴ Te tāca jéē ni stéén yā, máni máá jnūhun yátá ní cahān yā jíni i. Te nuū tēe cáscuáha jíni yá chi ni nacastūhun cájí yá jnūhun ún.

Jeē ní jecuiñī tachī ñihin jíni mar ni sáha ya

(Mt. 8.23-27; Lc. 8.22-25)

³⁵ Te jeē cuácuaa quíví ún, te ni cahān yā jíni tēe cáscuáha jíni yá:

Na yáha yó quíhīn yō inga lado mar, achí yá.

³⁶ Te ni casquéndō de ñayuu cuehē ún, te ni quívícoo de ini barco nuū je íne Jesús, cuango de jíni yá. Te suni cuango jecu gā barco jíni de jíniáhan de. ³⁷ Te ni jequíhi ñin tachī ñihin, te ni stónnda ndute mar, te ni quíví ini barco. Te je yajni chitú ndute ini barco. ³⁸ Te Jesús catú yá yatā de ini barco, quíxí yā te yíhi ñin sahma

castíhi xinī yā. Te ni castónnda de ya, te ni cacahān de:

Maestro, ¿á tu sáha ní cuenta jeē quēe yó chíji ndute te cuu yō? achí de.

³⁹ Te ni ndocuiñī yā, te ni cahān yā nuū tachí ñihin un jíni núu mar:

Jecuiñī te nayúú-ni coo ró, achí yá.

Te ni jecuiñī tachī, te ni cuu nayúú í-ni. ⁴⁰ Te ni cahān yā jíni de jíniáhan de:

¿Naun cáyūhú ndasí ró? ¿Naun tu cáchandíje ró jéē cácu ró sáha rí?

⁴¹ Te yōhyo ni cayūhú de, te ni cacahān de jíni jnāhan de:

¿Ndé ñin ga cúu tēe yáha jéē nde tachī ñihin jíni mar cájetáhú jéē cahán de? achí de.

*Tēe Gadara jeē ndóho tachī (Mt. 8.28-34; Lc. 8.26-39)***5**

¹ Te ni jinū Jesús jíni de jíniáhan de inga lado mar, región Gadara. ² Te ná ni quenda ya ini barco un, te ñin tēe ñūhun tachī ini, ni quenda de nde nuū yíndūji ndíyí, te ni quee de nuū yā. ³ Tēe un ndéé de nuū yíndūji ndíyí. Te tu jéjníñū jeē jíhni ñayuu de, ni jíni cadena. ⁴ Chi cuehē jíni ni conuhnī jehē de ndaha de jíni cadena. Te tāca jíni jéhnnde de, te sácuéché de. Te tú ni ñin cúndeyí jíni de. ⁵ Te nduú ñuú jíca de yucu jíni núu yíndūji ndíyí, te cána cóhó de, te stújí de máá de jíni yúu. ⁶ Te náa jíca gá vēji Jesús, te ni jito de ya. Te jíni de ni quee de nuū yā, te ni jecuiñī yití de nuū yā. ⁷ Te ni cana cóhó de:

¿Naun vēji ní núu ná, Jesús Sēhe Yaā Dios, Yaā cujéhnū téyí? Cáhán ndahú ná jíni ní, jíni nahín Yaā Dios, ma stóho ní sáña, achí de.

⁸ Súcuan ni cahān de, chi je ni cahān Jesús:

Táchī, quenda ini tēe yáha quíhīn rō.

⁹ Te ni cajñūhun yá de:

¿Na vé naní ró?

Te ni cahān de:

Legión naní ná, chi cuehē tachī ñūhun ini ná, achí de.

¹⁰ Te ni cahān ndahú ndasí de jíni yá jeē ma tájí yá tachī quendacoo región

ún. ¹¹ Te yajni yucu yúcuan cáhiin cuehē quīnī cájitu tī. ¹² Te tachī jeē ñúhun ini tēe un ní cacahān ndahú jíin yá:

Núu tají ní sãñá, te cuāha ní jnúhun quīvicoo ná ini quīnī yūcuán, áchí.

¹³ Te Jesús ni jēhe ya jnúhun. Te ni quendacoo tachī ún ini tēe ún, te ni quīvicoo ini quīnī, te íyó nájnūhun uū mil tī. Te quīnī un ní cajinu tī ni ñingoo tī ñin yucáva, ni quīvicoo tī nuū mar. Te ni ndaquīhi tī ndute, ni cajihī tī.

¹⁴ Te tēe cándito tī, ni cajinu de cuangoo de jeē ní cayūhú de. Te ni jinūcoo de ni cacastūhún de nuū ñáyuu ñuu un jíin ñáyuu tāca rancho. Te cuangoo ñayuu un cuácondēhé i na vé ni cuu. ¹⁵ Te ni jinūcoo i nuū íne Jesús, te ni cajito i nuū tēe ni ñuhun cuehē tachī ini. Te néne de, te ñúhun de sahma, te je ni nducájí xínī de. Te ni cayūhú ñáyuu ún. ¹⁶ Te tēe ní cajito, ni canacani de jnúhun nuū ñáyuu, ndese ni nduvāha tēe ni ñuhun tachī ini, jíin ndese ni candoho quīnī ún. ¹⁷ Yūcuán na te ni caquejéé i cacahān ndahú i jíin yá jeē na cújiyo ya región yúcuan quíhīn yā.

¹⁸ Te ni ndīvi ya ini barco. Te tēe ni ñuhun tachī ini un ní cahān ndahú de jíin yá jeē na cuāha ya jnúhun quíhīn de jíin yá. ¹⁹ Te Jesús tu ní jēhe ya jnúhun, chi ni cahān yā jíin de:

Cuánuhun vehe ró núu jnáhan ró, te nacani ró jnúhun nuū i ndese yōhyo jéhnu jniñu ni sáha máá Jítóho rō jíin ró, te ndese ni cundáhú ni yā rohó, áchí yá.

²⁰ Te ni quenda de cuahān de, te ni quejéé de nácani de jnúhun tācá ñuu Decápolis ndese yōhyo jéhnu jniñu ni sáha Jesús jíin de. Te ndīvii ñayuu un ní canaa ni i cájini nahín i.

Jnúhun sēhe síhí Jairo jíin ñahan ní quehé yusáhma ya

(Mt. 9.18-26; Lc. 8.40-56)

²¹ Te ni nayāha tucu Jesús cuanuhun yā inga lado mar jíin barco. Te ni quecoo cuehē ñayuu nuū yā, nuū íne ya yumar. ²² Te ni quee ñin tēe cújéhnu ini vehe ñi sinagoga, naní

de Jairo. Te ná ni jito de nuū yā, te ni jecuiñī yití de nuū jehé yā. ²³ Te ni cahān ndahú ndasí de jíin yá:

Sēhe síhí ná je yajni cuu i. Na quíhīn yō vehe ná te soó ní ndaha ní síquī i návāha na ndúvāha i te cotecu i, áchí de.

²⁴ Yūcuán na te cuahān yā jíin de. Te cuehē ñayuu cándiquīn i ya, te ni chitú níhin i xiin ya cuangoo i. ²⁵ Te mēhñu ñáyuu un cuáhān ñin ñahan cúhú, jeē ní cuu uxī uū cuiyā ndóho ña cuehyī niñī. ²⁶ Te yōhyo ni ndoho ña, chi ni jexin ña tāca jēé névāha ña jíin cuehē tēe tájná, te tu ní jéjníñu jeē ndúvāha ña, chi sa suhva víhyá gā sáha. ²⁷ Te ñahan yáha ná ni nihīn ña jnúhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhma ya. ²⁸ Chi ni jeni ni ña: Vēsú maá sahma ya na níhīn rī quehé rí, te nduvāha ri, jéni ni ña. ²⁹ Te ni jecuiñī-ni niñī ña, te ni jini ña jeē ní nduvāha ña cuehyī ún. ³⁰ Te Jesús ni jini yā jeē ní nduvāha ñin ñayuu jíin fuerza yā. Te ni ndió cóto ya nuū ñáyuu cuehē, te ni cahān yā:

¿Ndé ñin ni quehé sahma ri? Achí yá.

³¹ Te tēe cáscuáha jíin yá, ni cacahān de:

Jító ní jéé ñáyuu cuehē yāha ní chitú níhin i xiin ní te cáquīhi i níhīn ní cáni ichi, te cájnūhun ní ndé ñin ni quehé sahma ní.

³² Te máá yá jító ya cháha chúcuan, cúní yā jeē na cáchi ñayuu ni sáha. ³³ Te ñahan un yúhú ña te quísi i ña, te je jíin ña jeē ní nduvāha ña. Te ni quee ña, te ni jecuiñī yití ña nuū yā, te ni cachi ña ndīhi ndese ni cuu jíin ña. ³⁴ Te ni cahān yā jíin ña:

Séhē, ni candíje ró jéé cuu nasávāha ri rohó, te jeē yúcuan ní nduvāha ró. Cuáhān te na ndúsī ni rō, chi je ni nduvāha ró cuéhyī ní ndoho ró, áchí yá.

³⁵ Te níni cáhán gā yā súcuan, te ni quecoo ñayuu cáyúcú vehe tēe cújéhnu ini vehe ñi sinagoga, te ni cacahān i jíin de:

Je ni jihī sēhe sīhí ní. Te ma sajnēñu ga ní Maestro, achí i.

³⁶ Te Jesús tu ní sáha ya cuenta jeē súcuan cácahān i, te ni cahān yā jíin tēe cújéhnu ini vehe i sinagoga:

Ma yūhu ró, chi candíje ró jēē nastécu rī i, achí yá.

³⁷ Te tu ní jéhe ga yā jnūhun condiquīn ñayuu yā, chi máa-ni Pedro jíin Jacobo, jíin Juan ñani Jacobo. ³⁸ Te ni jinū yā vehe tēe cújéhnu ini vehe i sinagoga, te ni jito ya ñayuu, cácuvaā i, te cándahyū i, te cácana cóhó i. ³⁹ Te ni quivī ya, te ni cahān yā:

¿Najehē yōhyo cásaava rō te cándahyū rō? Sūchi sīhí yáha, tu ní jihí i, chi quixí-ni i, achí yá.

⁴⁰ Te ni cajecū catá i jeē ni cáhān yā. Te ni quenehen ndihí ya i cuahān i nuū quéhe. Te ni cana ya máa-ni tátá jíin náná sūchi sīhí un, jíin tēe cáhān jíin yá, te ni quivī ya jíin de nuū catú sūchi sīhí ní jihí ún. ⁴¹ Te ni jni ya ndaha i, te ni cahān yā jíin i:

Talita cumi, achí yá. Te jnūhun un cúní cahān: Sīhí, cáhān rī jíin ró, ndocuiñī, achí yá.

⁴² Te ni ndocuiñī-ni sūchi sīhí un, te ni nacaca i, chi je íyó i uxī uū cuiyā. Te yōhyo ni canaa ni ñayuu cájito i. ⁴³ Te ni ndacu nihin ya jniñu nuū i jíin náhan i jeē ma cáchi cuiñi i nuū ni ñn. Te ni cahān yā jeē na cuáha ña jeē cáji sūchi sīhí.

*Jeē cuánuhun yā ñuu Nazaret
(Mt. 13.53-58; Lc. 4.16-30)*

6

¹ Te ni quenda Jesús yūcuán, te cuanuhun yā ñuu yā. Te tēe cáscuáha jíin yá cuango de jíin yá. ² Te máa quivī ndétātu ní steén yā jnūhun ini vehe i sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutūhva tēe yáha táca jnúhun yáha? ¿Te ndese cúu jeē cahān de jnūhun ndíchí yáha jíin jēē sáha de jniñu jénu yáha? ³ Chi tēe yáha cúu carpintero, te sēhe María cúu de, te ñani Jacobo jíin José jíin Judas jíin

Simón cúu de. Te suni cáyūcu cuáha de jíin yó yāhá. Achí i.

Te súcuan ni cacujēē ni i nuū Jesús. ⁴ Te ni cahān yā jíin i:

Tāca tēe nácani jnūhun Yaā Dios, íyó yñúhún ñayuu jíin de, chi máni ñayuu ñuu maá de, jíin jnáhan de, jíin ñayuu vehe de cúu jeē tu íyó yñúhún jíin de. Achí yá.

⁵ Te tu ní cúu sáha ya cuehē jniñu jénu yūcuán. Chi jecu-ni ñayuu cácuñu ni soó yá ndaha ya siquī i, te ni nasávāha ya i. ⁶ Te náa ni yā jito ya jeē tu cácañíje ñayuu jíin náhan i. Yūcuán na te ni jica cuu ya táca ñuu yajni, ni steén yā jnūhun.

Jeē ní taji yá ndihúxi uū de cuanacani de jnūhun

(Mt. 10.5-15; Lc. 9.1-6)

⁷ Te ni cana ya ndihúxi uū tēe cáscuáha jíin yá, te ni taji yá ndihuū ndihuū de quingoo de. Te ni sáha ya jeē cóndiso jniñu de quenehen de tachí ini ñayuu. ⁸ Te ni ndacu ya jeē tú na vé condiso de jeē cuajniñu de ichi, ni ñunu, ni staā, ni xūhún. Chi máa vara-ni condahá de. ⁹ Te quihí de ndijēn, te ma quihín de jíin úu sahma, achí yá. ¹⁰ Te suni ni cahān yā jíin de:

Na-ni vehe núu ni quivícoo ró, te yūcuán coyūcu ró ndé quenda tucu ró quihín rō inga ñuu. ¹¹ Te núu ñn ñuu tu cájetáhú i róhó, ni tu cúní i cuni nahín i jnūhun cahān rō, na quéndacoo ró yūcuan, te scóyo ró tícachā jehē rō, te súcuan steén rō jeē íyó cuéchi i jeē tu ní cájetáhú i. Jendaá cahān rī jíin ró jeē quiví coo juicio te xeén gā coo castigo siquī ñuu cásaaha súcuan vēsú siquī ñuu Sodoma jíin ñuu Gomorra nuū ní casáha ndasí ñayuu cuéchi.

¹² Te ni quendacoo de cuahān de, te ni canacani de jnūhun jeē na nácani ni ñayuu jeē stóo i cuéchi i. ¹³ Te suni ni caquenehen de cuehē tachí ini ñayuu. Te ni cachihí de aceite cuehē ñayuu cácuñu, te ni canduvāha i.

*Jeē ni jihí Juan tēe scuándute
(Mt. 14.1-12; Lc. 9.7-9)*

14 Te rey Herodes ni jini jnūhun de jnūhun Jesús, chi ni jitē núu jnūhun ya ní cáhnu. Te ni cahān de:

Tēe yúcuan cúu Juan tēe ni scuándute, te ni natecu de. Jeē yúcuan íyó poder de sáha de jniñu jéhu. Achí de.

15 Te sava ga ñayuu ni cacahān i:

Tēe un cúu Elías jeē ní nacani jnūhun jenahán.

Te sava ga i ni cacahān:

Tuú chi ñn tēe nácani jnūhun Yaā Dios cúu de, nájñūhun tēe ni canacani jnūhun ya nde jenahán, achí i.

16 Te ná ni jini Herodes, te ni cahān de:

Tuú chi yúcuan cúu Juan jeē ní ndacu ri jniñu ni tahndē xinī, te ni natecu de núu súcuan, achí de.

17 Chi máá Herodes ni ndacu de jniñu jeē na quívi Juan vecāa, jíin jéē na cónuhnī de jíin cadena. Súcuan ni sáha de jeē síquí Herodías, ñasihí ñani de Felipe. Chi Herodes ni quihin de ña jeē cúu tucu ña ñasihí de. 18 Te Juan ni cahān de nuū Herodes:

Tu íyó ley jeē cóndeca ró ñasihí ñani rō, achí de.

19 Te jeē yúcuan Herodías ni jito uhū ña Juan, te cúní ña jeē na cúu de, te tu ní níhín ña modo. 20 Chi Herodes yúhú de cahni de Juan, chi jíin de jeē tēe ndaā tēe ndoo cúu Juan. Te jeē yúcuan ní jesi de jeē nducú ña jeē cúu Juan. Te nújnahan ni de jíin nahín de jnūhun cáhán Juan, vésú tu jécūhun vāha ni de. 21 Te ni quee ñn quívi jeē ní cundeyí Herodías. Chi ni sáha Herodes ñn vico quívi ní cacu de, te ni jēhe de jeē ní cacuxíni tēe cándiso jniñu nuū de, jíin tēe cácuu capitán, jíin tēe cácujuhnu región Galilea. 22 Te ni quívi sēhe síhí máá Herodías, ni jita jéhe i nuū chitú un. Te ni cacusiñ ni rey Herodes jíin tēe cácuixíni jíin de. Te ni cahān de jíin súchi síhí un:

Cacān na vé cuní rō, te cuāha ri nuū rō, achí de.

23 Te ni cahān teyí de jeē cuāha de núu na vé cuní i cacān i, vésú nde sava región jeē yñi ndaha de. 24 Te ni quenda i, ni jecajñūhún i náná i:

¿Na vé cacān na núu de? achí i.

Te ni cahān ña:

Xinī Juan tēe scuándute cacān rō nuū de, achí ña.

25 Yūcuán na te ni ndīvi-ni i nuū rey, te ni cahān i:

Cúní na jéē vijna ñúhún-ni cuāha ní xinī Juan tēe scuándute, cone nuū ñn cohō, achí i jíin de.

26 Yūcuán na te ni cucuíhyá ndasí ni rey un jeē ní cundeyí Herodías jeē cúu Juan. Te síquí jeē ní jéjnūhun téyí de, jíin jéē ní cajini sōho tēe cáyeji staā jíin de, jeē yúcuan tu ní cúní de sásáhán de jeē ni jíicān i. 27 Te ni tají-ni de ñn soldado jeē quíquihin de xinī Juan. 28 Te ni jehēn soldado un vecāa, te ni jehnde de xinī Juan. Te ni quee de jíin xinī Juan, íne nuū ñn cohō. Te ni jēhe de nuū súchi síhí un, te máá i ni jēhe i nuū naná i.

29 Te tēe cáscuáha jíin Juan ni canihín de jnūhun, te ni jengoo de, ni candonehen de yiquí cúu Juan, te ni cachindūji de.

Jeē ni scáji yā uhūn mil tēe

(Mt. 14.13-21; Lc. 9.10-17; Jn. 6.1-14)

30 Yūcuán na te tēe cácuu apóstol jeē ní tají yá cuangoo nacani jnūhun, ni ndecoo de nuū Jesús. Te ni canacani de nuū yā tēcá jniñu ni casáha de, jíin jnūhun ni castéén de. 31 Te ni cahān yā jíin de:

Na quíngoo yó ñn lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní núne ya jeē cáji yā staā jíin de. 32 Yūcuán na te ni quívi ya ñn barco jíin táca tēe apóstol un, te cuangoo sñn ya jíin de ñn lugar nuū tú ñayuu. 33 Te cuehē ñayuu ni cajito i jeē cuahán yā jíin de, te ni canacuni i jeē maá yá cúu. Te nde tēcá ñuu ni quendacoo i, te yachī cuangoo i, te xīhna gā i ni jinūcoo vésú maá yá. 34 Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cúu i nájñūhun lanchi jeē tú jito ho tī. Te ni steén yā cuehē jnūhun nuū i. 35 Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. ³⁶ Núu súcuan te tají ní ñayuu na quíngoo i tāca rancho jíin ñuu yajni, te cuaan i staā caji i, chi tú na vé cándiso i caji i, áchí de.

³⁷ Te ni cahān Jesús jíin de:

Cuāha máá ró jeē cáji i, áchí yá.

Te ni cacahān de:

¿Te ndese cuu? Chi ni ma cúu vēsú núu quicuaan ná ndé uū ciento denario staā caji ñayuu, achí de.

³⁸ Te ni cahān yā jíin de:

¿Nasaa staā cánevāha ró? Cuacondēhe, áchí yá.

Te nuū ní cajini de, te ni cacahān de:

Uhūn-ni staā jíin úu chācá íyó, áchí de.

³⁹ Yūcuán na te ni cahān yā jíin ñáyuu jeē na cúcōo sūn i cuenta grupo nuū íte. ⁴⁰ Te ni cacucōo sūn ciento ciento i, jíin cincuenta cincuenta i.

⁴¹ Te ni quihin ya ndihúhún staā jíin úu chācá un, te ni ndacoto ya ichi ándiví, te ni nacuatáhú yá. Te ni tahu cuéchí yá staā ún, te ni jēhe ya nuū téé cáscuáha jíin yá, te máá de ni casaja de nuū ñáyuu cuehē ún. Te suni ni jēhe ya ndindúú chācá, ni casaja de nuū i.

⁴² Te ndivii i ni cayejí, te ni candutú chíji i. ⁴³ Yūcuán na te ni canastútú de pedazo staā jíin chāca jēé ní quendōo, te ni chitú úxí uū jīca. ⁴⁴ Te tēe ni cayejí, chi uhūn mil de cúu.

Jeē ní jica jéhe yá nuū mar

(Mt. 14.22-27; Jn. 6.16-21)

⁴⁵ Yūcuán na te ni cahān-ni Jesús jíin téé cáscuáha jíin yá jeē na quívicoo de barco, te cosnūú de yāha de inga lado mar ñuu Betsaida. Te máá yá chi natajé yá ñayuu quinhun i, te sáa te suni quihin yā. ⁴⁶ Te nuū ní cuu ni natajé yá i, te ni caa ya yucu cuacacān tahu yā. ⁴⁷ Te jeē ní cuaa, te barco un je ni cuu sava nuū mar cuahān, te máñuhún-ni ya ni quendōo nuū ñuhun íchi. ⁴⁸ Te ni jito ya jeē yóhyo jnūndóho cáscaca de barco, chi nihin vēji tachí ichi núú de. Te jeē yínee gā ni quee ya nuū de, jīca jéhe yá nuū mar. Te yāha ya nuū de quihīn yā nuú. ⁴⁹ Te ni cajito de jeē jíca ya nuū

mar, te ni cajeni ni de jeē jihná cúu, te ni cacana cóhó de. ⁵⁰ Chi ndihí de ni cajito nuū yā, te ni cayūhú ndasí de. Te ni cahān-ni ya jíin de:

Ndeyí coo ni rō, te ma yūhu ró, chi máá rí cúu, áchí yá.

⁵¹ Te ni quíví ya ini barco un, te ni jecuiñí-ni tachí. Te yóhyo ni canaa ni de cájito de. ⁵² Chi cándāa néé gá jeē níjnūní de, chi ni jíin jniñu jéhu jeē ní nducuehē staā, tu ní cájecūhun ni de jeē máá yá cúu Yaā ní tají Yaā Dios.

Jeē ní nasávāha ya ñayuu cácuñu región Genesaret

(Mt. 14.34-36)

⁵³ Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco.

⁵⁴ Te nuū ní quenda ya jíin de ini barco, te ñayuu yúcuán ni canacuni-ni i ya. ⁵⁵ Te yachí ni jengoo i tācá ndañúú yūcuán, te ni caquindeca i ñayuu cácuñu, cáyosó i nuū camilla, vējicoo ñayuu nuū ní jito i íne ya. ⁵⁶ Te ndé-ni cúu-ni núu ni quíví ya, núu ñuu lulí, chí ñuu cáhnu, chí rancho, te cájequin i ñayuu cácuñu yuhíchi, te cácahān ndahú i jíin yá jeē na quéhé i vēsú yusáhma ya. Te tāca ñáyuu jeē ní caquehé sahma ya, ni canduvāha-ni i.

Siquí ndese cújnehén ñayuu

(Mt. 15.1-20)

7

¹ Yūcuán na te tēe grupo fariseo jíin jecu tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús. ² Te tēe un ní cajito de jeē sava tēe cáscuáha jíin Jesús, ni cayejí jnehén de staā, chi tu ní cáscuáha de costumbre jeē nándahá de nuū Yaā Dios. Te ni cacahān siquí de. ³ Chi tēe fariseo jíin ndihí ñayuu hebreo, névāha i costumbre jenahán jēé ma cáji i staā núu tu nandahá váha i xihna gā. ⁴ Te núu ni ndecoo i jeē ni jengoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán jeē casquícu i, nájnūhun jeē ndúndoo taza, tindhō, cohō cáa, jíin jito. ⁵ Te tēe fariseo jíin téé cástéén

tutu ley Yaā Dios, ni cacajñuhún de ya:

Tēe cáscuáha jíin ró, ¿naun tu cáscuácu de costumbre ñayuu jenahán? Chi sa cáyeji jnehén de staā, achí de.

⁶ Te ni cahān yā jíin de:

Ndaā ni nacani Isaías jñuhun siquī rō jijnáhan ró jēē tēe stáhú-ni cácuu ró. Chi súcuan ni tee de jñuhun ni cahān Yaā Dios nde jenahán:

Ñayuu yáha chi máá yuhu-ni i cájetáhu i ruhū,

te nasūu ndé jíin ini jíin ánuá i.

⁷ Te cáchiñuhún sáá-ni i ruhū, chi jñuhun cástéén i cúu jniñu ní candacu tēe,

te nasūu jēē ní ndacu máá rí cúu.

Achí Yaā Dios. Achí Isaías. ⁸ Súcuan cácuu ró, chi ni casiáá rō jniñu ní ndacu Yaā Dios nuū rō, te cáscuácu ró costumbre jeē ní cajequin ñayuu, jeē ndúndoo tindohō jíin taza. Te cuehē gā costumbre súcuan cáscuácu ró, achí yá.

⁹ Te suni ni cahān yā:

Cásiáá rō jniñu ní ndacu Yaā Dios, návaha squícu ró costumbre ni cajequin máá ró. ¹⁰ Chi Moisés ni cahān de: Coó yáñuhún ró jíin tátá rō jíin náná rō. Te núu ndé ñn cahān siquī tátá chí siquī naná, na cúu nahín. Achí Moisés. ¹¹ Te máá ró chí cácahān rō jeē cuu cahān ñn tēe jíin tátá de náná de: Ma cúu chindéé ñáhán ná níhín cuáha na jēē cáji ni jēē cúhun ní, chí ndíhi jeē névāha ná, chí Corbán cúu, achí ró. (Te jñuhun Corbán cuní cahān jeē ni sócō nuū Yaā Dios.) ¹² Te cácahān rō jeē núu súcuan cahān ñn tēe, te tuá cánuú chindéé ñáhán de tátá de náná de. ¹³ Te súcuan cástívi ró jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuehē gā jniñu súcuan cásaáha ró, achí yá.

¹⁴ Te ni cana tucu ya ñayuu cuehē ún, te ni cahān yā jíin i:

Cuni sōho vāha ró jíin náhan ró, te chuhun ni rō: ¹⁵ Tāca jēē iyó, te núu ni quívi yuhu ñayuu te tu cújnehén i sáha. Chi jeē quénda ini anuá ñayuu, yūcuan

cúu jeē cújnehén i sáha. ¹⁶ Tāca róhó jēē jíni sōho, na chúsóhó ró, achí yá.

¹⁷ Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni cacajñuhún de ya siquī jñuhun yátá yáha jēē ni cáhān yā. ¹⁸ Te ni cahān yā jíin de:

¿A máá ró suni ná tu jecūhun ni rō, chí naún? ¿A tu cájini rō jeē tāca jēē quívi ini ñayuu, ma cúu cújnehén i sáha? ¹⁹ Chi tu quívi ini anuá i, chí chíji i quívi, te quénda-ni cuahān, achí yá.

Súcuan ni steén yā jeē tāca jēē yéji ñayuu, tu cújnehén ánuá i sáha. ²⁰ Te ni cahān gā yā:

Jeē quénda ini anuá ñayuu, yūcuan cúu jeē cújnehén i sáha. ²¹ Chi nde ini anuá ñayuu quénda jeē jéni néé ni, jeē casiquí ndéé jnáhan, jeē jíca jnéni, jeē jéni ndíyi, ²² jeē sacuíhná, jeē ndíyo ni ndajniñu jnáhan, jeē sáha néé, jeē stahú jnáhan, jeē máni cuēchi sáha, jeē cucuésún ni, jeē cahān yāa siquī jnáhan, jeē sandúxí máá, jeē canéé xíní. ²³ Tācá jniñu néé yáha, máni ini anuá ñayuu quénda, te cújnehén i sáha, achí yá.

Ñahan inga nación jeē ní candíje nñhin

(Mt. 15.21-28)

²⁴ Te ni quenda ya yūcuan cuahān yā región Tiro jíin Sidón. Te ni quívi ya ñn vehe, te cúní yā jeē tú ni ñn ñayuu cuni jeē íne ya yūcuán. Te vēsú súcuan, te tu ní cúu cone sáhi yá. ²⁵ Te ñn ñahan íyó séhe síhí ña jeē ñuhun tachí ini i, ni níhín-ni ña jñuhun jeē íne ya. Te ni quee ña, te ni jecuíñi yití ña nuū jehé yā. ²⁶ Te ñahan ñuu jíca cúu ña, chí nde Sirofencia cúu nación ña. Te ni cahān ndahú ña jíin yá jeē na quénehen ya tachí ini séhe síhí ña. ²⁷ Te ni cahān Jesús jíin ña:

Nasūu núu maá ní vēji ná, chí máni nuū ñayuu cácuu séhe Israel. Chi tu íyó váha jeē quénde yō staā séhe te cuāha yó núu ína, achí yá.

²⁸ Te ni cahān ña:

Jendaá cahān ni Tátā, te chindéé ñáhán ní sáña vēsú cúu ná nájnuhun

ina. Chi suni máá tí cáhiin tí chíi mesa, cánihin tí staā cuechí jēē cóyo yuhu sūchi lúli cáyeji tí, achí ña.

²⁹ Yūcuán na te ni cahān yā jíin ña:

Vāha ni cahān ní. Cuáhán ní núu súcuan, chí je ni quenda tachī ún ini sēhe síhí ní, achí yá.

³⁰ Te ni najinū ña vehe ña, te ni jito ña jeē catú sēhe síhí ña nuū jito, te je ni quenda tachī ún ini i.

Jeē ní nasávāha ya ñn tēe sóhó cástéte

³¹ Te ni quenda tucu ya región Tiro, ni yāha ya Sidón jíin táca ñuu Decápolis, te ni jinū yā mar Galilea.

³² Te ni caquindeca i ñn tēe sóhó cástéte nuū yā, te ni cacahān ndahú i jíin yá jeē na sóo yá ndaha ya síquī de. ³³ Te ni quenehen sñn ya de nuū ñáyuu cuehē ún, te ni chune ya xinī ndáha ya sōho de, te ni tesihí yá, te ni quehé yá yaá de. ³⁴ Te ni ndacoto ya ichi ándiví, te ni jitū ni yā, te ni cahān yā:

Efata, achí yá, jeē cuní cahān: Nanune.

³⁵ Te ni nanune-ni sōho de, te ni nduvāha yáá de, te ni nacahān vāha de. ³⁶ Te ni ndacu ya jniñu nuū ñáyuu un jēē ma cáchi i nuū ní ñn. Te vēsú ni cahān nihin ya jíin i, te víhyá gā ni cajete i jnūhun. ³⁷ Te yōhyo ni canaa ní i cájito i, te ni cacahān i:

Vāha sáha ya táca jniñu, chí nde tēe cásohó, cánacuni sōho de, te tēe cándāa ññhín, cánacahān vāha de sáha ya, achí i.

Jeē ní scáji yā cuūn mil ñayuu (Mt. 15.32-39)

8

¹ Te tiempo un ní candutútú cuéhē ndasí ñáyuu, te tuá na vé caji i. Te ni cana Jesús tēe cáscuáha jíin yá, te ni cahān yā:

² Cúndáhú ni rī ñayuu yāhá, chí je ni cuu unī quiví cáyūcú i jíin rí, te tuá na vé caji i. ³ Te núu natajé rí i quinhun ndite i vehe i, te cuíta íi i sava ichi, chí íyó sava i jeē jicá véjicoo i, achí yá.

⁴ Te tēe cáscuáha un ní cacahān de:

¿Te ndé nuū nihín yō staā caji i jíjnáhan i? Chí yāhá tú na ñayuu yūcu, achí de.

⁵ Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, achí de.

⁶ Yūcuán na te ni cahān yā jíin ñáyuu cuehē un jēē na cúcoo i. Te ni quihin ya ndihúxá staā ún, te ni nacuatáhú yá nuū Yaā Dios. Te ni tahú cuéchí yá, te ni jēhe ya nuū tēe cáscuáha jíin yá. Te máá de ni casaja de nuū ñáyuu cuehē ún. ⁷ Te suni cándiso de jecu chācá lúli. Te ni nacuatáhú yá síquī, te ni cahān yā jeē suni saja de jíjnáhan de. ⁸ Te ndihí i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jīca. ⁹ Te tēe ni cayeji un, íyó nájnūhun cuūn mil de. Te ni nacuatáhú yá nuū ñáyuu ún, te cuanungoo i. ¹⁰ Yūcuán na te ni ndiví-ni ya ini barco jíin tēe cáscuáha jíin yá, te cuahān yā región Dalmanuta.

Jeē ní cajicān de ñn jniñu jéhnú nuū yā

(Mt. 16.1-4; Lc. 12.54-56)

¹¹ Yūcuán na te ni quecoo tēe grupo fariseo, te ni caquejé de stíchí de Jesús. Te cácumí de coto ndee de ya, te ni cajicān de jeē sáha ya ñn jniñu jéhnú jeē coo ñn seña ichi ándiví. ¹² Te ni jitū ni yā síquī jeē tu cácdíje de jíjnáhan de, te ni cahān yā:

¿Naun cájicān ñayuu yáha ñn jniñu jéhnú nuū rí? Jendaá cahān rí jeē ma stéén rí ni ñn jniñu jéhnú nuū ñáyuu yāhá.

¹³ Te ni squéndōo ya de jíjnáhan de, te ni ndiví tucu ya ini barco, te cuahān yā inga lado mar.

Jnūhun levadura tēe fariseo

(Mt. 16.5-12)

¹⁴ Te tēe cáscuáha jíin yá ni canaa ni de condiso de jeē caji de, chí ñn-ni pan cánevāha de ini barco. ¹⁵ Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

16 Te ni cacahān tēe cáscuáha un jíin táca jnáhan de:

Va siquī jeē tú na staā ndíso yó, jeē yúcuān cáhān yā súcuān, áchí de.

17 Te ni jini Jesús, te ni cahān yā:

¿Najehē cándajnūhun ró jeē ni cáhān rī súcuān siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhān rī súcuān siquī jeē tu cándiso ró stáā? ¿A yóhyo uun ni rō candíje ró? 18 Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni rō? 19 Chi ná ni tahú cuéchí rí uhūn staā ni cayejí uhūn mil tēe, ¿te nasaa jīca ni chítú pedazo staā jeē ní canastútú ró? Achí yá.

Te ni cacahān de:

Uxī uū jīca, áchí de.

20 Te suni súcuān ná ni tahú cuéchí rí uxā staā ni cayejí cuūn mil tēe, ¿te nasaa jīca ni chítú pedazo staā jeē ní canastútú ró? Achí yá.

Te ni cacahān de:

Uxā jīca, áchí de.

21 Te ni cahān yā jíin de:

Te nde vijna ¿á ná tu jecūhun ni rō jíin náhan ró?

Súcuān ni cahān yatá yá jeē ma cándíje de jnūhun stáhú cástéén tēe ún.

Jeē ní nasávāha ya tēe cuáá ñuu Betsaida

22 Yūcuán na te ni jinū yā jíin de ñuu Betsaida. Te ni caquindeca ñayuu ñn tēe cuáá núu yā, te ni cacahān ndahú i jíin yá jeē na tēe ya ndaha ya nuū de. 23 Yūcuán na te ni jñi ya ndaha tēe cuáá un, te ni quenehen ya de yatā ñūu ún. Te ni tee ya tesīhi yá tñūú de, te ni tee ya ndaha ya siquī. Te ni cajnūhun yá de núu cuu coto de jecu.

24 Te ni ndacoto de, te ni cahān de:

Jíto ná ñayuu jeē cájica i, te tu jíto cájí ná, chi ná cáa yujnu cáa i, áchí de.

25 Yūcuán na te ni tee tucu ya ndaha ya siquī tñūú de. Te ni ndacoto vāha de, te ni nduvāha-ni tñūú de, te ni jito cájí de ndīhi-ni. 26 Te ni natajé yá de quínuhun de vehe de, te áchí yá:

Ma quívi ró ñuu, ni ma cáchi cuíti rō nuū ní ñn, áchí yá.

Jeē ni cáhān Pedro jeē Jesús cúu Cristo

(Mt. 16.13-20; Lc. 9.18-21)

27 Yūcuán na te Jesús jíin tēe cáscuáha jíin yá, cuahān yā tācá ndañūu Cesarea Filipo. Te ichi un ní cajnūhun yá de:

Ruhū, ¿ndé ñn cúu ri cácahān ñayuu?

28 Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun Yaā Dios cúu ní.

29 Yūcuán na te ni cajnūhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

30 Te ni ndacu ya jniñu nuū de jíin náhan de jeē ma cáchi de jnūhun yáha nuū ní ñn ñayuu.

Jeē ní castūhún Jesús jeē cúu yā

(Mt. 16.21-28; Lc. 9.22-27)

31 Te ni quejéé yá steén yā nuū de:

Máá rí, Yaā ní nduu tēe, cánuú ndoho xeēn rī. Te tāca tēe jénu jíin sūtū cácujuhnu jíin tēe cástéén tutu ley, squéhichí de ruhū, te cahni de ruhū. Te nuū uní quívi te natecu rī, achí yá.

32 Te cájí ní cahān yā jnūhun yáha. Yūcuán na te Pedro, ni cana máñuhún de ya, te ni quejéé de cáhān de nuū yā jeē ma cuáha ya jnūhun coo súcuān.

33 Te máá yá ni ndió cóto ya ni jito ya nuū tēe cáscuáha jíin yá. Te ni cahān yā nuū Pedro:

Cujiyo quihīn rō, chi cáhān rō ná cáhān Satanás. Chi tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájini ni ñayuu, achí yá.

34 Te ni cana ya tēe cáscuáha jíin yá jíin ñayuu cuehē ún, te ni cahān yā:

Na-ni ñayuu núu cúní i condiquīn i ruhū, na cási i jeē cúní máá i, te na cóndiquīn i ruhū te cuāha i jnūhun ndoho i jnūndóho jeē siquí rī, vésú na cúu i. 35 Chi núu ndé ñayuu cúní i cácu i nuū jnúndóho quiji nuū i jeē siquí

ruhū, núu súcuan te jnahnū ndetū i nń cáni. Te núu ndé ñáyuu, vésú na cúu i jeē siquí ruhū jíin síquī jeē scáca i jnūhun jeē jnáma ri ñayuu, núu súcuan te cotecu i nń cáni. ³⁶ ¿Chi ndé cua-jníñu vésú na cúndeyí ñáyuu nihīn i nń ñáyiví, te núu quiví i nuū jnahnū ndetū i? ³⁷ Chi tú na jíin cuiṭi chunaa ñayuu jeē cácu ánuá i. ³⁸ Te ñayuu yáha tu cácandije cuiṭi i, te máni máá cuéchi cásáha i. Te núu na-ni ñayuu cúcanu i nuū ñáyuu yáha jeē siquí ruhū, Yaā ní nduu tēe, jíin síquī jnúhun cáhán rī, suni súcuan cucanu rī jeē siquí máá i, quiví ndiji ri jíin táca ndajéhé ndoo ri. Te quiví ún chi yōhyo luu cujéhnū ri nájñuhun cújéhnū Tátá rī. Achí yá.

9

¹ Te suni ni cahān yā jíin de jíjnáhan de:

Jendaá cahán rī jíin ró jeē sava tēe cáhīn yáhá, ma cúu de chi nde cuni de jeē ndácu Yaā Dios jniñu jíin poder yā, achí yá.

Jeē tucu ni nduu ya

(Mt. 17.1-13; Lc. 9.28-36)

² Yūcuán na te nuū inú quiví te Jesús ni jeca ya Pedro jíin Jacobo jíin Juan, cuahān sñn ya jíin de ñn yucu súcún. Te yūcuán, tucu ni nduu ya nuū de. ³ Te sahama ya ni ndindēe, te ni nducuíjín quiyí, nájñuhun yuhvā volcán. Te tú ni ñn ñayuu ñayiví yáha cuu nacate jeē ndúquiyí ndasí súcuan. ⁴ Te ni cajito de jeē Elías jíin Moisés cándajnūhún de jíin yá. ⁵ Yūcuán na te ni cahān Pedro jíin Jesús:

Maestro, nacā jeē váha jeē cáhīn na yáha. Te na sáha ná únī vehe ramada, ñn cuu máá ní, inga cuu Moisés, te inga cuu Elías, achí de.

⁶ Chi yōhyo ni cayūhu tēe cáscuáha ún, te Pedro tu ní sáha de cuenta na vé cúu jeē cahán de. ⁷ Te ni quiji vicō nūhun ní jesi-ni nuū de. Te nuū vicō un ní cahān ñn jnūhun:

Yáha cúu Sēhe ri jeē maní ndasí rí jíin. Te na cúni nahín ró jnūhun cáhán yā. Achí.

⁸ Te ni candacoto-ni de, te tuá tēe un ní cajito de, chi máá ñn na Jesús.

⁹ Te ni cananuu de jíin yá yucu ún. Te ni ndacu nihin ya jniñu nuū de jeē ma cáchi de nuū ní ñn jeē súcuan ni cajito de, chi nde na nátecu maá yá, Yaā ní nduu tēe, achí yá. ¹⁰ Jeē yúcuan ní cachuváha de táca jēe ní cuu ún, te cácajnūhun jnáhan de na jnūhun cúu jeē nátecu yā. ¹¹ Te ni cacajnūhún de ya:

Te tēe cástéén tutu ley Yaā Dios, ¿najehe cácahān de jeē cánuú ndiji Elías xīhna gā, te sáa te quiji Yaā cúu Cristo? achí de.

¹² Te ni cahān yā:

Jendaá cúu jeē xīhna gā quiji ñn tēe cúu nájñuhun Elías, te sátūhva de ndihí, achí tutu. ¿Te ndese cáhán tucu tutu i siquí ruhū, Yaā ní nduu tēe? Cáhán jeē ndoho xeēn rī, te sájéē ni i nuū rī. ¹³ Te cáhán rī jíin ró jeē jé ni quiji tēe ni cuu nájñuhun Elías, te ni casáha ndeváha ñayuu jíin de táca jēe ní cacuu ni máá i, nájñuhun cáhán jnūhun de nuū tútu, achí yá.

Jeē ní nasávāha ya ñn sūchi ñūhun tachī ini

(Mt. 17.14-21; Lc. 9.37-43)

¹⁴ Te ni najinū yā jíin de nuū sava ga tēe cáscuáha jíin yá, te ni cajito ya ñayuu cuehē ndasí, ni cajicó ndúu i de. Te suni cáhīn tēe cástéén tutu ley Yaā Dios, cátejnáhan jíin de. ¹⁵ Te nuū ní cajito táca ñáyuu un jēe véji ya, te ni canaa ni i. Te cájину i cuangoo i nuū yā jeē cahān i jíin yá. ¹⁶ Te ni cajñuhun yá i:

¿Na siquí cátejnáhan ró jíin de jíjnáhan de? achí yá.

¹⁷ Te ni cahān ñn tēe íne yūcuán:

Maestro, vendeca ná séhe ná núu ní, chi ñūhun ñn tachī ini i, te ni cuñhín i ni sáha. ¹⁸ Te ndé-ni cúu nuū íne i, te tachī un scótúu i, te jéhní yíhí-ni i. Te jée tiñū yuhu i, te squíññi jnúhun i. Te cuacuxií ndasí i sáha. Te ni cahān ndahú ná jíin tēe cáscuáha jíin ní jeē na quénehen de tachī ún, te tu ní cúu sáha de, achí de.

¹⁹ Te ni cahān yā jíin de jíjnáhan de:

Ñayuu tu cándije cuiṭi cácuu ró. ¿Nasaa ga quiví condee rī jíin ró? ¿Te

nasaa ga quiv̄i cuandeyí ni rī jín ró? Cuáquihin sūchí un, na quíji i, áchí yá.

²⁰ Te ni caquindeca de i nuū yā. Te nuū ní jito tachī un núū yā, te ni jehni yīhí-ni i. Te ni cotúú i, te cónehén cócáni i, te jée tiñū yuhu i. ²¹ Te Jesús ni cajñūhun yá tatá i:

¿Nasaa cuiyā ni cuu jeē sáha súcuan jín i?

Te ni cahān de:

Nde lulí i. ²² Te ni cuu cuehē jínu scótúú táchī ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ni ní chindéé ñáhán ní sãña jéē ndúvāha sēhe ná, áchí de.

²³ Te ni cahān Jesús jín de:

Núu cuu candíje ró jéē sáha ri, chí ñayuu candíje te cuu tāca jéē cuní i, áchí yá.

²⁴ Te máá tátá sūchí un ní cahān jee de:

Cándíje ná, te chindéé ñáhán ní sãña jéē candíje ñihin ga ná, áchí de.

²⁵ Te ni jito Jesús jeē ní cutútú cuéhē ñayuu nuū yā. Te ni cahān yā nuū tachí:

Tachī jeē sañhín sásóhó, ruhū ndácu ri jniñu jeē na quénda ró ini sūchi yáha, te ma ndívi ga rō ini i, áchí yá.

²⁶ Yūcuán na te ni cana cóhó táchī ún, te ni jehni yīhí tucu i, te ni quenda cuahān. Te sūchí un ní cuu i nájnūhun ndīyí. Te ni cacahān cuehē ñayuu jeē jé ni jihí i. ²⁷ Te Jesús ni jñi ya ndaha i, te ni ndonehen ya i, te ni nucuiñi-ni i.

²⁸ Yūcuán na te ni quiv̄i ya ini ñ vehe, te tē cáscuáha jín yá, ni caca-jñūhun sñn de ya:

¿Najehē tu ní cúu quenehen ná tachī un jínáhan ná? áchí de.

²⁹ Te ni cahān yā:

Ñn tachī súcuan chí ma quénda cuiti te núu tú cacān tahú rō te coo ndite ni rō, achí yá.

Jeē ni cahān tucu ya jeē cúu yā
(Mt. 17.22-23; Lc. 9.43-45)

³⁰ Te ni quenda ya yūcuan jín de jínáhan de, te ni yāha ya ndañúū Galilea cuahān yā. Te tu ní cúní yā jeē

cúni ni ñn ñayuu. ³¹ Chi stéén yā nuū tēe cáscuáha jín yá, te áchí yá:

Máá rí, Yāā ní nduu tēe, nastúu i ruhū nuū tāca tēe xeēn. Te cahni de ruhū, te núu ni jihí rī, te nuū uní quiv̄i te natecu rī, achí yá.

³² Te tu ní cájecūhun ni de jñūhun yáha, te cáyūhú de cajñūhún de ya siquī jñūhun ni cahān yā.

Nde ñayuu cúu jeē cujénu ga
(Mt. 18.1-5; Lc. 9.46-48)

³³ Te ni jinū yā jín de ñuu Capernaum, te nuū ni quiv̄i ya ini vehe, te ni cajñūhun yá de:

¿Na jñūhun ni candajnūhun ró ichi véji yó? áchí yá.

³⁴ Te tu ní cacahān cuiti de, chí ichi un ní cacahān de siquī núu ndé ñn de cujénu ga. ³⁵ Yūcuán na te ni cucōo ya, te ni cana ya ndihúxi uū de, te ni cahān yā:

Núu ndé ñn ró cúní cujénu ga, na cúu ró tēe núu ga nuū tāca jñáhan ró, te cuajniñu ró núu jñáhan ró.

³⁶ Yūcuán na te ni jñi ya ndaha ñn sūchi lulí, te ni jeni ya i mēhñú de jínáhan de. Te ni nundee yā i, te ni cahān yā jín de:

³⁷ Na-ni ñayuu núu jeē siquí ruhū jetáhú i ñn sūchi lulí nájnūhun sūchi yáha, te ruhū jetáhú i. Te ñayuu jetáhú ruhū, nasūu máá ñn-ni ruhū, chí suni Yāā ní tají ruhū jetáhú i, áchí yá.

Ñayuu tu cáhán siquī yā, ín i jín yá
(Mt. 10.42; Lc. 9.49-50)

³⁸ Yūcuán na te ni cahān Juan jín yá:

Maestro, ni cajito ná ñn tēe jeē jín síhví ní quenehen de tachī ini ñayuu. Te ni cajesi ná jéē sáha de, chí tu jíca de jín yó, achí de.

³⁹ Te ni cahān Jesús jín de:

Ma cási rō jeē sáha de. Chí ni ñn tēe jeē jín síhví rí sáha de jniñu jénu, ma cúu nacahān de siquī rī. ⁴⁰ Chi tēe tu cáhán siquī yō, ín de jín yó. ⁴¹ Te na-ni ñayuu núu jeē siquí ruhū cuāha i vēsú ñn ñajin ndute coho ró, siquī jeē cácandíje ró ruhū, ndaā ndije cúu jeē nihín i tahū i. Achí yá.

Xeēn coo siquē ñáyuu quívi nuū cuéchi

(Mt. 18.6-9; Lc. 17.1-2)

⁴² Te núu ñin sūchi lúli yáha cándije i ruhū, te núu quívi i cuéchi sáha na-ni ñayuu, te vāha ga núu ni conuhnī ñin yōso cáhnu sucūn ñayuu ún, te quēe i chíji ndute mar nuū. ⁴³ Te núu ndaha ró sáha jeē quívi ró cuéchi, vāha ga cahnde rō na quíhín, návāha tuá sáha ró cuéchi. Chí vāha ga jeē cóndee ñin-ni ndaha ró te quívi ró núu cotecu rō ñí cáni, vēsú jeē cóndee ndíndúú ndaha ró te quívi ró infierno, nuū cayú ñuhūn jeē ma ndahvá cuíti. ⁴⁴ Te yūcuán chi tu cájihī tindacú, te tu ndáhvá cuíti ñuhūn. ⁴⁵ Te núu jehē rō sáha jeē quívi ró cuéchi, suni vāha ga cahnde rō na quíhín, návāha tuá sáha ró cuéchi. Chí vāha ga jeē cóo cúhndu ró te quívi ró núu cotecu rō ñí cáni, vēsú jeē cóndee ndíndúú jehē rō te quívi ró infierno, nuū cayú ñuhūn jeē ma ndahvá cuíti. ⁴⁶ Te yūcuán chi tu cájihī tindacú, te tu ndáhvá cuíti ñuhūn. ⁴⁷ Te núu tinūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chí vāha ga jeē quívi ró ñuu nuū ndácu Yaā Dios jniñu jíin ñin na tinūu ró, vēsú jeē cóndee ndíndúú tinūu ró te quívi ró infierno. ⁴⁸ Te yūcuán chi tu cájihī tindacú, te tu ndáhvá cuíti ñuhūn.

⁴⁹ 'Chí nájñuhun quénda vāha oro sáha ñuhūn, súcuan quénda vāha ñayuu sáha jñundóho. Te tāca cúñu jeē socó ñayuu nuū yā, cúhuhvūā sáha ñí. ⁵⁰ Vāha íyó ñí, te núu ñí ún na náā jeē uhvūá, ¿te ndese nduu uhvūá tucu sáha ró? Núu súcuan te cuu ró ñáyuu vāha, nájñuhun íyó vāha ñí. Te na cóyūcu vāha ró jíin jnáhan ró. Achí yá jíin de.

Siquē jeē ma stóo jnáhan tē jíin ñahan
(Mt. 19.1-12; Lc. 16.18)

10

¹ Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū

yā, te ni steén tucu ya jñuhun nuū i, nájñuhun sáha ya. ² Yūcuán na te jecu tē grupo fariseo ni quecoo de nuū yā, chí cácuni de coto ndee de ya núu ndese cahān yā. Te ni cacajñuhūn de ya núu íyó ley jeē cuu ndusñin ñin tē jíin ñasihí de. ³ Te ni cahān yā jíin de:

¿Na jniñu ni ndacu Moisés nuū rō nde jenahán?

⁴ Te ni cacahān de:

Moisés ni jēhe de jñuhun jeē cúvāha ñin acta jeē ndusñin de jíin ña, te ndōo ña, achí de.

⁵ Te ni cahān Jesús jíin de:

Siquē jeē níhni ni rō jijnáhan ró, jeē yúcuán ní ndacu de jniñu yáha núu rō.

⁶ Te nde xihna ñuhūn, ná ni sáha Yaā Dios ndihí, chí tē jíin ñahan ni sáha ya. ⁷ Jeē yúcuán cúu jeē stóo tē tátá de náná de, te quijnáhan de jíin ñasihí de. ⁸ Te ñin na cuu ndíndúú de, achí Yaā Dios. Núu súcuan te tuá cúu uū jnáhan de, chí ñin na cúu. ⁹ Jeē yúcuán tu íyó vāha jeē stóo jnáhan, chí jeē ni squíjnáhan Yaā Dios cúu, achí yá.

¹⁰ Te tē cáscuáha ún nuū ni quívicoo de vehe, te ni cacajñuhūn tucu de ya siquē jñuhun ún. ¹¹ Te ni cahān yā jíin de:

Núu ndé tē stóo de ñasihí de te condeca de inga ñahan, núu súcuan te cásiquí ndé de ñasihí de. ¹² Te núu ñin ñahan stóo ña yí ña te condeca ña inga tē, suni cásiquí ndé ña de. Achí yá.

Jeē ni jíicān tahu Jesús jehē sūchi lúli
(Mt. 19.13-15; Lc. 18.15-17)

¹³ Yūcuán na te ni quecoo ñayuu jíin sūchi lúli, jēe na sóo yá ndaha ya xinī i. Te tē cáscuáha jíin yá, ni cacahān de nuū ñáyuu vējicoo jíin i. ¹⁴ Te ni jito Jesús, te ni quití ni yā, te ni cahān yā jíin de:

Cuāha jñuhun na quíjicoo sūchi lúli jíñā nuū rī, te ma cási rō jeē quíjicoo i. Chí ñayuu jeē ndió cóo ni i caní ni i nájñuhun sūchi yáha, suu i quívi ndaha Yaā andiví jeē ndacu ya jniñu nuū i.

¹⁵ Te jendaá cahán rī jíin ró, núu ñin ñayuu tú cuatáhú i jeē ndácu Yaā Dios jniñu nuū i, nájñuhun jétáhú ñin sūchi lúli, ma quívi cuíti i ndaha ya, achí yá.

16 Te ni nundee ya i, te ni soó yá ndaha ya xinī i, te ni jicān tahu yā jehē i jíjnáhan i.

Jnūhun tēe cúcá
(Mt. 19.16-30; Lc. 18.18-30)

17 Yūcuán na te ni quihin tucu ya ichi cuahān yā. Te jínu ñn tēe ni quee de, te ni jecuiñi yití de nuū yā, ni cajnūhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihin tahu na cotecu na ní cāni andiví? áchí de.

18 Te ni cahān yā jíin de:

¿Naun cáhán rō jeē tēe vāha cúu ri? Tú ni ñn tēe vāha íyó, chí máá ñn-ni Yaā Dios. 19 Je jíni rō tācá jniñu ní ndacu Yaā Dios: Ma cosíquí ndéē jnáhan ró. Ma cáhni rō ndīyi. Ma sacuíhná ró. Ma sajnūhún ró. Ma stahú ró jnáhan ró. Cuatáhú ró nuū tatá rō nuū naná rō. Achí yá.

20 Te ni cahān tēe un jíin yá:

Tācá jniñu yáha je ni squícu ná ndé ná lulí ná, Maestro, achí de.

21 Yūcuán na te ndáhú jíto ya nuū de jeē cúsiñi ni yā jíin de. Te ni cahān yā:

Ñn na jniñu cúmanī sáha ró núu súcuan. Cuáhán te xīco ró ndihí jeē névāha ró, te cuāha ró núu ñáyuu ndahú. Te nde andiví cuāha ya jeē vāha ndasí núu rō. Yūcuán na te quiji ró condiquin rō ruhū, te cuāha ró jnūhun ndoho ró jnúndóho jeē síquí rī, achí yá.

22 Te ná ni jini sōho de jnūhun yáha, te ni jnahuhū ni de, te cúcuíhyá ni de cuahān de, chí cúcá ndasí de.

23 Yūcuán na te Jesús ni ndacoto ya ní xiin ya, te ni cahān yā jíin tēe cáscuáha jíin yá:

Tēe cúcá chí yōhyo yí quívicoo de ndaha Yaā Dios jeē ndacu ya jniñu nuū de, áchí yá.

24 Te tēe cáscuáha jíin yá, yōhyo ni canaa ni de jeē ní cajini de jnūhun ni cahān yā. Te ni cahān tucu ya jíin de:

Séhē, ñayuu tēnuū xūhún, yōhyo yí quívicoo i ndaha Yaā Dios jeē ndacu ya jniñu nuū i. 25 Yachī gā yāha ñn camello yaū yutícuí, vēsú jeē quíví ñn

ñayuu cucá ndaha Yaā Dios jeē ndacu ya jniñu nuū i, áchí yá.

26 Te víhyá gā ni canaa ni de cájini de, te ni cacajnūhun jnáhan de:

¿Ndé ñáyuu cúu jeē cácu núu súcuan?

27 Te ni ndacoto ya nuū de, te ni cahān yā:

Ñayuu chí ma cúu squíví i máá i ndaha Yaā Dios, te máá yá chí cuu sáha ya, chí ndihí-ni jniñu cuu sáha ya, achí yá.

28 Yūcuán na te ni cahān Pedro jíin yá:

Sāña jíjnáhan ná, ní castóo ná ndihí jeē cánevāha ná, te cándiquin na níhín, áchí de.

29 Te ni cahān Jesús:

Jendaá cahán rī jíin ró jijnáhan ró, núu na-ni ñayuu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeē síquí ruhū jíin síquí jeē scáca i jnūhun jeē jnáma ri ñayuu, 30 núu súcuan te nanihín i ñn ciento gā jeē súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jíin jéē cóto xeēn ñayuu i. Te nde inga vida quiji te cotecu i ní cāni. 31 Te cuehē ñayuu jeē vijna cácujuhnu, nduu i ñayuu núu ga. Te ñayuu jeē núu ga vijna, chí ndujehnu i, áchí yá.

Jeē ni cahān tucu ya jeē cúu yā
(Mt. 20.17-19; Lc. 18.31-34)

32 Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tēe cáscuáha ún. Te canaa ni de ni cajini sōho de jnūhun ni cahān yā. Te cáyūhú de cuángoo de jíin yá. Yūcuán na te ni cana sñn tucu ya ndihúxí uū tēe cáscuáha, te ni quejéé yá cástūhún tucu ya nuū de tāca jéē quíji síquí yā.

33 Achí yá:

Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujuhnu jíin núu tēe cástéén tutu ley. Te ndonda de síquí rī jeē cúu rī, te squíví de ruhū nuū tēe nación Roma jeē cáyūcú Jerusalén cándacu jniñu.

34 Te tāca tēe un sácatā de nuū rī, te caní de ruhū, te tesíhí de nuū rī, te sáa

te cahni de ruhū. Te nuū uní quivī te natecu rī, achí yá.

Jeē ní jícān Jacobo jíin Juan #n favor nuū yā

(Mt. 20.20-28)

³⁵ Yūcuán na te Jacobo jíin Juan, ndindúú séhe Zebedeo, ni quecoo de nuū Jesús, te ni cacahān de:

Maestro, cáculi na jéē sáha ní #n jeē cacán na núū ní, achí de.

³⁶ Te ni cahān yā jíin de:

¿Ndese cáculi rō jeē sáha ri jíin ró? achí yá.

³⁷ Te ni cacahān de:

Cuāha ní jnūhun jeē cónēne ná xiin ní quivī ndujéhu ní, #n ná lado váha ní, te inga ná lado jecó ní, achí de.

³⁸ Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnúndóho nájñūhun jeē quíji siquī rī? ¿Te á canda ró ndoho xeēn rō nájñūhun ndoho ri? achí yá.

³⁹ Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jnúndóho nájñūhun jeē quíji siquī rī, te ndoho xeēn rō nájñūhun ndoho ri. ⁴⁰ Te jeē cónēne ró lado váha ri jíin lado jecó rí, nasūu rúhū cúu jeē cuáha jnūhun. Chi je íyó túhva cuu tāca téē jeē ní nacāji Tátá rī, te téē un níhīn, achí yá.

⁴¹ Te uxī gā téē cáscuáha un, ní cajini de jnūhun yáha, te ni caquítī ni de nuū Jacobo jíin Juan. ⁴² Te Jesús ni cana ya de, te ni cahān yā jíin de:

Cájini rō ndese cásáha téē cáculjéhu nuū ñáyuu tācá nación. Chi cándacu níhīn de jniñu nuū i, te máá de cáchí ndese coo. ⁴³ Te máá ró jijnáhan ró, chi ma sáha ró súcuan. Chi núu ndé #n ró cúní culjéhu, sa suhva cuajniñu ró núu jnáhan ró. ⁴⁴ Te núu ndé #n ró cúní cuu nuū, sa suhva sáha ró máá ró mozo nuū tāca jnáhan ró. ⁴⁵ Chi suni súcuan sáha ruhū, Yaā ní nduu téē, chi nasūu jéē véji ri jeē cuajniñu ñáyuu nuū rī, chi sa suhva véji ri jeē cuajniñu ri nuū ñáyuu. Te cuāha ri máá rí cuu rī návāha jnama ri cuehē ñáyuu, achí yá.

Jeē ní nasávāha ya Bartimeo téē cuáá

(Mt. 20.29-34; Lc. 18.35-43)

⁴⁶ Yūcuán na te ni jinū yā ñuu Jericó jíin téē cáscuáha jíin yá. Te sáá te ni quenda ya yūcuan jíin de jíin ñáyuu cuehē ndasí. Te Bartimeo téē cuáá, séhe Timeo, néne de yuhíchi, jícān de caridad. ⁴⁷ Te ni jini de jnūhun jeē Jesús ñuu Nazaret véji ya. Te ni quejéé de cána jee de:

Jesús Séhe yucūn David, cundáhú ni ní sáña, achí de.

⁴⁸ Te cuehē ñáyuu ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ní sáña víi, achí de.

⁴⁹ Yūcuán na te ni jecuiñī Jesús, te ni cahān yā:

Cana de na quíji de.

Te ni cacana i téē cuáá un:

Ndeyí coo ni rō. Ndocuiñī, na quíhīn yō, chi cána ya rohó, achí i jíin de.

⁵⁰ Yūcuán na te ni scáne de ticāchí de, te yachī ni ndocuiñī de, te ni jinū de nuū Jesús. ⁵¹ Te ni cahān yā jíin de:

¿Na vé cuní rō jeē sáha ri jíin ró?

Te máá de ni cahān de:

Maestro, jeē na ndúndijin tinūu ná cuní na, achí de.

⁵² Te ni cahān Jesús jíin de:

Cuáhán núu súcuan. Ni candíje ró jeē cuu nasávāha ri rohó, te jeē yūcuan ní nduvāha ró, achí yá.

Te ni ndundijin-ni tinūú de, te ni ndiquin de Jesús cuahān de jíin yá ichi ún.

Jeē ní quivī Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

11

¹ Te ni cuyajni ya ñuu Jerusalén, véji ya ñuu Betfagé jíin ñuu Betania, jeē íne jehē yucu Olivos. Te ni tají yá uū téē cáscuáha jíin yá jeē quíngoo de. ² Te achí yá jíin de:

Cuángoo ñuu lulí íne ichi núú. Te núu ni quivī-ni ró yūcuan, te nihīn rō #n burro núhni tī, jeē ní #n téē ná tu coso de tī. Te ndají ró tī, quijicoo ró jíin tī. ³ Te núu ndé #n cajñuhún naun

cándají ró tī, te cachi rō: Máá Jítóho yō jíni ñúhún yá tī, te yachī natajǐ yá tī ndiji tǐ, achí rō. Achí yá jíin de.

⁴ Te cuango de, te ni canihīn de burro un núhni tī yehyí núu quéhe nuū náquijnáhan ichi. Te ni candajǐ de tǐ. ⁵ Te sava ñayuu cáhīn yúcuan ní cacahān jíin de:

¿Na vé cúu jeē casáha ró jeē cándajǐ ró burro jíinā? achí i.

⁶ Yūcuán na te ni cacahān de nájnūhun ni cachi Jesús. Te ni casiáá i tǐ vējicoo de jíin tǐ. ⁷ Te ni ndecoo de jíin tǐ nuū Jesús, te ni casoó de sahma de siquǐ tǐ, te ni jecosō yā tǐ. ⁸ Te cuehē ñayuu ni cascáá i sahma i ini ichi. Te sava ga i ni cajehnde i ndaha ñúú, te ni cachucun i ini ichi ún.

⁹ Te ñayuu cuango ichi yátá, cácana jee i:

Yōhyo cújéhnū ya. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. ¹⁰ Te yōhyo luu coo, chi je yajni ndacu ya jniñu nájnūhun ni ndacu jíi yō rey David. Te yōhyo cújéhnū máá Yaā Dios. Achí i.

¹¹ Te ni quǐvǐ Jesús ñuu Jerusalén, jíin ini templo cáhnu. Te ni jito ya nuū táca ndajniñu yúcu ní yúcuan. Te ni quenda ya cuahān yā ñuu Betania jíin ndihúxí uū de, chi je ni ini.

Jeē ni cáhān yā nuū yújnu higo
(Mt. 21.18-19)

¹² Te inga quǐvǐ ún, nuū ní quenda ya ñuu Betania cuahān yā jíin de, te jíi yā sōco. ¹³ Te nde jicá ni jito ya ñn nundēhe higo jeē ín ndaha. Te ni jecondēhe yá núu sanaa te nihīn yā ndehē caji yā. Te tú na vé ni níhín yā, chi máá ndaha-ni ín. Chi nasūu tiempo ndehē cúu. ¹⁴ Yūcuán na te ni cahān yā nuū yujnu ún:

Tuá na ndehē cuun cuǐtǐ xinī rō jeē cáji ñayuu, achí yá.

Te tēe cáscuáha jíin yá ni cajini de jeē súcuan ni cahān yā.

Jeē ní quenehen ya ñayuu ini templo
(Mt. 21.12-17; Lc. 19.45-48; Jn. 2.13-22)

¹⁵ Te ni najinū yā jíin de ñuu Jerusalén. Te ni quǐvǐ ya ini templo cáhnu, te ni quenehen ya ñayuu cájeen

quǐtǐ te cánaxīco núu ñayuu jeē socō i. Te ni scotúú ndeyǐ ya táca mesa tēe cástáyǐ xūhún, jíin silla tēe cáxīco paloma. ¹⁶ Te tu ní jéhe ya jnūhun jeē yáha ñayuu ini templo jíin ndajniñu ndíso i. ¹⁷ Te ni steén yā jnūhun nuū i, achí yá:

Yósó núu tútu ñi jeē cahān Yaā Dios: Vehe rǐ chi vehe nuū cájicān tahú ñayuu táca nación cúu, achí yá. Te máá ró jijnáhan ró chi nájnūhun yaū cava ñacuñna ní canasáha ró, achí yá.

¹⁸ Te tēe cástéén tutu ley Yaā Dios jíin sūtū cácujeñnu, ni cajini de jnūhun yáha, te ni quejéé de cánducú de modo ndese cahni de ya. Chi cáyūhú de jeē ndujéhnū ga maá yá vēsú maá de, chi táca ñayuu yōhyo cácusñ ni i cajini i jnūhun steén yā. ¹⁹ Te jeē cuácuaa, te ni quenda ya ñuu Jerusalén cuahān yā.

Jeē ni ichī nundēhe higo
(Mt. 21.20-22)

²⁰ Te jenéhen inga quǐvǐ ni nayāha ya jíin de cuahān yā. Te ni cajito de jeē nundēhe higo un je ni ichī nde yoho. ²¹ Yūcuán na te ni nucūhun ni Pedro, te ni cahān de jíin yá:

Maestro, cundēhe ní nundēhe higo jeē ni cáhān ni núu, te vijna je ni ichí caján, achí de.

²² Te ni cahān Jesús jíin de:

Candíje ró jéé sáha Yaā Dios jeē jicān rō. ²³ Chi jendaá cahān rǐ jíin ró, núu ndé ñayuu cahān i jeē cújiyo yucu yáha quihīn nde nuū mar, te núu tú nacani siquǐ ni i, chi sa suhva candíje i jeē cóo nájnūhun ni cahān i, yūcuán na te cundaā jeē ni jicān i. ²⁴ Jeē yúcuan cáhān rǐ jíin ró, táca jéé cacān tahú rō, te núu candíje ró jéé nihín rō, te nihīn rō. ²⁵ Te jeē cájicān tahú rō, te cone cáhnu ni rō nuū ñayuu casáha cuēchi siquǐ rō, návāha máá Tátá rō jeē ndeé yá andiví, suni cone cáhnu ni yā nuū cuéchi ró. ²⁶ Chi núu tú cone cáhnu ni rō nuū jnáhan ró, te suni máá Tátá rō jeē ndeé yá andiví, ma cóne cáhnu ni yā nuū cuéchi ró, achí yá.

Siquǐ jeē ndíso jniñu Jesús
(Mt. 21.23-27; Lc. 20.1-8)

27 Yūcuán na te ni najinū tucu ya ñuu Jerusalén. Te jíca cuu ya ini templo cáhnu. Te sutū cácujuhnu jíin téé cástéén tutu ley Yaā Dios jíin téé jéhnū cándacu jniñu, ni quecoo de nuū yā. 28 Te ni cacajnūhún de ya:

¿Ndé ní nihīn jniñu ró jéē sáha ró jniñu yáha? ¿Te ndé ñn ni tee jniñu siquī rō jeē sáha ró súcuan? áchí de.

29 Te ni cahān Jesús:

Suni ruhū, cajnūhun rí rohó ñn jnūhun jíjnáhan ró. Te núu cuu stío cuíñí rō, yūcuán na te cachi rī nuū rō ndé ní nihīn jniñu ri jeē sáha ri jniñu yáha. 30 ¿Ndé ñn ni tee jniñu siquī Juan jeē ni scuándute de? ¿A Yaā Dios chí táca téé? Cachi nuū rī, achí yá.

31 Yūcuán na te ni candajnūhun máá de:

Núu cahān yō jeē Yaā Dios ni tee ya jniñu un siquī Juan, te cahān de jíin yó: Núu súcuan ¿te najehē tu ní cá candíje ró de? 32 Te núu cahān yō jeē ñayuu ni catee jniñu un siquī de, te quitī ni ñayuu nuū yō, achí de cácahān máá de.

Chi cáyūhú de jeē quitī ni ñayuu, chi ndivii i cá candíje i jeē téé ni nacani jnūhun Yaā Dios ni cuu ndije Juan.

33 Jeē yúcuán ní cacahān de jíin yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu siquī rī sáha ri jniñu yáha, achí yá.

Jnūhun yátá siquī téé nées cá sájniñu nuū uva

(Mt. 21.33-46; Lc. 20.9-19)

12

1 Te ni quejéé yá cahán yā jnūhun yátá jíin de jíjnáhan de:

Ñn téé ni nachuhun de cuehē uva, te ni jesi de corral, te ni sáha de ñn nuū cúhun ndehē un táxīn. Te ni sáha de ñn vehe súcún návāha cuu coto de ní cáhnu.

Te ni stío de nuū sava téé sájniñu nuū, te cuu sava de ndehē jíin. Te ni tee de ichi cuahān jíca de. 2 Te máá tiempo ndutútú uva, te ni tají de ñn mozo de cuanuquihin sava uva nuū téé cá sájniñu ún. 3 Te téé un

ní cajni de mozo un, te ni cacani de i, te ni canatajé de i cuanuhun i súcuan-ni. 4 Yūcuán na te téé chíí uva un ní tají tucu de inga mozo cuahān. Te téé cá sájniñu un ní cajēhe de yuū xinī mozo un, te ni castújí de, te ni cacahān ndevāha de nuū. 5 Te téé chíí uva ni tají tucu de inga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

6 Te téé chíí uva, íyó ñn sēhe de jeē maní ndasí de jíin. Te jeē sándēhí na ni tají de sēhe de un cuahān nuū téé cá sájniñu. Te jéni ni de: Téé ún chí cuatáhú de jíjnáhan de nuū séhe ri.

7 Te téé cá sájniñu un ní cacahān máá: Téé chíí táhū cúu jeē yáha. Na cáhni yō de, te ndōo tahū de cuu máá yó, achí.

8 Te ni cajni de i, ni cajehni de i, te ni cascāne de i inga lado. Achí yá.

9 Yūcuán na te ni cajnūhun yá de:

Núu súcuan ¿te ndese sáha téé chíí uva un? Ndiji de te cahni de téé cá sájniñu ún, te cuāha de ñuhun cáá uva un núu inga sava téé sájniñu nuū.

10 ¿Te á ná tu cahu ró jnūhun yáha jéé yosó núu tútu iī, jeē ruhū cúu nájñūhun ñn yuū? Chi áchí tutu:

Yuū jeē ní casquéhichí téé cájeni vehe, yuū yáha nduu jeē quituu vehe.

11 Máá Jítóho yō Yaā Dios ni sáha ya súcuan,

te cánaa ni yō jíto yó jniñu yáha.

Achí tutu, achí yá.

12 Yūcuán na te ni canducú de modo jni de ya. Chi ni cajecūhun ni de jeē siquī máá de cúu jnūhun yátá ní cahān yā siquī téé cá sájniñu nuū uva jíin téé cájeni vehe. Te siquī jeē cáyūhú de jeē quitī ni ñayuu, te ni castóo de ya te cuangoo de.

Siquī xúhun renta

(Mt. 22.15-22; Lc. 20.20-26)

13 Yūcuán na te ni catajé de sava téé grupo fariseo jíin téé grupo Herodes cuangoo de nuū yā, ndúcú de ndese sáha de návāha cahān yā ñn jnūhun jeē nihín de cuēchi siquī yā. 14 Te ni quecoo de, te ni cacahān de jíin yá:

Maestro, cájini na jéé téé cáhān ndaā cúu ní, te tu yúhú ní jeē cahān

ni ñin ñayuu siquī ní. Chi tu sáha ní cuenta ndese cúu ñin ñin i, chi ñnuú-ni sáha ní jíin i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jnī nación yō, chí tuú? ¿A chúnaa yō, chí má chúnaa yō? Achí de jíin yá.

¹⁵ Te máá yá jini yā jeē stahú-ni de, te ni cahān yā jíin de:

¿Najehē cájito ndee rō ruhū? Cuāha ñin xūhún na cóto ri, achí yá.

¹⁶ Te ni cajēhe de xūhún. Te ni jito ya, te ni cajnūhun yá de:

¿Ndé ñin nuū cúu jeē ndeé nuū xūhun yáha, te ndé síhví cúu jeē ndeé yāhá?

Te ni cacahān de jíin yá:

Nuū jíin síhví rey un cúu, achí de.

¹⁷ Yūcuán na te ni cahān yā jíin de:

Núu súcuan te nacuāha rō núu rey un jéé yñi cuenta nuū de, te nacuāha rō núu Yaā Dios tāca jéé yñi cuenta nuū máá yá, achí yá.

Te ni canaa ni de ni cajini de jeē ndichí ní cahān yā.

Jeē ní cacajnūhún de siquī jeē nátecu ndīyi

(Mt. 22.23-33; Lc. 20.27-40)

¹⁸ Yūcuán na te jecu tēe grupo sa-duceo ni quecoo de nuū yā. Te tēe un cacahān jeē tu nátecu cuiti ndīyi. Te ni cacahān de jíin yá siquī ñin jnūhun, achí de:

¹⁹ Maestro, Moisés ni tee de nuū tútu jeē cánevāha yó: Núu ñin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñi nuū ndīyi ñani de, achí tutu. ²⁰ Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihí de, te tú sēhe de ní íyo. ²¹ Te tēe uū ni naquihin de ña, te suni ni jihí de, te tú sēhe de ní íyo. Te suni súcuan tēe unī. ²² Te ndihúxá de ni condeca de ña, te ni ñin de tú sēhe de ní íyo. Te jeē sándñí te suni ni jihí ñahan ún. ²³ Núu súcuan te núu na nátecu de jíjnáhan de quiñí nátecu ndīyi, ¿te ndé ñin de cuu ña ñasihí de?

Chi ndihúxá de ni condeca de ña. Achí de jíin yá.

²⁴ Yūcuán na te ni cahān yā jíin de:

Yōhyo cástívi rō jnūhun siquī jeē tu cájecūhun ni rō jeē cahān tutu ñi, ni tu cájini rō jeē íyó poder Yaā Dios jeē nastécu yā ndīyi. ²⁵ Chi quiñí nátecu ndīyi, te tuá na jnūhun quijnáhan tēe jíin ñahan coo. Chi coo i nájnūhun ndajéhé Yaā Dios andiví. ²⁶ Te siquī jeē nátecu ndīyi, ¿á tu ní cácahu rō tutu ní tee Moisés, ndese ni cahān Yaā Dios jíin de mēhñu yúcū jeē cayú yáñuhūn? Máá rí cúu Yaā Dios Abraham jíin Isaac jíin Jacob, achí yá jíin Moisés. ²⁷ Chi vēsú je ni cajihí de, te cátecu de nuū íyó máá yá, chí cúu ya Yaā sáha jeē técu ñayuu ñí cáni. Yōhyo cástívi rō jnūhun núu súcuan. Achí yá jíin de.

Jniñu cánuú ndasí gá jeē ní ndacu Yaā Dios

(Mt. 22.34-40)

²⁸ Te ni quee ñin tēe stéén tutu ley Yaā Dios, te ni jini de jeē castichí jnáhan tēe un jíin Jesús. Te ni jini de jeē váha ni nastió cuñí yā jnūhun. Te ni cajnūhún de ya:

¿Ndé ñin cúu jnūhun ndácu jniñu cánuú ndasí gá nuū tāca gá jniñu ni ndacu ya jenahán? achí de.

²⁹ Te ni cahān Jesús jíin de:

Yāha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín rō. Máá Jítóho yō Yaā Dios, máá ñin-ni ya íyó. ³⁰ Núu súcuan te coo manī ndasí rō jíin máá Jítóho rō Yaā Dios, nde jnāā ndasí rō sáha rō ndihí jeē cúsiñi ni yā, nde jíin ini jíin ánuá rō, jíin ñí jeē níjnūnī rō, jíin ñí fuerza rō. Yāha cúu jniñu ndácu ya jeē cánuú ndasí gá. ³¹ Te jniñu uū jeē ní ndacu ya, suni súcuan cáhán: Cundáhú ni rō jnáhan rō nájnūhun cundáhú ni rō máá rō. Tuá inga jnūhun ndácu jniñu cánuú gá íyó, chí suu máá jéé yáha-ni. Achí yá jíin de.

³² Yūcuán na te ni cahān tēe stéén tutu ley jíin yá:

Vāha ni cahān ní, Maestro. Chi ndaā chí íyó ñin-ni Yaā Dios, te tuá na inga yā íyó. ³³ Te cánuú jéé coo manī ndasí

yó jíin yá nde jíin ini jíin ánuá yō, jíin ní jeē níjnūnī yō, jíin ní fuerza yō, te cundáhú ni yō jnáhan yó nájnūhun cundáhú ni yō maá yó. Te cánuú ndasí gá jeē yáha vēsú jeē cáhmu yó quiti jíin táca gá jeē socó yō nuū yā. Achí de jíin yá.

³⁴ Yūcuán na te ni jini Jesús jeē váha ni stió cuñí de, te ni cahān yā jíin de:

Je yajni cuu quiví ró ndaha Yaā Dios jeē ndacu ya jniñu nuū rō, achí yá.

Yūcuán na te ni ñn ga de, tuá ni chūndeyí ni de cajnūhún de ya.

Siquí jeē cúu Cristo sēhe yucūn David

(Mt. 22.41-46; Lc. 20.41-44)

³⁵ Te stéen Jesús jnūhun ini templo, te ni cahān yā:

¿Ndese cúu jeē cácahān tēe cástéén tutu ley Yaā Dios jeē Cristo cúu sēhe yucūn David? ³⁶ Chi máá David suhva ni cahān de jnūhun ya ni sáha Espíritu Santo nde jenahán:

Máá Jítóho yō Yaā Dios ni cahān yā jíin Jítóho rī, Yaā quiji:

Cucōo ró lado váha rī nuū cujéhnu ró, te na sáha ri jeē quende rō poder táca jeē cájito uhū rohó.

Achí Yaā Dios. Achí David. ³⁷ Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Te ñayuu cuehē, cánujnahan ni i cájini nahín i táca jnúhun cáhān yā.

Jeē ni cáhān yā jeē iyó cuéchi de jíjnáhan de

(Mt. 23.1-36; Lc. 11.37-54; 20.45-47)

³⁸ Te stéen yā jnūhun, te ni cahān yā jíin i:

Coto má candíje ró táca tēe cástéén tutu ley. Chi cácusí ni de cáñuhun de sahma cáni jeē steén jeē cujéhnu de, cájica cuu de jíin. Te cánujnahan ni de jeē cahán yíñuhún ñáyuu jíin de ini calle. ³⁹ Te cánujnahan ni de cucōo de nuū silla yíñuhún gá ini vehe iī sinagoga, jíin silla yíñuhún gá nuū víco cáyeji ñayuu. ⁴⁰ Te cáquende de vehe ñahan ní caquendōo ndáhú. Te nahán cájicān tahú de návāha cani ni ñayuu jeē tú na cuéchi de. Tēe yáha jíjnáhan

de chi xeēn gā ndoho de castigo. Achí yá.

Jeē ni sócō ñahan viuda xūhún

(Lc. 21.1-4)

⁴¹ Te ñn quiví néne Jesús ini templo ichi núu táca yéjnū nuū cásocō i xūhún. Te jíto ya ndese cáchuhun ñayuu xūhún ini yejnū ún. Te cuehē ñayuu cucá ní cachuhun i cuehē xūhún. ⁴² Te ni quee ñn ñahan viuda jeē ndóho ndáhú. Te ni chuhun ña uū centavo lulí ini yejnū ún. ⁴³ Yūcuán na te ni cana ya tēe cáscuáha jíin yá, te ni cahān yā jíin de:

Jendaá cahán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō táca ñáyuu cucá. ⁴⁴ Chi táca i ni casocō i jeē ni ndóo siquí xūhún cuéhē i. Te ñahan yáha, vēsú ndahú ndóho ña, te ni chuhun ndihí ña jeē cótecu ña. Achí yá jíin de.

Jeē ní cachi yā jeē náa templo

(Mt. 24.1-2; Lc. 21.5-6)

13

¹ Te ni quenda Jesús ini templo cáhnu, te ñn tēe scuáha jíin yá ni cahān de:

Maestro, condēhe ní ná luu jíto táca vehe yáha jéē cúu templo, jíin táca yúu jeē ní cuvāha, áchí de.

² Te ni cahān yā jíin de:

Táca vehe náhnu yāha jéē cájito ró, chí ma cóso jnáhan ga ni ñn yuū, chí ndihí jnanū. Achí yá.

Na seña coo nuū cuácuyajni ndihí ñayiví

(Mt. 24.3-28; Lc. 21.7-24; 17.22-24)

³ Te ni jehēn yā jíin de yucu Olivos jeē íne ichi núu templo cáhnu. Te ni cucōo ya yūcuán. Te Pedro jíin Jacobo jíin Juan jíin Andrés ni cacajnūhun sín de ya:

⁴ Castūhun ní nuū ná, ¿ndé quiví coo táca jéē ní cachi ní jéē coo? ¿Te na seña coo núu cuácuyajni squícu táca jéē ni cáhān ní? áchí de.

⁵ Te ni cahān yā jíin de:

Coto ró jéē ma stahú ni ñn de róhó. ⁶ Chi quijicoo cuehē tēe jeē stahú jíin

síhví rí. Máá rí cúu Cristo, achi de. Te súcuan stáhú de cuehē ñayuu.

7 'Te nihīn rō jnūhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quivī ndihī ñayiví. 8 Chi ndonda nación siquī inga nación, te ndonda ñuu siquī inga ñuu jeē cua-jnáhan. Te cháha chúcuan jnāa, te coo jnamā, te ndonda ñayuu siquī jnáhan i. Te tāca jéē yáha cácuu jnūndóho quejéé xíhna ñúhún gá.

9 'Te condito ró máá ró, chí nastúu i róhó núu tāca tóhō, te ini tācá vehe iī sinagoga canī i róhó. Te quindecā i sava ró núu tācá gobernador jíin núu tāca rey, te cahān i cuēchi siquī rō siquī jeē cácanđije ró rúhū. Te súcuan te cuu nacani ró jnūhun ri nuū de. 10 Te jíni ñúhún jéé xíhna gā cuitē núu jnūhun nuū tācá nación ndese jnáma ri i, te sáa te ndihī quivī. 11 Te núu ni cajni de róhó cuángoo de jíin ró nuū tāca tóhō, te ma nacani ni rō xíhna gā ndese stió cuiñí rō nuū de te cācu ró. Chí máá hora un te máá Yaā Dios cuāha ya jnūhun nuū rō ndese cahān rō, te jnūhun ún cahān rō. Chí nasūu máá ró cúu jeē cahān, chí Espíritu Santo cúu jeē cahān. 12 Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tátá jíin náná jeē cahni. 13 Te tāca ñáyuu quitī ni i nuū rō jeē siquī ruhū. Te ñayuu cuiñí nihin jíin jnūhun ri nde quivī jínu, chí cācu i.

14 'Te Daniel, tēe ni nacani jnūhun Yaā Dios, ni tee de jnūhun in tēe néé jéé quíji. Te róhó jéé cácahu tutu ún, na jécūhun ni rō. Chí in quivī te cuni rō jeē sáha ndevāha de jeē stívī de tācá ndajníñu iī ini templo, te cuiñí de nuū tú na ley cuiñí de. Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. 15 Te ñayuu cáyūcu núu quéhe, ma ndívī i ini vehe jeé quénehen i ndajníñu i, chí cánuú cunu yachī i návāha cācu i. 16 Te ñayuu cáhīin nuū itu, ma ndíji i vehe jeé quíhin i sahma i. 17 Te quivī ún nacā jeé ndahú ñahan cáñuhun sēhe jíin

ñahan cándeca yiquín, chí ma cúnihin ña cunu yachī ña. 18 Te cacān tahú rō jeē ma quíji jnūndóho un jéé cunu ró máá tiempo cúun yuhvā. 19 Chi jeé quejéé un te coo cuehē jnūndóho xeēn, jeē ná tu coo súcuan nde quivī ní sáha Yaā Dios ñayiví te nde vijna. Te jeē ndihī jnūndóho ún te ni ma cóo ga jeē súcuan. 20 Te núu tú nastívī máá Jítoho yō Yaā Dios tiempo jnūndóho ún, te ni in ñayuu ma cácu cuitī i. Te jeé siquī ñáyuu cácanđije jeé ní nacāji ya, jeé yúcuu nastívī ya tiempo un.

21 'Núu súcuan te núu in ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahān i. 22 Chi canecoo tēe cástáhú te cahān de jeé Cristo cúu de, chí cahān de jeé tēe nacani jnūhun Yaā Dios cúu de. Te sáha de jniñu jéhnu jeē naa ni ñayuu coto i, návāha stáhú de nde maá ñáyuu ní nacāji ya, te núu na cúu. 23 Te ndito na cóo ni rō, chí je ni castūhun rí nuū rō vijna nde ná tu coo.

Ndese coo quivī ndiji Yaā ní nduu tēe

(Mt. 24.29-35, 42-44; Lc. 21.25-36)

24 'Te quivī ún, núu je ni ndihī jnūndóho ún, te kujnúú niāndii, te yoō ma ndíi gā. 25 Te ningoo quīmī ín andiví. Te tāca jéé ín andiví chí quisī i. 26 Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhyo luu kujéhnu ri. 27 Yūcuán na te tají rí ndajéhé rī quinastútú yá ñayuu ní nacāji ri ndicúún lado ñayiví, nde nuū ndihī ñayiví te nde nuū ndihī andiví.

28 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeé jeé ni cuyajni tiempo jihní. 29 Te suni súcuan núu ni cajini rō jeé ní quejéé cúu tācá jniñu jeé ni cahān rī, yūcuán na te na jécūhun ni rō jeé ní cuyajni quivī ndíji ri, te yachī coo. 30 Jendaá cahān rī jíin ró jeé ma cúu ndihī ñayuu jeé cóto jnūndóho ún, chí nde squícu ndihī jniñu ún. 31 Andiví jíin ñayiví

chi naa, te tāca jnúhun cáhán rī chi ma náā, chi ndihí squícu.

³² Te quivī jín hora jeē ndíji ri, tú ni ñn ñayuu jiní, ni máá ndajéhé cáhiyo andiví, ni máá rí, Sēhe Yaā Dios. Chi máá ñn ni Tátá rī cúu jeē jiní.

³³ Núu súcuan te na cócuhun ni rō tāca jnúhun yáha, te ndito na cóo ni rō, te cacān tahu rō, chi tu cájini rō na quivī ndiji ri. ³⁴ Chi coo nájnūhun ñn tēe jeē quihín jicá de, te nde ná tu quenda de vehe de, te ni ndacu de jniñu nuū tāca mozo de ndese sáha ñn ñn de. Te ni ndacu de jniñu nuū tēe ndító yéhyí jéē na cóndito de. ³⁵ Te suni súcuan róhó jínáhan ró, ndito na cóo ni rō. Chi cúu ri nájnūhun jitohe vehe ún, te tu cájini rō na hora ndiji ri, á jéē cuácuaa, chí ñuú, chí jéē cána líhli, chí jénéhen. ³⁶ Chi ñn sanaa-ni te ndiji ri, te coto ró jéē ma nánihīn rī rohó jéē tu ndító ró. ³⁷ Te jnūhun cáhán rī jín ró jijnáhan ró, suni cáhán rī jín ndivii ñayuu: Ndito na cóo ni rō jijnáhan ró. Achí yá.

Jeē ní casquíjnáhan de jnūhun jeē jni de Jesús

(Mt. 26.1-5; Lc. 22.1-2; Jn. 11.45-53)

14

¹ Te cúmanī uū gā quivī te quejéé vico pascua jeē cáyeji ñayuu hebreo pan jeē tú na levadura yíhi. Te sutū cácujeñnu jín tēe cástéén tutu ley, ni canducú de modo ndese jni de Jesús jín jnúhun stáhú, te cahni de ya. ² Te ni cacahān de:

Ma jni yó de máá quivī vico, chi ndonda ñayuu siquī yō, achí de.

Jnūhun ñahan jeē ní chuhun perfume xinī yā

(Mt. 26.6-13; Jn. 12.1-8)

³ Te íne Jesús ñuu Betania vehe Simón, tēe ni ndoho cuehyī stehyú. Te níní yéji yā staā, te ni quee ñn ñahan nuū yā, ndáhá ña ñn frasco yuū luu jeē ñūhun aceite perfume, jeē máni ita nardo cúu, te yōhyo yahu ndéé. Te ni tahu ña frasco un, te ni chuhun ña xinī yā. ⁴ Te sava tēe cáhiin yūcuan ní caquiti ni de, te ni cacahān de:

¿Najehē cúu jeē náā saá-ni perfume jiñā? ⁵ Chi cuu xícó yahu yó víhyá gā unī ciento denario, te cuāha yo núu ñayuu ndahú núú, achí de.

Te ni cacahān sōó de jín ña.

⁶ Te ni cahān Jesús:

Ma stáhān rō ña. ¿Naun casáha ró jéē nácani uhū ni ña? Chi ñn jniñu váha cúu jeē ni sáha ña jín rí. ⁷ Chi níní coyūcu ñayuu ndahú jín ró, te núu cácu ni rō te cuu sáha váha ró jín i. Te ruhū chi tuá condee rī jín ró. ⁸ Chi ni sáha ña ndihí jeē cuu sáha ña jeē maní ña jín rí. Chi nde ná tu quindūji ri te je ni sátūhva ña ruhū jeē ní chuhun ña perfume ruhū. ⁹ Jendaá cahān rī jín ró jeē ní cáhnu ñayiví ndé-ni cúu nuū cuité núu jnūhun jeē jnáma ri ñayuu, suni nacani i jnūhun jeē ni sáha ñahan yáha, návāha cocuhun ni ñayuu ña, achí yá.

Jeē ní nastúu Judas yā

(Mt. 26.14-16; Lc. 22.3-6)

¹⁰ Yūcuán na te Judas Iscariote, ñn jeē ndihúxí uū tēe cácuáha un, ní jehēn de nuū sutú cácujeñnu, ni sándaā de jín jéē nastúu de Jesús nuū jijnáhan. ¹¹ Te nuū ní cajini sōho sutū un jéē cahān de, te ni cacusiñ ni, te ni cajejnūhun jeē cuáha xūhun núu de. Te nde quivī un ní nducú de modo ndese nastúu de ya.

Jeē ní jequin yā Cena yā

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Te ni quee máá quivī jeē quejéé vico pascua jeē cáyeji ñayuu pan jeē tú na levadura yíhi, te suni quivī un cájehni i londe nájnūhun ni ndacu Yaā Dios jniñu jeē sáha i vico pascua un. Te tēe cácuáha un ní cacajnūhún de ya:

¿Ndé nuū cuní ni jéē quísátūhva ná cuxíni ní vico pascua? achí de.

¹³ Te ni tají yá uū tēe cácuáha ún quingoo de, te achí yá jín de:

Cuángoo nde ñuu, te yūcuán najnáhan ró jín ñn tēe ndíso quiyi ndute. Te condiquīn rō de quihīn rō jín de.

¹⁴ Te vehe jeē ndiví de, yūcuan cáhān

rō jín tée chí vehe: Achí máá Maestro: ¿Ndé ñn cúu cuarto vehe ní cuáha núú ní núu cuxíni ya vico pas-cua jín tée cáscuáha jín yá? achí rō. ¹⁵ Te máá de stéén de ñn cuarto cáhnu nde xiní véhe jeē je iyó túhva. Te yūcuan sātūhva ró jeē cuxíni yó, áchí yá jín de.

¹⁶ Te cuangoo tēe cáscuáha ún, te ni jinūcoo de ñuu, te ni canihín de nájñuhun ni cahān yā jín de. Te ni casātūhva de jeē cuxíni ya vico pas-cua.

¹⁷ Te jeē cuácuaa, te ni quee ya jín ndihúxí uū de. ¹⁸ Te ni cacucōo de mesa cáyeji de staā, te ni cahān yā:

Jendaá cahān rī jín ró jeē ñn róhó jéé yéji jín rí, nastúu ro rúhū, achí yá.

¹⁹ Yūcuán na te ni cacucuíhyá ni de, te ná ñn ná ñn de ni cacajñuhún de ya:

¿A sáña cúu? achí ñn de.

Te suni súcuan ñnga de:

¿A sáña cúu? achí ñn ñn de.

²⁰ Te ni cahān yā jín de:

Ñn jeē uxí uū rō jeē cáyeji cáhnu jín rí ñn cohō, suu nastúu ruhū. ²¹ Te ruhū, Yaā ní nduu tēe, jendaá cúu jeē quihín rī cuu rī, nájñuhun yósó jñuhun rí nuū tútu ñ. Te nacā xeēn ndoho tēe nastúu ruhū. Vāha ga núu tu ní cácu tēe un núú, áchí yá.

²² Te níni cáyeji de jín yá, te ni quihin ya pan, te ni nacuatáhú yá, te ni tahú cuéchi yá, te ni jēhe ya nuū tēe cáscuáha jín yá. Te ni cahān yā:

Caji rō jijnáhan ró, chí yāha cúu yiquí cúñu rī, achí yá.

²³ Yūcuán na te ni quihin ya ñn copa ndūxi uva, te ni nacuatáhú yá, te ni jēhe ya ni cajihí ndihí de. ²⁴ Te ni cahān yā jín de:

Yāha cúu ññī rī jeē cuáha ri jeē cúu contrato jeé, te cati jeē ndundo cuēchi cuehē ñayuu. ²⁵ Te jendaá cahān rī jín ró jeē ndé vijna te ma cóho ga rī ndūxi ndehē uva yāhá, chí nde quiji quivī ndacu Yaā Dios jññu ní ñayiví, te sáá te coho tucu ri jín ró jijnáhan ró. Achí yá.

Jeē ní cachi yā jeē yūhu Pedro cahān de jeē jini de ya

(Mt. 26.30-35; Lc. 22.31-34; Jn. 13.36-38)

²⁶ Te ni jita ya ñn yaa ñ jín de jijnáhan de. Te ni quenda ya cuahān yā jín de nde yucu Olivos. ²⁷ Yūcuán na te ni cahān yā:

Ndivii rō nayūhu ró jeē siquí ruhū jecuáa vijna. Chí suhva je yósó jñuhun rí nuū tútu ñ, ni cahān Yaā Dios: Cuáha ri jñuhun jeē cáhni ñayuu tēe ndito lanchi, te lanchi un cuítē núu tí jeē yūhu tí, achí. ²⁸ Te jeē nátecu rī, te xīhna ruhū cosnūu rí quihín rī región Galilea, te sáá te najinūcoo ró, áchí yá.

²⁹ Yūcuán na te ni cahān Pedro:

Vésú ndihí de na náyūhú de, te máá ná chí ma náyūhú cuítē ná, áchí de jín yá.

³⁰ Te ni cahān yā jín de:

Jendaá cahān rī jín ró jeē jecuáa vijna, nde ná tu cana líhli uū jínu, te yūhu ró jeē jññ ñayuu rohó, te uní jínu cahān rō jeē tu jini rō ruhū, achí yá.

³¹ Te ni cahān teyí de jín yá:

Vésú núu cuu na jín ní, te ma cahān cuítē na jéé tu jini na níhín, áchí de.

Te suni súcuan ni cacahān ndihí de.

Jeē ní jicān tahú yā nuū huerto Getsemaní

(Mt. 26.36-46; Lc. 22.39-46)

³² Yūcuán na te ni jinū Jesús jín tēe cáscuáha jín yá ñn lugar nuū naní Getsemaní. Te ni cahān yā jín de:

Yāhá-ni cucōo ró, te na quihín rī cacān tahú rī, achí yá.

³³ Te ni jeca ya Pedro jín Jacobo jín Juan, cuahān yā jín de. Te ni quejéé yá cucuíhyá ndasí ni yā te cúxií ni yā jeē quíji jññdóho siquí yā. ³⁴ Te ni cahān yā jín de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró, áchí yá.

³⁵ Te ni jica ya jecu gā, te ni jecuiñī yití yá ni jequin ya nuū yā nuū ññuhun. Te ni jicān tahú yā nuū Yaā Dios jeē núu cuu te ma ndóho ya jññdóho jeē quejéé quiji siquí yā. ³⁶ Te suhva ni cahān yā:

Tátá maá ná, ndihí-ni jññu cuu sáha máá ní. Te tejiyo ní jññdóho yāha jéé ma quíji siquí ná. Te nasūu jéé cuní maá ná, chí jeē cuní maá ní cóo, áchí yá.

37 Te ni ndee yā nuū ndinúni tée cáscuáha jíin yá, te ni jito ya jeē cáquixi de. Te ni cahān yā jíin Pedro:

Simón, ¿á quíxí rō? ¿A tu ní cánda ró condito ró jíin rí vēsú ñn hora? 38 Coó ndito ni rō te cacān tahu rō jeē chindéé ñáhán yá rohó jeē ma sáha ró cuéchi jeē coto ndee jeneé rōhó. Chi cúní ndije ánuá rō squícu vāha ró, te yiqui cúñu rō chí tu fuerza, achí yá.

39 Te ni jehēn tucu ya, ni jicān tahu yā, te suní jnūhun yúcuan ní cahān yā.

40 Te ni ndee ya nuū de, te ni jito ya jeē cáquixi tucu de, chi yōhyo cájii de mahná. Te tuá ni cániñ de jnūhun stío cuñí de nuū yā. 41 Te ni ndee yā jeē vuelta uní, te ni cahān yā jíin de:

Vijna te cusū rō te ndetātu ró. Te tuú chi je ni cuu, chi je ni quee hora, te ruhū, Yaā ní nduu tēe, natūu ri te jñi tēe cáhiyo cuéchi ruhū. 42 Ndocuiñi jijnáhan ró, chí je vēji tēe nastúu ruhū, te quihñ yō jíin de. Achí yá.

Jeē ní cajñi de Jesús

(Mt. 26.47-56; Lc. 22.47-53; Jn. 18.2-11)

43 Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujeñnu jíin tēe cástéén tutu ley jíin tēe jéñnu cándacu jniñu, ni catají de tēe ún. 44 Te Judas, tēe nastúu ya ún, je ni jēhe de ñn seña nuū tēe un jíináhan, chí ni cachi de:

Tēe jeē téchūhu rí un cúu. Te jñi ró jíináhan ró quihñ rō jíin, te ma siaá cuiti rō, achí de.

45 Te ni quee de nde nuū Jesús, te ni cahān de jíin yá:

Maestro, Maestro, achí de.

Te ni techūhú de ya. 46 Te tāca gá tēe un ní cajñi de ya, te cuangoo de jíin yá.

47 Te ñn tēe íne jíin yá ni tava de espada de, te ni jehnde de sōho ñn mozo maá sūtū cujeñnu ga. 48 Te ni cahān Jesús jíin ñáyuu cuehē ún:

¿Te va tēe cuíhná cúu ri jeē vējicoo ró jíin espada jíin yujnu jñi ró rúhū jeē súcuan? 49 Tāca quívī ni ine ri jíin ró jíináhan ró ini templo cáhnu, ni steén

rī jnūhun, te tu ní cájñi ró rúhū. Te súcuan cása ha ró návāha na squícu jeē cahán tutu ñi, achí yá.

50 Yūcuán na te ndihi tēe cáscuáha jíin yá, ni castóo de ya, ni cajinu de cuangoo de.

Tēe suchí jeē ní jinu

51 Te ñn tēe suchí, ndíquín de ya cuahān de jíin yá. Te ndí de máá ñn sahma cuitá. Te ni cajñi tēe ún de.

52 Te máá sahma cuitá un ní canihñ. Te ni jinu máá ñi-ni de cuahān de.

Jeē ní indichi Jesús nuū junta tēe cácujeñnu ga

(Mt. 26.57-68; Lc. 22.54-55, 63-71; Jn. 18.12-14, 19-24)

53 Yūcuán na te ni jinūcoo de jíin Jesús nuū sutū cujeñnu ga. Te tāca sūtū cácujeñnu jíin tēe jéñnu cándacu jniñu jíin tēe cástéén tutu ley, ni candutútú de. 54 Te Pedro chí jíicá-ni ndíquín de ya, te ni jinū de nde ini patio sutū cujeñnu ga. Te ni cucōo de jíin táca policía, násaā de ñuhñ.

55 Te sutū cácujeñnu jíin ndihi tēe cása ha junta cujeñnu ga, ni canducú de cuéchi siquī Jesús, chí cahni de ya cácuni de. Te tu ní cániñ de. 56 Chí cuehē de ni cacahān yaá siquī yā, te tu ní quíjnáhan jnūhun ni cacahān de. 57 Yūcuán na te ni candocuiñi sava de, te ni catee de cuéchi siquī yā, achí de:

58 Máá ná ni cajini ná cáhán de jeē canu de templo yáha jēe ní cuvāha ni casáha tēe, te nuū uní quivī te nacani de inga jeē násūu jíin ndaha tēe cuvāha, achí de. Achí jíináhan.

59 Te ni jnūhun yáha tu ní quíjnáhan tucu jeē cácahān de siquī yā.

60 Yūcuán na te sutū cujeñnu ga ni ndocuiñi de nuū ñáyuu cuehē ún, te ni cajñuhñ de Jesús:

¿Naun tu cáhán cuiti rō? ¿A íyó ndāā jeē cácahān tēe yáha siquī rō? achí de.

61 Te máá yá tu ní cáhán cuiti yā, chí tú na vé ni stío cuñí yā. Te sutū cujeñnu ga ni cajñuhñ tucu de ya:

¿A máá ró cúu Cristo, Sēhe Yaā vāha jeē cujeñnu? achí de jíin yá.

62 Te ni cahān yā:

Suu ri cúu. Te coto ró jéē ruhū, Yaā ní nduu tēe, condee rī lado váha Yaā iyó poder, te ndiji ri ichi ándiví jín vícō, achí yá.

⁶³ Yūcuán na te sutū cujéhnū ga ni jehnde de sahma de jeē quití ndasí ni de, te ni cahān de:

¿Ndé jíní ñúhún gá yō testigo núu súcuan? ⁶⁴ Chi je ni cajini ró jéē cahán de jnūhun ndevāha jeē quití ni Yaā Dios, chí sáha de máá de Sēhe Yaā Dios. ¿Te ndese cájeni ni rō? Achí de.

Te ndihí de ni cacahān jeē na cúu yā.

⁶⁵ Te sava de ni catesihí de nuū yā, te ni cajesí de sahma nuū yā, te ni cacani de ya. Te cácahān de jín yá:

Cachi ndé ñn cúu jeē ní caní rōhó, achí de.

Te tāca tēe policía ni cacani de nuū yā.

Jeē ní cachi Pedro jeē tu jíní de ya

(Mt. 26.69-75; Lc. 22.56-62; Jn. 18.15-18, 25-29)

⁶⁶ Te íne Pedro ini patio ichi chíji nuū cáhīn de jín Jesús. Te ni quee ñn ñahan jéjníñu vehe sutū cujéhnū ga ún. ⁶⁷ Te ní jito ña nuū de jeē néne de násaā de yuñúhún. Te ní jito váha ña nuū de, te ni cahān ña:

Róhó chí suni ní jica ró jín Jesús, tēe ñuu Nazaret, achí ña.

⁶⁸ Te máá de tu ní cáchi de, chí ni cahān de:

Tu jíní rī de, ni tu jíní rī na jnūhun cáhán rō, achí de.

Te ni quenda de yéhyí núu quéhe. Te ni cana-ni líhli. ⁶⁹ Te ñahan jéjníñu un ní jito tucu ña nuū de, te ni quejéé ña cáhán ña jín ñáyuu cáhīn yūcuán:

Tēe yáha suni jnáhan tāca tēe un cúu, achí ña.

⁷⁰ Te máá de tu ní cáchi tucu de. Te ni cunúu jecu gā, te ñayuu cáhīn yūcuan ní cacahān tucu i jín Pedro:

Jendaá ndije jeē suni jnáhan de cúu ró, chí tēe Galilea cúu ró, te inuú-ni cáhán rō jín de jínáhan de. Achí í.

⁷¹ Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíní rī tēe un jéē cácahān rō jnūhun de, achí de.

⁷² Yūcuán na te ni cana-ni líhli vuelta uū. Te ni nucūhun ni de jnūhun ni cahān Jesús jín de: Nde ná tu cana líhli uū jínu, te yūhu ró te cahān rō uní jínu jeē tu jíní rō ruhū. Te ni nacani ni de siquī jnūhun ún, te ni ndahyū de.

Jeē ní indichi Jesús nuū Pilato

(Mt. 27.1-2, 11-14; Lc. 23.1-5; Jn. 18.28-38)

15

¹ Te jeē ní cundijin, te sutū cácujehnū ni candutútú de jín tēe jéhnū cándacu jniñu, jín tēe cástéén tutu ley, jín ndihí tēe cásaá junta cujéhnū ga, te ni casquíjnahān de jnūhun. Te ni cajihni de Jesús, te cuango de jín yá nuū Pilato, tēe cúu gobernador. ² Te Pilato ni cajnūhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájnūhun cáhán rō.

³ Te sutū cácujehnū un ní cacahān de cuehē cuēchi siquī yā. ⁴ Te Pilato ni cajnūhún tucu de ya:

¿Naun tu cáhán cuiti rō? ¿A tu jíní ró jéé cuehē cuēchi cácahān de siquī rō? achí de.

⁵ Te tu ní cáhán cuiti yā ni ñn jnūhun jín de. Te nahán ní naa ni Pilato ndéhé de nuū yā.

Jeē ní cundaā jeē cúu yā

(Mt. 27.15-31; Lc. 23.13-25; Jn. 18.38-19.16)

⁶ Te íyó costumbre Pilato jeē quiví víco un siáá de ñn tēe íne vecāa, núu na-ni tēe cácuni ñayuu. ⁷ Te íyó ñn tēe nání Barrabás, íne de vecāa jín táca jnáhan de siquī jeē ní candonda de siquī tohō te ni cajehni de ndíyí. ⁸ Te ni quecoo ñayuu cuehē, te ni cacahān i jín Pilato jeē na sáha de nájnūhun íyó costumbre de. ⁹ Te ni cahān Pilato jín í:

¿A tu cácuni rō jeē siaá rī tēe cúu Rey rohó ñáyuu hebreo? achí de.

¹⁰ Súcuan ni cahān de, chí cúní de siáá de Jesús. Chí je ni jecūhun ni de jeē ní cacucuésún ni tāca sūtū un cájito de ya, te jeē yūcuan ní quiijicoo jín yá nuū de. ¹¹ Te sutū cácujehnū

un ní cascáhán de ñayuu cuehē un jēē váha ga na cácan i jeē siaá Pilato Barrabás. ¹² Yūcuán na te ni cajnuhún tucu Pilato:

Núu súcuan ¿te ndese cáconi rō jeē sáha ri jíin téē jeē cácahān rō jeē cúu de Rey rohó ñáyuu hebreo? áchí de jíin i.

¹³ Te ni cacana jee i:

Cata caa ní de jicā cruz, na cúu de, áchí i.

¹⁴ Te ni cahān Pilato:

¿Na cuēchi ni sáha de núu súcuan?

Te ñayuu un ní cacana jee tucu i:

Cata caa ní de jicā cruz, na cúu de, áchí i.

¹⁵ Te Pilato cuní de jeē na cúsiñ ni ñayuu jíin de, te ni siaá de Barrabás. Yūcuán na te ni ndacu de jniñu jeē na cáni tãcá soldado Jesús, jíin jēē cata caa de ya jicā cruz.

¹⁶ Yūcuán na te soldado un cuángoo de jíin yá ini patio palacio, jeē sácata de nuū yā. Te ni canastútú de ndihí jnáhan de. ¹⁷ Te ni cachuhun de ya ñin sahma cuehé ndihí jēē cúu sahma rey. Te ni casáha de ñin corona iñu, ni cachuhun de xinī yā. ¹⁸ Yūcuán na te ni cacana de:

Nacā jeē váha rey cúu Rey ñayuu hebreo, achí de.

¹⁹ Te ni cacani de yujnu xinī yā, te ni catesihí de nuū yā, te ni cajecuiñi yití de nuū yā, casáha de jeē chiñuhún de ya. ²⁰ Te nuū ní cuu ni casácata de nuū yā, te ni catava de sahma cuehé ndihí un, te ni canachuhun de ya sahma máá yá. Te ni caquenehen de ya jeē cata caa de ya jicā cruz.

Jeē ní cacata caa de ya jicā cruz

(Mt. 27.32-44; Lc. 23.26-43; Jn. 19.17-27)

²¹ Te ñin téē nání Simón ñuu Cirene, téē cúu tátá Alejandro jíin Rufo, vendiji de jeē ni jéhēn de rancho. Te ni yāha de yūcuán, te ni catejniñu soldado un de jeē cóndiso de cruz yā.

²² Te cuángoo de jíin yá ñin lugar nuū naní Gólgota, jeē cuní cahān Lugar Yiqui Xíní. ²³ Te ni cajēhe de vino jeē ni sácā núu jíin súje uvuā jeē cóho ya, te tu ní jíhi ya. ²⁴ Te ni cacata caa de ya jicā cruz. Te ni casáha de sorteo

jeē siquí ndese nihīn ñin ñin de sahma ya.

²⁵ Te cahān ni cacata caa de ya. ²⁶ Te jnūhun ni catee de xinī cruz cahān na siquí ni jíhi yā: Yāha cúu Rey ñayuu hebreo, achí. ²⁷ Te suni ni cacata caa de uū téē cuihná núu uū gā cruz, ñin de lado váha ya, te inga de lado jecó yá. ²⁸ Te ni squícu jnūhun cáhán tutu iñ: Ni casquijnáhan de ya jíin téē casáha neé, áchí.

²⁹ Te ñayuu cáyāha yūcuán cáscuicó i xinī i, te cácahān neé i:

Jājañ. Róhó chi cáhán rō jeē cánu rō templo cáhnu, te nuū uní quiví te nucondichi sáha ró. ³⁰ Núu súcuan te jnama ró máá ró, te nuu ró jicā cruz viñ, achí i.

³¹ Te suni súcuan ni cacahān catá sutū cácujeñnu jíin téē cástéén tutu ley, te áchí de cácahān maá de:

Núu inga ñayuu ni jnama de, ¿te naun tu cúu jnama de máá de vijna?

³² Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, áchí de jíjnhān de.

Te téē cándita caa jíin yá, suni súcuan ni cacahān neé de.

Jeē ni jíhi Jesús

(Mt. 27.45-56; Lc. 23.44-49; Jn. 19.28-30)

³³ Te nuū ní cuu cahuxí uū, te ni cunee ní cáhnu nde cahuní. ³⁴ Te nuū ní cuu cahuní, te ni cana jee Jesús:

Eloi, Eloi, ¿lama sabactani? achí yá. Te jnūhun un cúni cahān: Yā Dios maá ná, Yā Dios maá ná, ¿naun ni stóo ní sáña?

³⁵ Te sava ñayuu cáhīn yūcuán, ní cajini i jnūhun ún, te ni cacahān i:

Cuni nahín, chí cána de xinī Elías, téē ni nacani jnūhun Yā Dios jehāhān, achí i.

³⁶ Te ni jinu ñin téē, ni jechundaji de cachí nuū vinagre iyá. Te ni tee de xinī ñin yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiiji Elías nasnúu de, áchí de.

³⁷ Te máá Jesús ni cana jee ya, te ni jíhi-ni ya. ³⁸ Yūcuán na te sahma ndíta caa jeē ndihyú cuarto iñ ini templo cáhnu, ni ndatā sava sava nde xinī te nde nuū jehé. ³⁹ Te téē ñuu Roma jeē

cúu capitán, índichi de nuū yā, te ni jini de jeē ní cana jee ya te ni jihī yā. Te ni cahān de:

Jendaá ndije jeē Séhe Yaā Dios cúu tēe yáha, áchí de.

⁴⁰ Te suni cáhīin sava ñahan, cándēhe jíca ña. Te unī ña cácuu María ñuu Magdala, jíin María naná José jíin Jacobo suchí, jíin ñahan nání Salomé.

⁴¹ Te ñahan yáha ní candiquīn ña ya, ni cajejnīñu ña nuū yā nde náa jíca ya Galilea. Te suni cáhīin cuehē gā ñahan jeē ni jéngoo jíin yá ñuu Jerusalén.

Jeē ní quindūji Jesús

(Mt. 27.57-61; Lc. 23.50-56; Jn. 19.38-42)

⁴² Te ni ini quivī ún. Te quivī sátūhva cúu, chi sajnē cúu quivī ndétātú. ⁴³ Te ni quee José, tēe ñuu Arimatea. Te cúu de ñn tēe cújēhnu nuū junta cújēhnu ga. Te suni ñúhun ni de jeē quiji quivī jeē ndacu Yaā Dios jniñu. Te tu yúhú de chi ni quivī de nuū Pilato, ni jicān de yiqui cúñu Jesús. ⁴⁴ Te Pilato chi náa ni de jeē yachí ni jihī yā. Te ni cana de capitán, te ni cajnūhún de tēe un núu je ni jihī yā. ⁴⁵ Yūcuán na te ni cucáhnu ni de jeē ni cáhān capitán jíin de, te ni jēhe de jnūhun jeē quihin José yiqui cúñu yā. ⁴⁶ Te José ni jeen de ñn sahma cuitá váha. Te ni snúu de yiqui cúñu yā, te ni chusúcún de sahma ún. Te ni chindūji de ya ini ñn yaū jeē quindūji ndīyī, jeē ní caan jíca ñn cava. Te ni jesī de ñn yuū yuhu yáú un. ⁴⁷ Te María ñuu Magdala, jíin María naná José, ni cajito ña nuū ní cachindūji de ya.

Jeē ní natecu Jesús

(Mt. 28.1-10; Lc. 24.1-12; Jn. 20.1-10)

16

¹ Te ni ini quivī ndétātú, te María ñuu Magdala, jíin María naná Jacobo, jíin Salomé, ni cajeen ña tãcá perfume jeē quíchuhun ña yiqui cúñu yā. ² Te jenéhen quivī domingo, jeē ní cane niāndii, te ni jinūcoo ña nuū ní yindūji ya. ³ Te cácahān ña:

¿Ndé níhīn yō tēe tejiyo yuū ndihyú yuhu yáú? áchí ña.

⁴ Te ni candacoto ña, te ni cajito ña jeē jé ni cujiyo yuū cáhnu un cuáhān.

⁵ Te ni quivīcoo ña ini yaū ndīyī. Te ni cajito ña ñn ndajéhé Yaā Dios jeē cáa nájnūhun tēe suchí, néne ya ichi lado váha, ñúhun ya ñn sahma cuijín cáni. Te ni cayūhú ña. ⁶ Te ni cahān yā jíin ña:

Ma yūhu ró jijnáhan ró. Chi vecondēhe ró Jesús ñuu Nazaret, Yaā ni jihī jíca cruz. Tuá yā yáhá, chi je ni natecu yā. Yáhá condēhé ró nuū ní cachindūji de ya. ⁷ Cuánungoo te cachi rō nuū tēe cáscuáha jíin yá, jíin núu Pedro, jeē xīhna gā maá yá jinū ña. ⁸ Yūcuán na te ñahan un ní quenda-coo ña nuū ní yindūji ya, te cájino ña cuangoo ña. Chi quisi i ña jeē cáyūhú ña. Te tu ní cácachi cuiti ña nuū ní ñn, chi cáyūhú ña.

⁹ Te Jesús ni natecu yā jenéhen quivī domingo. Te xīhna gā ni nane ndijin yā nuū María ñuu Magdala, ñahan jeē ní quenehen ya uxā tachī ini. ¹⁰ Te cuahān ña cuacastūhún ña nuū tãca tēe ni cajica jíin yá jeē ní nane ya nuū ña. Te cáccuúhyá ni de te cándahyū de. ¹¹ Te nuū ní cajini de jnūhun jeē ní jito ña nuū yā jeē técu yā, te tu ní cácaandíje de jnūhun cáhān ña.

Jeē ní nane Jesús nuū María ñuu Magdala

(Jn. 20. 11-18)

⁹ Te Jesús ni natecu yā jenéhen quivī domingo. Te xīhna gā ni nane ndijin yā nuū María ñuu Magdala, ñahan jeē ní quenehen ya uxā tachī ini. ¹⁰ Te cuahān ña cuacastūhún ña nuū tãca tēe ni cajica jíin yá jeē ní nane ya nuū ña. Te cáccuúhyá ni de te cándahyū de. ¹¹ Te nuū ní cajini de jnūhun jeē ní jito ña nuū yā jeē técu yā, te tu ní cácaandíje de jnūhun cáhān ña.

Jeē ní nane ya nuū uū tēe cáscuáha jíin yá

(Lc. 24.13-35)

¹² Yūcuán na te ni quendacoo uū jnāhan tēe ún, cájica de cuahān de ichi rancho, te sñn modo ni nane ndijin yā nuū de. ¹³ Te ni canandicó de, ni cacastūhún de nuū tãca gá jnāhan de. Te ni tu ní cácaandíje tucu jnāhan de jeē cácahān ndindúú de.

Jeē ní tejnīñu ya de nacani de jnūhun

(Mt. 28.16-20; Lc. 24.36-49; Jn. 20.19-23)

¹⁴ Te cúcuéé gá te ni nane ndijin yā nuū ndihúxí ñn de jeē cáyūcú de mesa cáyeji de staā. Te ni cahān yā nuū de,

chi nīhni ni de jeē tu cá candíje de jeē cá cahān jnāhan de un, jéē ní natecu yā ni cajito de ya. ¹⁵ Te ni cahān yā jíin de:

Cuāngoo jíjnāhan ró nī ñayīví, te nacani ró jnūhun ri nuū tāca ñayuu ndese jnáma ri i. ¹⁶ Te ñayuu candíje te cuandute i, chi cācu i. Te ñayuu tú candíje, chi jnahnū ndetū i. ¹⁷ Te ñayuu candíje, sáha i tācá jniñu jéhnū yáha jeē steén jeē iyó rí jíin i: Jíin síhví rí quenehen i tachī ini ñayuu. Te cahān i tijni yuhu jéé. ¹⁸ Te núu ni jni# sanaa i coō, chí núu ni jihi i veneno, te ma sáha daño jíin i. Te suni soó i ndaha i siquī ñayuu cácu hū, te nduvāha. Achí yá jíin de.

*Jeē ní ndaa ya cuanuhun yā andiví
(Lc. 24.50-53)*

¹⁹ Yūcuán na te nuū ní ndihi ni cahān maá Jítóho yō jíin de jíjnāhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéhnū ya. ²⁰ Te máá de ni quenda-coo de, ni canacani de jnūhun ya tāca lado ndese jnáma ya ñayuu. Te máá Jítóho yō ni chindéé ñáhán yá de. Te ni jéhe ya fuerza jeē sáha de tācá jniñu jéhnū jeē steén jeē iyó ndáa jnūhun cánacani de. Te ni cuu. Amén.

JNUHUN VAHA NI TEE SAN LUCAS

¹ Cuehē tēe ni cajicu de ni catee yúcun de historia Jesús, tãcá jniñu jeē ni sáha ya ni cajito yó. ² Te ni catee de tãca jnúhun jeē ní cacastúhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya. ³ Te máá ná, suni ni nanducú yúcun ná tãca jnúhun ya, nde nuū ní quejéé. Te ni jeni ni na jéē suni íyó váha jeē tée cájí ná tãca jnúhun yáha núu ní, amigo Teófilo. ⁴ Te súcuan te cuni ni jéē iyó ndãã tãca jnúhun jeē ní cacastúhún i nuū ní.

Jeē ní cachi ndajéhé jeē cacu Juan tēe scuándute

⁵ Tiempo jeē ní cuu Herodes rey región Judea, te ni ñyo ñn sutū ñáyuu hebreo, naní de Zacarías, te grupo Abías cúu de. Te ñasihí de naní ña Elisabet, te suni sēhe yucun maá sūtū Aarón cúu ña. ⁶ Te ndĩndúú de cahīyo ndaã de nuū Yaã Dios, te ndaã váha cásquícú de jniñu ndácu ley maá Jítóho yō Yaã Dios, cájito tãca ñáyuu. ⁷ Te tú sēhe de íyó, chi ñahan númá cúu Elisabet, te je jéhnú ndĩndúú de.

⁸ Te ñn quivĩ te jéjníñu Zacarías nuū jniñu jeē cúu de sutū nuū Yaã Dios, chi ni quee quivĩ jeē ndĩvĩ grupo de. ⁹ Te ni casáha de sorteo, nájnūhun íyó costumbre sutū. Te ni sáha tocar Zacarías jeē quivĩ de ini cuarto ñi templo Jítóho yō Yaã Dios, te cahmu de sūje cútú. ¹⁰ Te hora jeē cayú sūje cútú, te tãca ñáyuu cuehē cáhĩn i fuera, cájicãn tahu i. ¹¹ Te ni cane ñn ndajéhé maá Jítóho yō nuū de, ín ya lado váha altar nuū jéhnú de sūje cútú. ¹² Te ni cunéé ni Zacarías ni jito de nuū yã, te yōhyo ni yūhú de. ¹³ Te ni cahãn ndajéhé un jíin de:

Zacarías, ma yūhu ró, chi je ni chihi Yaã Dios cuenta jeē ni jícãn tahu rō. Te ñasihí ró Elisabet, scácu ña ñn sēhe yí, te snání ró i Juan. ¹⁴ Te yōhyo cusĩ ni rō. Te cuehē ñáyuu cusĩ ni jeē cácu i. ¹⁵ Chi kujéhnú sēhe ró sáha máá Yaã

Dios. Te ma cóho i vino ni ndixi cuí. Te cunuú máá Espíritu Santo jíin i, nde ná tu cacu i. ¹⁶ Te sáha i jeē cuehē ñáyuu nación rō Israel ndĩvĩcoo i nuū Jítóho i Yaã Dios. ¹⁷ Te xĩhna gã Juan quiji nacani jnúhun Jítóho yō Jesús, te sáá te quiji ya. Te sáha i nájnūhun ni sáha Elías, tēe ni nacani jnúhun Yaã Dios jenahán, te coneváha i poder jeē nãcani i jnúhun, nájnūhun ni coneváha Elías. Te sáha i jeē tãca tátá ndumanĩ de jíin sēhe de. Te suni sáha i jeē ñáyuu nĩhni ni cuatáhú i nuū Yaã Dios, nduu i ñáyuu ndaã. Súcuan sátúhva i ñáyuu návãha candíje i máá Jítóho yō jeē quiji ya. Achí ndajéhé.

¹⁸ Te Zacarías ni cajnúhún de ya:

¿Ndese cucáhnú ni na núu jendaá cúu? Chi tēe jéhnú cúu ná, te suni jéhnú ñasihí ná, achí de.

¹⁹ Te ni cahãn ndajéhé un jíin de:

Máá rí cúu Gabriel, te íne rí nuū Yaã Dios, jejniñu rí nuū yã. Te ni tají yá ruhú vēji rí cahãn rí jíin ró, te nãcani rí jnúhun váha yáha núu rō. ²⁰ Te jeē tu ní cándíje ró jnúhun ni cahãn rí, te cuñĩhĩn ró, te ma cúu cahãn rō, chi nde na cácu sēhe ró. Te squícú nahĩn jnúhun cáhãn rí yãhá, na quée quivĩ, achí ndajéhé.

²¹ Te ñáyuu cáhĩn ichi fuera, cándetu i Zacarías, te cájeni ni i na vé ni cuu jeē cucuée de ini cuarto ñi templo. ²² Te nuū ní quenda de, te tuá ni cúu cahãn de jíin i. Te ni cajecūhun ni i jeē ini templo ni jito ndijin de ñn jeē ni stéén yã nuū de. Te máá seña na ni sáha de nuū i, chi ni cuñĩhĩn de.

²³ Te nuū ni jínu quivĩ ni jejniñu de ini templo, te cuanuhun de vehe de.

²⁴ Te ni cuu jecu quivĩ, te ñasihí de Elisabet ni jecūhun sēhe ña. Te ni ñyo ña vehe ña uhūn yoō jeē tuá nde ní jéhen ña. Te jéni ni ña: ²⁵ Súcuan ni sáha máá Jítóho yō jíin rí, te ni tejiyo ya jnúhun jeē cúcanu rí nuū ñáyuu jeē tú sēhe rí, jéni ni ña.

Jeē ní cachi ndajéhé jeē cacu Jesús

²⁶ Te nuū iñú yoō, te ni tají Yaã Dios ndajéhé yã Gabriel, ni jehēn yã ñn ñuu naní Nazaret, ndañúu Galilea. ²⁷ Te ni

jeḥēn yā nuū ìn sūchi sḥí nání María. Te je ni cundaā jeē quijnáhan ña jíin ìn tēe nání José, te sēhe yucūn rey David cúu de. ²⁸ Te ni quiví ndajéhé un núu ndeé ña, te ni cahān yā:

Tandii, nacā ndetū cúu ró. Chi máa Jítóho yō Yaā Dios iyó yá jíin ró, te ni sáha ya jeē yóhyo ndetū gā cúu ró núu tāca gā ñahan, áchí yá.

²⁹ Te nuū ni jíto ña nuū yā, te ni cunéé ni ña jeē súcuan cáhān yā, te jéni ni ña naun cáhān yā súcuan jíin ña.

³⁰ Te ni cahān gā ndajéhé un jíin ña:

Ma yūhu ró María, chi ni sáha Yaā Dios jeē váha jíin ró. ³¹ Te jecūhun sēhe ró te scácu ró ìn sēhe yí, te snání ró i Jesús. ³² Te kujénu i, te conaní i Sēhe Yaā kujénu téyí. Te máa yá jeē cúu ya Jítóho yō Yaā Dios, sáha ya jeē cuu i rey, nájnūhun jíi i David ni cuu de rey. ³³ Te ní cáni ndacu i jniñu nuū ñáyuu nación Israel. Te ma ndíhi cuiti jeē ndácu i jniñu. Achí ndajéhé.

³⁴ Yūcuán na te ni cajnūhún María:

¿Ndeese coo jeē ni cáhān ní? Chi ná tu coo yí ná, áchí ña.

³⁵ Te ni cahān ndajéhé un:

Máa Espíritu Santo quiji siquī rō, te poder máa Yaā kujénu téyí sáha ìn jniñu jénu jíin ró. Te jeē yúcuan máa súchi íi jeē cácu, quihi cuenta i nuū Yaā Dios, te cahān ñayuu jeē Séhe Yaā Dios cúu i. ³⁶ Te suni cástūhun rí nuū rō jeē jnáhan ró Elisabet, suni scácu ña ìn sēhe vésú je jénu ña. Te vijna íyó íñū yoō jeē tuá cácahān ñayuu jeē cúu ña ñahan númá. ³⁷ Chi ndíhi-ni cuu sáha Yaā Dios, te tu íyó ni ìn jeē ma cúu sáha ya, achí ndajéhé un.

³⁸ Yūcuán na te ni cahān María:

Cuu núu súcuan, chi sáha ná táca jniñu ndácu Jítóho yō Yaā Dios, te na cóo jíin ná nájnūhun ni cachí ní, áchí ña.

Te máa ndajéhé un cuáhān-ni ya.

Jeē ni jécondēhé María Elisabet

³⁹ Te ni cuu jecu quiví, te yachí cuahān María, ni caa ña yucu cuahān ña ìn ñuu región Judea. ⁴⁰ Te ni jinū ña vehe Zacarías, te ni cahān ña jíin Elisabet. ⁴¹ Te nuū ní jini Elisabet

jeē cahān María jíin ña, te sūchi ñūhun chīji ña ni canda-ni i. Te ni cunuū Espíritu Santo ini anuá ña. ⁴² Te ni cahān jee ña:

Ni sáha Yaā Dios jeē yóhyo ndetū gā cúu ró núu tāca gā ñahan, jíin jéē yóhyo ndetū sēhe ró. ⁴³ ¿Te ndese cúu jeē ní quee naná máa Jítóho rī nuū rī? Chi tu cújénu cuiti rī. ⁴⁴ Chi jeē ní jini-ni ri jnūhun ni cahān rō jíin rí, te sūchi ñūhun chīji ri ni canda i jeē cúsi ni i. ⁴⁵ Te nacā ndetū rō jeē ní candíje ró, chi squícu nahín tāca jnūhun ni cahān máa Jítóho yō jíin ró. Achí Elisabet.

⁴⁶ Yūcuán na te ni cahān María: Cáhān rī jeē kujénu ndasí máa Jítóho yō Yaā Dios,

⁴⁷ te cúsi ni rī jíin Yaā Dios, Yaā jnáma ruhū.

⁴⁸ Chi ni sáha ya cuenta ruhū, vésú tu cújénu rī.

Te na squícu ri jniñu ndácu ya.

Te nde vijna te táca ñáyuu jeē nácacu, cahān i jeē yóhyo ndetū rī.

⁴⁹ Chi Yaā jniñi ndíhi poder, ni sáha ya jniñu jénu jíin rí.

Te Yaā íi ndoo cúu ya.

⁵⁰ Te ní cáni cundáhú ni yā tāca ñáyuu ndíso íyo nuū yā.

⁵¹ Ni sáha ya jniñu jénu jíin poder yā, chi ni scúnu ya ñáyuu casándúxí máa,

⁵² te ñáyuu cácujeñu, ni quende ya jeē kujénu i.

Te ñayuu ndahú chi ni sajeñu ya i,

⁵³ te ñayuu cájiī sōco ni jēhe ya jeē cáji vāha i.

Te ñayuu cucá ní natají yá i súcuan-ni.

⁵⁴ Te ni chindéé ñáhán yá yohó, ñáyuu nación Israel, jeē cácuu yó mozo yā,

te tu náā ni yā jeē cundáhú ni yā yohó.

⁵⁵ Chi súcuan ni jejnūhun ya nuū tāca jíi yō,

nuū Abraham jíin táca yúcūn de jeē cóo ní cáni.

Achí María.

⁵⁶ Te ni condee ña jíin Elisabet nájnūhun unī yoō. Yūcuán na te cuanuhun ña vehe ña.

Jeē ní cacu Juan tēe scuándute

⁵⁷ Te ni jinū quiví jeē scácu Elisabet sēhe ña, te ni scácu ña ìn sēhe yí.

58 Te tāca ñáyuu ndeé yajni jíin ña jíin tāca jnáhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jnūhun sī ni jíin ña.

59 Yūcuán na te nuū uná quivī jeē ní cacu i, te ni jengoo ñayuu ni sáha i circuncidar sūchi yíquín un. (Te yūcuan cúu ñin jnūni nuū yíquí cúñu tāca sūchi yí hebreo jeē steén jeē cácuu i ñayuu Yaā Dios.) Te snání i sūchí un síhví tátá i Zacarías nuū. 60 Te ni cahān naná i:

Ma cúu, chi Juan conaní i, áchí ña.

61 Te ni cacahān i jíin ña:

¿Te naun? Chi tú ni ñin jnáhan ró naní sūcuan, áchí i.

62 Yūcuán na te jíin seña ni cacajnūhún i tátá sūchí un ndese cúní de jeē cónaní i. 63 Te máá de ni jicān ñin tutu, te ni tee de: Juan conaní i. Te tāca ñáyuu un ní canaa ni i cájito i. 64 Te ni nduvāha Zacarías jeē ní cuñíhín de, te ni quejéé de cáhán de jeē yóhoyo vāha Yaā cúu Yaā Dios. 65 Te tāca ñáyuu ndeé yajni jíin de, yóhoyo ni canaa ni i. Te ní yucu región Judea ni jité núu tāca jnūhun yáha jeē sūcuan ni cuu. 66 Te tāca ñáyuu jeē ní cajini jnūhun, ni quejéé i cánacani ni i, te cácajnūhun jnáhan i:

¿Ndeese coo na cuéhnu sūchi yáha? áchí i.

Chi máá Jítoho yō yóhoyo ni sáha ya jeē váha jíin i.

Jnūhun luu jeē ní nacani Zacarías

67 Te tátá i Zacarías ni cunuú Espíritu Santo jíin de, te ni nacani de jnūhun ni steén Yaā Dios nuū de:

68 Yóhoyo vāha Yaā cúu máá Jítoho yō, Yaā Dios yohó ñáyuu Israel, chi ni quiji ya nuū yō jeē cácuu yó ñáyuu yā, te ni jnama ya yohó.

69 Te ni jeni ya ñin Yaā iyó poder jeē jnáma ya yohó, te Yaā ún cacu yucūn mozo yā rey David.

70 Chi sūcuan ni jejnūhun ya, ni cacahān tāca téé ndoo ánuá jeē ní canacani de jnūhun ya jnahán.

71 Chi ni cacahān de jeē jnáma ya yohó núu jeē cájito uhū yohó, jíin núu jeē cáquitī ni nuū yō.

72 Chi ni cundáhú ni yā tāca jíi yō jijnáhan,

te tu ní náā ni yā contrato ñi yā.

73 Chi suu un ní jejnūhun téyí yá nuū jíi yō Abraham,

74 suu jeē jnáma ya yohó núu ñáyuu cájito uhū yohó, návāha cuajníñu yó núu yā, te ma yūhu yó i.

75 Te coo ndaā coo ndoo ánuá yō, cuajníñu yó núu yā tāca quivī jeē cótecu yō.

76 Te róhó sūchi lúli, cuu ró téé nacani jnūhun Yaā cujéñu téyí.

Chi cosnúu ró ichi núu máá Jítoho yō, návāha sátūhva ró ñáyuu, te sáá te quiji ya.

77 Te castūhun ró nuū ñáyuu máá yá jeē jnáma ya i, jíin jéé cóne cáhnu ni yā nuū tāca cuéchi i.

78 Chi Yaā Dios máá yó, vāha ni yā te cundáhú ni yā yohó.

Jeē yūcuan tají yá máá Yaā jeē sáha jeē cundijin ini anuá yō, quiji ya nde andiví,

79 návāha jecūhun ni yohó jéé cáyūcu nájñūhun nuū néé nuū jé yajni cuu yō.

Te chuhun ya yohó ichi nuū cóo ndeyí coo sī ni yō.

Achí Zacarías.

80 Te sūchi lúli un ní jehnu i te ni ije i jíin jnūhun ya. Te ni condee i nde nuū ñūhun téhé ndé quivī ní quenda ndijin i nuū ñáyuu Israel.

Jeē ní cacu Jesús (Mt. 1.18-25)

2

1 Te ni cuu jecu quivī, te Augusto, téé cúu rey, ni ndacu de jniñu jeē coo censo jeē núcosō síhví ndivii ñayuu ní cáhnu nuū ndácu de jniñu. 2 Yāha cúu censo xīhna ñūhún jéé ní casáha de ná ni cuu Cirenio gobernador nación Siria. 3 Te ndivii ñayuu cuanungoo i ná ñuu ná ñuu máá i jeē nácuāha i síhví i. 4 Te suni José ni quenda de ñuu Nazaret, ndañúu Galilea. Te cuanuhun de región Judea, te ni najinū de ñuu Belén, jeē cúu ñuu nuū

ní cacu rey David jenahán. Chi sēhe yucūn David cúu de. ⁵ Te ni jehēn de návāha nacuāha de sīhví de jíin María, chi je yajni quijnáhan ña jíin de. Te ñúhun sēhe ña ni sáha Espiritu Santo. ⁶ Te níni cáhīin de yūcuán te ni jinū quivī jeē cacu sēhe ña. ⁷ Te ni scácu ña sēhe yí nūú ña, te ni chusúcún ña i sahma cuitá, te ni jequin ña i ini ñn nundōo nūú yéji quití, chi tuá núne mesón condee ña.

Jeē ní canecoo ndajéhé yā nuū pastor

⁸ Te yajni ñuu Belén cáhīin tēe cácuu pastor, te cándito de lanchi de ní niñu jecuáa nde yucu ún. ⁹ Te ñn sanaa-ni te ni cane ñn ndajéhé maá Jítoho yō nuū de, te nduva maá Jítoho yō ni ndindēe ní nūú cáhīin de. Te yōhyo ni cayūhú de. ¹⁰ Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jnūhun vāha nuū rō, te sáha jeē cúsi ndasí ni tāca ñáyuu: ¹¹ Chi vijna nde ini ñuu David ni cacu ñn Yaā jnama róhó, te maá Jítoho yō Cristo cúu ya. ¹² Te súcuan nacuni rō sūchi yíquin un, chi ñúsúcún i sahma cuitá te cátú i ini ñn nundōo nūú yéji quití. Achí yá.

¹³ Te ñn sanaa-ni te ni canecoo cuehē gā ndajéhé andiví, cáhīin ya jíin ndajéhé un, te cácahān yā jeē yóhyo vāha Yaā cúu Yaā Dios. Te achí yá:

¹⁴ Yōhyo luu cújéhu Yaā Dios nde nuū sucún.

Te na ndúvāha ni tāca ñáyuu ñayīvi, sáha ya jeē cúsi ni yā jíin i. Achí táca ndajéhé.

¹⁵ Yūcuán na te cuanungoo ndajéhé un andiví. Te tēe cácuu pastor ni cacahān de jíjnáhan de:

Na quihín yō nde ñuu Belén, te cuni yō na vé ni cuu jeē ní castūhun maá Jítoho yō nuū yō, achí de.

¹⁶ Te yachī cuangoo de, te ni nanihīn de María jíin José jíin súchi yíquin un, cátú i ini nundōo nūú yéji quití. ¹⁷ Te nuū ní cajini de nuū i, te ni canacani de jnūhun jeē ní cachi ndajéhé yā nuū de siquī sūchi yíquin un. ¹⁸ Te ni canaa ni tāca ñáyuu

cájini nahín i jnūhun cácahān tēe cácuu pastor. ¹⁹ Te María, ni quendōo tāca jnūhun yāha nuū jeē níjnūní ña, te nācani ni ña siquī. ²⁰ Te tēe cácuu pastor cuanungoo de, te ni cacahān de jeē yóhyo vāha Yaā cúu Yaā Dios siquī tāca jēe ní cajini sōho de jíin jēe ní cajito de, chi ni squícu nahín nájñūhun ni cahān ndajéhé yā jíin de.

Jeē ní castéén de i nuū Yaā Dios ini templo

²¹ Te ni cuu unā quivī jeē ní cacu ya, te ni casáha de circuncidar sūchi yíquin un. Te ni casnání de i Jesús, chi sīhví yúcuan ní cachi ndajéhé yā nuū María nde ná tu jecūhun i.

²² Te ni jīnu quivī jeē casquícu ña costumbre jeē ndúndoo ña nuū Yaā Dios jijnáhan ña, nájñūhun cáhān ley jeē ní jéhe ya nuū Moisés. Te ni jengoo de jíin i ñuu Jerusalén jeē nācuāha de i nuū maá Jítoho yō Yaā Dios. ²³ Súcuan ni casáha de, chi yósó nūú tútu ley yā: Tāca súchi yí nūú jēe cácacu, quihí cuenta i nuū Jítoho yō Yaā Dios, achí tutu. ²⁴ Te suni cuasocō de nájñūhun cáhān ley maá Jítoho yō: Socō rō uū livi chí úu paloma, achí tutu.

²⁵ Te ni iyo ñn tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún vāha nuū Yaā Dios cúu de. Te ñúhun ni de jeē quée maá Yaā jnama ñayuu nación de Israel. Te maá Espiritu Santo íyó yá jíin de. ²⁶ Te je ni castūhun yá nuū de jeē ma cúu cuití de chi nde coto de nuū Cristo jeē tají maá Jítoho yō Yaā Dios. ²⁷ Te ni steén yā nuū de jeē quihín de templo quivī ún. Te suni tátá naná sūchi yíquin Jesús, ni quivícoo de ini templo jíin i, jeē nācuāha de i nuū Yaā Dios nájñūhun cáhān ley Moisés. ²⁸ Te Simeón ni ñunundee de i, te ni cahān de jeē yóhyo vāha Yaā cúu Yaā Dios, te achí de:

²⁹ Tátá Yaā Dios, vijna te cuu cuāha ni jnūhun jeē cuu ná, chi je ni cusí ni ná.

Chi je ni squícu ní jnūhun ni jejnūhun ní nūú sãña jēe cúu ná mozo ni.

30 Chi ni jito jínū na nú Yaā jnáma sãña jínáhan ná.

31 Chi ni jeni ní yá jeē jnáma ya tāca ñáyuu ñayiví.

32 Te máá yá sáha jeē cündijin ini anuá ñayuu tācá nación, nāvāha jecūhun ni i siquī ní.

Te sáha ya jeē cujéhnū ñayuu maá ní Israel.

Achí Simeón.

33 Te José jín náná i cánaa ni de cájini nahín de jnūhun ni cahān Simeón siquī i. 34 Te ni jicān tahu Simeón jehē de jínáhan de, te ni cahān de jín náná i María:

Sūchi yáha vēji i jeē candíje cuehē ñayuu nación yō Israel, te cācu i jínáhan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichī ni cuehē ñayuu i. 35 Te súcuan te quenda ndijin ndese cájini ni tāca ñáyuu. Te máá ró chi jnahuhū ndasí ni rō coto ró jéé ndóho i. Achí Simeón.

36 Te suni íne ñn ñahan nácani jnūhun Yaā Dios, naní ña Ana. Te sēhe Fanuel, yucūn Aser cúu ña. Te je jéhnū ndasí ña. Te nde ná lulí ña te ni condee ña jín yí ña uxā cuiyā. 37 Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe ii, chi jéjníñu ña nuū Jítoho yō Yaā Dios nduú ñuú, te ndite ni ña te jícán tahu ña. 38 Te suni hora un ní quee ña, te ni nacuatáhú ña nuū Yaā Dios. Te ni cahān ña jnūhun sūchi yíquín un jín táca ñáyuu Jerusalén jeē cáñuhun ni i jeē quée Yaā jnama i.

Jeē cuáungoo de ñuu Nazaret

39 Te ni jinu ni casquícu de tācá jniñu ndácu ley maá Jítoho yō Yaā Dios, te cuanungoo de ñuu de Nazaret, ndañū Galilea. 40 Te sūchi lulí un ní jehnu i, te ni ije i, te ni cundíchí gá i. Te ni sáha Yaā Dios jeē váha ndasí jín i.

Jeē íne sūchi lulí Jesús ini templo

41 Te ndijnahan cuiyā jéngoo tátá i náná i ñuu Jerusalén, jeē cúu vico pas-cua. 42 Te nuū ní cuu uxī uū cuiyā i, te cuangoo tucu de Jerusalén, nájñuhun sáha sáha de quiví vico ún. 43 Te ni

yáha vico, te cuanungoo de. Te sūchi lulí Jesús, ni quendōo i Jerusalén, te tu ní cájini José jín náná i. 44 Te cájini ni de jeē cuahán i mēhñu ñáyuu cájica ichi ún. Te ni cajica de ñn quiví, te sáa te ni cananducú de i mēhñu táca jnáhan de jín ñáyuu cájini jnáhan de jín. 45 Te tu ní cánanihín de i. Te ni canandicó de cuangoo de Jerusalén, cuananducú de i.

46 Te nuū uní quiví te ni cananihín de i ini templo, néne i mēhñu téé cástéén tutu ley Yaā Dios, te jini nahín i jeē cácahān de te cájnūhún i de siquī jnūhun ún. 47 Te tāca ñáyuu cájini jnūhun cáhán i, cánaa ni cájito jeē váha cájí xíní i te vāha nástíó cuiñí i jnūhun. 48 Te nuū ní cajito tátá i náná i nuū i, te ni canaa ni de. Te ni cahān naná i jín i:

Séhē, ¿naun ni sáha ró súcuan jín rí? Chi ruhū jín tátá rō, yōhyo ni canacani ni rī cananducú rí rohó, achí ña.

49 Yūcuán na te ni cahān i:

¿Naun cananducú ní sãña? ¿A tu cájini ni jéé cánuú cocu ná jín jniñu Tátá na Yaā Dios? Achí i.

50 Te tu ní cájecūhun ni tátá i náná i jnūhun ni cahān i.

51 Yūcuán na te cuanuhun i jín de jínáhan de ñuu Nazaret, te ni jendije i nuū de. Te náná i, ni quendōo tāca jnūhun yáha núu jeē níjnūní ña. 52 Te Jesús ni jehnu ga i, te ni cundíchí gá i, te cúshí ni Yaā Dios jín i, te suni súcuan tāca ñáyuu.

Jnūhun Juan tēe scuándute

(Mt. 3.1-12; Mr. 1.1-8; Jn. 1.19-28)

3

1 Te ni cuu xahūn cuiyā jeē ndácu Tiberio jniñu ní nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jín Traconite, te Lisnias cúu de gobernador Abilinia. 2 Te sutū cujéhnū ga cácuu Anás jín Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñūhun téhé. 3 Te ni jica nuu de tācá ñuu jeē

iyó yajni yūte Jordán. Te cáhán de jíin ñáyuu jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuéchi i. ⁴ Te súcuan ni squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenahán:

Coo ñn tēe cana jee nde nuū ñūhun téhé:

Sátūhva ró máá ró jijnáhan ró, chi quee máá Jítóho yō.

Te sáha ró jniñu ndaā, chi vēji ya.

⁵ Te tāca xéhvā na ndúndaā, te tācá yucu jíin loma na ndúnduhvā, te na ndúyóhó ichi yácuá, te na ndúlñi ichi ndáyí.

Te ndihí un cúu jeē ndúvāha ndundaā anuá ñayuu nuū yā.

⁶ Te ndihí i cuni i jeē jnáma Yaā Dios i. Súcuan cahān Juan, achí tutu.

⁷ Te ni quendacoo cuehē ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájñūhun coō. ¿A cájeni ni rō jeē cuu cunu ró cācu ró núu castigo xeēn jeē quíji? ⁸ Núu súcuan te sáha ró jniñu váha, te súcuan stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cācu ró síquī jeē cácuu ró yúcūn Abraham. Chi cáhán rī jíin ró jeē cuu sáha Yaā Dios jeē tāca yūū yáha nduu sēhe Abraham jeē candíje váha, te núu cúní yā.

⁹ Te cácuu ró nájñūhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñūhun je íyó túhva ñn cāa jeē cahnde nde yoho yujnu. Núu súcuan te sáha ya jíin ró nájñūhun jíin táca yujnu jeē tu cúun ndehē váha, jeē tahndé te cayū nuū ñuhún. Achí de.

¹⁰ Te ñayuu un ní cacajñūhún i de:

¿Te ndese sáha ná núu súcuan? Achí i.

¹¹ Te ni cahān de:

Róhó jéē cánevāha uū sahma, na cuáha ró ñn nuū jeē tu névāha. Te róhó jéē cánevāha jeē yéji, suni súcuan na sáha ró, achí de jíin i.

¹² Te suni jecu tēe cástútú xūhun renta, ni quecoo de jeē cuándute de. Te ni cacajñūhún de Juan:

Maestro, te máá ná, ¿ndese sáha ná jíjnáhan ná?

¹³ Te ni cahān Juan jíin de:

Ma scaá ró cácan rō xūhún, chi máá cúhva-ni jeē ní ndacu jniñu nuū rō, achí de.

¹⁴ Te suni ni cacajñūhún jecu soldado:

Te máá ná, ¿ndese sáha ná jíjnáhan ná? achí de.

Te ni cahān Juan jíin de:

Ma quénde rō ndajñiñu ni ñn jíin jnūhun siúhú ni jíin jnūhun stáu yáhu, te cusñi ni rō jíin yáhu ró, achí de.

¹⁵ Te tāca ñáyuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan. ¹⁶ Te ni cahān Juan jíin i jíjnáhan i:

Ruhū chí jíin ndute scuándute ri rohó. Te vēji ñn Yaā jeē nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhún. Te cújéhnu ndasí yá, chi tú na vé jéhnu cuiti cúu ri nuū yā, ni jeē cuajniñu ri nuū yā vésú ñn jniñu lúli gá nájñūhun jeē ndají rí vésú correa ndijēn yā. ¹⁷ Te sáha ya nájñūhun sáha tēe scánda trigo, chí sásñn ya ñayuu váha jíin ñáyuu cunéé, nájñūhun cúndoo trigo jeē quénda sñn paja. Te nastútú yá trigo yā ndiví ini yacā yā. Te paja chí jnaa yā nuū ñuhún jeē ma ndahvá cuiti. Achí Juan.

¹⁸ Te súcuan te jíin cuéhē gā jnūhun ni stihví ni de ñayuu un, ní nacani de jnūhun váha Yaā Dios nuū i. ¹⁹ Te suni ni cahān xeēn de nuū Herodes, tēe cúu gobernador, chí tēe un ní nacueca de Herodías, ñasihí ñani de Felipe. Te cuehē gā jniñu néé súcuan ni sáha Herodes. ²⁰ Te sa víhyá gā ni sáha de jeē neé gá, chí ni chune de Juan vecāa.

Jeē ní jendute Jesús

(Mt. 3.13-17; Mr. 1.9-11)

²¹ Te nde ná tu quívi Juan vecāa, ná ni ine de ni scuándute de tāca ñáyuu, te suni ni scuándute de Jesús. Te jícan tahu yā, te ni nune-ni andiví. ²² Te ni

cuun Espíritu Santo ni quee xinī yā, te cáa nájñūhun ñn paloma. Te ichi ándiví ní cahān ñn jñūhun:

Máá ró cúu Sēhe ri jeē maní ndasí rí jín, te yōhyo cúsiñ ni rí jín ró, achí.

Lista ñayuu yucūn ní quiji Jesucristo (Mt. 1.1-17)

²³ Te ná ni quejéé Jesús steén yā jñūhun, te íyó yá nájñūhun ocō uxī cuiyā. Te cájeni ni ñayuu jeē sēhe José cúu ya. Te José ni cuu sēhe Elí, ²⁴ te Elí ni cuu sēhe Matat, te Matat ni cuu sēhe Leví, te Leví ni cuu sēhe Melqui, te Melqui ni cuu sēhe Jana, te Jana ni cuu sēhe José, ²⁵ te José ni cuu sēhe Matatías, te Matatías ni cuu sēhe Amós, te Amós ni cuu sēhe Nahum, te Nahum ni cuu sēhe Esli, te Esli ni cuu sēhe Nagai, ²⁶ te Nagai ni cuu sēhe Maat, te Maat ni cuu sēhe Matatías, te Matatías ni cuu sēhe Semei, te Semei ni cuu sēhe José te José ni cuu sēhe Judá, ²⁷ te Judá ni cuu sēhe Joana, te Joana ni cuu sēhe Resa, te Resa ni cuu sēhe Zorobabel, te Zorobabel ni cuu sēhe Salatiel, te Salatiel ni cuu sēhe Neri, ²⁸ te Neri ni cuu sēhe Melqui, te Melqui ni cuu sēhe Adi, te Adi ni cuu sēhe Cosam, te Cosam ni cuu sēhe Elmodam, te Elmodam ni cuu sēhe Er, ²⁹ te Er ni cuu sēhe Josué, te Josué ni cuu sēhe Eliezer, te Eliezer ni cuu sēhe Jorim, te Jorim ni cuu sēhe Matat, ³⁰ te Matat ni cuu sēhe Leví, te Leví ni cuu sēhe Simeón, te Simeón ni cuu sēhe Judá, te Judá ni cuu sēhe José, te José ni cuu sēhe Jonán, te Jonán ni cuu sēhe Eliaquim, ³¹ te Eliaquim ni cuu sēhe Melea, te Melea ni cuu sēhe Mainán, te Mainán ni cuu sēhe Matata, te Matata ni cuu sēhe Natán, ³² te Natán ni cuu sēhe David, te David ni cuu sēhe Isaí, te Isaí ni cuu sēhe Obed, te Obed ni cuu sēhe Booz, te Booz ni cuu sēhe Salmón, te Salmón ni cuu sēhe Naasón, ³³ te Naasón ni cuu sēhe Aminadab, te Aminadab ni cuu sēhe Aram, te Aram ni cuu sēhe Esrom, te Esrom ni cuu sēhe Fares, te Fares ni cuu sēhe Judá, ³⁴ te Judá ni cuu sēhe Jacob, te Jacob ni cuu sēhe Isaac, te Isaac ni cuu sēhe Abraham, te Abraham ni cuu sēhe Taré, te Taré

ni cuu sēhe Nacor, ³⁵ te Nacor ni cuu sēhe Serug, te Serug ni cuu sēhe Ragau, te Ragau ni cuu sēhe Peleg, te Peleg ni cuu sēhe Heber, te Heber ni cuu sēhe Sala, ³⁶ te Sala ni cuu sēhe Cainán, te Cainán ni cuu sēhe Arfaxad, te Arfaxad ni cuu sēhe Sem, te Sem ni cuu sēhe Noé, te Noé ni cuu sēhe Lamec, ³⁷ te Lamec ni cuu sēhe Matusalén, te Matusalén ni cuu sēhe Enoc, te Enoc ni cuu sēhe Jared, te Jared ni cuu sēhe Mahalaleel, te Mahalaleel ni cuu sēhe Cainán, ³⁸ te Cainán ni cuu sēhe Enós, te Enós ni cuu sēhe Set, te Set ni cuu sēhe Adán, te Adán ni cuu sēhe Yaā Dios, chí ni sáha ya de.

Jeē ní jito ndee jexeén Jesús (Mt. 4.1-11; Mr. 1.12-13)

4

¹ Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū yā nde nuū ñūhun téhé ní sáha Espíritu Santo. ² Te ni ine ya yūcuan úu xico quiví, te ni jito ndee jexeén yā, chí cúní jeē sáha ya cuēchi. Te táca quíví ún tu ní yéji cuiñi yā, te ná ni yāha quiví ún, te jí yā sōco. ³ Yūcuán na te ni cahān jexeén un jín yá:

Núu máá ró cúu Sēhe Yaā Dios, te cahān rō jeē yuū yáha na ndúu staā caji rō, achí.

⁴ Te ni cahān Jesús jín:

Tuú chí yósó núu tútu ñ: Nasūu máni máá jín stáa cátecu ñayuu, chí suni jín táca jñūhun cáhān Yaā Dios, achí yá.

⁵ Yūcuán na te cuahān jexeén un jín yá nde xinī ñn yucu súcún, te ñn núnúu-ni ni steén nuū yā táca nación ní cáhnu ñayiví. ⁶ Te ni cahān jín yá:

Nuū máá ró cuāha ri jeē kujéñu rō núu ndivii nación yáha, chí yōhyo luu cáa. Chí máá rí jñí ndihí, te cuu cuāha ri nuū ndé ñn cúní rí. ⁷ Núu súcuan te núu cuiñi yítí ró chíñúhún ró ruhū, te cuāha ndihí ri nuū rō. Achí jexeén.

⁸ Te ni cahān Jesús jín:

Satanás, cujiyo quihñ rō, chí yósó núu tútu jeē chíñúhún ñayuu máá

Jítóho i Yaā Dios, te nuū maá-ni ya cuajníñu i. Achí yá.

⁹ Yūcuán na te cuahān jexeén un jíin yá nde ñuu Jerusalén. Te ni jeni ya xinī torre templo. Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñúhun, chí jnama ya rohó. ¹⁰ Chi yósó núu tútu: Tejniñu ya ndajéhé yā quijicoo coto rohó.

¹¹ Te cunundee yā rohó jíjnáhan ya, návāha ma cáchihi ró jéhē rō nuū yuú. Achí tutu. Achí jexeén.

¹² Te ni cahān Jesús:

Tuú chí suni yósó núu tútu jeē ma coto ndee ñayuu Jítóho i Yaā Dios, núu jnama ya i chí tuú, áchí yá.

¹³ Te tuá ni níhín jexeén modo coto ndee Jesús quiṽi ún, te ni cujiyo cuahān jecu-ni tiempo.

Jeē ní quejéé Jesús nácani ya jnūhun región Galilea

(Mt. 4.12-17; Mr. 1.14-15)

¹⁴ Te ni cunuú fuerza Espíritu Santo ini Jesús, te cuanuhun yā Galilea. Te ní región yajni yūcuan ní jitē núu jnūhun ya. ¹⁵ Te ni steén yā jnūhun ini tācá vehe iī sinagoga, te ndihi ñayuu ni cajejnúhún i ya.

Jeē cuánuhun yā ñuu Nazaret

(Mt. 13.53-58; Mr. 6.1-6)

¹⁶ Te ni najinū yā ñuu Nazaret nuū ní jehnu ya. Te quiṽi ndétátú ni quiṽi ya ini vehe iī sinagoga, nájnūhun sáha sáha ya. Te ni ndocuiñi yā jeē cahu ya tutu iī. ¹⁷ Te ni cajēhe de tutu ni tee Isaías, tēe ni nacani jnūhun Yaā Dios nde jenahán. Te ni nune ya tutu ún, te ni nanihín yā nuū yosó jnúhun ni cahu ya:

¹⁸ Espíritu maá Jítóho yō Yaā Dios iyó yá jíin rí,

chí ni tejniñu ya ruhū jeē nácani ri jnūhun vāha nuū ñayuu ndahú.

Te ni tají yá ruhū vēji ri jíin jnúhun jeē ndúvāha ni ñayuu cácuíhyá ni.

Te castūhun rí nuū ñayuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni,

te jnama ri ñayuu jeē cándoho i sáha jnáhan i.

¹⁹ Te nacani ri jnūhun jeē ní quee tiempo jeē sáha Jítóho yō Yaā Dios jeē váha ñayuu.

Achí tutu ni cahu ya.

²⁰ Te ni nacasi yā tutu ún, te ni nacuāha ya nuū téé jéjníñu ini sinagoga, te ni nucōo ya jeē steén yā jnūhun nuū ñayuu cáhīn ini sinagoga. Te tācá i cájito vāha i nuū yā. ²¹ Te ni quejéé yá cahán yā jíin i:

Vijna te ni squícu jnūhun cáhán tutu iī yāha ní cajini sōho ró, áchí yá.

²² Te ndivii i ni cacahān jeē váha tēe cúu ya, te cánaa ni i jeē ní cajini i tāca jnúhun luu ni cahān yā. Te ni cacajnūhun jnáhan i:

¿A násūu séhe José cúu tēe yáha?

²³ Te ni cahān yā jíin i:

Jíní vāha ri jeē cájeni ni rō cahān rō jnūhun yátá yáha jíin rí: Tēe tájné, sátájné ró maá ró núu súcuan. Te jnūhun yáha cúni cahān jeē nájnūhun ni nasávāha ri cuehē ñayuu cácuñu ini ñuu Capernaum ni canihín rō jnūhun, suni súcuan na sáha ri ñuu yō yáhá návāha candíje ró cájeni ni rō. Achí yá jíin i.

²⁴ Te ni cahān gā yā:

Jendaá cahán rī jíin ró, ni ñn tēe nácani jnūhun Yaā Dios, tu cájetáhú ñayuu ñuu maá de nuū de. ²⁵ Te suni jendaá cahán rī jíin ró jeē ní íyo cuehē ñahan ní ndóo ndáhú ini nación yō Israel, tiempo ni cotecu Elías, tēe ni nacani jnūhun Yaā Dios. Te tiempo un tu ní cúun cuiṽi saū unī cuiyā yosáva, te ni íyo ñn jnamā xeēn ní cáhnu nación. ²⁶ Te tu ní tájé Yaā Dios Elías quihín de nuū ni ñn ñahan viuda nación yō Israel, chí nuū máá ñn-ni ñahan viuda jeē ndeé ñuu Sarepta ndañū Sidón, ni jehēn de ni jito de jeē ní yeji ña. ²⁷ Te ini nación yō Israel suni ní íyo cuehē tēe ni candoho cuehyí stehyú, tiempo jeē ní cotecu Eliseo, tēe ni nacani jnūhun Yaā Dios. Te ni ñn de tu ní cándíje jeē ndúvāha de sáha Eliseo, chí sa suhva máñúhún-ni

Naamán, tēe nación Siria ni nduvāha. Achí yá.

²⁸ Yūcuán na te tāca ñáyuu cáhīn ini sinagoga, yōhyo ni caquītī ni i jnūhun ní cahān yā. ²⁹ Te ni candocuiñī i, te ni caquenehen i ya yatā ñūū ún, cuahān i jīn yá xinī yúcu íne ñuu ún, chi cáconi i chundahá i ya ñinga ya cava ún. ³⁰ Te tu ní cúu sáha i, chi ni yāha-ni ya mēhñú i cuahān yā.

Jeē ní quenehen ya tachī ini ñn tēe
(Mr. 1.21-28)

³¹ Yūcuán na te cuahān Jesús ñuu Capernaum región Galilea. Te quivī ndétātu ní steén yā jnūhun nuū ñáyuu. ³² Te ni canaa ni i cájini i jnūhun steén yā. Chi ni steén vāha ya nuū i, chi jíní vāha máá yá.

³³ Te ini vehe sinagoga un íne ñn tēe jeē ñūhun tachī xeén ini de. Te tēe un ní cana cóhó de:

³⁴ Cujiyo ní. ¿Naun vēji ní nuū na jínáhan ná, Jesús ñuu Nazaret? ¿A véji ní jéē snāā ni sáña, chí naún? Je jíní na ndé ñn cúu ní, chí Sēhe ī Yaā Dios cúu ní. Achí de.

³⁵ Te Jesús ni cahān xeén yā nuū tachī ún:

Casi yuhu ró te quenda ró ini tēe yāha, áchí yá.

Te ni cotúú-ni tēe un núū tāca ñáyuu, ni sáha tachī ún. Te ni quenda ini de cuahān, te tú na vé ni sáha ga jīn de.

³⁶ Te ndihí ñayuu un ní cayūhú i, te ni cacahān i jín jnāhan i:

¿Na jnūhun cúu yāha jéē ní cuu súcuan? Chí cújēhnu tēe yāha jéē ndácu ñihin de jniñu nuū tachí, te quéndacoo-ni, áchí i.

³⁷ Te jnūhun ya ni jitē núu cuahān ní cáhnu región yūcuán.

Jeē ní nasávāha ya naná chīsó Simón Pedro
(Mt. 8.14-15; Mr. 1.29-31)

³⁸ Yūcuán na te ni quenda Jesús ini vehe ī sinagoga, te cuahān yā te ni jinū yā vehe Simón. Te náná chīsó Simón, yíhí xeén quíji ña, te ni cacahān ndahú de jín yá jehē ña. ³⁹ Te ni jīta ndeyi ya nuū ña, te ni cahān yā jeē na ndíco quíji ún. Te ni nduvāha-ni ña. Te

ni ndocuiñī-ni ña, te ni sáha ña jeē ní yeji yā jīn de.

Jeē ní nasávāha ya cuehē ñayuu
(Mt. 8.16-17; Mr. 1.32-34)

⁴⁰ Te jeē ni quée niāndii, te tāca ñáyuu jeē iyó jnāhan i cácuñū ndinuū cuehyī, ni caquindeca i jnāhan i un núu yā. Te ni soó yá ndaha ya siquī ñn ñn i, te súcuan ni nasávāha ya i. ⁴¹ Te suni cuehē ñayuu ni quendacoo tachī ini i, te cácana cóhó táchí ún:

Máá ní cúu Sēhe Yaā Dios, achí.

Te ni cahān xeén yā nuū, te tu ní jéhe ya jnūhun jeē cahán gā súcuan, chí cájini jeē maá yá cúu Cristo, Yaā ní tají Yaā Dios.

Jeē ní nacani ya jnūhun región Galilea
(Mr. 1.35-39)

⁴² Te nuū ní cundijin, te ni quenda ya cuahān sñn ya yatā ñūū nuū tú ñayuu. Te tāca ñáyuu cánanducú i ya, te ni jinūcoo i nuū íne ya. Te cástétu i ya jeē tú cujiyo ya nuū i. ⁴³ Te ni cahān yā jīn i:

Suni cánuú jéē nacani ri jnūhun vāha nuū tāca gá ñuu siquī ndese ndácu Yaā Dios jniñu, chí jeē yúcuán ní tají yá ruhū vēji ri. Achí yá.

⁴⁴ Te ni jica cuu ya ní región Galilea, nácani ya jnūhun ini tācá vehe ī sinagoga.

Jeē ní canihñ de cuehē chācá ni sáha ya
(Mt. 4.18-22; Mr. 1.16-20)

5

¹ Te ñn quivī te íne Jesús yumar Genesaret. Te ni quecoo cuehē ñayuu, te ni chitú ñihin i nuū yā, chí cáconi i cuni nahín i jnūhun Yaā Dios. ² Te ni jito ya jeē yúcu uū barco yajni yumar. Te tēe cájni chācá, je ni quendacoo de ini barco, te cánacate de ñunu de. ³ Te ni quivī ya ini ñn barco jeē cúu barco Simón. Te ni cahān yā jīn de jeē na scáca yátá de quihñ jecu gā nuū ndúte. Te ni cucōo ya, te nde ini barco un ní steén yā jnūhun nuū ñáyuu cuehē jeē yúcu i yundúte un.

⁴ Te nuū ni jínu ni steén yā, te ni cahān yā jíin Simón:

Scáca ró barco na quíhín yō nde nuū iyó cúnú ndute, te sínga ró ñunu ró jñi ró cháca, áchí yá.

⁵ Te ni cahān Simón:

Maestro, ní ñiñu ni casínga ná ñunu jeē jñi ná tí, te tu ní níhín cuítí ná ni ñin tí. Te jeē cahán maá ní súcuan, te na sínga tucu ná ñunu, áchí de.

⁶ Te ni casínga de, te ni quívicoo cuehē ndasí cháca, nde nducú táhndē ñunu de. ⁷ Te ni cacaja ndahá de nuū jnáhan de cáhīn ini inga barco, na quíjicoo chindéé ñájnañan jíin de. Te ni quecoo de, te ni cascútú ndí de ti ndíndúú barco, te nde je yajni quēe barco. ⁸ Te ni jito Simón Pedro jeē súcuan ni cuu. Te ni jecuíñi yítí de nuū Jesús, te ni cahān de:

Cujiyo ní núu ná, chi tēe iyó cuéchi cúu ná, áchí de.

⁹ Chi máa de jíin táca tēe cáhīn jíin de, ni cayūhú de jeē ní canihīn de cuehē chācá un ní sáha ya. ¹⁰ Te suni ni cayūhú Jacobo jíin Juan, ndíndúú séhe Zebedeo, chi tēe chindéé ñájnañan jíin Simón cácuu de. Te ni cahān Jesús jíin Simón:

Ma yūhu ró, chi nde vijna te sáha ri jeē nihīn rō cuehē ñayuu candíje ruhū, nájnūhun ni nihīn rō cuehē chācá. Achí yá.

¹¹ Yūcuán na te nuū ni jíinūcoo de jíin barco nuū ñūhun íchi, te ni castóo de ndíhi ndajníñu de, te ni candiquīn de ya cuango de.

Jeē ní nasávāha ya ñin tēe ndóho cuehyī stehyú

(Mt. 8.1-4; Mr. 1.40-45)

¹² Yūcuán na te íne Jesús ini ñin ñuu, te ni quee ñin tēe ndóho cuehyī stehyú. Te ni jito de nuū Jesús, te ni jecuíñi yítí de ni jekuīn de nuū de nde nuū ñūhun, te ni cahān ndahú de jíin yá:

Jíni na jēe cuu sáha ní jēe nduvāha ná, te núu cúní ni, áchí de.

¹³ Yūcuán na te ni soó yá ndaha ya síquī de, te ni cahān yā:

Cúní rī. Te na nduvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un. ¹⁴ Te ni ndacu ya jniñu nuū de jeē ma cáchi cuítí de nuū ní ñin. Te áchí yá:

Quisteén rō maá ró nuū sutú, te condahá ró jeē socó rō nuū Yaā Dios síquī jeē ndúndoo ró núu yā, nájnūhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

¹⁵ Te víhyá gā ni jītē núu jnūhun ya cuahān. Te ni cataca cuehē ñayuu jeē cúni nahín i jnūhun stéén yā, jíin jēe nasávāha ya i nuū táca cuéhyī cándoho i. ¹⁶ Te máa yá cuahān sñn ya nuū tú ñayuu, te ni jicān tahú yā.

Jeē ní nasávāha ya ñin tēe ndóho cuehyī ni íjin

(Mt. 9.1-8; Mr. 2.1-12)

¹⁷ Te ñin quívi te stéén yā jnūhun, te jecu tēe grupo fariseo jíin tēe cástéén tutu ley Yaā Dios, cáyūcú de yūcuán. Te tēe un ní quecoo de nuū yā jeē véjicoo de táca ndañū Galilea, jíin ndañū Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuu. ¹⁸ Yūcuán na te ni quecoo jecu tēe, cándiso de ñin tēe ndóho cuehyī ni íjin, cáttú de nuū ñin camilla. Te cánducú de squívi de tēe ún ini vehe, te caquin de nuū íne ya. ¹⁹ Te tu ní canihīn de modo quívicoo de jíin tēe un, chi cáyūcú chítú ñayuu. Te ni cacao de síquī véhe, te ni canune de teja. Te ni cascúun de tēe cúhú un jíin camilla de nde nuū íne Jesús mēhñu ñayuu. ²⁰ Te ni jini Jesús jeē cácandíje de jeē cúu nasávāha ya tēe cúhú un. Te ni cahān yā jíin tēe cúhú un:

Róhó, je íne cáhnu ni rī nuū táca cuéchi ró, áchí yá.

²¹ Yūcuán na te tēe cástéén tutu ley Yaā Dios jíin tēe grupo fariseo, ni quejé de cájeni ni de síquī yā: ¿Ndé ñin cúu tēe yáha jēe cahán de jnūhun ndevāha jeē quítí ni Yaā Dios? Chi nasūu Yāā Dios cúu de jeē cóne cáhnu ni de nuū cuéchi.

²² Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? ²³ Jeē uú jnūhun yáha, ¿ndé ñn yí gá cáa? ¿A jée cahán rī jín tée cúhú: Je íne cáhnu ni rī nuū tāca cuéchi ró? ¿Chí yí gá jeē cahán rī: Ndocuññi te caca ró, chí je ni nduvāha ró, achi rī? ²⁴ Te vijna te na stéén rī jeē maá rí, Yaā ní nduu tēe, ndíso jniñu ri ini ñayvī yáha jeē cóne cáhnu ni rī nuū cuéchi.

Yūcuán na te ni cahán yā jín tée ni íjin ún:

Cáhán rī jín ró, ndocuññi te naquihin ró camilla rō, te quinhun rō vehe ró, áchí yá jín de.

²⁵ Te ni ndocuññi-ni tēe ún, jito jínúu ñayuu. Te ni naquihin de camilla nuū ni cátu de, te cuanhun de vehe de. Te nácuatáhu de nuū Yaā Dios. ²⁶ Te yōhyo ni canaa ni tāca ñayuu cájito i, te ni cacahán i jeē yōhyo vāha Yaā cúu Yaā Dios. Te suni yōhyo cáyūhú i, te cácahán i:

Vijna te ni cajito yó jniñu jéhu téyí, áchí i.

Jeē ní cana ya Leví

(Mt. 9.9-13; Mr. 2.13-17)

²⁷ Yūcuán na te ni quenda ya cuahán yā, te ni jito ya nuū ñn tēe stútú xúhun renta, naní de Leví, néne de nuū cutútú xúhun renta. Te ni cahán yā jín de:

Condiqñ ruhū na quíhín yō.

²⁸ Te ni ndocuññi de, te ni stóo de ndíhi ndajniñu de, te cuahán de jín yá.

²⁹ Yūcuán na te ni sáha Leví ñn vico cáhnu vehe de, jeē cúsiñ ni de jín Jesús. Te cuehē tēe cástútú xúhun renta jín sava ga tēe, cáyūcú de mesa cáyeji de staā jín yá. ³⁰ Te tēe grupo fariseo jín tēe cástéén tutu ley Yaā Dios, ni quejé de cácahán de síquī tēe cáscuáha jín yá, te ni cacajnūhún de:

¿Najehē cáyeji rō cájhi ró jín tēe cástútú xúhun renta jín tēe cása ha cuéchi? áchí de.

³¹ Te ni cahán Jesús:

Ñayuu cáhīyo vāha, tu jini ñūhún i tēe tájna, chí ñayuu cácuñú cúu jeē jini ñūhún. ³² Te ruhū nasūu jéé véji ri cana ri ñayuu tú cuéchi, jeē cúu i nájnūhun ñayuu cáhīyo vāha. Chí

sa suhva vēji ri cana ri ñayuu cáhīyo cuéchi, jeē na nácani ni i te stóo i cuéchi i. Achí yá.

Jeē ní cacajnūhún de ya síquī jeē cóndite ni

(Mt. 9.14-17; Mr. 2.18-22)

³³ Yūcuán na te ni cacahán de jín yá:

Tēe cáscuáha jín Juan, jín tēe cáscuáha jín grupo fariseo, cuehē jínu cáhīyo ndite ni de te cájicān tahu de. Te tēe cáscuáha jín máá ní, ¿naun tu cása ha de súcuan? Chí cáyeji de cájhi de.

³⁴ Te ni cahán yā jín de:

¿A cuu condite ni de níni jéé iyó rí jín de? ¿A cuu sáha ró jéé condite ni ñayuu cáhīn vico nánda ha, te núu níni néne tēe nánda ha? ³⁵ Te quee quivī jeē cújiyo tēe ni nánda ha, te quivī ún chí condite ni i. Achí yá.

³⁶ Te suni ni cahán yā uū jnūhun yátá síquī jeē tu quíjnahan jnūhun jeé jéé steén yā jín táca jnūhun jenahan. Achí yá:

Ni ñn ñayuu tu jéhn de i ñn pedazo sahma jéé i, te nachuhun i nuū ñn sahma túhú i. Chí núu súcuan te stívi i sahma jéé i, te suni tu quíjnahan jeé jeé un jín jéé tuhú. ³⁷ Te tú ni ñn chúhun vino jeé ini ññi túhú. Chí núu súcuan, te vino jeé un ndatá ññi, te naa vino jín ññi. ³⁸ Chí cánuú jéé chúhun vino jeé ini ññi jéé, te súcuan te quéndōo vāha ndíndúú. ³⁹ Te ñayuu cájhi vino áva, tu cúní i coho i jeé jeé, chí jeé áva cúu jeé vāha ga, áchí i. Achí yá.

Jeē ní cataxín de yoco trigo quivī ndétātú

(Mt. 12.1-8; Mr. 2.23-28)

6

¹ Te ñn quivī ndétātu ní yāha Jesús cuahán yā mēhñú nuū cáa trigo. Te tēe cáscuáha jín yá ni cataxín de yoco trigo, te ni caquñ de ini ndaha de, te ni cayeji de. ² Te sava tēe grupo fariseo ni cacajnūhún de:

¿Najehē casáha ró jniñu jeē tu íyó vāha sáha ró quivī ndétātú?

³ Te ni cahán Jesús jín de:

¿A tu ní cácahu cuiṭi rō tutu ndese ni sáha David, ñn quiṽi jeē ni jíi de sōco jíin tée cáhīn jíin de? ⁴ Te ni quiṽi de ini vehe Yaā Dios, te ni quihin de pan iī jeē yosó ndijin nuū Yaā Dios. Te ni yeji de, te suni ni jēhe de ni cayeji tēe cáhīn jíin de. Te tú na ley jeē cáji ni ñn tēe, chí máá-ni sutū cuu caji. Te vēsú súcuan te tú na cuēchi ní íyo siquī de. Achí yá.

⁵ Te ni cahān gā yā jíin de:

Ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quiṽi ndétátú, áchí yá.

Jeē ní nduvāha tēe ni ichī ndaha
(Mt. 12.9-14; Mr. 3.1-6)

⁶ Te inga quiṽi ndétátú, suni ni quiṽi ya ini vehe iī sinagoga, te ni steén yā jnūhun. Te yūcuan ine ñn tēe ni ichī ndaha váha de. ⁷ Te tēe cástéén tutu ley jíin tée grupo fariseo, cájito yuhu de ya núu nasávāha ya tēe un quiṽi ndétátú, návāha nihīn de cuēchi siquī yā. ⁸ Te máá yá je jíin yā ndese cájeni ni de. Te ni cahān yā jíin tée ni ichī ndaha ún:

Ndocuiñi, te condichi rō mēhñu yáha, áchí yá.

Te ni ndocuiñi de, te ni jecondichi de mēhñú. ⁹ Yūcuán na te ni cahān yā jíin de jíin de de:

Na cájnūhun rí rohó ñn jnūhun: ¿Ndesé cáhán ley siquī quiṽi ndétátú? ¿A jeē sáha váha yó, chí sáha neé yó? ¿A jeē nasávāha yó ñayuu je yajni cuu, chí sáha yó jeé cúu i? Achí yá.

¹⁰ Te ndéhé yá nuū de jeē cáyūcú de ní xiin ya. Te ni cahān yā jíin tée chúu un:

Scáá ndaha ró.

Te ni scaá de, te ni nduvāha-ni ndaha de. ¹¹ Te yōhyo ni caquiñi ni tāca tée un, te ni quejé de cándajnūhún de siquī Jesús, ndese cahni de ya.

Jeē ní nacāji ya uxī uū tēe apóstol
(Mt. 10.1-4; Mr. 3.13-19)

¹² Te ni cuu jecu quiṽi, te ni quenda ya cuacacān tahú yā nde yucu. Te ní niñu ni jicān tahú yā nuū Yaā Dios. ¹³ Te nuū ní cundijin, te ni cana ya tāca tée cáscuáha jíin yá. Te ni nacāji ya uxī uū de, te ni cahān

yā jeē cuu de apóstol, condiso jniñu de nacani de jnūhun ya. ¹⁴ Te yāha cúu síhvī de jíin de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé, ¹⁵ Mateo, Tomás, Jacobo sēhe Alfeo, Simón tēe grupo cananista, ¹⁶ Judas ñani Jacobo, jíin Judas Iscariote, tēe jeē ní nastúu de ya.

Jeē ni steén yā nuū ñayuu cuehē
(Mt. 4.23-25)

¹⁷ Te ni nanuu ya yucu jíin táca tée un jeē cascuáha jíin yá, te ni jecuiñi yā ñn nduhvá jíin de. Te cuehē ñayuu ní región Judea jíin ñuu Jerusalén, jíin ñayuu yumar ñuu Tiro jíin ñuu Sidón, ni quecoo i jeē cúni nahín i jnūhun steén yā, jíin jeē ndúvāha i cuehyi cándoho i. ¹⁸ Te ñayuu jeē ñūhun tachī ini i, suni ni canduvāha i ni sáha ya. ¹⁹ Te ndivii ñayuu cácuni i quehé i ya, chí súcuan ndúvāha i sáha ya jíin poder yā.

Jnūhun ñayuu yōhyo ndetū jíin ñayuu jeē xeēn ndoho
(Mt. 5.1-12)

²⁰ Te ni ndacoto ya nuū tée cáscuáha jíin yá un, te ni cahān yā:

Yōhyo ndetū rohó jeé cándoho ndáhú, chí quiṽi ró ñuu nuū ndácu Yaā Dios jniñu.

²¹ Yōhyo ndetū rohó jeé cáji sōco vijna, chí quiñi quiṽi jeē ndutú chíji rō.

Yōhyo ndetū rohó jeé cándahyū rō vijna, chí quiñi quiṽi jeē cuecú rō.

²² Yōhyo ndetū rō te núu cáquiñi ni ñayuu nuū rō jeē siquí ruhū, Yaā ní nduu tēe, te cáscuáha i rōhó, te cácahān neé i nuū rō, te cácahān i jeē ñayuu casáha jniñu neé cácuu ró. ²³ Te na cóo síi ni rō quiṽi sáha i súcuan, te víhyá gā na cúsiñi ni rō, chí cáhnu téyí coo tahū rō nde andiví. Chí suni súcuan ni casáha uhū tāca jíi i jíin tée ni canacani jnūhun Yaā Dios nde jenahán.

²⁴ Te nacā jeē xeēn ndoho rōhó ñayuu cucá, chí vijna-ni cúu jeē cáhīyo síi ni rō.

²⁵ 'Nacā jeē xeēn ndoho róhó ñáyuu jeē vjna cáhīyo vetū chíji ró, chí quiji quivī jeē cuu rō sōco.

'Nacā jeē xeēn ndoho róhó ñáyuu jeē vjna cájecū rō, chí quiji quivī jeē nducuíhyá ni rō te ndahyū rō.

²⁶ 'Nacā jeē xeēn ndoho tāca ró núu cájejnúhún ñáyuu rohó, chí suni súcuan ni cajejnúhún jíi i tāca tée ni canacani jnūhun stáhú ndé jenahán.

Jnūhun jeē cundáhú ni yō ñayuu cájito uhū yohó

(Mt. 5.38-48; 7.12)

²⁷ 'Te cáhán rī jíin róhó jeē cájini sōho: Cundáhú ni rō ñayuu cájito uhū rohó. Te sáha vāha ró jíin ñáyuu cáquitī ni nuū rō. ²⁸ Te cacān rō jeē váha coo ñayuu cácahān ndevāha síquī rō. Te cacān tahu rō jehē ñáyuu cácahān neé nuū rō. ²⁹ Te núu ndé tée cani de ñin lado yiqui núu rō, te vāha ga suni cuāha ró ñnga lado cani de, vēsú jeē nacūāha ró jēē ndútahū de. Te núu ndé tée cúní de quende de ticāchi ró, suni cuāha ró jnūhun jeē na quíhín de jíin ndé camisa rō. ³⁰ Te na-ni ñayuu jicán nuū rō, te cuāha ró núu i. Te ñayuu quíhin ndajníñu ró, ma nānacān rō. ³¹ Te nájnūhun cáconi rō jeē sáha vāha ñayuu jíin ró, suni súcuan na sáha vāha ró jíin i.

³² 'Chí núu íyó mánī rō jíin máa-ni ñayuu jeē maní jíin ró, ¿te na vé jeē váha ga sáha ró núu súcuan? Chí nde tēe cásáha cuēchi, suni maní de jíin tēe maní jíin máa de. ³³ Te núu sáha vāha ró jíin máa-ni ñayuu jeē casáha vāha jíin ró, ¿te na vé jeē váha ga sáha ró núu súcuan? Chí nde tēe cásáha cuēchi, suni súcuan cásáha de. ³⁴ Te núu cuāha núu ró núu máa-ni ñayuu jeē ñūhun ni rō nacūāha i nuū rō, ¿te na vé jeē váha ga sáha ró núu súcuan? Chí nde tēe cásáha cuēchi, suni jéhe núu de nuū tāca gá tēe cásáha cuēchi, návāha nanihīn tucu de. ³⁵ Núu súcuan te cundáhú ni rō ñayuu cájito uhū rohó, te sáha vāha ró jíin i, te cuāha núu ró núu i. Te ma cuáha ró máa síquī jeē cani ni rō jeē suni nacūāha i nuū rō. Te súcuan te cáhnu coo tahu rō, te stéén rō jeē cácuu ró séhe Yaā cujéhnu

téyí. Chí máa yá vāha ni yā jíin ñáyuu tu nacuatáhú núu yā jíin ñáyuu casáha neé. ³⁶ Núu súcuan te cundáhú ni rō ñayuu, nájnūhun máa Tátá rō cundáhú ni yā i.

Ma cahán yō síquī cuéchi jnáhan yó
(Mt. 7.1-5)

³⁷ 'Ma cahán rō síquī cuéchi ñayuu ndese sáha i, návāha suni ma cahán Yaā Dios cuēchi síquī rō jeē casáha ró súcuan. Ma cahán xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō. ³⁸ Cuāha ró núu ñáyuu, te suni súcuan cuāha Yaā Dios nuū rō. Chí vāha ndasí cuáha ya nuū rō, nájnūhun jeē chícuāha váha ya, quisi ya, sánīhin ya, te nde scáa ya cuāha ya nuū rō. Chí cūhva jeē cájēhe ró núu ñáyuu, suni cūhva un cuáha ya nuū rō. Achí yá.

³⁹ Te ni cahán yā ñin jnūhun yátá jíin i:

Tēe cástéén jnūhun tú ndaā, cácuu de nájnūhun tēe cuáa. Te ñin tēe cuáa, ¿á cuu stéén de ichi nuū ñnga tēe cuáa? ¿A tú ñingava ndíndúú de ini xehvā? ⁴⁰ ñin tēe scuáha, tu cújéhnu de nuū maestro de. Te tēe scuáha ún, núu je ni cutūhva vāha de, te jinū de coo de nájnūhun maestro de.

⁴¹ 'Te cuēchi jnáhan ró cúu nájnūhun jeē íne ñin yāca lúli tñnū i. ¿Te naun cásáha ró cuenta jeē súcuan, te tu cásáha ró cuenta cuēchi máa ró jeē cúu nájnūhun jeē íne ñin nduhu tñnū máa ró? ⁴² ¿Te naun cácahān rō jíin jnáhan ró: Condetu, na táva rī yāca íne tñnū ró, te tu canacani ni rō jeē íne ñin nduhu tñnū máa ró? Tēe stáhú-ni cácuu ró núu súcuan. Xīhna gā tñnū máa ró tava rō nduhu, te yūcuán na te cuu condēhe váha ró jēē táva rō yāca tñnū jnáhan ró.

Jíin jniñu cásáha ñayuu te nacuni yō ndese ñayuu cácuu i

(Mt. 7.17-20; 12.34-35)

⁴³ 'Tu íyó yujnu váha jeē jéhe ndehē neé, te ni tu íyó yujnu neé jēe jéhe ndehē váha. ⁴⁴ Chí jíin ndéhē jeē jéhe ñin ñin yujnu, te jíiní yō núu yujnu váha

cúu. Chi tu scóyo yó ndehē higo xinī iñu, ni tu scóyo yó ndehē uva xinī yucú zarza. ⁴⁵ Te suni súcuan tēe vāha, cáhán de jnūhun vāha, chi vāha ánuá de. Te tēe sáha néé cáhán de jnūhun néé, chi cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān i.

Siquī uú vehe
(Mt. 7.24-27)

⁴⁶ ¿Najehē cácahān yinūhún ró jín rí: Jitoho ná, áchí ró, te tu cásquicu ró jniñu ndácu ri? ⁴⁷ Tāca ñáyuu vēji nuū rī te jini sōho jnūhun cáhán rī te squícu, na stéén rī nuū rō ndese cúu i. ⁴⁸ Cúu i nájñūhun in tēe jeē ní jeni de vehe de, te ni jete cúnú de nde ni nihīn de toto, te ni jeni de siquī. Te nuū ní ndaa yūte, te ni chundahá vehe ún, te tu ní cánda cuiñi sáha, chi siquī toto ín. ⁴⁹ Te tāca ñáyuu jini sōho jnūhun cáhán rī, te tu squícu i, cúu i nájñūhun in tēe ni jeni de vehe de nuū ñūhun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa iñ-ni. Achí yá jín i jínáhan i.

Jeē ní nasávāha ya mozo capitán
(Mt. 8.5-13)

7

¹ Te nuū ni jinu ni cahān yā ni cajini nahín ñáyuu ún, te cuahān yā ñuu Capernaum. ² Te in tēe nación Roma jeē cúu capitán, íyó in mozo de jeē manī ndasí de jín. Te mozo un cúhú i te je yajni cuu i. ³ Te ni jini capitán jnūhun Jesús. Te ni tají de jecu tēe jénu cándacu jniñu nuū ñáyuu hebreo, cuango de nuū yā jeē cahán ndahú de jín yá jeē na quíji ya sávāha ya mozo de. ⁴ Te ni jinūcoo tēe un núu Jesús, te ni cacahān ndahú ndasí de jín yá:

Chindéé ñahán ní tēe cúu capitán, chi tēe vāha cúu de. ⁵ Chi manī de jín nación yō, te máá de ni ndacu jniñu ni cuvāha in vehe sinagoga cuu yó. Achí de.

⁶ Yūcuán na te cuahān Jesús jín de jínáhan de. Te nuū ní cuyajni ya vehe capitán, te ni tají de jecu amigo de

cuajnahān yā. Te ni cacahān de jín yá:

Achí capitán jeē tu cúní de sájñénu de níhín, chi tu cújénu de jeē quihín ni quívi ní vehe de. ⁷ Jeē yúcuan tu ní sájénu de máá de jeē quíji de nuū ní, áchí de. Te máá jeē cahán-ni ní, te na ndúvāha-ni mozo de, áchí de. ⁸ Chi máá de suni ndíso jniñu de ni casáha tēe cácujeñu ga. Te cújénu de nuū tācá soldado de, áchí de. Te núu cáhán de jín in tēe jeē na quihín de, te cuahān de. Te núu cáhán de jín inga tēe jeē na quíji de, te quíji de. Te núu ndácu de in jniñu nuū mozo de, te sáha i, áchí de. Achí táca tēe un jín yá.

⁹ Te jeē ní jini Jesús jnūhun yáha, te ni naa ni yā. Te ni ndió cóto ya ni cahān yā jín ñáyuu cuehē cándiquin yatā yā:

Jendaá cahán rī jín ró jeē ni nación yō Israel tu ní níhín rī ni in ñayuu candíje níhin súcuan, nájñūhun cándíje tēe ún, vésú tēe nación tu jini jnūhun Yā Dios cúu de. Achí yá.

¹⁰ Te tēe ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

Jeē ní nastécu yā sēhe yññahan viuda

¹¹ Yūcuán na te cuahān yā in ñuu naní Naín. Te tēe cáscuáha jín yá, jín ñáyuu cuehē, suni cuango i jín yá. ¹² Te ná ni cuyajni ya yuñú ún, te yūcuán ní quendacoo ñayuu jeē quíchindūji i in tēe suchí jéé ni jihī. Te máñúhún-ni i nuū naná i, te ñahan viuda cúu ña. Te cuehē ñayuu ñuu un véjicoo jín ña. ¹³ Te ná ni jito máá Jitoho yō nuū ña, te ni cundáhú ni yā ña, te ni cahān yā jín ña:

Ma ndahyú ni, áchí yá.

¹⁴ Yūcuán na te ni jinū yā nde nuū ndíyi ún, te ni jñi ya yejnū, te ni cajeciñi tēe cándiso ún. Te ni cahān yā jín súchi ní jihī:

Cáhán rī jín ró, ndocuiñi, achí yá.

¹⁵ Yūcuán na te ni nucōo súchi ní jihī ún, te ni quejéé i nácahān i. Te ni nacuāha ya i nuū naná i. ¹⁶ Te ndivii ñayuu ni cayūhú i jeē ní cajito i, te ni

cacahān i jeē yóhoyo vāha Yaā cúu Yaā Dios. Te cacahān i:

Mēhñu yó ni quee ñn tēe cújēhnu nácani jñūhun Yaā Dios.

Te suni cacahān i:

Máá Yaā Dios ni quejéé yá chindéé ñáhán yá ñayuu yā. Achí i.

¹⁷ Te ni jitē núu jñūhun ya ní cáhnu región Judea jíin táca región yajni yūcuán.

*Jeē ní tají Juan uū tēe nuū yā
(Mt. 11.2-19)*

¹⁸ Te íne Juan vecāa, te tēe cáscuáha jíin de ni cacastūhun núu de jeē súcuan ni cuu táca jñiñu yáha. ¹⁹ Te ni cana Juan uū tēe ún, te ni tají de cuango nuū Jesús, návāha cajñūhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga. ²⁰ Te ni jinūcoo tēe un núu yā, te ni cacahān de:

Juan tēe scuándute ni tají de sãña véjicoo ná cajñūhun ná nihín núu máá ní cúu Cristo jeē achí tutu jeē quíji, chí condetu yó inga tēe quiji. Achí de.

²¹ Te máá hora un ní nasávāha ya cuehē ñayuu cácuñu, jíin ñayuu cándoho cuehyī xeēn, jíin ñayuu ñūhun tachī ini. Te suni cuehē ñayuu cuaá ní ndundijin tñūú i ni sáha ya. ²² Te ni cahān yā jíin de:

Cuángoo te castūhun ró nuū Juan táca jñiñu ni cajito ró jíin jñūhun ni cajini ró. Te cachi ró nuū de jeē ñayuu cuaá cánanune tñūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jñūhun nuū ñayuu ndahú jéé jnama Yaā Dios i. ²³ Te yóhoyo ndetū tēe jeē ma nácani yátá ni de jeē ruhū cúu Cristo. Súcuan cachi ró nuū Juan. Achí yá jíin de.

²⁴ Te ná cuanuhun ndindúú tēe ún, te ni quejéé Jesús cahán yā jñūhun Juan jíin ñayuu:

¿Na vé ni jécondēhe ró jijnáhan ró ndé nuū ñūhun téhé? ¿A ñn tēe jéni ñn jéni uū ni, nájñūhun ite jeē cánda sáha tachī? ²⁵ Te núu tuú, ¿te na vé ni jécondēhe ró núu súcuan? ¿A

ñn tēe cúni cújēhnu jeē ñūhun sahma lúu? Tuú chí cájini ró jeē tēe cáñuhun sahma lúu te cánducú táca jéé cúsn̄ ni, máni ini vehe rey cáyūcú de. ²⁶ ¿Te na vé ni jécondēhe ró núu súcuan? ¿A ñn tēe nácani jñūhun Yaā Dios? Cáhán rī jíin ró jeē suu ni jécondēhe ró. Te cújēhnu ga Juan yáha vēsú táca gá tēe ni canacani jñūhun Yaā Dios. ²⁷ Chí jñūhun Juan cúu jeē ni cáhán Yaā Dios jeē yosó núu tútu ñ:

Tají rí tēe nacani jñūhun ri cosnūú de ichi núu Cristo,

návāha coo tūhva ñayuu jeē jinú yā.

Achí Yaā Dios, achí tutu. ²⁸ Te cáhán rī jíin ró jeē ini ñayīvi yáha cújēhnu ga Juan tēe scuándute vēsú táca gá tēe jeē ni íyo ini ñayīví. Te vēsú súcuan te táca tēe núu ga ini ñuu nuū ndácu Yaā Dios jñiñu, cújēhnu ga de vēsú Juan. Achí yá.

²⁹ Te táca ñayuu jíin táca tēe cástútú xūhun renta, ni cajini i jñūhun cáhán yā, te ni cajetáhú i jeē Yaā ndaá cúu Yaā Dios, chí je ni cajendute i nuū Juan. ³⁰ Te tēe grupo fariseo jíin tēe cástéén tutu ley, ni casquéhichī de jñūhun jeē cúni Yaā Dios sáha ya jeē váha de, chí tu ní cájendute de nuū Juan. ³¹ Te ni cahān gā maá Jítóho yō:

Yáhá cachi rī ñn jñūhun yátá návāha na cúni ró ndese cúu ñayuu tiempo vijnā. ³² Cúu i nájñūhun sūchi lúli cáhīin nuū yáhu cácasíquí i. Te cácana ndee i xinī jnáhan i: Ní cativi rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū ró, achí i. Te nájñūhun cándāa sūchi lúli un jéé tu ní núnjahan ni i ni ñn, suni súcuan cándāa ró. ³³ Chí ni quiji Juan tēe scuándute, te cuehē jínu ni íyo ndite ni de, tu ní yéji de staā ni tu ní jíhi de vino. Te tu ní cánujnahan ni ró, chí ni cacahān ró jeē ñūhun tachī ini de. ³⁴ Yūcuán na te ni quee máá rí, Yaā ní nduu tēe, te yéji rī jíhi ri, te tu cánujnahan ni ró, te chísoó jñūhun ró cacahān ró jeē máni máá jéé yéji rī jíhi ri vino. Te quíjnahan ri jíin tēe cástútú xūhun renta jíin táca gá tēe cása cuēchi, achí ró. ³⁵ Te núu cúndichí ñn tēe jíin jñūhun Yaā Dios, te

jíin jniñu sáha de te cájini tāca gá tēe ndíchí jeē ndichí de. Achí yá.

Jeē íne Jesús vehe Simón tēe fariseo

³⁶ Te ñin tēe fariseo ni cana de Jesús jeē cáji yā staā jíin de. Te ni jinū yā vehe de, te ni cucōo ya mesa jeē cáji yā staā. ³⁷ Yūcuán na te ñin ñahan sáha cuēchi, ndéé ña ñuu yúcuan, te ni jini ña jeē ni jíin Jesús vehe tēe fariseo un, yéji yā staā. Te ni quee ña jíin ñin frasco yuū luu jeē ñūhun chitú aceite perfume. ³⁸ Te íin yítí ña nuū jehé yā, te ndáhyú ña. Te ni quejéé ña stáji ña jehé yā jíin ndute tñúú ña, te ni nasíchí ña jíin ixi xíní ña. Te ni techūhú ña jehé yā, te ni chuhun ña perfume un. ³⁹ Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jñūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chí ñahan sáha cuēchi cúu ña, jéni ni de. ⁴⁰ Yūcuán na te ni cahān Jesús jíin de:

Simón, cúní rī cahān rī jíin ró ñin jñūhun.

Te ni cahān maá de:
Cahān ní, Maestro.

⁴¹ Te ni cahān Jesús:

Ñin tēe jéhe núu xūhún, ni íyo uū tēe táu nuū de. ñin de ni cotaū uhūn ciento denario, te inga de ni cotaū uū xico uxī denario. ⁴² Te tú na vé cánevāha tēe un jéé náchunaa de. Te tēe jéhe núu xūhun ní ine cáhnu ni de nuū ndindúú tēe ún. Núu súcuan te cachi rō: Jeē ndindúú tēe ún, ¿ndé ñin de coo maní gā jíin de? Achí yá.

⁴³ Te ni cahān Simón:

Jéni ni na jéé tēe ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

⁴⁴ Te jito ya nuū ñahan ún, te ni cahān gā yā jíin Simón:

¿A jito ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehé rī nájnūhun íyó costumbre. Te ñahan yáha ní stáji ña jehé rī jíin ndute tñúú ña, te ni nasíchí ña jíin ixi xíní ña. ⁴⁵ Te tu ní

téchūhu ró ruhū nájnūhun íyó costumbre. Te ñahan yáha, nde jeē ni quívi ri vehe ró, tu jécuiñi ña jeē téchūhú ña jehé rī. ⁴⁶ Te tu ní chūhun ró aceite xiní rī nájnūhun íyó costumbre. Te ñahan yáha ní chuhun ña aceite perfume jehé rī. ⁴⁷ Núu súcuan te cáhán rī jíin ró jeē ni stéén ña jeē yóhyo maní ña jíin rí siquī jeē íne cáhnu ni rī nuū tāca cuéchi ña, vésú cuehē cúu. Te núu cone cáhnu ni rī nuū ñin ñayuu íyó jecu-ni cuéchi, te jecu-ni stéén i jeē maní i jíin rí, achí yá.

⁴⁸ Te ni cahān yā jíin ña:

Je íne cáhnu ni rī nuū tāca cuéchi ró, achí yá.

⁴⁹ Yūcuán na te ñayuu cáyeji staā jíin yá, ni quejéé i cácahān maá i:

¿Ndé ñin ga cúu tēe yáha jéé cahán jeē íne cáhnu ni nuū cuéchi? achí i.

⁵⁰ Te Jesús ni cahān gā yā jíin ñahan ún:

Ni candíje ró rúhū, te jeē yúcuan ní jnama ri rohó. Cuáhán te na ndúsñ ni rō. Achí yá.

Jñūhun ñahan ní cajejniñu nuū yā

8

¹ Yūcuán na te ni cuu jecu quívi, te ni jica cuu Jesús táca ñuu náhnu jíin ñuu lulí. Te nácani ya jñūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jíin yá. ² Te suni íyó jecu ñahan cájica jíin yá, jeē ní quenehen ya tachí ini sava ña, te ni nasávāha ya sava ña jeē cándoho cuehyí. Te ñin ña cúu María ñuu Magdala, te ini ñahan un ní quenehen ya uxā tachí. ³ Te inga ña cúu Juana, ñasihí Chuza, tēe ndíso jniñu ini vehe Herodes. Te inga ña cúu Susana, jíin cuehē gā ñahan jeē cáchindéé ñahán ña, jéhe ña tāca jéé jíni ñūhún yá jíin de jíin ñahan de.

Jñūhun yátá síquī tēe jéte trigo
(Mt. 13.1-9; Mr. 4.1-9)

⁴ Te cuehē ñayuu táca ñuu yúcuan ní jinūcoo i nuū Jesús. Te ni cacutútú cuehē ndasí ñayuu, te ni cahān yā ñin jñūhun yátá jíin i:

⁵ ñin tēe cate trigo, ni quenda de jeē cáte de. Te ná ni quejéé de jéte de, te jecu trigo ni jítē yuhíchi. Te ni cajeñū ñayuu siquī, te ni cayeji saa. ⁶ Te jecu gā ni jítē nuū ñúhun yuū. Te ni cane, te ni ichī-ni, chi tú cuehē cajin. ⁷ Te jecu gā ni jítē nuū náne iñu. Te ñnuú-ni ni canecoo iñu jíin, te ni jesi nuū. ⁸ Te jecu ni jítē nuū ñúhun váha. Te nuū ní jehnu, te ni jēhe cuehē nunī, chi jeē ñin ñin ni jēhe nde ciento. Achí yá.

Yūcuán na te ni cahān jee ya:

Tāca róhó jéē jíni sōho, na chúsóhó ró, achí yá.

Najehē cahān yā mání jnūhun yátá
(Mt. 13.10-17; Mr. 10-12)

⁹ Te tēe cáscuáha jíin yá ni caca-jnūhún de ya na vé cuní cahān jnūhun yátá yáha. ¹⁰ Te ni cahān yā:

Róhó jíināhan ró, chi sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te mání jíin jnūhun yátá cáhān rī jíin sava ga i, návāha vēsú cájito i, te quéndōo i nájnūhun jeē tú na vé ni cájito i. Te vēsú cájini sōho i, te ma jécūhun ni i.

Jeē ní castūhun cáj yá jnūhun yátá téé jéte trigo

(Mt. 13.18-23; Mr. 4.13-20)

¹¹ Jnūhun yátá yáha cuní cahān: Trigo un cúu jnūhun Yaā Dios. ¹² Te trigo jeē ni jítē yuhíchi cúu nájnūhun ñayuu cájini sōho jnūhun, te quíji-ni jexeén te quénde-ni jnūhun ini anuá i, návāha ma candíje i te ma jnáma rī i. ¹³ Te trigo jeē ni jítē nuū ñúhun yuū cúu nájnūhun ñayuu cájini jnūhun, te cájetáhú i te cácusī ni i jíin. Te tu cúcutú jnūhun ún ini anuá i. Te jecu-ni quívī cácandíje i, te núu ni quejéé jnúndóho, te cájica yátá i. ¹⁴ Te trigo jeē ni jítē nuū náne iñu cúu nájnūhun ñayuu cájini jnūhun, te cuangoos i te cácuñéñu i jíin jniñu i jíin jéē cuní i cucúca i te coo sī ni i. Te tu íje i jíin jnúhun ya. ¹⁵ Te trigo jeē ni jítē nuū ñúhun váha cúu nájnūhun ñayuu cájini nahín jnúhun ya, te cájni vāha i, chi íyó váha íyó ndāā anuá i. Te cáhije i jíin jnúhun ya, chi cácandíje vāha i.

Jnūhun yátá siquī lámpara
(Mr. 4.21-25)

¹⁶ 'Núu nástīn ñayuu ñin lámpara, te tu jési i ni ñin siquī, ni tu jéni i chíji jīto. Chi sa suhva jéni i nuū sucún, návāha cundijin nuū ñáyuu quívicoo vehe. ¹⁷ Te suni súcuan tu íyó ni ñin jnūhun sāhi jéē ma cúni ñayuu, chi ndíhi tāca jnúhun cácahān i nane ndijin te cuni ñayuu.

¹⁸ 'Núu súcuan te na cúni sōho vāha ró, chi ñayuu je jécūhun ni, stéén gā yā nuū i. Te ñayuu tu cándíje, máá jecu jeē jéni ni i jeē jiní i, sa suhva naa. Achí yá.

Náná yā jíin ñani yā
(Mt. 12.46-50; Mr. 3.31-35)

¹⁹ Yūcuán na te ni quee naná yā jíin táca ñani yā nuū íne ya. Te tu ní cúu quívicoo ña nuū yā siquī jeē chitú ñayuu. ²⁰ Te ñin ñayuu ni castūhun núu yā:

Náná ni jíin táca ñani ni cáhīn nuū quéhe, te cácuni cahān jíin ní, áchí i.

²¹ Te ni cahān maá yá:

Suni náná rī jíin ñani rī cácuu ñayuu cájini sōho jnūhun Yaā Dios te cáscuáca i, áchí yá jíin i.

Jeē ní jecuiñī tachī níhin jíin mar ni sáha ya

(Mt. 8.23-27; Mr. 4.35-41)

²² Te ñin quívī ni quívī ya ñin barco jíin téé cáscuáha jíin yá, te ni cahān yā jíin de:

Na yáha yó quíhīn yō inga lado mar.

Te ni cascáca de barco cuangoos de.

²³ Te níni cascáca de barco, te ni quixī yā. Te ni jequíhi ñin tachī níhin nuū mar, te je yajni chitú ndute ini barco, te ndúcú quéé barco. ²⁴ Te ni castóna de ya, te ni cacahān de:

Maestro, Maestro, vijna te quēe yó chíji ndute te naa yō, achí de.

Te ni ndocuiñī-ni ya, te ni cahān yā nuū tachī níhin jíin núu mar. Te ni cajecuiñī-ni, te ni cuu nayúú í-ni.

²⁵ Te ni cahān yā jíin téé cáscuáha jíin yá:

¿Naun tu cácandíje ró?

Te máá de yōhyo ni cayūhú de, te cánaa ni de, te cácahān de jíin jnáhan de:

¿Ndé ñin ga cúu tēe yáha jéē nde nuū tachí níhin jíin núū ndúte ndácu de jniñu te cájetáhú jéē cahán de? Achí de.

*Tēe Gadara jeē ndóho tachí
(Mt. 8.28-34; Mr. 5.1-20)*

²⁶ Yūcuán na te ni cane ya jíin de región Galilea, te cuahān yā región Gadara jeē íne inga lado mar Galilea.

²⁷ Te nuū ní nanuu ya nuū ñúhun íchi, te ñin tēe ñuu un ní quee de nuū yā. Te je ni cuu cuehē cuiyā ñúhun cuehē tachí ini de. Te tu ñúhun cuiti de sahma, ni tu ndéé de vehe, chí sa suhva nuū cáyindūji ndīyí ndeé de.

²⁸ Te ná ni jito de nuū Jesús, te ni jecuiñī yití de nuū yā, te ni cana cóhó de:

¿Naun vēji ní núū ná, Jesús Sēhe Yaā cujéhnū téyí? Cáhán ndahú ná jíin ní jeē ma stóho ní sáña, achí de.

²⁹ Súcuán ni cahān de, chí je ni ndacu ya jniñu nuū tachí un jéē na quéndacoo ini de. Te ni cuu cuehē jíinu sáha xeēn tachí jíin de. Te cájihni ñayuu ndaha de jehē de jíin cadena, návāha tú na vé sáha de. Te ndihī-ni jéhnde de, te jíinu de jéhén de nde nuū ñúhun téhé sáha tachí ún. ³⁰ Te Jesús ni cajñūhun yá de:

¿Na vé naní ró?

Te ni cahān de:

Legión naní ná.

Súcuán ni cahān de jeē naní de, chí ñúhun cuehē tachí ini de. ³¹ Te ni cacahān ndahú táchī un jíin yá jeē ma tají yá quihīn ini tūhnchi cúnú. ³² Te yucu yúcuán cáhīin cuehē quīnī cájitu tí. Te tachí jeē cáñuhun ini tēe un ní cacahān ndahú jíin yá jeē na cuáha ya jñūhun quīvīcōo ini quīnī ún. Te ni jēhe ya jñūhun. ³³ Te ni quendacoo tachí ún ini tēe ún, te ni quīvīcōo ini quīnī. Te quīnī un ní cajinu tí ni níngoo tí ñin yucáva, ni quīvīcōo tí nuū mar, te ni ndaquihī tí ndute, ni cajihī tí.

³⁴ Te tēe cándito tí ni cajito de jeē súcuán ni cuu, te ni cayūhú de. Te ni cajinu de cuacastūhún de nuū ñáyuu

ñuu un jíin ñáyuu tāca rancho. ³⁵ Te cuangoo ñayuu un cuácondéhé i na vé ni cuu. Te ni jinūcōo i nuū íne Jesús. Te ni cajito i nuū tēe ní quendacoo tachí ini, néne de nuū jehé Jesús, te ñúhun de sahma, te je ni nducájí xīnī de. Te ni cayūhu ñáyuu ún. ³⁶ Te tēe ní cajito ni canacani de jñūhun nuū ñáyuu, ndese ni nduvāha tēe ni ñuhun tachí ini.

³⁷ Yūcuán na te tāca ñáyuu ní región Gadara, ni caquejéé i cácahān ndahú i jíin yá jeē na cújiyo ya quihīn yā, chí yōhyo cáyūhú i. Te ni ndīvī ya ini barco jeē quīnūhun yā. ³⁸ Te tēe jeē ní quendacoo tachí ini, ni cahān ndahú de jíin yá jeē na cuáha ya jñūhun quihīn de jíin yá. Te Jesús ni cahān yá jeē na quéndōo de, te achí yá:

³⁹ Cuánuhun vehe ró, te nacani ró jñūhun ndese yōhyo jéhnū jniñu ní sáha Yaā Dios jíin ró, achí yá jíin de.

Te cuahān de, te ni nacani de jñūhun ní ñuu ún, ndese yōhyo jéhnū jniñu ní sáha Jesús jíin de.

Jñūhun sēhe sáhí Jairo jíin ñahan ní quehé yusáhma ya

(Mt. 9.18-26; Mr. 5.21-43)

⁴⁰ Te nuū ní najinū Jesús inga lado mar, te ñayuu un ní cacusiñī ni i jeē ní najinū yā, chí ndihī i cándetu i ya. ⁴¹ Te ni quee ñin tēe cújéhnū ini vehe íi sinagoga, naní de Jairo. Te ni jecuiñī yití de nuū jehé yā, te ni cahān ndahú de jíin yá jeē na quihīn yā jíin de vehe de. ⁴² Chí íyó ñin sēhe sáhí de jeē mañúhún-ni i nuū de, te íyó i nájnūhun uxī uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquīn i ya, te ni chitú níhin i xiin ya cuangoo i.

⁴³ Te mēhñu ñáyuu un cuáhān ñin ñahan cúhú jeē ní cuu uxī uū cuiyā ndóho ña cuehyī niñī. Te ni jexin ña tāca jéē névāha ña jíin tēe tájná, te tu ní ndúvāha ña sáha ni ñin de. ⁴⁴ Te ni quee ña ichi yátá yā, te ni quehé ña yusáhma ya. Te ni jecuiñī-ni niñī ña.

⁴⁵ Yūcuán na te ni cahān Jesús:

¿Ndé ñin ni quehé sahma ri? achí yá.

Te ndivii i ni cacahān jeē tu ní quehé i. Te Pedro jiín tēe cáhīn jiín de, ni cacahān de:

Maestro, jito ní jēē ñáyuu cuehē yāha ní chitú níhin i xiin ní, te cáquīhi i níhín, te cájnūhun ní ndé ñn ni quehé sahma ní.

⁴⁶ Te ni cahān Jesús:

Tuú chi ñn ñayuu ni quehé sahma ri, chi ni jini rī jeē jiín fuerza rī ni nduvāha ñn ñayuu, achí yá.

⁴⁷ Te ni jini ñahan un jēē tu ní cúu coo yuhu jeē ni sáha ña. Te quísi i ña ni quee ña, te ni jecuiñi yití ña nuū jehé yā. Te jito jínū tāca ñáyuu, te ni cachi cají ña najehē ni quehé ña yusáhma ya, jiín jēē ní nduvāha-ni ña. ⁴⁸ Te ni cahān yā jiín ña:

Séhē, ni candíje ró jēē cuu nasávāha ri rohó, te jeē yúcuan ní nduvāha ró. Cuáhán te na ndúsī ni rō, achí yá.

⁴⁹ Te níni cáhán gā yā súcuan, te ni quee ñn tēe vēji vehe Jairo, tēe cújehnu ini sinagoga, te ni cachi nuū de:

Je ni jihī sēhe síhí ní. Te ma sájnēñu ga ní Maestro, achí de.

⁵⁰ Te ni jini Jesús jnūhun yáha, te ni cahān yā jiín Jairo:

Ma yūhu ró, chi candíje-ni ró, te nastécu rī sēhe ró, achí yá.

⁵¹ Te ni jinū yā vehe, te tu ní jēhe ya jnūhun quīvi ñayuu jiín yá, chi máa-ni Pedro jiín Juan jiín Jacobo jiín tátá naná sūchi síhí un. ⁵² Te cácuquíhyá ni ndihi ñayuu cáyūcú ini vehe, te cándahyū i jehē sūchí un. Te ni cahān yā:

Ma ndahyú rō jijnáhan ró. Tu ní jíhi i, chi quíxi-ni i, achí yá.

⁵³ Te ni cajecū catá i jeē ni cáhán yā, chi cájini i jeē ni jíhi sūchi síhí un.

⁵⁴ Yūcuán na te ni jñi ya ndaha i, te ni cahān jee ya jiín i:

Síhī, ndocuñi, achí yá.

⁵⁵ Te ni natecu i, te ni ndocuñi-ni i. Te ni ndacu ya jniñu jeē na cuáha ña jeē cáji i. ⁵⁶ Te tátá i náná i yōhyo ni canaa ni de cájito de. Te ni ndacu níhin ya jniñu nuū de jeē ma cáchi de nuū ni ñn jeē súcuan ni cuu.

Jeē ní tají yá ndihúxi uū de cuacacani de jnūhun

(Mt. 10.5-15; Mr. 6.7-13)

9

¹ Te ni nastútú yá ndihúxi uū tēe cáscuáha jiín yá, te ni sáha ya jeē cóndiso jniñu de te coo poder de jeē queñehen de tachī ini ñayuu, jiín jēē nasávāha de ñayuu cácuñu. ² Te ni tají yá de quingoo de jeē nácani de jnūhun ndese ndácu Yaā Dios jniñu, jiín jēē nasávāha de ñayuu cácuñu. ³ Te ni cahān yā jiín de:

Ma cóndiso ró jēē cuajniñu ró ichi, ni vara, ni ñunu, ni staā, ni xūhún. Te quihīn rō jiín ñn-ni camisa, te ma cóndiso ró inga. ⁴ Te na-ni vehe núu ni quívicoo ró, te yūcuán coyūcu ró nde quenda tucu ró quihīn rō inga ñuu. ⁵ Te núu ñn ñuu tu cájetáhú i rōhó, na quéndacoo ró yúcuan, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. Achí yá.

⁶ Te ni quendacoo de cuahān de, ni cajica nuu de táca ñuu, ni canacani de jnūhun jnáma Yaā Dios ñayuu. Te tāca lado ni canasávāha de ñayuu cácuñu.

Jeē ni jíhi Juan tēe scuándute

(Mt. 14.1-12; Mr. 6.14-29)

⁷ Te Herodes, tēe cúu gobernador, ni jini jnūhun de táca jniñu sáha Jesús. Te ni cunéé ni de, chi cájeni ni sava ñayuu cácahān i jeē Juan ni natecu de. ⁸ Te sava ga i cácahān jeē ní nane Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya nde jenahán, ní natecu de. ⁹ Te ni cahān Herodes: Juan chi ni ndacu ri jniñu ni tahndē xinī. Núu súcuan ¿te ndé tēe cúu tēe yáha jeē jíni jnūhun ri jeē sáha de jniñu jehnu? Achí de.

Te ni nducú Herodes modo coto de nuū Jesús.

Jeē ni scáji yā uhūn mil tēe

(Mt. 14.13-21; Mr. 6.30-44; Jn. 6.1-14)

¹⁰ Te ni ndecoo tēe cácuu apóstol jeē ní tají yá ni canacani jnūhun. Te ni cacachi de nuū yā táca jniñu ni casáha

de. Te ni jeca ya de cuahān sīn ya jīn de ĩn lugar nuū tú ñayuu, yajni ñuu Betsaida. ¹¹ Te ni cajini ñayuu, te suni cuangoo i. Te ni jetáhú yá i, te ni nacani ya jnūhun ndese ndácu Yaā Dios jniñu, te ni nasávāha ya ñayuu cácuñu.

¹² Te nuū cuáhini, te ni quecoo ndihúxí uū tēe cáscuáha jīn yá, te ni cacahān de jīn yá:

Tají ní ñayuu cuehē yāhá na quíngoo i táca ñuu jīn táca rancho yajni yāhá, te nducú i nuū ndóo i te cuaan i jeē cáji i, chi tú na vé iyó yáha, áchí de.

¹³ Te ni cahān yā jīn de:

Cuāha máá ró jeē cáji i, áchí yá.

Te ni cacahān de:

Tú na vé cánevāha ná, chi uhūn-ni staā jīn úū-ni chācá. Te vēsú núu quicuaan ná staā caji ndihī ñayuu cuehē yáha, te ni ma cúu, áchí de.

¹⁴ Chi íyó nájñūhun uhūn mil tēe. Te ni cahān yā jīn tēe cáscuáha ún:

Cahān jīn ñáyuu na cúcōo sīn cincuenta i, áchí yá.

¹⁵ Te súcuan ni casáha de, te ni cacucōo ndihī ñayuu. ¹⁶ Te ni quihin ya ndihúhún staā jīn úū chācá un, te ni ndacoto ya ichí ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jīn yá, te ni casaja de nuū ñáyuu cuehē. ¹⁷ Te ndivii i ní cayeji, te ni candutú chíji i. Te ni canastútú de pedazo staā jeē ní quendōo, te ni chitú úxí uū jīca.

Jeē ní cahān Pedro jeē Jesús cúu Cristo

(Mt. 16.13-19; Mr. 8.27-29)

¹⁸ Te ĩn quivī ni cusīn Jesús, jícán tahú yā, te máá-ni tēe cáscuáha un cáhīn de jīn yá. Te ni cajñūhun yá de:

Ruhū, ¿ndé ĩn cúu ri cácahān ñayuu? achí yá.

¹⁹ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē ĩnga tēe ni nacani jnūhun ya ni natecu de.

²⁰ Yūcuán na te ni cajñūhun yá de:

Te máá ró, ¿ndé ĩn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

Jeē ní castūhún Jesús jeē cúu yā

(Mt. 16.20-28; Mr. 8.30-9.1)

²¹ Yūcuán na te ni ndacu nīhin ya jniñu nuū de jeē ma cáchi de jnūhun yáha núu ní ĩn ñayuu. ²² Te ni cahān yā:

Máá rí, Yaā ní nduu tēe, cánuú ndoho xeēn rī. Te táca tēe jēhnu jīn sūtū cácujeñu jīn tēe cástéén tutu ley, squéhichī de ruhū. Te cahni de ruhū, te nuū uní quivī te natecu rī, achí yá.

²³ Yūcuán na te ni cahān yā jīn ndihī de:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū táca quivī, te cuāha i jnūhun ndoho i jnūndóho jeē siquí rī, vēsú na cúu i. ²⁴ Chi núu ndé ñáyuu cuní i cácu i nuū jnūndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē siquí ruhū, te cotecu i ní cáni. ²⁵ ¿Chi ndé cuajñīñu vēsú na cūndeyí ñayuu nihīn i ní ñáyiví, te núu squiví i máá i nuū jnahnú ndetū i ní cáni? ²⁶ Chi núu na-ni ñayuu cúcanu i jeē siquí ruhū, Yaā ní nduu tēe, jīn síquí jñūhun cáhán rī, suni súcuan cucanu rī jeē siquí máá i, quivī ndíji ri. Te quivī ún chi yōhyo luu cujēhnu ri, nájñūhun cújēhnu Tátá rī, te suni cácujeñu ndajéhé ndoo ya sáha ya. ²⁷ Te jendaá cahān rī jīn ró jeē sava tēe cáhīn yāhá, ma cúu de chi nde cuni de jeē ndácu Yaā Dios jniñu jīn poder yā. Achí yá.

Jeē tucu ni nduu ya

(Mt. 17.1-8; Mr. 9.2-8)

²⁸ Yūcuán na te nájñūhun nuū uná quivī jeē ní cahān yā jnūhun yáha, te ni caa ya ĩn yucu, cuacacān tahú yā. Te Pedro jīn Jacobo jīn Juan cuangoo de jīn yá. ²⁹ Te níni jícán tahú yā, te tucu ni nduu nuū yā, te sahna ya ni nducujín quiyí, te ndíndé. ³⁰ Yūcuán na te ni canecoo uū tēe, cándajñūhún

de jíin yá. Te cúu de Moisés jíin Elías, tēe ni cahīyo jenahán. ³¹ Te luu ndíndēe de cáhīin de, te ni cacahān de jíin yá siquī jeē ní cuyajni cuu yā ñuu Jerusalén. ³² Te Pedro jíin tēe cáyūcu jíin de, yōhyo cájiī de māhná, te vēsú súcuan te tu ní cáquixī de. Te ni cajito de jeē lúu ndíndēe yá jíin ndíndúú tēe cáhīin jíin yá. ³³ Te nuū ní cacujiyo tēe un núu yā, te ni cahān Pedro jíin yá:

Maestro, nacā jeē váha jeē cáhīin ná yáha. Te na sáha ná únī vehe ramada, ñn cuu máá ní, ñnga cuu Moisés, te ñnga cuu Elías, achí de.

Te tu sáha de cuenta na vé cúu jeē cahán de. ³⁴ Te níni cáhán de súcuan, te ni quee vicō nūhun ní jesi nuū de jíjnáhan de. Te ni cayūhú de jeē cáhīin de chíji vicō ún. ³⁵ Te nuū vicó un ní cahān ñn jnūhun:

Yáha cúu Sēhe ri jeē maní ndasí rí jíin. Te na cúni nahín ró jnūhun cáhán yā, achí.

³⁶ Te nuū ni jínu ni cahān jnūhun ún, te máá ñn na Jesús ín ya nuū de. Te máá de tu ní cácahān cuiti de, te tāca quívī ún tu ní cácachi de nuū ni ñn jee súcuan ni cajito de.

Jeē ní nasávāha ya ñn sūchi ñūhun tachī ini
(Mt. 17.14-21; Mr. 9.14-29)

³⁷ Te ñnga quívī un ní nanuu ya yucu jíin de. Te cuehē ñayuu ni jejnahan í ya. ³⁸ Te mēhñu ñayuu cuehē un ní cana jee ñn tēe:

Maestro, jícan tahu na núu ni jēe condēhe ní sēhe yíí ná, chí máñúhún í nuū ná. ³⁹ Te máni jeē sáha xeēn tachī jíin í, te cána cóhó í sáha, te jéni yíí í, te jēe tiñū yuhu í. Te yōhyo stóho í, te yōhyo uhū siaá í. ⁴⁰ Te ni cahān ndahú ná jíin tēe cáscuáha jíin ní jeē na quénehen te tachī ún, te tu ní cúu sáha de, achí de.

⁴¹ Te ni cahān yā jíin de jíjnáhan de:

Ñayuu yōhyo níhni ní cácuu ró, chí tu cácañdije ró jēe cuu nduvāha í. ¿Nasaa ga quívī condee rí jíin ró jeē cuándeyí ní rí jíin ró? Cuáquihin sēhe ró na quíji í, achí yá.

⁴² Te níni véji í nuū yā, te ni cotúú í ní sáha tachī, te ni jehni yíí í. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya í nuū tatá í. ⁴³ Te ndivii ñayuu nahán ní canaa ní í cájito í jeē yōhyo jéhnú jniñu sáha Yāa Dios.

Jeē ní cáhān tucu ya jeē cúu yā
(Mt. 17.22-23; Mr. 9.30-32)

Te níni cánaa ní í cájito í tācá jniñu ní sáha Jesús, te ni cahān yā jíin tēe cáscuáha jíin yá:

⁴⁴ Chuhun váha ní rō jnūhun cáhán rí yāhá, te ma náa ní rō, chí ruhū, Yāa ní nduu tēe, nastúu í ruhū quívī rí ndaha tāca tēe xeēn, achí yá.

⁴⁵ Te tu ní cájecūhun ní de jnūhun cáhán yā, chí tu ní cúu cuiti jecūhun ní de. Te ni cayūhú de cajnūhún de ya siquī jnūhun ní cahān yā.

Nde ñayuu cúu jeē cújéhnú ga
(Mt. 18.1-5; Mr. 9.33-37)

⁴⁶ Yūcuán na te tēe cáscuáha jíin yá ní caquejéé de cácahān de siquī núu ndé ñn de cújéhnú ga. ⁴⁷ Te Jesús ní jini yā jeē súcuan cájeni ní de. Te ní jnií ya ndaha ñn sūchi lúlí, te ní jeni ya í xiin ya. ⁴⁸ Te ní cahān yā jíin de:

Na-ni ñayuu núu jeē siquí ruhū jetáhú í sūchi lúlí yáha, te ruhū jetáhú í. Te ñayuu jetáhú rúhū, suni jétáhú í Yāa ní tají rúhū véji rí. Te ñayuu núu ga mēhñu ró, máá í cújéhnú ga, achí yá.

Ñayuu tu cáhán siquī yā, ín í jíin yá
(Mr. 9.38-40)

⁴⁹ Yūcuán na te ní cahān Juan:

Maestro, ní cajito ná ñn tēe jeē jíin síhví ní quénehen de tachī ini ñayuu. Te ní cajesí na jēe sáha de, chí tu jíca de jíin yó, achí de.

⁵⁰ Te ní cahān Jesús jíin de:

Ma cásí rō jeē sáha de, chí tēe tu cáhán siquī yō, ín de jíin yó, achí yá.

Jeē ní cáhān yā nuū Jacobo jíin Juan

⁵¹ Te ní cuyajni quívī jeē quínuhun yā andiví, te ní tee téyí ní yā jeē quihín yā ñuu Jerusalén. ⁵² Te ní tají yá sava tēe yósnúu de jíin jnūhun jeē jinú yā. Te cuangoo de ñn ñuu Samaria návāha nducú de nuū ndóo ya. ⁵³ Te ñayuu

Samaria un tu ní cájēhe i vehe ndōo ya, chi ni cajini i jeē ndé Jerusalén quihīn yā. ⁵⁴ Te Jacobo jíin Juan, tē cáscuáha jíin yá, ni cajini de jeē súcuan cúu, te ni cacahān de jíin yá:

¿A cúni ni jēē ndácu yó jniñu quiiji ñuhūn nde andiví, nájñuhun ni sáha Elías, návāha naa ñayuu yáha? Achí de.

⁵⁵ Yūcuán na te ni ndió coto Jesús nuū de, te ni cahān yā nuū de:

Tu cájini rō na nuū vēji jñuhun cácahān rō. ⁵⁶ Chi ruhū, Yaā ní nduu tē, tú vēji ri jeē snāā rī ñayuu, chi sa suhva jeē jnáma ri ñayuu, achí yá.

Yūcuán na te cuahān yā jíin de inga ñuu.

Siquī ñáyuu jeē cáconi i condiquīn i ya

(Mt. 8.19-22)

⁵⁷ Te níni jica ya ichi jíin de, te ni cahān ñn tē jíin yá:

Condiquīn na níhín quihīn yō ndé-ni cúu-ni nuū quihín ni, áchí de.

⁵⁸ Te ni cahān Jesús jíin de:

Tāca ñúcui, íyó yāu cava cáñuhun ti. Te suni saa, iyó táca ti. Te ruhū, Yaā ní nduu tē, tú nuū cusú rī, achí yá.

⁵⁹ Te ni cahān yā jíin inga de:

Condiquīn ruhū na quihín yō.

Te máá tē un ní cahān de:

Condetu ní ndé na quíchindūji ná tátá na xihna gā. Yūcuán na te condiquīn na níhín, áchí de.

⁶⁰ Te ni cahān Jesús jíin de:

Stóo tāca ndíyi na chindūji jnáhan ndíyi, chi ndíyi cácuu ñayuu tu cácañdije. Te rōhó, cuáhán te nacani ró jnúhun ndese ndácu Yaā Dios jniñu, áchí yá.

⁶¹ Yūcuán na te suni ni cahān inga de:

Cúni na condiquīn na níhín, te cuāha ní jnúhun jeē xihna gā quicahān na jíin ñáyuu cáyūcú vehe ná, áchí de.

⁶² Te ni cahān Jesús jíin de:

Núu na-ni tēe quéjéé de condiquīn de ruhū, te núu máni jeē nácani cuíhyá ni de siquī tāca jéé ni stóo de, núu súcuan te cúu de nájñuhun ñn tēe jítu jíin yátá, te jícó coto de ichi vehe de. Te ma cuajniñu de condiquīn de ruhū siquī jniñu ndácu Yaā Dios, achí yá.

Jeē ní tají yá unī xico uxī de

10

¹ Te ná ni cuu tācá jniñu yáha, te máá Jítóho yō ni nacāji ya unī xico uxī gā de. Te ni tají yá ndihuū ndihuū de jeē cósnūú de nuū yā, quingoo de tācá ñuu jíin táca lugar nuū jé yajni quihīn maá yá. ² Te ni cahān yā jíin de:

Ñayuu yáha cácuu i nájñuhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. Núu súcuan te cacān tahu rō nuū maá Jítóho rō Yaā Dios jeē na tají yá cuehē tēe na quingoo de cahnde de trigo, cúu jeē nacani de jñuhun ya nuū ñáyuu.

³ Te cuángoo jíinánhan ró, te na cástūhun rí nuū rō jeē tají rí rohó quingoo ró nájñuhun londe mēñu yñī.

⁴ Te ma cóndiso ró ñunu, ni yijni xūhún, ni ndijēn. Te ichi ma cucuéé ró nda-jñuhun ró jíin ni ñn. ⁵ Te na-ni vehe núu ni quiví ró, te xihna gā cahān rō: Na quiiji jñuhun ndeyí jñuhun sñ ni nuū rohó, ñáyuu vehe yáha, achi rō.

⁶ Te núu vehe yúcuan íyó ñáyuu vāha, te jñuhun ndeyí ní cahān rō jinū siquī i. Te núu tuú, te jñuhun ndeyí ní cahān rō ma jinú siquī i.

⁷ Te suni vehe yúcuan coyūcu ró, te caji rō coho ró jéé cuáha ñayuu nuū rō. Chi siquī jniñu jeē nácani ró jnúhun nuū ñáyuu, te cánuú coto i rōhó. Ma quéndōo ró tijni vehe, chi ñn-ni vehe.

⁸ Te na-ni ñuu núu ni quivícoo ró, te núu cuatáhú i rōhó, te caji rō tāca jéé cuáha i nuū rō. ⁹ Te nasávāha ró ñáyuu cácuñu ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō.

¹⁰ Te na-ni ñuu núu ni quivícoo ró, te núu tu ní cájetáhú i rōhó, te quendacoo ró ini calle yūcuán, te cahān rō: ¹¹ Nde ticachā ñuu rō yāha jéé ni jñí jehē rī, na náscóyo ri jeē cúu seña jeé iyó cuéchi ró jéé tu ní cájetáhú ró.

Te na cónahán ró jeé Yaā Dios je ni cuyajni ya jeé ndacu ya jniñu nuū rō nuú. ¹² Te cáhán rī jíin ró jeé quiví juicio te xeēn gā coo castigo siquī ñuu casáha súcuan vēsú siquī ñuu Sodoma nuū ní casáha ndasí ñáyuu cuéchi.

Jeē ní cuxeēn yā nuū sava ñuu ñhni ni

(Mt. 11.20-24)

¹³ 'Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chi núu ini ñuu Tiro jiín ñuu Sidón ni sáha ri jniñu jéhu jeē ni sáha ri ini ñuu maá ró, te yachī nacani ni ñayuu ñuu un jéē stóo i cuēchi i núú. Te sáha i seña jeē steén jeē nácani ni i siquī cuéchi i, chi cuhun i sahma jnúú te chuhun i yaā xinī i núú. ¹⁴ Núu súcuan te quivī coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jiín ñuu Sidón. ¹⁵ Te róhó ñáyuu ñuu Capernaum, ¿á cájeni ni rō jeē cujéhu ró nájñuhun ñn jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndíyí. Achí yá.

¹⁶ Te ni cahān gā yā jiín tée jeē tají yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichī rohó, suni ruhū squéhichī i. Te ñayuu squéhichī ruhū, suni squéhichī i Yaā ní tají rúhū vēji ri. Achí yá.

Jeē ní ndecoo tēe ni tají yá

¹⁷ Te ni ndecoo unī xico uxī tēe un, cácusñ ni de te cácahān de jiín Jesús:

Nde tachī cájetáhú núu na jéē jiín síhví ní, chi quéndacoo ini ñayuu, achí de.

¹⁸ Te ni cahān yā jiín de:

Súcuan cúu, chi ni jito ri jeē nájñuhun ñn taja ni ñingava Satanás ichi ándiví, chi ni quende rī ndíhi poder un. ¹⁹ Te vijna te je ni jēhe ri fuerza nuū rō jeē cueñū rō nájñuhun siquī tāca cóo jiín tísuhma, te cundeyí ró siquī tāca fuerza maá jéē jito uhū yohó, te tú na vé sáha ga jiín ró. ²⁰ Te ma cúsn ni rō maá-ni jeē cájetáhú táchī nuū rō, chi sa cusñ gā ni rō jeē yosó síhví ró nde ándiví. Achí yá.

Jeē ní cusñ ni Jesús

(Mt. 11.25-27; 13.16-17)

²¹ Te suni hora un ní cusñ ni Jesús, ni sáha Espíritu Santo, te ni cahān yā:

Na cútahū na núu ni Tátā, Jitoho ándiví jiín ñáyiví. Chi ni jesi ni táca jnúhun ndíchí ní, jeē ma cúni ñayuu ndichí jiín ñáyuu tūhva cuenta ñáyiví yáha. Te ni steén ni núu ñáyuu cácuu nájñuhun sūchi lúli. Chi súcuan ni nuj-nahan ni ni Tátā, achí yá.

²² Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé ñn cúu ruhū, Sēhe Yaā Dios, chi máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chi máá-ni Sēhe cúu jeē jiní. Te íyo ñáyuu jeē cuní maá Séhe steén yā nuū i ndese Yaā cúu Tátá yā, te máá i suni cuni i. Achí yá.

²³ Yūcuán na te jito ya nuū tée cáscuáha ún, te ni cahān yā jiín máá-ni de:

Yōhyo ndetū ñayuu cájito jniñu jéhu jeē cájito máá ró. ²⁴ Chi cáhán rī jiín ró jeē cuehē tēe ni canacani jñuhun Yaā Dios, jiín táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jñuhun ñn tēe vāha ni nación Samaria

²⁵ Yūcuán na te ñn tēe steén tutu ley Yaā Dios, ni ndocuññ de ni jecahān de jiín Jesús, chi cúni de coto ndee de ya. Te ni cajñuhún de:

Maestro, ¿na vé sáha ná te nihīn tahú na cotecu na ñí cáni ándiví? áchí de.

²⁶ Te ni cahān yā jiín de:

¿Ndesé yósó núu tútu ley? ¿Ndesé cáhán cáhu ró? Achí yá.

²⁷ Te máá tēe un ní cahān de jeē cahān nuū tútu:

Coo manī ndasí ró jiín máá Jitoho rō Yaā Dios, nde jnáā ndasí ró sáha ró ndíhi jeē cúsn ni yā, nde jiín ini jiín ánuá rō, jiín ñí fuerza rō, jiín ñí jéē níjñuní rō. Te cundáhú ni rō jnáhan ró nájñuhun cundáhú ni rō maá ró, achí. Achí de.

²⁸ Te ni cahān yā jiín de:

Vāha ni cahān rō. Te núu cuu sáha ró súcuan te nihīn tahú rō cotecu rō ñí cáni, achí yá.

29 Te máá té un cúní de jeē quéndō ndaā de nuū yā jíin jnúhun ni canjñuhún de, te ni cahān de:

¿Te ndé ñáyyuu cácuu jnáhan ná? áchí de.

30 Te ni cahān Jesús:

Íin tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuñhna núu de, te ni caquende ndihí ndajníñu de, te nde sahma ñuhun de. Te ni cacani ndevāha ún de jeē jé yajni cuu de núu. Te ni castóo ún de, te cuangoo. 31 Te ni cuu jeē íchi un yáha ñin sutū quihín de, te ni jito de nuū téé ún, te ni síyo-ni de cuahān de. 32 Te suni súcuan ñin tēe grupo levita jeē cájejniñu ini templo, vēji de ichi ún, te ni jito de nuū téé ún, te ni yáha jíca-ni de cuahān de. 33 Te ñin tēe nación Samaria, suni vēji de ichi ún, te nuū ní jito de, te ni cundáhú ni de tēe ún. 34 Te ni quee de nde nuū catú téé ún, te ni chuhun de aceite jíin vino nuū ni túji tēe ún, te ni jihni de sahma nuū. Te ni soó de tēe un síquī quiti de, te cuahān de jíin téé un ndé ñin mesón, te ni condito de. 35 Te inga quiví ún, hora jeē quihín de, te ni tava de uū xuhun cáa, ni jēhe de nuū tēe chíí mesón. Te ni cahān de: Coto ní téé yáha, te núu caxín gā ni xuhun ní jíin de, te nuū nándicó ná te nachunaa ná núu ní, áchí de. 36 Núu súcuan ¿te ndese jéni ni rō? Jeē ndinúni téé ún, ¿ndé ñin de ni chihí cuenta jeē jnáhan de cúu tēe ni canecoo ñacuñhna núu? Achí yá jíin téé stéén tutu ley.

37 Te ni cahān de:

Tēe jeē ní cundáhú ni tēe ni tují, vēsú tēe ñuu jíca cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyyuu, achí yá.

Jeē ni íne ya vehe Marta jíin María

38 Yūcuán na te ni quihin tucu ya ichi cuahān yā, te ni jíin yā ñin ñuu lulí. Te ñin ñahan nání Marta, ni cana ña ya ni jehēn yā vehe ña. 39 Te Marta, íyó ñin cuhū ña nání María. Te María ni cucōo ña nuū jehé Jesús, jíni nahín ña jnúhun cáhán yā. 40 Te Marta chi

cúnéé máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñuhún ña sãña núu jniñu? Te cahān ni jíin ña na chindéé ñáhán ña sãñá, áchí ña.

41 Te ni cahān Jesús jíin ña:

Marta, yōhyo ndihví ni rō jíin cuéhē jniñu, te yōhyo stóho ró máá ró jíin.

42 Te íyó ñin-ni jniñu cánuú. Te María chi ni nacāji ña jniñu cánuú, suu jeē ndihví ni ña síquī jnúhun Yaā Dios, te ma quénehen yó ña nuū ún. Achí yá.

Jeē ni stéén yā ndese cacān tahú yō (Mt. 6.9-15; 7.7-11)

11

1 Te ñin quiví íne Jesús ñin lugar jícan tahú yā. Te nuū ní ndihí ni jícan tahú yā, te ñin tēe scuáha jíin yá, ni cahān de:

Stéén ni núu ná ndese cacān tahú na jíjnáhan ná, nájnūhun ni steén Juan nuū téé ni cascuáha jíin de, áchí de.

2 Te ni cahān yā jíin de:

Jeē cacān tahú rō, te suhva cahān rō:

Tátá maá ná jíjnáhan ná jéé ndeé ní andiví,

níní na cóo yíñuhún ná nuū ní, chi Yaā íi cúu ní.

Te ñuhun ni na jéé yachí quiji quiví ndacu ní jniñu ní ñáyiví yáha.

Te na cóo tācá jniñu nújnahan ni ní, nájnūhun íyó ini andiví, súcuan na cóo ini ñáyiví.

3 Staā jeē cátecu na táca quiví, cuāha ní núu ná vijna.

4 Te cone cáhnu ni ní núu tāca cuéchi cásáha ná núu ní,

nájnūhun cáhine cáhnu ni na núu ñáyyuu casáha cuéchi nuū ná.

Te ma cuáha ní jnúhun jeē coto ndee jexeén sãñá,

chi sa suhva jnama ní sãña nuū tāca jéé neé.

Achi rō jíjnáhan ró. Achí yá.

5 Te ni cahān gā yā:

Núu ndé ñin rōhó íyó ñin amigo rō, te núu quihín rō vehe de sava ñuu te cahān rō jíin de: Amigo, cuāha núu uní staā nuū rí. 6 Chi ñin amigo rí jeē

jica de viaje, ni quee de vehe ri, te tú na vé névāha ri jeē cuáha ri caji de. Achi rō. ⁷ Te núu cahān tēe íne ini vehe: Ma stáhān rō ruhū, chí ndíhyú yehyí rí, te je cáquixī sēhe ri jíin rí, te ma cúu ndonda ri jeē cuáha ri nuū rō, achi de. ⁸ Te cáhān rī jíin ró, vēsú ma ndónnda de cuāha de nuū rō síquī jeē cúu de amigo rō, te jeē yóhyo stáhān rō de, jeē yúcuan ndonda de cuāha de ndíhi jeē jíini nūhún ró. ⁹ Núu súcuan te cáhān rī jíin ró jijnáhan ró jeē suni súcuan cacān tahu rō nuū Yaā Dios, te cuāha ya nuū rō. Te nducú ró tāca jéē váha iyó núu yā, te nihīn rō sáha ya. Te cacān tahu rō nde nihīn rō, nájnūhun sáha ñayuu cahán yehyí ndé nune quívi i. ¹⁰ Chí tāca ñayuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cuní i.

¹¹ ¿Te ndé ñn ró cúu tátá, te núu sēhe ró jicán i staā nuū rō, te á cuáha ró ñn yuū nuū í? Te núu jicán i chācá, ¿te á cuáha ró ñn coō nuū í? ¹² Chí núu jicán i ñn ndívi, ¿te á cuáha ró ñn tísuhma nuū í? Tú cuíti súcuan. ¹³ Núu súcuan te máá ró jijnáhan ró, vēsú ñayuu iyó cuéchi cácuu ró, te cájini rō cuāha ró jéē váha nuū séhe ró. Te nagā ni cuu máá Tátá rō andívi jéē ma cuáha ya Espíritu Santo nuū ñayuu jicán nuū yā. Achí yá.

Jeē ní cacahān de jeē jejniñu ya fuerza Satanás

(Mt. 12.22-30; Mr. 3.19-27)

¹⁴ Te quénehen ya ñn tachī ini ñn tēe, jeē ní cuñhín de ni sáha. Te nuū ní quenda tachī, te ni nacahān tēe ni cuñhín un. Te ni canaa ni ñayuu cájito i. ¹⁵ Te sava ñayuu ún chi ni cacahān i:

Jíin fuerza Satanás jeē cujéhnū nuū tachí, quénehen tēe yáha táca táchī ini ñayuu, achí i.

¹⁶ Te sava ga i cúní i coto ndee i ya, te ni cajicān i jeē sáha ya jeē coo ñn seña ichi ándívi. ¹⁷ Te máá yá jiní yā jeē súcuan cájeni ni i, te ni cahān yā:

Tācá nación jeē sasín máá te cuajnáhan máá, núu súcuan te snāā jeē iyó váha máá. Te núu ñayuu ñn vehe sásín

máá te cuajnáhan máá, núu súcuan te ma cúu ga coyūcu cáhnu. ¹⁸ Te suni súcuan Satanás, núu sásín máá jíin jnáhan tachī, ¿te ndese cuiñi nīhin jeē ndácu jniñu núu súcuan? Chí cacahān rō jeē jíin fuerza Satanás quénehen ri tachī ini ñayuu. ¹⁹ Te núu súcuan cúu núu, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jíin jnáhan i cachi jeē ní castívi ndasí ró ni cacahān rō jeē cáquenehen ri tachī jíin fuerza Satanás. ²⁰ Te tuú chi sa suhva jíin fuerza Yaā Dios cúu jeē quénehen ri tachī. Núu súcuan te je ndéé Yaā Dios mēhñu ró jéē ndácu ya jniñu.

²¹ Te núu ñn tēe ndacuī, ndíto de vehe de jíin nújíi de, núu súcuan te tú ni ñn ndajniñu de ndoñhún.

²² Te núu quiji inga tēe ndacuī gā, te cundeyí jíin tēe ún, núu súcuan te quende nujíi de jeē ndíto de vehe de, te sáha de ndese cúní maá de jíin ndajniñu jeē quénde de. Te nájnūhun tēe ndacuī gā ún, súcuan cúu máá rí nuū Satanás.

²³ Te ñayuu tu iyó mání jíin rí, núu súcuan te jito uhū i ruhū. Te ñayuu tu nástútú jíin rí, núu súcuan te sa jéte núu i ñayuu vejicoo nuū rī.

Tachī jeē nastútú jnáhan ndívi ini ñayuu

(Mt. 12.43-45)

²⁴ Núu ni quenda ñn tachī ini ñn tēe tu cándíje, te jica cuu nuū ñhún téhé, nducú núu ndétátú, te tu níhín, yūcuán na te jéni ni maá: Na quínuhun rī vehe nuū ní quenda ri. ²⁵ Te núu ni ndee tucu, te jito jeē tēe tu cándíje un cúu de nájnūhun ñn vehe jeē ní ndundoo. ²⁶ Yūcuán na te jéquihin uxā gā tachī xeén gā vēsú maá. Te quívicoo ini tēe un jéé cóyūcu yúcuan. Núu súcuan te xeén gā ndoho tēe un jéé sándíhí vēsú jeē xíhna nūhún. Achí yá.

Yóhyo ndetū ñayuu cájini nahín jnúhun ya

27 Te níní cáhán yā jnūhun yáha, te ñn ñahan íne mēhñu ñáyuu cuehē un, ní cahān jee ña jíin yá:

Yōhyo ndetū ñahan ní scácu níhín te ní scáxin ña níhín, áchí ña.

28 Te ní cahān yā:

Sa suhva yōhyo ga ndetū ñayuu cájini nahín jnūhun Yaā Dios te cásquicu i, áchí yá.

Jeē ní cajicān ñayuu tu cácandíje ñn jniñu jéhnu

(Mt. 12.38-42; Mr. 8.12)

29 Te ní cataca cuehē gā ñayuu nuū Jesús, te ní quejéé yá cahán yā:

Ñayuu iyó vijna máni cásáha néé i. Te cájicān i ñn jniñu jéhnu jeē steén núu Yaā ní tají Yaā Dios cúu ri. Te tú na inga jniñu jéhnu stéén rī nuū i, chi máa-ni jniñu jéhnu nájnūhun ní cuu jíin Jonás, tēe ní nacani jnūhun Yaā Dios nde jenahán. 30 Chi nájnūhun ní cajini ñayuu ñuu Nínive jeē ní cuu ñn jniñu jéhnu jíin Jonás, suni súcuan cuni ñayuu tiempo yáha jeē coo ñn jniñu jéhnu jíin rúhū, Yaā ní nduu tēe, jeē quijnáhan jíin modo ní ndoho Jonás. 31 Te reina jeē ní cujéhnu nación ichi sur, natecu ña jíin ñáyuu tiempo yáha, quiṽi juicio jeē sándaā yā cuēchi, te cahān ña cuēchi siquī i. Chi nde jicá téyí ní quiji ña ní jini nahín ña jnūhun ndíchí ní cahān rey Salomón. Te vijna chi cújéhnu ga ruhū, Yaā íne yáhá vēsú Salomón, te tu cácandíje ró rúhū. 32 Te tāca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo yáha, quiṽi juicio jeē sándaā yā cuēchi, te cahān i cuēchi siquī ñáyuu yáha. Chi máa i ní canacani ní i ní castóo i cuēchi i quiṽi ní nacani Jonás jnūhun nuū i. Te vijna chi cújéhnu ga ruhū, Yaā íne yáhá vēsú Jonás, te tu cácandíje ró rúhū.

Jnūhun yátá síquī lámpara

(Mt. 5.15; 6.22-23)

33 'Núu nástñn ñayuu ñn lámpara, tu chíshí i, ní tu chúne i chíji ñn cajón. Chi sa suhva jéni i nuū sucún, návaha cundijin nuū ñáyuu quiṽicoo vehe. 34 Te tinūu ró cúu nájnūhun lámpara nuū yiqui cúñu rō. Núu súcuan te núu

tinūu ró iyó ndijin, te ní-ni yiqui cúñu rō cundijin. Te núu tinūu ró tu iyó ndijin, te ní-ni yiqui cúñu rō iyó nee.

35 Te suni súcuan cúu ánuá rō, te coto ró jéé ma cáni néé ní rō, návaha tú coo nee ini anuá rō. 36 Chi núu máni jniñu váha cásáha ró, te tú na jniñu néé cásáha ró, núu súcuan te luz yā cundijin váha ini anuá rō, nájnūhun ñn lámpara jeē sáha jeē cundijin váha. Achí yá.

Jeē ní cahān yā jeē iyó cuēchi de jíjnáhan de

(Mt. 23.1-36; Mr. 12.38-40; Lc. 20.45-47)

37 Te nuū ní cuu ní cahān yā, te ñn tēe grupo fariseo ní cana de ya jeē caji yā staā vehe de. Te ní quiṽi ya, te ní cucōo ya mesa jeē cáji yā staā. 38 Te tēe fariseo un náā ní de jíto de jeē tu squícu ya costumbre jeē nandahá yá te caji yā staā. 39 Te ní cahān maá Jítóho yō jíin de:

Róhó tēe fariseo jíjnáhan ró, chi nájnūhun jeē cánacate ró yátā vaso jíin yátā cohó cúu jeē nándahá ró. Te ichi íni rō chi ñúhun máni máa jnūhun cuíhná jíin jnūhun néé. 40 Tēe cánéé cácuu ró. ¿A tu cájini rō jeē Yaā ní sáha yiqui cúñu rō, suni ní sáha ya anuá rō? 41 Te jeē cájēhe ró caridad nuū ñáyuu ndahú, na sáha ró síquī jeē cundáhú ndije ní rō i. Te súcuan te coo ndaā anuá rō.

42 'Nacā xeēn ndoho róhó tēe fariseo, chi cásquicu ró tācá jniñu lúlí, te tu cásquicu ró jniñu cánuú. Chi cásáha ró úxī uxī nuhnī tamīnu jíin ruda jíin táca yucū, te cásocō rō ñn ñn siquī tāca úxī un núu Yaā Dios. Te tu cásáha cuiṽi rō jniñu ndaā, ní tu cáhīyo manī rō jíin Yaā Dios. Tāca jéé yáha cánuú sáha ró núú, te suni ma stóo ró jéé socó rō tāca yúcū ún.

43 'Nacā xeēn ndoho róhó tēe fariseo, chi máni cánujnahan ní rō cucōo ró núu silla yíñúhún gá ini vehe ñi sinagoga. Te cánujnahan ní rō jeē cahán yíñúhún ñáyuu jíin ró nuū calle.

44 'Te nacā xeēn ndoho róhó tēe cástéén tutu ley Yaā Dios, jíin róhó tēe fariseo, chi tēe stáhú-ni cácuu ró. Chi cándāa ró nájnūhun yaū ndīyi jeē tú ndijin, chi cásnáā rō anuá ñayuu, te tu

jíní i jeē súcuan cásáha ró jíin i. Achí yá jíin de.

⁴⁵ Yūcuán na te ni cahān ñn tēe stéén tutu ley:

Maestro, jeē ni cahān ni táca jnúhun yáha, suni nde siquī maá ná jíináhan ná ní cahān ní, áchí de jíin yá.

⁴⁶ Te ni cahān yā:

Suni nacā xeēn ndoho róhó tēe cástéén tutu ley. Chi suni cástéén rō tāca ley ni catava maá ró jeē yí sáha, te tu cácuñdeyí ñáyuu squícu i. Te máá ró, chi ni ñn xinī ndáha ró tu cáscánda ró jēe squícu ró.

⁴⁷ 'Nacā xeēn ndoho ró jíináhan ró. Chi cásáha ró vehe siquī nuū yíndūji ndīyí jíi rō, tēe ni canacani jnúhun Yaā Dios nde jenahán. Te suni táca jíi rō ni cajehni de tēe ún. ⁴⁸ Te jeē casáha ró súcuan cúu jeē cáquijnáhan ró jíin de siquī jníñu ní casáha de. Chi máá de ní cajehni tēe ún, te máá ró cásáha ró vehe ndīyí ún.

⁴⁹ 'Jeē yúcuán nde jenahán ní cahān Yaā Dios ñn jnúhun ndíchí: Tají rí táca tēe nacani jnúhun rí jíin táca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios. ⁵⁰ Te súcuan te siquī ñáyuu tiempo yáha na cóndee cuēchi jeē ní cajehni jíi i tēe ni canacani jnúhun Yaā Dios, nde quiví ni jécōo ñayiví te nde vijna, ⁵¹ nde Abel xihna gā te nde Zacarías, tēe ni cajehni de ini templo sava mēhñu cuarto ñ jíin altar. Núu súcuan te cáhán rí jíin ró jeē siquī ñáyuu tiempo yáha condee táca cuēchi ún.

⁵² 'Nacā xeēn ndoho róhó jēe castéén tutu ley, chi cájesi rō ichi jeē jécūhun ni ñáyuu jnúhun ya. Chi ní máá ró tu cácuñi rō jécūhun ní rō, ní tu cájehe ró jnúhun jeē jécūhun ní ñáyuu cácuñi. Achí yá.

⁵³ Te jeē ni cahān yā jnúhun yáha, te tēe cástéén tutu ley Yaā Dios jíin tēe fariseo, yōhyo ní caquití ní de nuū yā. Te ní caquejé de cástíchí de ya siquī cuehē gā jnúhun. ⁵⁴ Chi yuhu-ni cánducú de núu sanaa te stíví yá jnúhun cahān yā, návāha nihīn de cuēchi siquī yā.

Siquī jnúhun stáhú cácahān tēe fariseo

12

¹ Te níní súcuan cúu, te ní cacutútú cuéhē mil ñayuu, chi nde cájeñū i siquī jehé jnáhan i. Te xihna gā ní quejé yá cahān yā jíin tēe cáscuáha jíin yá:

Coto má candíje ró levadura tēe grupo fariseo, chi suu cúu jnúhun stáhú cácahān de. Chi jíte núu nuū ñáyuu, nájnūhun ndécava levadura nuū ñújen pan. ² Chi jnúhun stáhú un má quéndōo sáhi cuítí, chi ndihí natūu ndijín, te cuni ñayuu. ³ Núu súcuan te suni máá ró, táca jnúhun ní cacahān rō jeē tu ní jíin ñayuu, ñn quiví te cuni vāha i. Te táca jnúhun ní cacahān sáhi ró jeē ndihyú yehyí, ñn quiví te cahān jee ñayuu yatā táca vehe.

Jeē ní cachi yā ndé ñn cúu jeē yūhu yó

(Mt. 10.28-31)

⁴ 'Cáhán rí jíin ró jíináhan ró, amigo: Ma yūhu ró coto ró ñáyuu cahni yiqui cúñu rō, chi núu ní cajehni i róhó, te tuá na vé cúu sáha ga i. ⁵ Te na cáchi rí nuū rō ndé ñn yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te íyó poder yā chune ya rohó infierno. Suu máá yá cúu jeē yūhu ró jeē ma stíví ró nuū yā.

⁶ 'Te táca saa chi tú yahu ndéé tī, chi nde uhūn tī jeē uú centavo lulí. Te ní ñn tī tu náa ní Yaā Dios jeē tu ndíto ya.

⁷ Te nagā ní cuu róhó jíináhan ró, chi nde ndihí ixí xíní rō je ní cahu ya. Núu súcuan te ma yūhu ró jíináhan ró, chi cánuú ndasí gá rō nuū yā vésú cuehē táca saa.

Ñáyuu jejnúhún Jesucristo nuū inga ñayuu

(Mt. 10.32-33; 12.32; 10.19-20)

⁸ 'Te cáhán rí jíin ró, táca ñáyuu jeē cuajnúhún rúhū nuū inga ñayuu, suni súcuan ruhū, Yaā ní nduu tēe, cuajnúhún rí i nuū táca ndajéhé Yaā Dios. ⁹ Te táca ñáyuu jeē ma cuajnúhún rúhū nuū inga ñayuu, suni súcuan ma cuajnúhún rí i nuū táca ndajéhé Yaā Dios.

10 'Te núu ndé ñáyuu cahān i siquī ruhū, Yaā ní nduu tēe, cone cáhnu ni Yaā Dios nuū i. Te núu ndé ñáyuu cahān ndevāha i siquī Espíritu Santo, ma cóne cáhnu ni Yaā Dios nuū i.

11 'Te núu cuandeca i róhó táca vehe ñi sinagoga nuū tée cásandaā cuēchi, jíin núu tée cácuu tohō, te ma nácani ndasí ni rō ndese stío cuíñi rō jnūhun nuū de. 12 Chi máá hora un te Espíritu Santo steén yā nuū rō ndese cahān rō. Achí yá.

Siquī jeē ma ténuū yō ndajniñu cúcá

13 Yūcuán na te ñi tēe íne nuū ñáyuu cuehē un ní cahān de jíin Jesús:

Maestro, cahān ni jíin ñani na jéē na tahú sáva de tahū na jíin de, achí de.

14 Te ni cahān yā jíin de:

¿Ndé ñi ni jeni ruhū jeē ndacu ri jniñu tahū sáva tahū rō? Achí yá.

15 Te ni cahān gā yā:

Condito ró máá ró jijnáhan ró jéē ma ndíyo ni rō xūhun jíin táca gá. Chi vésú cuehē ndasí ndajniñu névāha ñi tēe, te nasūu jéē yūcuán sáha jeē quéndōo ndetū de, achí yá.

16 Yūcuán na te ni cahān yā ñi jnūhun yátá jíin i:

Ni íyo ñi tēe cúcá jeē névāha ñi hun jeē cúu vāha ndasí itu. 17 Te tēe cúcá un ní nacani ni de: ¿Ndese sáha ri? Chi tuá ndé cuhun ñiñi ri. Achí de. 18 Te ni jeni ni de: Suhva na sáha ri. Na cánu rī táca yácā rī, te nasáha ri jeē náhnu ga. Te yūcuán chuvāha ndihí ri ñiñi ri jíin táca ndajniñu ri. 19 Yūcuán na te cahān rī jíin ánuá rī: Vijna te cuehē teyí névāha yó jéē canda cuehē cuiyā. Na ndétātu yó te caji yō coho yó, te na cúsiñi ni yō, ni jeni ni de. 20 Te ni cahān Yaā Dios jíin de: Tēe cánéé cúu ró. Chi jecuáa vijna cuu rō, te táca jéē ní chuvāha ró, ¿ndé tée cuu? Achí Yaā Dios jíin de. 21 Te súcuán ndoho táca tée jeē sacúcá de máá de, te tu ndúcú de jeē quéndōo ndetū de sáha Yaā Dios. Achí yá.

Yaā Dios ndíto ya yohó
(Mt. 6.25-34)

22 Te ni cahān yā jíin tée cáscuáha jíin yá:

Núu súcuán te cáhán rī jíin ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun ró. 23 Chi Yaā Dios ni sáha ya jeē técu rō jíin yiquí cúñu rō, te nagā ni cuu jeē ma cuáha ya jeē caji rō jíin jéē cuhun ró. 24 Condēhe ró ndese cátecu quiñi cácuu nájñūhun calú, chi tu cátaji ti, ni tu cánastútú tí jeē chívāha ti, ni tú yacā tí. Te vésú súcuán te máá Yaā Dios scáji yā tí. Te cánuú ndasí gá ró jijnáhan ró vésú táca quiñi ún. 25 ¿Te ndé ñi rō, á cuu scuéhnu ró máá ró sava metro gā, vésú na nácani ndasí ni rō? 26 Te núu ma cúu sáha ró vésú ñi jniñu lúlí súcuán, ¿te najehē cánacani ndasí ni rō siquī jeē caji rō jíin jéē cuhun ró?

27 'Condēhe jijnáhan ró ndese jéē ita táca yúcū. Chi tu sájniñu, ni tu táu. Te cáhán rī jíin ró jeē ni rey Salomón, quiñi ní ñi hun de sahma váha ndasí, tu ní ñi hun de sahma lúu súcuán nájñūhun ita ún. 28 Te núu súcuán jéhe Yaā Dios sahma lúu ita un jéē jéē vijna te sajnē cayū nuū ñi hún, te nagā ni cuu róhó jijnáhan ró jéē ma sáha ya jeē nihín rō sahma. ¿Te naun tu cácandíje ñi hin ró jéē ndíto ya rohó? 29 Núu súcuán te ma nácani cuíhyá ni rō ndese caji rō ndese coho ró. 30 Chi táca ñáyuu ñayiví jéē tu cácandíje cúu jeē máni siquī jeē yáha cándihví ni i. Te máá ró jijnáhan ró, chi íyó Tátá rō andiví, te jíin yā jeē cajiñi ñi hún ró táca jéē yáha. 31 Te sa suhva cánuú gá jeē cóndihví ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō táca jéē yáha.

Ndese coo cúcá yó nde andiví
(Mt. 6.19-21)

32 'Ma yūhu ró jijnáhan ró chi cácuu ró nájñūhun lanchi ri. Chi vésú jecu-ni cácuu ró, te máá Tátá rō cúsiñi ni yā jeē quiñi coo ró ñi nuu nuū ndácu ya jniñu. 33 Xico ró jeē cánevāha ró, te cuāha ró xūhun un núu ñáyuu ndahú. Te súcuán caya ró tahū rō nde andiví núu ma cútúhú, nájñūhun jeē chívāha ró xūhun ini yijni. Chi nde andiví te ma náa jeē váha conevāha ró. Chi yūcuán

má quívi ñacuĩhná, ni ma cúu stívi tiquíxin. ³⁴ Chi nde nuū nihín rō tahū vāha ró, yūcuan cúu nuū cóndihvī ni rō siquī.

Jeē na cóo tūhva yó jēē ndēē yā

³⁵ 'Coo tūhva ró jíjnáhan ró jēē ndēē Jitoho rō, te coo ró nájnūhun mozo jeē nastān i lámpara i. ³⁶ Chi íyó tūhva i te cándetu i jeē ndēē patrón i jeē cuahán de vico nándāha. Chi núu ni ndee de te cahán de, te nune-ni i yéhyí jíjnáhan i. ³⁷ Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jíin ró jeē maá patrón sātūhva de máá de, te scúcoo de i mesa te cani de cohō i. ³⁸ Te vēsú cucuéé de ndee de nde sava ñuú, chí jēē néē gā, te núu cuni de jeē súcuan cándito mozo de, te yōhyo ndetū i jíjnáhan i núu súcuan. ³⁹ Te na jécūhun ni rō jeē cahán jnūhun yátá yáha: Tēe chíi vehe, núu ni jini de na hora quiiji ñacuĩhná, te condito de, te ma cuáha de jnūhun jeē sacuíhná vehe de núú. ⁴⁰ Te suni súcuan coo tūhva ró jíjnáhan ró, chí núu tuú, te máá hora jeē tú na vé cájeni ni rō, te ndee ruhū, Yāā ní nduu tēe. Achí yá jíin de.

Jnūhun mozo vāha jíin mozo tu squícu

(Mt. 24.45-51)

⁴¹ Yūcuán na te Pedro ni cajnūhún de ya:

¿A jíin máá-ni ná jíjnáhan ná cahán ni jnūhun yátá yáha, chí suni cahán ni jíin ndihí ga ñayuu? achí de.

⁴² Te ni cahán maá Jitoho yō:

Cahán rī jíin ndé-ni ñayuu cúu nájnūhun mozo jeē ndito xinī te squícu vāha. Te máá patrón sáha de jeē condiso jníñu i coto i ñayuu vehe de, návāha scáji i máá hora. ⁴³ Te yōhyo ndetū mozo un jēē núu ni ndee patrón, te cuni de jeē súcuan squícu vāha i. ⁴⁴ Jendaá cahán rī jíin ró jeē cani de mozo un jēē cóto i ndihí ndajníñu de. ⁴⁵ Te núu jéni ni i jeē ma ndíji yachī patrón i, te quejéé i cani i tēe jíin ñahan cácuu jnáhan mozo i, te caji i coho i te najīni i, ⁴⁶ núu súcuan te ndee-ni patrón quívi jeē tu ndétu i

jíin hora jeē tú na vé jéni ni i. Te stóho xeēn de i, te squívi de i ndoho i jíin ñáyuu tu cásquícu.

⁴⁷ Te mozo jeē jíin i ndese nújnahan ni patrón i, te núu tu sātūhva i ni tu squícu i jeē cuni de, ndoho xeēn i jíin yujnu xíi. ⁴⁸ Te mozo jeē tu jíin i ndese nújnahan ni patrón i, te núu sáha i jniñu jeē cani de i, núu súcuan te cūhva-ni cani de i. Chi ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjníñu ya i, suni cuehē gā nandacān yā nuū i.

Jeē siquí Jesús te cusín ini ñayuu (Mt. 10.34-36)

⁴⁹ 'Ni quee rī jeē nájnūhun jeē scuiquín rī ñuhūn ini ñayívi, te suu cúu jeē cusín ini ñayuu jeē siquí ruhū. Te cúní rī jeē yachī coo súcuan, návāha quívicoo ñayuu ndaha Yāā Dios. ⁵⁰ Te íyó ñn jnūndóho cánuú ndoho ri, te cúcuíhyá ndasí ni rī chí nde jínu ndoho ri, te ndusī ni rī. ⁵¹ ¿A cájeni ni rō jeē véji ri jeē cóyūcu mánī ñayuu ñayívi? Cahán rī jíin ró jeē tuú, chí sa suhva jeē cusín ini ñayuu jeē siquí ruhū. ⁵² Chi nde vijna te quejéé jēē uhūn ñayuu ñn vehe, sásín máá jíjnáhan, unī siquí uú, te uū siquí uní. ⁵³ Chi tátá cusín ini jíin séhe yí, te séhe yí jíin tátá, te náná jíin séhe síhí, te séhe síhí jíin náná, te náná chíso jíin séhe jēnú, te séhe jēnu jíin náná chíso. Achí yá.

Jeē ni cahán yā siquí seña andívi (Mt. 16.1-4; Mr. 8.11-13)

⁵⁴ Te suni ni cahán yā jíin ñáyuu cuehē ún:

Núu cájito ró jeē náne vicō ichi núu cáne niāndii, te cácahān rō jeē cuun saū, te súcuan cúu. ⁵⁵ Te núu quée tachī vēji ichi sur te cácahān rō jeē nandii, te súcuan cúu. ⁵⁶ Tēe stáhú-ni cácuu ró. Chí cájecūhun ni rō ndese steén seña andívi jíin ini ñayívi, ¿te naun tu cájecūhun ni rō ndé ñn cúu ruhū jeē sáha ri tācá jniñu jéhnu tiempo yáha?

*Jeē cóndihvī ni yō jeē ma cóndee
cuēchi siquī yō*

(Mt. 5.25-26)

⁵⁷ ¿Te najehē tu cáncani ni maá ró ndé ñn cúu jniñu ndaā sáha ró? ⁵⁸ Te núu ñn ñayuu quihīn i jíin ró nuū tohó jeē cacán i cuēchi siquī rō, núu súcuan te níni cuáhān rō jíin i ichi te condihvī ni rō sándaā rō jíin i. Chi núu tuú, te squívī i róhó núu juez, te juez siáha de róhó núu policía, te policía chune de róhó vecāa. ⁵⁹ Te jendaá cahán rī jíin ró jeē ma quénda cuiti rō yūcuán chi nde chunaa rō ndihī cuiti xūhun cájicān de. Te suni súcuan condihvī ni rō cahān ndahú ró jíin Yaā Dios, návāha ma ndácunehen ya cuēchi siquī rō. Achí yá jíin de.

*Jeē cánuú nacani ni yō jeē stóo yó
cuéchi yó*

13

¹ Te ñn quivī yúcuán ní quecoo jecu tēe, ni canacani de jñūhun nuū yā ndese ni candoho jecu tēe Galilea. Chi ná cájehni de quitī jeē socó de, te ni quecoo mozo Pilato ni cajehni tēe ún.

² Te ni cahān Jesús:

Tēe Galilea un, ¿á cájeni ni rō jeē súcuan ni candoho de siquī jeē xeēn gā ni íyo cuēchi de vēsú tāca gā ñayuu Galilea? ³ Cahán rī jíin ró jeē tuú. Te róhó jíjnāhan ró suni jnahnū ndetū rō núu tú nacani ni rō jeē stóo ró cuéchi ró. ⁴ Te xahūn unī tēe jeē ní cotúú torre Siloé siquī de, te ni cajihī de, ¿á cájeni ni rō jeē ní casáha de cuēchi xeēn gā vēsú tāca gā ñayuu ñuu Jerusalén? ⁵ Cahán rī jíin ró jeē tuú. Te máá ró jíjnāhan ró, suni jnahnū ndetū rō núu tú nacani ni rō jeē stóo ró cuéchi ró.

Jñūhun yátá núndēhe higo

⁶ Yūcuán na te ni cahān yā jñūhun yátá yáha jēe steén yā ndese cácuu ñayuu tu squícu jñūhun Yaā Dios:

Cácuu i nájnūhun ñn nundēhe higo jeē ín nuū ñūhun ñn tēe. Te ni jecondēhé de núu ín ndehē xinī, te tú na vé ín. ⁷ Te ni cahān de jíin mozo sájniñu nuū ñūhun de: Vijna te je íyo

únī cuiyā jeē quíji ri nducú rí ndehē xinī yújnu higo yáha, te tú na vé cúun xinī. Núu súcuan te cahnde rō, chi máá jēe sajnēñu nuū ñūhun, áchí de. ⁸ Te ni cahān mozo un jíin de: Stóo ní na cuñi ñn na cuiyā, te na nástáyā ná jéhē te chuhun ná jéhen. ⁹ Te na cóndēhe yó núu tú cuun ndehē inga cuiyā. Te núu tuú, te tahndē, achí mozo. Achí yá.

*Jeē ní nasávāha ya ñn ñahan quivī
ndétátú*

¹⁰ Te ñn quivī ndétátú te stéén Jesús jñūhun ini vehe iī sinagoga. ¹¹ Te íyó ñn ñahan jeē ní cuu xahūn unī cuiyā huhú ña. Chi ñn tachī ni sáha jeē jíca tñhī ña, te tuá cúu cuiti caca jnuu ña. ¹² Te ni jito Jesús nuū ña, te ni cana ya ña, te ni cahān yā jíin ña:

Vijna te nduvāha ní jēe huhú ni.

¹³ Te ni soó yá ndaha ya siquī ña, te ni nucuñi jnuu-ni ña, te ni nacuatáhú ña nuū Yaā Dios. ¹⁴ Te tēe cújehnu ini vehe iī sinagoga, ni quitī ni de nuū Jesús jeē ní nasávāha ya ñahan un quívī ndétátú. Te ni cahān de jíin ñayuu:

Íñū quivī iyó jēe sájniñu yó, te tāca quívī ún quijícoo ró nduvāha ró. Te quívī ndétátú chi ma cúu, áchí de.

¹⁵ Yūcuán na te ni cahān maá Jítoho yō jíin de:

Tēe stáhú-ni cácuu ró. Quivī ndétātu ¿á tu cándají ró stiquī rō burro ró jēe quíscóho ró tí ndute? ¹⁶ Te ñahan yáha jēe cúu ña ñn sēhe yucūn Abraham, chi nájnūhun ni conuhnī ña xahūn unī cuiyā ni sáha Satanás. ¿Te á tu íyó váha jeē nájnūhun nandají rí ña nuū cuehyī ndóho ña quivī ndétátú? Achí yá.

¹⁷ Te jeē ni cahān yā súcuan, te tāca tēe cájito uhū de ya, ni cacucanu de. Te ndihī ñayuu ún chi ni cacusiñi ni i jíto i tācá jniñu jéhu sáha ya.

*Jñūhun yátá siquī ndiquin mostaza
(Mt. 13.31-32; Mr. 4.30-32)*

¹⁸ Te ni cahān yā:

Na cahán rī ñn jñūhun yátá návāha cuni rō ndese ndúcuehē ñayuu ndácu Yaā Dios jniñu nuū. ¹⁹ Ndúcuehē i nájnūhun jéhu ñn ndiquin mostaza

jeē jéquin ñn tēe nuū ñúhun de, te ndúu nájnūhun ñn yujnu. Te cúu cáhnu, te tãcá saa chi cásáha tĩ tacã tĩ chĩji ndaha ún. Achí yá.

Jnūhun yátá síquī levadura
(Mt. 13.33)

²⁰ Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū: ²¹ Cúu nájnūhun levadura jeē ní quihin ñn ñahan, te ni saca ña jíin únĩ kilo harina, te ni ndaa ndĩhi ñujen ni sáha. Achí yá.

Siquī jeē quivī yó yéhyí túū
(Mt. 7.13-14, 21-23)

²² Te jíca Jesús jeē cuahán yā ichi ñúu Jerusalén, te yáha ya tãcá ñuu náhnu jíin ñuu lulí, te stéén yā jnūhun.

²³ Te ñn ñayuu ni cajnūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

²⁴ Condihvī ni rō quivīcoo ró ndaha Yaā Dios. Chi cúu nájnūhun ñn yéhyí túū. Te cáhán rī jíin ró jeē ñn quivī te cuehē ñayuu nducú i quivīcoo i, te ma cúu ga. ²⁵ Te quivī ún te sáha ri nájnūhun ñn tēe chí vehe jeē ndocuñĩ de te nacasi de yéhyí. Te ichi yátá véhe cuiñi ró jíinahan ró, te scáján ró yéhyí, te cahān rō: Nune ní yéhyí na quivīcoo ná. Te cahān de jíin ró: ¿Ndé nuū véjicoo ró? Chi tu jíin rī rohó, achi de. ²⁶ Yūcuán na te quejéé ró cahān rō jíin de: Ni cayeji ná ni cajihí ná jíin ní, te ini calle ñuu na ní steén ni jnūhun, achi rō. ²⁷ Te cahān maá de: Cáhán rī jíin ró jeē tu jíin rī rohó ndé chi véjicoo ró. Cuijiyo quingoo ró, chi ñayuu casáha jniñu néé cácuu ró. Achi de. ²⁸ Te quivīcoo ró núu ndahyú rō, te nacayihí yuhu ró jéé ndoho xeén rō. Te coto ró núu Abraham jíin Isaac jíin Jacob jíin ndĩhi tēe ni canacani jnūhun Yaā Dios, cáyūcú de ñuu nuū ndácu ya jniñu. Te rōhó, vésú cácuu ró yúcūn de, te quivīcoo ró núu ndoho ró. ²⁹ Te cuehē ñayuu, vésú tu cácuu i yucūn de, te quijicoo i ichi núu cáne niāndii jíin ichi núu quée niāndii, ichi norte jíin ichi sur. Te cucōo i mesa caji i staā

ñuu nuū ndácu Yaā Dios jniñu. ³⁰ Te sava ñayuu jeē vijna cácuu i sandĩhí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandĩhí. Achí yá.

Jeē ní cucuíhyá ni yā síquī ñáyuu ñuu Jerusalén
(Mt. 23.37-39)

³¹ Te máá quivī un ní quecoo jecu tēe fariseo, te ni cacahān de jíin yá:

Cuijiyo ní quihīn ní inga lado, chí cúnĩ Herodes cahni de níhín, áchĩ de.

³² Te ni cahān yā:

Cuángoo te castūhun ró nuū tēe mañoso un jéé ná tu jinū quivī cuu rī, chí vijna jíin sájnē quenehen ri tachĩ ini ñayuu, te nasávāha ri ñayuu cácuu. Te isá te jíin jniñu sáha ri, achi rō.

³³ Chi cánuú jéé cáca ri quihīn rī vijna jíin sájnē jíin isá, te jinū rī Jerusalén. Chi tēe cánacani jnūhun Yaā Dios, tu cájihĩ de inga lado, chí máá-ni ini ñuu Jerusalén cájehni i de. Achí yá.

³⁴ 'Róhó ñuu Jerusalén, jéhni rō tēe cánacani jnūhun Yaā Dios, te jéhe ró yúu xinĩ téé tájí Yaā Dios véjicoo nuū rō. Te cuehē jíin ni cuni rī nastútú rí sēhe ró, nájnūhun ndují jéé nastútú tĩ sēhe tĩ chĩji ndijēn tĩ, te tu ní cúnĩ rō. ³⁵ Núu súcuan te vijna te stóo uun na ri rohó jíin séhe ró. Te cáhán rī jíin ró jéé ndé vijna te ma cóto cuiñi gā rō nuū rī, chí nde quiji quivī jeē cahān séhe ró: Yōhyo vāha Yaā cúu Yaā véndiji jíin jniñu máá Jítoho yō Yaā Dios, achi i. Achí yá.

Jeē ní nasávāha ya ñn tēe cúhú cuehyī cuiñi

14

¹ Te ñn quivī ndétātu ní jehēn yā vehe ñn tēe fariseo cujéhnu, ni jecaji yā staā jíin de. Te tãca gá tēe fariseo cájito yuhu de ya núu stívĩ yá. ² Te yúcuan íne ñn tēe cúhú de cuehyī cuiñi, índichi de nuū yā. ³ Te ni cajnūhun yā tēe cástéén tutu ley Yaā Dios jíin táca tēe fariseo:

¿A íyó ley jeē nasávāha ri ñayuu cácuu quivī ndétātu, chí tuú? áchĩ yá.

⁴ Te máá de tu ní cacahān cuiti de. Te ni jñi ya tēe cūhú un, te ni nasávāha ya de, te ni cahān yā jeē na nūhun de vehe de. ⁵ Te ni cahān yā jín de jínáhan de:

¿Ndé ñn rōhó núu burro ró chí stíquī rō ñingava ti ini pozo, te á tu yachī natava rō tī vēsú quivī ndétātu cúu, chí naún? Achí yá.

⁶ Te tu ní cúu stío cuñí de ni ñn jñuhun nuū yā jeē súcuan ni cahān yā.

Jñuhun siquī ñayuu jéngoo vico

⁷ Te ni jito Jesús jeē tēe ni cataca ún, cánacāji de silla yñúhún gá nuū mesa cucōo de. Te ni cahān yā jñuhun yáha jín de:

⁸ Núu ñn tēe cana de jeē quihín rō ñn vico nándāha, te ma cucōo ró lugar nuū yñúhún gá. Chí núu súcuan te sanaa te je ni cana de ñn tēe cújéhnū ga vēsú rohó. ⁹ Te quee tēe ni cana rōhó, te cahān de jín ró: Ndonga, te na cucōo tēe yáha jíñā. Yūcuán na te cucanu rō jeē quihín rō cucōo ró ndé sandíhí na. ¹⁰ Chí sa suhva núu ni cana ñn tēe rōhó, te cucōo ró ndé lugar sandíhí na. Te núu quee tēe ni cana rōhó, te cahān de jín ró: Amigo, nehen cucōo ró ñn lugar nuū yñúhún gá, achi de. Yūcuán na te ñayuu cáyūcu mesa jín ró coto i jeē sajhéhnū de rōhó. ¹¹ Súcuan ni cahān rī jñuhun yáha návāha cuni rō jeē táca ñayuu jeē sajhéhnū i máá i, nuu i sáha Yaā Dios. Te ñayuu jeē snúū i máá i, ndujéhnū i sáha ya. Achí yá.

¹² Te suni ni cahān yā jín tēe ni cana ya yéji yā staā:

Núu sáha ró ñn vico cúsamá chí jeē cuxíni, te ma cána ró ñayuu cácuu amigo rō, jín ñani rō, jín jnáhan ró, jín ñayuu cucá. Chí núu súcuan te suni máá i nacana i rōhó, te súcuan nanihín rō jeē ni jéhe ró. ¹³ Chí sa suhva núu sáha ró vico, te cana ró ñayuu ndahú, ñayuu cuhdú, ñayuu chacuá, jín ñayuu cuaá. ¹⁴ Te súcuan te quendōo ndetū rō, chí ma cúu nacūāha i nuū rō. Te nihín rō tahū rō quivī nátecu ñayuu ndaā, achí yá.

Jñuhun yátá síquī vico cúxíni

¹⁵ Te ñn tēe yéji staā jín yá, ni jini de jñuhun yáha, te ni cahān de jín yá:

Yōhyo ndetū ñayuu jeē cáji staā nde ñuu nuū ndácu Yaā Dios jniñu, áchí de.

¹⁶ Yūcuán na te ni cahān Jesús ñn jñuhun yátá jeē steén yā jeē cána Yaā Dios ñayuu quivicoo i ñuu nuū ndácu ya jniñu:

Ñn tēe ni sáha de ñn vico cáhnu cuxíni, te ni tají de mozo ni cana cuehē ñayuu. ¹⁷ Te máá quivī cuxíni, te ni tají de mozo de cuacana ñayuu jeē quíjicoo caji staā: Nehen ní jínáhan ní, chí je íyó túhva ndíhi, áchí mozo. ¹⁸ Te ndíhi i ni cacahān i jeē na cóne cáhnu ni de chí ma quíngoo i. ñn tēe ni cahān de: Sáa ní jeen rī ñn ñuhun te cánuú quícondēhe rí, te na cóne cáhnu ni de chí ma jeé rī. Achí de. ¹⁹ Te inga de ni cahān: Ni jeen rī uhūn yunta stíquī, te quihín rī coto ndee rī tī, te na cóne cáhnu ni de nuū rī chí ma jeé rī, achí de. ²⁰ Te inga de ni cahān de: Sáa ní quijnáhan rī, te jeē yúcuu ma cúu jeé rī, achí de. ²¹ Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quítī ni patrón, te ni cahān de jín mozo de: Yachī quihín rō táca calle náhnu jín calle lulí, te cana ró ñayuu ndahú, ñayuu cuhdú, ñayuu chacuá, jín ñayuu cuaá, na quíjicoo i vico, áchí de. ²² Te ni jehēn mozo, te ni ndee de, te ni cahān de jín patrón de: Je ni sáha ná jéē ni cahān ní, te cúmanī gā ñayuu te chitú vehe ní, áchí de. ²³ Te ni cahān tucu patrón: Quihín tucu ró táca calle jín ichi, te cana fuerza rō ñayuu na quíjicoo i, návāha chitú vehe rī. ²⁴ Chí cáhán rī jín ró jeē ní ñn tēe ni cana rī xīhna ñúhún, ma cuáha cuiti rī jñuhun jeē cuxíni de vehe rī, achí de. Achí yá.

Jñuhun jeē cánuú nacani vāha ni yō te condiquīn yō Cristo

²⁵ Te cuehē ndasí ñayuu cándiquīn i Jesús cuangoo i jín yá, te ni ndió cóto ya nuū i, te ni cahān yā jín i:

²⁶ Núu na-ni ñayuu cuní condiquīn ruhū, te núu manī gā i jín tátá i, náná i, ñasíhí i, sēhe i, ñani i, cuāha i, vēsú jín ruhū, ma cúu cuu i ñayuu scuáha

jíin rí. Te núu ndíhví gā ni i síquī jeē cóo vāha máá i vēsú jeē cóndiquīn i ruhū, te suni ma cúu tucu. ²⁷ Te na-ni ñayuu núu tu jéhe i jnūhun ndoho i jnūndóho vēsú nde cuu i jeē síquī jeē cóndiquīn i ruhū, te ma cúu cuu i ñayuu scuáha jíin rí. ²⁸ Chi núu ndé ñn ró cúní rō sáha ró ñn vehe cáhnu, ¿á tu cánuú jéē xíhna gā cucōo ró te tava rō cuenta núu canda xūhun jéē sínu ró? ²⁹ Chi núu tuú, te núu je ni jequin rō cimientu, te tu cánda xūhun ró sínu ró, yūcuán na te tāca ñayuu sácatā i coto i rōhó. ³⁰ Te cahān i: Tēe yáha ní quejéé de sáha de vehe, te tu ní cánda de sínu de, achi i. ³¹ Te suni súcuan núu ñn rey quihīn de cuajnáhan de jíin inga rey jeē véji síquī de, ¿á tu cánuú jéē xíhna gā cucōo de te nacani ni de núu canda uxī mil soldado jeē cuajnáhan de jíin inga rey jeē véji síquī de jíin ócō mil soldado? ³² Chi núu tú canda de, te níni jíca gā véji inga rey, te tají de tēe cándiso jníñu, cajnūhún de na vé cuní inga rey jeē cuáha de nuū, te jecuiñi-ni. ³³ Te máá ró jijnáhan ró, suni súcuan cánuú jéē xíhna gā nacani ni rō cahnde ni rō stóo ró ndíhi jeē névāha ró, chi núu tuú te ma cúu cuu ró ñayuu scuáha jíin rí.

Jnūhun yátá síquī ññ
(Mt. 5.13; Mr. 9.50)

³⁴ Te ñayuu cá candíje cácuu i nájnūhun ññ. Vāha íyó ññ, te núu ññ ún na náa jeē uhvuá, ¿te ndese nduu uhvuá tucu? ³⁵ Tuá cuajníñu cuítí, ni jeē chúhun ñayuu nuū ítu, ni jeē ndúu jēhen, chi máá cate iñ-ni i. Tāca rōhó jéé jíni sōho, na chúsóhó ró. Achí yá.

Jnūhun yátá síquī lanchi ní sana
(Mt. 18.10-14)

15

¹ Te tāca tēe cástútú xūhun renta jíin táca gā tēe cásáha cuēchi, ni quecoo de nuū Jesús jeē cuni sōho de jnūhun cáhán yā. ² Te tāca tēe grupo fariseo jíin tēe cástéén tutu ley Yāa Dios, ni cacahān de síquī yā:

Tēe yáha jétáhú de tāca tēe cásáha cuēchi te yéji de jíin, áchí de.

³ Te ni cahān yā jnūhun yátá yáha jíin de:

⁴ ¿Ndé ñn ró núu névāha ró ñn ciento lanchi, te núu scuíta ró ñn tí, te á tu stóo ró cúun xico xahūn cuūn gā tí yucu, te quinanducú ró quítí ní sana ún ndé nanihīn rō tí? ⁵ Te núu ni nanihīn rō tí, te coso sūcun ró tí, te cusī ni rō. ⁶ Te núu ni ndee rō vehe ró, te nastútú ró tācá amigo rō jíin ñayuu yúcu yajni jíin ró, te cahān rō jíin i: Na cúsī ni yō, chi ni nanihīn rī lanchi rī jeē ní sana. Achi rō. ⁷ Te cáhán rī jíin ró jeē suni súcuan cúu nde andíví. Chi cúsī gā ni yā jíin ñn ñayuu iyó cuēchi núu nacani ni i jeē stóo i cuēchi i, vēsú jíin cúun xico xahūn cuūn ñayuu iyó ndāa jeē tuá jíni ñūhún nacani ni i.

Jnūhun yátá síquī ñahan ní scuíta xūhún

⁸ Te núu ñn ñahan névāha ña uxī peso cāa, te núu scuíta ña ñn, ¿á tu nastīn ña lámpara te nastāa ña vehe, te nanducú yúcun ña nde nanihīn ña? ⁹ Te núu ni nanihīn ña, te nastútú ña tācá amiga ña jíin ñayuu yúcu yajni jíin ña, te cahān ña jíin i: Na cúsī ni yō, chi ni nanihīn rī xūhun jéē ni scuíta rī. Achí ña. ¹⁰ Te cáhán rī jíin ró jeē suni súcuan cúsī ni tācá ndajéhé Yāa Dios síquī ñn ñayuu iyó cuēchi núu nacani ni i jeē stóo i cuēchi i. Achí yá.

Jnūhun yátá síquī sūchi ní jéhēn jecó

¹¹ Te ni cahān gā yā:

Ñn tēe ni íyo uū sēhe yí de. ¹² Te tēe suchí gā ni cahān i jíin tátá i: Tátā, tahú sáva ní ndajníñu ní, te cuāha ní sava cuu tahū ná, áchí i. Te ni tahú sáva de tahū ndíndúú i. ¹³ Te ni cuu jecu-ni quiví, te tēe suchí gā un ní stutú ndíhi i ndajníñu i. Te ni quenda i cuahān i ñn ñuu jíca. Te yūcuan ní snāa i tahū i, chi ni jexīn cáhá i. ¹⁴ Te ná ni ndíhi ni jexīn i, te ni quee ñn jnamā xeén ini ñuu ún, te ni quejéé cúmanī jeē cáji i. ¹⁵ Yūcuán na te cuanducú jníñu i nuū ñn tēe ñuu ún. Te ni tají de i cuahān i rancho de jeē cóto i quíní de. ¹⁶ Te cúní i caji i vēsú soō ndúchi jeē cáyeji quíní ún, návāha ndutú chíji i. Te ni ñn ñayuu tú na vé jéhe nuū

i. ¹⁷ Yūcuán na te ni quejéé i nácani ni i: Tāca mozo casájniñu vehe tátá rī, íyó cuéhē staā cáyeji i. Te ruhū chi jíi rī sōco yāhá. ¹⁸ Na quínuhun rī nuū tátá rī, te cahān rī jíin de: Tátā, ni sáha ná cuéchi nuū Yaā Dios jíin núū maá ní. ¹⁹ Vijna te nasūu gá tēe vāha cúu ná jēe cónaní ná sēhe ní. Te cuāha ní jnúhun cuu ná nájnūhun ñn mozo ni, achi rī. ²⁰ Yūcuán na te ni naquihin i ichi cuanuhun i vehe tátá i.

Te níni jíca gá vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techūhú de i. ²¹ Yūcuán na te ni cahān i jíin de: Tátā, ni sáha ná cuéchi nuū Yaā Dios jíin núū maá ní. Vijna te nasūu gá tēe vāha cúu ná jēe cónaní ná sēhe ní. Achí i. ²² Te máá tátá i chi sa ni cahān de jíin táca mozo de: Cuáquihin sahma váha ga te chuhun ró i. Te chuhun ró ñn xehyu ndaha i, te chihi ró ndíjēn jehē i. ²³ Te quiquihin ró becerro xéhen, te cahni rō tī na cáji yō, chi sáha yó vico. ²⁴ Chi sēhe yí rí yáha, nájnūhun je ni jihī i, te ni natecu i. Chi tu ní jíni rī ndé chi ní jéhēn i, te ni ndee i, áchí de. Te ni caquejéé de casáha de vico.

²⁵ Te sūchi jévāha, íne i nde rancho, te vëndiji i, te ni cuyajni i yatā véhe. Te ni jíni i jēe cúu yaa te cájita jéhé ñáyuu. ²⁶ Te ni cana i ñn mozo, te ni cajnúhún i na vé cúu jēe cúu. ²⁷ Te ni cachi mozo un núū i: Ni ndee ñani rō, te tátá rō ni jehni de becerro xéhen, chi ni ndee vāha i nuū de, áchí mozo. ²⁸ Yūcuán na te ni quiñi ni sūchi jévāha, te tu ní cúní i ndívi i. Te ni quenda tátá i, te ni cahān ndahú de jíin i jēe na ndívi i. ²⁹ Te ni cahān i jíin tátá i: Níní sáha ná jniñu ndácu ní, te tu cúnihni cuiñi ni na núū ní. Te tu jéhe ní vēsú ñn lítú núū ná, jēe sáha ná vico caji na jíin táca amigo na. ³⁰ Te ni ndee sēhe ní yáha jēe ni jéñin cāhá i xūhun ní jíin táca ñahan. Te ni jehni ní becerro xéhen caji i, áchí i jíin tátá i. ³¹ Yūcuán na te ni cahān de jíin i: Séhē, rōhó chi níni ndéé ró jíin rí, te ndíhi jēe névāha ri chi suni cuenta maá ró cúu. ³² Te vijna chi íyó váha jēe sáha yó vico te cusñi ni yō. Chi ñani rō

yāhá, nájnūhun ni jihī i, te ni natecu i. Chi tu ní jíni yō ndé chi ní jéhēn i, te ni ndee i, áchí de. Achí yá.

Jnúhun yátá síquī mozo jēe ni stáhú de patrón de

16

¹ Te suni ni cahān Jesús jíin tēe cáscuáha jíin yá:

Ñn tēe cúca ní ñyo ñn mozo de jēe ndíso jniñu nuū tāca gá mozo. Te ni cacahān jíin patrón un jēe mozo un snāā cāhá ndajniñu de. ² Te ni cana de mozo un, te ni cahān de jíin: ¿Na jnúhun cúu yāha jēe nihín rī síquī rō? Nacuāha cuenta jniñu ndíso ró, chi ma cóndiso jniñu ga rō nuū mozo rī. Achí de. ³ Yūcuán na te jéni ni maá de: ¿Ndese sáha ri vijna? Chi patrón rī quenehen de jniñu ri. Te tú ndacuī rī jēe cáte ri ñuhun, te jēe cacán rī caridad chi cúcanu rī. ⁴ Núu súcuan te jíni rī ñn jēe sáha ri, návāha ñayuu cájeen nuū patrón rī, cuāha i vehe condee rī núu na quée quiñi jēe quenehen de jniñu ri. ⁵ Te ni cana de ná ñn ná ñn tēe jēe cátaū nuū patrón de. Te ni cajnúhún de ñn: ¿Nasaa táu rō nuū patrón rī? ⁶ Te ni cahān tēe ún: ñn ciento barril aceite, achí de. Te ni cahān mozo un: Yāhá na cuáha ri lista rō, te cucōo yachí rō, te na sáha ró inga lista jēe uú xico uxī na, achí de. ⁷ Yūcuán na te ni cajnúhún de inga tēe: Te rōhó, ¿nasaa táu rō? Te tēe un ní cahān de: ñn ciento cajón trigo, achí de. Te ni cahān de jíin tēe ún: Yāhá na cuáha ri lista rō, te na sáha ró inga lista jēe cuún xico na, áchí de. ⁸ Yūcuán na te patrón ni cahān de: Nacā jēe ndichí ní sáha tēe cúnéé un, áchí de. Te cāhán rī jíin ró jēe ñáyuu ñayívi yáha, ndichí gá casáha i jēe quendōo vāha i nuū jñahan i, vēsú ñayuu cácanñe nuū Yaā Dios.

⁹ Núu súcuan te cāhán rī jíin ró jēe ndichí gá na sáha ró vēsú jēe ni sáha mozo ndichí un. Chi ini ñayívi yáha nuū yíhi cuéchi, na sáha ró jniñu váha jíin xūhun ró, cuāha ró núu ñáyuu ndahú, návāha vēsú núu ni

ndihí xūhun ró ñayīvi yáha, te quívicoo ró andiví núu coo vehe ró ní cáni.

¹⁰ Tēe jeē squícu vāha jíin ñin jniñu lúli-ni, suni squícu vāha de jíin jniñu cáhnu. Te tēe jeē stahú jíin ñin jniñu lúli-ni, suni stahú de jíin jniñu cáhnu. ¹¹ Núu súcuan te núu tu squícu vāha ró jíin xūhun jeē iyó ñayīvi yáha nuū yíhi cuēchi, te ma cuáha ya jeē vāha cuu ró ní cáni andiví. ¹² Te núu tu squícu vāha ró jíin ndajniñu jeē ni jéhe núu ya nuū ró ñayīvi yáha, te ma cuáha ya tahū cuu ró ní cáni.

¹³ Ni ñin mozo ma cúu cuajniñu de nuū uū patrón. Chi quiñi ni de nuū ñin te coo maní de jíin inga, chí squícu vāha de nuū ñin te sájéē ni de nuū inga. Te suni súcuan ma cúu cuajniñu ró núu Yaā Dios te núu máni siquī xūhun ndíhví ni rō, achí yá.

¹⁴ Te tēe fariseo ni casácatā de nuū yā jeē ní cajini de táca jñūhun cáhán yā, chí tēe cútóo xūhun cácuu de. ¹⁵ Te ni cahān yā jíin de:

Máa ró casáha ró jéē tēe ndaā cácuu ró núu ñáyuu. Te Yaā Dios chí jini yā ndese cáa ini anuá rō. Chi jniñu cájeni ni ñayuu jeē jniñu jéhnu cúu, te nuū Yaā Dios chí jniñu néé cúu.

Siquī ley Yaā Dios jíin siquī jeē ndácu ya jniñu

¹⁶ Nde ná tu quiñi Juan tēe scuándute, te ni iyo ley jeē ni jéhe Yaā Dios nuū Moisés, te suni ni castéén táca tēe canacani jñūhun ya. Yūcuán na te ná ni quiñi Juan, te ni quejéé jítē núu jñūhun vāha ndese ndácu Yaā Dios jniñu. Te táca ñáyuu nducú ndéyí i quívicoo i ndaha ya.

¹⁷ Te yí gá cúu jeē náā ñin letra nuū tutu ley yā vésú jeē náā andiví jíin ñayīvi, chí squícu ndihí jñūhun cáhán.

Siquī jeē ma stóo jnáhan tēe jíin ñahan (Mt. 19.1-12; Mr. 10.1-12)

¹⁸ Núu ñin tēe stóo de ñasihí de te quiñáhan de jíin inga ñahan, núu súcuan te cásiquí ndéē de ña. Te núu ñin tēe condeca de ñahan ní ndusín, suni cásiquí ndéē de ña, achí yá.

Jñūhun tēe cúca jíin Lázaro

¹⁹ Te ni cahān gā yā:

Ni iyo ñin tēe cúca, ní ñuhun de sahma lúu vāha ndasí. Te ndiquiví ni iyo vāha ndasí jéē ní yeji de. ²⁰ Te suni ni iyo ñin tēe ndáhú, nání de Lázaro, néne de yéhyí tēe cúca un, te ní cáhnu de ín ndíhyi. ²¹ Te máni cúní de jeē ndutú chíji de jíin stāa cuēchi jeē stívi tēe cúca un. Te quécúo ina te cányuu tí nuū ndíhyi de. ²² Te ni jihí tēe ndáhú un, te táca ndajéhé Yaā Dios cuangoo ya jíin ánuá de nde andiví nuū néne Abraham. Te suni ni jihí tēe cúca un, te ni quindūji de. ²³ Te tēe cúca un xeēn ndóho de íne de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jíin de. ²⁴ Yūcuán na te ni cana cóhó de: Tátā Abraham, cundáhú ni ní sáña, te tají ní Lázaro, na quíchundaji de xiní ndáha de nuū ndúte, te quiñi de stáji de yáá ná. Chi xeēn ndóho ná núu yáñuhūn yāhá. Achí de. ²⁵ Te ni cahān Abraham jíin de: Séhē, nucūhun ni rō jeē ni níhīn rō ndihí jeē vāha ná ni cotecu rō, te Lázaro chí sa suhva jñūndóho ni níhīn de. Te vijna je ni ndusí ni de yāhá, te róhó chí ndóho ró jíin. ²⁶ Te suni iyó ñin jeē cunú téyí, íne mēhñu yó jijnáhan yó. Te ñayuu cáhīn yāhá, vésú cácuu i yāha i jeē i nuū rō, te ma cúu. Te ni ma cúu yāha máa ró quiñicoo ró yáha. Achí Abraham. ²⁷ Yūcuán na te ni cahān tēe cúca: Núu súcuan te cáhán ndahú ná jíin ní, Tátā Abraham, tají ní Lázaro na quíhīn de vehe tátá na. ²⁸ Chi iyó úhūn gā ñani ná, te na quícatchi de nuū i jeē na nácani ni i te stóo i cuēchi i, návāha ma quívicoo i nuū ndóho ná yáha, achí de. ²⁹ Te ni cahān Abraham jíin de: Je cánevāha i tutu jeē ní tee Moisés jíin táca tēe ni canacani jñūhun Yaā Dios. Suu yūcuán na chúhun ni i, achí Abraham. ³⁰ Te ni cahān tucu tēe cúca: Vésú súcuan, Tátā Abraham, te núu ñin ñayuu ni jihí quíhīn nuū i, yūcuán na te nácani ni i jeē stóo i cuēchi i, achí de. ³¹ Te ni cahān Abraham jíin de: Núu tu chúhun ni i jñūhun ni nácani Moisés jíin táca tēe ni canacani jñūhun Yaā Dios, suni ma candíje cuíi i núu

natecu ñin ndiŷi quihin nuū i, áchí de.

Xeēn coo siquī ñáyuu squívi jnáhan nuū cuéchi
(Mt. 18.6-7, 21-22; Mr. 9.42)

17

¹ Te ni cahān Jesús jiin tēe cáscuáha jiin yá:

Máni íyó jēē nducú squívi ñayuu nuū cuéchi. Te nacā xeēn ndoho ñayuu jeē squívi jnáhan nuū cuéchi. ² Vāha ga núu ni conuhnī ñin yōso cáhnu sucūn i te quēe i chíji ndute mar, vēsú jeē squívi i ñin sūchi lúli yáha núu cuéchi. ³ Coto ma sáha ró súcuan jíjnáhan ró.

Te núu jnáhan ró sáha de cuéchi siquī rō, te cahān rō nuū de. Te núu nacani ni de, te cone cáhnu ni rō nuū de. ⁴ Te núu uxā jínu jeē ñin quívi sáha de cuéchi siquī rō, te núu uxā jínu nacani ni de te cahān de jiin ró jeē cone cáhnu ni rō chí ma sáha ga de, te cánuú cone cáhnu ni rō nuū de. Achí yá.

Jeē yóhyo cújéhu jnūhun cándije

⁵ Te tēe cácuu apóstol ni cacahān de jiin Jítóho yō:

Sáha ní jēē ñihin ga candíje ná jēē sáha Yaā Dios jeē cájicān na núu yā, achí de.

⁶ Te ni cahān maá Jítóho yō jiin de:

Núu cáccandíje ró vēsú ñin tíhli-ni, nájnūhun ñin ndiquin mostaza jeē tíhli-ni cáa, te cuu cahān rō jeē núyūhndu yáha na quénda te nucondichi nde nuū mar, te coo nájnūhun cahān rō.

Jeē cánuú squícu vāha yó núu yā

⁷ Ndé ñin ró íyó mozo rō jeē jítu de chí ndíto de quiti ndéca ró, te núu ni najinū de vehe ró, te tu cáhān rō jiin de jeē cúcōo de caji de staā. ⁸ Chí sa suhva cáhān rō: Sáha ró ndeyu cuxíni ri, te cani ró cóhō rī. Te núu ni cuu ni yeji rī ni jīhi ri, yūcuán na te caji maá ró coho ró, cácahān rō. ⁹ Te cácahān rō jeē tu cánuú nacuatáhú ró nuū mozo núu ni sáha de jniñu ní ndacu ró, chí jeē cánuú sáha de cúu. ¹⁰ Te suni súcuan maá ró jíjnáhan ró, cácuu ró mozo Yaā Dios. Te núu ni casquícu

ró táca jniñu ní ndacu ya nuū rō, te cahān rō: Tu cánuú nacuatáhú yá nuū rī, chí ni sáha ri máa-ni jeē cánuú sáha ri, achi rō. Achí yá.

Jeē ní nasávāha ya uxī tēe ndóho cuehyī stehyú

¹¹ Te jíca Jesús ichi cuahān yā ñuu Jerusalén, te ni yāha ya cuahān yā mēhñú región Samaria jiin Galilea.

¹² Te ni jinū yā ñin ñuu, te uxī tēe ndóho cuehyī stehyú ni quendacoo de vejnahan de ya, te jíca ní cajecuiñī de.

¹³ Te ni cacana jee de:

Jesús, Maestro, cundáhú ni ni sáña, achí de jíjnáhan de.

¹⁴ Te ni jito Jesús nuū de, te ni cahān yā jiin de:

Cuángoo te stéén rō maá ró nuū tāca sūtū jeē ní canduvāha ró, achí yá.

Te níni cuángoo de te ni canduvāha-ni de. ¹⁵ Yūcuán na te ñin-ni de ni nandió cóo de nuū Jesús, te cáhān jee de, nácuatáhú de nuū Yaā Dios jeē ní nduvāha de. ¹⁶ Te ni jecuiñī yití de nuū yā, te ni jequin de nuū de nde nuū ñūhun, te ni nacuatáhú de nuū yā. Te tēe Samaria cúu de. ¹⁷ Te ni cahān Jesús:

¿A násūú ndihúxí de ni canduvāha? Te ñin gā de, ¿naun tu ní cánandicó de nacuatáhú de? ¹⁸ ¿A máñuhún-ni tēe ñuu jíca yáha cúu jeē ní nandicó de nácuatáhú de nuū Yaā Dios?

¹⁹ Te ni cahān yā jiin tēe ún:

Ndocuiñī quinhun rō. Chí ni candíje ró jēē cuu nasávāha ri rohó, te jeē yúcuu ní nduvāha ró, achí yá.

Ndese coo quívi jeē ndíji ya ndacu ya jniñu

(Mt. 24.23-28, 36-41)

²⁰ Te tēe fariseo ni cacajnūhún de Jesús ndé quívi quejéé jēē ndácu Yaā Dios jniñu ini ñayívi. Te ni cahān yā jiin de:

Ma quēē ndijin jeē ndácu Yaā Dios jniñu. ²¹ Ni ma cúu cahān ñayuu: Yāha íne ya ndácu ya jniñu, chí: Yūcuu íne ya, achi i. Chí je ndácu Yaā Dios jniñu mēhñu ró jíjnáhan ró. Achí yá.

²² Yūcuán na te ni cahān yā jiin tēe cáscuáha jiin yá:

Quee tiempo jeē yóhyo cúu ni rō coto ró jéē ndiji ruhū, Yaā ní nduu tēe, te ma coto ró jíjnáhan ró. ²³ Te cahān ñayuu jíin ró: Yāha íne ya, chí: Yūcuan íne ya, achi i. Te ma quíngoo ró condēhe ró, ni ma cóndiquín rō i. ²⁴ Chi nájnūhun sáha taja jeē ndíndēē ñin lado andíví te cúndijin nde inga lado, suni súcuan cuu quíví ndíji ruhū, Yaā ní nduu tēe, chí ndíhi ñayuu coto. ²⁵ Te jíni ñúhún jéē xihna gā ndoho xeēn rī, te ñayuu iyó vijna, squéhichī i ruhū. ²⁶ Chi nájnūhun ni cuu quíví ni íyo Noé, suni súcuan cuu quíví ndíji ruhū, Yaā ní nduu tēe. ²⁷ Chi quíví un ní cayejí i, ni cajihí i, ni canandāha i, ni cajēhe i sēhe síhí i jeē nándāha, nde ni jinū quíví jeē ni quíví Noé ini barco cáhnu jeē naní arca. Te ni cuun saū xeén, te ni ndaa ndute ni cajihí ndíhi i. ²⁸ Te suni súcuan ni cuu quíví ni íyo Lot. Ni cayejí i, ni cajihí i, ni cajeen i, ni caxícó i, ni catajī i itu, ni cajeni i vehe. ²⁹ Te quíví jeē ní quenda Lot ini ñuu Sodoma cuahān de, te ni cuun ñuhūn jíin azufre ichi ándíví, te ni snāa ndíhi ñayuu. ³⁰ Te suni súcuan coo quíví jeē ndíji ruhū, Yaā ní nduu tēe.

³¹ Te quíví ún te ñayuu cáhīn yata véhe, te ndajníñu i ñúhun ini vehe, cáhān rī jíin i jeē ma ndíví i naquihin i, chí cánuú cunu yachī i jeē cácu i. Te suni súcuan ñayuu casájniñu nuū itu, ma quínuhun i vehe i jeē quíhin i ndajníñu i. ³² Te nucūhun ni rō ndese ni ndoho ñasíhí Lot jeē ni jíhī ña. ³³ Te núu ndé ñáyuu cuní i cácu i nuū jnúndóho quíji nuū i jeē síquí ruhū, núu súcuan te jnahnū ndetū i ní cáni. Te núu ndé ñáyuu, vésú na cúu i jeē síquí ruhū, te cotecu i ní cáni.

³⁴ Te cáhān rī jíin ró jeē quíví ndíji ri te quíxí uū tēe ñin jíto jecuáa, te ñin de naquihin ri, te inga de ndōo, chí tu ní cándíje de. ³⁵ Te coo uū ñahan jeē ndíco cáhnu, te ñin ña naquihin ri, te inga ña ndōo. ³⁶ Te uū tēe sájniñu de nuū itu, te ñin de naquihin ri, te inga de ndōo. Achí yá.

³⁷ Te jeē ní cajini de jnūhun yáha, te ni cacajnūhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jíin de:

Nájnūhun jeē cutútú téji ndé-ni cúu nuū catú quíti ní jíhī, suni súcuan coo tāca jéē ni cáhān rī ndé-ni cúu-ni nuū cáhīyo ñayuu.

Jnūhun yátá síquí juez jíin ñahan viuda

18

¹ Te ni cahān yā ñin jnūhun yátá jíin de jeē cánuú jeē niní cácan tahu de, te ma ndínuu ni de jíin. ² Te ni cahān yā:

Ni íyo ñin juez ini ñin ñuu. Te ni tu ndíso íyo de nuū Yaā Dios, ni tu yúhú de nuū ní ñin ñayuu. ³ Te suni ñuu un íyo ñin ñahan ní ndóo ndáhú. Te ñahan un jéhén-ni jéhén-ni ña nuū de, jícan ña jeē na sándaā de síquí ñin ñayuu jeē jíto uhū i ña. ⁴ Te cuehē quíví tu ní cúni de sándaā de, te yūcuán na te ni jeni ni de: Vésú tu ndíso íyo rī nuū Yaā Dios, ni tu yúhú rī nuū ní ñin ñayuu, ⁵ te ñahan viuda yáha, yóhyo stáhān ña ruhū, te jeē yúcuan na sándaā rī síquí ñáyuu jeē jíto uhū i ña. Chi núu tuú, te quejéé rí jnaníní ni rī jeē quíji quíji ña. Achí de. Achí máá Jítoho yō.

⁶ Te ni cahān gā yā:

Súcuan cúu jeē ni cáhān juez, tēe tú ndaā. ⁷ Te Yaā Dios, nasūu súcuan cúu ya, chí sándaā yā síquí jníñu ñayuu ní nacāji ya jeē nduú ñuú cácahān ndahú i jíin yá. Chi jnama ya i nuū tāca jéé cájito uhū i. ¿Te á cuéé jnama ya i? ⁸ Cáhān rī jíin ró jeē yachī. Te quíví ndíji ruhū, Yaā ní nduu tēe, ¿á níhīn gā rī ñayuu cácaandíje níhin ini ñayíví? Achí yá.

Jnūhun yátá síquí tēe fariseo jíin tēe stútú xúhun renta

⁹ Te suni ni cahān yā jnūhun yátá yáha jíin jecu ñayuu jeē cájeni ni i jeē ñáyuu ndaā cácuu i, te cájeni ni i jeē sava ga ñayuu tu cáhīyo ndaā:

¹⁰ ñin tēe fariseo cuahān de templo jeē cacān tahu de. Te ñin tēe stútú xúhun renta suni cuacacān tahu de templo. ¹¹ Te tēe fariseo, índichi de, te súcuan ni jícan tahu de: Tátā Yaā Dios, na cútahū na núu ní, chí

tu cúu ná nájñūhun cándāa sava ga tēe, tēe cuihná, tēe néé, tēe cásiquí ndéē jnáhan cácuu de. Ni tu cúu ná nájñūhun cáa tēe yúcuu jēē stutú xūhun renta jeē scáa ga de jícán de nuū ñáyuu. ¹² Te uū jínu jeē semana iyó ndite ni na núu ní, te jéhe ná nuū ní ññ siquí tāca úxī ndajñíñu níhín na, áchí de. ¹³ Te tēe stutú xūhun renta, ni jecuiññ jicá de nuū templo, ni tu ní chūndeyí ni de jeē ndonehen de nuū de, chí sa suhva ni cani de yíquí jicá de jeē cucuíhyá ni de. Te ni cahān de: Tātā Yaā Dios, cundáhú ni ní sáña, chí tēe íyó cuéchi cúu ná, áchí de. ¹⁴ Te cáhán rī jíin ró jeē tēe stutú xūhun renta, ni jetáhú Yaā Dios de, te cuanuhun de vehe de. Te tēe fariseo chí tu ní jétáhú yá de. Chí ñáyuu jeē sajhēnu i máá i, sa ndululí i. Te ñáyuu jeē sálulí i máá i, sa ndujénu i. Achí yá.

Jeē ni jícān tahu Jesús jehē sūchi lúli (Mt. 19.13-15; Mr. 10.13-16)

¹⁵ Te ni quecoo ñáyuu jíin sūchi lúli núu Jesús, jeē na sóo yá ndaha ya xiní i. Te tēe cáscuáha un ní cajini de jeē súcuu cúu, te ni cacahān de nuū ñáyuu vējicoo jíin i. ¹⁶ Te máá Jesús ni cana ya de, te ni cahān yā:

Cuāha jñūhun na quíjicoo sūchi lúli jíinā nuū rī, te ma cási ró jeē quíjicoo i. Chí ñáyuu jeē ndió cóo ni i cani ni i nájñūhun sūchi yáha, suu i quívi ndaha Yaā Dios jeē ndacu ya jñiñu nuū i. ¹⁷ Te jendaá cahān rī jíin ró, núu ññ ñáyuu tú cuatáhú i jeē ndácu Yaā Dios jñiñu nuū i, nájñūhun jétáhú ññ sūchi lúli, ma quívi cuíti i ndaha ya, achí yá.

Jñūhun tēe cúca (Mt. 19.16-30; Mr. 10.17-31)

¹⁸ Te ññ tēe cújénu ni cajñūhún de ya:

Tēe vāha cúu ní Maestro. ¿Te na jñiñu vāha sáha ná te nihín tahu na cotecu na ní cáni andiví? Achí de.

¹⁹ Te ni cahān Jesús jíin de:

¿Naun cáhán ró jeē tēe vāha cúu rí? Tú ni ññ tēe vāha íyó, chí máá ññ-ni Yaā Dios. ²⁰ Je jíin ró tācá jñiñu ní ndacu Yaā Dios: Ma cosíquí ndéē

jnáhan ró. Ma cáhni ró ndīyí. Ma sacuíhná ró. Ma sajnūhún ró. Cuatáhú ró nuū tatá ró nuū naná ró. Achí yá.

²¹ Te ni cahān maá de:

Tācá jñiñu yáha je ni squícu ná ndé ná lulí ná, achí de.

²² Te Jesús ni jini ya jñūhun yáha, te ni cahān yā jíin de:

Íin na jñiñu cúmaní sáha ró núu súcuu. Xícó ndihí jeē névāha ró, te cuāha ró núu ñáyuu ndahú. Te nde andiví cuāha ya jeē vāha ndasí núu ró. Yūcuán na te quiji ró condiquín ró ruhū, achí yá.

²³ Te ná ni jini sōho de jñūhun yáha, te yōhyo ni cucuíhyá ni de, chí cúca ndasí de. ²⁴ Te jíto Jesús jeē súcuu cucuíhyá ni de, te ni cahān yā:

Tēe cúca chí yōhyo yí quívicoo de ndaha Yaā Dios jeē ndacu ya jñiñu nuū de. ²⁵ Yachí gā yáha ññ camello yaū yutícuí vēsú jeē quívi ññ ñáyuu cucá ndaha Yaā Dios jeē ndacu ya jñiñu nuū i, achí yá.

²⁶ Te tēe ní cajini jñūhun yáha, ní cacahān de:

¿Ndé ñáyuu cúu jeē cácu núu súcuu? Achí de.

²⁷ Te ni cahān yā jíin de:

Ñáyuu chí ma cúu squívi i máá i ndaha Yaā Dios, te máá yá chí cuu sáha ya, achí yá.

²⁸ Yūcuán na te ni cahān Pedro:

Sáña jíin náhán ná ní castóo ná ndihí jeē cánevāha ná, te cándiquín na níhín, achí de.

²⁹ Te máá yá ni cahān yā jíin de:

Jendaá cahān rī jíin ró jíin náhán ró, núu na-ni ñáyuu stóo i vehe, chí tátá, chí ñani, chí ñasihí, chí séhe, jeē siquí jeē scáca i jñūhun jeē ndácu Yaā Dios jñiñu nuū ñáyuu, ³⁰ núu súcuu te nanihín cuehē gā i ini ñayívi yáha, te tiempo quiji te cotecu i ní cáni, achí yá.

Jeē ni cáhán tucu ya jeē cúu yā (Mt. 20.17-19; Mr. 10.32-34)

³¹ Te ni cana sñn ya ndihúxí uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuu squícu ndihí jñūhun ndese

ndoho ruhū, Yaā ní nduu tēe, nájñuhun ni catee tēe ni canacani jñuhun Yaā Dios nde jenahán. ³² Chi ñayuu nastúu i ruhū nuū tēe nación Roma jeē cáyucú Jerusalén cándacu jniñu. Te tēe un sácata de nuū rī, te cahān neé de nuū rī, te tesihí de nuū rī. ³³ Te cani de ruhū, te sáa te cahni de ruhū. Te nuū uní quiví te natecu rī. Achí yá.

³⁴ Te máa de tu ní cájecūhun cuiti ni de tāca jñuhun yáha. Chi jñuhun yí cúu, te tu ní cúu jecūhun ni de jeē cahán yā.

Jeē ní nasávāha ya ñn tēe cuáá ñuu Jericó

(Mt. 20.29-34; Mr. 10.46-52)

³⁵ Te ni cuyajni ya cuahān yā ñuu Jericó. Te ñn tēe cuáá néne de yuhíchi, jícán de caridad. ³⁶ Te ni jini sōho de jeē yáha cuehē ñayuu cuango i, te ni cajñuhún de naun cuángo i. ³⁷ Te ni cacahān i jíin de jeē Jesús, tēe ñuu Nazaret, yáha ya cuahān yā. ³⁸ Yūcuán na te ni cana jee de:

Jesús Sēhe yucūn David, cundáhú ni ni sáña, achí de.

³⁹ Te ñayuu cuango ichi núú yā, ni cacahān i nuū de jeē na cási de yuhu de. Te máa de víhyá gā ni cana jee de:

Máa ní jeē cúu ní Séhe yucūn David, cundáhú ni ni sáña víi, achí de.

⁴⁰ Yūcuán na te ni jecuiñí Jesús, te ni cahān yā jeē na quíndeca i de. Te nuū ní cuyajni de nuū yā, te ni cajñuhun yá de:

⁴¹ ¿Na vé cuní rō jeē sáha ri jíin ró? achí yá.

Te ni cahān de:

Jeē na ndúndijin tinūu ná cuní na, achí de.

⁴² Te ni cahān Jesús jíin de:

Ndundijin tinūu ró núu súcuan. Ni candíje ró jeē cuu nasávāha ri rohó, te jeē yúcuán ní nduvāha ró, achí yá.

⁴³ Te ni ndundijin-ni tinúú de, te ni ndiquin de ya, te nácuatáhú de nuū Yaā Dios. Te ndihi ñayuu jeē ní cajito i, suni ni cacahān i jeē yóhoyo vāha Yaā cúu Yaā Dios.

Jñuhun Zaqueo

19

¹ Te ni quiví Jesús ini ñuu Jericó, te ni yāha-ni ya cuahān yā. ² Te yūcuán íyó ñn tēe cúcá nání de Zaqueo, te cújéhnú de nuū tēe cástútú xūhun renta. ³ Te cuní de coto de návāha cuni de ndé ñn cúu Jesús. Te tu ní cúu, chi cuehē ñayuu cuango i jíin yá, te ndiqui-ni cáa de. ⁴ Te jínu de ni cosnūú de. Te ni caa de xiní ñn nuyūhndú návāha coto de nuū yā, chi yūcuán yáha ya quihīn yā. ⁵ Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachí nuu ró, chi jíni ñúhún jéé ndóo ri vehe ró vijna, achí yá.

⁶ Yūcuán na te ni cusí ni de, te yachí ni nanuu de, te ni jeca de ya cuahān de jíin yá vehe de. ⁷ Te ni cajito ñayuu jeē súcuan ni cuu, te ni cacahān i síquī yā jeē cuahán yā ndóo ya vehe ñn tēe sáha cuēchi. ⁸ Yūcuán na te ni ndocuiñí Zaqueo, te ni cahān de jíin máa Jítoho yó:

Vijna te sava ndihi ndajniñu ná chi cuāha ná núu ñayuu ndahú. Te núu ni scáa ga na ní jicān na xūhun nuū ñayuu, te nacuāha ná únī gā síquī naquihin i, achí de.

⁹ Te ni cahān Jesús:

Vijna te vehe yáha je ni cācu ñn tēe jeē ma jnahnú ndetū de, chi ni candíje de nájñuhun ni candíje jíi de Abraham. ¹⁰ Chi ruhū, Yaā ní nduu tēe, ni quiji ri nducú rí ñayuu jeē jnahnú ndetū, te jnama ri i, achí yá.

Jñuhun yátá síquī uxī mozo jíin xūhun

¹¹ Te nuū ñayuu ní cajini tāca jñuhun yáha, ní cahān gā Jesús ñn jñuhun yátá jéé steén yā ndese coo quiví ndíji ya. Chi je ni cuyajni ya ñuu Jerusalén, te cájeni ni i jeē vijna ñúhún quejéé jéé ndácu ya jniñu sáha Yaā Dios. ¹² Te ni cahān yā:

Ñn tēe cújéhnú cuahān jicá de ñga nación, návāha nihīn jniñu de cuu de rey, te ndiji de ndacu de jniñu. ¹³ Te nde ná tu quihīn de, te ni cana de uxī mozo de, te nuū ñn ñn i ni jēhe de ñn xūhun jéé ndeé yahu ndasí. Te

ni cahān de jíin i: Sájniñu ró jēē na ndúcuehē xūhun yáha jíináhan ró níni jēē quihín rī te ndee rī, achí de. ¹⁴ Te ñayuu nación de cáquitī ni i nuū de, te ni catajī i jecu tēe cándiso jniñu cuango yata de jeē cahān: Tu cánujnahan ni ñayuu nación na jēē cuáha ní jniñu nuū tēe yáha jēē cuu de rey nuū i, achí. ¹⁵ Te vēsú súcuan te ni nihīn jniñu de cuu de rey, te vendijī de nación de. Te nuū ní ndee de, te ni ndacu de jniñu jeē na quíjicoo mozo jeē ni jéhe de xūhun núū, návāha na cúni de nasaa ni canihīn ñn ñn i siquī. ¹⁶ Te ni quee ñn mozo un núū de, te ni cahān i: ñn xūhun jēē ni jéhe ní núū ná, ni nduu uxī, achí i. ¹⁷ Te ni cahān maá rey: Vāha mozo cúu ró, te vāha ni sáha ró. Chi ni squícu vāha ró jíin ñn jniñu lúli-ni, te vijna te sáha rī jeē cujéhu ró ndacu ró jniñu nuū uxī ñuu jnā rī, achí de. ¹⁸ Te ni quee inga mozo, te ni cahān i: ñn xūhun jēē ni jéhe ní núū ná, ni nduu uhūn, achí i. ¹⁹ Te suni ni cahān de jíin mozo un: Róhó, cujéhu ró ndacu ró jniñu nuū uhún ñuu jnā rī, achí de. ²⁰ Te ni quee inga mozo, ni cahān i: Yāha nácuāha ná xūhun ní, chi ni chuvāha ná ini ñn pañuelo. ²¹ Chi ni yūhu ná nihín, chi tēe xeēn cúu ní. Chi cuehē gā nándacān ní vēsú jeē ni jéhe ní, te cuehē gā cuní ni vēsú jeē cúu sáha mozo ni, achí de. ²² Yūcuán na te ni cahān rey: Mozo neé cúu ró núu súcuan, te jíin jnúhun ni cahān rō te sándaā rī jeē iyó cuéchi ró jēē tu ní sájniñu ró jíin xūhun rī. Chi jéni ni rō jeē tēe xeēn cúu rī, te cuehē gā nándacān rī vēsú jeē ni jéhe rī, te cuehē gā cuní rī vēsú jeē cúu sáha mozo rī. ²³ Núu súcuan ¿te naun tu ní chúne ró xūhun rī vēsú nuū banco? Te jeē ní ndee rī te naquihín rī xūhun rī nde jíin séhe xūhun núú. Achí de. ²⁴ Te ni cahān de jíin ñayuu cáhīn yūcuán: Quende xūhun jíñā nuū i, te cuāha ró núu mozo jeē névāha uxī, achí de. ²⁵ Te ñayuu un ní cacahān i jíin de: Te ndese, chi je névāha de uxī, achí i. ²⁶ Te ni cahān tucu rey: Cáhān rī jíin ró jeē ñayuu je névāha, sa quiiji ga nuū i, te conevāha cuehē i. Te ñayuu jeē

tu névāha, sa cujiyo-ni vēsú jecu jeē névāha i. ²⁷ Te tēe jeē cájito uhū ruhū, jeē tu ní cánujnahan ni de jeē cuu rī rey nuū de, cuáquihin de na quíjicoo de yáha. Te cahni rō de coto rī, achí de. Achí Jesús.

Jeē ni quívi Jesús ñuu Jerusalén
(Mt. 21.1-11; Mr. 11.1-11; Jn. 12.12-19)

²⁸ Te nuū ní ndihī ni cahān yā jnúhun yáha, te ni jica ga yā cuahān yā ñuu Jerusalén. ²⁹ Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū tēe cáscuāha jíin yá jeē quíngoo de. ³⁰ Te achí yá jíin de:

Cuáhān ñuu lúli íne ichi núú. Te núu ni quívi ró, te nihīn rō ñn burro núhni tī, jeē ní ñn tēe ná tu coso de tī. Te ndají ró tī quiiji ró jíin tī. ³¹ Te núu nde ñn cajnúhún naun cándají ró tī, te cahān rō jíin: Máá Jítóho yō jíni ñúhún yá tī, achí rō. Achí yá.

³² Te cuango tēe ni tají yá, te ni canihīn de tī nájnúhun ni cahān yā jíin de. ³³ Te jeē cándají de tī, te ni cacahān jítóho tī jíin de:

¿Naun cándají ró burro rī? achí.

³⁴ Te ni cacahān de:

Máá Jítóho yō jíni ñúhún yá tī.

³⁵ Te ni ndecoo de jíin tī nuū Jesús. Te ni casoó de sahma de siquī tī, te ni casáha de jeē ní jecosō yā siquī tī. ³⁶ Te ná-ni cuahān yā, sáá cáscáá ñayuu sahma i ini ichi. ³⁷ Te nuū ní cuyajni ya nuū cúun ichi yucu Olivos, te ndihī ñayuu cáncandíje jeē cándiquīn i ya, ni caquejéé i cácusī ni i, te cácana jee i jeē yóhoyo vāha Yaā cúu Yaā Dios siquī tī cáca jniñu jéhu ni sáha ya ni cajito i. ³⁸ Te achí i:

Yóhoyo vāha Yaā cúu Rey jeē véji jíin jniñu máá Jítóho yō Yaā Dios. Te sáha ya jeē cóo manī yō jíin Yaā Dios andiví. Te yóhoyo cújéhu Yaā Dios, achí i jíináhan i.

³⁹ Yūcuán na te jecu tēe fariseo cáhīn mēhñu ñayuu cuehē ún, ní cacahān de jíin yá:

Maestro, cahān ni núu ñayuu cándiquīn nihín jēē na cási i yuhu i, achí de.

40 Te ni cahān Jesús:

Cáhān rī jín ró jeē núu ñayuu yáha na cási i yuhu i, te tāca yúu chi cana jee, áchí yá.

41 Te nuū ní cuyajni ya Jerusalén, te ni jito ya ñuu ún, te ni ndahyū yā siquī.

42 Te ni cahān yā:

Róhó ñayuu Jerusalén, yōhyo ni cuu ni rī jeē na jécūhun ni rō jeē cuu ndumanī rō jín Yaā Dios sáha ri. Te siquī jeē tu cácadíje ró, te vijna chi ma cúu ga jecūhun ni rō. 43 Chi quee quivī jeē coo jnūndóho, te ñayuu cájito uhū rohó, cuicó ndūū i ñuu rō, te casi cutú i jín yúū, te tāca lado ndonda i siquī rō. 44 Te ndihī vehe scótúú i, te cahni i róhó jínáhan ró. Te ma stóo i ni ñn vehe jeē cóso jnáhan ga yuū. Chi ni quiji ri nde nuū Yaā Dios jeē jnáma ri rohó, te tu ní cácadíje ró. Achí yá.

Jeē ní quenehen ya ñayuu ini templo
(Mt. 21.12-17; Mr. 11.15-19;
Jn. 2.13-22)

45 Te ni quivī ya ini templo cáhnu, te ni quejéé yá quenehen ya tāca ñayuu cájeen quitī te cánaxico núu ñayuu jeē socó i. 46 Te ni cahān yā jín i:

Yósó núu tútu iī jeē cahān Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jínáhan ró, chi nájnūhun yaū cava ñacuīhna ní canasáha ró, áchí yá.

47 Te ndiquivī ni steén yā jnūhun ini templo. Te sutū cácujuhnu jín téé cástéén tutu ley Yaā Dios jín téé cácujuhnu nuū ñayuu ñuu ún, cánducú de modo ndese cahni de ya. 48 Te tu cánihīn de modo sáha de, chi ndivīi ñayuu yōhyo cájetáhú i cájini nahín i jnūhun cáhān yā.

Siquī jeē ndíso jniñu Jesús
(Mt. 21.23-27; Mr. 11.27-33)

20

1 Te ñn quivī steén yā jnūhun nuū ñayuu ini templo, te nácani ya jnūhun jeē jnáma Yaā Dios ñayuu. Te ni que-coo sutū cácujuhnu jín téé cástéén tutu ley Yaā Dios jín táca téé jéhu cándacu jniñu. 2 Te ni cacahān de:

Castūhún, ¿ndé ní nihīn jniñu ró jéé sáha ró jniñu yáha? ¿Te ndé ñn ni tee jniñu siquī rō jeē sáha ró súcuan? Achí de.

3 Te ni cahān Jesús jín de:

Suni ruhū cajnūhun rí rohó ñn jnūhun jínáhan ró. Castūhun núu rī: 4 ¿Ndé ñn ni tee jniñu siquī Juan jeē ni scuándute de? ¿A Yaā Dios chí táca téé? Achí yá.

5 Yūcuán na te ni candajnūhun máá de:

¿Ndese cahān yō? Núu cahān yō jeē Yaā Dios ni tee ya jniñu un siquī Juan, te cahān de jín yó: ¿Najehē tu ní cácadíje ró de núu súcuan? 6 Te núu cahān yō jeē ñayuu ni catee jniñu un siquī de, te ndivīi ñayuu cahni i yóhó jín yúū, chi cácadíje i jeē téé ni nacani jnūhun Yaā Dios ni cuu ndije Juan, achí de cácahān maá de.

7 Te ni cacahān de jeē tu cájini de ndé ñn ni tee jniñu siquī Juan jeē ni scuándute de. 8 Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu siquī rī sáha ri jniñu yáha, áchí yá.

Jnūhun yátá siquī tēe néé cásjjniñu nuū uva

(Mt. 21.33-44; Mr. 12.1-11)

9 Te ni quejéé Jesús cahān yā jnūhun yátá yáha jín ñayuu ún:

Ñn tēe ni nachuhun de cuehē uva nuū ñūhun de. Te ni stóo de nuū sava tēe sájniñu nuū, te cuu sava de ndehē jín. Te ni tee de ichi jeē cuahān nahán de inga ñuu. 10 Te máá tiempo ndutútú uva, te ni tají de ñn mozo cuahān nuū téé cásjjniñu ún, návāha naquihin de sava ndehē uva un. Te tēe un ní cacani de mozo, te ni canatajé de i cuanuhun i súcuan-ni. 11 Te tēe chíí uva ni tají tucu de inga mozo cuahān. Te tēe cásjjniñu ún, suni ni cacahān ndevāha de nuū i, te ni cacani de i, te ni canatajé de i cuanuhun i súcuan-ni. 12 Te tēe chíí uva ni tají tucu de inga mozo cuahān. Te tēe cásjjniñu ún, suni ni castújí de mozo un, te ni cascúnu de i.

13 Yūcuán na te ni cahān tēe chíí uva: ¿Ndese sáha ri? Na tají rí sēhe ri

jeē maní rī jín, chi sanaa te núu ni cajito de i te coo yíñuhún de nuū i. Achí de. ¹⁴ Te tēe cásájniñu ún, ná ni cajito de jeē véji i, te ni cacahān de: Tēe chíí táhū cúu jeē véji ún. Na cáhni yō de, te ndōo tahū de cuu máá yó, achí. ¹⁵ Te ni caquenehen de i inga lado, te ni cajehni de i, achí yá.

Te ni cajñuhun yá de:

Núu súcuan ¿te ndese sáha tēe chíí uva jín tēe cásájniñu ún? ¹⁶ Ndihi de te cahni de tēe un jíjnáhan, te cuāha de ñuhun cáá uva un núu inga sava tēe sájniñu nuū, achí yá.

Te jeē ní cajini ñayuu jñuhun yáha, te ni cacahān i:

Aí, núu ma cóo cuíti súcuan víi, achí i.

¹⁷ Te ndéhé yá nuū i jíjnáhan i, te ni cahān yā:

Núu súcuan ¿te á cájecūhun ni rō jñuhun yáha jēe yosó núu tútu i jeē cúu rī nájñuhun ññ yuū? Chi achí tutu: Yuū jeē ní casquéhichī tēe cájeni vehe, yuū yáha nduu jeē quítuu vehe.

Achí. ¹⁸ Te ñayuu tu cá candíje, ndoho i nájñuhun ndóho ñayuu jeē cotúú siquí yuú te jnánú i. Te quiví sándaā Yaā Dios cuēchi, te ñayuu tu cá candíje, ndoho i nájñuhun ndóho ñayuu jeē nínga yuū siquí i te cundihī i sáha. Achí yá.

Siquí xúhun renta

(Mt. 21.45-46; 22.15-22; Mr. 12.12-17)

¹⁹ Yūcuán na te sutū cácujuhnu jín tēe cástéén tutu ley Yaā Dios, ni cacuni de jñi de ya maá hora un. Chi ni cajecūhun ni de jeē siquí maá de cúu jñuhun yátá ní cahān yā siquí tēe cásájniñu nuū uva jín tēe cájeni vehe. Te tu ní cúu, chi cáyūhú de jeē quítu ni ñayuu. ²⁰ Yūcuán na te ni catajé de jecu tēe cuacoto yuhu de ya, te tēe un cásáha-ni de jeē tēe ndaā cácuu de. Te cánducú de sáha de jeē cahān yā ññ jñuhun jeē nihín de cuēchi siquí yā, te quindecá de ya nuū tēe cúu gobernador. ²¹ Te ni cacahān de:

Maestro, cájini na jēe cahān vāha ní, te stéén ndaā ní. Te tu sáha ní cuenta ndese cúu ññ ññ ñayuu, chi inuú-ni sáha ní jín i. Te stéén ndaā ní ndese

siquícu ñayuu nuū Yaā Dios. ²² Núu súcuan te cachi ní: ¿A íyo váha jeē chúnaa yō renta nuū rey nación Roma jeē jñi nación yō, chí tuú? achí de.

²³ Te ni jini yā jeē cá cuni de stáhú de ya, te ni cahān yā jín de:

¿Najehē cájito ndee rō ruhū?

²⁴ Stéén ññ xūhún na cóto rī. ¿Ndé ññ nuū cúu jeē ndeé nuū xúhun yáha, te ndé síhví cúu jeē ndeé yāhá? achí yá.

Te ni cacahān de jín yá:

Nuū jín síhví rey un cúu, achí de.

²⁵ Yūcuán na te ni cahān yā jín de:

Núu súcuan te nacuāha ró núu rey un jēe yíhi cuenta nuū de, te nacuāha ró núu Yaā Dios táca jēe yíhi cuenta nuū maá yá, achí yá.

²⁶ Te táca tēe ún tu ní cúu nihín de cuēchi siquí yā jín ni ññ jñuhun cáhán yā, cájito jínúu ñayuu. Chi sa ni canaa ni de jeē ndichí ní stió cuíñi yā jñuhun nuū de, te tuá na vé ni cácahān de.

Jeē ní cacajñuhún de siquí jeē nátecu ndíyi

(Mt. 22.23-33; Mr. 12.18-27)

²⁷ Yūcuán na te jecu tēe grupo sa-duceo ni quecoo de nuū yā. Te tēe un cácahān jeē tu nátecu cuíti ndíyi. Te ni cacahān de jín yá:

²⁸ Maestro, Moisés ni tee de nuū tútu jeē cánevāha yó: Núu ññ tēe cuu de, te ndōo ñasihí de, te núu tu ní íyo sēhe de jín ña, núu súcuan te cánuú jeē ñani de naquihin ñasihí de, te sēhe de jeē cácu jín ña nucuñi i nuū ndíyi ñani de, achí tutu. ²⁹ Núu súcuan te ni íyo uxā ñani. Te tēe núu ní quijnáhan de jín ñahan. Te ni jihí de, te tú sēhe de ní íyo. ³⁰ Te tēe uū ni naquihin de ña, te suni ni jihí de, te tú na sēhe de ní íyo. ³¹ Te tēe uní ni naquihin de ña. Te suni súcuan ndihúxá de ni condeca de ña, te ni cajihí ndihí de, te ni ññ de tú sēhe de ní íyo. ³² Te jeē sándihí te suni ni jihí ñahan ún. ³³ Núu súcuan te núu na nátecu de jíjnáhan de quiví nátecu ndíyi, ¿te ndé ññ de cuu ña ñasihí de? Chi ndihúxá de ni condeca de ña. Achí de jíjnáhan de.

³⁴ Yūcuán na te ni cahān yā jín de:

Ñayīvī yáha chi cáquijnáhan tēe jíin ñahan. ³⁵ Te ñayuu vāha jeē natecu i quīvīcoo i andiví, ma quiijnáhan ga i yūcuán, chi tuá na jnūhun quiijnáhan tēe jíin ñahan coo. ³⁶ Ni ma cúu cuiṭi gā i, chi coo i nájñūhun ndajéhé Yaā Dios. Te sēhe Yaā Dios cuu i, chi je ni canatecu i. ³⁷ Te suni máá Moisés cáhán de jeē nátecu ndīyī, chi ni tee de nuū tútu ndese ni cahān yā jíin de mēhñu yúcū jeē cayú yáñuhūn. Chi ni cahān de jeē cúu ya Yaā Dios Abraham jíin Isaac jíin Jacob. ³⁸ Te jeē ni cáhán de súcuan cúu jeē ní cachi de jeē cátecu tāca ndīyī. Chi vēsú je ni cajihī i, te cátecu i nuū iyó máá yá, chi cúu ya Yaā sáha jeē técu ñayuu ní cáni. Achí yá jíin de.

³⁹ Te jecu tēe cástéén tutu ley Yaā Dios ni cacahān de:

Vāha ni cahān ní Maestro.

⁴⁰ Te tuá ni cáchundeyí ni de ca-jñūhún de ya.

Siquī jeē cúu Cristo sēhe yucūn David

(Mt. 22.41-46; Mr. 12.35-37)

⁴¹ Te ni cahān yā jíin de jíináhan de: ¿Ndese cúu jeē cácahān ñayuu jeē Cristo cúu sēhe yucūn David? ⁴² Chi máá David suhva ni cahān de jñūhun ya nuū tútu Salmo:

Máá Jítoho yō Yaā Dios suhva ni cahān yā jíin Jítoho rī, Yaā quiji:

Cucōo ró lado váha ri nuū cujéhnū ró, ⁴³ te na sáha ri jeē quende rō poder tāca jéé cájito uhū rohó.

Achí Yaā Dios. Achí David. ⁴⁴ Te núu sēhe yucūn David cúu Cristo, ¿te ndese cúu jeē ni cahān de jeē Jítoho de cúu ya? áchí yá.

Jeē ni cáhān yā jeē iyó cuéchi de jíináhan de

(Mt. 23.1-36; Mr. 12.38-40; Lc. 11.37-54)

⁴⁵ Te ni cahān yā jíin tēe cáscuáha jíin yá, te suni ni cajini sōho ndihī ñayuu:

⁴⁶ Coto má cándije ró táca tēe cástéén tutu ley. Chi cácusī ni de cáñuhun de sahma cáni jeē steén jeē cujéhnū de, cájica cuu de jíin. Te cánujnahan ni de jeē cahān yíñuhún ñáyuu jíin de nuū yáhu. Te cánujnahan ni de cucōo de

nuū silla yíñuhún gá ini vehe iī sin-agoga, jíin silla yíñuhún gá nuū víco cáyeji ñayuu. ⁴⁷ Te cáquende de vehe ñahan ní caquendōo ndáhú. Te nahán cájicān tahu de návāha cani ni ñayuu jeē tú na cuéchi de. Tēe yáha jíináhan de chi xeēn gā ndoho de castigo. Achí yá.

Jeē ni sócō ñahan viuda xūhún
(Mr. 12.41-44)

21

¹ Te ná ni iyo ya ini templo, te jító ya nuū ñáyuu cucá jéé cáchuhun i cuehē xūhún ini tāca yéjnū nuū cásocō i. ² Te suni ni jito ya nuū ññ ñahan viuda jeē ndóho ndáhú, te ni chuhun ña uū centavo lulí ini yejnū ún. ³ Te ni cahān yā:

Jendaá cahán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca gá ñayuu.

⁴ Chi tācá i ni casocō i jeē ni ndóo siquī xūhún cuéhē i. Te ñahan yáha, vēsú ndahú ndóho ña, te ni chuhun ndihī ña jeē cótecu ña. Achí yá jíin de.

Jeē ní cachi yā jeē náa templo
(Mt. 24.1-2; Mr. 13.1-2)

⁵ Te sava de ni cacahān de jeē luu cáa templo cáhnu, chi ni cuvāha jíin táca yúu luu jíin táca jéé ní casocō ñayuu. Yūcuán na te ni cahān yā:

⁶ Ndhī jeē cájito ró yáha, quee quivī jeē ma cóso jñáhan ga ni ññ yuū, chi ndihī jñanū, achí yá.

Na seña coo nuū cuácuyajni ndihī ñayīvī

(Mt. 24.3-28; Mr. 13.3-23)

⁷ Te ni cacajnūhún de ya:

Maestro, ¿ndé quivī coo tāca jéé ní cachi ní jéé coo? ¿Te na seña coo nuū cuácuyajni squícu tāca jéé ni cahān ní? achí de.

⁸ Te ni cahān yā:

Coto ró jéé ma stahú i rōhó. Chi quijicoo cuehē tēe jeē stahú jíin síhvī rí, te cahān de: Máá rí cúu Cristo. Te suni cahān de: Je ni quee quivī ndihī ñayīvī, achí de. Te ma cóndiquīn rō de. ⁹ Te núu nihīn rō jñūhun jeē tāca lado iyó guerra te cándonda ñayuu

siqui tohō, te ma yūhu ró, chi cánuú jéē xihna gā coo súcuan, te ni ma jinú yachi quiví ndihi ñayiví. Achí yá.

¹⁰ Te ni cahān gā yā:

Ndonda nación siquí inga nación, te ndonda ñuu siquí inga ñuu jeē cua-jnáhan. ¹¹ Te cháha chúcuan jnāa téyí, te coo jnamā jíin cuéhyí xeēn. Te coo seña jéhu ichi ándiví jéē yūhú ndasí ñayuu coto i.

¹² Te nde ná tu coo tācá jniñu yáha, te coto xeēn i rōhó, te jniñ i rōhó. Te quindecá i sava ró táca vehe ñi sinagoga jeē cahán i cuéchi siquí rō. Te chune i sava ró vecāa. Te quindecá i sava ró núu tāca rey jíin núu tācá gobernador, te cahán i cuéchi siquí rō jeē siquí jeē cácan díje ró rúhū. ¹³ Te jeē súcuan coo, te cuitē núu ga jnūhun ri, chi nacani ndaā rō nuū de jíin áhan de. ¹⁴ Núu súcuan te cundaā ni rō jeē ma nacani ni rō xihna gā ndese stío cuíñí rō nuū de te cācu ró. ¹⁵ Chi ruhū cuāha ri jnūhun ndichí cahán rō, návāha ñayuu jeē cájito uhū rohó, ma cūndeyí i jíin ró ni ma cúu cahán i siquí rō. ¹⁶ Te nde tatá rō, naná rō, ñani rō, jnáhan ró, jíin amigo rō, nastúu i rōhó núu ñayuu xeēn. Te cahni i sava ró. ¹⁷ Te tāca ñayuu chi quiví ni i nuū rō jeē siquí ruhū. ¹⁸ Te ni ñiñ ixi xini rō jíin áhan ró ma náa, chi coto ya rohó. ¹⁹ Te núu cuíñi ñihin ró jíin jnūhun ri, te cotecu rō ní cáni.

²⁰ Te núu ni cajito ró jéē ní cajicó ndúu soldado ñuu Jerusalén, te na jécūhun ni rō jeē jé yajni naa ñuu ún. ²¹ Yūcuán na te ñayuu cáyūcú región Judea, na cúnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhñi nde rancho, ma nándicó i ñuu ún. ²² Chi tāca quiví un cuāha Yaā Dios castigo nuū ñayuu jeē siquí cuéchi i, návāha squícu tāca jnūhun jeē yosó núu tútu. ²³ Te quiví ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihñ ña cunu yachi ña. Chi yōhyo xeēn coo jnūndóho ini ñayiví, te quiji castigo xeēn siquí ñayuu yáha. ²⁴ Te sava i cuu nuū guerra, te sava i quingoo preso

nde tācá inga nación. Te ñayuu tāca gá nación ndacu ñihin i jniñu nuū ñayuu ñuu Jerusalén, nde jinu tiempo jeē jéhe Yaā Dios jnūhun ndacu i jniñu.

Ndese coo quiví ndiji Yaā ní nduu tēe

(Mt. 24.29-35, 42-44; Mr. 13.24-37)

²⁵ Yūcuán na te coo seña nuū níandii jíin núu yoó jíin núu quími. Te ini ñayiví te quiji jnūndóho xeēn siquí ñayuu tācá nación. Te cunéé ni i, te yūhú i jeē ñihin xeēn mar te ndóna xeēn ndute mar vēji nuū ñūhun. ²⁶ Te cuu sōó sava ñayuu jeē cáyūhú i cándetu i tāca jnūndóho quiji siquí ñayiví. Te tāca jéē ín andiví chi quisí i. ²⁷ Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhyo luu kujéhu ri. ²⁸ Te núu ni quejéé táca jniñu yáha, te ndeyí coo ni rō, te cocunuū rō andiví, chi je yajni jnama ya rohó. Achí yá jíin de jíin áhan de.

²⁹ Te suni ni cahán yā jnūhun yátá yáha:

Condēhe jíin áhan ró ndese sáha nundēhe higo jíin táca gá yujnu. ³⁰ Núu cájito ró jéē ní quejéé náne numa yújnu ún, te cájini rō jeē jé yajni coo tiempo jihni. ³¹ Te suni súcuan núu ni cajito ró jéē ní quejéé cúu tācá jniñu jeē ni cahán rí, yūcuán na te na jécūhun ni rō jeē ní cuyajni quiví ndacu Yaā Dios jniñu ini ñayiví.

³² Jendaá cahán rí jíin ró jeē ma cúu ndihi ñayuu tiempo un, chi nde squícu ndihi jniñu ún. ³³ Andiví jíin ñayiví chi naa, te tāca jnūhun cáhán rí chi ma náa, chi ndihi squícu.

³⁴ Te coto ma stívi ró maá ró jíin áhan ró jéē sáha ró táca cuéchi, jíin jéē najini ró, jíin jéē cunjéñu ró jíin táca ndajniñu cotecu rō, návāha tú sanaa ni rō te quee quiví un siquí rō. ³⁵ Chi nájnūhun jeē núu ñiñ trampa, súcuan quee jnūndóho siquí ñayuu cáyūcu ní cáhnu ñayiví. ³⁶ Núu súcuan te ndito coo ni rō, te níni cácan tahu rō, návāha cuu cācu ró núu tāca jnūndóho jeē quíji ún, te cuu cuíñi ró núu ruhū, Yaā ní nduu tēe. Achí yá.

³⁷ Te ndiquivī steén yā jnūhun ini templo, te ndijnahan jecuāā jéndōo ya nde yucu jeē naní Olivos. ³⁸ Te tāca jénéhen quécōo ñayuu nuū yā ini templo jeē cúni sōho i jnūhun steén yā.

Jeē ní casqujínahan de jnūhun jn# de Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

22

¹ Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi. ² Te sutū cácujeñhu jíin tée cástéén tutu ley, ni canducú yuhu de modo cahni de Jesús, chi cáyūhú de jeē quiñi ni ñayuu.

³ Te ni quivī Satanás ini anuá Judas jeē nastúu de ya. Te suni nání de Iscariote, te cúu de ñn jnahan jeē ndihúxí uū tēe apóstol. ⁴ Te ni jehēn de ni candajnūhún de jíin táca sūtū cácujeñhu jíin tée cándiso jniñu ini templo, núu ndese nastúu de ya nuū tée un jíjnanhan. ⁵ Te tēe un ní cacusñi de, te ni cajejnūhun de jeē cuáha de xūhun núu Judas. ⁶ Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

Jeē ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Te ni quee maá quivī vico jeē cáyeji ñayuu pan jeē tú na levadura yíhi, te suni quivī un cájeñni i londe najnūhun ni ndacu Yaā Dios jniñu jeē sáha i vico pascua un. ⁸ Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jéé cuxíni yó vico pascua, achí yá.

⁹ Te ni cacajnūhún de ya:

¿Ndé nuū cuní ni jéé quisátūhva ná? achí de.

¹⁰ Te ni cahān yā jíin de:

Cuángoo ñuu yūcuán, te núu ni quivicoo ró te najnahan ró jíin ñn tēe ndíso quiyi ndute. Te condiquin ró de quihñn ró jíin de nde vehe nuū ndívi de. ¹¹ Te cahān ró jíin tée chí vehe ún: Achí máá Maestro: ¿Ndé ñn cúu cuarto vehe ní cuāha núu ní núu

cuxíni ya vico pascua jíin tée cáscuáha jíin yá, achi rō. ¹² Yūcuán na te steén de ñn cuarto cáhnu nde xiní véhe jeē je íyó túhva, te yūcuán sátūhva ró jéé cuxíni yó, achí yá.

¹³ Te cuangoo de, te ni canihñn de najnūhun ni cahān yā. Te ni casátūhva de jeē cuxíni ya vico pascua.

¹⁴ Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tée cácuu apóstol. ¹⁵ Te ni cahān yā jíin de:

Yōhoyo ni cuu ni rī cuxíni ri jíin ró jíjnanhan ró vico pascua yáha, vijna nde ná tu cuu rī. ¹⁶ Chi cáhán rī jíin ró jeē ma cáji cuñi gā rī vico pascua, chi nde quiñi quivī ndacu Yaā Dios jniñu ní ñayiví, te sáa te caji tucu ri, achí yá.

¹⁷ Te ni quihin ya ñn copa ndūxi uva, te ni nacuatáhú yá, te ni cahān yā:

Quihin copa yáha, te coho ró jíin jnahan ró. ¹⁸ Chi cáhán rī jíin ró jeē ndé vijna te ma cóho ga rī ndūxi uva, chi nde quiñi quivī ndacu Yaā Dios jniñu ní ñayiví, te sáa te coho tucu ri. Achí yá.

¹⁹ Te ni quihin ya pan, te ni nacuatáhú yá, te ni tahú cuéchi yá, te ni jēhe ya nuū de jíjnanhan de. Te ni cahān yā:

Yáha cúu yiqui cúñu rī jeē socō rī jeē chunaa rī cuēchi ró jíjnanhan ró. Te níni caji rō súcuán jeē cáñuhun ni rō ruhū jeē ni jíhī rī jehē rō. Achí yá.

²⁰ Te suni súcuán ni sáha ya jíin copa ndūxi uva, ná ni cuu ni cuxíni ya. Te ni cahān yā jíin de:

Yáha cúu niñi rī jeē cuáha ri jeē cúu contrato jeé, te cati jeē ndundoo cuēchi ró jíjnanhan ró.

²¹ Te vijna chi tēe nastúu ruhū, néne de jíin rí nuū mesa yáha. ²² Chi ruhū, Yaā ní nduu tēe, jendaá cúu jeē quihñn rī cuu rī najnūhun je ni sándaā Yaā Dios jeē súcuán coo. Te nacā xeñ ndoho tēe jeē nastúu ruhū, achí yá.

²³ Yūcuán na te ni caquejéé de cacajnūhun jnahan de ndé ñn de cúu jeē nastúu de ya.

Jeē ní cacahān de siquī ndé ñn de cújéhnú ga

²⁴ Yūcuán na te yōhyo ni cacahān de siquī ndé ñn de cújéhnú ga nuū jnāhan de. ²⁵ Te ni cahān Jesús jíin de:

Rey tācá nación chi cándacu ñihin de jniñu nuū ñayuu cájni de, te cacahān i jeē téé cásáha vāha cúu jeē cácujehnú nuū i. ²⁶ Te rōhó jíjnāhan ró, ma cóo ró súcuan. Chi núu ndé ñn ró cújéhnú ga, te sa nasáha lulí ró maá ró. Te núu ndé ñn ró ndácu jniñu, te sa nasáha ró máá ró téé jéjniñu nuū jnāhan. ²⁷ ¿Te ndé ñn cúu jeē cujéhnú ga, á téé yéji nuū mesa, chí téé jéni cohō? ¿A násūu téé jeē yéji nuū mesa cúu jeē cujéhnú ga? Te ruhū nasūu súcuan cúu ri, chi ni nasáha ri maá rí nájñūhun téé jéjniñu nuū rō, chi vēji ri sáha ri jeē nihín tahu rō.

²⁸ Te máá ró cácuu téé jeē niní cáhīn jíin rí tāca quívī jeē ndóho ri jñūndóho. ²⁹ Núu súcuan te nájñūhun ni sáha Tátá rī jeē ndácu ri jniñu, suni súcuan sáha ri jeē ndacu ró jniñu jíjnāhan ró. ³⁰ Te caji rō coho ró jíin rí ini ñuu nuū ndacu ri jniñu. Te cucōo ró ñn ñn mesa jeē sándaā rō jniñu ndihúxí uū yucūn Israel. Achí yá.

Jeē ní cachi yā jeē yūhu Pedro cahān de jeē jiní de ya

(Mt. 26.31-35; Mr. 14.27-31; Jn. 13.36-38)

³¹ Te suni ni cahān maá Jítóho yō jíin Simón Pedro:

Simón, cuni sōho ró, chi ni jicān Satanás rohó jíjnāhan ró jéé coto ndee rohó nájñūhun jeē síjin trigo, te stúu ndé ñn ró cácuu nájñūhun paja jeē nayūhu ró, te ndé ñn ró cácuu nájñūhun trigo jeē candíje ñihin ró.

³² Te ni jicān tahu rī jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jéé íje tāca jnāhan ró jíin jñūhun ri. Achí yá.

³³ Te ni cahān de jíin yá:

Je íyó túhva ná quíhīn na jíin ní vecāa te vēsú na cuu na jíin ní, achí de.

³⁴ Te ni cahān yā:

Pedro, cáhān rī jíin ró jeē nde ná tu cana líhli vijna, te yūhu ró jeē jñi

ñayuu rohó, te unī jínu cahān rō jeē tu jíiní rō ruhū, achí yá.

Jeē ní cuyajni coto ya jñūndóho

³⁵ Yūcuán na te ni cajñūhun yá de jíjnāhan de:

Ná ni tají rí rohó ní jengoo ró jéé tu ní cóndiso ró ñunu ni yijni xūhún ni ndijēn, ¿te á ní íyo ñn jeē ní cumanī nuū rō? Achí yá.

Te ni cacahān de:

Tú ni ñn ní cumanī.

³⁶ Te ni cahān yā:

Nde vijna sa cáhān rī jeē cóndiso ró ñunu ró, te suni yijni xūhún. Te téé jeē tu névāha espada jeē coto de máá de, na xíco de ticāchí de te na cuāan de. ³⁷ Chi cáhān rī jíin ró jeē quee quívī ndoho yó jñūndóho, chi cánuú squícu jñūhun yáha jéé cahān nuū tútu siquī rī: Sáha ñayuu jíin yá nájñūhun cásáha i jíin téé sáha cuēchi xeēn, achí tutu. Chi tāca jñūhun un jéé yosó cáhān siquī rī, chi squícu nahín, achí yá.

³⁸ Yūcuán na te ni cacahān de:

Yáha íyó úu espada, achí de.

Te ni cahān yā jíin de:

Jíin jéé yáha-ni, achí yá.

Jeē ní jicān tahu yā nuū huerto Getsemaní

(Mt. 26.36-46; Mr. 14.32-42)

³⁹ Te ni quenda ya cuahān yā yucu Olivos nájñūhun sáha sáha ya. Te téé cáscuáha jíin yá ni candiquín de ya cuangoo de jíin yá. ⁴⁰ Te nuū ni jínū yā yūcuán, te ni cahān yā jíin de:

Cacān tahu rō jíjnāhan ró jéé chindéé ñáhān yá rohó jéé ma sáha ró cuéchi núu coto ndee jeneé rōhó, achí yá.

⁴¹ Te ni jica ya jecu, cūhva jeē jicá jíinú yuū jeē squíin. Te ni jecuiñī yití yá, te suhva ni jicān tahu yā:

⁴² Tátā, núu cúní ni te tejiyo ní jñūndóho yáha jéé ma quíji siquī ná. Te nasūu jéé cuní maá ná, chí jeē cuní maá ní na cóo, achí yá.

⁴³ Te ni cane ñn ndajéhé andiví núu yā, te ni jéhe fuerza nuū yā.

⁴⁴ Te cúcuíhyá ndasí ni yā jeē quiji jñūndóho siquī yā, te ni nducú ndéyí gá yā ni jicān tahu yā. Te ni cane

jnañu yā, te tóo nuū ñúhun nájnūhun yúyú náhnu niñi.

⁴⁵ Te ná ni ndocuiñi yā jeē ni jícan tahu yā, te ni ndee yā nuū tée cáscuáha jíin yá. Te ni jito ya jeē cáquixi de, chi tuá cáhīyo ndeyí ni de cacān tahu de jeē cácuquíhyá ndasí ni de. ⁴⁶ Te ni cahān yā jíin de:

¿Naun cáquixi rō? Ndonga te cacān tahu rō jeē chindéé ñáhán yá rohó jéē ma sáha ró cuéchi jeē cóto ndee jeneé rohó. Achí yá.

Jeē ní cajñi de Jesús

(Mt. 26.47-56; Mr. 14.43-50; Jn. 18.2-11)

⁴⁷ Te sá cáhán gā yā súcuan, te ni quecoo cuehē ñayuu. Te tēe nání Judas, ñin jnáhan jeē uxí uū tēe scuáha jíin yá, yósnúu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya. ⁴⁸ Te ni cahān Jesús jíin de:

Judas, ¿á jíin jéē téchūhu ró ruhū cúu jeē nastúu ró ruhū, Yaā ní nduu tēe? Achí yá.

⁴⁹ Te tēe cáhīin jíin yá, ni cajito de jeē ní quejéé cúu, te ni cacajñuhún de ya:

¿A ndonga ná jíjnáhan ná síquī de jíin espada? achí de.

⁵⁰ Te ñin de ni stují de mozo sutū cujéhnu ga, chi ni jehnde de sōho lado váha. ⁵¹ Te ni cahān Jesús:

Siáá, na jécuiñi, achí yá.

Te ni tee ya ndaha ya sōho mozo un, te ni nasávaha ya de. ⁵² Te ni cahān yā jíin sūtū cácujeñnu jíin tée cándiso jniñu ini templo jíin táca tée jéñnu jeē ní quecoo de jeē jñi de ya:

¿Te va tēe cuíhná cúu ri jeē véjicoo ró jíin espada jíin yujnu jeē jñi ró ruhū jeē súcuan? ⁵³ Táca quívī ni ine ri jíin ró jijnáhan ró ini templo cáhnu, te tu ní cájñi ró ruhū. Te vijna te ni quee hora jeē jñi ró ruhū jíin jéē sáha ró táca jniñu jeē ndácu jeneé jéē ndeé nuū néē. Achí yá.

Jeē ní cachi Pedro jeē tu jíin de ya

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Te ni cajñi de ya cuango de jíin yá vehe sutū cujéhnu ga. Te Pedro chi

jíca-ni ndíquín de ya. ⁵⁵ Te táca policia ni cascáyú de ñuhūn ini patio, te ni condúu de yuñúhún un cáyúcú de. Te suni ni cucōo Pedro jíin de. ⁵⁶ Te ñin ñahan jéjñiñu ini vehe un, ní jito ña nuū de jeē néne de yuñúhún. Te ni jito váha ña nuū de, te ni cahān ña:

Tēe yáha suni ni jica de jíin tée ún, achí ña.

⁵⁷ Te máa de tu ní cáchi de, chi ni cahān de:

Tu jíin rī tēe ún, achí de.

⁵⁸ Te ni cunúu jecu gā, te ni jito tucu inga ñayuu nuū Pedro, te ni cahān:

Róhó, suni jnáhan táca tée un cúu ró, achí.

Te ni cahān Pedro:

Nasūu cúu ri, hombre, achí de.

⁵⁹ Te ni cuu nájnūhun ñin hora gā, te ni cahān ñihin inga de:

Jendaá ndije jeē tée yáha ní jica de jíin tée ún, chí suni tēe región Galilea cúu de, achí de.

⁶⁰ Te ni cahān Pedro:

Hombre, tu jíin rī na jñuhun cáhán rō.

Te sá súcuan cáhán gā de, te ni cana-ni líhli. ⁶¹ Yūcuán na te ni ndió cóto máa Jítoho yō, te ni jito ya nuū Pedro. Te ni nucūhun ni de jñuhun ni cahān yā jíin de: Nde ná tu cana líhli, te yūhu ró te cahān rō unī jínu jeē tu jíin rō ruhū. ⁶² Te ni quenda de cuahān de, te yōhyo ni ndahyū de jeē ní cachi de jeē tu jíin de ya.

Jeē ní casácatā de nuū yā

(Mt. 26.67-68; Mr. 14.65)

⁶³ Te táca tée cándito Jesús, ni casácatā de nuū yā, te ni cacani de ya. ⁶⁴ Te ni cajesi de sahma nuū yā, te ni cacani de nuū yā, te ni cacahān de:

Cachi ndé ñin cúu jeē ní cani róhó, achí de.

⁶⁵ Te cuehē gā jñuhun súcuan ni cacahān neé de jíin yá.

Jeē ní indichi Jesús nuū junta tēe cácujeñnu ga

(Mt. 26.59-66; Mr. 14.55-64; Jn. 18.19-24)

⁶⁶ Te jeē ní cundijin, te ni candutútú táca tée jéñnu cándacu jniñu nuū ñayuu hebreo, jíin sūtū cácujeñnu, jíin tée

cástéén tutu ley Yaā Dios. Te cuango de jíin yá nuū junta tēe cácujuhnu ga, te yūcuan ní cacajnuhún de ya:

⁶⁷ Cachi, ¿á máá ró cúu Cristo jeē ní tají Yaā Dios? Achí de.

Te ni cahān yā jíin de:

Vēsú na cáhān rī jeē suu ri cúu, te ni ma candíje cuíti rō. ⁶⁸ Te suni núu cajnuhun máá rí rohó jíināhan ró, te suni ma stió cuíñí rō nuū rī, ni ma siaá rō ruhū. ⁶⁹ Te ruhū, Yaā ní nduu tēe, tāca quíví jeē quíji conene ri lado váha máá Yaā iyó poder, achí yá.

⁷⁰ Yūcuán na te ndihí de ni cacajnuhún de ya:

¿A máá ró cúu Sēhe Yaā Dios núu súcuan?

Te ni cahān yā jíin de:

Suu ri cúu, nájnūhun cácahān rō, achí yá.

⁷¹ Yūcuán na te ni cacahān de:

¿Na testigo gā jíini ñúhún yó núu súcuan? Chi ni cajini sōho yó jíin yuhu máá de jeē cahān ndevāha de jeē cúu de Sēhe Yaā Dios. Achí de jíināhan de.

Jeē ní indichi Jesús nuū Pilato
(Mt. 27.1-2, 11-14; Mr. 15.1-5; Jn. 18.28-38)

23

¹ Yūcuán na te ni candocuíñí ndihí de, te cuango de jíin yá nuū Pilato.

² Te yūcuan ní caquejé de cácahān de cuēchi siquī yā:

Ni canihīn na tēe yáha jēe stóna de ñayuu siquī tohō. Te cáhān de jeē tú váha jeē cuāha ná xúhun renta nuū rey nación Roma jeē ndácu jniñu nuū nación na. Te suni cáhān de jeē maá de cúu Cristo, Rey jeē ní tají Yaā Dios. Achí de jíināhan de.

³ Yūcuán na te Pilato ni cajnuhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájnūhun cáhān rō, achí yá.

⁴ Te ni cahān Pilato jíin sūtū cácujuhnu jíin ñayuu cuehē ún:

Tú ni ñn jnūhun stíví cáhān tēe yáha jēe nihín rī cuēchi siquī de, achí de.

⁵ Te máá de víhyá gā ni cacahān de:

Tēe yáha stóna ndasí de ñayuu siquī tohō jíin jnūhun stéén de ññ Judea. Chi ni quejé de stéén de nde Galilea, te vijna te nde yáha, achí de.

Jeē ní indichi Jesús nuū Herodes

⁶ Te nuū ní jini sōho Pilato jeē Galilea cácahān, te ni cajnuhún de ñayuu núu tēe región Galilea cúu ya.

⁷ Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngoo de jíin yá nuū Herodes, tēe cúu gobernador Galilea. Chi quíví ún suni íne Herodes ñuu Jerusalén.

⁸ Te nuū ní jito de nuū Jesús, te yōhyo ni cusí ni de, chi je ni cuu cuehē tiempo jeē cuní de coto de nuū yā. Chi ni nihín de jnūhun ya, te ñúhun ni de jeē sáha ya ñn jniñu jénu coto de.

⁹ Te ni cajnuhún de ya cuehē jnūhun, te tu ní stió cuíñí yā ni ñn jnūhun nuū de.

¹⁰ Te suni cáhīn tāca sūtū cácujuhnu jíin tēe cástéén tutu ley, te nihín ni cacahān de cuēchi siquī yā.

¹¹ Yūcuán na te Herodes jíin tāca soldado de ni cacahān neé de jíin yá, te ni casacatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quíndeca de ya nuū Pilato.

¹² Te máá quíví un ní candumaní jnāhan Pilato jíin Herodes, chi ichi yátá ni caquítí jnāhan ni de.

Jeē ní cundaā jeē cúu yā

(Mt. 27.15-26; Mr. 15.6-15; Jn. 18.39-19.16)

¹³ Yūcuán na te ni cana Pilato tāca sūtū cácujuhnu jíin tāca tēe cándiso jniñu jíin tāca gá ñayuu, ni candutútú.

¹⁴ Te ni cahān de:

Ni caquindeca ró tēe yáha núu rī, jeē cácahān rō jeē stóna de ñayuu siquī tohō. Te je ni stichí rī de, ni cajito jíinú rō. Te tu ní nihín rī ni ñn cuēchi siquī de nájnūhun jeē cácahān rō.

¹⁵ Te ni Herodes, tu ní nihín de, chi ni natajítu de tēe yáha núu rī. Te tú cuíti ni ñn cuēchi ní sáha de jeē cúu de. ¹⁶ Núu súcuan te na cuāha ri castigo de, te siaá rī de quihín de, achí Pilato.

¹⁷ Te íyó costumbre jeē tācá vico pascua siaá Pilato ñn preso jeē cuní

ñayuu. ¹⁸ Te ñayuu cuehē ún, inuú-ni ni cacana jee i:

Na cúu tēe jíñá, te siáá ní Barrabás, achí i.

¹⁹ Te Barrabás íne de vecāa siquī jeē ni stóna de ñayuu siquī tohō iní ñuu ún, te ni jehni de ndīyí. ²⁰ Te Pilato cuní de siáá de Jesús, te ni cahān tucu de jíñ ñayuu. ²¹ Te máá i víhyá gā ni cacana jee i:

Cata caa ní de jicā cruz, na cúu de, achí i.

²² Te ni cahān tucu de jíñ i vuelta uní:

¿Na cuēchi ni sáha de núu súcuan? Tu ní níhín cuítí rī ni ñn cuēchi siquī de jeē cúu de. Núu súcuan te na cuáha ri castigo de, te siáá rī de quihīn de, achí Pilato.

²³ Te víhyá gā ni cacana jee ñayuu un, ní cacahān níhin i jeē na cúu yā jicā cruz. Te máá i jíñ táca sūtū cácujuhnu, ni cacana jee ndasí i. Te ni cacundeyí i ni cascāhān i Pilato jeē na cúu yā. ²⁴ Yūcuán na te ni ndacu Pilato jniñu jeē na cóo nájñuhun cácuñi i. ²⁵ Te ni siaá de tēe jeē ní cajicān i, tēe jeē íne vecāa jeē ni stóna de ñayuu siquī tohō te ni jehni de ndīyí. Te ni jēhe de jñuhun jeē na cúu Jesús nájñuhun cácuñi i.

Jeē ní cacata caa de ya jicā cruz

(Mt. 27.32-44; Mr. 15.21-32; Jn. 19.17-27)

²⁶ Te cuango tēcá soldado jíñ yá jeē cahni de ya jicā cruz. Te ni canihīn de ñn tēe ñuu Cirene, nání de Simón, vendijí de jeē ni jéhēn de rancho. Te ni catejníñu de tēe un jéē cóndiso de cruz yā quihīn de yatā yā.

²⁷ Te cuehē ndasí ñayuu ndíquín i yatā yā cuango i. Te suni cuehē ñahan cuango ña, te cándahyū cohó ña jeē cácuquíhyá ni ña jehē yā. ²⁸ Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chí sa suhva ndahyū rō jehē maá ró jíñ jéhē sēhe ró jíñáhan í. ²⁹ Chi quee quivī jeē coo jñúndóho xeēn siquī rō, te cahān rō: Yōhyo ndetū tēcá ñahan númá, jíñ jéē

tu ní scácu sēhe, jíñ jéē tu ní cóndeca yiquín, chí tú sēhe ña jeē jnahuhū ni ña jeē ndóho i, achí rō jijnáhan ró.

³⁰ Quivī ún te quejéé ñayuu cahān i jíñ táca yucu: Cotúú síquī rī jijnáhan ri návāha cuu rī. Te suni jíñ táca loma: Casi siquī rī jijnáhan ri, achí i. ³¹ Chi núu cásáha xeēn i jíñ rúhū jeē tú na cuēchi ri, te nagā ni cuu jeē ma cóo xeēn siquī ndihí ñayuu chí íyó cuēchi i. Achí yá.

³² Te suni cuango de jíñ úu tēe ni casáha cuēchi xeēn, jeē suni cuu de jíñ yá. ³³ Te ni jinūcoo de lugar nuū naní Yiquí Xíní, te yūcuan ní cacata caa de ya jicā cruz. Te suni ni cacata caa de ndíndúú tēe ni casáha cuēchi xeēn un núu uū gā cruz, ñn de lado váha ya, te inga de lado jecó yá. ³⁴ Te níñí jéē súcuan cúu, te ni cahān Jesús:

Tátā, cone cáhnu ni ní núu de jíñáhan de, chí tu cájini de na vé casáha de, achí yá.

Te soldado un ní casáha de sorteo jeē siquí ndese nihīn ñn ñn de sahna ya. ³⁵ Te cáhīn ñayuu yūcuan, cájito i nuū yā. Te suni nde tēe cándiso jniñu, cácahān catá de cájito de ya:

Núu inga ñayuu ni jnama de, te na jnama de máá de vijna, te núu ndaā jeē Cristo jeē ní nacāji Yaā Dios cúu de, achí.

³⁶ Te tēcá soldado suni ni casácatā de nuū yā, chí ni quecoo de nde nuū yā, te ni cajēhe de vinagre iyá coho ya. ³⁷ Te cácahān de jíñ yá:

Núu máá ró cúu Rey ñayuu hebreo, te na jnama ró máá ró, achí de.

³⁸ Te suni ni íyo jñuhun jeē ndeé xiní cruz yā jeē cahān na siquī ni jíñ yā, te suhva yósó jíñ yuhu griego jíñ latín jíñ hebreo: Yāha cúu Rey ñayuu hebreo, achí.

³⁹ Te ñn jeē ndíndúú tēe ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnama ró máá ró te suni jnama ró ndíndúú rí, achí de.

⁴⁰ Te inga de ni cahān de nuū jnáhan de:

¿A tu yúhú ró Yaā Dios naún? Chi inuú cándoho yó jíin Yaā yáha. ⁴¹ Te máá yó chi vetū-ni cándoho yó, chi yáha cánihīn yō castigo siquī jniñu néé ní casáha yó. Te Yaā yáha chi tú ni in cuēchi ní sáha ya, achí de.

⁴² Te ni cahān de jíin yá:

Jesús, nucūhun ni ní sáña jéé quéjéé ní ndacu ní jniñu, achí de.

⁴³ Yūcuán na te ni cahān Jesús jíin de:

Jendaá cahán rī jíin ró jeē víjna te condee rō jíin rí nuū jardín andiví, achí yá.

Jeē ní jihī Jesús

(Mt. 27.45-56; Mr. 15.33-41; Jn. 19.28-30)

⁴⁴ Te nuū ní cuu nájnūhun cahuxī uū, te ni cunee ní cáhnu nde cahunī.

⁴⁵ Te ni cujnuú níāndii. Te sahma ndíta caa jeē ndihyú cuarto ī ini templo cáhnu, ni ndatā-ni sava sava.

⁴⁶ Yūcuán na te ni cana jee Jesús:

Tátā, naquihin ní ánuá na, achí yá.

Te súcuan ni cahān yā, te ni jihī-ni ya.

⁴⁷ Te tēe nación Roma jeē cúu capitán ni jito de jeē súcuan ni cuu, te ni cahān de jeē yóhyo cújéhnu Yaā Dios, te achí de:

Jendaá ndije jeē téé tú na cuēchi cúu tēe yáha, achí de.

⁴⁸ Te ndivii ñayuu cáhīn yūcuan ní cajito i tāca jéé ní cuu, te cácani i yīquī jicā i jeē cájnahuhū ni i, te ni nandió cóo i cuanungoo i. ⁴⁹ Te tāca ñáyuu cájini jnáhan jíin yá, jíin tāca ñahan Galilea jeē ní cajica ña jíin yá, cáhīn jicá ña cájito ña tāca jéé ní cuu.

Jeē ní quindūji Jesús

(Mt. 27.57-61; Mr. 15.42-47; Jn. 19.38-42)

⁵⁰ Te ni Iyo in tēe vāha tēe ndaā, nání de José. Te tēe ñuu Arimatea ndañū Judea cúu de. Te cúu de jnáhan tāca téé hebreo cácujeéhnu ga jeē casáha junta. ⁵¹ Te ñūhun ni de jeē quiji quiví jeé ndacu Yaā Dios jniñu, te suni tu ní nújnahān ni de jeē ní casāndaā junta un jéé cúu Jesús. ⁵² Te tēe un ní jehēn de nuū Pilato, ni jicān de yīquī

cúñu Jesús. ⁵³ Te ni snúu de ya jicā cruz, te ni chusúcun de ya in sahma cuitá. Te ni chindūji de ya ini in yaū jeē ní caan jicā in cava, nuū ná tu quindūji ndiyí. ⁵⁴ Te quiví un cúu quiví casátūhva ñayuu, chi jehíni un quéjéé quiví ndétátú.

⁵⁵ Te ñahan ní quijicoo jíin yá nde Galilea, ni jengoo ña jíin José, te ni cajito vāha ña yaū ún, jíin ndese ni cachindūji de ya. ⁵⁶ Te cuanungoo ña vehe ña, te ni casátūhva ña tācá perfume jíin aceite yucū jeén asīn. Te ni candetátú ña quiví ndétátú, nájnūhun ndácu ley Yaā Dios jniñu.

Jeē ní natecu Jesús

(Mt. 28.1-10; Mr. 16.1-8; Jn. 20.1-10)

24

¹ Te jenéhen ndasí quiví domingo, te ni jinūcoo tucu ñahan un núu ní yindūji Jesús, te cándahá ña tācá perfume jíin aceite ni casátūhva ña. Te suni cuangoo sava ga ñahan jíin ña.

² Te nuū ni jinūcoo ña, te ni cajito ña jeē ní cujiyo yuū ndihyú yuyáú ndiyí.

³ Te ni quivícoo ña yaū ún, te tuá yiqui cúñu Jitoho yō Jesús ni cájito ña. ⁴ Te ni cacunéé ni ña cájito ña jeē tuá ndiyí. Sáa te ni cajito ña uū ndajéhé Yaā Dios jeē cáa nájnūhun tēe, cáhīn ya xiin ña, te cáñūhun ya sahma ndíndéé. ⁵ Te yóhyo ni cayūhú ña, te ni cajexin ña nuū ña nde nuū ñūhun. Te ni cacahān ndajéhé un jíin ña:

¿Naun sa nuū cáyindūji ndiyí cánanducú ró Yaā técu? ⁶ Tuá yā yāhá, chi je ni natecu yā. Te nucūhun ni rō ndese ni cahān yā jíin ró ná íne ga yā región Galilea. ⁷ Chi ni cachi ya jeē maá yá, Yaā ní nduu tēe, cánuú natūu ya nuū tāca téé cáhīyo cuēchi, jeē jni de ya cahni de ya jicā cruz, te nuū uní quiví te natecu yā. Achí ndajéhé un.

⁸ Yūcuán na te ni canucūhun ni ña tāca jnūhun ni cahān Jesús. ⁹ Te ni quendacoo ña nuū ní yindūji ya, te cuanungoo ña. Te ni canacani ña tāca jnūhun yáha núu ndihúxí in apóstol jíin núu tāca gá de. ¹⁰ Te ñahan ní canacani jnūhun yáha núu téé cácuu

apóstol, cúu ña María ñuu Magdala, jíin Juana, jíin María naná Jacobo, jíin sava ga ña. ¹¹ Te tãcá apóstol chi cájeni ni de jeē jnúhun cánéé cáñúú cacahān ña, te tu ní cá candíje de.

¹² Te vésú súcuan, te Pedro ni quenda de, te jínu de cuacondēhé de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu máá na. Te cuanuhun de vehe de, te nahán náā ni de jeē ní jito de jeē tuá yā.

Jeē ní ndajnúhun yá jíin úu de ichi cuáhán Emaús
(Mr. 16.12-13)

¹³ Te suu quiví un cuángoo uū jnáhan de ñn ñuu naní Emaús, jeē jicá nájnūhun uxí ñn kilómetro jíin ñuu Jerusalén. ¹⁴ Te cándajnúhún de siquí tãcá jniñu jeē ní cuu ún. ¹⁵ Te ní cándajnúhún de te cácajnūhun jnáhan de, te máá Jesús ni cuyajni ya yatā de, te jíca ya cuahān yā jíin de. ¹⁶ Te ni sáha jíin de jeē tu ní cá nacuni de ya, vésú cájito de nuū yā. ¹⁷ Te ni cajnúhun yá de:

¿Na jnúhun cándajnúhun ró cájica ró? ¿Te najehē cá cucuíhyá ni rō? Achí yá.

¹⁸ Te ñn de jeē naní Cleofas ni cahān de jíin yá:

Ndihí cuiti ñayuu cájini i tãcá jniñu ní cuu ini ñuu Jerusalén tãca quiví yáha. ¿Te á máñúhún-ni níhín cúu jeē ní quee ní ñuu un jéē tu jíin ni na vé ni cuu? Achí de.

¹⁹ Te ni cajnúhun yá de:

¿Te na vé ni cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jnúhun Yaā Dios. Te jíin poder Yaā Dios ni sáha ya tãcá jniñu jéhnu te ni nacani ya jnúhun, jíto jíinú Yaā Dios jíin tãca ñáyuu. ²⁰ Te sutū cácujuhnu jíin téé cándiso jniñu nuū ná, ni canastúu de ya nuū tãca téé Roma, te téé un ní casándaā de jeē cúu yā jíicā cruz. ²¹ Te máá ná ní cañūhun ni na jéē maá yá jnama ya nación na Israel nuū ñáyuu Roma nuú. Te siquí tãcá jniñu yáha, te ni cane inga jnúhun. Chi vijna je íyó úní quiví jeē ní cuu ún.

²² Te sava ñahan cájini jnáhan ná jíin, ni canacani ña ñn jnúhun jeē yóhio cánaa ni na sáha, chi cácahān ña jeē ní natecu yā. Chi jenéhen ndasí ní jengoo ña yaū ndiyí ún. ²³ Te tuá ní cájito ña yiquí cúñu yā. Te ni ndecoo ña nuū na jíin náhan ná, te cácahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. ²⁴ Te ni jengoo sava jnáhan ná ndé yaū ndiyí ún, te ni cajito de jeē súcuan íyó, nájnūhun ni cacahān ñahan ún, te tu ní cájito cuiti de nuū yā.

²⁵ Yūcuán na te ni cahān maá yá jíin de:

Tēe tu cájecūhun cuiti ni cácuu ró. Yóhio uhū cá candíje ró táca jnúhun Cristo ni cacahān tēe ni canacani jnúhun Yaā Dios nde jenahán. ²⁶ ¿Te á tu súcuan ní jíin ñúhún ndoho Cristo tãca jnúndóho yáha, te sáá te quinhun yā nuū lúu cujéhnu ya? Achí yá.

²⁷ Te ni nacani cáj yá tãca jnúhun jeē yosó núu tútu íi jeē cahán siquí maá yá. Te ni quejéé yá jíin jnúhun ni tee Moisés, te ni cahān gā yā tãca jnúhun jeē ní catee tēe ni canacani jnúhun ya nde jenahán.

²⁸ Te nuū ni jíinúcoo de ñuu nuū cuángoo de ún, te Jesús ni sáha ya jeē cáca ga yā quihín yā. ²⁹ Te máá de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, achí de.

Yūcuán na te ni quiví ya jeē quéndōo ya jíin de. ³⁰ Te nuū ní cucōo ya mesa jeē cáj yá jíin de jíin náhan de, te ni quihín ya staa, te ni jíicān tahú yā, te ni tahú cuéchí yá, te ni jēhe ya nuū de.

³¹ Te jeē sáha ya súcuan, te nájnūhun ni cananune tinúu de, te ni canacuni de ya. Te ni ndoñúhún-ni ya nuū de cuahān yā. ³² Te ni cacahān maá de:

Jendaá jeē yóhio ni cacusiñi ní yō ná ni nacani ya jnúhun nuū yō ichi ún te ni castūhun cáj yá jnúhun cáhán tutu íi. Achí de.

³³ Yūcuán na te yachí ni canaquihin de ichi, ni canandicó de cuanungoo de ñuu Jerusalén. Te ni canajnáhan de jíin ndihúxí ñn ga apóstol, cáyūcu

tútú de jíin sava ga jnáhan de. ³⁴ Te ni cacahān tē cáyūcu tútú un:

Jendaá ndije jeē ní natecu maá Jítóho yō, te ni nane ndijin yā nuū Simón, achí de jíjnáhan de.

³⁵ Yūcuán na te ndindúú tēe un ní canacani de jnūhun ndese ni nájna han ya jíin de ichi, jíin ndese ni canacuni de ya ná ni tahu cuéchi yá staā.

Jeē ní nane ya nuū tēe cáscuáha jíin yá

(Mt. 28.16-20; Mr. 16.14-18; Jn. 20.19-23)

³⁶ Te sá cacahān gā de tāca jnúhun yáha, te ni jecuiñi-ni Jesús mēhñú de jíjnáhan de. Te ni cahān yā jíin de:

Ndeyí sñ coo ni rō jijnáhan ró, achí yá.

³⁷ Te ni candacoto iyo de, ni cayūhú ndasí de, chi ni cajeni ni de jeē in ánuá cúu ya. ³⁸ Te ni cahān yā jíin de:

¿Naun cáyūhu ró, te naun cájeni siquí ni rō súcuan? ³⁹ Condēhé ndaha ri jíin jéhē rī, te cuni rō jeē maá rí cúu. Jni ruhū te cuni rō, chi in ánuá tu névāha cūñu ni yiqui nájñūhun cájito ró jē névāha máá rí, achí yá.

⁴⁰ Te jeē ni cáhān yā súcuan, te ni steén yā ndaha ya jéhē yā nuū ni yíhi ndūyu cāa. ⁴¹ Te yōhoyo ni cacusñ ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rī yāhá? achí yá.

⁴² Yūcuán na te ni cajēhe de in pedazo chācá ní tau nuū yā, jíin in pedazo ñahmā ndūxi yocō. ⁴³ Te ni quihin ya, te ni yeji yā nuū de jíjnáhan de. ⁴⁴ Te ni cahān yā jíin de:

Tāca jēe ní cuu jíin rí cúu jeē ni cáhān rī ná ni ine rí jíin ró jíjnáhan ró ndé saá, jeē cánuú squícu tāca jnúhun ri jeē yosó núu tútu ley Moisés, jíin núu tācá tutu tēe ni canacani jnūhun Yaā Dios, jíin núu tútu salmo, achí yá.

⁴⁵ Te ni nune ya jeē níjnūní de, návāha cuu jecūhun ni de tāca jēe cahán tutu iī. ⁴⁶ Te ni cahān yā:

Súcuan cáhān nuū tútu jeē ruhū Cristo, cánuú cuu rī, te nuū uní quiví

natecu rī. ⁴⁷ Te cuitē núu jnūhun ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuitē núu jnūhun yáha, te quihin nuū ñayuu tācá nación. ⁴⁸ Te máá ró cácuu tēe nacani jnūhun tācá jniñu ní cajito ró. ⁴⁹ Te tají rí Espíritu Santo quiji ya nuū rō jijnáhan ró, nájñūhun ni je-jnūhun Tátá rī. Te na quéndōo ró ñuu Jerusalén condetu ró ndé nihin rō poder Espíritu Santo jeē quiji nde andiví. Achí yá.

Jeē ní ndaa ya cuanuhun yā andiví (Mr. 16.19-20)

⁵⁰ Yūcuán na te ni quenda ya ñuu Jerusalén, cuahān yā nde ñuu Betania jíin de jíjnáhan de. Te ni ndonehen ya ndindúú ndaha ya, te ni jicān tahu yā jéhē de. ⁵¹ Te níni jicān tahu yā jéhē de, te ni cujiyo-ni ya nuū de, ni ndaa ya cuanuhun yā andiví. ⁵² Te máá de ni cachiñúhún de ya. Te sáa te cuanungoo de ñuu Jerusalén, te yōhoyo cácusñ ni de. ⁵³ Te níni cáhān de ini templo cáhnu, cánacuatáhú de nuū Yaā Dios. Te ni cuu. Amén.

JNUHUN VAHA NI TEE SAN JUAN

Yaā naní Jnúhun Yaā Dios ni nduu ya tēe

¹ Nde xihna ñúhún ná ni jecōo ndihi jeē iyó, te je iyó Yaā naní Jnúhun Yaā Dios, chi stéén yā ndihi jnúhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya. ² Máá yá ndeé yá nde jeē xihna ñúhún jíin Yaā Dios. ³ Te ni sáha Yaā Dios jeē jíin máá yá ni jecōo ndihi tāca jéé iyó. Te ma jecōo ni ñn jeē iyó núu tu ní sáha máá yá. ⁴ Máá yá sáha jeē técu ndihi-ni, te máá yá cúu luz jeē steén ini anuá ñayuu, cúu jeē sáha ya jeē jécūhun ni i síquī Yaā Dios. ⁵ Te Yaā cúu luz ún ndíndēe núu ñáyuu tu cájica ndaā, jeē nájnūhun cáhīyo i nuū néé. Te ñayuu cáhīyo nuū néé tu cúu ndahva i luz yā.

⁶ Te ni iyo ñn tēe jeē ní tají Yaā Dios, naní de Juan. ⁷ Tēe un ní quiiji de jeē nacani cájī de jnúhun máá Yaā cúu luz, návaha candíje tāca ñáyuu jeē jíin jnúhun cáhán de. ⁸ Nasūu máá Juan cúu luz ún, chi cúu de ñn jeē ní nacani cájī jnúhun máá luz un. ⁹ Te máá Yaā cúu luz ndije jeē steén ini anuá tāca ñáyuu, nde saá ní quiiji ya ini ñayíví.

¹⁰ Te Yaā cúu Jnúhun Yaā Dios ni condee yā ini ñayíví, te vésú jeē jíin máá yá ni sáha Yaā Dios ñayíví, te ñayuu ñayíví tu ní cáconi i cuatáhú i jeē máá yá cúu. ¹¹ Ni quiiji ya nuū ñáyuu máá yá nación hebreo, te ñayuu ún tu ní cájetáhú i ya. ¹² Te vésú súcuan te sava ñayuu chi ni cajetáhú i ya, te ni cacandíje i jeē sáha ya jehē i. Te nuū máá i ní jēhe ya jnúhun jeē ndúu i sēhe Yaā Dios. ¹³ Te jeē ndúu i sēhe Yaā Dios, nasūu jíin modo jeē cácau ñayuu ini ñayíví, ni nasūu síquī jeē cáconi tēe, chi máá Yaā Dios sáha ya jeē ndúu i sēhe ya.

¹⁴ Te máá Yaā cúu Jnúhun Yaā Dios ni nduu ya tēe, te ni condee yā jíin yó. Te ni cajito yó jéé yóhyo luu cújéhu

ya, chi máñúhún-ni ya cúu Sēhe Tátá yā, Yaā cújéhu súcuan. Te máni máá jéé sáha ya jeē váha yóhó, te máni máá jnúhun ndaā cahán yā. ¹⁵ Te Juan ni nacani de jnúhun ya, te ni cahán de:

Yaā yáha cúu jeē ni cáhán rī náa áchí rí jeē Yaā quiiji chi cújéhu ga yā vésú ruhū, chi je iyó yá nde ná tu cacu ri, achí de.

¹⁶ Te ndihi yó ní canihín yō cuehē ndasí jeē váha iyó núu yā, chi máni jeē váha sáha sáha ya jíin yó. ¹⁷ Moisés ni steén de ley Yaā Dios nuū ñáyuu jenahán, te Jesucristo chi sáha ya jeē váha yóhó te steén yā tāca jnúhun ndaā Yaā Dios nuū yō. ¹⁸ Tú ni ñn ñayuu ni jíto cuiti nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ni steén nuū yō ndese Yaā cúu Yaā Dios.

Jnúhun Jesús jeē ni cáhán Juan tēe scuándute

(Mt. 3.11-12; Mr. 1.7-8; Lc. 3.15-17)

¹⁹ Te ñayuu hebreo ñuu Jerusalén, ni catajī i jecu sutū jíin tēe grupo levita jeē cájeñíñu ini templo, ni jengoo de nuū Juan, návaha cajnúhún de ndé ñn cúu Juan te na jniñu ndíso de. ²⁰ Te Juan cájī ní cachi de:

Nasūu ruhū cúu Cristo, achí de.

²¹ Te ni cacajnūhún tucu de:

Núu súcuan ¿te ndé ñn cúu ró? ¿A cúu ró Elías, tēe ni nacani jnúhun Yaā Dios nde jenahán, chí naún?

Te ni cahán Juan:

Nasūu de cúu ri.

Te ni cacajnūhún tucu de:

Núu súcuan ¿te á cúu ró tēe nacani jnúhun Yaā Dios jeē achí tutu ñi jeē quíji?

Tuú, achí tucu Juan.

²² Te ni cacahán tucu jíin de:

¿Te ndé ñn cúu ró núu súcuan? Cachi nuū rī jijnáhan ri, chi jíni ñúhún castūhun rí nuū tāca tēe ni catajī ruhū vējicoo ri. Cachi na jniñu ndíso ró ví.

²³ Te ni cahán Juan:

Máá rí cúu tēe jeē ni cáhán Isaías, tēe ni nacani jnúhun Yaā Dios nde jenahán, jeē quíji ri cana jee ri nde nuū ñúhún téhé. Te cáhán rí jíin ñáyuu

jeē na sātūhva i máá i, chi quiji máá Jítóho yō. Achí Juan.

²⁴ Te tēe grupo fariseo cácuu jeē ní catajǎ tée ní quiijicoo ún. ²⁵ Te ní cacajñūhún de Juan:

Núu súcuan ¿te naun scuándute ró te núu nasūu Cristo ní Elías ní máá tée quiji nacani jñūhun Yaā Dios cúu ró?

²⁶ Te ní cahān Juan:

Ruhū chi jíin ndute scuándute ri. Te mēhñu ró jijnáhan ró íne ññ Yaā jeē tu cájini rō. ²⁷ Te Yaā un cúu jeē ní cahān rǎ jeē quiji ya te cújéhnu ga yā vēsú ruhū. Chi tú na vé jéhnu cuiñi cúu ri nuū yā, ní jeē cuajñíñu ri nuū yā vēsú ññ jniñu lúlú gá nájñūhun jeē ndajǎ rǎ correa ndijēn yā. Achí de.

²⁸ Súcuan ní cuu jeē ní candajñūhún de jíin Juan nde Betábara jeē íne ichi núu cáne niāndii yūte Jordán, nuū scuándute Juan.

Siquǎ jeē cúu ya Londe Yaā Dios

²⁹ Te ñnga quiivǎ un ní jito Juan nuū Jesús jeē véji ya nuū de. Te ní cahān de jíin ñáyuu:

Condēhe jíin náhan ró, chi yāha véji Yaā cúu Londe jeē ní tajǎ Yaā Dios, te cuu yā jeē sándoo ya cuēchi ñayuu ñayivǎ. ³⁰ Yaā yāha cúu jeē ní cahān rǎ jeē quiji ññ Yaā cujéhnu ndasí, chi je íyó yá nde ná tu cacu ri. ³¹ Te nde saá te tu ní jíin rǎ jeē yāha cúu Yaā ní tajǎ Yaā Dios. Te ní quiji ri jeē scuándute ri ñayuu ñuu yō Israel jíin ndute, návāha stéén rǎ nuū i jeē suu ya cúu, achí Juan.

³² Te suni ní cahān gā de jñūhun ya:

Ní jito ri Espírítu Santo, ní cuun ya ichi ándivǎ, cáa ya nájñūhun paloma, te ní quee ya xinǎ Jesús. ³³ Te nde saá te ná tu cuni rǎ jeē Jesús cúu. Te máá Yaā Dios jeē ní tajǎ yá ruhū jeē scuándute ri jíin ndute, ní cahān yā jíin rǎ: Núu ní jito ró jéē cúun Espírítu Santo te quendōo xinǎ ññ tēe, yūcuan cúu Yaā jeē cuáha Espírítu Santo condee ini anuá ñayuu, achí Yaā Dios. ³⁴ Te je ní jito ri ún, te nácani cájǎ rǎ jñūhun jeē máá yá cúu Sēhe Yaā Dios. Achí Juan.

Uū tēe jeē ní cana ya xīhna gā

³⁵ Te ñnga quiivǎ ún te Juan íne tucu de yūcuan jíin úū tēe cájica jíin de. ³⁶ Te

ní jito de nuū Jesús jeē jíca ya yūcuán. Te ní cahān de:

Condēhe jíin náhan ró, chi yūcuan cúu Yaā cúu Londe jeē ní tajǎ Yaā Dios.

³⁷ Te ndindúú tée cájica jíin Juan ní cajini sōho de jñūhun yāha, te ní candiquǎn de Jesús. ³⁸ Te ní ndió cóto Jesús, te ní jito ya jeē cándiquǎn de yatā yā. Te ní cahān yā jíin de:

¿Na vé cánanducú ró?

Te ní cacahān de jíin yá:

Maestro, ¿ndé nuū ndeé ní?

³⁹ Te ní cahān yā jíin de:

Quíngoo yó te cuni rō.

Te ní jengoo de, te ní cajito de nuū ndeé yá. Te ní caquendōo de jíin yá quiivǎ ún, chi nájñūhun cacuūn jehíni cúu.

⁴⁰ Te Andrés, ñani Simón Pedro, cúu ññ jeē ndindúú tée un jéē ní cajini sōho jñūhun ní cahān Juan, te ní candiquǎn Jesús. ⁴¹ Te Andrés, yachǎ ní jenanducú de ñani de Simón, te ní cahān de jíin:

Ní caquiñáhan ri jíin Mesías, achí de. Te jñūhun un cúní cahān Cristo, Yaā ní tajǎ Yaā Dios.

⁴² Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ní cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jñūhun un cúní cahān Pedro, jeē cuní cahān yuū.

Jeē ní cana ya Felipe jíin Natanael

⁴³ Te ñnga quiivǎ un cúní Jesús quihǎn yā región Galilea. Te ní nihǎn jñáhan ya jíin Felipe, te ní cahān yā jíin de:

Condiquǎn ruhū na quihǎn yō.

⁴⁴ Te Felipe cúu tēe ñuu Betsaida, jeē cúu ñuu Andrés jíin Pedro. ⁴⁵ Te ní jenanducú de Natanael, te ní cahān de jíin:

Ní canihǎn jñáhan ri jíin Yaā jeē yosó jñūhun ya nuū tútu ley jeē ní tee Moisés, jíin núu tútu ní catee tēe ní canacani jñūhun Yaā Dios nde jenahán. Te Jesús sēhe José ñuu Nazaret cúu ya. Achí de.

⁴⁶ Te ní cahān Natanael jíin de:

¿Te ndese cúu cujéhnu ññ tēe jeē ní cacu ñuu ndahú Nazaret?

Te ni cahān Felipe:
Quíhín yō de cuni rō, achí de.

⁴⁷ Te ni jito Jesús jeē véji Natanael,
te ni cahān yā:

Yāha véji ñn tēe ndaā jeē cúu ndije
yucūn Israel, chi tu stáhú cuiṭi de, achí
yá.

⁴⁸ Te ni cahān Natanael jiín yá:

¿Ndese jíní ni sáña?

Te ni cahān Jesús:

Je ni jito ri rohó ndé ná tu cana
Felipe xinī rō, ná íne ró jéhē nundéhe
higo, achí yá.

⁴⁹ Yūcuán na te ni cahān Natanael
jiín yá:

Maestro, máá ní cúu Sēhe Yaā Dios,
máá ní cúu Rey ñuu yō Israel, achí de.

⁵⁰ Te ni cahān Jesús:

¿A máá jēē ni cáhān rī jeē ní jito ri
rohó ná íne ró jéhē nundéhe higo, te
jeē yúcuan cándíje ró rúhū naún? Tuú
chi coo jniñu jéhnú ga coto ró vēsú jeē
yáha, achí yá jiín de.

⁵¹ Te ni cahān gā yā:

Jendaá cahán rī jiín ró jijnáhan
ró jēē nde vijna te coto ró jēē núne
andiví, te tācá ndajéhé Yaā Dios
cándaá cánuu nuū ruhū, Yaā ní nduu
tēe, achí yá.

*Jeē ni jéhēn yā ñn vico nándaaha ñuu
Caná*

2

¹ Te ni yāha unī quivī, te ni íyo
ñn vico nándaaha ñuu Caná ndañūū
Galilea. Te yúcuan íne náná Jesús. ² Te
suni ni cacana i Jesús jiín tēe cáscuáha
jiín yá, ni jehēn yā vico un jiín de. ³ Te
ni ndoco vino. Te náná Jesús ni cahān
ña jiín yá:

Ni ndoco vino i, achí ña.

⁴ Te ni cahān Jesús jiín ña:

¿Naun cáhán ni súcuan jiín ná nánā?
Chi ná tu quee quivī jeē sáha ná jniñu
jéhnú, achí yá.

⁵ Te náná yā chi ni cahān ña jiín
ñáyuu cájeni cohō:

Sáha ró jijnáhan ró táca jēē cahān yā
jiín ró. Achí ña.

⁶ Te yúcuan íyó íñū tenéjā yuū jeē
ñúhun ndute cájichi ñayuu hebreo jeē
ndúndoo i nuū Yaā Dios. Te ñn ñn

tenéjā un cánda cuhun cuūn xico chí
ciento litro ndute. ⁷ Te ni cahān Jesús
jiín ñáyuu cájeni cohō:

Scútú ndñ rō tācá tenéjā yáha.

Te ni cascútú ndñ i. ⁸ Te ni cahān yā
jiín i:

Vijna te quēen ró jecu te quindecena
ró coto ndee tēe ndíto vico, achí yá.

Te ni cajendeca i nuū de. ⁹ Te ni
séyūhú de ndute jeē ní nduu vino,
te tu jíní de ndé ní canihín i. Chi
máni mozo un cúu jeē cájini, chi máá
i ni caquēen ndute ún. Yūcuán na te
tēe ndíto vico ni caña de tēe nándaaha.
¹⁰ Te ni cahān de jiín:

Tāca ñáyuu chí xīhna gā vino váha
cájēhe i, te núu je ni cajihí váha ñayuu
cáhīn vico, yūcuán na te jéhe de vino
ndahú na. Te máá ró tucu ni sáha ró,
chi nde jeē sándihí te jéhe ró vino jeē
yóhyo váha ga jíhi, achí de.

¹¹ Jniñu yáha jēē ni sáha Jesús ini ñuu
Caná ndañūū Galilea cúu jniñu jéhnú
xīhna ñúhún jēē ni sáha ya jeē steén
yā poder yā. Te súcuan ni steén yā jeē
yóhyo cújéhnú ya. Te tēe cáscuáha jiín
yá ni cacandíje de ya.

¹² Te ná ni yāha jniñu yáha, te
cuahān yā ñuu Capernaum jiín náná
yā jiín táca ñani yā jiín tēe cáscuáha jiín
yá. Te ni coyūcu yá yūcuán jecu quivī.

*Jeē ní quenehen ya ñayuu ini templo
(Mt. 21.12-13; Mr. 11.15-18;
Lc. 19.45-46)*

¹³ Te jeē cuácuyajni vico pascua
casáha jnáhan ñuu yā hebreo, te
cuahān yā ñuu Jerusalén. ¹⁴ Te ini
templo cáhnu ni jito ya ñayuu cáxícó
stiquī jiín lanchi jiín paloma, jiín
ñáyuu castáyí xūhun, cáyūcú i nuū
mesa i. ¹⁵ Te jeē súcuan ni jito ya, te
ni sáha ya ñn cuarta ññ. Te ni scúnu
ya tācá i ini templo, nde jiín lanchi
jiín stiquī i. Te ni jete yā xūhun ñáyuu
castáyí. Te ni scotúú yá táca mesa
i. ¹⁶ Te ni cahān yā jiín ñáyuu cáxícó
paloma:

Tava tācá quiṭi yáha. Te ma sáha ró
yáhu ini vehe Tátá rī. Achí yá.

¹⁷ Yūcuán na te tēe cáscuáha jiín yá,
ni canucūhun ni de jnūhun yósó núū

tútu iĩ: Je yajni cuu na jéē yóhyo ndíhví ni na síquī vehe ní, áchí yá jíin Tátá yā, achí tutu.

¹⁸ Te tēe ñuu yā hebreo ni cacajñūhún de ya:

¿Na jniñu jéhu sáha ró jéē steén rō poder rō, te cucáhu ni rī jeē ndíso jniñu ró sáha ró súcuan? áchí de jíin yá.

¹⁹ Te ni cahān yatá Jesús:

Canu rō templo yáha, te nuū uní quiví te nucondichi sáha ri, achí yá.

²⁰ Yūcuán na te ni cacahān tēe hebreo un:

Uū xico iñu cuiyā te ni jínu ni cuvāha templo yáha. Te rōhó, ¿á núu uní-ni quiví te nucondichi sáha ró naún? Achí de.

²¹ Te templo jeē cahān Jesús cúu máá yiquí cúñu yā, chí cahni ñayuu yā te natecu yā nuū uní quiví. ²² Jeē yúcuan cúu jeē ná ni natecu yā jeē ni jíhī yā, te tēe cáscuáha jíin yá ni canucūhun ni de jeē ni cáhān yā jñūhun yáha. Te ni cacandíje de jñūhun jeē yosó núu tútu iĩ, jíin jñūhun yáha jéē ni cáhān Jesús.

Jeē jini Jesús ndese cáa ini anuá ñayuu

²³ Te ná íne Jesús ñuu Jerusalén máá vico pascua, te cuehē ñayuu ni cacandíje i jeē cúu ya Cristo, chí ni cajito i táca jniñu jéhu sáha ya jeē steén yā poder yā. ²⁴ Te máá Jesús chí tu ní jétáhú yá i, chí je jíin yā ndese cáa ini anuá i jíin náhan i. ²⁵ Te tu jíin ñūhún yá jeē cáchi ni ññayuu nuū yā ndese íyó táca ñayuu, chí máá yá je jíin yā ndese cáa ini anuá i.

Jeē ní candajñūhún Jesús jíin Nicodemo

3

¹ Te ni íyo ññayuu tēe grupo fariseo, naní de Nicodemo, te cújéhu de nuū ñayuu ñuu de hebreo. ² Tēe yáha ní quiji de nuū Jesús ññayuu jecuáa, te ni cahān de jíin yá:

Maestro, je cájini na jéē maá Yaā Dios ni tají yá nihín jéē steén ni jñūhun ya nuū na jíin náhan ná. Chí núu tu íyó Yaā Dios jíin ní, te ma cúu sáha ní ni

ññayuu jéhu nájnūhun sáha máá ní jeē steén ni poder ní, áchí de.

³ Te ni cahān Jesús:

Jendaá cahān rī jíin ró jeē núu tu nacacu jeé ññayuu, te ma cúu quiví i ndaha Yaā Dios jeē ndacu ya jniñu nuū i, áchí yá jíin de.

⁴ Te ni cahān Nicodemo jíin yá:

¿Te ndese cuu nacacu ññayuu tēe te núu je ni jéhu de? ¿A cuu nucūhun tucu de chíjini náná de te nacacu tucu de? áchí de.

⁵ Te ni cahān Jesús:

Jendaá cahān rī jíin ró jeē núu tu nacacu ññayuu, te ma cúu quiví i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájnūhun jíin ndute, te condee Espíritu Santo ini anuá i. ⁶ Jeē cácu sáha ñayuu, chí sēhe ñayuu cúu. Te jeē cácu sáha Espíritu yā, chí sēhe ya cúu. ⁷ Ma náa ni rō caní ni rō ndese cúu jñūhun ni cahān rī jíin ró jeē cánuú jéé nacacu jeé ró jíin náhan ró. ⁸ Te tachí chí quée cuahān ndé-ni cúu nuū cuní máá, te jíin sōho ró jéē cáyu, te tu jíin rō ndé nuū véji ni ndé nuū quihín. Te suni súcuan cúu táca ñayuu jeē nácacu sáha Espíritu, chí tu jíin rō ndese sáha ya jniñu ún, áchí yá.

⁹ Te ni cahān tucu Nicodemo:

¿Ndesese ga cúu núu súcuan?

¹⁰ Te ni cahān Jesús:

Máá ró cúu ññayuu maestro jeē cújéhu nuū ñayuu ñuu yō Israel, te ¿á tu jécūhun ni rō jñūhun yáha naún? ¹¹ Jendaá cahān rī jíin ró jeē jñūhun cájecūhun ni rī cúu jeē cácahān rī jíin ró. Te cánacani cájini rī jñūhun jniñu ní cajito ri. Te tu cacandíje ró jñūhun cácahān rī. ¹² Chí ni cahān rī jñūhun ndese sáha Yaā Dios ini ñayuví, te tu cacandíje ró. Núu súcuan ¿te ndese candíje ró núu cahān rī jñūhun táca ndese sáha ya nde andíví?

¹³ Chí ni ññayuu tu ní cáca andíví jeē cúni ndese íyó yúcuan, chí máñūhún-ni ruhū, Yaā ní nduu tēe. Chí andíví ndéé rí, te ni cuun rí véji rí. ¹⁴ Te nájnūhun ni cata caa Moisés ññayuu nuū ññayuu yujnu, ná ni cajica ñayuu nuū ññayuu téhé, suni súcuan máá rí,

Yaā ní nduu tēe, cánuú jéē cóndita caa ri jicā cruz. ¹⁵ Te súcuan cánuú návāha tāca ñáyuu jeē candíje i jeē jnáma ri i, ma jnahnú ndetū i, chi sa suhva cotecu i ní cáni andiví.

Yōhyo ni cundáhú ni yā ñayuu ñayiví

¹⁶ Chi Yaā Dios yōhyo ni cundáhú ni yā ñayuu ñayiví. Jeē yúcuan ní tají yá Séhe ya ni quiji, vésú mañúhún-ni ya iyó, návāha tāca ñáyuu jeē candíje i jeē jnáma ya i, ma jnahnú ndetū, chi sa suhva cotecu i ní cáni andiví. ¹⁷ Chi tu ní tají Yaā Dios Séhe ya ini ñayiví jéē snahnú ndetū yā ñayuu, chi sa suhva jeē jnáma ya ñayuu.

¹⁸ Ñayuu jeē candíje i jeē jnáma ya i, ma jnahnú ndetū i. Te ñayuu tu cándíje, je ni jnahnú ndetū i, chi tu ní cándíje i máá Séhe Yaā Dios, te máá ñn-ni ya iyó. ¹⁹ Máá Yaā jeē stíndēē ini anuá ñayuu, je ni quee ya ini ñayiví. Te cánujnahan gā ni ñayuu caca i nájñuhun nuū néē vésú nuū luz yā, chi jniñu cásáha i cúu jniñu néē. Jeē yúcuan cúu jeē jnahnú ndetū ñayuu tu cándíje ún. ²⁰ Chi tāca ñáyuu casáha jniñu néē, tu nújnahan cuíti ni i luz yā. Te tu jéhe i jñuhun jeē stíndēē yá ini anuá i, chi tu cúní i jeē natūu jniñu néē cásáha i. ²¹ Te ñayuu jeē cájica jíin jniñu ndaā, jéhe i jñuhun jeē stíndēē yá ini anuá i, návāha natūu ndijin jeē tācá jniñu cásáha i cúu jniñu cúní Yaā Dios. Achí yá jíin de.

Jeē ni cáhān tucu Juan jñuhun Jesús

²² Yūcuán na te Jesús jíin téé cáscuáha jíin yá, cuahān yā región Judea. Te ni condee yā yūcuán jecu tiempo jíin de, te cáscuándute de ñayuu. ²³ Te suni scuándute Juan, íne de lugar jeē naní Enón yajni ñuu Salim, chi yūcuán íyó cuéhē ndute. Te ni quijicoo ñayuu nuū de, te ni scuándute de i. ²⁴ Súcuan ni sáha Juan nde ná tu quiví de vecāa.

²⁵ Yūcuán na te sava tēe cáscuáha jíin Juan yōhyo ni cacahān de jíin sava jnáhan de hebreo siquī núu ndé ñn cúu modo vāha ga jeē cúchi ñayuu ndundoo i nuū Yaā Dios. ²⁶ Te ni quecoo de nuū Juan, te ni cacahān de:

Maestro, tēe ní ine jíin ní yūte Jordán ichi núu cáne niāndii, jeē ní nacani ní jñuhun de nuū ná, vijna te scuándute máá de, te ndivii ñayuu cuangoo i nuū de.

²⁷ Te ni cahān Juan:

Ni ñn tēe ma cúu sáha de jniñu Yaā Dios te núu ma tejníñu ya de. ²⁸ Máá ró jijnáhan ró chi ni cajini sōho ró jéē ni cáhān cají rí jeē násūu máá rí cúu Cristo, chi cúu rí ñn jeē ní tají Yaā Dios jeē cósnūu nacani jñuhun jeē quíji ya. ²⁹ Te núu cásáha vico quíjnáhan, te máá yñ cúu jeē ndéca ñasihí. Te amigo yñ un íne jíin de, te jíini sōho jñuhun cáhān de. Te yōhyo cúsiñ ni jíini sōho jñuhun cáhān yñ ún. Te suni súcuan ruhū, chi cúu rí nájñuhun amigo yñ, chi ni quee máá Cristo, te yōhyo cúsiñ ni rí jíini sōho rí jñuhun cáhān yā. ³⁰ Te jíini ñúhún jéē ndujéhnu ga máá yá te ndululí gá máá rí, achí Juan.

Jeē ní quiji ya nde nuū sucún

³¹ Te Yaā jeē véji nde andiví, cújéhnu ya nuū ndíhi. Chi tāca jéē ní cacu ini ñayiví yáha, séhe ñayiví cúu, te máni jñuhun ñayiví cáhān. Te Yaā jeē véji ichi ándiví, chi cújéhnu ya nuū ndíhi ñayuu. ³² Te nácani ya jñuhun jeē ní jito ya jíin jéē ní jini sōho ya. Te ñayuu chi tu cándíje i jñuhun cáhān yā. ³³ Te núu ñn ñayuu candíje i jñuhun cáhān yā, suu cúu jeē jejnúhún i jeē Yaā ndaā cúu Yaā Dios. ³⁴ Chi Yaā ní tají Yaā Dios véji, máni máá jñuhun Yaā Dios cahān yā. Chi Yaā Dios tu yícuaña jéhe ya Espíritu yā nuū Yaā ní tají yá. ³⁵ Máá yá jeē cúu ya Tatá, yōhyo maní yā jíin Séhe ya, te ndivii ni jéhe ya ndaha Séhe ya jeē ndacu ya jniñu nuū. ³⁶ Ñayuu jeē candíje máá Séhe ya jeē jnáma ya i, cotecu i ní cáni andiví. Te ñayuu tu cúní candíje Séhe ya, ma cótecu i ní cáni andiví, chi sa suhva cuāha Yaā Dios castigo jeē ndoho i ní cáni.

Jeē ni cáhān Jesús jíin ñahan ñúu Samaria

4

¹ Te tēe grupo fariseo, ni canihin de jnūhun jeē iyó cuéhē gā tēe cáscuáha jíin Jesús vēsú jíin Juan, jíin jéē cuehē gā ñayuu scuándute ya vēsú Juan. ² Te nasūu jéē scuándute máá yá, chi tēe cáscuáha jíin yá cúu jeē cascuándute. ³ Te ná ni jini Jesús jeē súcuan ni canihin de jnūhun, te ni quenda ya región Judea, te cuanuhun yā región Galilea.

⁴ Te ichi jeē nuhún yā chi yáha región Samaria. ⁵ Te ni jinū yā ñn ñuu región Samaria jeē naní Sicar, yajni ñuhun jeē ni jéhe Jacob nuū séhe de José nde jenahán. ⁶ Te yūcuan íne pozo jeē naní pozo Jacob. Te ni cucōo Jesús xiin pozo un, chi ni cuíta yá jeē cuahán yā ichi. Te nájnūhun cahuxī uū cúu. ⁷ Te ni quee ñn ñahan Samaria, vēji ña vequihin ña ndute. Te ni cahān Jesús jíin ña:

Cuāha ní ndute coho ná, áchí yá.

⁸ Te tēe cáscuáha jíin yá, chi je cuan-goo de nde ñuu, cuacuaan de jeē cáji de jíin yá. ⁹ Te ñahan Samaria un ní cahān ña jíin yá:

¿Ndese cúu jeē jicán ni ndute nuū ná coho ní? Chi tēe hebreo cúu ní, te ñahan Samaria cúu ná, áchí ña.

Súcuan ni cahān ña, chi ñayuu hebreo tu cácahān i jíin ñáyuu Samaria.

¹⁰ Te ni cahān Jesús:

Núu jeē jiní ni ndese cúní Yaā Dios sáha ya jeē váha níhín, jíin ndé ñn cúu sãña jéē jicán na ndute nuū ní, yūcuán na te máá ní cacān ni núu ná, te cuāha ná ndute jeē cótecu ni ñí cáni sáha, áchí yá.

¹¹ Te ni cahān ña jíin yá:

Tátā, yōhyo cúnú pozo yáha, te tú na vé ndahá ní jéē táva ní ndute. Núu súcuan ¿te ndé nuū nihín ni ndute jeē cótecu na sáha? ¹² ¿Te á cújénu ga maá ní vēsú jíi yō Jacob, chí naún? Chi máá de ni stóo de pozo yáha nuū yō. Te yāha ní cajihí máá de ndute, jíin táca séhe de, jíin quiiti ndéca de. Achí ña.

¹³ Te ni cahān Jesús:

Tāca ñáyuu jeē jíhi ndute yáha, chi jichí tucu i. ¹⁴ Te ñayuu coho ndute

jeē cuáha na núu i, chi ma jichí cuiiti gā i. Chi ndute jeē cuáha ná un, cane ñni i nájnūhun ndute jeē cáne ñuhún, te sáha jeē cotecu i ñí cáni, áchí yá jíin ña.

¹⁵ Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuiiti gā ná, ni tuá jíni ñūhun quiquihin ná ndute pozo yáha, áchí ña.

¹⁶ Te ni cahān Jesús jíin ña:

Cuácana ní yñ ní te quiiji ní jíin de, áchí yá.

¹⁷ Te ni cahān ña:

Tú yñ ná íyó.

Te ni cahān Jesús:

Ndaā cahán ni jéē tú yñ ní íyó. ¹⁸ Chi je ni cuu uhūn yñ ní, te tēe ndéca ní vijna chi nasūú yñ ní cúu de. Yāha cúu jeē ni cáhān ndaā ní, áchí yá.

¹⁹ Te jeē súcuan ni cahān yā, te ni cahān ña:

Tátā, ñn tēe nácani jnūhun Yaā Dios cúu ní, jéni ni ná. ²⁰ Tāca jíi na ñáyuu Samaria, yucu yáha ní cachiñúhún i Yaā Dios. Te máá ní ñayuu hebreo, cácahān ni jéē ñuu Jerusalén cúu nuū cánuú chiñúhún yó yā, áchí ña.

²¹ Te ni cahān Jesús jíin ña:

Nánā, candíje ní jnūhun cáhán na, chi quee quiiví jeē ni nasūú yucu yáha ni nasūú ñuu Jerusalén cúu nuū chiñúhún ní maá Yaā cúu Tátá, chi ndíhi-ni lugar te cuu chiñúhún ní yá.

²² Máá ní ñáyuu Samaria tu cájini ni ndé ñn cúu jeē cáchiñúhún ní. Te máá ná jijnáhan ná chi cájini na ndé ñn cúu jeē cáchiñúhún ná. Chi nde nuū maá ná jijnáhan ná ñáyuu hebreo cúu nuū véji Yaā jnama ñayuu. ²³ Te je ni quee quiiví jeē ñáyuu cáchiñúhún ndáā, vijna te chiñúhún ndije i Yaā cúu Tátá nde jíin ini jíin ánuá i. Chi máá Tátá cúní yā jeē súcuan chiñúhún ñáyuu yā. ²⁴ Yaā Dios cúu Espíritu, te ñayuu jeē cuní i chiñúhún i ya, cánuú jéē chiñúhún ndije i ya jíin ini jíin ánuá i, áchí yá.

²⁵ Te ni cahān ñahan ún:

Jíní na jéē quíji Mesías jeē cúu Cristo, Yaā jeē tají Yaā Dios. Te núu

ni quee maá yá, te stéén cají yá tāca jnúhun nuū yō.

²⁶ Te ni cahān Jesús:

Maá ná jeē cahán jíin ní, suu ná cúu Yaā ún.

²⁷ Te sá cahán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē ndájnūhun yá jíin ñahan yúcuan. Te ni ñin de tu ní cájnūhún de ya núu na vé cájnūhun yá ña chí na vé ndájnūhun yá jíin ña.

²⁸ Yūcuán na te ñahan un ní stóo ña quiyí ña, te cuahān ña nde ñuu. Te ni cahān ña jíin ñayuu ún:

²⁹ Nehen na quíngoo yó te coto ró ñin tēe jeē ní cachi ndihi tāca jēe ni sáha ri. Sanaa te maá yá cúu Cristo, jeē cándetu yó quiji, áchí ña.

³⁰ Yūcuán na te ni quendacoo i ñuu ún, te cuangoo i nuū íne Jesús. ³¹ Te nde ná tu jinūcoo i, te tēe cáscuáha jíin yá ni cacahān ndahú de jíin yá:

Maestro, caji ni stáa víi, achí de.

³² Te ni cahān yā jíin de:

Iyó stáa caji rī jeē tu cájini rō ndese cúu.

³³ Yūcuán na te tēe cáscuáha jíin yá, ni cacajnūhun jñahan de:

¿A ní quindeca ñin ñayuu jeē ní yeji yā, chí naún? áchí de.

³⁴ Te ni cahān Jesús:

Jeē ní cachi rī jeē iyó jēe cáji rī cúu jeē cúsih ni rī sáha ri jniñu cúní Yaā ní tají rúhū vēji ri, jíin jēe sínu ri jniñu ún. ³⁵ Te cácahān rō jeē cúmanī cuñ gā yoō te tahndē trigo. Te ruhū chi cahán rī jíin ró: Condēhe jíjnáhan ró, chi ñayuu cuehē cácuu i nájnūhun trigo jeē jé ni cuaan jeē tahndé, chi je cáhiyo tūhva i candíje i ruhū. ³⁶ Te tēe scándíje ñayuu cácuu de nájnūhun tēe cájehnde trigo, te nihīn de yāhu de. Te jeē cánastútú de ñayuu cúu jeē cótecu i ní cáni andiví. Te tēe cáscuíté núu jnúhun ri, ñnuú-ni cusih ni de jíin tēe cástéén gā jnúhun ri. ³⁷ Chi ndaā cúu jnúhun jeē cahán: ñin tēe jéte, te inga tēe nástútú, áchí. ³⁸ Te suu cúu jeē ní tají rí rohó jíjnáhan ró jēe scándíje ró ñayuu jeē jé ni canihīn jnúhun ya ni casáha inga tēe. Chi inga tēe je ni canacani de jnúhun nuū ñayuu, te

maá ró chi nájnūhun cánastútú ró i cúu jeē scándíje ró i.

³⁹ Te cuehē ñayuu Samaria jeē cáyucú ñuu ún, ni cacandíje i Jesús jeē ní jini sōho i jnúhun ni cahān ñahan ún. Chi ni cahān ña: Ni cachi ya ndihi tāca jēe ni sáha ri. ⁴⁰ Te jeē yúcuan cúu jeē ñayuu Samaria un ní jinūcoo i nuū yā, te ni cacahān ndahú i jíin yá jeē na quéndōo ya ñuu i. Te ni ndōo ya yúcuan úu quiví. ⁴¹ Te cuehē gā i ni cacandíje i ya jíin jnúhun cahán maá yá. ⁴² Te ni cacahān i jíin ñahan ún:

Tuá niní jēe cahán maá ró te candíje ri yā, chí je ni cajini sōho ri jnúhun cahán maá yá. Te cájini yō jeē maá yá cúu ndije Cristo, Yaā jnama ñayuu ñayiví. Achí i.

Jeē ní nasávāha ya sēhe tēe ndíso jniñu nuū rey

⁴³ Te nuū ni yáha uū quiví ún, te Jesús ni quenda ya Samaria, te ni quihin tucu ya ichi cuanuhun yā región Galilea. ⁴⁴ Chi je ni cahān maá yá jeē tēe cánacani jnúhun Yaā Dios, tu cáhiyo yíñuhún ñayuu ñuu de jíin de, te suni súcuan ni cuu jíin maá yá. ⁴⁵ Te ná ni najinū yā Galilea, te ñayuu un ní cajetáhú i ya, chí suni maá i ni jengoo i vico pascua ñuu Jerusalén, te ni cajito i tācá jniñu ní sáha ya quiví ni íyo vico ún.

⁴⁶ Yūcuán na te ni jehēn tucu ya ñuu Caná ndañúu Galilea, nuū ni sáha ya jeē ndúte ni nduu vino. Te ini ñuu Capernaum ni íyo ñin tēe cújéhnu jeē ndíso jniñu nuū rey. Te cúhú sēhe de. ⁴⁷ Tēe un ní jini jnúhun de jeē ní najinū Jesús región Galilea jeē ni jehēn yā región Judea. Te ni jecondéhé de ya, te ni cahān ndahú de jíin yá jeē na quihín yā jíin de vehe de, te nasávāha ya sēhe de, chí je yajni cuu i. ⁴⁸ Te ni cahān Jesús jíin de:

Núu tú coto ró jniñu jéhnu jeē náa ni rō sáha, te ma candíje cuiti rō jijnáhan ró, áchí yá.

⁴⁹ Te tēe ndíso jniñu nuū rey, ni cahān de:

Cava vāha ni ní na quihín yō, chí núu cucuéé ní te cuu sēhe ná, áchí de.

⁵⁰ Yūcuán na te ni cahān Jesús:
Cuánuhun vehe ró, chi cotecu sēhe ró.

Te tēe un ní candíje de jnūhun ni cahān Jesús, te cuanuhun-ni de. ⁵¹ Te níni jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, áchí i.

⁵² Te ni cajnūhún de na hora ni quejéé ndúvāha i. Te ni cacahān i jíin de:

Cahān jeē ícu ni quenda quíji i.

⁵³ Yūcuán na te máá tátá i ní sáha de cuenta jeē hora un cúu jeē ni cáhān Jesús jíin de jeē cótecu sēhe de. Te ni candíje de jíin ní vehe de jeē cúu ya Yaā ní tají Yaā Dios.

⁵⁴ Yāha cúu vuelta uū jeē ni sáha Jesús jniñu jéhu jeē ni stéén yā poder yā región Galilea, jeē ní najinū yā jeē ni jéhēn yā región Judea.

Jeē ní nasávāha ya ĩn tēe cátú yuhu pila Betesda

5

¹ Yūcuán na te cuahān tucu Jesús ñuu Jerusalén, chi íyó tucu vico cásáha jnáhan ñuu yā hebreo. ² Te Jerusalén iyó ĩn pila ndute yajni yéhyí jeē naní yéhyí lanchi. Te yuhu hebreo naní Betesda. Te nuū íne pila un íyó úhūn corredor. ³ Te ini tācá corredor un cācāa cuehē ñayuu cācuhū, jeē cuaá, jeē chacuá, jeē ni íjin. Te cāndetu i jeē canda ndute ún. ⁴ Chi íyó quívi jeē cúun ĩn ndajéhé yā ini pila un, te scānda ya ndute. Te ñayuu quívi xīhna gā ini pila un ná scānda ya ndute, te ndúvāha i na-ni cuehyí ndóho i. ⁵ Te yūcuan íyó ĩn tēe jeē ní cuu ocō xahūn unī cuiyā cuhú de. ⁶ Te ni jito Jesús jeē catú de, te ni jini yā jeē ní cuu cuehē cuiyā cuhú de. Te ni cahān yā jíin de:

¿A cúní rō nduvāha ró? áchí yá.

⁷ Te ni cahān tēe cūhú un jíin yá:

Tu níhín na ni ĩn tēe squívi sāná ini pila hora jeē cānda ndute. Chi tācá jínu jeē cuní na quívi ná, te quívi-ni inga ñayuu xīhna gā. Achí de.

⁸ Te ni cahān Jesús:

Ndocuñī te naquihin ró camilla rō te caca ró, áchí yá.

⁹ Te tēe un ní nduvāha-ni de. Te ni naquihin de camilla de, te ni quejéé de jíca de. Te quívi ndétātu cúu quívi ún. ¹⁰ Yūcuán na te jnáhan de tēe hebreo un ní cacahān jíin de:

Quívi ndétātu cúu vijna. Te áchí ley jeē ma cúu condiso ró camilla rō.

¹¹ Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin rí camilla rí te caca rí, achí de.

¹² Yūcuán na te ni cacajnūhún un de:

¿Ndé tēe ni cahān jíin ró jeē náquihin ró camilla rō te caca ró?

¹³ Te tēe ni nduvāha ún, tu jíin de ndé ĩn cúu jeē ní nasávāha de. Chi cāhīn cuehē ñayuu yūcuán, te Jesús je cuahān yā. ¹⁴ Te cúcuéé gá te ni najnáhan Jesús jíin de ini templo cāhnu. Te ni cahān yā:

Vijna chi je ni nduvāha ró. Ma sáha ga rō cuēchi, chi núu tuú, te quíji ĩn jnūndóho xeēn gā siquī rō, achí yá.

¹⁵ Yūcuán na te cuahān tēe ún, te ni castūhún de nuū jnáhan de hebreo un jeē Jesús cúu jeē ní nasávāha ya de.

¹⁶ Te siquī jeē ní sáha Jesús jniñu yáha quívi ndétátú, jeē yūcuan cúu jeē tēe hebreo un cājito xeēn de ya, te cācuni de cahni de ya. ¹⁷ Te ni cahān Jesús jíin de:

Máá Tátá rí chi ní cāni te nde vijna sáha ya jniñu váha, te suni súcuan ruhū sáha rí jniñu váha.

¹⁸ Te siquī jeē ni cáhān yā súcuan, te tēe hebreo un víhyá gā cācuni de cahni de ya. Chi nasūu máá ĩn-ni jeē tu squícu ya jeē cāhán ley siquī quívi ndétátú, chi suni jeē ni cáhān yā jeē Tatá yā cúu Yaā Dios, te súcuan sáha ĩnuú yá máá yá jíin Yaā Dios.

Siquī jeē ndíso jniñu Sēhe Yaā Dios

¹⁹ Te ni cahān Jesús:

Jendaá cāhán rí jíin ró jijnáhan ró: Ruhū jeē cúu Sēhe Yaā Dios, tú na vé cúu sáha rí jeē máá rí, chi máni sáha rí jeē jito rí sáha Tátá rí. Chi tācá jeē sáha Tátá rí, suni sáha ruhū jeē cúu rí Sēhe ya. ²⁰ Chi máá Tátá rí, manī yā jíin ruhū jeē cúu rí Sēhe ya, te stéén yā nuū rí ndíhi jeē sáha

ya. Te jéhnú ga jniñu stéén yā vésú jeē ní cuu vijna, jeē naa ni rō coto ró jíjnáhan ró. ²¹ Te nájnūhun jeē nastécu maá Tátá rī ndīyī te cotecu tucu i, suni súcuan ruhū jeē cúu ri Sēhe ya, nastécu rī ndé-ni cúu jeē cuní maá rí. ²² Te máá Tátá rī, tu sándaā yā siquī ni ññayuu, chi ni jēhe ya jnūhun jeē sándaā maá rí siquī tāca ññayuu, chi Sēhe ya cúu ri. ²³ Te súcuan te coo yíñúhún ndīhi ññayuu nuū rī, nájnūhun yíñúhún i nuū Tátá rī. Te ññayuu tu íyó yíñúhún nuū rī, núu súcuan te suni tu yíñúhún i nuū maá Tátá rī jeē ní tají yá ruhū vēji ri.

²⁴ 'Jendaá cahán rī jíin ró: Núu ññayuu chuhun ni i jnūhun cáhán rī, te candíje i jeē Yaā ndaā cúu Yaā ní tají ruhū vēji ri, ññayuu ún cotecu i ní cáni andívī, te ma jnahnú ndetū i. Chi ma cúu ga i nájnūhun ndīyī, chi sa suhva cotecu i ní cáni. ²⁵ Jendaá cahán rī jíin ró jeē quiji quivī, te vijna je ni quejéé, jeē tāca ññayuu cácuu nájnūhun ndīyī, cuni nahín i jnūhun cáhán ruhū, Sēhe Yaā Dios. Te ññayuu cuatáhú, chi cotecu i ní cáni. ²⁶ Chi nájnūhun íyó poder maá Tátá rī jeē sáha ya jeē técu ndīhi-ni, suni súcuan ni jēhe ya poder nuū ruhū jeē sáha ri jeē cotecu ndīhi-ni. ²⁷ Te suni ni sáha ya jeē ndíso jniñu ri sándaā rī siquī ññayuu, chi cúu ri Yaā ní nduu tēe. ²⁸ Ma náā ni rō caní ni rō siquī jnūhun cáhán rī. Chi quee quivī jeē tāca ndīyī cuni sōho i jnūhun cahán rī, ²⁹ te quendacoo i nuū yíndūji i. Te ndīyī jeē ní casáha jniñu váha, natecu i jeē cótecu i ní cáni. Te ndīyī jeē ní casáha jniñu néé, natecu i te quivícoo i nuū jnahnú ndetū i.

Ndé vé cúu jeē steén jeē ní tají Yaā Dios yā

³⁰ 'Tú na vé cúu sáha ri jeē maá rí. Chi nájnūhun ndácu Yaā Dios jniñu nuū rī, súcuan sándaā rī jniñu. Te ndaā sándaā rī, chi tu sáha ri jeē cuní maá rí, chi sáha ri jeē cuní maá Tátá rī, Yaā ní tají ruhū vēji ri. ³¹ Núu ruhū cahán rī jeē cúu ri Sēhe Yaā Dios, te cachi ññayuu jeē tu jéjniñu jnūhun cáhán rī. ³² Te íyó inga jeē cahán jeē cúu ri Sēhe ya.

Te jíni rī jeē jnūhun un jéē cahán yā, chi níhín jniñu. ³³ Máá ró ni catajé ró tēe ni cacajnūhún de Juan. Te Juan chi ndaā ni cahán de jnūhun ri. ³⁴ Te vésú súcuan te nasūu ruhū cúu jeē jíni ññuhún jeē steén ññ tēe jeē Sēhe Yaā Dios cúu ri. Chi máá ró cúu jeē jíni ññuhún návāha candíje ró te cācu ró jíjnáhan ró. Jeē yúcuan ní cahán rī jeē íyó ndaā jnūhun ri jeē ní nacani Juan. ³⁵ Máá Juan ni cuu de nájnūhun ññ lámpara jeē cayú te cúndijin, cúu jeē ní nacani de jnūhun ri. Te máá ró, jecu-ni quivī ni canujnahan ni rō jeē ni stéén de nuū rō. ³⁶ Te íyó jéē steén cají gá jeē cujéhnú ri vésú jeē ní cáhán Juan. Suu jniñu sáha ri, jniñu jeē ní tejniñu Tátá rī ruhū jeē sáha ri, jniñu un stéén ndije jeē maá yá ni tají ruhū vēji ri. ³⁷ Te Tátá rī jeē ní tají yá ruhū vēji ri, suni máá yá cahán nuū tútu ññ jeē cujéhnú ri, vésú tu ní cájini sōho cuivī rō jeē cahán yā, ni tu ní cájito ró yá. ³⁸ Te tu ní cáchuhun ni rō jnūhun un jéē ni cáhán Tátá rī, chi tu cácandíje ró ruhū, Yaā ní tají yá vēji. ³⁹ Cánanducú vii rō tāca jnūhun cáhán tutu ññ, chi cájeni ni rō jeē yúcuan níhín rō jnūhun jeē cótecu rō ní cáni sáha. Te jnūhun siquī maá rí cúu jeē cahán tutu ún. ⁴⁰ Te vésú súcuan te tu cácuni rō cuatáhú ró ruhū quivícoo ró ndaha ri návāha cotecu rō ní cáni.

⁴¹ 'Tu chíhi ri cuenta jnūhun jeē cácahán ññayuu jeē cujéhnú ri. ⁴² Chi je jíni rī ndese cándaā ánuá rō jeē tu cáhīyo maní rō jíin Yaā Dios. ⁴³ Ruhū vēji ri jíin jniñu cuní Tátá rī, te tu cájetáhú ró ruhū. Te núu inga tēe quee de jíin jniñu cuní maá de, sa tēe un yáchī cuatáhú ró de. ⁴⁴ ¿Ndese cuu candíje ró jíjnáhan ró? Chi máni cácuni rō jeē cujéhnú ró sáha jnáhan ró, te tu cánducú ró jeē cujéhnú ró sáha Yaā Dios, jeē maá ññ-ni ya íyó. ⁴⁵ Ma cáni ni rō jeē cáquin rī cuēchi siquī rō nuū Tátá rī. Chi íyó ññ jeē cáquin cuēchi siquī rō, suu Moisés, tēe jeē cáñuhun ni rō jeē quendōo ndaā rō jíin ley jeē ní tee de. ⁴⁶ Chi núu ní cácandíje ró jéē ní tee Moisés, te suni candíje ró ruhū

nuú, chi jnūhun máá rí ni tee de. ⁴⁷ Te núu tu cácan díje ró jnúhun ri jeē ní tee de, ¿te ndese candíje ró jnúhun cáhán maá rí núu súcuan? Achí yá jíin de.

Jeē ni scáji yā uhūn mil tē
(Mt. 14.13-21; Mr. 6.30-44; Lc. 9.10-17)

6

¹ Yūcuán na te cuahān Jesús inga lado mar Galilea, jeē cúu mar Tiberias. ² Te yōhyo cuehē ñayuu ni candiquīn i ya, chi ni cajito i tācá jniñu jéhu jeē steén yā poder yā jeē ní nasávāha ya ñayuu cácu hū. ³ Te ni caa ya ñn yucu, te ni cucōo ya yūcuan jíin tēe cáscuáha jíin yá. ⁴ Te je ni cuyajni vico pascua jeē cánucūhun ni jnáhan ñuu yā hebreo jeē ní cacācu i nuū ñáyuu nación Egipto. ⁵ Te ni ndacoto ya, te ni jito ya jeē véjicoo cuehē ndasí ñáyuu. Te ni cahān yā jíin Felipe:

¿Ndé nuū cuaan yó jéē cáji ñayuu yáha jíin áhan i?

⁶ Te súcuan ni cahān yā jeē jíto ndee yā de núu ndese cahān de. Chi je jíni máá yá ndese sáha ya. ⁷ Te ni cahān Felipe jíin yá:

Te ni ma cánda uū ciento denario staā, ni vésú jeē cáji i jecu jecu jíin áhan i, áchí de.

⁸ Yūcuán na te ni cahān Andrés, ñani Simón Pedro, inga tēe scuáha jíin yá un:

⁹ Yāha íne ñn sūchi yí jéē ndíso i uhūn staā cebada jíin úu chācá. ¿Te ndé canda cuiñi ún, chi ñayuu cuehē ndasí cúu?

¹⁰ Yūcuán na te ni cahān Jesús:

Cahān jíin ñáyuu na cúcōo i, áchí yá.

Te yūcuan cáa cuehē ite, te ni cacucōo i, te nájnūhun uhūn mil tēe cúu. ¹¹ Te ni quihīn Jesús staā ún, te ni nacuatáhú yá nuū Yāā Dios. Te ni jēhe ya nuū tēe cáscuáha jíin yá, te máá de ni casaja de nuū ñáyuu ní cacucōo ún. Te suni súcuan ni sáha ya jíin cháca, te ni cayeji i nasaa cácu ni máá i. ¹² Te nuū ní candutú chíji i, te ni cahān yā jíin tēe cáscuáha ún:

Nastútú ró tācá pedazo jeē ni ndóo, návāha tu stívi cuiñi yō.

¹³ Te ni canastútú de, te ni chitú úxī uū jica pedazo jeē ni ndóo siquī ndihúhún staā cebada un jeē tuá ni ndíhi caji ñayuu. ¹⁴ Te ñayuu un ní cajito i jniñu jéhu ni sáha Jesús jeē ni steén yā poder yā. Te ni cacahān i:

Jendaá ndije jeē tēe yáha cúu jeē cahān tutu jeē quíji ini ñayívi jéē nácani jnūhun Yāā Dios. Achí i.

¹⁵ Te ni jini Jesús jeē cácu ni i sáfuerza i ya jeē cuu ya rey i núu. Te ni cujiyo tucu máá ñn-ni ya, ni caa ya cuahān yā nuū sucún gá yucu.

Jeē ní jica jéhe yá nuū mar
(Mt. 14.22-27; Mr. 6.45-52)

¹⁶ Te nuū cuácuaa, te tēe cáscuáha jíin yá ni nanuu de cuango de nde mar. ¹⁷ Te ni ndívicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. ¹⁸ Yūcuán na te ni jequíhi ñn tachī níhin, te sáha jeē ndóna ndute mar un. ¹⁹ Te jeē ní cuu nájnūhun uhūn chí íñu kilómetro cájica de jíin barco, te ni cajito de jeē jica Jesús nuū mar, te ni cuyajni ya véji ya nuū barco. Te ni cayúhú de. ²⁰ Te máá yá ni cahān yā jíin de:

Máá rí cúu. Ma yūhu ró jíin áhan ró.

²¹ Te ni cacusiñi ni de jeē na quívi ya ini barco. Te ni sáha ya jeē yachī-ni ni jinucoo-ni de ñuhun íchi núu cuángoo de ún.

Jeē cánanducú ñayuu Jesús

²² Te inga quívi ún, te ñayuu jeē ní caquendōo inga lado mar, ni cajini i jeē tēe cáscuáha jíin yá cuango de jíin máñuhún-ni barco ni íne yūcuán, jíin jéē tu ní quívi Jesús quihīn yā jíin de jíin áhan de. ²³ Te sava ga barco jeē véjicoo ichi ñuū Tiberias, ni quecoo yajni lugar nuū ní cayeji i staā jeē ní nacuatáhú máá Jítoho yō jehē. ²⁴ Te jeē ní cajito ñayuu un jéē tuá Jesús íne ya yūcuán, ni tēe cáscuáha jíin yá, te ni quívicoo i tāca barco un, te cuango i ñuu Capernaum cuananducú i ya.

Jesús cúu staā jeē cótecu yō ññ cáni

25 Te nuū ni jínūcoo i nde inga lado mar, te ni nanihīn jnáhan i jíin Jesús. Te ni cacajñuhún i ya:

Maestro, ¿na hora ni quee ni yáha?

26 Te ni cahān Jesús:

Jendaá cahān rī jíin ró jeē cánanducú ró ruhū siquī jeē ní cayejī rō nde ni candutú chíji ró, te nasūu siquī jeē ní cajito ró tāca jniñu jéhu jeē steén rī poder rī. 27 Ma cóndihvī ni rō maá siquī jeē caji rō jeē yachī nataxīn, chi sa suhva condihvī ni rō siquī jeē nihín rō jeē cótecu rō ní cáni sáha. Te maá rí, Yaā ní nduu tēe, cuāha rī nájnūhun staā jeē cótecu rō ní cáni sáha. Chi Tátá rī Yaā Dios ni jeni ya ruhū jeē sáha rī súcuan. Achí yá jíin i.

28 Yūcuán na te ni cacajñuhún i ya:

¿Ndese sáha ná návāha squícu ná jniñu cúní Yaā Dios?

29 Te ni cahān Jesús:

Jniñu jeē cúní Yaā Dios cúu jeē candíje ró ruhū, Yaā ní tají yá vēji.

30 Yūcuán na te ni cacahān i:

Núu súcuan ¿te na jniñu jéhu sáha ní coto ná jíjnáhan ná te candíje ná jéē ní tají yá nihín? ¿Na jniñu cúu jeē sáha ní? 31 Chi tāca jíi yō jenahán ni cayejī de maná jeē ní cuun ichi ándiví ndé nuū ñúhun téhé, nájnūhun yósó núu tútu: Yaā Dios ni jéhe ya staā ni cuun ichi ándiví, ni cayejī i, áchí tutu. Achí yá.

32 Te ni cahān Jesús:

Jendaá cahān rī jíin ró: Nasūú Moisés ni jéhe staā un núu de jíjnáhan de jeē ní cuun ichi ándiví, chi maá Tátá rī ni jéhe. Te maá yá jéhe staā ándiví jéē cótecu rō ní cáni sáha. 33 Chi staā jéhe Yaā Dios cúu maá Yaā ní quiji ichi ándiví, te sáha ya jeē ñayuu ñayiví cotecu i ní cáni ándiví. Achí yá.

34 Te ni cacahān i jíin yá:

Níní cuāha ni stāā ún caji na núu súcuan.

35 Te ni cahān Jesús:

Maá rí cúu maá stāā jeē cótecu rō ní cáni sáha. Ndé vé quiví ndaha ri, ma cúu cuiṭi gā sōco. Te ndé vé candíje ruhū, ma jichí cuiṭi gā. 36 Te nájnūhun je ni cahān rī jíin ró, tu cáncandíje ró ruhū, vēsú ni cajito ró núu rī. 37 Tāca

ñayuu jeē sáha Tátá rī jeē candíje i ruhū, maá i quivícoo ndaha ri. Te jétáhú rí tāca jéē cúní quiví ndaha ri, chi ma squéhichī cuiṭi rī quihīn.

38 Chi ni quiji rī ichi ándiví návāha sáha rī jniñu jeē cúní Yaā ní tají ruhū, te nasūu jéē sáha rī jeē cúní maá rí. 39 Te jniñu jeē cúní Tátá rī, Yaā ní tají ruhū, cúu jeē ma scuíta rī ni ññayuu ni jéhe ya nuū rī, chi condito rī i te nastécu rī i quiví jínu ñayiví. 40 Te Yaā ní tají ruhū, cúní yá jeē tāca ñayuu jeē nihín i jnūhun ruhū, Sēhe Yaā Dios, te candíje i ruhū, cotecu i ní cáni ándiví. Chi nastécu rī i quiví jínu ñayiví. Achí yá.

41 Yūcuán na te ni caquejéé jnáhan ñuu yā hebreo cácahān de siquī yā, chi ni cahān yā jeē maá yá cúu staā ní quiji ichi ándiví. 42 Te ni cacahān de:

¿A násūu tēe yáha cúu Jesús, sēhe José? Te cájini yō tatá de náná de. ¿Te ndese cúu jeē cahān de jeē ni quiṭi de ichi ándiví núu súcuan?

43 Te ni cahān Jesús jíin de:

Ma cahān rō siquī rī jíjnáhan ró. 44 Ni ññayuu ma cúu quiví i ndaha rī núu ma sáha Tátá rī jeē cúu ni i quiví i, chi maá yá ni tají ruhū vēji rī. Te nastécu rī i quiví jínu ñayiví. 45 Te suhva yósó núu tútu ni catee tēe ni canacani jnūhun Yaā Dios: Tācá i chi steén Yaā Dios nuū i, áchí. Núu súcuan te tāca ñayuu jíni sōho jnūhun cáhān Tátá rī, te jétáhú i jeē steén yā nuū i, ñayuu ún chi quivícoo i ndaha ri.

46 Te tu ní jíto ni ññayuu nuū maá Tátá rī. Chi máñuhún-ni ruhū ni jito rī nuū yā, chi nde nuū maá yá vēji rī. 47 Jendaá cahān rī jíin ró jíjnáhan ró jéē ñayuu jeē candíje i jeē jnáma rī i, maá i cotecu i ní cáni. 48 Maá rí cúu staā jeē cótecu rō ní cáni sáha. 49 Tāca jíi rō jenahán, ni cayejī de staā maná jeē ní cuun ichi ándiví ndé nuū ñúhun téhé, te tu ní sáha jeē cótecu de ní cáni ándiví. 50 Te staā jeē cahān rī jeē vēji ichi ándiví, chi na-ni ñayuu caji, te cotecu i ní cáni ándiví. 51 Te suu maá rí cúu staā un jéē ní quiji ichi ándiví jéē sáha jeē cótecu rō ní cáni. Te ñayuu jeē cáji staā yáha, cotecu i ní cáni ándiví. Te staā jeē cuāha rī un cúu

yiqui cúñu rī, te cuāha ri návāha ñayuu ñayiví cotecu i ní cáni andiví. Achí yá.

⁵² Yūcuán na te jnáhan ñuu yā hebreo ni cacahān de jíin táca jnáhan de:

¿Ndese cuu cuāha tēe yáha yiqui cúñu de caji yō? achí de.

⁵³ Te ni cahān Jesús jíin de:

Jendaá cahān rī jíin ró: Núu tú candíje ró jéē yiqui cúñu ruhū, Yaā ní nduu tēe, cúu nájnūhun staā, te niñī rī cúu nájnūhun ndute, núu súcuan te ma cótecu rō ní cáni andiví. ⁵⁴ Chi ñayuu cácandíje jeē yiqui cúñu rī cúu nájnūhun staā te niñī rī cúu nájnūhun ndute, máá i cotecu i ní cáni. Te nastécu rī i quiví jínu ñayiví. ⁵⁵ Chi yiqui cúñu rī jíin níñī rī cúu ndije jeē sáha jeē cótecu i ní cáni. ⁵⁶ Te ñayuu cácandíje jeē yiqui cúñu rī jíin níñī rī cúu nájnūhun staā jíin ndute jeē cótecu i ní cáni sáha, máá i ní ní ndúú i jíin rí, te ndúú rí jíin i. ⁵⁷ Máá Tátá rī, Yaā técu, ni tají yá ruhū vēji ri, te técu rī sáha máá yá. Te suni súcuan, ñayuu cácandíje jeē cúu ri nájnūhun staā i ndute i, suni súcuan cotecu i ní cáni sáha ri. ⁵⁸ Máá rí cúu staā ní quiji ichi ándiví. Te staā jeē cahān rī tu cúu nájnūhun staā maná jeē ní cayeji táca jíi rō jenahān, chi tu ní sáha jeē cótecu de ní cáni. Te staā jeē cahān rī, chi ñayuu caji, cotecu i ní cáni sáha, áchí yá.

⁵⁹ Táca jnúhun yáha ní steén Jesús nuū ñáyuu ní candutútú ini vehe iī sinagoga ñuu Capernaum.

Jnúhun cotecu yō ní cáni

⁶⁰ Te cuehē ñayuu cascuáha jíin yá, ni cajini sōho i jnúhun yáha jéē ni stéén yā. Te ni cacahān maá i:

Yōhyo yí jnúhun cáhān yā yáhá. ¿Ndese cuu cuatáhú yó?

⁶¹ Te ni jini Jesús jeē cácahān i jeē yí cúu jnúhun yáhá, te ni cahān yā jíin i:

¿A yí sáha jnúhun yáha jíin ró jínáhan ró? ⁶² ¿Te ndese sáha ró núu coto ró jéē ruhū, Yaā ní nduu tēe, ndaa ri nuhun rī nuū ni cóndee rī xīhna ñúhún? ⁶³ Máá ánuá ñayuu cúu jeē sáha jeē técu i. Chi yiqui cúñu i tu jéjníñu cuiti súcuan. Te táca jnúhun ni

cahān rī jíin ró cúu jeē quéndōo vāha ánuá rō, te cotecu rō ní cáni sáha. ⁶⁴ Te sava ró chi tu cácandíje ró. Achí yá.

Chi nde xīhna ñúhún je jíin Jesús ndé-ni cúu ñayuu jeē ma cándíje, jíin ndé ñn de cúu jeē nastúu de ya. ⁶⁵ Te ni cahān gā yā:

Jeē yúcuan ní cahān rī jíin ró jeē ma cúu quiví ni ñn ñayuu ndaha ri, te núu tu sáha Tátá rī jeē cúu ni i quiví i, áchí yá.

⁶⁶ Te nde quiví ún te cuehē ñayuu cascuáha jíin yá, ni castóo i ya, te tuá ni cájica i jíin yá. ⁶⁷ Yūcuán na te ni cahān yā jíin máá ndihúxí uū tēe cáscuáha jíin yá:

¿A suni cáconi máá ró quingoo ró, chí naún?

⁶⁸ Te ni cahān Simón Pedro:

¿Ndé núu gā quingoo ná? Chi máá ní cúu jeē nácani jnúhun jeē cótecu na ní cáni sáha. ⁶⁹ Te ni cacandíje ná te cájini na jéē maá ní cúu Cristo, Sēhe Yaā Dios, Yaā técu, achí de.

⁷⁰ Te ni cahān Jesús:

Te vēsú ni nacāji ri ndihúxí uū rō, te íyó ñn ró jeē ní quiví jexeén ini. Achí yá.

⁷¹ Te súcuan ni cahān yā siquī Judas Iscariote, sēhe Simón. Chi máá de nastúu de ya, vēsú ñn jnáhan jeē uxí uū tēe cáscuáha jíin yá cúu de.

Jeē tu ní cácandíje ñani Jesús

7

¹ Yūcuán na te jíca cuu Jesús región Galilea. Chi tu cúní yā caca cuu ya región Judea, chi jnáhan ñuu yā hebreo jeē cáyūcu yúcuan, cáconi de cahni de ya. ² Te cuacuyajni vico jeē casáha ñayuu yā hebreo vehe ramadá, cáyūcú i chíji. ³ Te ñani yā ni cacahān de jíin yá:

¿Naun máá yáha-ni íne ró? ¿Naun tú quihīn rō región Judea, návāha tēe yúcuan jéē cácandíje de rōhó, suni coto de jniñu jéhnu sáha ró. ⁴ Chi núu cúní ñn tēe jeē cuité núu jnúhun de, te tu sáha yuhu de jniñu. Te núu sáha nde ró táca jniñu jéhnu, vāha ga na sáha ró jéē cúní ndivii ñayuu.

⁵ Súcuan ni cacahān ñani yā jín yá, chi ni máá de tu cácan díje de ya.

⁶ Yūcuán na te ni cahān Jesús:

Ná tu quee maá quivī jeē quihín rī. Te máá ró jijnáhan ró chi na-ni quivī-ni te cuu quingoo ró. ⁷ Chi ma quití ni ñayuu ñayivī núū rō, te máá rí chi quití ni i jító i ruhū, chi cáhán rī jeē jíní rī jeē máni jniñu néé cásáha i.

⁸ Cuángoo máá ró vico ún. Te máá rí chi ma quihín rī vijna, chi ná tu quee maá quivī cánuú quihín rī. Achí yá.

⁹ Súcuan ni cahān yā jnūhun yáha jín de, te ni quendōo ya Galilea.

Jeē ni jēhēn Jesús vico vehe ramadá

¹⁰ Te nuū ni yáha ñani yā cuango de vico ún, te sáá te suni cuahān maá yá. Te tú cuahān ndijin yā, chi tu ní stéen yā maá yá. ¹¹ Te jnáhan ñuu yā hebreo cánanducú i ya nuū vico ún, te cacahān i:

¿Ndé nuū íne tēe ún? áchí i.

¹² Te yōhyo ni cacahān ñayuu jeē siquí yā, chí sava i cacahān: Tēe vāha cúu de. Te sava ga i cacahān: Tuú chí stáhú de ñayuu.

¹³ Te yuhu-ni ni cacahān i jnūhun ya, chí cáyūhú i jeē quití ni jnáhan i tēe hebreo.

¹⁴ Te jeē ní cuu sava vico, te ni quee Jesús, ni quivī ya templo cáhnu, te ni quejéé yá steén yā jnūhun. ¹⁵ Te ni canaa ni jnáhan ñuu yā hebreo cájini sōho i, te ni cacahān i:

¿Ndese jíní tēe yáha cuéhē jnūhun ndíchí, chí tu ní jíca de escuela? áchí i.

¹⁶ Yūcuán na te ni cahān Jesús:

Jnūhun stéen rī chí nasūu jnúhun máá rí cúu, chí jnūhun jeē ni jéhe máá Yaā ní tají rúhū cúu. ¹⁷ Núu ñn ñayuu cuní i sáha i jniñu cuní Yaā Dios, ñayuu ún chí jecūhun ni i núu nde nuū Yaā Dios vēji jnūhun stéen rī, chí jnúhun jeē jéni ni máá-ni rí cúu. ¹⁸ Tēe cáhán jnūhun jéni ni máá de, tēe un ndúcú de jeē na sájéhnu ñayuu de. Te núu ñn tēe ndúcú de jeē sajéhnu de Yaā ní tají de, tēe un cúu tēe ndaā, te tú na jnūhun stáhú íyó jíin de.

¹⁹ ¿A násūu jéē ni jéhe Moisés ley yā nuū rō jeē squícu ró? Te ni ñn ró tu cásquícu. Chí sa jeē cácuni rō cahni rō ruhū, ¿te najehē cúu? Achí yá.

²⁰ Te ni cacahān ñayuu cuehē ún:

Tachī ndóho ró. ¿Ndé ñn cuní cahni rohó?

²¹ Te ni cahān Jesús:

Ni nasávāha rí ñn tēe quivī ndétátú, te ndivii rō ni canaa ní rō ni cajito ró jéē quivī ndétátú ni sáha rí jniñu ún. ²² Te Moisés ni jéhe de ley jeē cúu circuncidar nuū rō. Te cásáha ró circuncidar sūchi yá núu uná quivī jeē ní cacu i, vésú quivī ndétātu cúu. (Te nasūu máá Moisés ní jéquin ley un, chí je ni iyo nuū tāca jí de.) ²³ Núu súcuan te núu cásáha ró circuncidar vésú quivī ndétātu cúu, návāha squícu ró ley Moisés, ¿te najehē cáquití ni rō jeē ní nasávāha ndíhi rí ñn tēe quivī ndétátú? ²⁴ Ma yachí cani ni rō jeē cuéchi cúu jeē sáha rí. Chí sa cani vāha ni rō siquí táca jniñu vāha. Achí yá.

Jeē ní cachi Jesús ndé nuū véji ya

²⁵ Yūcuán na te sava ñayuu ñuu Jerusalén ni cacajnūhun jnáhan i:

¿A násūu tēe yáha cúu jeē cánanducú tēe cácujuhnu jeē cáhni de, chí naún?

²⁶ Te yáha cáhán ndijin de nuū chitú, te tú na jnūhun cacahān jíin de. ¿A sanaa te ni cacundaā ni tēe cácujuhnu jeē tēe yáha cúu Cristo jeē achí tutu jeē quiji, chí naún? ²⁷ Te tuú chí je cájini yō nuū véji tēe yáha. Te jeē quiji Cristo, chí ni ñn yó má cuní ndé chí quiji ya. Achí i.

²⁸ Yūcuán na te ni cahān jee Jesús jeē steén yā jnūhun ini templo:

Cájini rō ruhū, te cájini rō ndé ñuu véji rí. Te vésú súcuan te máá Yaā ndaā cúu jeē ní tají rúhū véji rí, te tú véji rí jeē cuní máá rí. Te tu cájini rō ndese Yaā cúu ya. ²⁹ Te máá rí chí jíní rī yā, chí nde nuū máá yá véji rí, te máá yá ni tají rúhū, achí yá.

³⁰ Yūcuán na te ni canducú de jni de ya. Te ni ñn de tu ní cúu jni de ya, chí ná tu quee maá quivī jeē jni de ya.

³¹ Te cuehē ñayuu chí ni cacandíje i ya, te ni cacahān i:

¿A násūu tée yáha cúu Cristo, Yaā ndétu yó jēē quiiji? Chi cuehē ndasí jniñu jéhnū sáha ya jeē steén yā poder yā. Achí i.

Jeē ní catajǐ de policíá jeē jnǐ de Jesús

³² Te ni cajini tēe fariseo jeē súcuan cácahān ñayuu jnūhun ya. Te máá de jíin sūtū cácujeñnu, ni catajǐ de policíá cándito templo jeē jnǐ de ya. ³³ Te ni cahān Jesús:

Jecu na quivǐ condee rǐ jíin ró jijnáhan ró. Yūcuán na te nuhun rǐ nuū Yaā ní tajǐ rúhū vēji rǐ. ³⁴ Te nanducú ró ruhū, te ma nánihǐn rō ruhū. Chi ma cúu jinūcoo ró núū cóndee rǐ. Achí yá.

³⁵ Yūcuán na te máá tēe un ní caca-jnūhun jnáhan de:

¿Te ndé nuū quihín tēe yáha jeē ma nánihǐn yō de? ¿A quihǐn de nuū jnáhan yó hebreo jeē ní cajitē núu cáyūcu ndé nación Grecia? ¿Te á steén de jnūhun nuū ñáyuu Grecia, chí naún? ³⁶ ¿Te na jnūhun cúu jeē ni cáhān de jíin yó jeē nanducú yó de te ma nánihǐn yō de, chi ma cúu jinūcoo yó núū cóndee de? Achí tēe un jíijnáhan de.

Siquǐ ndute jeē cótecu yō ní cáni sáha

³⁷ Te quivǐ sándihǐ vico ún te cúu vico cáhnu ga. Te quivǐ un ní ndocuiñǐ Jesús, te ni cahān jee ya:

Núu ndé ñáyuu jnáa ndasí i tāca jéē váha jeē sáha rǐ jehē i, nájnūhun jeē jichí i ndute, núu súcuan te na quivǐ i ndaha rǐ te coho i ndute, cúu jeē nihín i jeē váha ún. ³⁸ Te ñayuu jeē candíje jeē jnáma rǐ i, chí ini anuá i condee Espíritu Santo, te cuu ya nájnūhun yūte cáne ñuhún jeē sáha ya jeē cótecu i ní cáni, nájnūhun cáhān tutu iǐ. Achí yá.

³⁹ Te súcuan ni cahān yā jeē ñáyuu candíje jeē jnáma ya i, nihín i Espíritu Santo. Chi ná tu quee Espíritu ún, chí ná tu ndaa Jesús quinuñun yā nuū ndujéñnu ya.

Jeē ní cacusǐn ñayuu siquǐ yā

⁴⁰ Te sava ñayuu cuehē ún, ná ni cajini sōho i jnūhun yáha, te ni cacahān i:

Jendaá jeē tēe yáha cúu jeē achí tutu jeē quiiji de nacani de jnūhun Yaā Dios, achí i.

⁴¹ Te sava ga i ni cacahān:

Tēe yáha cúu Cristo, Yaā ní tajǐ Yaā Dios.

Te sava ga i chi ni cacahān i:

Tuú chi násūu Galilea quiiji Cristo. ⁴² Chi cáhān tutu iǐ jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

⁴³ Te súcuan te ni cacusǐn ñayuu jeē siquǐ yā. ⁴⁴ Te sava i cácuni i jnǐ i ya, te ni ñn i tu ní jnǐ i ya.

Jeē tu ní cácañdǐje tēe cácujeñnu

⁴⁵ Yūcuán na te policíá cándito templo tu ní cájniñ de Jesús, te cuanungoo de nuū tāca tēe fariseo jíin núu sutú cácujeñnu. Te tēe ún ni cacajnūhún de policíá:

¿Najehē tu ní quécoo ró jíin de? áchí.

⁴⁶ Te ni cacahān policíá un:

Tú cuiti ni ñn tēe cáhān vāha ndasí nájnūhun cáhān tēe yúcuan, achí.

⁴⁷ Te ni cacahān tēe fariseo:

¿Te á suni nde máá ró jíijnáhan ró ní stáhú de naún? ⁴⁸ Ni ñn jnáhan ruhū tēe cácujeñnu jíin tēe fariseo, tu cácañdǐje rǐ jnūhun cáhān tēe ún, ¿te naun cácañdǐje máá ró? ⁴⁹ Te ñayuu cuehē yáhá jéē tu cájecūhun ni i ley Moisés, chí jnahnū ndetū i jeē cácañdǐje i tēe ún, áchí de jíijnáhan de.

⁵⁰ Te ni cahān Nicodemo, tēe ni jéhēn nuū yā ñn jecuáa, te suni ñn tēe fariseo cúu de:

⁵¹ Cáhān ley yō jeē ma cúu tee yó cuéchi siquǐ ñn tēe, te núu tú xǐhna gā cuni sōho yó ndese cáhān de, návāha cucáhnu ni yō na cuéchi ni sáha de. Achí de.

⁵² Te ni cacahān jíin de:

Te róhó, ¿á suni nde Galilea vēji ró jéē cáhān rō jehē tēe ún? Nanducú váha ró núu tútu iǐ te cuni rō jeē ndé Galilea tu quénda cuiti ni ñn tēe nácani jnūhun Yaā Dios. Achí jíin de. ⁵³ Te cuanungoo de ná vehe ná vehe de.

Jnūhun ñahan ní casíquí ndéē jnāhan

8

¹ Te ni caa Jesús cuahān yā yucu Olivos. ² Te jeē cuácundijin inga quivī, te ni ndee tucu ya templo. Te ndihī ñayuu ni quecoo i nuū yā. Te ni cucōo ya, te ni steén yā jnūhun nuū i. ³ Yūcuán na te tēe cástéén tutu ley Yaā Dios jíin tēe grupo fariseo, ni quecoo de jíin ñn ñahan jeē ní canihīn de ña jeē casíquí ndéē ña. Te ni cajeni de ña mēhñú. ⁴ Te ni cacahān de jíin yá:

Maestro, ni canihīn ná ñahan yáha jēe casíquí ndéē ña. ⁵ Te ley Moisés ndácu jniñu nuū yō jeē cuáha yó yūu xinī ñahan cásaha súcuān nāvāha cuu ña. Te máá ní, ¿ndese cáhán ní?

⁶ Te súcuān ni cacahān de jeē cájito ndee de ya núu cuatáhú yá jeē cahán ley un, chi núu tuú te caquin de cuēchi síquī yā. Te Jesús ni jīta ndeyī ya, te ni tee ya nuū ñūhun jíin xinī ndáha ya. ⁷ Te jeē cácajnūhun cácajnūhún de ya, te ni ndonehen ya maá yá, te ni cahān yā jíin de:

Núu ndé ñn máá ró tú na cuēchi ró, te xīhna gā máá ró cuāha yuū xinī ña núu súcuān, áchí yá.

⁸ Te ni jīta ndeyī tucu ya, te ni tee tucu ya nuū ñūhun. ⁹ Te nuū ní cajini de jeē súcuān ni cahān yā, te ni cajecūhun ni de jeē suni cáhīyo cuēchi de. Te ná ñn ná ñn de ni quendacoo de cuahān de, xīhna gā tēe jéhnu ga te nde nuū ní ndihī na. Te ni ndōo máá ñn na Jesús jíin ñahan índichī mēhñú un. ¹⁰ Te ni ndonehen tucu ya maá yá, te tuá ni ñn tēe un ní jíto ya, chi máá na ñahan ún. Te ni cahān yā jíin ña:

¿Ndé chi cuángoo tēe cájequin cuēchi síquī rō? ¿A tú ni ñn de ní ndóna cahān gā cuēchi síquī rō?

¹¹ Te ni cahān ña:

Tú ni ñn de, áchí ña.

Yūcuán na te ni cahān Jesús jíin ña:

Ni ruhū, ma cahán rī cuēchi síquī rō. Cuáhán te ma sáha ga rō cuēchi, áchí yá.

Jesús cúu máá luz jeē steén ini anuá ñayuu

¹² Te inga jínu ni cahān Jesús jíin ñáyuu:

Máá rí cúu nájnūhun luz jeē steén ini anuá ñayuu ñayīvī, jeē sáha jeē jécūhun ni i síquī Yaā Dios. Ñayuu candíje ruhū chi ma cáca i nájnūhun nuū néē, chi sa suhva coneváha i luz ini anuá i jeē sáha jeē cótecu i nñí cáni.

¹³ Yūcuán na te ni cacahān tēe fariseo jíin yá:

Róhó chi cáhán rō jnūhun jehē maá ró, te tu jéjníñu jnūhun cáhán rō.

¹⁴ Te ni cahān Jesús jíin de jíjnāhan de:

Vēsú cáhán rī jehē maá rí, te íyó ndáa jnūhun cáhán rī. Chi jíin rī ndé nuū véji rī jíin ndé nuū quihín rī. Te róhó tu cájini rō ndé nuū véji rī ni ndé nuū quihín rī. ¹⁵ Máá ró chi cuenta ñayuu ñayīvī cásandaā rō síquī jnūhun cáhán rī. Te ruhū chi tu sándaā mañúhún rí síquī ni ñn ñayuu. ¹⁶ Te núu sándaā rī síquī i, te ndaā sáha rī, chi tu sáha mañúhún rí, chi sándaā rī nde jíin máá Tátá rī, Yaā ní tají rúhū véji rī. ¹⁷ Te yósó núu tútu ley cánevāha ró jéé núu inuú cácahān uū testigo, te jíin ñūhún cuatáhú ró jeē cácahān, chi íyó ndáa jnūhun ún. ¹⁸ Núu súcuān te ruhū cúu ñn jeē cahán ndaā rī jehē rī. Te inga jeē cahán ndaā jehē rī cúu máá Tátá rī, Yaā ní tají rúhū. Achí yá.

¹⁹ Te ni cacahān de jíin yá:

¿Ndé nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē cájini rō ruhū, suni cuni rō Tatá rī nuú.

²⁰ Tāca jnūhun yáha ní cahān Jesús jeē steén yā ini templo nuū cáyūcu yéjnū jeē cásocō i xūhún. Te tú ni ñn de ní jñí de ya, chi ná tu quee maá quivī jeē jñí de ya.

Jeē ní cahān yā jeē ma cúu jinūcoo de nuū cóndee yā

²¹ Te ni cahān tucu Jesús jíin de:

Ruhū chi quihín rī, te nanducú ró rúhū, te ma nánihīn rō ruhū, chi quendōo cuēchi ró síquī rō quivī cúu rō. Te jeē yúcuān má cúu jinūcoo ró núu quihín rī, achí yá.

22 Yūcuán na te tēe hebreo un ní cacahān maá de:

¿A cahni tēe yáha maá de, te jeē yúcuán cáhán de jeē ma cúu jinūcoo yó núu quihín de, chí naún? Achí de.

23 Te ni cahān yā:

Maá ró jijnáhan ró chi ñayīvi yáha véjicoo ró, te ruhū chi nde andīvi véji ri. Maá ró cácuu ñayuu ñayīvi yáha, te ruhū chi nasūu tēe ñayīvi yáha cúu ri.

24 Jeē yúcuán ní cahān rī jeē quendōo cuēchi ró siquī rō quivī cúu rō. Chi núu ma candíje ró jēe maá rí cúu Cristo, te quendōo nahín cuēchi ró siquī rō quivī cúu rō. Achí yá.

25 Te ni cacajnūhún de ya:

Núu súcuán ¿te ndé ñn cúu ró?

Te ni cahān yā:

Je ni cachí ri nuū rō nde xīhna ñúhún ndé ñn cúu ri. 26 Te íyó cuéhē gā jnūhun cuu cahān rī jín ró te sándaā rī siquī rō. Te ma cahán rī, chí ini ñayīvi yáha cáhán rī maá-ni jnūhun jeē ní jini ri ni cahān Yaā ní tají rúhū vēji ri. Te máni jnūhun ndaā cahán yā. Achí yá.

27 Te tu ní cájecūhun ni de jeē cahán yā jnūhun Tátá yā andīvi jín de. 28 Jeē yúcuán ní cahān gā yā:

Nde na yáha jeē cáta caa ró rúhū, Yaā ní nduu tēe, jicā cruz, yūcuán na te cuni rō ndé ñn cúu ri. Te cuni rō jeē tú na vé sáha ri jeē maá rí, chí cáhán rī maá-ni jnūhun ni steén Tátá rī nuū rī. 29 Chí máá Tátá rī, Yaā ní tají rúhū, ndéé yá jín rí. Te tu stóo máñúhún yá ruhū, chí níni sáha ri jniñu jeē núnahan ni maá yá. Achí yá.

30 Te jeē ni cahān yā jnūhun yáha, te cuéhē ñayuu ni cacandíje i ya.

Siquī ndé-ni cúu sēhe Yaā Dios jín séhe jexeén

31 Yūcuán na te ni cahān Jesús jín jnāhan ñuu yā hebreo jeē ní cacandíje i ya:

Te núu cuiñi nīhin ró jín jnūhun steén rī nuū rō, te cuu ndije ró ñayuu scuáha jín rí. 32 Te jecūhun ni rō jnūhun ndaā, te jnūhun ndaā un sáha jeē nduu libre rō nuū jeē yīhi ró ndaha.

33 Te ni cacahān i jín yá:

Sēhe yucūn Abraham cácuu ri, te tu cáyīhi cuiñi rī ndaha ni ñn. ¿Te ndese cúu jeē cahán rō jeē nduu libre rī núu súcuán?

34 Te ni cahān Jesús:

Jendaá cahán rī jín ró jeē tāca ñayuu casáha cuēchi, tu íyó libre i, chí yīhi i chíji cuēchi jeē jejniñu cāhá i nuū. 35 Te ñayuu jejniñu cāhá, chí tu cúu i ñn jnāhan ñayuu vehe nuū jejniñu i. Te ñn sēhe chí sa suhva cúu ndije i jnāhan ñayuu vehe ún. 36 Núu súcuán te máá rí jeē cúu Sēhe Yaā Dios, núu sáha ri jeē tuá cuajniñu cāhá ró nuū cuēchi, núu súcuán te nduu libre ndije ró jijnáhan ró, te cuu ró séhe ya. 37 Te jín rī jeē séhe yucūn Abraham cácuu ró, te vēsú súcuán te cácuñi rō cahni rō ruhū, chí tu cájetáhú ró jnūhun cáhán rī. 38 Ruhū chí cáhán rī jnūhun jeē ni steén Tátá rī nuū rī. Te máá ró chí cásáha ró jniñu jeē ni cahān tatá maá ró jijnáhan ró. Achí yá.

39 Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candíje ró nájñūhun ni candíje Abraham návāha cuu ndije ró yúcuán de, yūcuán na te jniñu váha ni sáha de suni sáha maá ró nuū. 40 Te vijna chí cácuñi rō cahni rō ruhū, vēsú ni cahān rī jín ró tāca jnūhun ndaā ni steén Tátá rī nuū rī. Te Abraham chí tu ní sáha cuiñi de súcuán. 41 Máá ró chí ñnuú cásáha ró jín tátá maá ró. Achí yá jín i.

Yūcuán na te ni cacahān i:

Maá rí chí tu cácuu ri sēhe ndáhú jēe tu tátá. Chí íyó ñn-ni tátá rī, te Yaā Dios cúu ya.

42 Te ni cahān Jesús:

Núu Yaā Dios cúu ndije tátá rō, te coo manī rō jín rí nuú. Chí nde nuū Yaā Dios ni quenda ri vēji ri. Te tú vēji ri jeē cuni maá rí, chí máá yá ni tají rúhū. 43 ¿Te najehē tu cájecūhun ni rō jnūhun cáhán rī núu súcuán? Suu siquī jeē tu cácuñi rō chusóhó ró jnūhun nácani ri. 44 Máá ró jijnáhan ró chí tátá rō cúu jexeén. Te cácuñi rō sáha ró máá jēe cuni tátá rō ún. Máá jexeén ni jehni ndīvi nde jeē xīhna ñúhún. Te tu

ni ñin cuiñi jín jnúhun ndaā, te tú cuiñi na jnúhun ndaā cahán. Te jeē cahán jexeén jnúhun stáhú cúu jeē súcuan cáa máa. Chi máa un cúu jeē ndíso jnúhun stáhú, te máa un cúu jeē ní squéjéé ndihí jnúhun stáhú. ⁴⁵ Te ruhū chi cahán rī jnúhun ndaā, te jeē yúcuan cúu jeē tu cácanđije ró rúhū. ⁴⁶ Te ni ñin ró ma nihín rō cuēchi siquī rī, chi tú cuiñi na cuēchi rī. Te máni jnúhun ndaā cahán rī, ¿te naun tu cácanđije ró rúhū? ⁴⁷ Ñayuu cácuu sēhe Yaā Dios, chi cáchusóhó i jnúhun Yaā Dios. Te nasūu séhe Yaā Dios cácuu ró, te jeē yúcuan tu cácani rō chusóhó ró. Achí yá jín de.

Iyó Jesús nde ná tu coo Abraham

⁴⁸ Yūcuán na te ni cacahán jnáhan ñuu yā hebreo un:

Ndaā cácahán rī jeē canéé ró nájñuhun ñayuu Samaria, te ñuhun tachī ini rō.

⁴⁹ Te ni cahán Jesús:

Tu ñuhun tachī ini rī, chi yññuhún rī jín Tátá rī. Te máa ró jijnáhan ró chi tu cáhīyo yññuhún ró jín rī. ⁵⁰ Máa rī tu ndúcú rī jeē cujéñu rī. Iyó ñin jeē sáha jeē cujéñu rī, te máa yá sándaā siquī jnúhun cácahán rō. ⁵¹ Jendaá cahán rī jín ró, núu ndé ñáyuu squícu jnúhun cáhán rī, ma cúu cuiñi i. Achí yá.

⁵² Te tēe hebreo un tu ní cájecūhun ni de, te ni cacahán de:

Vijna te ni cacucáñu ni rī jeē ñuhun ndije tachī ini rō. Chi Abraham jín táca tēe ni canacani jnúhun Yaā Dios nde jenahán, ni cajihī de. Te róhó cahán rō, núu ndé vé squícu jnúhun cáhán rō, te ma cúu cuiñi i, achí ró. ⁵³ ¿Te chí jéñu ga rō vēsú jii yō Abraham naún? Chi ni jihī de, te suni ni cajihī táca tēe ni canacani jnúhun ya. ¿Te ndé ñin ga sáha ró máa ró núu súcuan? Achí de.

⁵⁴ Te ni cahán Jesús:

Núu ruhū sajeñu rī maá rí, te tu nihín jniñu. Máa Tátá rī cúu jeē sajeñu ruhū. Te cácahán rō jeē maá yá cúu Yaā Dios maá ró. ⁵⁵ Te vēsú súcuan te tu cájini rō ndese Yaā cúu ya.

Te ruhū chi jín rī yā. Te núu cahán rī jeē tu jín rī yā, te cuu rī tēe stáhú nájñuhun máa ró jijnáhan ró. Te tuú chi jín ndije rī yā, te squícu rī jnúhun cáhán yā. ⁵⁶ Te jii rō Abraham ni cusñi ni de jeē coto de quiñi quéē rī. Te je ni jito de, te ni jito rī jeē ní cusñi ndasí ni de. Achí yá.

⁵⁷ Yūcuán na te ni cacahán tēe hebreo un jín yá:

Ni ná tu coo ró uū xico uxī cuiyā, ¿te ndese cúu jeē cahán rō jeē ní jito ró núu Abraham? achí de.

⁵⁸ Te ni cahán Jesús:

Jendaá cahán rī jín ró jeē nde ná tu cacu Abraham te je iyó rí, achí yá.

⁵⁹ Yūcuán na te ni caquihin de yuū jeē cuáha de xinī yā. Te Jesús chi ni quenda sáhi yá ni yáha ya mēññu de, ni quenda ya ini templo cuahán yā.

Jeē ní nasávāha ya ñin tēe ni cacu cuáa

9

¹ Te jeē jica Jesús cuahán yā, te ni jito ya nuū ñin tēe ni cacu cuáa. ² Te tēe cáscuáha jín yá ni cacajñuhún de ya:

Maestro, ¿naun ni cacu cuáa tēe yáha? ¿A cuéchi tátá de náná de cúu, chí cuéchi máa de cúu, chí naún?

³ Te ni cahán Jesús:

Nasūu cuéchi máa de, ni nasūu cuéchi tátá de náná de cúu jeē ní cacu de súcuan, chi sa suhva návāha cuni ñayuu jniñu jéñu sáha Yaā Dios jín de. ⁴ Níní jéē cúu nájñuhun nduú ini ñayñí, te cánuú sáha rī jniñu Yaā ní tají rúhū. Chi quee tiempo jeē coo nájñuhun jecuáa, jeē tuá cuu sájniñu ni ñin. ⁵ Níní jéē iyó rí ini ñayñí te cúu rī luz jeē cúndijin ini anuá ñayuu ñayñí, návāha jecūhun ni i siquī Yaā Dios. Achí yá.

⁶ Te ná ni cahán yā súcuan, te ni tesñi yá nuū ñuhun, te ni sáha ya ndehyū jín tesñi yá un, te ni tee ya siquī tññu tēe cuáa un. ⁷ Te ni cahán yā jín de:

Cuáhan núu pila Siloé te nacate ró tññu ró, achí yá. Te jnúhun Siloé cuni cahán, ndute ní cascáca de ni quee.

Yūcuán na te cuahān de, te ni nacate de t̄nū de, te ni ndundijin-ni, te ni nandico de vēji de. ⁸ Yūcuán na te ñayuu yūcu yajni jín de, jín ñayuu jeē ní cajito jeē cúu de tēe cuáá, ni cacajnūhun jnáhan i:

¿A násūu tēe yáha cúu jeē ndeé-ni yāhá te jícán caridad?

⁹ Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cúní coto de.

Te máá de chi ni cahān de:

Suu ri cúu.

¹⁰ Yūcuán na te ni cacajnūhún i de:

¿Te ndese cúu jeē ní nanune t̄nūu ró núu súcuan?

¹¹ Te ni cahān de:

Tēe nání Jesús ni sáha de ndehyū, te ni tee de t̄nūu rí, te ni cahān de jín rí: Cuáhán núu pila Siloé te nacate ró t̄nūu ró. Te ni jēhēn rī, te ni nacate ri, te ni nanune-ni t̄nūu rí, achí de.

¹² Yūcuán na te ni cacajnūhún i de:

¿Ndé nuū íne tēe ún? achí i.

Tu jíní rī, achí de.

Jeē ní castíhí tēe fariseo tēe ni cacu cuáá

¹³ Yūcuán na te ni cajendeca i tēe ni íyo cuáá un núu tēe grupo fariseo.

¹⁴ Te quiv̄i ndétātu cúu jeē ní sáha Jesús ndehyū jeē ní nanune ya t̄nūú de. ¹⁵ Te tēe fariseo un ní cacajnūhún tucu de tēe ún ndese ni nanune t̄nūú de. Te ni cahān de:

Ni tee de ndehyū siqūi t̄nūu ná, te ni nacate ná, te ni ndundijin-ni t̄nūu ná, achí de.

¹⁶ Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chi tu nēe i de quiv̄i ndétátú.

Te sava ga de chi ni cacahān:

¿Ndese cuu sáha tēe un táca jniñu jēhnu yáha te núu tēe íyó cuéchi cúu de?

Te ni cacus̄in de siqūi yā. ¹⁷ Te ni cacajnūhún tucu de tēe ni íyo cuáá un:

Róhó, ¿ndese cáhán rō siqūi tēe ni nanune t̄nūu ró núu súcuan?

Te máá de ni cahān de:

Ín tēe nácani jnūhun Yaā Dios cúu de, achí de.

¹⁸ Te tēe hebreo un chi tu ní cá candíje de jeē ni íyo cuáá tēe ún te ni ndundijin t̄nūú de. Te ni cacana xinī tatá de náná de. ¹⁹ Te ni cacajnūhún de:

¿A yáha cúu sēhe ro jēe ní cacu cuáá cáhān rō? Núu súcuan ¿te ndese ni ndundijin t̄nūú de vijna? achí.

²⁰ Te ni cacahān tatá de náná de:

Suu sēhe ri cúu tēe yáha jēe ní cacu cuáá. ²¹ Te tu cájini rī ndese ni ndundijin t̄nūú de vijna, ni tu cájini rī ndé tēe ni nanune t̄nūú de. Cajnūhun ró máá de, chi je jēhnu de, te na cáchi máá de.

²² Súcuan ni cacahān tatá de náná de, chi cáyūhú de cájito de jnáhan de tēe hebreo. Chi je ní casándaā tēe un jēe núu ndé ñayuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quiv̄i i ini vehe i sinagoga. ²³ Jeē yúcuan ní cacahān tatá de náná de: Cajnūhun ró máá de, chi je jēhnu de.

²⁴ Yūcuán na te tēe hebreo un ní cacana tucu de tēe ni íyo cuáá un. Te ni cacahān de jín:

Cachi cají ró nuū rī, jító jínúu Yaā Dios. Chi cájini rī jeē tēe íyó cuéchi cúu tēe ni nanune t̄nūu ró.

²⁵ Yūcuán na te ni cahān de:

Tu jíní na núu íyó cuéchi de, chí naún. Te íyó ín jeē jíní ná, cúu jeē tēe cuáá ní cuu ná, te vijna chi ni ndundijin t̄nūu ná. Achí de.

²⁶ Te ni cacajnūhún tucu de:

¿Ndese ni sáha de jín ró? ¿Ndese ni nanune de t̄nūu ró núu súcuan?

²⁷ Te ni cahān de:

Je ni cuu ni castūhun ná nuū ní, te tu ní cá cuni ní cuatáhú ní. ¿Te najehē cá cuni ni jēe cáchi tucu ná núu ní? ¿Te chí suni cá cuni ni jínáhan ní candíje ní yá naún?

²⁸ Yūcuán na te ni cacahān neé jín de, te achí:

Máá ró chi cándíje ró tēe ún, te máá rí chi cá candíje ri Moisés. ²⁹ Te cájini rī jeē ni cáhān Yaā Dios jín Moisés. Te tēe yúcuan, ni tu cájini rī ndé nuū véji de.

³⁰ Te ni cahān tēe ni íyo cuáá:

Náa ni na jéē cácahān ni jéē tu cájini ní jeē véji de nuū Yaā Dios, vēsú ni nanune de tinūu ná. ³¹ Te cájini yō jeē Yaā Dios tu jini nahín yá jeē cájicān ñayuu iyó cuéchi. Chi jini nahín yá nuū maá-ni ñayuu jeē cáchiñúhún i ya te cásaha i jeē cuní yā. ³² Te ní véji yó te tu ní jini sōho cuiṭi yō jeē ñn tēe nanune de tinūú inga tēe ni cacu cuáá. ³³ Te núu nasūu ndé nuū Yaā Dios véji tēe ún, te ma cúu cuiṭi sáha de ñn jniñu súcuan. Achí de.

³⁴ Te ni cacahān tēe hebreo un:

Róhó chi íyó ndasí cuéchi ró ndé quívī ní cacu ró, ¿te á máá ró steén nuū rī naún? áchí.

Te ni caquenehen tēe un yátā vehe ñi sinagoga.

Siquī ñayuu cáhīyo cuáá ánuá

³⁵ Te ni jini jnūhun Jesús jeē ní caquenehen de tēe ún. Te ni nihīn jnáhan ya jiín de, te ni cahān yā jiín de:

¿A cándíje ró Séhe Yaā Dios?

³⁶ Te ni cahān de:

¿Ndé ñn cúu ya návāha candíje ná yá?

³⁷ Te ni cahān Jesús:

Je ni jito ró núu yā, te suu cúu ruhū jeē cahán jiín ró, achí yá.

³⁸ Yūcuán na te ni jecuiñī yití de nuū yā, te ni cahān de:

Cándíje ná jéē nihín cúu Jitoho ná.

³⁹ Te ni cahān Jesús:

Véji ri ini ñayīvi yáha jéē sándaā rī siquī ñayuu. Chi ñayuu jeē nájnūhun cácuáá ánuá, ndundijin ini anuá i jeē jécūhun ni i siquī rī. Te ñayuu jeē jéni ni i jeē cájecūhun ni i, nájnūhun nducuáá ánuá i. Achí yá.

⁴⁰ Te sava tēe fariseo jeē cáhīn jiín yá, ná ni cajini de jnūhun yáha, te ni cacahān de jiín yá:

¿Te chí jéni ni rō jeē suni tēe tu cájecūhun ni cácuu máá rī naún?

⁴¹ Te ni cahān Jesús:

Núu jeē cácuu ró tēe tu jécūhun ni nuú, te ma cóo cuéchi ró. Te siquī jeē ní cacahān rō jeē cájecūhun ni rō, te tu cájetáhú ró, jeē yúcuan condee cuéchi siquī rō.

Jnūhun yátā siquī lanchi

10

¹ 'Jendaá cahán rī jiín ró, núu yīhi lanchi ini corral cánevāha cáhnu ñayuu, te núu ndé tēe tu quívī de ichi yéhyí corral un, chi sa suhva inga lado cáa de quívī de, tēe un cúu ñacuīhná, chi véji jeē sacuíhná. ² Te tēe quívī ichi yéhyí, chi tēe un cúu pastor ndíto lanchi. ³ Te tēe ndíto yéhyí, núne de te quívī tēe ún. Te lanchi de cánacuni tī tachī de. Te cána de síhvī lanchi máá de, te táva de tī. ⁴ Te núu ni tava de ndīhi lanchi máá de, te yósnúu de nuū tī cuahān de. Te lanchi un cándiquīn tī de, chi nácuni tī tachī de. ⁵ Te ma cóndiquīn tī yatā inga tēe, chi sa suhva cunu tī coto tī de, chi nácuni tī jeē nasūu jítoho tī cúu.

⁶ Jnūhun yátá yáha ní cahān Jesús jiín ñayuu, te tu ní cájecūhun ni i na jnūhun cúu jeē ni cahān yā.

Jesús cúu máá pastor vāha

⁷ Yūcuán na te ni cahān gā Jesús jiín i:

Jendaá cahán rī jiín ró: Máá rí cúu nájnūhun yéhyí corral nuū quívīcoo ñayuu cácuu nájnūhun lanchi rī. ⁸ Tāca tēe jeē tu ní tájí Yaā Dios, jeē ní quijicoo de nde ná tu quee rī, cácuu de nájnūhun ñacuīhná, chi tu ní cástéén de jnūhun ndaā. Te ñayuu cácuu nájnūhun lanchi rī, tu ní cájetáhú i de.

⁹ Máá rí cúu nájnūhun yéhyí. Te ñayuu jeē jiín máá rí quívīcoo, jnama rī i. Te cuu i nájnūhun lanchi jeē ndívīcoo tī nuū yīhi vāha tī, te quéndacoo tī nuū cáji vāha tī.

¹⁰ 'Tēe cuíhná chi máni véji de jeē sacuíhná de lanchi, te cahni de, te snáa de. Te ruhū chi véji rī návāha cotecu ñayuu cácuu lanchi rī, te nde yōhyo vāha ndetū coo i. ¹¹ Máá rí cúu máá pastor vāha. Te pastor vāha chi ndíto vāha de lanchi de, vēsú nde cuu de jeē siquí tī. ¹² Te ñn tēe yíyāhu, nasūú pastor tī cúu de, chi nasūú lanchi máá de cúu tī. Te núu jíto de jeē véji yīhī, te stóo de lanchi, te jínu de cuahān de. Te yīhī chi jnī tī lanchi, te sáha tī jeē jité núu lanchi. ¹³ Te tēe yíyāhu ún chi jínu de cuahān de siquī

jeē lanchi tátú cúu jeē ndító de, te jeē yúcuan tu cúndáhú ni de ti.

¹⁴ 'Máá rí cúu máá pastor vāha. Te jíní rī tāca ñáyuu cácuu nájnūhun lanchi ri, te máá i cájini i ruhū. ¹⁵ Te yāha cúu nájnūhun jeē Tatá rī jini yā ruhū, te máá rí jini rī Tatá rī. Te cuu rī jeē síquī ñayuu cácuu lanchi ri. ¹⁶ Te suni íyó gá ñayuu jeē cácuu lanchi ri, te sñn sñn ñayuu cácuu i. Te cánuú jéē suni condeca ri ñayuu ún. Te cuatáhú i jnūhun cáhán rī. Te coyūcu cáhnu-ni ndihí ñayuu candíje, te coo ñn-ni pastor i.

¹⁷ 'Te Tatá rī manī ndasí yá jíin rí síquī jeē jéhe ri máá rí jeē cúu rī jehē ñayuu, te natecu tucu ri. ¹⁸ Ni ñn ma cúu cahni ruhū, chí máá rí cúu jeē jéhe jnūhun cuu rī. Jeē cachí máá rí te cuu rī, te jeē cachí máá rí te natecu rī, chí súcuan íyó poder rī. Súcuan ni cahān Tatá rī jeē sáha ri. Achí yá.

¹⁹ Te jeē ní cajini jnáhan ñuu yā hebreo jnūhun yāha, te ni cacusñn tucu i. ²⁰ Te cuehē i ni cacahān:

¿Naun cáchusóhó ró jeē cahán de? Chí ñúhun tachí ini de, te ni tiví xini de.

²¹ Te sava ga i ni cacahān:

Tu súcuan cáhán tēe ñúhun tachí ini, nájnūhun cáhán tēe yāha. Te tēe ñúhun tachí ini, ¿á cuu nanune de tinūu téé cuáá naún? Achí.

Jeē ní casquéhichí i Jesús

²² Te tiempo míjin cúu, te ñuu Jerusalén cánasáha ñayuu vico jeē cánucūhun ni i quiví ní cuhí templo cáhnu. ²³ Te jíca cuu Jesús ini templo, ini corredor jeē naní Salomón. ²⁴ Te jnáhan ñuu yā hebreo ni cacutútú i nuū yā, te ni cacahān i:

¿Nasaa ga quiví sáha ró jéē ma cucáhnu ni rí? Cachi cají núu rī jijnáhan ri núu máá ró cúu Cristo.

²⁵ Te ni cahān Jesús:

Je ni castūhun rí nuū rō, te tu ní cá candíje ró. Tāca jniñu jeē ní tejniñu Tatá rī ruhū sáha ri, yūcuan stéén cají jéē máá yá ni tají rúhū. ²⁶ Te tu cá candíje ró, chí nasūú lanchi ri cácuu ró, nájnūhun je ni cahān rī jíin ró. ²⁷ Ñayuu cácuu lanchi ri, chí nácuni i

jeē máá rí cúu jeē cahán jíin i. Te jíní rī i, te cándiquīn i ruhū. ²⁸ Te cotecu i ní cáni sáha ri, te ma jnahnú ndetū cuiti i. Te ni ñn ma cúu quende i ndaha ri. ²⁹ Máá Tatá rī ni síquí ya i ndaha ri. Te cújéhnu ga máá yá vésú tāca gá. Te ni ñn ma cúu quende i ndaha ya. ³⁰ Máá rí jíin Tatá rī, chí ñn-ni cúu ri, achí yá.

³¹ Yūcuán na te jnáhan ñuu yā hebreo ni caquihin tucu de yuū jeē cuáha de xiní yā. ³² Te ni cahān yā jíin de:

Ni steén rī cuehē jniñu váha nuū rō jeē ni sáha ri jíin poder Tatá rī. ¿Te á síquī jeē ni sáha ri jniñu váha cúu jeē cuáha ró yúu xiní rī núu súcuan? Achí yá.

³³ Te ni cacahān de jíin yá:

Nasūu síquī jeē ni sáha ró jniñu váha cúu jeē cuáha ri yuū xiní rō, chí síquī jeē cahán ndevāha ró jéē achí ró jeē inuú cúu ró jíin Yaā Dios. Chí tēe-ni cúu ró, te sáha ró jéē inuú cúu ró jíin Yaā Dios. Achí de jíin yá.

³⁴ Te ni cahān Jesús:

Yósó núu tútu ley cánevāha ró jéē ni cáhán Yaā Dios: Nájnūhun yaā cácuu ró, achí Yaā Dios, achí tutu. ³⁵ Chí ñayuu jeē ní cajetáhú jnúhun ya, ni cahān yā jeē cácuu i nájnūhun yaā. Te cájini yō jeē ma cúu cahān yō jeē tú ndaā jnūhun cáhán tutu i. ³⁶ Núu súcuan ¿te naun cacahān rō jeē jnúhun ndevāha cúu jeē ni cáhán rī jeē Séhe Yaā Dios cúu ri? Chí máá Yaā Dios ni jeni ya ruhū síquī jniñu i, te ni tají yá ruhū vēji ri ini ñayiví. ³⁷ Núu tu sáha ri jniñu sáha Tatá rī, núu súcuan te ma candíje ró rúhū. ³⁸ Te núu sáha ri, te vésú tu cá candíje ró rúhū, te na cándíje ró síquī jniñu sáha ri ún. Te súcuan te cucáhnu ni rō jeē ñn-ni cúu Tatá rī jíin rí, te ñn-ni cúu ri jíin Tatá rī. Achí yá.

³⁹ Yūcuán na te cánducú tucu de jni de ya. Te ni ndoñúhún-ni ya cuahān yā.

⁴⁰ Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán. ⁴¹ Te ni quiijicoo cuehē ñayuu nuū yā, te ni cacahān i jíin táca jnáhan i:

Ndaā chi vēsú tu ní sáha Juan ni ñn jniñu jéhnú, te ni cundaā ndihi jnūhun ni cahān de siquī ndese sáha tēe yáha. Achí i.

⁴² Te cuehē ñayuu jeē ni jéngoo nuū yā yūcuán, ni cacandíje i ya.

Jeē ni jīhī Lázaro

11

¹ Te ni íyo ñn tēe cūhú, nání de Lázaro. Te máa de jíin cuáha de María jíin Marta, cácuu de ñayuu ñuu Betania. ² Te María un jeē cúu cuāha Lázaro, suu ña cúu jeē ní chihi aceite perfume jehē Jitoho yō, te ni nasíhī ña jíin ixi xíní ña. ³ Te ndíndúú cuáha de un ní catajī ña jnūhun cuahān nuū Jesús:

Tēe jeē maní ni jíin, cūhú de, áhí ña, áhí mozo.

⁴ Te ná ni jini Jesús jnūhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sáha Yaā Dios jeē cuni ñayuu ndese cújéhnú ya. Chi ruhū, Sēhe Yaā Dios, jíin cuéhyī yáha te stéén rī jeē suni cújéhnú máa rí. Achí yá.

⁵ Te maní Jesús jíin Marta jíin cūhū ña jíin Lázaro. ⁶ Te vēsú súcuuan te nuū ni níhīn yā jnūhun jeē cūhú de, te ni quendōo ya uū gā quivī nuū ndeé yá un. ⁷ Yūcuán na te ni cahān yā jíin tēe cáscuáha jíin yá:

Na quíhīn tucu yó región Judea.

⁸ Te tēe cáscuáha un ní cacahān de jíin yā:

Maestro, ná tu cuu quivī jeē ní canducú jnáhan yó hebreo cuāha de yuū xinī ní. ¿Te cúní ni quíhīn tucu ní yúcuuan naún? Achí de.

⁹ Te ni cahān Jesús:

Ma cúu cahni ñayuu ruhū núu ná tu quee maá quivī cuu rī. Chi jeē iyó rí ñayivī yáha cúu nájnūhun jeē iyó úxī uū hora ñn nduú. Te jeē sáha rí jeē cuní Yaā Dios, cúu rí nájnūhun tēe jeē jíca nduú, te tu cáchihi de jehē de, chi cúndijin nuū de ñayivī yáha. ¹⁰ Te tēe jeē tu sáha jeē cuní Yaā Dios, chi nájnūhun jíca de jecuáa, te nájnūhun

cáchihi de jehē de, chi tu cúndijin ini anuá de. Achí yá.

¹¹ Yūcuán na te ni cahān tucu ya:

Amigo yō Lázaro quíxí de, te quíhīn rī sáha rí jeē nátahū ni de. Achí yá.

¹² Yūcuán na te tēe cáscuáha un ní cacahān de:

Núu quíxí de te jíiní yō jeē nduvāha de.

¹³ Te Jesús chi súcuuan ni cahān yā jeē jé ni jīhī de. Te cájeni ni tēe cáscuáha jeē quixí ndije de. ¹⁴ Yūcuán na te ni cahān cají yá:

Je ni jīhī Lázaro. ¹⁵ Te cúshī ni rī jeē tu ní cóyūcu yó yūcuán, návāha vāha ga candíje ró jéē coto ró jniñu jéhnú sáha rí. Núu súcuuan te na quíngoo yó núu ndíyī ún. Achí yá.

¹⁶ Yūcuán na te Tomás, tēe cúu cuatí, ni cahān de jíin jnáhan de jeē cascuáha jíin yá:

Suni na quíngoo yó návāha cuu yō jíin yá, achí de.

Jesús cúu jeē sáha jeē nátecu te cotecu ní cáni

¹⁷ Te nuū ní quee Jesús, te jíiní yā jeē ní cuu cuūn quivī yíndūji Lázaro.

¹⁸ Te yajni-ni íne ñuu Betania jíin ñuu Jerusalén, nájnūhun uū kilómetro yosáva. ¹⁹ Te Marta jíin María, ni quecoo cuehē jnáhan ña hebreo jeē

cahán i jnūhun ndeyí ni jíin ña jeē siquí jeē ni jīhī cuāha ña. ²⁰ Te nuū ní jini Marta jeē véji Jesús, te ni quenda ña cuajnahān ña ya. Te María chi ni ndōo ña vehe. ²¹ Te ni cahān Marta jíin Jesús:

Núu ní íyo ní yáha, te ma cúu cuāha ná núu. ²² Te vēsú súcuuan te jíiní na jéē tāca jéē cacán ni núu Yaā Dios, te sáha ya, achí ña.

²³ Te ni cahān Jesús jíin ña:

Natecu cuāha ró.

²⁴ Te ni cahān Marta:

Jíiní na jéē nátecu de quivī nátecu tāca ndíyī nde quivī jínu ñayivī.

²⁵ Te ni cahān Jesús:

Máa rí cúu Yaā sáha jeē nátecu jíin jéē cótecu ní cáni. Ñayuu candíje jeē jnáma rí i, vēsú na cúu i, te natecu i. ²⁶ Te ñayuu cátecu te cándíje i ruhū,

cotecu i ní cáni andiví. ¿A cándíje ró jnúhun yáha? Achí yá.

²⁷ Te ni cahān ña:

Cándíje ná jéē maá ní cúu Cristo, Sēhe Yaā Dios, jeē achí tutu jeē quíji ini ñayivi, áchí ña.

Jeē ni ndáhyū Jesús nuū yíndūji Lázaro

²⁸ Te ná ni cahān ña súcuan, te cuahān-ni ña, cuacana yuhu ña cuhū ña María:

Máa Maestro ni quee yā, te cána ya rohó, áchí ña.

²⁹ Te jeē ní jini María jnúhun yáha, te yachí ni ndocuñi ña, cuahān ña nuū yā. ³⁰ Te ná tu quívi Jesús ñuu, chi ni ndōo-ni ya nuū ni jéjnahan Marta yā.

³¹ Te ñayuu hebreo un jéē cáyūcú ini vehe jíin María, jeē cácahān i jnúhun ndeyí ni jíin ña, ni cajito i jeē yachí ni ndocuñi ña cuahān ña. Te ni candiquin i ña cuango i, chí cájeni ni i jeē cuándahyū ña nde nuū yíndūji ndīyi.

³² Yūcuán na te ni jinū María nuū íne Jesús, te ni jecuiñi yití ña nuū jehé yā, te ni cahān ña:

Núu ní íyo ní yáha, te ma cúu cuāha ná núu, áchí ña.

³³ Te ni jito Jesús jeē ndahyú ña jíin jéē cándahyū ñayuu vējicoo jíin ña. Te yōhyo ni nducuíhyá ni yā, te ni jnahuhū ni yā jeē cundáhú ni yā i.

³⁴ Te ni cajnúhun yá ña:

¿Ndé mí ní cachindūji ró de?

Te ni cacahān ña jíin yá:

Quíhín yō te cuni ní, áchí ña.

³⁵ Te ni ndahyū Jesús. ³⁶ Yūcuán na te ni cacahān ñayuu hebreo un:

Condēhe náa yōhyo manī de jíin ndíyi ún.

³⁷ Te sava i chí ni cacahān i:

Tēe yáha jéē ní nanune de tinūu tée cuáá, ¿á tu ní cúu sáha de jeē ma cúu Lázaro nuú? áchí i.

Jeē ní natecu Lázaro

³⁸ Te yōhyo ni jnahuhū ni tucu Jesús, te ni quee yā nde nuū yíndūji ndīyi. Te ñin yaū cava cúu, te yuyáú un ndíhyú ñin yuū. ³⁹ Te ni cahān yā:

Tejiyo yuū un jíjnáhan ró, áchí yá.

Te Marta, cuāha ndīyi un, ní cahān ña:

Je jéén xicō de, chí je ni cuu cuūn quiví yíndūji de.

⁴⁰ Te ni cahān Jesús jíin ña:

¿A násūú je ni cahān rī jíin ró jeē núu candíje ró te coto ró jéē yōhyo cújéhnū Yaā Dios jíin poder yā? achí yá.

⁴¹ Yūcuán na te ni catejiyo i yuū jeē ndési yuyáú ndīyi ún. Te ni ndacoto-ni Jesús ichi ándiví, te ni cahān yā:

Tátā, na cútahū na núu ni jéē sáha ní jéē jicán na. ⁴² Te jíin na jéē níni sáha níjéē jicán na. Te jeē váha ñayuu cáhīn yáha cúu jeē súcuan cáhān na, návāha na cándíje i jeē maá ní ni tají sáña.

⁴³ Te ná ni cahān yā súcuan, te ni cahān jee ya:

Lázaro, quenda quiji ró, áchí yá.

⁴⁴ Te ni quenda-ni tēe ni jihī ún, te ñúsúcún ndaha de síhin de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

Jeē ní casquínáhan de jnúhun jeē cáhni de Jesús

(Mt. 26.1-5; Mr. 14.1-2; Lc. 22.1-2)

⁴⁵ Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chí ni cajito i jniñu ní sáha ya. ⁴⁶ Te sava i chí cuango i nuū tée grupo fariseo, te ni cacastūhún i ndese ni sáha Jesús. ⁴⁷ Yūcuán na te tēe fariseo un jíin sūtū cácujeñnu ni candutútú de junta jíin táca gá tēe cácujeñnu. Te ni cacahān de:

¿Ndese sáha yó? Chí tēe ún yōhyo cuehē jniñu jéhnū sáha de. ⁴⁸ Te núu condēhé-ni yó, te ndivii ñayuu candíje i de. Te quijicoo táca tée nación Roma jeē cácujeñnu, te canu de templo cáhnu yó, te scuíté núu de ñayuu nación yō, achí de jíjnáhan de.

⁴⁹ Te ñin jnáhan de jeē naní Caifás, jeē cúu máá sūtū cujeñnu ga cuiyā ún, ni cahān de:

Róhó chí tu cájini cuítī rō, ⁵⁰ ni tu cájecūhun ni rō jeē váha ga jeē cúu ñin

tēe jehē ñáyuu nación yō vēsú jeē nāā ndivii i, áchí de.

⁵¹ Te tu ní cáhán de jnūhun yáha jēē jēni ni maá de. Chi siquī jeē cúu de sutū cujéhnū ga cuiyā ún, te ni sáha Yaā Dios jíin de jeē ní nacani de jnūhun jeē cúu Jesús jehē ñáyuu nación hebreo. ⁵² Te nasūu máá ñn-ni jehē nación hebreo, chi suni jehē ndivii ñayuu cácuu sēhe Yaā Dios jeē ní cajitē núu tēcá nación, návāha ñn na cuu i jíináhan i. ⁵³ Yūcuán na te nde quivī ún te tēca tēe hebreo cácujehnū un, ní casquijnáhan de jnūhun jeē cáhni de Jesús.

⁵⁴ Jeē yúcuan tuá ní jíca ndijin yā nuū jnáhan ñuu yā hebreo un, chi ni quenda ya región Judea, te cuahān yā ñn ñuu naní Efraín, nuū iyó yajni ñuhun téhé. Te ni condee yā yúcuan jíin tēe cáscuáha jíin yá.

⁵⁵ Te ni cuyajni vico pascua jeē cánasáha ñayuu hebreo. Te cuehē ñayuu tēcá ñuu yūcuán cuángoo i ñuu Jerusalén, návāha squícu i jeē cáhán ley jeē cúchi i ndundoo i nuū Yaā Dios, te sáa te quejéé vico pascua. ⁵⁶ Te cánanducú i Jesús, te cácajnūhun jnáhan i ini templo:

¿Ndese cájeni ni rō? ¿A quiji de vico, chí tuú? Achí i.

⁵⁷ Te sutū cácujehnū jíin tēe fariseo ni candacu de jniñu jeē núu ndé ñn ñayuu jiní ndé nuū íne ya, te na cástūhún i, návāha jni de ya.

Jeē ní chuhun María perfume jehē Jesús

(Mt. 26.6-13; Mr. 14.3-9)

12

¹ Te cúmanī iñū gā quivī te coo vico pascua. Te ni jehēn tucu Jesús ñuu Betania nuū ndeé Lázaro, tēe ni jihī te ni nastécu yā de. ² Te ni casáha i ñn vico xini jeē yiñúhún i jíin yá. Te Marta ni jeni ña cohō. Te Lázaro yéji de staā jíin yá nuū mesa jíin táca gá ñayuu. ³ Yūcuán na te María ni quee ña jíin nájnūhun sava litro aceite perfume jeē máni ita nardo cúu, te yōhyo yahu ndeé. Te ni chuhun ña jehē Jesús, te ni nasíchí ña jíin ixi ña. Te ní ini vehe

un ní chitú xicō perfume un. ⁴ Yūcuán na te ni cahān Judas Iscariote sēhe Simón, ñn tēe scuáha jíin yá un, te suu de cúu jeē nastúu de ya:

⁵ ¿Najehē tu ní cúyāhu perfume yáha jēē uní ciento denario, te cuāha yó núu ñáyuu ndahú núu. Achí de.

⁶ Súcuan ni cahān de, nasūu jēē cundáhú ndije ni de ñayuu ndahú, chi sa suhva jeē cúu de tēe cuíhná. Chi máá de ndíso yijni xūhún, te quíhin cuíhná de jeē cájequin táca tēe ún. ⁷ Yūcuán na te ni cahān Jesús:

Ma stáhān rō ña. Chi jeē ni sáha ña yāhá cúu jeē ni sátūhva ña ruhū nde quivī jeē quíndūji ri. ⁸ Chi níni cáyūcu ñáyuu ndahú jíin ró, te ruhū chí tuá condee rī jíin ró. Achí yá.

Jeē ní casquijnáhan de jnūhun jeē cáhni de Lázaro

⁹ Te cuehē ñayuu hebreo ni cajini jnūhun i jeē néne ya ñuu Betania. Te ni jinūcoo i, te nasūu máá ñn jeē cuní i coto i nuū Jesús, chi suni jeē cuní i coto i nuū Lázaro, tēe jeē ní nastécu yā. ¹⁰ Yūcuán na te sutū cácujehnū ni casquijnáhan de jnūhun jeē suni cáhni de Lázaro. ¹¹ Chi jeē siquí Lázaro te ni cujiyo cuehē jnáhan ñuu de hebreo nuū de, te cácandíje i Jesús.

Jeē ni quivī Jesús Jerusalén

(Mt. 21.1-11; Mr. 11.1-11; Lc. 19.28-40)

¹² Te inga quivī ún, te ñayuu cuehē jeē ní quecoo vico pascua un, ní cajini jnūhun i jeē véji Jesús ñuu Jerusalén. ¹³ Te ni cajehnde i ndaha ñúú, te ni quendacoo i cuajnahan i ya. Te cácana jee i:

Yōhyo cújéhnū Yaā Dios. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. Yōhyo vāha Yaā cúu Rey nación yō Israel. Achí i.

¹⁴ Te ni nihīn Jesús ñn burro, te ni jecosō yā tī, nájnūhun cáhán tutu i:

¹⁵ Ñayuu ñuu Jerusalén jeē naní ñuu Sion, ma yūhu ró jijnáhan ró.

Yāhá condēhe ró jeē véji Rey rō, te yósó yá ñn burro.

Achí tutu.

¹⁶ Te quivī ún te tēe cáscuáha jíin yá, tu ní cájecūhun ni de jeē súcuan

squícu tāca jéē yosó núū tútu iī. Te nde ná ni ndujéhnú Jesús jeē cuánuhun yā andiví, te sáá te ni canucūhun ni de tāca jnúhun yósó síquī yā, jíin jéē ní casáha de súcuan jíin yá.

¹⁷ Te ñayuu ní cahīin jíin yá ná ni cana ya xinī Lázaro nuū ní yindūji de, te ni nastécu yā de, ni canacani i jnúhun ndese ni sáha ya. ¹⁸ Jeē yúcuán ní quendacoo ñayuu cuehē un, ní jejnahan i ya, chi ni cajini jnúhun i jeē ni sáha ya jniñu jéhnú un jéē ni steén yā poder yā. ¹⁹ Yūcuán na te ni cacahān maá téé fariseo:

Vijna te je ni cajito yó jéē ma cúu cuiti gā casi yō. Chi jíto yó jéē ndivii cuiti ñayuu cuango i jíin de. Achí de jíinahan de.

Ñayuu nación Grecia nánducú i Jesús

²⁰ Te sava ñayuu nación Grecia, suni ni quijicoo i ñuu Jerusalén vico pas-cua un jéē chiñúhún i Yaā Dios. ²¹ Te ni quecoo i nuū Felipe, tēe ñuu Bet-saida ndañú Galilea. Te ni cacahān i jíin de:

Tátā, cácu ni ná cahān na jíin Jesús, achí i.

²² Te ni jehēn Felipe, ni castūhún de nuū Andrés. Te ndíndú de cuacastūhún de nuū Jesús. ²³ Te ni cahān Jesús jíin de:

Je ni quee quiví jeē ndujéhnú Yaā ní nduu tēe. ²⁴ Te jendaá cahán rī jíin ró, ñin nunī trigo núu tú ñingava nuū ñúhun te quindūji, núu súcuan te quendōo máá ñin-ni. Te núu quindūji, te nacayā cuehē ndasí. Te suni súcuan cánuú cuu rī quindūji rī, návāha coo cuehē ñayuu jeē ndúu i sēhe Yaā Dios. ²⁵ Te na-ni ñayuu núu tu jéhe i jnúhun ndoho i jeē síquí ruhū, te jnahnū ndetū i. Te ñayuu jeē jéhe i jnúhun ndoho i jeē síquí ruhū ini ñayiví yáha, cotecu i ní cáni andiví. ²⁶ Núu ndé ñayuu cuní i cuajníñu i nuū rī, na cóndiquin i ruhū. Te nuū cóndee rī, suni yūcuán condee ñayuu jejníñu nuū rī. Te ñayuu jejníñu nuū rī, chi sáha Tátá rī jeē cujéhnú i.

Jeē ni cahān Jesús jeē cuu yā

²⁷ Te vijna te cúcuíhyá ndasí ni rī sáha jnúndóho quiji síquí rī. ¿Te ndese cahān rī? ¿A cahān rī jíin Tátá rī: Jnama ní sáña núu jnúndóho jeē quiji síquí ná, achí rī? Ma cúu, chi jeē síquí yúcuán cúu jeē véji rī. ²⁸ Tátā, steén ni jéē cujéhnú ndasí ní jíin poder ni, achí yá.

Yūcuán na te ichi andiví ní cahān ñin jnúhun:

Je ni steén rī jeē cujéhnú rī, te sáha tucu rī inga jínu, achí yá.

²⁹ Te ni cajini ñayuu cahīin yūcuán, te ni cacahān i jeē taja cáhán. Te sava ga i ni cacahān:

Ñin ndajéhé Yaā Dios ni cahān jíin yá.

³⁰ Te ni cahān Jesús jíin i:

Tu ní cáhán jnúhun yáha jéē síquí ruhū, chi sa suhva návāha cuni rō síquí jnúhun jeē ni cahān yā jíin rī.

³¹ Vijna cúu jeē sándaā Yaā Dios síquí cuéchi ñayuu ñayiví yáha. Vijna cúu jeē scúnu ya jexeén jeē ndácu jniñu ini ñayiví yáha. ³² Te ruhū, núu na jínu condita caa rī cuu rī ini ñayiví, te sáha rī jeē jnāā tāca ñayuu quivícoo i ndaha rī, achí yá.

³³ Súcuan ni cahān yā jeē steén yā ndese modo cuu yā. ³⁴ Te ni cacahān ñayuu jíin yá:

Ni cajini sōho ná jéē cahán tutu ley Yaā Dios cánevāha yó, jeē Cristo cotecu yā ní cáni. ¿Te naun cáhán ni jéē Yaā ní nduu tēe, cánuú condita caa ya cuu yā? ¿Ndé ñin cúu máá Yáá ní nduu tēe núu súcuan? Achí i.

³⁵ Yūcuán na te ni cahān Jesús:

Máá jecu na quiví condee rī jíin ró jeē cúu rī luz cundijin ini anuá rō. Núu súcuan te vijna jeē iyó gá luz rī jíin ró, te caca ró jíin, chi sanaa ni rō te cuahān rī, te nájnūhun quendōo ró núu néē. Chi ñayuu cájica nájnūhun nuū néē, tu cájini i ndé nuū cuango i. ³⁶ Núu súcuan te níni ndéé gá rī jíin ró, te candíje ró rúhū jeē cúu rī luz, návāha nduu ró ñayuu cájica jíin luz, achí yá.

Súcuan ni cahān Jesús tāca jnúhun yáha, te cuahān-ni ya, te tuá ni steén yā maá yá nuū i.

Jeē tu ní cá candíje ñayuu hebreo jeē cúu ya Cristo

³⁷ Te vēsú cuehē jniñu jéhu ni sáha Jesús jeē steén yā poder yā nuū i, te tu ní cá candíje i ya. ³⁸ Chi squícu nahín jnúhun ni cahān Isaías, tēe ni nacani jnúhun Yaā Dios nde jenahán:

Tátá Yaā Dios, tu ní cá candíje ñayuu jnúhun ni canacani ná, te tu ní cá candíje i jniñu jéhu jeē ni steén ni poder ni núu i.

Achí Isaías. ³⁹ Jeē yúcuān tu ní cúu candíje i, chi ni cahān tucu Isaías:

⁴⁰ Ni sáha ya jeē nájnūhun cáhiyo cuáá ánuá i,

jíin jéē cá cunihni ni i, návāha coo nájnūhun jeē tu cájito i, te ni ma jécūhun ni i, ni ma násāma ini i quivícoo i nuū rī, jeē nasávāha ri anuá i nuū cuéchi i. Achí Cristo, achí tutu. ⁴¹ Jnúhun yáha ní cahān Isaías, chi je ni jito de ndese yōhyo cújéhu Jesús, te ni cahān de ndese coo quiví jeē quíji ya.

⁴² Te vēsú súcuān te cuehē ñayuu hebreo chi ni cá candíje i ya, te suni nde jíin sava tēe cándacu jniñu. Te tu ní cá cachi de jeē cá candíje de ya, chi squícu jeē cáyūhú de tāca tēe fariseo. Chi núu súcuān te quenehen ún de ini vehe iī sinagoga jeē ma cuáha ga jnúhun quivícoo de. ⁴³ Chi cá cusī gā ni de jeē cújéhu de sáha ñayuu, vēsú jeē cújéhu de sáha Yaā Dios.

Jnúhun cáhán Jesús cúu jeē sándaā squícu ñáyuu

⁴⁴ Te ni cahān jee Jesús:

Ñayuu cá candíje ruhū, nasūu máñúhún-ni ruhū cá candíje i, chi suni cá candíje i nde maá Tátá rī, Yaā ní taji rúhū. ⁴⁵ Te ñayuu cájito nuū rī, suni cájito i nuū Yaā ní taji rúhū. ⁴⁶ Máá rí jeē cúu ri luz cúndijin ini anuá ñayuu, ni quíji ri ini ñayiví návāha tāca ñayuu cá candíje ruhū, ma cáca i nájnūhun nuū néē. ⁴⁷ Te núu in ñayuu jíni sōho i jnúhun cáhán rī, te núu tu jétáhú i, te nasūu rúhū sándaā squícu i. Chi tú vēji ri jeē ndénehen ri cuéchi squícu ñayuu ñayiví, chi sa suhva jeē jnáma ri i. ⁴⁸ Te ñayuu jeē casquéhichī i ruhū te

tu cájetáhú i jnúhun cáhán rī, íyó in jeē sándaā squícu i. Suu tāca jnúhun jeē ni cáhán rī, jnúhun un cúu jeē ndenehen cuéchi squícu i quiví jínu ñayiví. ⁴⁹ Chi tu cáhán rī jeē cúu ni maá rí, chi Tátá rī, Yaā ní taji rúhū, máá yá ni ndacu jniñu nuū rī ndese cahān rī jíin ndese steén rī. ⁵⁰ Te jíni rī jeē jniñu ndacu Tátá rī sáha jeē cótecu ñayuu ní cáni. Núu súcuān te jnúhun cáhán rī, chi máni jnúhun jeē ní cachi Tátá rī cúu, áchí yá.

Jeē ní nacate ya jehē tēe cáscuáha

13

¹ Te jehíni inga quiví te quejéé vico pascua. Te je jíni Jesús jeē ní quee quiví jeē quénda ya ñayiví yáha quínuhun yā nuū Tátá yā. Te níni cúndáhú ni yā ñayuu maá yá jeē cáyucú ini ñayiví. Te vijna jeē jínu jeē íne ya ñayiví, te sáha ya in jniñu jeē steén cají yá jeē cundáhú ni yā i.

² Te jexeén je ni squiví ini anuá Judas Iscariote sēhe Simón, jeē vijna nastúu de ya. ³ Te jíni Jesús jeē véji ya nuū Yaā Dios, te nuhūn yā nuū Yaā Dios, jíin jéē ni sáha Tátá yā jeē cújéhu ya squícu ndihí-ni. ⁴ Te cúxíni ya jíin tēe cáscuáha jíin yá, te ni ndocuñí yā. Te ni stáa ya sahma ndíi ya, te ni jihni yā in toalla chíji ya. ⁵ Te ni chuhun ya ndute ini in tijehēn. Te ni quejéé yá nácate ya jehē tēe cáscuáha. Te násíchí yā jíin toalla jeē nuhní chíji ya.

⁶ Te ni jinū yā nuū Simón Pedro. Te ni cahān Pedro jíin yá:

¿Sa máá ní nacate jehē ná naún?

⁷ Te ni cahān Jesús:

Tu jécūhun ni rō jeē sáha ri vijna, te cúcuéé gá te jecūhun ni rō.

⁸ Te ni cahān Pedro jíin yá:

Ma nácate cuiti ni jehē ná.

Te ni cahān Jesús:

Núu tú nacate ri jehē rō, te ma cúu cundúu ró jíin rí.

⁹ Te ni cahān Simón Pedro:

Núu súcuān cúu te nasūu máá jehē-ni ná, chi suni nacate ní ndaha ná jíin xíní ná, áchí de.

10 Te ni cahān Jesús jín de:

Tēe jeē sa ní jichi, tu jíní ñúhún ndundoo ní cáhnu de, chi máá jéhē-ni de, chi je íyó ndoo ní cáhnu de. Te máá ró chi je ni candundoo ró. Te tú ndíhi ró cáhiyo ndoo.

11 Chi je jíní yā ndé ñn de cúu jeē nastúu de ya, te jeē yúcuan ní cahān yā: Tú ndíhi ró cáhiyo ndoo.

12 Te nuū ni jínu ni nacate ya jehē de jijnáhan de, te ni naquihin ya sahmandí ya, te ni nucōo tucu ya nuū mesa. Te ni cahān yā:

¿A cájecūhun ni rō na vé cuní cahān jeē ni sáha ri jín ró? 13 Cácahān rō jeē Maestro jín Jítóho rō cúu ri, te ndāā cácahān rō, chi suu ndije cúu ri. 14 Núu súcuan te vésú Maestro rō jín Jítóho rō cúu ri, te ni nacate ri jehē rō jijnáhan ró, te suni súcuan cánuú jéē nacate máá ró jehē jnáhan ró. 15 Chi jniñu yáha ni sáha ri jeē steén rī nuū rō jeē suni súcuan sa cuajniñu ró núu jnáhan ró, nájnūhun sa máá rí ni jejniñu ri nuū rō. 16 Jendaá cahán rī jín ró jeē ñn mozo tu cújéhnú de nuū patrón de, te tēe jíca jniñu táhú nuū de, te cújéhnú de nuū tée ni tají de. Te máá ró cácuu mozo rī, te na cuajniñu ró núu jnáhan ró nájnūhun ni steén rī nuū rō. 17 Te núu ni cajecūhun ni rō jnūhun yáha, te yōhyo ndetū rō te núu squícu ró.

18 "Te nasūu jéē cahán rī jeē ndíhi ró ndétū, chi je jíní rī tāca rōhó jéē ní nacāji ri. Te cánuú squícu jnūhun yáha jeē cáhán tutu i: Tēe yéji staā jín rí, ni ndió cuíñi de siquī rī, achí tutu. 19 Te vijna te je cástūhun rí tāca jéē yáha núu rō nde ná tu coo, návāha núu na cóo, te candíje ró jéē maá rí cúu Yaā ní tají Yaā Dios. 20 Jendaá cahán rī jín ró jeē na-ni ñayuu jeē cuatáhú i tāca jéē tají rí, te ruhū jetáhú i. Te ñayuu jetáhú ruhū, suni jétáhú i Yaā ní tají ruhū vēji ri, achí yá.

Jeē ní cachi yā jeē nastúu Judas yā
(Mt. 26.20-25; Mr. 14.17-21;
Lc. 22.21-23)

21 Te ná ni cahān Jesús tāca jnūhun yáha, te ni cucuíhyá ndasí ni yā. Te ni cahān cají yá:

Jendaá cahán rī jín ró jijnáhan ró jéē ñn máá ró nastúu ruhū, achí yá.

22 Yūcuán na te tēe cáscuáha jín yá, ni candacoto de nuū jnáhan de, cájeni ni de ndé ñn de cúu jeē ni cáhān yā.

23 Te ñn máá tée scuáha jeē maní gā yā jín, néne de xiin ya mesa jeē cácuixini de jín yá. 24 Te ni sáha Simón Pedro seña nuū de jeē na cájnūhún de ya ndé ñn de cúu jeē ni cáhān yā. 25 Yūcuán na te tēe un ní scáyí de máá de nuū Jesús, te ni cajnūhún de ya:

¿Ndé ñn de cúu? áchí de jín yá.

26 Te ni cahān Jesús:

Na chundaji ri staā te cuāha ri nuū ñn de, te suu tēe un cúu, achí yá.

Te ni chundaji ya staā, te ni jēhe ya nuū Judas Iscariote sēhe Simón. 27 Te jeē ní quihin de staā ún, te ni quívi-ni Satanás ini anuá de. Yūcuán na te ni cahān Jesús jín de:

Jniñu jeē sáha ró, na sáha yachí rō.

28 Te ni ñn tēe cáyeji staā jín yá, tu ní cájecūhun ni de naun ni cahān yā súcuan jín de. 29 Chi sava de cájeni ni de jeē ni cáhān Jesús jín Judas jeē cuāan de jeē jíní ñúhún yá vico ún, chí jéē cuáha de jecu xūhun núu ñayuu ndahú. Chi máá de ndíso yijni xūhún. 30 Te jeē ní yeji de staā ún, te ni quenda-ni de cuahān de. Te je ni cuaa.

Jeē ní ndacu ya jniñu jéé

31 Yūcuán na te jeē cuahán Judas te ni cahān Jesús:

Vijna te ruhū, Yaā ní nduu tēe, steén rī ndese cújéhnú ri, te suni jín ruhū te cuni ñayuu ndese cújéhnú Yaā Dios.

32 Te núu jín ruhū cuni ñayuu ndese cújéhnú Yaā Dios, núu súcuan te suni steén Yaā Dios ndese cújéhnú ruhū jeē cúu ri Sēhe ya. Te yachí-ni steén yā.

33 Séhē, tuá nahán condee rī jín ró jijnáhan ró. Te nanducú ró ruhū, te nájnūhun ni cahān rī jín tāca jnáhan yó hebreo, suni súcuan cáhán rī jín ró vijna, jeē ma cúu jinūcoo ró núu quihín rī. 34 Te vijna te ndácu ri ñn jniñu jéé núu rō, jeē na cúndáhú ni rō jnáhan ró. Nájnūhun cúndáhú ni rī rohó, suni súcuan na cúndáhú ni rō

jnáhan ró. ³⁵ Te núu cúndáhú ni rō jnáhan ró, súcuan te cuni tāca ñáyuu jeē cácuu ró tée cáscuáha jíin rí, achí yá.

Jeē ní cachi yā jeē yūhu Pedro cahān de jeē jiní de ya

(Mt. 26.31-35; Mr. 14.27-31; Lc. 22.31-34)

³⁶ Te ni cahān Simón Pedro jíin yá: ¿Ndé nuū quihín ni núu súcuan?

Te ni cahān Jesús:

Nuū quihín rī chi ma cúu condiquīn rō ruhū vijna, te cúcuéé gá te jinū rō.

³⁷ Te ni cahān Pedro: ¿Najehē ma cúu condiquīn na níhín vijna? Tu yúhú ná cuu na jéē siquí ni.

³⁸ Te ni cahān Jesús:

¿A jéni ni rō jeē tu yúhú ró cuu rō jeē siquí rī? Jendaá cahán rī jíin ró jeē nde ná tu cana líhli, te unī jínu yūhu ró te cahān rō jeē tu jíiní rō ruhū. Achí yá.

Jesús cúu ichi jeē jinú yō nuū Tatá yā

14

¹ Te ni cahān gā yā:

Ma cucuíhyá ni rō siquí tāca jnúndóho. Na cándije ró jéē sáha Yaā Dios jehē rō, te suni na cándije ró jéē sáha ri jehē rō. ² Chi nuū ndeé Tatá rī, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rí nuū rō nuú. Núu súcuan te quihín rī quisátūhva ri nuū cóyūcu ró. ³ Te jeē quihín rī sátūhva ri nuū cóyūcu ró, te ndiji ri quinaquihin ri rohó quihín yō, návāha suni coyūcu ró nuū cóndee maá rí. ⁴ Te je cájini rō ndé nuū quihín rī, te cájini rō ndese jinū rō yūcuán. Achí yá.

⁵ Te ni cahān Tomás jíin yá:

Tu cájini na ndé nuū quihín ni, ¿te ndese cuni ná ichi jíinú yūcuan núu súcuan?

⁶ Te ni cahān Jesús jíin de:

Maá rí cúu ichi jinū rō andiví, te maá rí cúu jnūhun ndaā jíin jnúhun cotecu rō ñí cáni. Te ni ñn ma jinú nuū Tatá rī te núu tú ruhū. ⁷ Te núu je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yā, chi je ni cajito ró núu rī, achí yá.

⁸ Te ni cahān Felipe jíin yá:

Stéén ni Tatá ni núu ná, te na cúvāha ni na jíináhan ná, achí de.

⁹ Te ni cahān Jesús:

Felipe, je ni cuu cuehē quiví jíca ri jíin ró jijnáhan ró, ¿te á ná tu cuni rō ndé ñn cúu ri naún? Tēe jeē jíto ruhū, suu Tatá rī jíto de. Núu súcuan ¿te najehē cahán rō jeē steén rī Tatá rī nuū rō? ¹⁰ ¿A tu cándije ró jéē ñn-ni cúu ri jíin Tatá rī, te Tatá rī ñn-ni cúu ya jíin rí? Tāca jnúhun cáhán rī jíin ró, nasūu jnúhun maá rí cúu. Chi Tatá rī jeē ñn-ni cúu ya jíin rí, maá yá sáha tācá jniñu jeē sáha ri. ¹¹ Cándije ró jijnáhan ró jéē ñn-ni cúu ri jíin maá Tatá rī, te Tatá rī ñn-ni cúu ya jíin rí. Te núu tu cájecūhun ni rō, te cándije ró ruhū siquí tācá jniñu sáha ri. ¹² Jendaá cahán rī jíin ró, núu ndé ñáyuu cándije ruhū, jniñu jénu jeē sáha ri yāhá, suni sáha i. Te jénu ga jniñu sáha i vēsú yāhá, chi quinhun rī nuū ndeé Tatá rī. ¹³ Te tācá na-ni vé cacán rō nuū Tatá rī siquí jeē cáncándije ró jéē cúu ri Sēhe ya, te sáha ri jeē cacán rō, te súcuan stéén rī jeē yóhoyó cújénu Tatá rī. ¹⁴ Chi tācá na-ni vé cacán rō siquí jeē cáncándije ró ruhū, te sáha nahín rí.

Jeē ni jéjnūhun ya jeē tají yá Espíritu Santo

¹⁵ Te núu maní rō jíin rí jijnáhan ró, te na squícu ró jniñu ndácu ri nuū rō. ¹⁶ Te cacán tahu rī nuū Tatá rī, te tají yá inga Yaā chindéé ñáhán rohó, te sáha ya jeē cóo sñ ni rō jijnáhan ró. Te Yaā un cúu maá Espíritu jeē steén jnūhun ndaā, te condee yā jíin ró ñí cáni. ¹⁷ Te ñáyuu ñayiví má cúu cuatáhú i ya, chi tu cúu coto i nuū yā, ni tu cúu cuni i ndese Yaā cúu ya. Te maá ró chi je cájini rō ndese Yaā cúu ya, chi ndeé yá jíin ró, te condee yā ñni anuá rō ñí cáni. ¹⁸ Ma stóo uun ri rohó, chi ndiji ri nuū rō. ¹⁹ Jecu na quiví te ma cóto ga ñáyuu ñayiví núu rī. Te maá ró jijnáhan ró chi coto ró núu rī, chi cotecu rī ñí cáni, te jeē yúcuun suni cotecu maá ró. ²⁰ Te quiví ún te cuni rō jeē ñn-ni cúu ri jíin Tatá rī, te maá ró ñn-ni cúu ró jíin rí jeē ndeé

rí ini anuá rō jijnáhan ró. ²¹ Te na-ni ñayuu núu ñúhun ni i jniñu ní ndacu ri, te squícu i, ñayuu un cúu jeē maní ndije jíin rí. Te ñayuu jeē maní jíin rí, suni coo maní Tatá rí jíin i. Te suni ruhū coo maní rí jíin i, te stéén rí nuū i jeē nduú rí jíin i. Achí yá.

²² Te ni cahān Judas jíin yá (te nasūu tēe cúu Iscariote):

Najehē cúu jeē steén ni máá ní nuū ná, te nuū ñáyuu ñayívi chi tuú?

²³ Te ni cahān Jesús:

Ñayuu jeē maní jíin rí, chi cásquícu i jeē cahán rí. Te coo maní Tatá rí jíin i. Te Tatá rí jíin máá rí quijicoo ri cundúú rí jíin i. ²⁴ Te ñayuu jeē tú maní jíin rí, tu cásquícu i jeē cahán rí. Te jnūhun cájini sōho ró cáhán rí, nasūu jnūhun máá rí cúu, chi jnūhun máá Tatá rí jeē ní tají ruhū cúu.

²⁵ Tāca jnūhun yáha cáhán rí jíin ró níní íne ga rí jíin ró. ²⁶ Te Tatá rí chi tají yá Espíritu Santo, quiji nucuiñi nuū rí. Te máá yá chindéé ñáhán yá rohó, te sáha ya jeē cóo sñ ni rō. Te stéén yā tāca jnūhun nuū rō, te nacachi tucu ya tāca jéē ni cahān rí jíin ró.

²⁷ Te jeē quihín rí, te sáha ri jeē cóo ndeyí coo sñ ni rō. Nájñūhun íyó ndeyí sñ ni máá rí, suni súcuan coo ndeyí sñ ni rō sáha ri. Te jeē sáha ri jeē cóo ndeyí sñ ni rō, tu quíjnáhan jíin jnūhun ndeyí cácahān ñayuu ñayívi. Ma cucuíhyá ni rō siquī tāca jnúndóho, te ni ma yūhu ró. ²⁸ Je ni cajini sōho ró jéē ni cahān rí jeē quihín rí, te ndiji ri cundúú rí jíin ró. Te núu cáhiyo maní vāha ró jíin rí, te cusñ ni rō jeē ni cahān rí jeē nuhún rí nuū Tatá rí. Chi cújéhnū ga Tatá rí vijna vēsú ruhū.

²⁹ Je ni castūhun rí nuū rō tāca jnūhun yáha nde ná tu coo, návāha núu je ni cuu, te candíje ró ruhū jijnáhan ró.

³⁰ Ma cahán rí cuehē gā jnūhun jíin ró, chi je vēji jexeén jeē ndácu jniñu ini ñayívi yáha. Te tú na vé cúu sáha siquī rí nuú. ³¹ Te na cóo nájñūhun ni ndacu Tatá rí jniñu nuū rí, návāha cuni ñayuu ñayívi jéē maní rí jíin Tatá rí, te sáha ri jniñu ní ndacu ya. Ndocuiñi jijnáhan ró na quíngoo yó. Achí yá.

Jesús cúu nájñūhun yoyúcú uva

15

¹ Máá rí cúu nájñūhun yoyúcú uva váha ndaā, te Tatá rí cúu nájñūhun tēe ndíto yoyúcú uva un. ² Te máá ró chi cácuu ró nájñūhun ndaha, te núu tu jéhe ró ndéhē te quende yā rohó. Te núu cácuu ró nájñūhun ndaha jeē jéhe ndehē, te nasándoo ya nacahnde yā rohó nájñūhun jeē cúu ró ndaha ún, návāha cuāha ró cuehē gā ndehē. ³ Te máá ró chi je ni candundoo ánuá rō jíin jnūhun ni steén rí nuū rō, nájñūhun ndúndoo ndaha uva. ⁴ Na cundúú ró jíin rí, te suni máá rí cundúú rí jíin ró. Ìn ndaha uva ma cúu cuāha ndehē jeē maá, te núu tu yíjnñi jicā yóho. Te suni súcuan máá ró, ma cúu sáha ró jniñu váha te núu tu cundúú ró jíin rí.

⁵ Máá rí cúu yoyúcú un, te máá ró cácuu ndaha ri. Ñayuu jeē nduú jíin rí, te ruhū nduú rí jíin i, máá i cúu nájñūhun ndaha jeē jéhe cuehē ndehē. Chi núu tú cundúú ró jíin rí, te tú cuíti na jniñu váha cuu sáha ró. ⁶ Ñayuu jeē tu cundúú jíin rí, quende yā i nájñūhun ìn ndaha uva, te ichi. Te ndoho i nájñūhun ndaha uva un jéē ndutútú te cayū nuū ñuhún.

⁷ Núu nduú ró jíin rí, te cáñuhun ni rō jnūhun cáhán rí, yūcuán na te cacān rō na-ni vé cácuni rō, te sáha ri jeē cácahān rō. ⁸ Te núu cásáha ró cuehē jniñu váha, súcuan cástéén rō jeē cúu ndije ró ñáyuu cascuáha jíin rí, te súcuan nácuni ñayuu jeē yóhyo cújéhnū Tatá rí. ⁹ Nájñūhun maní Tatá rí jíin rí, suni súcuan maní rí jíin ró jijnáhan ró. Núu súcuan te ma siaá rō jnūhun maní rí jíin ró. ¹⁰ Núu squícu ró jniñu ní ndacu ri nuū rō, te níní coo maní rí jíin ró, nájñūhun máá rí squícu ri jniñu ní ndacu Tatá rí nuū rí, te níní íyó mání yā jíin rí.

¹¹ Súcuan ni cahān rí jíin ró návāha coo sñ ni rō nájñūhun íyó sñ ni rí, chi nde cusñ teyí ni rō. ¹² Te yāha cúu jniñu ndácu ri nuū rō jijnáhan ró: jeē na cundáhú ni rō jnáhan ró nájñūhun

cúndáhú ni rī rohó. ¹³ Núu ñn tēe cuu de jehē amigo de, te tuá na vé cúmanī gā sáha de jeē cundáhú ni de amigo de. ¹⁴ Te máá ró cácuu amigo rī núu squícu ró jniñu ndácu ri nuū rō. ¹⁵ Ma cahán gā rī mozo jíin ró, chi ñn mozo tu cástūhún patrón nuū i ndese jéni ni de sáha de. Chi sa suhva amigo cahán rī jíin ró, chi je ni castūhun rī nuū rō tāca jnúhun ni cahán Tatá rī jíin rī. ¹⁶ Máá rī ni nacāji rōhó jēe jnáma ri rohó, te nasūu máá ró ni cánacani ni xīhna gā jeē cóndiquīn rō ruhū. Te ni jeni ri rohó jēe caca ndaā rō te scándíje ró cuéhē ñayuu jeē cuu i sēhe ri ní cáni. Te súcuan te ndíhi jeē cacán rō nuū Tatá rī siquī jeē cácandíje ró rúhū, sáha ya jeē jícan rō. ¹⁷ Te yāha cúu jniñu ndácu ri nuū rō: jeē na cúndáhú ni rō jnáhan ró.

Jeē cáquitī ni ñayuu ñayīvi núu Jesús jíin núu ñáyuu cácandíje

¹⁸ Te núu cáquitī ni ñayuu ñayīvi núu rō jíinánhan ró, te je cájini rō jeē xīhna gā nuū máá rī ni caquitī ni i. ¹⁹ Te núu jeē iyó gá rō jíin modo ñayuu ñayīvi, te coo manī ñayuu ñayīvi jíin ró nuú, nájñuhun manī i jíin jnáhan i. Te ni nacāji ri rohó jēe tuá coo ró jíin modo ñayuu ñayīvi. Te jeē yúcuan cáquitī ni i nuū rō, chi tuá cácuu ró cuenta ñayīvi. ²⁰ Nucūhun ni rō jñūhun ni cahán rī jíin ró: Núu tu iyó yíñuhún ñáyuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rōhó jēe cácuu ró mozo rī. Te núu jeē ni cájetáhú i jñūhun ni steén rī, te suni cuatáhú i jñūhun cástéén rō. ²¹ Te tācá jniñu yáha sáha i jíin ró jeē siquī ruhū, chi tu cájini i Yaā ní tají rúhū vēji ri.

²² 'Núu jeē tu ní quíji ri nacani ri jñūhun nuū i, te ma cóo cuēchi i núu. Te vijna chi ma cúu ga cahán i jeē tu jíni i jeē iyó cuéchi i. ²³ Ñayuu jeē cáquitī ni nuū rī, suni nuū Tatá rī cáquitī ni i. ²⁴ Núu jeē tu ní sáha ri jniñu jéhu nuū i jeē ní ñn tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vēsú súcuan te cáquitī ni i nuū rī jíin núu

Tatá rī. ²⁵ Te súcuan cásáha i návāha squícu jñūhun yósó núu tútu ley Yaā Díos jeē cánevāha i: Ni caquitī ni i nuū rī, vēsú tú na cuēchi ri, achí.

²⁶ 'Te tají rí maá Yaā chindéé ñáhán rōhó te sáha ya jeē cóo sī ni rō. Te Yaā un cúu máá Espíritu jeē steén jñūhun ndaā, te quiji ya nde nuū Tatá rī, te nacani cáji yá jñūhun ri. ²⁷ Te suni máá ró nacani ró jñūhun ri, chi je cáhīn ro jíin rī nde ná ni quejéé rí nácani ri jñūhun.

16

¹ 'Tāca jnúhun yáha ní cahán rī jíin ró návāha ma náyūhu ró jeē quíji jñūndóho. ² Chi quenehen i rōhó jēe ma cuáha ga i jñūhun cone ró táca vehe i sinagoga. Te quee quivī jeē cahni i rōhó, te cani ni i jeē ñn jniñu váha ni sáha i nuū Yaā Díos. ³ Te súcuan sáha i jíin ró, chi tu cájini cuiti i máá Tatá rī ni máá rī. ⁴ Te ni cahán rī jñūhun yáha jíin ró návāha núu je ni quee quivī jeē súcuan coo, te nucūhun ni rō jeē jé ni cahán rī jíin ró.

Jniñu sáha Espíritu Santo

'Te tu ní cáhan rī jñūhun yáha jíin ró nde xīhna ñúhún, chi íne máá rí jíin ró jíinánhan ró. ⁵ Te vijna chi nuhūn rī condee rī jíin Yaā ní tají rúhū vēji ri. Te ni ñn ró tu cájñūhun ró ndé nuū quihín rī. ⁶ Chi máá jēe cácuuhyá ndasí ni rō jeē ni cáhan rī súcuan jíin ró. ⁷ Jendaá cahán rī jíin ró: Jeē váha máá ró jíinánhan ró cúu jeē quihín rī. Chi núu tú quihín rī, te ma quíji Yaā chindéé ñáhán rōhó te sáha ya jeē cóo sī ni rō. Te núu cuahán rī, te tají rí yā quiji ya nuū rō. ⁸ Te jeē quee yā, te steén yā nuū ñáyuu ñayīvi jēe iyó cuéchi i, jíin ndese quivīcoo i ichi ndaā, jíin jēe sándaā Yaā Díos siquī cuéchi i. ⁹ Steén yā jeē iyó cuéchi i, chi tu cácandíje i ruhū. ¹⁰ Te steén yā siquī ichi ndaā, chi máá rí nuhūn rī nuū Tatá rī, te ma cóto ga rō nuū rī. ¹¹ Te steén yā siquī jeē sándaā Yaā Díos cuéchi ñayuu, chi je ni cundaā jeē jnahnú ndetū maá jéxeén jeē cujéhu ini ñayīvi yáha.

12 'Te íyó cuéhē gā jnūhun cúní rī cahān rī jīn ró, te ma cúu jecūhun ni rō vijna. 13 Te jeē quée maá Espíritu jeē steén jnūhun ndaā, te máá yá steén tāca jnūhun ndaā un núū rō. Chi ma cahán yā jeē maá yá, chi cahān yā tāca jēē jīni sōho ya cahán Yaā Dios. Te steén yā siquī tācá jniñu jeē coo. 14 Te steén yā jeē cujéhnu ri, chi nacastūhun yá nuū rō tāca jnūhun jeē jé ni cahān rī, te sáha ya jeē jécūhun ni rō. 15 Ndihi ndese cújéhnu Tátá rī, suni súcuan cújéhnu máá rí. Jeē yúcuan ní cahān rī jeē Espíritu Santo nacastūhun yá nuū rō tāca jnūhun jeē jé ni cahān rī, te sáha ya jeē jécūhun ni rō jijnáhan ró.

Vēsú cácuíhyá ni rō, te ndus# ni rō

16 'Jecu na te ma cóto ga rō nuū rī. Te jecu tucu quivī te coto tucu ró núū rī, chi quinuñuñu rī nuū ndeé Tátá rī. Achí yá.

17 Yūcuán na te sava tēe cáscuáha jīn yá, ni cacajñūhun jnáhan de:

¿Na jnūhun cúu jeē yáha jeē cahán yā jīn yó? Chi áchí yá jeē jecu na te ma cóto ga yō nuū yā, te jecu tucu quivī te coto tucu yó núū yā, chi siquī jeē quínuhun yā nuū ndeé Tátá yā. 18 ¿Na jnūhun cúu jeē yáha jeē cahán yā, jecu na? Tu cájecūhun ni yō na vé cúu jeē cahán yā. Achí de.

19 Te ni jini Jesús jeē cácuni de cajñūhún de ya. Te ni cahān yā jīn de:

¿A cácajnūhun jnáhan ró na vé cúu jeē ni cáhān rī jīn ró jeē jecu na te ma cóto ga rō nuū rī, te jecu tucu quivī te coto tucu ró núū rī? 20 Jendaá cahán rī jīn ró jeē ndahyū rō jijnáhan ró te cucuíhyá ni rō, te ñayuu ñayiví chi sa cusí ni i. Te vēsú cucuíhyá ni rō, te sa ndus# ni rō jeē cóto tucu ró núū rī. 21 ñn ñahan núu cuacuyajni scácu ña, te jéhnde chíji ña, chi je ni quee hora jeē scácu ña. Te núu je ni scácu ña sūchi lúli, te tuá nahán ña jeē ní ndoho ña, chi cúsi ni ña jeē ní cacu sēhe ña. 22 Te suni súcuan cúu jeē cándoho ró vijna, chi cácuíhyá ni rō jīn rí. Te jecu-ni quivī te coto jnáhan tucu yó, te cusí ndasí ni rō. Te ni ñn ma cúu casí jeē cúsi ni rō.

23 'Te quivī ún chi tú na vé cacān gā rō nuū rī. Chi jendaá cahán rī jīn ró jeē nuū maá Tátá rī cacān rō, te sáha ya ndihi jeē cájicān rō, siquī jeē cácañdije ró rúhū. 24 Nde vijna te ná tu cacān rō nuū Tátá rī jeē jīn síhví rí. Te vijna te na quéejé ró cacān rō jīn síhví rí, te nihīn rō, návāha cusí ndasí ni rō.

Je ni quende yā poder ndihi jeneé cáhīyo ini ñayiví

25 'Tāca jnūhun yáha ní cahān yatá rí jīn ró. Te quee quivī jeē ma cahán yatá gá rī jīn ró, chi sa suhva castūhun cájī rí nuū rō siquī Tátá rī. 26 Te quivī ún chi cacān rō nuū Tátá rī siquī jeē cácañdije ró rúhū. Te tu cáhān rī jīn ró jeē cacān tahú rī jehē rō nuū Tátá rī. 27 Chi máá Tátá rī je cúndáhú ni yā rohó siquī jeē cáhīyo manī rō jīn rí, te ni cacandije ró jēē ndé nuū maá yá vēji rí. 28 Ni quenda ri nde nuū Tátá rī, te ni quee rī ini ñayiví. Te vijna te quenda ri ini ñayiví, te nuñuñu tucu ri nuū Tátá rī. Achí yá.

29 Te ni cacahān tēe cáscuáha jīn yá:

Vijna te cáhān cají ní, te tuá cahán yatá ní. 30 Vijna te cájini na jēē jini ni ndivii cuiti, te tuá jini ñúhún jēē cájnūhún ni ñn ná níhín. Jeē yúcuan cácañdije ná jēē vēji ní ndé nuū Yaā Dios. Achí de.

31 Te ni cahān Jesús jīn de:

¿A ndé vijna te cácañdije ró naún? 32 Te quiji quivī, te je ni quee, jeē cuité núu ró quínungoo ró ná vehe ná vehe ró, te stóo máñúhún ró ruhū. Te nasūu jēē quéndōo máñúhún rí, chi Tátá rī íne ya jīn rí. 33 Tāca jnūhun yáha ní cahān rī jīn ró návāha coo ndeyí coo sí ni rō siquī jeē cácañdije ró rúhū. Ini ñayiví chi cánuú coto ró jnúndóho. Te vēsú súcuan te na cóo sí ni rō, chi je ni quende rī poder tāca jéneé cáhīyo ini ñayiví. Achí yá.

Jeē ni jicān tahú Jesús jehē ñayuu cácañdije

17

¹ Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátā, je ni quee quiví jeē ndóho ná. Vijna te stéén ni jéē cujéhnú máá ná jeē cúu ná Séhe ní, návāha suni máá ná steén na jéē cujéhnú máá ní. ² Chi ni sáha ní jéē ndíso jníñu ná síquī tāca ñáyuu, návāha tāca ñáyuu jeē ní jéhe ní núu ná, cotecu i ní cání sáha ná. ³ Te suhva cúu jnúhun cotecu i ní cání: suu jeē na cúni i níhín jéē mañúhún-ni ní cúu Yaā ndaā, jín jéē cúni i sãña jeē cúu ná Jesucristo, Yaā ní tají ní.

⁴ Je ni steén na núu ñáyuu ñayiví jéē cujéhnú ní, te je sínu ná jniñu ní ndacu ní núu ná. ⁵ Te vijna, Tátā, sáha ní jéē ndujéhnú tucu ná ndé nuū néne ní, nájñuhun cújéhnú ná jín ní nde ná tu jecōo ñayiví.

⁶ Ñayuu jeē ní nacāji ní ini ñayiví, ni jéhe ní i nuū ná, te ni steén na núu i ndese Yaā cúu ní. Cuenta maá ní cúu i, te ni jéhe ní i nuū ná. Te ni cajetáhú i jnúhun ní, te ni casquícu i. ⁷ Te vijna te cájini i jeē ndé nuū maá ní vĕji tāca jéē iyó jín ná. ⁸ Chi tāca jnúhun ni cahān ni jín ná, ní castúhun ná núu i, te ni cajetáhú i. Te ni cajini i jeē ní quenda ndije ná ndé nuū maá ní, te ni cacandíje i jeē maá ní ni tají sãña.

⁹ Te jícán tahú na jéhē maá i jínáhan i. Tu jícán tahú na jéhē ñáyuu ñayiví jéē tu cácdíje, chi sa jehē maá ñáyuu ni jéhe ni núu ná, chi cuenta maá ní cácuu i. ¹⁰ Te tācá i jeē yíhi i ndaha máá ná, suni cuenta maá ní cúu. Te tācá i jeē cúu i cuenta maá ní, suni cuenta maá ná cúu i. Te cástéén i ndese cújéhnú ná.

¹¹ Te tuá condee ná ini ñayiví. Te máá i chi quendōo i ini ñayiví, te máá ná chi najeē ná condee na jín ní. Yaā i Yaā ndoo cúu ní, Tátā. Te jín poder ní condito ní tāca ñáyuu ni jéhe ni núu ná, návāha inuú na cóo ni i jínáhan i, nájñuhun cúu máá yó. ¹² Te jeē ní condee na jín i ini ñayiví, te jín poder ni ní condito ná i. Tāca ñáyuu ni jéhe ni núu ná, ni condito yúcún ná i. Te tu ní jéhe na jnúhun naa i jínáhan i, chi

máá in-ni tēe jeē je cúu de tēe jnahnú ndetū, návāha squícu jnúhun yósó núu tútu i.

¹³ Te vijna te najeē na núu ní, te cáhán na tāca jnúhun yáha jín i níni jéē íne ga ná ini ñayiví, návāha na cóo sĕ ndasí ni i nájñuhun cúsi ni maá ná. ¹⁴ Ni castúhun ná jnúhun ní núu i. Te ni caquiti ni ñayuu ñayiví núu i, chi tuá cácuu i cuenta ñayiví, nájñuhun máá ná tu cúu ná cuenta ñayiví. ¹⁵ Te tu jícán tahú na jéē quénehen ní i ini ñayiví, chi sa suhva jeē cóndito ní i nuū jexeén. ¹⁶ Nasūu cuenta ñayiví cácuu i, nájñuhun máá ná jéē násūu cuenta ñayiví cúu ná. ¹⁷ Jín jnúhun ndaā ní te sáha ní jéē coo ndoo coo i i nuū ní. Tāca jnúhun cáhán maá ní cúu jnúhun ndaā. ¹⁸ Te nájñuhun ni tají ní sãña ní quiji ná ini ñayiví, suni súcuan tají ná i nacani i jnúhun ní núu ñáyuu ñayiví. ¹⁹ Te jehē maá i cúu jeē jéhe ná máá ná cuu ná, návāha suni máá i coo ndoo coo i i nuū ni jéē jín jnúhun ndaā.

²⁰ Te nasūu máá in-ni jehē ñáyuu yáha jícán tahú na, chi suni jehē tāca gá ñáyuu jeē candíje i sãña núu na cúni sōho i jnúhun jeē nacani máá i jínáhan i. ²¹ Te jícán tahú na jéē inuú na cóo ni i jínáhan i. Nájñuhun in-ni cúu ní jín ná, Tátā, te in-ni cúu ná jín máá ní, suni súcuan na cóo inuú i jín yó. Te cúni na jéē inuú na cóo ni i, návāha na cácdíje ñáyuu ñayiví jéē maá ní ni tají ní sãña. ²² Ni sajehnú ná i nájñuhun ni sajehnú ní sãña, návāha inuú na cóo ni i, nájñuhun inuú-ni cúu yó. ²³ Te ndúu ná jín i, te ndúu ní jín ná, te súcuan te inuú cuiti coo ni i jínáhan i. Yūcuán na te cuni ñayuu ñayiví jéē maá ní ní tají ní sãña, jín jéē maní ndasí ní jín i nájñuhun maní ni jín ná.

²⁴ Tátā, máá ní ni jéhe ní i nuū ná. Te cúni na jéē cóyúcú i jín ná nuū cóndee ná, návāha coto i ndese luu cújéhnú ná ni sáha ní. Chi iyó maní ndasí ní jín ná nde ná tu jecōo ñayiví te nde vijna. ²⁵ Yaā ndaā cúu ní, Tátā, te ñayuu ñayiví tu jín i níhín, te máá ná chi jín na níhín. Te ñayuu yáha chi cájini i jeē maá ní ni tají sãña. ²⁶ Ni

steén na núū i jíjnáhan i ndese Yaá cúu ní. Te stéén gā na súcuan nuū i, návāha na cóo manī ndasí i jíjnánhan i, nájñūhun íyó mánī ndasí ní jíjnáná, te návāha condee ná ini anuá i. Achí yá.

Jeē ní cajñi de Jesús
(Mt. 26.47-56; Mr. 14.43-50; Lc. 22.47-53)

18

¹ Te nuū ní cuu ni cahān Jesús tāca jñūhun yáha, te ni quenda ya jíjn tēe cáscuáha jíjn yá, cuahān yā inga lado yuu Cedrón. Te yūcuan íyó ññ huerto nuū ní quívi ya jíjn tēe cáscuáha jíjn yá. ² Te Judas, tēe jeē nastúu de ya, suni jíjn de lugar un, chí cuehē jínu ni nataca Jesús yūcuan jíjn tēe cáscuáha jíjn yá. ³ Te ni jinū de yūcuan jíjn ññ grupo soldado jíjn jecu policía cándito templo, jeē ní catají sutū cáscujéñnu jíjn tēe grupo fariseo. Te cándiso de machete, te cájnñi de linterna jíjn yiti. ⁴ Te Jesús je jíjn yā tāca jñúndóho jeē véji siquī yā. Te ni quenda ya ichi núu de, te ni cahān yā:

¿Ndé ññ cánanducú ró?

⁵ Te ni cacahān de jíjn yá:

Jesús tēe ññ Nazaret cánanducú rí.

Te ni cahān yā:

Máá rí cúu.

Te Judas, tēe jeē nastúu de ya, suni íne de jíjn tēe ún. ⁶ Te jeē súcuan ni cahān yā, máá rí cúu, te ni cajica yátá de, te ni cacotúu-ni de. ⁷ Yūcuán na te ni cajñūhún tucu ya de:

¿Ndé ññ cánanducú ró?

Te ni cacahān de:

Jesús tēe ññ Nazaret.

⁸ Te ni cahān Jesús:

Je ni cachi rí jeē máá rí cúu. Te núu ruhū cánanducú ró, te máá-ni rí jññ ró, te tēe yáha na quíngoo de. Achí yá.

⁹ Súcuan ni cuu návāha na squícu jñūhun jeē ní cahān yā jíjn Tátá yā: Tu ní jéhe na jñūhun naa ni ññ tēe jeē ní jéhe ni núū na, áchí yá. ¹⁰ Te Simón Pedro ndíso de ññ espada. Te ni tava de, te ni jehnde de sōho lado váha ññ tēe nání Malco. Te tēe un cúu de mozo máá sutū cújéñnu. ¹¹ Te ni cahān Jesús jíjn Pedro:

Nachuvāha espada rō ini cubierta. ¿A tu cánuú jēe ndóho rí jñūndóho yáha jeē ní sándaā Tátá rí jeē ndóho rí? Achí yá.

Jeē ní indichi Jesús nuū sutú cújéñnu
(Mt. 26.57-58; Mr. 14.53-54; Lc. 22.54)

¹² Yūcuán na te tācá soldado un, jíjn capitán de, jíjn táca policía tēe hebreo un, ni cajñi de Jesús, te ni cajihni de ya. ¹³ Te xihna gā vehe Anás cuangoo de jíjn yá. Te tátá chíso Caifás cúu Anás. Te Caifás cúu máá sutū cújéñnu ga cuiyā ún. ¹⁴ Te suu de ni cachi nuū jñáhan de hebreo jeē cánuú jēe cúu ññ tēe jehē nación de.

Jeē ní cachi Pedro jeē tu jíjn de ya
(Mt. 26.69-70; Mr. 14.66-68; Lc. 22.55-57)

¹⁵ Te Simón Pedro jíjn inga tēe scuáha, cándiquñ de Jesús cuangoo de yatā yā. Te inga tēe scuáha ún chí jíjn jñáhan de jíjn sutū cújéñnu. Jeē yúcuán ní quívi de jíjn Jesús ini patio vehe sutū cújéñnu ún. ¹⁶ Te Pedro ni quendōo de yatā yehyí. Te máá tēe scuáha jēe jíjn jñáhan jíjn sutū cújéñnu ún, ni quenda de ni cahān de jíjn ññ nahan ndíto yéhyí, te ni squívi de Pedro ini patio. ¹⁷ Yūcuán na te ññ nahan ndíto yéhyí un ní cajñūhún ññ Pedro:

¿A násūú ññ tēe scuáha jíjn tēe indichi nuū sutú un cúu ró?

Te ni cahān de:

Nasūu cúu rí, achí de.

¹⁸ Te tāca mozo jíjn policía un ní cascáyú de ññhūñ jíjn tícāyí, chí mñjin sáha. Te cáhñ de cánañ de. Te suni indichi Pedro, násaā de jíjn táca tēe ún.

Jeē ní stíchí sutú cújéñnu ún Jesús
(Mt. 26.59-66; Mr. 14.55-64; Lc. 22.66-71)

¹⁹ Te sutú cújéñnu un ní stíchí de Jesús ndé-ni cúu tēe cáscuáha jíjn yá, jíjn na jñūhun cúu jeē steén yā. ²⁰ Te ni cahān Jesús:

Níní ní cahān rí nuū chitú ññayuu, ni cajini sōho ndíhi ññayuu. Te níní ní steén rí jñūhun ini tācá vehe ññ sinagoga jíjn ini templo cáhnu nuū ndutútú ndívi jñáhan yó hebreo. Te

tú ni ñn jnūhun ní cáhán sáhi rí. ²¹ ¿Te naun cájnūhun ró ruhū? Cajnūhun ñáyuu ní cajini sōho jnūhun ni cahān rī, te máá i cachi ndese ni cahān rī. Chi cájini i ndese ni cahān rī.

²² Te jeē ni cáhān Jesús súcuan, te ñn policía ndíto templo jeē índichi de yūcuán, ní cani-ni de nuū yā. Te ni cahān de jíin yá:

¿A súcuan cáhān rō jíin sūtū cujéhu naún?

²³ Te ni cahān Jesús:

Núu ni cahān rī ñn jnūhun néé, cachi na jnūhun néé ní cahān rī. Te núu tu ní cáhān rī ñn jnūhun néé, ¿te naun cáni ró rúhū? achí yá.

²⁴ Yūcuán na te Anás, sutū cujéhu un, ní tají de ya, núhni yā cuahān yā nuū Caifás, tēe cúu máá sūtū cujéhu ga.

Jeē ní cachi tucu Pedro jeē tu jíni de ya

(Mt. 26.71-75; Mr. 14.69-72; Lc. 22.58-62)

²⁵ Te níni jéē súcuan cúu, te índichi-ni Pedro, násaā de yuñuhún. Te ni cacahān jíin de:

¿A násūú ñn tēe scuáha jíin tēe un cúu ró, chí naún?

Te máá de tu ní cáchi de:

Nasūu cúu ri, achí de.

²⁶ Yūcuán na te ñn mozo sutū cujéhu, jnāhan tēe jeē ní jehnde Pedro sōho, ni cahān jíin de:

¿A násūu máá ró cúu jeē ní jito ri jíin de ini huerto?

²⁷ Te Pedro tu ní cáchi tucu de. Te ni cana-ni líhli.

Jeē ní índichi Jesús nuū Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yūcuán na te ni quendacoo de jíin Jesús vehe Caifás, cuango de jíin yá nde palacio tēe nación Roma jeē cúu gobernador. Te je cuacundijin. Te ñayuu hebreo tu ní quívicoo i ini palacio, návāha tu stívi i ley i jeē cahān jeē ma quívi i ini vehe ñn ñayuu jeē násūú hebreo cúu. Chi núu súcuan te ma cúu cuxíni i vico pascua jeē cóo inga quívi ún. ²⁹ Yūcuán na te ni quenda Pilato, tēe cúu gobernador, ni cahān de jíin i jíināhan i:

¿Na cuēchi cájicān rō siquī tēe yáha?

³⁰ Te ni cacahān i:

Núu jeē násūu tēe cúnéé cúu tēe yáha, te ma jnī ná de jeē quíndeca ná de nuū ni núú, achí i.

³¹ Te ni cahān Pilato:

Cuángoo jíināhan ró, te sándaā rō siquī de jíin ley cánevāha máá ró.

Te ni cacahān ñayuu hebreo un:

Máá ná jeē cácuu ná ñáyuu hebreo, tú na permiso cánevāha ná jéē cáhni ná ni ñn ñayuu.

³² Súcuan ni cacahān i návāha squícu jnūhun jeē ní cachi Jesús jeē quívi ya ndaha tēe Roma te cahni de ya jíicā cruz. ³³ Te ni ndívi Pilato ini palacio, te ni cana de jeē na quíji Jesús. Te ni cajnūhún de ya:

¿A máá ró cúu Rey ñayuu hebreo naún?

³⁴ Te ni cahān Jesús jíin de:

¿A cájnūhun ró ruhū jeē súcuan jéni ni maá ró, chí jéē ní cacastūhun ñáyuu hebreo nuū rō?

³⁵ Te ni cahān Pilato:

¿Chí tēe hebreo cúu ri jeē cúni rī? Ñayuu nación maá ró jíin sūtū cácujehu ni cachihí rōhó ndaha ri. ¿Na vé ni sáha ró núu súcuan? Achí de.

³⁶ Te ni cahān Jesús:

Nasūu jéē ndácu ri jniñu návāha jnūhun cándacu tāca rey ñayívi yáha. Chi núu jeē ñáyuu ñayívi ní casáha jeē cúu ri rey, yūcuán na te tēe cándiquín ruhū, cuajnáhan de návāha ma quívi ri ndaha jnāhan ri hebreo nuú. Te nasūu núu ñayívi yáha cúu jeē ndácu ri jniñu vijna. Achí yá.

³⁷ Yūcuán na te ni cahān Pilato jíin yá:

¿Te á ñn rey cúu ró jéē súcuan?

Te ni cahān Jesús:

Rey cúu ri, návāha jnūhun cáhān rō. Ni quíji ri ni cacu ri ini ñayívi yáha návāha nacani ri jnūhun ndaā. Te ndíhi ñayuu cájetáhú jnúhun ndaā, cájini nahín i jnūhun cáhān rī. Achí yá.

³⁸ Te ni cahān Pilato:

¿Ndese cuni yō ndé ñn cúu máá jnūhun ndaā?

Jeē ní cundaā jeē cúu yā

(Mt. 27.15-31; Mr. 15.6-20; Lc. 23.13-25)

Te jeē ni cáhān de jnūhun yáha, te ni quenda tucu de nuū ñáyuu hebreo. Te ni cahān de jíin i:

Tú cuiti na cuēchi níhín rī síquī de. ³⁹ Te íyó costumbre maá ró jijnáhan ró jeē vico pascua te siaá rī ñn tēe íne vecāa nuū rō. ¿Te á tu cáconi rō jeē siaá rī Rey rō nuū rō? Achí de.

⁴⁰ Yūcuán na te ndivii i ni cacana jee tucu i:

Ma siaá ni tēe jíñá, chí Barrabás siaá ni, áchí i.

Te tēe cuíhná cúu Barrabás.

19

¹ Yūcuán na te ni cahān Pilato jeē na jññ soldado Jesús, te caní de ya jíin cuarta ññ. ² Te ni casáha de ñn corona iñu, ni cachuhun de xinī yā. Te ni cachuhun de ya ñn sahma cuehé ndíhí jeē cúu sahma rey. ³ Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

⁴ Yūcuán na te ni quenda Pilato inga jíinu, te ni cahān de jíin ñáyuu:

Yāhá condēhe ró tava rī de, návāha na cúni rō jeē tú na cuēchi níhín rī síquī de.

⁵ Te ni quenda Jesús, ñūhun ya corona iñu jíin sahma cuehé ndíhí un. Te ni cahān Pilato jíin i:

Yāhá condēhe ró de jíjnáhan ró.

⁶ Te nuū ní cajito sutū cácujeñnu jíin táca policía nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najññ máá ró de te cahni rō de. Chí ruhū, tú na cuēchi níhín rī síquī de.

⁷ Te ni cacahān ñayuu hebreo un:

Cáneváha ná ñn ley, te jeē síquí ley un cánuú jeē cúu de, chí sáha de máá de jeē Séhe Yāā Dios cúu de.

⁸ Te jeē ní jini sōho Pilato jnūhun yáha, te víhyá gā ni yūhú de. ⁹ Te ni ndivicoo tucu de ini palacio, te ni cajññhún de Jesús:

¿Ndé nuū véji ró?

Te tu ní cáhān cuiti Jesús jíin de. ¹⁰ Yūcuán na te ni cahān de jíin yá:

¿Naun tu cáhān rō jeē cahān rī? ¿A tu jíin rō jeē ndiso jññu ri jeē cáhni rī rohó jicā cruz, te suni ndiso jññu ri jeē siaá rī rohó quíhín rō?

¹¹ Te ni cahān Jesús:

Núu tu ní sáha Yāā Dios jeē ndiso jññu ró, te tú na vé cúu sáha ró síquī rī. Jeē yúcuan tēe jeē ní nacuāha ruhū ndaha ró, cuēchi xeēn gā condee síquī de vésú maá ró. Achí yá.

¹² Yūcuán na te nde hora un ndúcu ndéyí Pilato ndese siaá de ya. Te ñayuu hebreo chí cacana jee i:

Núu siaá ni tēe jíñá, te tu cúu ní amigo rey Roma jeē cujéñnu ndácu jññu núu súcuan. Chí táca tēe jeē sáha de rey maá de, núu súcuan te cúu de enemigo síquī rey un. Achí i.

¹³ Te jeē ní jini sōho Pilato jnūhun yáha, te ni ndacu de jññu jeē na quenda Jesús ini vehe quiji ya. Te ni cucōo de silla nuū cúndaā jññu, nuū máni máá yūu ni jecāva, te lugar un nání Gabata nuū yúhu hebreo. ¹⁴ Te cuacuu cahuxī uū, te jehíni quivī ún quejéé vico pascua. Te ni cahān Pilato jíin ñáyuu hebreo:

Yāhá índichi maá rey rō.

¹⁵ Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jeē cata caa rī rey rō jicā cruz naún?

Te sutū cácujeñnu un ní cacahān de:

Tuá na inga rey cánevāha ná jíjnáhan ná, chí máá-ni rey Roma jeē cujéñnu ndácu jññu nuū ná.

¹⁶ Yūcuán na te Pilato ni nacuāha de ya nuū i jeē na cúu yā jicā cruz. Te ni cajññ i ya cuango i jíin yá.

Jeē ní cacata caa de ya jicā cruz

(Mt. 27.32-44; Mr. 15.21-32; Lc. 23.26-43)

¹⁷ Te ni quenda Jesús, ndiso ya cruz yā, cuango de jíin yá ñn lugar nuū naní Yiquí Xíní, te nuū yúhu hebreo naní Gólgota. ¹⁸ Te yúcuan ní cacata caa de ya jicā cruz. Te suni ni cacata caa de uū tēe nuū uū gā cruz, ñn ñn

de ñn lado yā, te máá Jesús mēhñú.
 19 Te suni ni ndacu Pilato jniñu jeē na
 cóndee jnūhun xinī cruz yā, jeē cahán:
 Tēe yáha cúu Jesús ñuu Nazaret, Rey
 ñayuu hebreo, achí. 20 Te cuehē ñayuu
 hebreo ni cacahu i jnūhun yáha, chi
 máá yajni yuñúú cúu nuū ní cacata
 caa de ya. Te jnūhun un yósó jíin yuhu
 hebreo jíin griego jíin latín. 21 Te tāca
 sūtū cácujeñnu nuū ñayuu hebreo, ni
 cacahán de jíin Pilato:

Ma tée ní jéē cúu de Rey ñayuu he-
 breo, chi sa suhva tee ní jéē máá de ni
 cahán jeē cúu de Rey ñayuu hebreo.

22 Te ni cahán Pilato:

Ma násama ri jeē jé ni ndacu ri jniñu
 ni jecondee.

23 Te soldado un, nuū ní cuu ni
 cacata caa de Jesús jicā cruz, te ni
 caquihin de sahma ya, te ni cajehnde
 de ni nduu cuñ parte, te ñn ñn parte
 ni cuu ñn ñn soldado un. Te suni ni
 caquihin de camisa yā. Te camisa un
 tu ní quícu, chi ni cunu ní. 24 Te ni
 cacahán máá de:

Ma cáhnde yō, chi vāha ga na sáha
 yó sorteo, te na cóndēhe yó ndé ñn yó
 níñn, achí de.

Te súcuan ni squícu jnūhun yósó núū
 tútu ñi nde jenahán jeē cahán Jesús:
 Ni caquihin de sahma ri cuu máá de.
 Te ni casáha de sorteo siquī camisa rī.
 Achí. Súcuan ni casáha soldado un.

25 Te yajni cruz nuū ndíta caa Jesús
 íne náná yā, jíin cúhū ña María ñasihí
 Cleofas, jíin María ñuu Magdala. 26 Te
 ni jito Jesús nuū naná yā jíin núū tée
 scuáha jeē maní gā yā jíin, suni índichi
 de yūcuán. Te ni cahán yā jíin náná yā:

Nánā, nde vijna te máá de nucuññi
 de cuu de sēhe ní.

27 Yūcuán na te ni cahán yā jíin tée
 scuáha ún:

Nde vijna te cuu ña nájñūhun náná
 rō, achí yá.

Te nde hora un ní cana de ña cua-
 condee ña vehe de condito de ña.

Jeē ni jihī Jesús
 (Mt. 27.45-56; Mr. 15.33-41;
 Lc. 23.44-49)

28 Yūcuán na te ni jini Jesús jeē jé ni
 jīnu tācá jniñu jeē cánuú ndoho ya. Te

návāha squícu jnūhun cáhán tutu ñi, te
 ni cahán yā:

Jíchí rī ndute, achí yá.

29 Te yūcuan íin ñn tīndohō ñūhun
 chitú vinagre iyá. Te ni cachundaji de
 ñn cachī nuū vinagre un, te ni catee
 de xinī ñn ndaha yújnu hisopo, te ni
 catee de yuhu ya jeē cóho ya. 30 Te ná
 ni jihī ya vinagre un, te ni cahán yā:

Je ni jīnu, achí yá.

Te ni cāyí-ni xinī yā, te ni jihī-ni ya.

Jeē ní cují soldado lanza xiin ya

31 Te inga quivī ún coo vico pascua.
 Te tēe hebreo tu cácuñi de jeē cóndita
 caa ndīyí ún jicā cruz quivī ndétátú
 un. Chi quivī ndétátú jeē cúu vico
 pascua, ñi ndasí gá vēsú tāca gá quivī
 ndétátú. Te ni cacahán de jíin Pilato
 jeē na ndácu de jniñu jeē jnahnú sīñn
 tēe cándita caa, te na cújiyo de jicā
 cruz. 32 Te ni quecoo soldado, te ni
 cajehnū de sīñn ñn tēe jeē ndíta caa
 jíin yá, te suni súcuan inga de. 33 Te
 nuū ní quecoo de nuū Jesús, te ni
 cajito de jeē jé ni jihī yā. Jeē yūcuan
 tu ní cájehnū de sīñn ya.

34 Te ñn soldado chi ni cují de lanza
 xiin ya, te ni cane-ni ñññ jíin ndute.

35 Te máá rí jeē tée tutu yáha, ni jito
 ri jeē súcuan ni cuu, te nácani ndaā
 rī jnūhun ndese ni cuu. Te jíin rī jeē
 iyó ndaā jnūhun cáhán rī, návāha suni
 candíje máá ró jijnáhan ró. 36 Chi
 súcuan ni cuu návāha squícu jnūhun
 cáhán tutu ñi: Ma cahnú de ni ñn yiqui
 ya, achí. 37 Te suni inga jnūhun cáhán
 tutu ñi: ñn quivī te coto i nuū Yaā jeē
 ní cují i lanza, achí.

Jeē ní quindūji Jesús
 (Mt. 27.57-61; Mr. 15.42-47;
 Lc. 23.50-56)

38 Te ni cuu tāca jéē yáha. Te íyó
 ñn tēe ñuu Arimatea jeē naní José, te
 cúu de tēe cándíje Jesús. Te yuhu-ni
 cándíje de, chi yúhú de jnáhan de he-
 breo. Te ni cahán ndahú de jíin Pilato
 jeē na cuáha jnūhun quihin de yiqui
 cúñu Jesús. Te ni jēhe Pilato jnūhun.
 Yūcuán na te cuahán José, ni snúu
 de yiqui cúñu Jesús. 39 Te suni ni
 jinū Nicodemo, tēe ni quiji nuū Jesús

in jecuáa. Te ndiso de nájnūhun ocō uxī kilo sūje uvuā jeē ní saca jnāhan jíin yúcū áloe. ⁴⁰ Te ndindúú de ni caquihin de yiqui cúñu Jesús, te ni cachusúcun de jíin tira sahma jeē ní quívi yucū jeē jeén asin ún, nájnūhun íyó costumbre maá ñáyuu hebreo jeē cáchindūji i ndīyi. ⁴¹ Te yajni nuū ní jíihí Jesús íyó in huerto. Te nuū huerto un ndéé in yaū jeē ní caan jeé jicā in cava, nuū ná tu quindūji ndīyi. ⁴² Te yūcuan ní cachindūji de Jesús, chí íne yajni yaū ndīyi ún. Chí je yajni quejéé quívi ndétátú de jeē cácuu de ñayuu hebreo, te tú na ley chindūji de ndīyi núu je ní quejéé quívi ún.

Jeē ní natecu Jesús
(Mt. 28.1-10; Mr. 16.1-8; Lc. 24.1-12)

20

¹ Te jenéhen quívi domingo ní jinū María ñuu Magdala nuū ní yindūji Jesús, te yínee gā cúu. Te ní jito ña jeē ní cujiyo yuū ndihyú yuyáú ndīyi. ² Yūcuán na te jíinu ña cuahān ña nuū Simón Pedro jíin núu inga tēe scuáha ún jeē maní gā Jesús jíin. Te ní cahān ña jíin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

³ Te ní quendacoo Pedro jíin inga tēe scuáha ún, cuácondēhé de yaū ndīyi. ⁴ Te cájini tayí ndindúú de. Te inga tēe scuáha ún, níhin ga ní jinū de vésú Pedro. Te xihna gā de ní jinū yaū ndīyi. ⁵ Te ní scáyí de máá de, te ní jito nihni de ini yaū. Te ní jito de jeē tira sahma un cáyūcu máá na. Te tu ní quívi de. ⁶ Te sáá te ní jinū Simón Pedro jeē ndiquín jnāhan de vēji de jíin inga tēe ún. Te ní quívi de nuū ní yindūji Jesús. Te suni ní jito de jeē tira sahma cáyūcu máá na. ⁷ Te ní jito de sahma jeē ní ñúsúcun xíní Jesús, tu catú jíin tira sahma, chí ní natuu te catú sín. ⁸ Yūcuán na te suni ní quívi inga tēe scuáha jeē ní jinū xihna gā nuū ní yindūji ya. Te ní jito de ndese íyó, te ní candíje de jeē ní natecu yā. ⁹ Chí nde ná tu jinūcoo de yaū ndīyi, te tu ní

jécūhun ní de jnūhun cáhān tutu íi, jeē jíini ñúhún natecu yā núu je ní jíihí yā. ¹⁰ Yūcuán na te ndindúú tēe cáscuáha ún cuanungoo de vehe de.

Jeē ní nane ya nuū María ñuu Magdala
(Mr. 16.9-11)

¹¹ Te María índichi ña ndáhyú ña nuū ní yindūji ya. Te níni ndáhyú ña, te ní scáyí ña máá ña, ní jito nihni ña ini yaū ún. ¹² Te ní jito ña uū ndajéhé andiví, cáñuhun ya sahma cuijín. Te in ya néne ichi xíní, te inga ya néne ichi núu jehé nuū ní catu yiqui cúñu Jesús. ¹³ Te ní cacahān yā jíin ña:

¿Najehē ndahyú rō?

Te ní cahān ña:

Ni catava de Jitoho ná, te tu jíini na ndé nuū ní cachune de ya.

¹⁴ Te jeē ní cahān ña súcuan, te ní ndió cóto ña, te ní jito ña nuū Jesús jeē índichi yā yūcuán. Te tu ní nácuni ña jeē máá yá cúu. ¹⁵ Te ní cahān yā jíin ña:

¿Najehē ndahyú rō? ¿Ndé in nánducú ró? achí yá.

Te máá ña jéni ní ña jeē tēe ndíto huerto cúu ya. Te ní cahān ña jíin yá:

Núu máá ní ní quenehen ní yá, te cachi ní ndé nuū ní jéchune ní yá, te na quínuquihin ná yá, achí ña.

¹⁶ Te ní cahān Jesús jíin ña:

María, achí yá.

Te jeē ní cahān yā súcuan, te ní nácuni ña ya, te ní ndió cóto ña, te ní cahān ña jíin yuhu hebreo:

Raboni, achí ña. Te jnūhun un cúní cahān, Maestro.

¹⁷ Te ní cahān Jesús jíin ña:

Ma quehé ró rúhū, chí ná tu ndaa ri quinhun rī nuū Tatá rī. Te cuáhān núu tēcá hermano rī, tēe ní cascuáha jíin rí, te cachi rō nuū de jeē ndaa ri quinhun rī nuū Tatá rī, jeē suni Tátá maá ró jijnāhan ró cúu. Te cúu ya Yaā Dios maá rí jíin Yaā Dios maá ró jijnāhan ró. Achí yá.

¹⁸ Yūcuán na te María ñuu Magdala un, cuáhān ña, te ní castūhún ña nuū tēe cáscuáha un jéé ní jito ña nuū máá Jitoho yō jíin jéé ní cahān yā jnūhun yáha jíin ña.

Jeē ní nane ya nuū tée cáscuáha jíin yá

(Mt. 28.16-20; Mr. 16.14-18; Lc. 24.36-49)

¹⁹ Te jeē ní cuaa máá quíivī domingo un, te cáhīin tūtú tée cáscuáha ún ini ñn vehe. Te cándihyū yehyí, chí cáyūhú de jnáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vēsú ndihyú yehyí, te ni cahān yā jíin de:

Ndeyí sñ coo ni rō jijnáhan ró, áchí yá.

²⁰ Te ná ni cahān yā súcuan, te ni steén yā ndaha ya jíin xiin ya nuū de. Te ni cacusiñi ni tēe cáscuáha un jēē ní cajito de nuū máá Jítoho yō. ²¹ Yūcuán na te ni cahān tucu Jesús:

Ndeyí sñ coo ni rō jijnáhan ró. Te nájnūhun ni tají Tátá rī ruhū ini ñayīvī, suni súcuan tájí rí rohó nacani ró jnūhun ri nuū ñáyuu. Achí yá.

²² Yūcuán na te ni tīvi tachī yā nuū de jíin de. Te ni cahān yā:

Vijna te ni canihīn rō Espíritu Santo.

²³ Te tāca ñáyuu jeē cone cáhnu ni rō nuū cuéchi i, núu súcuan te coo jnūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jnūhun cáhnu ni nuū cuéchi i. Achí yá.

Jeē ní nane ya nuū Tomás

²⁴ Te Tomás, tēe ni cacu cuatí, ñn jnáhan jeē uxí uū tēe cáscuáha jíin yá, tu ní íne de quíivī jeē ní nane Jesús nuū tāca gá tēe cáscuáha. ²⁵ Yūcuán na te sava ga tēe cáscuáha un, ní cacahān de jíin Tomás:

Ni cajito ri nuū máá Jítoho yō.

Te ni cahān Tomás:

Núu tú coto ri nuū ni túji ndaha ya ní sáha ndūyu cāa, te núu tú chune ri xinī ndáha ri nuū ní íne ndūyu cāa, te núu tú chune ri ndaha ri xiin ya, te ma candíje cuítī rī, achí de.

²⁶ Te nuū uná quíivī, te tēe cáscuáha un cáhīin tūtú tucu de ini ñn vehe. Te íne Tomás jíin de. Yūcuán na te ni quee-ni tucu Jesús, ni jecuiñī yā mēhñú de, vēsú cándihyū yehyí. Te ni cahān yā jíin de:

Ndeyí sñ coo ni rō jijnáhan ró.

²⁷ Te ni cahān-ni ya jíin Tomás:

Chune xinī ndáha ró ini ndaha ri yáhá te coto ró. Te scáá ndaha ró, te chune ró xiin ri nuū ni tújī. Te ma cáni siquí gá ni rō, chí sa suhva na cándíje ró.

²⁸ Yūcuán na te ni cahān Tomás jíin yá:

Aī, Jítoho máá ná jíin Yaā Dios máá ná cúu ní, áchí de.

²⁹ Te ni cahān Jesús jíin de:

Tomás, nde ni jito ró núu rī, te ni candíje ró. Te yōhyo ndetū tāca ñáyuu jeē candíje ruhū vēsú tu ní jito i nuū rī, achí yá.

Najehē ni tee Juan libro yáha

³⁰ Te suni ní sáha Jesús cuehē gā jniñu jéhu jeē ní steén yā poder yā nuū tée cáscuáha jíin yá, jeē tu yósó núu tútu yáha. ³¹ Te tācá jniñu yáha ní tee ri návāha candíje ró jijnáhan ró jēe Jesús cúu Cristo, máá Séhe Yaā Dios. Chí jeē candíje ró yá, te cotecu rō ní cáni sáha ya.

Jeē ní nane ya nuū uxá tēe cáscuáha jíin yá

21

¹ Te ni cuu jecu quíivī, te inga jínu ní nane Jesús nuū tée cáscuáha jíin yá, jeē cáhīin de yumar Tiberias. Te suhva ni steén yā máá yá nuū de:

² Cáhīin tūtú Simón Pedro, jíin Tomás, tēe ni cacu cuatí, jíin Natanael, tēe ñuu Caná ndañū Galilea, jíin ndindúú séhe Zebedeo, jíin úu gā tēe cáscuáha.

³ Te ni cahān Simón Pedro jíin de jíin de:

Quíjnī ri chācá.

Te ni cacahān de:

Suni quingoo ri jíin ró.

Te cuangoo de, te ni quíivīcoo de ñn barco. Te tu ní cánihīn cuítī de tí jecuáa yúcuan. ⁴ Te jeē cuácundijin, te íne Jesús yumar. Te tēe cáscuáha ún, tu ní cánacuni de jeē máá yá cúu.

⁵ Yūcuán na te ni cahān yā jíin de:

Aá rō jijnáhan ró, ¿á ní canihīn rō chācá caji yō?

Te ni cacahān de:

Tú cuítī, achí de.

⁶ Yūcuán na te ni cahān yā jíin de:

Síngava ñunu ró ichi lado váha barco, te nihīn rō tī.

Te ni casíngava de ñunu, te tuá ní cúu cuíti natava de, jeē ní quívicoo cuehē ndasí cháca. ⁷ Yūcuán na te tēe scuáha jeē maní gā Jesús jíin, ní cahān de jíin Pedro:

Máá Jítóho yō cúu, áchí de.

Te jeē ní jini sōho Simón Pedro jeē maá Jítóho yō cúu, te ni nachuhun de sahma de, chi ni tava de jeē sájniñu de. Te ni ndava-ni de nuū mar cuahān de nuū yā. ⁸ Te tāca gá tēe cáscuáha ún, vendicoo de jíin barco yundúte, cástaa de ñunu ñuhun chitú cháca. Chi tu jícá cáhīn de jíin ñuhun íchi, chi nájnūhun ciento-ni metro cúu. ⁹ Te nuū ní quendacoo de ini barco, te ni cajito de jeē nduhvá tīcua ñuhūn, te íne staā jíin ñn chācá chíhyó. ¹⁰ Te ni cahān Jesús jíin de:

Cuáquihin jecu chācá jéē sa ní cajnií ró, na táu yó, áchí yá.

¹¹ Te ni quívī Simón Pedro ini barco, te ni stāa de ñunu, ni quee de jíin ndé nuū ñuhun íchi. Te ñuhun chitú cháca náhnu, ñn ciento uū xico uxī unī tī cúu. Te vēsú ñn súcuan tī ñuhun, te tu ní táhndé ñunu. ¹² Te ni cahān Jesús jíin de:

Nehen jijnáhan ró na cási ni yō.

Te ni ñn tēe cáscuáha ún tu ní cūndeyí ni de cajnūhún de ya núu ndé ñn cúu ya. Chi je cájini de jeē maá Jítóho yō cúu ya. ¹³ Te ni quindēhe Jesús yuñuhún, te ni quihin ya staā ún, te ni jēhe ya nuū de, te suní súcuan chācá un.

¹⁴ Yāha cúu vuelta unī jeē ní nane Jesús nuū tēe cáscuáha jíin yá, ná ni natecu yā.

Jeē ní ndajnūhún Jesús jíin Simón Pedro

¹⁵ Te nuū ní cuu ni cajesi ni de, te Jesús ni cajnūhun yá Simón Pedro:

Simón sēhe Jonás, ¿á mánī gā rō jíin rí vēsú tāca gá tēe yáha?

Te ni cahān de:

Je jíiní ní jéē maní na jíin ní, achí de.

Te ni cahān yā jíin de:

Núu súcuan te stéén rō jnūhun ri nuū ñáyuu cácuu nájnūhun londe ri.

¹⁶ Te ni cajnūhun yá de vuelta uū:

Simón sēhe Jonás, ¿á mánī rō jíin rí?

Te ni cahān de jíin yá:

Je jíiní ní jéē maní na jíin ní, achí de.

Te ni cahān yā:

Condito ró ñáyuu cácuu nájnūhun lanchi ri núu súcuan.

¹⁷ Te ni cajnūhún tucu ya de vuelta unī:

Simón sēhe Jonás, ¿á mánī rō jíin rí?

Te ni cucuíhyá ni Pedro jeē ní cajnūhun yá de vuelta unī núu maní de jíin yá. Te ni cahān de:

Máá ní jini ní ndihi, te jíiní ní jéē maní na jíin ní.

Te ni cahān yā:

Núu súcuan te stéén rō jnūhun ri nuū ñáyuu cácuu nájnūhun lanchi ri.

¹⁸ Te jendaá cahán rī jíin ró jeē nde ná suchí ró, te ni quihin máá ró sahma ró, te ni jica ró ndé nuū cuní maá ró. Te núu na yí ró, te nasūu jéē cuní maá ró, chi inga ñayuu quindēca i rōhó nuū tu cuní rō quihīn rō. Te scáa rō ndīndúú ndaha ró jéē cuu rō.

¹⁹ Jnūhun yáha ní cahān yā jeē ní stéén yā jeē cóndita caa de jicā cruz cuu de, te jeē súcuan cuatáhú de cúu jeē steén de jeē yóhyo cújéhnū Yāa Dios. Yūcuán na te ni cahān gā yā:

Condiquīn rō ruhū jeē sáha ró jniñu ní ndacu ri nuū rō, achí yá.

Jnūhun tēe scuáha jeē maní gā yā jíin

²⁰ Te ni ndió cóto Pedro, te ni jito de tēe scuáha jeē maní gā Jesús jíin, ndíquín de vēji de yatā. Tēe un cúu jeē ní conene xiin Jesús ná ni cacuxíni de jíin yá, te ni cajnūhún de ya: ¿Ndé ñn de cúu jeē nastúu níhín? ²¹ Te jeē ní jito Pedro nuū tēe ún, te ni cajnūhún de Jesús:

Te tēe yáha, ¿ndese coo jíin de?

²² Te ni cahān Jesús:

Núu cuní rī jeē cótecu de nde quívī ndíji ri, ¿te naun ndíhvī ni rō? Máá ró chi condiquīn rō ruhū jeē sáha ró jniñu ní ndacu ri nuū rō, achí yá.

²³ Yūcuán na te jnūhun yáha ní jite núu nuū tācá hermano, jeē tēe scuáha un má cúu de. Te tu ní cáhán Jesús jeē ma cúu de, chi sa suhva ni cahān

yā: Núu cúní rī jeē cótecu de nde quiivī
ndíji ri, ¿te naun ndíhví ni rō?

²⁴Te tēe scuáha un jēē maní gā Jesús
jín, suu cúu ruhū jeē nácani jnūhun
tācá jniñu yáha, te suu ri tēe tāca
jnūhun yáha. Te cájini rō jijnáhan ró jēē
iyó ndáā jnūhun nácani ri.

²⁵Te suni iyó cuéhē ndasí gá jniñu
ní sáha Jesús. Te núu tee yó ná ìn ná
ìn, te ma cánda ní ñáyiví cuhun tutu
jeē cóso jnūhun ún, jéni ni rī. Te ni cuu.
Amén.

JNIÑU JEHNU JEE NI CASAHA TEE APOSTOL

Jeē ni jéjnūhun ya quiji Espiritu Santo

¹ Amigo Teófilo, nuū tútu jeē ní tee ná xíhna gā ni castūhun ná nuū ní táca jniñu ní sáha Jesús, jín táca jnúhun ni steén yā nde quiivī ní quejéé yá ni sáha ya ² te nde quiivī ní ndaa ya cuanuhun yā andiví. Te nde ná tu ndaa ya quihīn yā, te ni sáha Espiritu Santo jeē ní ndacu ya jniñu nuū táca apóstol, tēe ni nacāji ya. ³ Te nuū ni jínu ni ndoho ya jeē ni jíhī yā, te uū xico quiivī te tijni jínu ni steén ndijin yā maá yá nuū tēe un jíjnáhan de, te súcuan ni cajini de jeē iyó ndáa jeē ní natecu yā. Te ni cahān yā jín de siquī ndese ndácu Yaā Dios jniñu.

⁴ Te ná cáhīn tútu de jín yá, te ni cahān yā jín ndihi de jeē ma quéndacoo de ini ñuu Jerusalén, chí áchí yá:

Condetu ró ndé quee Espiritu Santo jeē ni jéjnūhun maá Tátá rī Yaā Dios. Chí je ni cachi rī nuū rō jeē ni jéjnūhun ya quiji Espiritu Santo. ⁵ Chí Juan, jendaá jeē maá ndute-ni ni scuándute de ñayuu. Te róhó jíjnáhan ró, jecu na quiivī te nájnūhun cuandute ró jín Espiritu Santo, cúu jeē condee yā ini anuá rō, áchí yá.

Jeē ní ndaa Jesús cuanuhun yā andiví

⁶ Yūcuán na te tēe cáhīn tútu jín yá, ni cacajnūhún de ya:

¿A vijna te nasáha ní jéē ñayuu ñuu yō Israel ndujéhnu i ndacu i jniñu nuū nación yō chí naún? áchí de.

⁷ Te ni cahān yā:

Ma cúu cuni rō quiivī chí cuíyā jeē cóo jeē ni sándaā maá Tátá rī, chí maá ñn-ni maá yá jiní yā na quiivī sáha ya. ⁸ Te jeē cúni rō cúu jeē quee Espiritu Santo te condee yā ini anuá rō jíjnáhan ró. Yūcuán na te nihīn rō poder te nacani ró jnúhun ri ní ini

ñuu Jerusalén, ní Judea, ní Samaria, nde ní cáhnu ñayiví, áchí yá jín de.

⁹ Te ni ndihi ni cahān yā táca jnúhun yáha. Te níni cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahān yā, te tuá ni cájito de ya. ¹⁰ Te níni cáhīn de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñūhun ya sahma cuijín ní cajecuññī yā xiin de jíjnáhan de, te cájito ya nájnūhun tēe. ¹¹ Te ni cacahān yā jín de:

Róhó tēe Galilea, ¿najehē cájito ndaa ró ichi ándiví? Chí maá Yāā Dios ni naquihīn ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áchí yá.

Jeē ní canacāji de Matías jeē nucuiññī de nuū Judas

¹² Yūcuán na te ni nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jín ñuu Jerusalén, nájnūhun ñn kilómetro-ni, cūhva jeē ni jéhe ley permiso caca ñayuu quiivī ndétátú.

¹³ Te ni ndivícoo de ini ñuu. Te ni ndacoo de cuarto xiní véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jín Judas ñani Jacobo. ¹⁴ Táca tēe yáha, níni cándutútú ñnuú de cájicān tahu de jín táca ñani Jesús jín náná yā María jín sava ga ñahan.

¹⁵ Te ñn quiivī te ni jecondichi Pedro nuū táca hermano cácandíje. Te cáhīn nájnūhun ciento ocō ñayuu. Te ni cahān de:

¹⁶ Hermano jíjnáhan ní, ni squícu nahín jnúhun cáhán tutu ñi jeē ní cáhān David nde jenahán ní sáha Espiritu Santo. Te jnúhun un ní cuu siquī Judas jeē ní yosnúu núu tēe ni cajni Jitoho yō Jesús. ¹⁷ Te suu tēe un ní jica de jín yó, te ni chindéé ñahán jnáhan de jín yó siquī jniñu ní jeni ya yohó. ¹⁸ Te ni cajeen ñn ñuhun jín xúhun ní nihīn tēe un siquī

jníñu neé ní sáha de. Te ni ñinga ndeyi de, te ni ndatā sáva chíji de, te ndihí yiti de ni jitē. ¹⁹ Te ni jitē jñūhun yáha núū tāca ñáyuu cáyūcú ñuu Jerusalén, te jeē yúcuan cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta niñí. ²⁰ Chi súcuan je yósó núū tútu Salmo siquī Judas:

Vehe de na quéndō iyú,
te ma cóndee ni ñn ga ñayuu ini vehe ún.
Te suni cáhán:
Jniñu ní condiso de na cóndiso ñga tēe.

Achí.

²¹ 'Núu súcuan te jini ñúhún jéē núcuñí ñn tēe lugar maá de jíin yó. Te tēe nucuñí jíin yó un, nacāji yó de mēhñu táca tēe ni cajica jíin yó tāca quíví jeē ní jica máá Jítoho yó Jesús jíin yó. ²² Te tēe nacāji yó un cúu tēe jeē ni íyo de jíin yó nde quíví ní jendute ya ni sáha Juan, te nde quíví ní ndaa ya cuanuhun yā andiví. Te tēe nucuñí jíin yó na cúu de testigo jíin yó jeē jé ni natecu yā, achí de.

²³ Te ni catee nuū de uū jñáhan tēe: Matías jíin José jeē naní de Barsabás te suni naní de Justo. ²⁴ Te ni cajicān tahú de:

Tátā Yaā Dios, máá ní chi jíní ni ndese cáa ánuá tāca ñáyuu. Núu súcuan te jeē ndíndúú tēe yáha, stéén ni ndé ñn de cúu jeē ní nacāji ní. ²⁵ Te condiso jniñu de cuu de apóstol. Te naquihin de jniñu ní stóo Judas, chi ni sáha de cuēchi te cuahān de lugar xeēn nuū cánuú quíhín de, achí de.

²⁶ Yūcuán na te ni casáha de ñn sor-teo te ni jinū Matías, te ni nucuñí de ni nduu de jñáhan ndihúxí ñn apóstol.

Jeē ní quee Espíritu Santo

2

¹ Te máá quíví víco Pentecostés ni cahīin tútú ñáyuu cacandíje ñuu Jerusalén. ² Te sanaa-ni te ni quejéé ñhín vēji nde andiví nájnūhun tachī ñhín quée, te tāca ñáyuu jeē cáyūcú ini vehe un ní cajini sōho i jeē ñhín ún. ³ Te ni cajito i nájnūhun yáñuhūn jeē

ní cajitē núu te ni cacucōo xinī ná ñn ná ñn i. ⁴ Te ndihí i, ni cunuú Espíritu Santo jíin i, te ni quejéé i cácahān i sñn sñn yuhu, ndese ni steén maá Espíritu nuū ná ñn ná ñn i cahān i.

⁵ Te ñuu Jerusalén, suni cáhīin ñayuu hebreo, yíñuhún núū Yaā Dios, jeē ní quijicoo i nde tācá nación ñí cáhnu ñayiví. ⁶ Te jeē ni ñhín súcuan te ni cacutútú cuéhē ñayuu ún. Te ni cunéé lí ni i jíjñáhan i, chí ná ñn ná ñn i ni cajini sōho i jeē tēe ni canihín Espíritu Santo cácahān de jñūhun yuhu ñúū jicá nuū vēji i. ⁷ Te ni canaa ni i cájito i te ni cacahān i:

¿A násūu tēe Galilea cácuu tāca tēe yáha jéē cácahān de tācá yuhu ñúū nuū vējicoo yó? ⁸ ¿Na vé ni cuu yāha núu súcuan? Chi ná ñn ná ñn yó cájini sōho yó cácahān de jñūhun yuhu ñúū nuū ní cacacu yó. ⁹ Chi vējicoo yó ndé tācá ñuu jicá. Sava yó vēji nde Partia jíin Media jíin Elam. Te sava ga yō vēji yó ndé Mesopotamia jíin Judea jíin Capadocia jíin Ponto jíin Asia. ¹⁰ Suni nde Frigia jíin Panfilia jíin Egipto jíin tijni ñuu jeē íne nde yatā gā ñuu Cirene ñuhun Africa vējicoo yó. Te sava ga yō nde ñuu Roma vējicoo yó, te cáyūcu jínu-ni yó yáha. Te máá yó jeē vējicoo ñuu Roma, sava yó cácuu máá ñáyuu hebreo te sava ga yō cácuu ñayuu sñn ñuu, ni cacandíje yó ndíquín yō ley ñayuu hebreo. ¹¹ Suni nde Creta jíin Arabia vējicoo sava yó. Te cájini sōho yó jéē jíin jñūhun yuhu ñúū ná ñn ná ñn máá yó cácahān de tācá jniñu jéhnu ní sáha Yaā Dios, achí i.

¹² Te ndihí i chí ni canaa íi ni i cájini nahín i. Te ni candajnūhún i jíin jñáhan i:

¿Na vé cúu jeē ní cuu núu súcuan jeē cácahān de yuhu ñúū yō? achí i.

¹³ Te sava i ni cacahān catá i:

Tuú chí jeē cánañi de, achí i.

Jeē ní nacani Pedro jñūhun nuū ñáyuu

¹⁴ Yūcuán na te ni candocuiñí Pedro jíin ndihúxí ñn ga apóstol, te ni cahān jee Pedro jíin ñáyuu ún:

Nihín jñáhan ñuu yō hebreo, jíin ndihí níhín jéē cáyūcu ní Jerusalén,

jnūhun yáha na chúhun ni ni jíjnáhan ní, chi cuni nahín ní cahān na jíin ní. ¹⁵ Chi máá ná jijnáhan ná, nasūu jéē cájini ná nájnūhun cájeni ni ní, chi sáá cahān jenéhen cúu, te nasūu hora cánajini ñayuu cúu. ¹⁶ Chi sa suhva squícu jniñu yáha nájnūhun ni cahān Joel, tēe ni nacani jnūhun Yaā Dios nde jenahán, chi súcuan ni cahān de:

¹⁷ Achí Yáa Dios: Quiṽí sándihí na te tají rí Espíritu rí cunuú yá jíin táca ñáyuu,

te sēhe yí ró jíin séhe síhí ró, nacani i jnūhun ri,

te tāca tée lulí chi coto ndijin de jeē steén rí nuū de,

te tāca tée jéhnú chi sáha ri jeē scóto jēni de.

¹⁸ Te quiṽí ún chi tají rí Espíritu rí cunuú yá jíin táca mozo rí, cúu tēe cúu ñahan,

te nacani i jnūhun ri.

¹⁹ Te ichi ándiví sáha ri jniñu jéhnú jeē náā ni ñayuu coto i,

te sáha ri jniñu jéhnú ini ñayivi jéē steén jeē kujéhnú ri,

chi coo niñi jíin ñúhūn jíin ñúhmā nájnūhun vicō.

Yūcuan cúu jeē sáha ri jeē cóo jnūndóho xeēn.

²⁰ Te nduu jnúú níandii te ma cúndijin gā,

te yoō coto cuéhé nájnūhun niñi.

Yūcuán na te quee quiṽí jeē ndíji máá Jítóho rō Jesús.

Quiṽí ún coo cuehē jniñu jéhnú, te cuni ndihi ñayuu jeē quiṽí maá Jítóho rō cúu.

²¹ Te tāca ñáyuu jeē cahān ndahú i jíin yá te jnama ya i, áchí Yáa Dios.

Achí Joel ni nacani de jnūhun ya.

²² Jeē yūcuan níhín tée ñuu yō Israel, cuni nahín gá ni jnúhun yáha jíjnáhan ní. Ni steén Yaā Dios jeē ní tají yá maá Jesús, Yaā ní jehnu ñuu Nazaret, chi máá Yáa Dios ni jēhe ya jeē ni sáha Jesús jniñu jéhnú mēhñu máá ní, jíin jniñu jeē steén jeē kujéhnú ya, te jniñu un ní canaa ni ni ní cajito ní. Te je cájini vāha ní jéē súcuan ni cuu. ²³ Te máá ní ni cajni ní yá, te ni cajendēca ní yá nuū tée xeēn ni cajehni de ya jicā

cruz ni casáha ní. Te nde jíin tiempo je ni jini Yaā Dios jeē súcuan sáha ní jíjnáhan ní, chi súcuan je ni sándaā yā.

²⁴ Te ni nastécu Yaā Dios Jesús te tuá ni cúu ya ndīyi, chi jnūhun xeēn jeē jihí ñayuu, tuá na vé cúu ga sáha jíin yá.

²⁵ Chi nde jenahán suhva ni tee David jnūhun ndese ni cahān Jesús jíin Yáa Dios:

Jíni na núu maá ní jeē cúu ní Jítóho ná, chi ní cáni ndéé ní jíin ná,

chi ndéé ní ichi ndáváha ná, cúu jeē chindéé ñahán ní sāña návāha coo ndeyí ni ná.

²⁶ Jeē yūcuan cúsi ni ná te cáhan na jnúhun si ni.

Jeē yūcuan ma nácani uhū ni na síquī jnúhun cuu ná.

²⁷ Chi ma cuáha ni jnúhun quendōo ánuá na lugar nuū cáyūcu ánuá ndīyi,

ni ma cuáha ni jnúhun tehyū ná, chi jéjniñu ná núu ní te maní ni jíin ná.

²⁸ Te ni steén ni núu na jéē nátecu ná, te sáha ní jéē cusī teyí ni ná condee na jíin ní ní cáni.

Achí Jesús, ni achí David.

²⁹ Tāca níhín jíjnáhan ní, na cástūhun cáji ná nuū ni jnúhun jíi yō David, chi tu ní cáhan de jnūhun yáha síquī maá de. Chi ni jihí de te ni quindūji de, te jíni yō nuū yindūji de nde vijna. ³⁰ Chi ni cuu de tēe ni nacani jnūhun Yaā Dios nde jenahán. Te ni jini de jeē váha ni jejnūhun ya nuū de jeē chíji yucūn maá de quiiji Cristo, te condee yā mesa de ndacu ya jniñu nájnūhun ni ndacu de jniñu jeē ní cuu de rey. ³¹ Te nde jíin tiempo ni jini de jeē nátecu Cristo, te ni cahān de jeē anuá yā, ma ndóo lugar nuū cáyūcu ánuá ndīyi, ni yiqui cúñu yā ma tehyú. ³² Chi Yaā Dios ni nastécu yā Jesús, te máá ná cácuu ná testigo jeē ní natecu yā. ³³ Te ni ndujéhnú tucu ya ni sáha Yaā Dios jíin poder yā. Te nde nuū maá Yáa Dios, Yaā cúu Tátá yā, ni nihín Jesús Espíritu Santo, chi súcuan ni jejnūhun ya. Te ni tají Jesús Espíritu Santo, te suu ya sáha jniñu jeē cájito ní te cájini sōho ní vijna. ³⁴ Te David,

nasūu siquī maá de ní cáhán de tāca jnúhun yáha, chi tu ní ndáa yiqui cúñu de andiví. Chi siquī Cristo cúu jeē ni cáhán de suhva:

Maá Yáa Dios ni cahán yā jín Jítoho rī Cristo:

Cucōo ró ichi ndávaha ri jeē steén jeē cujéhnú ró.

³⁵ Te na sáha ri jeē quende rō poder tāca jéē cájito uhū rohó, áchí yá. Achí David.

³⁶ 'Núu súcuan te ndihí ní jéē cácuu yó ñayuu Israel, na cúni vāha ní jéē vésú ni cajehni ni yá jicā cruz, te Yaā Dios ni jeni ya maá Jesús jeē cúu ya Jitoho yō te suni cúu ya Cristo, Yaā jnáma yóhó, áchí Pedro jín i.

³⁷ Te jeē súcuan ni cajini sōho i jnúhun yáha, te ni cajnahuhū ni anuá i. Te ni cacajnūhún i Pedro jín táca gá apóstol:

¿Te ndese sáha ná jínáhan ná núu súcuan? áchí i.

³⁸ Te ni cahán Pedro jín i:

Nacani ni ni jéē stóo ni cuéchi ní jínáhan ní, te cuandute ní jéē ní candíje ní Jesucristo, návaha cone cáhnu ni Yaā Dios nuū cuéchi ní, te cuāha Yaā Dios Espíritu Santo yā condee yā ini anuá ní. ³⁹ Chi súcuan ni jejnūhun máá Tátá yō Yaā Dios nuū yō jín núu séhe yó, te suni súcuan ni jejnūhun ya nuū ñayuu tāca gá nación, táca i jeē cána ya i candíje i.

⁴⁰ Te jín cuéhē gā jnúhun súcuan ni cahán cají Pedro, te ni stihví ni de i:

Nducú ndéyí ní jeē na cácu ní, chi jnahnú ndetū ñayuu casáha jniñu néé, áchí de.

⁴¹ Yūcuán na te táca i jeē ní cajetáhú jnúhun ni cahán de, ni cajendute i. Te quiví un ní nducuehē gā ñayuu cá candíje, nájnūhun unī mil gā ñayuu. ⁴² Te ni cahīn nihin i siquī jnúhun cástéén apóstol. Te inuú-ni cándajnūhun mánī i te cájicān tahu i, te ñn cáhnu-ni cáyeji i pan, nájnūhun ni steén maá Jítoho yō jeē núcūhun ni yō siquī yā.

Ndese ni coyūcu ñáyuu jeē ní candíje jeē xíhna ñúhún

⁴³ Te ndihí ñayuu ni cayūhú i ni cajito i, chi cuehē jniñu jéhnú jeē steén jeē cujéhnú ya ni casáha tēe apóstol.

⁴⁴ Te inuú ní cahīyo ni ñayuu cá candíje, te ni cacuu inuú i tāca jéē cánevāha i.

⁴⁵ Te ni caxícó i na-ni na vé cánevāha i, te ni casaja i xūhún un núu tāca jnáhan i, núu ndese jini ñúhún ñn ñn i.

⁴⁶ Te ndijnahan quiví ni candutútú i ini templo. Te manī ni cayeji cáhnu i pan táca vehe jnáhan i nájnūhun ni steén yā, te ni cahīyo sñ ni i. ⁴⁷ Te ni cacahán i jeē yóhó cujéhnú Yaā Dios. Te ndihí ñayuu ñuu un ní cajejnúhún i ñayuu cá candíje. Te ndijnahan quiví ni jnama Jitoho yō sava ga ñayuu, te ni nduu inuú i jín ñáyuu cá candíje.

Jeē ní nduvāha tēe ríngo

3

¹ Te ñn quiví te máá cáhunī jehíni ni caa Pedro jín Juan cuango de templo, chi hora un cájicān tahu jnáhan de hebreo. ² Te cájendēca ñayuu ñn tēe caríngo nde quiví ní cacu de. Te tēe un ndéé de ndijnahan quiví yehyí templo jeē naní Hermosa, jicān de caridad nuū tāca ñáyuu quívicoo ini templo. ³ Te tēe un ní jito de nuū Pedro jín Juan jeē véji de quívicoo de ini templo, te ni jicān de caridad nuū Pedro jín Juan. ⁴ Te Pedro jín Juan ni cajito vāha de nuū tēe ún. Te ni cahán Pedro jín de:

Condēhe núu rī jijnáhan ri, achí de.

⁵ Te máá tēe un ndétu tūhva de, ni jeni ni de jeē cuáha Pedro jín Juan jecu xūhun núu de. ⁶ Te ni cahán Pedro:

Tú na xūhun plata ni xūhun oro cánevāha ri. Te íyó ñn jeē vāha ga sáha ri jín ró: jín poder maá Jesucristo, Yaā ní jehnu ñuu Nazaret, cáhán rī jín ró, ndocuiñí te caca ró, áchí de.

⁷ Te ni jni de ndavāha tēe ún, te ni ndonehen de. Te jehē de jín súcūn jehé de ni nduvāha-ni. ⁸ Te ñn ni scánda de máá de ni ndocuiñí de, te ni quejéé de jica de. Te ni quiví de jín Pedro jín Juan ini templo, jica de, cánda de, te nácuatáhú de nuū Yaā Dios. ⁹ Te ni cajini tāca ñáyuu jeē jica

de te nácuatáhú de nuū yā. ¹⁰ Te ni canacuni i de jeē maá de cúu tēe ni condee yehyí templo jeē naní Hermosa, ni jicān de caridad. Te ni canaa ni i ni cajito i, te ni cayūhú i cájito i jeē ní nduvāha tēe ún.

Jeē ní nacani Pedro jnūhun ini corredor jeē naní Salomón

¹¹ Te tēe ni nduvāha ún, tu siáá de Pedro jiín Juan. Te ni cacutútú-ni cuehē ñayuu nuū de ini corredor jeē naní Salomón, te ni canaa ni i cájito i. ¹² Te ni jito Pedro jeē ní cutútú ñayuu ún, te ni cahān de jiín i:

Níhín tēe ñuu yō Israel jijnáhan ní, ¿najehē cánaa ni ni cájito ní jniñu yáha? ¿Najehē cájito ní núu ná te cájeni ni ni jéē maá ná jijnáhan ná iyó poder na jéē sáha ná jéē nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní? ¹³ Tuú chi máá Yáa Dios jií yō Abraham jiín Isaac jiín Jacob jiín táca gá jií yō, ni sáha ya jniñu yáha návāha cuni ñayuu jeē kujéhu Sēhe ya Jesús, Yáa jeē ní cajendēca ní núu tēe cácujuhnu. Te ná ni cuni Pilato jeē siaá de ya, te tu ní cájēhe ni jnúhun. ¹⁴ Te ni casquéhichī ni yá vēsú cúu ya Yáa ndaā, Yáa iī. Te sa suhva ñn tēe jéhni ndiyi ni cacahān ni jiín Pilato jeē na siáá de. ¹⁵ Te ni cacahān ni jéē na cúu Yáa jeē sáha jeē técu ndihī-ni. Te Yáa Dios ni nastécu yā Jesús jeē ní cuu ya ndiyi, te máá ná cácuu testigo jeē ní natecu yā. ¹⁶ Te tēe yáha jéē cájito ní te cánacuni ní de, ni candíje de jiín ná jeē iyó poder Jesús nasávāha ya de, te jeē yúcuan ní nasávāha ya de. Te jeē súcuan ni cacandíje ná ní sáha ya, jeē yúcuan ní nduvāha vāha de nájñūhun cájito ndihī ní.

¹⁷ Te na cástūhun ná nuū ni jijnáhan ní, je jíní na jéē maá ní jijnáhan ní jiín tēe cácujuhnu nuū yō, tu ní cájecūhun ni ní, te jeē yúcuan ní cajehni ni yá. ¹⁸ Te súcuan ni squícu jnūhun ni cahān Yáa Dios nde jenahán jéē cánuú ndoho Cristo siquī cuéchi ñayuu, chí ni sáha ya jeē súcuan ni cacahān tēe ni canacani jnūhun ya nde jenahán. ¹⁹ Te na nácani ni ni jéē stóo ni cuéchi

ní, te nasāma ini ní, te quivícoo ní ndaha Yáa Dios návāha ndahva yā cuéchi ní. Te quee quiví jeē ndúsñ ni ni sáha máá Jítóho yō. ²⁰ Te natají yá Jesús ndiji ya, chí cúu ya Cristo, Yáa ní jeni Yáa Dios jeē jnáma ya yohó. ²¹ Te jíní ñúhún jéē cóo ya andiví ndé nasájeé yá táca jéē iyó, nájñūhun ni cacahān tēe ndoo ni canacani jnūhun nde jenahán ní sáha Yáa Dios. ²² Chí suhva ni nacani jíí yō Moisés jnūhun nuū táca jíí yō: Máá Jítóho yō Yáa Dios caní ya Yáa nacani jnūhun nuū rō jijnáhan ró, nájñūhun ni jeni ya ruhū. Te cuu ya ñn jnáhan ñuu yō. Te na chúhun ni rō táca jnúhun jeē nácani ya ún. ²³ Te núu ndé tēe tú chuhun ni de jnūhun cahān yā, jnahnū ndetū de, te ma cúu ga de jnáhan ñayuu yā Israel, áchí Moisés.

²⁴ Te táca tēe ni canacani jnūhun nde jenahán, nde tiempo ni quiji Samuel te ní gá nde vijna, suni ni canacani de jnūhun siquī táca jniñu cúu quiví yáha. ²⁵ Yucūn maá tēe ni canacani jnūhun ya nde jenahán cácuu yó, te suni siquī maá yó jijnáhan yó cúu jeē ni sáha Yáa Dios contrato jiín jíí yō. Chí ni cahān yā jiín Abraham: Yucūn maá ró cane Yáa sáha jeē quéndōo ndetū táca ñayuu ní cáhnu ñayiví, áchí yá. ²⁶ Te jeē ní nastécu Yáa Dios Sēhe ya, te ni quiji ya nuū maá yó xíhna gā, návāha quéndōo ndetū yō sáha ya, chí sama ya anuá yō jeē ma sáha ga yō jniñu neé, áchí Pedro.

Jeē ní cajendēca de Pedro jiín Juan nuū tēe cácujuhnu

4

¹ Te Pedro jiín Juan níni cácahān gā de jiín ñayuu ún te ni quecoo táca sūtū jiín tēe grupo saduceo, jiín tēe cácujuhnu nuū tēe cándito templo. ² Te yōhyo ni caquití ni de siquī jeē castéén Pedro jiín Juan nuū ñayuu, jiín jéē cánacani de jnūhun jeē nátecu ndiyi chí je ni natecu Jesús. ³ Te ni cajñi ún de, te ni cachuhun ún de vecāa cone de nde cundijin inga quiví, chí je ni ini. ⁴ Te cuehē ñayuu jeē ní cajini sōho jnūhun ni cacahān Pedro jiín Juan ni

cacandíje i. Te ni nduu nájnūhun uhūn mil jeē maá nene tēe jeē ní cacandíje.

⁵ Te jeē ní cundijin inga quivī ún, te tēe cácujeñnu nuū ñáyuu hebreo jíin tēe jéñnu cándiso jniñu jíin tēe cástéén jnūhun tutu ley yā, ni candutútú de ini ñuu Jerusalén. ⁶ Te suni ni candutútú de jíin Anás jeē cúu sutū cujéñnu ga, jíin Caifás jíin Juan jíin Alejandro jíin táca gá jeē cácuu jnáhan sutū cujéñnu ga ún. ⁷ Te ni candacu jniñu jeē na quíjicoo Pedro jíin Juan condichi de mēhñú, te ni cacajñuhún de:

¿Nde ñin ni tejniñu róhó te ndese ni nihñ jniñu ró ní sáha ró jéē nduvāha tēe yáha? áchí.

⁸ Yūcuán na te Pedro chi ni cunuú maá Espíritu Santo jíin de, te jíin poder yā ni cahān de jíin táca tēe ún:

Tāca níhín tēe cácujeñnu nuū ñúū yō Israel jíin táca níhín tēe jéñnu cándiso jniñu, ⁹ vijna te cástíchí ní sáña síquī ñin jniñu váha ní casáha ná jéē ní nduvāha tēe cúhú yāhá. ¹⁰ Te na cástūhun ná nuū nihín jéē cácujeñnu ní, návāha suni cuni ndihí jnáhan ñuu yō Israel jeē jíin poder maá Jesucristo, Yaā ní jéñnu ñuu Nazaret, ni nduvāha tēe índichi nuū ni yáha. Te suu ya cúu Yaā jeē ní cajehni ni jícā cruz, te ni sáha Yaā Dios jeē ní natecu yā. ¹¹ Jesús cúu nájnūhun yuū cimientu jeē quítuu vehe. Te maá ní jijnáhan ní cácuu nájnūhun tēe casáha vehe, te ni casquéhichí ni yá nájnūhun jeē cátejiyo ní yúū, chi tu ní cacandíje ní yá. Te ni sáha Yaā Dios jeē cúu ya nájnūhun yuū cánuú gá jeē quítuu vehe. ¹² Te tú cuítu inga jeē cúu jnama yóhó, chi tuá na inga jeē cujéñnu ní jéni Yaā Dios ini ñayiví yáha jéē cúu jnama yóhó, áchí Pedro.

¹³ Yūcuán na te ni cajini un jéē Pedro jíin Juan jéñnu-ni cacahān de. Te je cajini jeē tú tūhva de, chi tēe súcuu-ni cácuu de. Te ni canaa ni cájito nuū de, te ni casáha cuenta jeē ní cajica de jíin Jesús. ¹⁴ Te cándēhe núū tēe ni nduvāha un, índichi de jíin Pedro jíin Juan, te tu ní cánihñ gā modo ndese ga cahān. ¹⁵ Yūcuán na te ni

candacu jniñu jeē na quéndacoo sñin de yatā véhe juzgado te ndajnūhun maá jíjnáhan. ¹⁶ Te ni cacahān:

¿Ndese sáha yó jíin tēe yáha núu súcuu? Chi ni jitē jnūhun yáha núū tāca ñáyuu ñuu Jerusalén jeē súcuu ni casáha de ñin jniñu jéñnu, te ma cúu cahān yō jeē tu iyó ndáá. ¹⁷ Te návāha ma cuítu ga jnūhun yáha, na cúxeēn yō nuū de jeē ma cahān cuítu gā de jnūhun Jesús nuū ní ñin ñayuu, áchí.

¹⁸ Te ni cacana ún de, te ni cacahān nihñ jíin de jeē ma cahān cuítu gā de jnūhun Jesús ni ma steén gā de jnūhun un núū ní ñin ñayuu. ¹⁹ Yūcuán na te ni cacahān Pedro jíin Juan:

Cani vāha ni ní te núu nújnahan ni Yaā Dios jeē stóo ná jniñu ní ndacu ya jeē sáha ná te cuandije ná maá na jniñu nándacu ní. ²⁰ Chi ma cúu stóo ná jniñu jeē nácani ná jnūhun ní cajini sōho ná jíin jniñu ní cajito ná, áchí de.

²¹ Yūcuán na te tēe ni cacutútú un ní cacuxeēn tucu de nuū Pedro jíin Juan. Te ni casiáá de cuango de, chi tú cuítu na modo stóho de chi cáyūhu cájito ñayuu, chi síquī jniñu jéñnu ni cuu ún te ndihí i cacahān i jeē yóhyo cújéñnu Yaā Dios. ²² Chi tēe jeē ní sáha ya jniñu jéñnu jíin de jeē ní nduvāha de, víhyá gā uū xico cuiyā de.

Jeē ní cajicān tahuñ ñayuu cácuandíje

²³ Te ná ni casiáá un Pedro jíin Juan cuango de, te ni najinūcoo de nuū tāca gá jnáhan de, te ni cacachi de ndese ni cacahān sutū cácujeñnu jíin tēe jéñnu cándiso jniñu. ²⁴ Te jeē ní cajini sōho de jnūhun yúcuu, te inuú-ni ni cajicān tahuñ de nuū Yaā Dios:

Tátā Yaā Dios jeē cujéñnu ní núū ndihí, maá ní cúu Yaā Dios ni sáha andiví jíin ñayiví jíin mar jíin táca ndihí jeē iyó. ²⁵ Te jeē jíin Espíritu Santo te ni sáha ní jéē ni cáhān mozo ní David nde jenahán:

¿Najehē cáquití ndevāha ni ñayuu sñin nación?

¿Te najehē cájeni sáa ni i jeē ndóna i síquī ní?

²⁶ Ni cacutútú jéē cácuu rey ñayiví jíjnáhan,

te tēe cácujuhnu ni cacutútú de,
te inuú-ni ni candonda de siquī maá
ní jeē cúu ní Jitoho ná,
jíin síquī Cristo, Yaā jeē ní jeni ní.
Achí David.

²⁷ Te jendaá chi Herodes jíin Poncio Pilato jíin táca tēe ñuu yō Israel jíin tēe táca gá nación, ni cacutútú de ini ñuu yáha ní candonda de siquī Séhe ií ní Jesús, Yaā ní jeni ní. ²⁸ Te súcuan ni cuu návāha squícu táca jniñu jeē jíin poder ni ní cundaā ni ni ndé jehān jeē súcuan coo. ²⁹ Te vijna, Tātā, coto ní ndese cácahān xeēn de nuū na jíjnāhan ná, te cuāha ni fuerza ni núu na jeē cácuu ná mozo ni, návāha jéhu-ni nacani ná jnúhun máá ní. ³⁰ Te jíin poder ní nasávāha ni ñáyuu cácuu, te sáha ní jniñu jéhu jeē steén jeē cujéhu ní. Te táca jeē yáha sáha ní jíin poder Séhe ií ní Jesús, áchí i jíjnāhan i.

³¹ Te nuū ní ndihi ni cajicān tahú i, te nuū cáyūcu tútu i un ní sáha ya jeē ni jnáa. Te ndihi i ni cunuú Espíritu Santo jíin i, te ni jēhe ya fuerza te jéhu-ni ni canacani i jnúhun Yaā Dios.

Jeē ní canevāha cáhu i ndajniñu

³² Te ñáyuu cuehē jeē ní cacandíje chi inuú cáhiyo ni i jíjnāhan i. Te tú ni ñin i ní cáhān jeē ndajniñu jeē névāha máá i cuu máá-ni i, chi táca ndajniñu ni canevāha cáhu i. ³³ Te nihin cánacani apóstol jnúhun jeē ní cajito de jeē ní natecu Jitoho yō Jesús. Te yōhyo ni chindéé ñáhān yá ñáyuu cácuandíje. ³⁴ Chi tú cuiti ni ñin i ní ndóho jeē cumaní nuū i, chi táca ñáyuu cánevāha cuehē ñuhun chí vehe, ni caxícó i sava te ni caquindeca i xūhún un. ³⁵ Te ni cajēhe i xūhún un núu tēe apóstol, te ni casaja tēe apóstol nuū ñáyuu cácuandíje núu ndese jíini ñuhún ñin ñin i. ³⁶ Te íyó ñin tēe nání José jeē cúu yucūn Leví, ni cacu de Chipre, ñuhun jeē íne sñin nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhān jnúhun ndeyí ni. ³⁷ Te ni xícó de ñin ñuhun de, te ndáhá de xūhún un ní jēhe de nuū tēe apóstol.

Siquī cuēchi jeē ní casáha Ananías jíin Safira

5

¹ Te suni inga tēe nání Ananías jíin ñasihí de Safira, ni caxícó de ñin ñuhun de. ² Te ni chuvāha de sava xūhún un cuu máá de jíin ña, chi súcuan ni candajnuhún de jíin ña, te ndáhá de inga sava nájnuhun jeē ndihi cúu, te ni jēhe de nuū tēe cácuu apóstol. ³ Te ni cahān Pedro:

Ananías, ¿naun ni jēhe ro jnúhun jeē quívi jexeén, jeē cúu Satanás, ini anuá rō te stáhú ró Espíritu Santo cuní rō? Chi jeē ní caxíco ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajniñu máá ró, chi ni sáha ró nájnuhun jeē ndihi xūhún ní jēhe ró. ⁴ ¿Te á násūu cuenta maá ró cúu ñuhun un ndé ná tu xíco ró? Te ná ni xíco ró ¿te á násūu cuenta maá ró cúu xūhún jeē cuajniñu ró ndé nuū cuní maá ró? ¿Te naun ni jeni ni rō jeē stáhú ró súcuan? Te nasūu máni máá tēe cúu jeē jícu ró stáhú ró, chi suni Yaā Dios, áchí Pedro.

⁵ Te ná ni jíini sōho Ananías táca jnúhun yáha, te ni cotúú-ni de ni jihí de. Te táca ñáyuu ní canihín jnúhun ún, yōhyo ni cayūhú i. ⁶ Te ni candocuñí tēe suchí, te ni cachusúcun de ndíyi un cuáchindūji de.

⁷ Te ni cunuú nájnuhun uní hora. Te ni jinū ñasihí ndíyi un ní quívi ña ini vehe ún, te tú na vé jiní cuiti ña. ⁸ Te Pedro ni cajnuhún de ña:

Cachi nuū rí, ¿á ñin súcuan-ni ni caxíco ró ñuhun ró chí tuú? áchí de.

Te ni cachi ña:

Suu súcuan-ni ni caxíco ná, áchí ña.

⁹ Te ni cahān Pedro jíin ña:

¿Naun ni casquijnāhan jnúhun ró jeē cóto ndee rō Espíritu Santo maá Jitoho yō? Chi ni nducú ró stáhú ró yā. Cuni nahín jeē cáhma nanecoo tēe cuachindūji yi ró, te suni súcuan quichindūji de rōhó, áchí de.

¹⁰ Te ni cotúú-ni ña nuū jehé Pedro te ni jihí-ni ña. Te ni ndívicoo tēe suchí un te ni cajito de jeē jé ni jihí ña, te ni caquenehen de ña, te ni jechindūji de ña xiin yi ña. ¹¹ Te yōhyo

ni cayūhú ndivii ñayuu cá candíje jíin táca gá ñayuu jeē ní cajini jnūhun jeē súcuan ni cuu.

Cuehē jniñu jéhu ni casáha apóstol

¹² Te cuehē jniñu jéhu jeē steén jeē cujéhu Yaā Dios ni casáha tēe apóstol nuū ñáyuu. Te táca ñáyuu cá candíje, inuú-ni cándutútú i ini corredor jeē naní Salomón. ¹³ Te tu ní cá chundeyí ni inga ñayuu quijnáhan jíin i. Te cájejnūhún i ñayuu cá candíje. ¹⁴ Te ni nducuehē gā i, chi cúu tēe cúu ñahan ni cacandíje i máá Jítoho yō. ¹⁵ Te cáquindecá ñayuu jnáhan i jeē cá cuhū, te cájequin i ini calle cáca i nuū camilla jíin núu yúu, chi cá cuni i vēsú ste cuándahū Pedro na yáha siquī i te nduvāha i. ¹⁶ Te suni cuehē ñayuu táca ñuu cáhiyo yajni yūcuan ní quijicoo i ñuu Jerusalén ni caquindecá i jnáhan i jeē cá cuhū jíin jéē cándoho tachī, te ndihi i ni canduvāha i.

Jeē ní cajito xeēn i tēe cácuu apóstol

¹⁷ Yūcuán na te sutū cujéhu ga jíin táca gá jnáhan jeē cá candíje sahan saduceo, ni cacucuésún ni jeē siquí tēe cácuu apóstol. ¹⁸ Te ni cajni de tēe cácuu apóstol ni cachuhun de vecāa. ¹⁹ Te ñn ndajéhé maá Jítoho yō ni nune ya yehyí vecāa ún jecuáa, te ni quenehen ya de jíjnáhan de. Te ni cahān yā jíin de:

²⁰ Cuáhán te cuiñi ró ini templo, te yūcuán nacani cájí ró jnūhun nuū ñáyuu siquī ndese nihin tahu i cotecu i ní cáni, áchí ndajéhé yā.

²¹ Te ni cajini sōho de jnūhun yáha. Te nuū ní cundijin te nehen ni quivicoo de ini templo, te cástéén de jnūhun ya nuū ñáyuu.

Te níni cástéén de te sutū cujéhu ga jíin táca jnáhan de ni canastútú de tēe junta cujéhu ga, jeē cúu ndihi tēe jéhu cándiso jniñu nuū ñáyuu nación Israel. Te ni catají de policía cuaque- nehen tēe apóstol ini vecāa. ²² Te nuū ni jínūcoo te tuá gā tēe apóstol. Te ni canandió cóo te ni cacachi:

²³ Jendaá cúu jeē ní cajito ná ndési váha vecāa, te cáhīn tēe cándito yéhyí

un. Te nuū ní canune ná, te tú cuiti gā tēe un cáhīn ini vecāa ún, áchí de.

²⁴ Te sutū cujéhu ga jíin tēe cujéhu nuū tēe cándito templo jíin sūtū cá cujéhu, nuū ní cajini sōho de jnūhun yáha, te ni cajeni ni de ndese ga cúu un núu súcuan. ²⁵ Te ni quee-ni ñn tēe te ni cachi:

Tēe jeē ní cachuhun ní vecāa, cáhīn de ini templo, te cástéén de jnūhun nuū ñáyuu, áchí de.

²⁶ Yūcuán na te tēe cá cujéhu nuū tēe cándito templo, jíin tēe cácuu policía de, ni jengoo de, te yúcún ní nacueca de táca tēe apóstol vendicoo de jíin, chi cáyūhú de jeē sanaa te cuāha ñayuu yuū xinī de núu sáha xeēn de jíin táca tēe apóstol. ²⁷ Te nuū ní najinūcoo de jíin tēe apóstol, te ni cajecuiñi de nuū tēe casáha junta. Te sutū cujéhu ga ni cahān:

²⁸ Ni cacahān ñihin ri jíin ró jeē ma steén cuiti gā ró jnūhun tēe naní Jesús. ¿Te naun ni casáha ró jéē ní ndecāva jnūhun un ní ñuu Jerusalén yāhá? Te cá cuni ró staú yáhu ró rúhū jijnáhan ri siquī jeē ní jíhī tēe ún, áchí.

²⁹ Te Pedro jíin táca gá apóstol ni cacahān de:

Cánuú jéē squícu ná jniñu ní ndacu Yaā Dios nuū ná te nasúu jniñu nándacu tēe. ³⁰ Máá Yáa Dios jíi yō ni nastécu yā Jesús, Yaā ní cajehni maá ní jeē ní cata caa ní yá jicā cruz.

³¹ Te ni sáha Yaā Dios jeē ní ndujéhu tucu Jesús néne ya ichi ndávāha Yaā Dios, te cúu ya Yaā ndácu jniñu, Yaā jnáma ñayuu. Te súcuan ni sáha Yaā Dios návāha yóhó, jéē cácuu yó ñáyuu Israel, na nácani ni yō jeē stóo yó cuéchi yó, te cone cáhnu ni yā nuū táca cuéchi yó. ³² Te máá ná ni cajito ná táca jniñu yáha, te suni máá Espíritu Santo steén cají yá jeē súcuan cúu, chi jéhe Yaā Dios Espíritu Santo yā condee ini anuá táca ñáyuu jeē cájendetū nuū yā, achí de.

³³ Te ná ni cajini sōho un jnúhun yáha, te yōhyo ni caquiti ni, te cahni de cá cuni nuú. ³⁴ Te mēhñú un jíjnáhan néne ñn tēe grupo fariseo naní de Gamaliel, te cúu de maestro jeē steén

ley yā, te tāca ñáyuu cájejnúhún i de. Te ni ndocuiñi de, te ni ndacu de jniñu jeē na cújiyo núu tēe apóstol. ³⁵ Te ni cahān de:

Róhó jnáhan ñuu yō Israel, cani vāha ni rō núu na vé cācuni rō sáha ró jín táca tēe yáha. ³⁶ Chi nucūhun ni rō jeē ñn cuiyā ni ndonda Teudas siquī gobierno, te ni cahān de jeē tēe téyí cúu de, te ni cacutútú nájnūhun cuñ ciento tēe jín de. Yūcuán na te ni cajehni ñayuu Teudas, te tāca jēe ní caquijnáhan jín de ni cajitē núu cuango sáa-ni, te ni jecuiñi-ni jniñu ún. ³⁷ Yūcuán na te quivī ni íyo censo te Judas, ñn tēe Galilea, ni ndonda de siquī gobierno, te ni cacutútú cuéhē tēe jín de. Te suni ni cajehni ñayuu Judas, te tāca tēe jeē ní caquijnáhan jín de ni cajitē núu cuango. ³⁸ Te vijna na cuáha ri consejo rohó. Ma stáhān gā rō tēe yáha. Siáá de na quíngoo de. Chi núu ñayuu-ni ni squejéé jniñu yáha, te jecuiñi i. ³⁹ Te núu Yaā Dios ni squejéé, te ma cúu casi rō, chi sanaa te siquī Yaā Dios cándonda ró, áchí de.

⁴⁰ Te ni cachusóhó jēe ni cáhān Gamaliel. Te ni canacana tēe cácuu apóstol, te ni cacani de jín cuarta ññ te ni cacahān xeēn jín de jeē ma cahān gā de jnūhun Jesús, te ni casiáá de cuango de. ⁴¹ Te máa apóstol ni quendacoo de nuū junta cuango de, cácusñ ni de jeē ni jēhe ya jnūhun ndoho de jeē cuáha ñayuu jnūhun canu de siquī jeē cácandíje de ya. ⁴² Te ndiquivī castéén de jnūhun vāha Jesucristo, te canacani de jnūhun ún ini templo jín táca-ni vehe.

Jeē ní cajeni de uxā tēe cuajniñu mēhñu ñáyuu cácandíje

6

¹ Te ni cucuehē ñayuu cácandíje. Te tiempo un te tēe hebreo jeē cácahān yuhu griego, ni quejéé de cácahñu de nuū jnáhan hebreo de, áchí de jeē ñahan viuda jeē cácahān yuhu griego tu cánihñ vāha ña staā jeē cásaja de táca quivī cuu ña. ² Yūcuán na te máa

ndihúxí uū apóstol ni canastútú de táca ñáyuu cácandíje, te ni cacahān de:

Tú vāha jeē jecuiñi jniñu jeē canacani ri jnūhun Yaā Dios siquī jeē cásaja rī staā. ³ Núu súcuan te róhó, hermano, nacāji ró úxā jnáhan máa yó, te na cóndiso jniñu de saja de staā. Te nacāji ró tēe jeē cájejnúhún ñáyuu de, tēe ndíchí jēe ní cunuú Espíritu Santo jín de. ⁴ Te ruhū jijnáhan ri, máni cacān tahú rī jín jēe nácani ri jnūhun ya, achí de.

⁵ Te ndihí ñayuu ni canujnahan ni i jnūhun ni cacahān de. Te ni canacāji i Esteban, tēe cándíje vāha jeē ní cunuú Espíritu Santo jín de. Te suni ni canacāji i Felipe jín Prócoro jín Nicanor jín Timón jín Parmenas jín Nicolás. Te Nicolás cúu tēe ñuu Antioquía, te ni nduu de tēe cándíje sahān ñayuu hebreo nde ná tu candíje de jnūhun Cristo. ⁶ Te ni cajeni i táca tēe yáha núu tēe cácuu apóstol, te tēe apóstol un ní casoó de ndaha de xinī táca tēe un ní cajicān tahú de nuū Yaā Dios siquī jniñu condiso de.

⁷ Te jnūhun Yaā Dios ni jitē gā cuahān, te ni nducuehē teyí ñáyuu cácandíje i jnūhun ya ini ñuu Jerusalén. Te suni cuehē sutū ni cacandíje de jnūhun ya.

Jeē ní cajni de Esteban

⁸ Te ni chindéé ñahán yá Esteban ni jēhe ya poder nuū de, te ni sáha de táca jniñu jéhnu nuū ñáyuu, jniñu jeē steén jeē kujéhnu Yaā Dios. ⁹ Te ñayuu hebreo jeē ní cacuyāhu i te ni canduu libre i, íyó vehe i sinagoga i. Te tēe un cácuu tēe ñuu Cirene jín tēe ñuu Alejandría jín tēe Cilicia jín tēe Asia. Te sava tēe un ní caquejéé de cástáhān jnáhan de jín Esteban. ¹⁰ Te tu ní cácundeyí jín de, chi ndíchí ní cahān de ni sáha máa Espíritu Santo. ¹¹ Yūcuán na te ni cascáhān sava tēe jeē na cáhān jnūhun stáhú siquī Esteban. Te ni cacahān jeē ní cajini sōho cáhān ndevāha Esteban siquī Moisés jín siquī Yaā Dios. ¹² Te jeē súcuan ni cacahān te ni caquitī ni táca ñáyuu jín tēe jéhnu cándiso jniñu jín tēe cástéén

jnūhun tutu ley yā. Te ndihi de ni candonda siquī Esteban, te ni cajni de cuangoo jín de nde nuū junta cujénu ga. ¹³ Te ni cajeni de tēe cahān jnūhun yáá siquī Esteban, te suhva ni cacahān:

Tēe yáha tu ndé jécuiñi de jeē cahān ndevāha de siquī templo iī yáha jín siquī ley yā. ¹⁴ Chi ni cajini sōho ná cáhān de jeē Jesús, tēe ni jehnu ñuu Nazaret, canu de templo yáha te nasama de jeē tajnúni ley yā jeē ni jéhe Moisés nuū yō, áchí.

¹⁵ Yūcuán na te ndihi tēe cáyūcu núu junta un ní candacoto vāha nuū Esteban, te ni cajini jeē jító nuū de ná jító nuū ñn ndajéhé Yāa Dios.

Jnūhun ni nacani Esteban

7

¹ Te máá sūtū cujénu ga ni cajni jnūhún Esteban:

¿A ndáa jeē súcuan ni sáha ró najnūhun cácahān de yāhá? áchí.

² Te ni cahān Esteban:

Ndihí níhín jēe cácuu ní jnáhan ñuu yō, jín ndihí níhín jēe cácujuhnu ní núu ñūu yō, cuni nahín ní jnūhun cahān ná: Máá Yāa Dios jeē yóhyo cújénu ya, ni steén yā maá yá nuū jíi yō Abraham nde na néne ga de región Mesopotamia, nde ná tu quihín de condee de ñuu Harán. ³ Te ni cahān yā jín de: Stóo ñuu rō jín táca jnáhan ró te quihín rō nuū cuáha ri condee rō, chí máá rí steén ichi nuū quihín rō, achí yá. ⁴ Yūcuán na te ni quenda de región Caldea, te ni jinū de ni condee de ñuu Harán. Te yūcuán ní jihī tatá de. Yūcuán na te ni sáha Yāa Dios jeē ní quee de ñuu yáha núu cáyūcu yó vjna. ⁵ Te tu ní jéhe ya ni ñn tíhlí ñuhun yáha cuu tahū de. Te vésú súcuan te ni jejnūhun ya jeē cuáha ya ñuhun un núu de nde jín núu táca séhe de, vésú ná tu coo séhe de sáá. ⁶ Te súcuan ni cahān Yāa Dios jín de: Séhe ró coyūcu jíca i inga ñuu, te cuñ ciento cuiyā sájniñu sáá-ni i te stóho ñayuu yúcuán i. ⁷ Te siquī jeē súcuan sáha i jín séhe ró, te máá rí chí stóho ri ñayuu ñuu ún. Te sáá te quendacoo séhe ró yúcuán,

te nucoyūcú i yāhá chiñúhún i ruhū, achí yá. ⁸ Te ni cahān yā jín Abraham jeē na cúu de circuncidar, jeē cúu ñn jnūni jeē ni sáha ya contrato jín de. Te ná ni cacu séhe de Isaac te ni sáha de circuncidar i nuū uná quiví. Te suni súcuan ni sáha Isaac jín séhe de Jacob, te Jacob jín séhe yí de jeē cácuu ndihúxí uū yucūn ñayuu Israel.

⁹ Te táca séhe Jacob ni cacucúésún ni de jín ñani maá de José, te ni caxícó de i nuū tēe jeē ní cajendēca i nde nación Egipto. Te Yāa Dios chí ni ndito ya José. ¹⁰ Te ni jnama ya i nuū táca jnúndóho ní jito i, te ni cundichí i ni sáha ya. Te Faraón, tēe cúu rey nación Egipto, ni cusí ni de jín i ni sáha ya, te ni tejniñu de José jeē cúu de gobernador te ndacu de jniñu nación Egipto jín núu ñayuu cáyūcú vehe Faraón.

¹¹ Te ni quiji quiví jeē ni íyo ñn jnamā xeēn, te ni ndoho ñayuu ní cáhnu nación Egipto jín ndé ñuu Canaán. Te táca jíi yō ún, tuá ni cánihín de jeē cáji de. ¹² Te ni nihín Jacob jnūhun jeē iyó trigo nde nación Egipto, te ni tají de séhe de ni jengoo de ni cajeen de trigo vuelta ñn. ¹³ Te jeē cuángoo de vuelta uū te ni nastúu José jeē maá de cúu ñani de jínáhan de. Yūcuán na te ni jini rey Faraón ndé ñn jnáhan cúu José. ¹⁴ Te ni cahān José jín táca ñani de jeē na cóndeca de tátá de Jacob jín ndihí jnáhan vehe de. Te ni íyo uní xico xahūn i. ¹⁵ Te súcuan ni cuu jeē ní jínū Jacob ni condee de nación Egipto nde ni jihí de. Te suni yūcuán ní coyūcu séhe de jeē cácuu jíi yō un ndé ni cajihí maá de. ¹⁶ Te ná ni quee quiví jeē ndénehen ya táca yúcuán de jeē cáyūcu tátú de nación Egipto, te ni cacondiso de yiqui ndihúxí uū ndíyí jíi un jēe ndíji ñuu Siquem, te ni cachindūji de ini yaū ndíyí ndeé jíca cáva jeē ní jeen jíi yō Abraham nuū táca séhe Hamor ñuu Siquem.

¹⁷ Te nde ná cáyūcu gá de nación Egipto, te cuacuyajni quiví jeē squícu jnūhun ni cahān Yāa Dios jín Abraham jeē quéndacoo séhe de nucoyūcú i ñuu ni jéjnūhun ya nuū i, te ñayuu

un ní tahū cuehē i ini nación Egipto. ¹⁸Yūcuán na te ni nucuñī inga rey ñuu Egipto jeē tu ní jíní de jeē váha ni sáha ndiyí José. ¹⁹Te rey un ní stahú de tāca jíí yō te ni sáha ndevāha de jíín i, chi ni sáha fuerza de i jeē ma cóto ga i sēhe yiquín i te na cúū. ²⁰Te tiempo un ní cacu Moisés, te ni cusī ni Yaā Dios jíín i. Te unī yoō ni condito sāhi náná i tátá i. ²¹Te tuá ni cúu condito sāhí de i, te ni cachune de i nuū nanihīn sēhe sīhí Faraón i, te ni naquihin sēhe ña i ni scuéhnu ña i nájnūhun sēhe máá ña. ²²Te ni cutūhva Moisés tāca jnúhun ndíchí ñuu Egipto, te ni kujénu de jíín jnúhun cáhán de jíín jniñu sáha de.

²³Te nuū uú xico cuiyā de te ni jecondēhé de jnáhan de jeē cácuu ñayuu Israel. ²⁴Te ni jito de nuū ñn tēe nación Egipto jeē sáha ndevāha jíín ñn tēe Israel. Te Moisés ni jnama de jnáhan de Israel ún, chi ni jehni de tēe Egipto un. Te súcuan ni ndutahū jeē ni sáha ndevāha jíín jnáhan de ún. ²⁵Te máá Moisés jéni ni de jeē jécūhun ni tāca jnáhan de jeē Yáā Dios ni tají yá de jeē jnáma de jnáhan de ún ini nación Egipto nuú, te tu ní cájecūhun cuiñi ni jnáhan de ún. ²⁶Te inga quiñi suni ni jito de nuū uú tēe Israel jeē cájehán, te cúní de jeē na jécuiñi. Te jeē yúcuan ní cahān de jíín: ¿Najehē casáha ndevāha ró jíín jnáhan ró? Chi nájnūhun ñn ñani-ni cácuu ró, áchí de. ²⁷Te máá tēe cáni tahū jnáhan un ní chundahá de Moisés te ni cahān de: ¿Ndé ñn ni jeni róhó jéē kujénu ró núū rī te sándaā rō jniñu ri jijnáhan ri? ²⁸¿Chí suni cúní rō cahni rō ruhū nájnūhun ni jehni rō tēe Egipto icu chí naún? áchí de jíín Moisés. ²⁹Te nuū ní jini sōho Moisés jnúhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yúcuan ní scácu ñasihí de uū sēhe yí de.

³⁰Te ni jīnu uū xico cuiyā jeē néne de yūcuán. Yūcuán na te ñn ndajéhé Yaā Dios ni quenda ya nuū de nde nuū ñúhun téhé nuū íin yucu súcún Sinaí. Te ni quenda ya nuū de xinī ñn yucū cuií cáhnu cándahá yáñuhūn,

te tu ní cáyú yucū ún. ³¹Yūcuán na te Moisés ni naa ni de jito de ún, te ni jehēn de nde nuū, návāha coto vāha de. Te ni jini sōho de jeē cahán maá Jítoho yō jíín de: ³²Máá rí cúu Yaā Dios tāca jíí rō jenahán, Abraham jíín Isaac jíín Jacob, achí yá. Te Moisés, quisi i de jeē yūhú de, te jeē yúcuan tuá ni cúndeyí ni de coto de nuū. ³³Te máá Jítoho yō ni cahān yā jíín de: Quenehen ndijēn rō chi nuū íin ró, ñuhun íi cúu. ³⁴Je ni jini rī ñayuu maá rí jeē yóhyo cándoho i nación Egipto, te suni jini sōho ri jeē cájnana uhū i, te ni cuun ri vēji ri jeē jnáma ri i jijnáhan i. Núu súcuan te vijna chi tají rí rohó ndicó ró quihīn rō nde nación Egipto, achí yá jíín de.

³⁵Te nde ná tu quenda Moisés Egipto, te tāca jnáhan de ni casquéhichī i de jeē ní cacahān i jíín de: ¿Ndé ñn ni jeni róhó jéē kujénu ró núū rī te sándaā rō jniñu ri? ni cacahān i jíín de. Te vēsú súcuan te máá ndajéhé Yaā Dios ni quenda nuū Moisés un jéē cándahá cáyú yucū cuií ún. Te súcuan ni cuu jeē ní natají yá de cuanuhun de nde Egipto jeē ndácu de jniñu nuū i te jnama de i. ³⁶Te máá Moisés ni sáha de jeē ní quendacoo jnáhan ñuu de ini nación yúcuan, te ni cayāha de Mar Rojo, te ni cajica cuu de ñuhun téhé úū xico cuiyā. Te ní tiempo un ní sáha de cuehē jniñu jénu jeē steén jeē kujénu Yaā Dios. ³⁷Te máá Moisés cúu jeē suhva ni cahān de jnúhun yáha jíín jnáhan ñuu yō Israel: Máá Yáā Dios cani ya Yaā nacani jnúhun nuū rō jijnáhan ró nájnūhun ni jeni ya ruhū. Te cuu ya ñn jnáhan ñuu yō. Te na chúhun ni rō jnúhun cahān Yaā ún, áchí. ³⁸Te suni nde ná ni cajica cuu jíí yō nde nuū ñúhun téhé, te ni cahān ndajéhé yā jíín Moisés xinī yucu súcún Sinaí, te ni nihīn de jnúhun jeē cahán ndese nihīn tahú yō cotecu yō, te ni nacani de jnúhun un núū tāca jíí yō, te ni quendōo jnúhun un núū yō.

³⁹Te tāca jíí yō ún tu ní cácuñi de cuandetū de nuū Moisés, chi sa suhva

ni cacuni de squéhichī ni de Moisés, te ni cacuni de nandicó de nungoo de Egipto nuú. ⁴⁰ Te ni cacahān de jíin Aarón: Sáha ní tijni yaā na cósnūu nuū yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéē jeē cuahán de xinī yucu Sinaí, achí. ⁴¹ Yūcuán na te ni cajēhe de oro ni cuvāha iin becerro oro, te nuū becerro ídolo un ní casocō de quitī, te ni cacusiī ni de jíin ídolo ni casáha de ún. ⁴² Te Yaā Dios ni cujiyo ya cuahān yā, te ni stóo ya de na chíñúhún de nuū tāca jéē jíto yó íin andiví, nájnūhun yósó núu tútu tēe ni canacani jnūhun Yaā Dios nde jenahán:

Ni cahān yā: Róhó ñáyuu Israel, ¿á cájeni ni rō jeē nuū ruhū ni casocō rō quitī

ná ni cajica cuu ró úu xico cuiyā nde nuū ñúhun téhé?

⁴³ Tuú, chí sa suhva ni cacondiso ró nicho jeē íne ídolo jeē naní Moloc

jíin figura quīmi jeē naní Renfán, ídolo jeē ní casáha máá ró ni cachiñúhún ró.

Jeē yúcuan cúu jeē siáha ri rohó quíhīn jicá ró nde yatā ñúu Babilonia, achí yá.

⁴⁴ Te ni ndacu ya jniñu nuū Moisés jeē na sáha de vehe ñi nuū chíñúhún de ya, nájnūhun cáa jeē ní steén yā nuū de. Te tāca jíi yō, nde nuū ñúhun téhé ní canevāha de vehe iī un núu ní cachuvāha de tabla yuū jeē yosó jnúhun ley yā. ⁴⁵ Te ni castóo de vehe un núu ndíhi sēhe de jeē cúu jíi yō. Te ni quiví Josué jíin jíi yō ini nación yáha, te ni sáha ya jeē ní cacundeyí de jíin táca ñáyuu jeē ní cacoyūcu yáha ní cajinu i cuango i. Te ni quivícoo de táca ñuu i jíin vehe iī ún, te ni quendō nde quiví ní cuu David rey. ⁴⁶ Te ni cusī ni Yaā Dios jíin rey David. Te ni jicān de nuū yā jeē sáha de iin vehe iī yā nuú, chí máá yá cúu Yaā Dios jíi de Jacob. ⁴⁷ Te ni cuu jeē nde sēhe yí de Salomón ni sáha vehe iī yā. ⁴⁸ Te vēsú súcuan ni cuu te Yaā cujēhnu téyí, tu ndéé yá máá vehe jeē

casáha ñáyuu, nájnūhun ni cahān tēe ni nacani jnūhun ya nde jenahán:

⁴⁹ Ni cahān yā:

Andiví cúu nájnūhun mesa nuū ndácu ri jniñu

te ñayiví cúu nájnūhun iin nuū yítuu jehē rī.

Núu súcuan ¿te ndese cuu sáha ró vehe jeē cóndee rī,

te ndese cuu sáha ró núu ndétātu rí?

⁵⁰ ¿A násūu máá rí ní sáha ndíhi jeē iyó?

áchí máá Jítóho yō Yaā Dios.

⁵¹ Te cáhán gā Esteban:

Yōhyo cáacunihni ni ní, te tu cácuni ní chusóhó ní, te cácuu ní nájnūhun ñáyuu tāca nación jeē tu cájini i jnūhun ya ni tu cácandíje i ya. Chi níni cájesi ni núu Espíritu Santo, te nájnūhun ni casáha jíi yō jenahán, suni súcuan casáha ní vijna. ⁵² ¿A ní iyo tēe nácani jnūhun ya nde jenahán jeē tu ní sáha ndevāha jíi yō jíin de? Chi jíi yō ni cajehni de tēe ni canacani jnūhun jeē quíji máá Yáa ndaā. Te je ni quiji Yáa ún, te máá ní ni canastúu ni yá nuū tēe ni cajehni de ya. ⁵³ Te vēsú nde jíin táca ndajéhé yā ni jēhe ya ley yā nuū yō, te máá ní chí tu cásquicu ní, achí Esteban.

Jeē ní cajehni de Esteban

⁵⁴ Tāca jnúhun yáha ní cajini sōho, te yōhyo ni caquitī ni, te cánacayihí yuhu cájito nuū Esteban. ⁵⁵ Te máá Esteban chí ni cunuú Espíritu Santo jíin de. Te ni jito de ichi ándiví, te ni jini de jeē ndíndēe núu néne Yaā Dios, te índichi Jesús ichi ndáváha ya. ⁵⁶ Te ni cahān de:

Vijna te jíto ri jeē núne andiví, te jíto ri nuū maá Yáa ní nduu tēe, índichi yā nuū cujēhnu ya lado váha Yaā Dios, achí de.

⁵⁷ Yūcuán na te ni cajesi un sōho, te ni cacana cóhó, te inuú-ni ni candonda siquī Esteban. ⁵⁸ Te ni caquehen Esteban cuango jíin de nde yatā ñúu. Te tēe ni cacahān yaá un jíin ndíhi jnáhan de ni cachucú de ticāchí de ndíto iin tēe suchí nání Saulo, te ni cacani de yuū xinī Esteban. ⁵⁹ Te níni

jéē cácani tāca téē un yúū xinī de te ni jicān tahu de nuū yā:

Tátā Jesús jeē cúu ní Jitoho ná, naquihín ní ánuá na vijna, áchí de.

⁶⁰ Te ni jecuiñī yití de te ni cahān jee de:

Tátā Yaā Dios, ma quénehen ní cuéchi siquī i jeē casáha i jíin ná, áchí de.

Súcuan ni cahān de te ni jihī-ni de.

Jeē ní jito xeēn Saulo ñayuu cácandíje

8

¹ Te Saulo, ni nujnahan ni de jeē ni jíhī Esteban.

Te quívi un ní caquejéē de cájito xeēn ndasí de ñayuu cácandíje Jesús ini ñuu Jerusalén, te jeē yúcuan cúu jeē ní cajitē núu ñayuu cácandíje cuangoo i ní Judea jíin ní Samaria. Te tēē apóstol chí tu ní cájitē núu de. ² Te sava tēē yíñuhún núu Yaā Dios, ni cachindūji de Esteban. Te yōhyo ni candahyū de jeē ni jíhī Esteban. ³ Te Saulo chí jito xeēn de ñayuu cácandíje, te quívi de ndijnahan vehe te jní de tēē, ñahan, chúhun de i vecāa.

Jeē ní canacani i jnūhun Yaā Dios ndañúū Samaria

⁴ Te tācá ñuu nuū cuángoo tāca ñayuu ní cajitē núu un ní canacani i jnūhun ndese jnáma Yaā Dios ñayuu.

⁵ Te ni jinū Felipe ñn ñuu ndañúū Samaria, te nuū ñayuu yúcuan ní nacani de jnūhun Cristo, Yaā ní jeni Yaā Dios jeē jnáma ya yohó. ⁶ Te tāca ñayuu ní cacutútú un ní cajini nahín váha i tāca jnūhun ni nacani Felipe, te ni cajito i tācá jniñu jéhnú ni sáha de. ⁷ Chí cuehē ñayuu cándoho tachī ni canduvāha i, te cácana cóhó táchī un ní caquendacoo. Te cuehē ñayuu ni íjin jíin ñayuu ríngo ni canduvāha. ⁸ Te jeē yúcuan ní cacusí teyí ni ñayuu ñuu ún.

⁹ Te ini ñuu un néne ñn tēē nání Simón, te tēē tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē ñn tēē cújéhnú téyí cúu máá de.

¹⁰ Te nde tēē cácujeñnu jíin ndivii cuiti ñayuu, cájetáhú ndasí i jnūhun cáhán

de, te ni cajeni ni maá i te ni cacahān i:

Tēē yáha ní jēhe Yaā Dios cuehē poder nuū de, áchí i.

¹¹ Te cájetáhú váha i jnūhun cáhán de, chí cuehē tiempo ni sáha de jniñu stáhú ní canaa ni i ni cajito i. ¹² Te nuū ni jíin Felipe, ni nacani de jnūhun váha ndese ndácu Yaā Dios jniñu, jíin jnūhun Jesucristo, te ni cacandíje i te ni cajendute i, cúu tēē cúu ñahan. ¹³ Te suni máá Simón ni candíje de te ni jendute de, te ni jica cuu de jíin Felipe. Te ni naa ni de jito de tācá jniñu jéhnú jeē sáha Felipe jeē steén jeē cújéhnú Yaā Dios.

¹⁴ Te cáyūcu tēē apóstol ñuu Jerusalén, te ni canihín de jnūhun jeē ñayuu Samaria ni cacandíje i jnūhun Yaā Dios. Te ni catají de Pedro jíin Juan cuangoo de yūcuán. ¹⁵ Te ni jinūcoo de, te ni cajicān tahu de jehē ñayuu un návāha na quívi Espíritu Santo ini anuá i jíinahan i. ¹⁶ Chí ná tu quívi ya ini anuá ni ñn i, chí máá-ni jeē ní cajendute i jeē ní cacandíje i Jitoho yō Jesús. ¹⁷ Yūcuán na te Pedro jíin Juan ni casoó de ndaha de xinī i jíinahan i, te ni quívi Espíritu Santo ini anuá i.

¹⁸ Te ni jito Simón jeē súcuan casoó apóstol ndaha de xinī ñayuu ún te súcuan quívi Espíritu Santo ini anuá i, te cúní de cuāha de xūhun núu tēē apóstol návāha nihín de poder un núu.

¹⁹ Chí ni cahān de:

Cúní na jēē cuāha ní poder yáha núu na, návāha núu ndé ñayuu soó ná ndaha ná xinī i te quívi Espíritu Santo ini anuá i, áchí de.

²⁰ Yūcuán na te ni cahān Pedro jíin de:

Na náa xūhun ró je jnahnū ndetū rō siquī jeē jéni ni rō jeē jíin xūhun te cuu cuaan ró táhū jeē véji nuū Yaā Dios.

²¹ Ma nihín tahu rō jeē sáha ró jniñu yáha, chí tu íyó ndáa anuá rō nuū Yaā Dios. ²² Núu súcuan te jíini ñuhún jéē stóo rō jnūhun jeē jéni néé ni rō súcuan te cahān ndahú ró jíin Yáa Dios, te máá yá sanaa te cone cáhnu ni yā siquī jeē jéni néé ni rō súcuan. ²³ Chí jíiní

rī jeē cucuésún ni rō síquī jeē sáha ri jniñu yáha. Te tāca jēē neé jēni ni rō ni cunuú un jíin ró, achí Pedro jíin de.

²⁴ Yūcuán na te ni cahān Simón jíin de:

Cacān tahu ni jēhē na jíináhan ní nuū maá Jítoho yō návāha tú jnahnū ndetū na nájnūhun ni cahān ní, achí de.

²⁵ Te Pedro jíin Juan ni cacahān cají de ndese cáandíje de jnūhun Yaā Dios. Te jeē cuánungoo de ichi ñūū Jerusalén, te tijni ndañūū Samaria ni canacani de jnūhun jeē jnáma ya ñayuu.

Felipe jíin tée nación Etiopía

²⁶ Yūcuán na te ni cahān ndajéhe maá Jítoho yō jíin Felipe:

Quihin ichi te quihīn rō ichi sur, ichi jeē quenda Jerusalén cuahān nde ñuu Gaza, achí yá.

Te ichi chúcuan chi máá ñuhun téhe cúu. ²⁷ Te ni quihin Felipe ichi cuahān de. Te nde nación Etiopía ni quiji ñn tēe eunuco jeē ndíso jniñu de cúu de tesorero nuū ñáhan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios ñuu Jerusalén. ²⁸ Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnūhun Yaā Dios nde jenahán. ²⁹ Te máá Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

³⁰ Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajnūhún de tēe ún:

¿A jécūhun ni ni jnúhun jeē cáhu ní chí tuú? achí de.

³¹ Te ni cahān maá tée un jíin Felipe:

¿Te ndese jecūhun ni ná? Chi tú na tēe castūhun núū ná ndese cúu ún, achí de.

Te ni cahān de jíin Felipe jeē na cáa de conēne ndúú de jíin de ini carreta.

³² Te jnūhun cáhu de tutu iī un cáhán suhva:

Nájnūhun lanchi jeē cuahán tī nuū cúu tī, súcuan ni casáha ñayuu jíin yá.

Te nájnūhun ñn londe quitī sáte jēē tu ndáhyú tī, súcuan ni sáha ya, chi tú na vé ni cáhán cuitī yā ná ni cajicān i cuēchi síquī yā.

³³ Te hora jeē ní cajēhe i jnūhun canu yā, tu ní casáha ndaā i síquī yā jíin jnúhun ndaā,

te ni cajehni i ya ini ñayīvi yáha.

Te coo cuehē ñayuu candíje nuū yā jeē ma cánda ni ñn ñayuu cahu i ñayuu ún.

Achí.

³⁴ Yūcuán na te ni cahān tēe Etiopía un:

Cava vāha ni ní cachi ni núū ná, ¿ndé síquī cahán tēe ni nacani jnūhun yáha? ¿A síquī maá de chí síquī ñnga tēe? achí de jíin Felipe.

³⁵ Yūcuán na te ni nacani Felipe jnūhun vāha Jesús nuū tée ún, chi ni quejé de ni castūhún de jnūhun jeē ní cahu tēe ún, jíin táca gá jnūhun jeē yosó núū tútu yā. ³⁶ Te níni cuángoo de ichi ún te ni jinūcoo de nuū ñúhun ndute, te ni cahān tēe Etiopía:

Yāha ñúhun ndute ¿te á tú cuu cuandute ná? achí de.

³⁷ Te ni cahān Felipe:

Cuu te núu cándíje ñihin ni ndé jíin ini jíin ánuá ni táca jēē ni sáha Jítoho yō Jesús jehē yō, achí de.

Te ni cahān tēe Etiopía:

Cándíje ná jēē Jesucristo cúu máá Séhe Yaā Dios, achí de.

³⁸ Te ni sáha de jeē na jécuiñī carreta de, te ni nuu ndindúú de cuangoo de ichi véyí núū ñúhun ndute ún, te ni scuándute Felipe tēe Etiopía. ³⁹ Te nuū ní quendacoo de nuū ndúte, te Espíritu maá Jítoho yō ni sáha ya jeē ní ndoñúhún-ni Felipe. Te tēe Etiopía vésú tuá ni jíto de nuū Felipe, te cúsiñi ni de cuahān de. ⁴⁰ Te ni nane Felipe ñuu Azoto. Te nácani de jnūhun ndese jnáma ya ñayuu, cuahān de táca ñuu nde ni jinū de Cesarea.

Jeē ní nasāma ini Saulo ni sáha Jesucristo
(Hch. 22.6-16; 26.12-18)

9

¹ Te Saulo chi máni cáhán de jeē cáhni de tāca ñáyuu cá candíje i máá Jítóho yō, te jeē yúcuán ní jehēn de nuū sutú cujéhnú ga. ² Te ni jicān de carta jeē cahán jeē quihín de tācá vehe iī sinagoga ñuu Damasco te cuhni de tēe ñahan jeē cá candíje i Jesús, quiiji de jíin i ñuu Jerusalén nuú. ³ Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndéé ñn luz nuū de. ⁴ Te ni cotúú-ni de nuū ñūhun, te ni jini sōho de ñn jnūhun cáhán jíin de:

Saulo, Saulo, ¿najehe jíto xeēn rō ruhū? achí.

⁵ Te ni cahān maá de:

¿Na nihín cúu jeē cahán, Tátā?

Te ni cahān yā jíin de:

Máá rí cúu Jesús, te jeē jíto xeēn rō ñayuu cá candíje i ruhū cúu jeē jíto xeēn rō ruhū. Te jeē sáha rō súcuán cúu nájnūhun stiquí jeē tu jéndíje ti te jéñú yatá tí xinī pulla, te súcuán stóho ti maá tí, achí yá.

⁶ Te máá de chi quísi i de jeē yūhú de, te ni cahān de:

Tátā, ¿na vé cuní ni jéē sáha ná núu súcuán? achí de.

Te ni cahān maá Jítóho yō jíin de:

Ndocuññi, quiví ró ini ñuu, te yūcuán iyó ñn tēe jeē cachi nuū rō na vé cúu jeē cánuú sáha rō, achí yá.

⁷ Te tēe cuango jíin Saulo, ni canaa ndasí ni de cájini sōho de ndusu jeē cahán, te tu ní cájito cuiti de nuū jeē cahán un. ⁸ Yūcuán na te ni ndocuññi Saulo. Te ni nducú de coto de, te tuá cúu coto de, te ni cajññi tēe ún ndaha de ni jinūcoo jíin de nde ini ñuu Damasco. ⁹ Te yūcuán ní condee de unī quiví. Te tu ní cúu cuiti coto de, ni tú na vé ni yéji de, ni tú na vé ni jíhi de.

¹⁰ Te ñuu Damasco néne ñn tēe cándíje, nání de Ananías. Te máá Jítóho yō ni steén ndijin ya maá yá nuū de te ni cahān yā jíin de:

Ananías, achí yá.

Te máá de ni cahān de jíin yá:

Naun ní sáña, Tátā, achí de.

¹¹ Te ni cahān maá Jítóho yō jíin de:

Quihin ichi te quihín rō calle jeē naní Calle Derechá, te vehe Judas cajñūhun ró ñn tēe nání Saulo ñuu Tarso, chi jícán tahu de. ¹² Te nájnūhun ni jito ndijin de jeē maá rō, Ananías, ni jinū rō, te ni soó rō ndaha ró xinī de, te ni nanune tinūú de, achí yá.

¹³ Yūcuán na te ni cahān Ananías:

Tátā, cuehē ñayuu cácahān jeē tēe yúcuán yōhyo jíto xeēn de ñayuu cá candíje i nihín ñuu Jerusalén. ¹⁴ Te vijna ni quee de yāhá, chi sutú cácujehnú ni catejññu de véji de jññi de tāca ñáyuu cácahān ndahú i jíin ní, achí de.

¹⁵ Te ni cahān maá Jítóho yō jíin de:

Cuáhán, chi máá rí ni nacaji tēe un jéē quihín de nacani de jnūhun ri nuū tāca ñáyuu nación Israel jíin núu ñáyuu tāca gá nación nde jíin núu tāca rey. ¹⁶ Chi stéén rí nuū de jeē cánuú ndoho de cuehē jnūndóho jeē siquí rí, achí yá.

¹⁷ Yūcuán na te cuahān Ananías. Te ni quiví de ini vehe nuū néne Saulo, te ni soó de ndaha de xinī Saulo, te ni cahān de:

Hermano Saulo, máá Jítóho yō Jesús, Yaā ní quenda ndijin nuū ní ichi jeē véji ní, ni tají yá sáña véji ná núu ni návāha na nánune tinūu ní, te návāha na cúnuú Espíritu Santo yā jíin ní, achí de.

¹⁸ Te ni nanune-ni tinūu Saulo, chi ni nungoo-ni nájnūhun soó chācá ní condihyū tinūú de ún. Te ni ndocuññi de ni jendute de. ¹⁹ Yūcuán na te ni nacaji de staā, te ni nanihín ni de. Te ní condee de jecu quiví jíin tēe cá candíje jeē cáyucú ini ñuu Damasco.

Jeē ní nacani Saulo jnūhun ini ñuu Damasco

²⁰ Te ni quejéé-ni de nacani de jnūhun Jesús ini tācá vehe iī sinagoga, achí de jeē Jesús cúu Sēhe Yaā Dios.

²¹ Te tāca ñáyuu ni cajini sōho jnūhun cáhán de ni canaa ni i, te ni cacahān i:

¿A násūu tēe yáha cúu jeē yóhyo jíto xeēn de tāca ñáyuu Jerusalén jeē cájicān tahu nuū Jesús? Te siquí yúcuán ní quee de yāha jéē cúhni de

ñayuu cá candíje, te quihín de jíin i nuū sutú cá cujéhnú núú, áchí i.

²² Te víhyá gā ni nacani Saulo jnūhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú ñuu Damasco, tu ní cánihín de modo cahān de jeē tu íyó ndáā jeē cahān Saulo.

Jeē ni cácu Saulo nuū jnáhan de hebreo

²³ Te ni yāha cuehē quivī. Te jnáhan de hebreo ni casquijnáhan jnūhun de jeē cáhni de Saulo. ²⁴ Te ni nihín Saulo jnūhun jeē cándito de nduú ñuú táca yéhyí pared jeē ní condúu ndihyú ñuu ún. ²⁵ Yūcuán na te ñn jecuáā te tēe cá candíje ni caquihin de Saulo, te ini ñn jīca cáhnu ní cascúun de Saulo jicā pared ún, te súcuan ni cácu de.

Jeē ní najinū Saulo ñuu Jerusalén

²⁶ Te nuū ní najinū de ñuu Jerusalén, te cúní de najnáhan de jíin tēe cá candíje. Te ni cayūhu tēe un ní cajito de Saulo, chí tu ní cá candíje de jeē ní nduu Saulo tēe cándíje nuū Jesús. ²⁷ Te Bernabé cuahān de jíin Saulo nuū cáyūcu tēe apóstol, te ni nacani de jnūhun nuū tēe ún ndese ni jini Saulo nuū máá Jítoho yō ichi nuū cuahán de, jíin jéē ní cáhān yā jíin de, jíin jéē jéhnú-ni ni nacani de jnūhun Jesús ini ñuu Damasco. ²⁸ Te ni condee Saulo ñuu Jerusalén ni jica de jíin táca tēe apóstol. ²⁹ Te jéhnú-ni ni nacani de jnūhun máá Jítoho yō. Te jnáhan ñuu de hebreo jeē cácahān yuhu griego, ni castáhān jnáhan jíin de, te máá tēe un cácu ni de cahni de Saulo. ³⁰ Te ni cajini táca hermano cá candíje, te ni cajendēca de Saulo nde ñuu Cesarea. Te yūcuán ní canatají de Saulo cuanuhun de nde ñuu de Tarso.

³¹ Te ñayuu cá candíje Jesús jeē cáyūcú Judea jíin Galilea jíin Samaria, tuá ni cájito xeēn ñayuu i. Te ni ije ga i jíin jnūhun ya, te cándiso íyo i nuū máá Jítoho yō. Te Espíritu Santo ni chindéé ñáhān yá i te ni nducuehē gā i.

Jeē ní nduvāha Eneas

³² Te tāca lado jécondēhe Pedro ñayuu cá candíje, te suni ni jecondēhé de ñayuu cá candíje cáyūcú ñuu Lida.

³³ Te yūcuán ní jini de nuū ñn tēe nání Eneas jeē ní cuu unā cuiyā cáa de chí ni íjin de. ³⁴ Te ni cahān Pedro jíin de:

Eneas, Jesucristo cúu Yaā nasávāha ya rohó. Ndocuiñī te natuu rō yuu ró, áchí de.

Te ni ndocuiñī-ni tēe ún. ³⁵ Te tāca ñayuu cáyūcú ñuu Lida jíin ndúhvā Sarón ni cajito i jeē ní nacaca Eneas, te ni casquéndōo i tāca jnūhun jeē tu íyó ndáā te ni cá candíje i máá Jítoho yō.

Jeē ní natecu Dorcas

³⁶ Te nde ñuu Jope ni íyo ñn ñahan cándíje, nání ña Tabita, te nuū yūhu griego nání ña Dorcas. Te ñahan yāha máni jniñu váha ni sáha ña, te ni sáha ña caridad ni chindéé ñáhān ña ñayuu cúmanī nuū. ³⁷ Te tiempo yūcuán ní quejéé cuéhyī jíin ña, te ni jihī ña. Te ni cascúchi i ndīyī ún, te ni cajequin i ndīyī un ndé ini cuarto xinī véhe. ³⁸ Te yajni íne ñuu Lida jíin ñuu Jope, te tēe cá candíje ñuu Jope ni cajini jnūhun de jeē néne Pedro ñuu Lida, te ni catají de uū tēe cuacana de Pedro, te ni cacahān de:

Ma cucuéé ní na quíhín yachī yō ñuu Jope, achí de.

³⁹ Yūcuán na te ni quihin Pedro ichi cuahān de jíin tēe ún. Te nuū ni jínū de, te ni cacao tēe un jíin de nde xinī véhe nuū catú ndīyī ún. Te táca ñahan viuda ni candicó ndúu ña de cándahyū ña, te cástéén ña táca sahma jíin tícāchi jéē ní sáha Dorcas te ni saja ña nde na técu ña. ⁴⁰ Yūcuán na te ni ndacu Pedro jniñu jeē na quéndacoo ndihī ñayuu ún quingoo i nde yatā véhe. Te ni jecuiñī yití de ni jicān tahu de, te ni nandió cóto de nuū catú ndīyī ún, te ni cahān de:

Tabita, ndocuiñī ní, áchí de.

Te máá ña ni ndacoto-ni ña te ni jito ña nuū Pedro, te ni nucōo-ni ña. ⁴¹ Te ni jni de ndaha ña, te ni ndonehen de ña. Yūcuán na te ni nacana de xinī ñayuu cá candíje nde jíin ñahan viuda ni ndīvicoo i, te ni steén de ña nuū i jeē

ni natecu ña. ⁴² Te ni jitē jnūhun jniñu yáha ñí ñuu Jope cuahān, te cuehē ñayuu ni cacandíje i jnūhun máa Jítoho yō. ⁴³ Te cuehē quivī ni ndōo Pedro ini ñuu Jope, néne de vehe ñn tēe sáha curtir ññ, nání de Simón.

Pedro jíin Cornelio

10

¹ Te ini ñuu Cesarea ni iyo ñn tēe nání Cornelio, ni cuu de capitán grupo soldado jeē naní Italiano. ² Te cúu de tēe ndíso iyo nuū Yaā Dios nde jíin ndíhi ñayuu vehe de, te yōhyo caridad ni tēe cúu de, chi jéhe de xūhun núu ñáyuu hebreo cándoho ndáhú, vēsú nasūu tēe hebreo cúu de. Te níní jíicán tahu de nuū Yaā Dios. ³ Te ñn quivī ni steén ndijin yā nuū tēe yáha nájñuhun cahuní jehíni, te ni jito de jeē ñn ndajéhé máa Yáā Dios ni quivī ya nuū néne de. Te ni cahān yā jíin de: Cornelio, achí yá.

⁴ Te máa de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jíin de:

Je chíhi Yaā Dios cuenta jeē jíicán tahu rō jíin jéē sáha ró caridad. ⁵ Vijna te tají ró jecu tēe na quíngoo de nde ñuu Jope, quicana de Simón jeē suni nání de Pedro, na quíji de. ⁶ Chi néne núu de vehe tocayo de Simón, tēe sáha curtir ññ, te ndéé vehe ún yajni yumar. Te máa de castūhun núu rō na vé cúu inga jeē cánuú sáhá ró, achí ndajéhé yā.

⁷ Te ndajéhé yā jeē ni cáhān jíin Cornelio, cuahān-ni ya. Te ni cana de uū mozo de jíin ñn soldado jeē yíñuhún núu Yaā Dios, chi cúcáhu ni de jeē squícu vāha tēe ún. ⁸ Te ni nacani ndíhi de jnūhun nuū táca tēe ún, te ni tají de cuangoo nde ñuu Jope.

⁹ Te inga quivī un cájica de ichi cuangoo de, te cuacuyajni de ñuu Jope. Te je yajni cahuxí uū cúu, te suu hora un ní caa Pedro siquī véhe chi cándaā, te yūcuan cácan tahu de. ¹⁰ Te ni quee sōco chíji de, te ni cuni de caji de staā. Te sáá casáha ña ndeyu te ni steén ndijin yā nuū de. ¹¹ Te ni jito de

jeē núne andiví. Te ni jito de nájñuhun ñn sahma manta jité cáhnu te núhni jnáhan ndicúún punta, te ni cuun vēji nuū de. ¹² Te chíji un cáñuhun ndinuū quiti, táca quiti cúún ndaha jíin táca cóo jíin táca quiti cándava. ¹³ Te ni jini sōho de ñn jnūhun ni cahān:

Pedro, ndocuiñí te cahni rō táca quiti jíñā, te caji rō tī, achí.

¹⁴ Te ni cahān Pedro:

Ma cáji na, Tátā, chí tu yéji cuiti na táca quiti jeē cahán ley ni jéē tú vāha caji na tí, chí nájñuhun jeē tu cáhīyo ndoo tí nuū ní, achí de.

¹⁵ Te ni cahān tucu jnūhun un jíin de:

Achí rí jeē iyó vāha caji rō táca quiti jíñā, chí ni sándoo rí, te ma cahán máa ró jeē tu cáhīyo ndoo tí, achí. Te súcuan ni steén caji yá nuū de jeē cúu quihín de nuū ñáyuu vēsú násūu jnáhan ñuu de hebreo cúu.

¹⁶ Te uní jínu ni cahān súcuan jíin de. Te sahma un ní ndaa cuanuhun andiví. ¹⁷ Te níní nácani ndasí ni Pedro na vé cuní cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún. ¹⁸ Te cácahān jee de cácajnūhún de núu yūcuan ndéé Simón jeē suni nání de Pedro. ¹⁹ Te níní nácani ga ni Pedro siquī jeē ní jito ndijin de ún, te Espíritu Santo ni cahān yā jíin de:

Ni quecoo uní tēe cánanducú róhó. ²⁰ Ndocuiñí te nanuu ró, te ma cáni ni rō jeē tú vāha quihín rō jíin de, vēsú nasūu jnáhan ñuu rō hebreo cácuu de, chí máa rí ni tají rí de vējicoo de, achí yá.

²¹ Yūcuán na te ni nanuu Pedro nuū tēe ni tají Cornelio, te ni cahān de:

Máa ná cúu tēe cánanducú ní. ¿Te na siquī vējicoo ní núu na núu súcuan? achí de.

²² Te ni cacahān mozo un:

Cornelio, tēe cúu capitán, ni tají de sañá. Te tēe ndaā, tēe ndíso iyo nuū Yaā Dios cúu de, te táca ñáyuu hebreo suni cácahān i jeē tēe vāha cúu de. Te ni cahān ñn ndajéhé yā jíin de jeē na cána de níhín jéē ní vehe de te chusóhó de jnūhun cahān ni jíin de.

²³ Yūcuán na te ni cahān Pedro jíin mozo un jéē na cúcoo de ini vehe ún, te ni candōo de yūcuán. Te nuū ní cundijin, te ni quihin Pedro ichi cuahān de jíin mozo un. Te suni cuango jecu hermano cácandíje ñuu Jope jíin de.

²⁴ Te nde inga quivī ni jinūcoo de ñuu Cesarea. Te Cornelio ndétu de jinūcoo Pedro, chi ni nastútú de tāca jnāhan de jíin tāca amigo de jeē qui-jnāhan vāha ga de jíin. ²⁵ Te nuū ni jíin Pedro jijnāhan de, te ni quenda Cornelio ni cahān de jíin Pedro, te ni jecuiñī yití de jeē chiñúhún de Pedro nuú. ²⁶ Te Pedro ni ndonehen de Cornelio, te ni cahān de:

Ndocuiñī ní, chi sāñá suni ñn tēe-ni cúu ná, áchí de.

²⁷ Te cándajnūhún de ni quivīcoo de ini vehe. Te ni jito Pedro jeē cáyūcu cuéhē ñayuu ini vehe de. ²⁸ Te ni cahān Pedro jíin ñayuu ún:

Je cájini vāha ni jíināhan ní jéē ley jeē cánevāha sāña ñayuu hebreo, cáhán jeē tú vāha jeē quijnāhan ná jíin ní quivīcoo ná vehe ní síquī jeē cúu ní ñayuu sñn nación. Te Yaā Dios chi ni steén yā nuū na jéē ma cujéē ni na núu ní ñn ñayuu. ²⁹ Jeē yúcuán cúu jeē vēji-ni ná, chi ni cana ní sāña, te tu ní sájéē ni ná. Te na cájnūhun ná nihín, ¿na síquī ni cana ní sāña? áchí Pedro.

³⁰ Yūcuán na te ni cahān Cornelio:

Vijna iyó cúun quivī nájñūhun máa hora yāha jéē cúu cahunī jehíni, te ndite ni ná chi súcuán chíñúhún ná nuū yā, te jícan tahu na ini vehe ná. Te ni quiji ñn ndajéhé yā nuū ná, te ndíndéé sahma ñūhun ya. ³¹ Te ni cahān yā jíin ná: Cornelio, je ni jini sōho Yaā Dios jeē jícan tahu rō, te chíhi ya cuenta jeē sāha ró caridad. ³² Núu súcuán te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chi tēe un néne de vehe tocayo de Simón, tēe sāha curtir ññ, te yajni yumar ndeé vehe de. Te quee tēe ún te castūhún de nuū rō jñūhun cánuú, áchí yá jíin ná. ³³ Súcuán ni cuu te ni tají-ni ná mozo na cuajēcoo de cana de níhín,

te na cútahū ná, chi vāha ni sāha ní jéē vēji ní. Te vijna ni candutútú ná yāha návāha tāca ná cuni sōho ná ndihi jñūhun Jitoho yō Yaā Dios jeē ni jéhe ya cahān ní, áchí de.

Jeē ní nacani Pedro jñūhun ya vehe Cornelio

³⁴ Yūcuán na te ni cahān Pedro:

Vijna te ni jini vāha ná jéē Yaā Dios inuú-ni sāha ya jíin tāca ñayuu, cúu ñayuu hebreo jíin ñayuu tāca gá nación. ³⁵ Chi cúsi ni yā jíin ñayuu tāca-ni nación núu cándiso iyo i nuū ya te cásaha i jniñu ndaā. ³⁶ Chi ni cahān yā jíin ñayuu Israel jeē ndívicoo tāca ñayuu nuū jñūhun manī yā jíin i sāha Jesucristo. Te máa yá cúu Jitoho tāca yóhó. ³⁷ Máa ní je cájini ní ndese ni cuu. Chi ná ni jíin ni nacani Juan jñūhun jíin jéē ni scuándute de ñayuu, te ni quejéé Jesús nacani ya jñūhun nde Galilea, te ni jité jñūhun un ní cáhnu Judea. ³⁸ Te cájini ni jéē Yaā Dios ni jéhe ya Espíritu Santo jíin poder nuū Jesús, Yaā ní jehnu ñuu Nazaret. Te cájini ni jéē ní jica cuu ya ni sāha ya jniñu vāha, te ni nasávāha ya tāca ñayuu jeē cándoho i sāha jexeén, chi Yaā Dios ni chindéé ñáhán yá Jesús. ³⁹ Chi máa ná cánacani cájini ná jñūhun tāca jniñu ní cajito ná ní sāha ya ní cáhnu Judea jíin ini ñuu Jerusalén. Yūcuán na te ni cajehni i ya, chi ni cata caa i ya jicā cruz. ⁴⁰ Te Yaā Dios ni nastécu yā máa Jesús nuū uní quivī, te ni ndiji ya nuū na ní cajito ná núu yā ni sāha Yaā Dios. ⁴¹ Te tu ní quíji ya nuū tāca inga ñayuu, chi nuū maá-ni tāca ná jeē jé ni nacāji Yaā Dios sāña jéē nacani ná jñūhun tāca jniñu jeē ní cajito ná. Chi ni cayejí na stāa ni cajihí ná ndute jíin yá ná ni nane ya jeē ní natecu yā. ⁴² Te ni ndacu ya jniñu nuū na jíināhan ná jéē na nacani ná jñūhun ya nuū tāca ñayuu te cahān cají ná jeē máa Yaā Dios ni jeni ya Jesús jeē sándaā yā jniñu ñayuu cátecu jíin ñayuu ní cajihí. ⁴³ Chi jñūhun Jesús cúu jeē ní cacahān tāca tēe ni canacani jñūhun Yaā Dios nde jenahán. Chi ni cacahān de jeē tāca ñayuu jeē candíje

i Jesús, cone cáhnu ni yā nuū cuéchi i, áchí Pedro.

Jeē ni quiví Espiritu Santo ini anuá ñayuu jeē násūú hebreo cácuu

44 Te níní cáhán gā Pedro táca jnúhun yáha te ni quiví-ni Espiritu Santo ini anuá táca ñayuu cájini nahín jnúhun ya jeē cahán de. 45 Te tēe hebreo jeē ni jínūcoo jín Pedro jeē suni cácandíje de Jesús, nahán ní canaa ni de ni cajito de jeē suni ni quiví Espiritu Santo ini anuá ñayuu jeē násūú hebreo cácuu. 46 Chi ni cajini sōho de cácahān ñayuu un sín yuhu, te cácahān i jeē yōhyo cújéhnu Yaā Dios. 47 Yūcuán na te ni cahān Pedro:

¿Ndé ñin casi jeē ma cuándute ñayuu yáha? Chi ni quiví Espiritu Santo ini anuá maá i, nájnūhun ni quiví ya ini anuá maá yó, áchí de.

48 Te ni cahān de jín i jeē na cuándute i siquī jeē ní cacandíje i Jesucristo. Yūcuán na te ni cacahān ndahú i jín Pedro jeē na quéndōo de jecu quiví jín i.

Jeē ní nacuāha Pedro cuenta nuū ñayuu cácandíje ini ñuu Jerusalén

11

1 Te tēe apóstol jín táca hermano cáyūcú Judea, ni canihín de jnúhun jeē súni ñayuu sín nación ni cacandíje i jnúhun Yaā Dios. 2 Te cuanuhun Pedro ñuu Jerusalén. Te sava tēe hebreo jeē cácandíje de ya ni cacahān de nuū Pedro:

3 ¿Najehē ni condee ní vehe ñayuu jeē násūú ñayuu nación yō cúu? Te ni yeji ni jín i, áchí.

4 Yūcuán na te ni nacani cájī Pedro jnúhun nuū téé ún ndihí ndese ni cuu siquī téé sín nación:

5 Néne ná ñuu Jope. Te níní jícán tahu na, te ni steén ndijin yā nuū ná, te ni jito ná nájnūhun ñin sahman manta jité cáhnu jeē nuhní jnáhan ndicúún punta, te nde ichi ándiví ní cuun ni quiji nuū ná. 6 Te ni jito vāha ná, te ni jini na jéé chíji un cáñūhun quiti cúún ndaha jín quiti xéén jín cóo jín quiti cándava. 7 Te ni jini sōho

na ñin jnúhun ni cahān jín ná: Pedro, ndocuiñi te cahni rō táca quiti jiñā, te caji rō tī, áchí jini ná. 8 Te ni cahān ná: Ma cáji na, Tátā, chi tu yéji cuiti na táca quiti jeē cahán ley ni jéé tu cáhīyo ndoo ti nuū ní, áchí ná. 9 Yūcuán na te jnúhun jeē véji nde ándiví ní cahān tucu jín ná: Ni sándoo maá rí tī, te ma cahán gā rō jeē tu cáhīyo ndoo ti, áchí jini ná. 10 Te unī jínu ni cahān súcuan. Yūcuán na te ni ndaa sahman un cuánuhun ándiví. 11 Te hora un ní jínūcoo unī tēe vehe nuū ni cóndee ná un, cánanducú de sãñá, te ñin jnáhan ñuu de Cesarea ni tají de vejicoo de. 12 Te maá Espiritu ni cahān yā jín ná jeē ma cáni ni na jéé tú vāha quihín na jín de. Te suni iñū hermano yáha ní jengoo jín ná, te ni quivícoo ná ini vehe tēe nání Cornelio. 13 Te tēe un ní nacani de jnúhun nuū na jínáhan ná jéé ní jito de ñin ndajéhé Yaā Dios, índichi yā ini vehe de, te ni cahān yā jín de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de. 14 Te tēe ún cachi de nuū rō ndese jnama Yaā Dios rohó jín ndihí ñayuu cáyūcú vehe ró, áchí yá. Achí Cornelio jín ná. 15 Te nuū ní quejéé ná cahán na, te ni quiví-ni Espiritu Santo ini anuá i jínáhan i, nájnūhun ni quiví ya ini anuá maá yó xihna gā. 16 Yūcuán na te ni nucūhun ni na jnúhun ni cahān maá Jítoho yō: Jendaá jeē maá ndute-ni ni scuándute Juan ñayuu. Te rohó jínáhan ró chí nájnūhun cuandute ró jín Espiritu Santo, cúu jeē cóndee yā ini anuá rō, achí yá. 17 Te suni ni jēhe Yaā Dios Espiritu yā nuū maá i nájnūhun ni jēhe ya nuū maá yó jeē cácandíje yó Jítoho yō Jesucristo. Núu súcuan ¿te ndé ñin cúu ná jéé cási ná jniñu jeē sáha Yaā Dios? áchí Pedro.

18 Súcuan ni cajini sōho de jnúhun yáha, te tuá ni cácahān de nuū Pedro, chí sa suhva ni cacahān de jeē yóhyo cújéhnu Yaā Dios. Te ni cacahān de:

Suni ni jēhe Yaā Dios jnúhun jeē na nacani ni ñayuu táca gá nación jeē stóo i cuéchi i návāha cotecu i ní cáni núu súcuan, áchí de.

Ñayuu cá candíje ini ñuu Antioquía

19 Te quiv̄ ní cajehni de Esteban ni quejé de cájito xeēn de ñayuu cá candíje, te jeē yúcuan ní cajitē nú ñayuu un táca ñuu cuango i, te ni jinūcoo i Fenicia jíin Chipre jíin ñuu Antioquía. Te ni canacani i jñuhun vāha ya nuū máni jnáhan hebreo i jeē cáyūcu yúcuan, te tu ní cánacani i jñuhun ya nuū inga ñayuu. 20 Te jecu tēe cá candíje jeē cáyūcu Chipre jíin ñuu Cirene ni jinūcoo de ñuu Antioquía, te suni nuū ñayuu táca nación jeē tu cájini i jñuhun ya ni canacani de jñuhun máá Jítóho yō Jesús jeē jnáma ya i. 21 Te máá Jítóho yō ni chindéé ñáhán yá de, te cuehē ñayuu ni castóo i jniñu jeē tu íyó ndáa te ni cacandíje i máá Jítóho yō.

22 Te ñayuu cá candíje ini ñuu Jerusalén ni cajini jñuhun i, te ni cataj́ i Bernabé cuahān de nde ñuu Antioquía. 23 Te nuū ni jínū Bernabé yūcuán, te ni jini de jeē yóhyo vāha ni sáha Yaā Dios jíin i, te ni cus̄ ndasí ni de. Te ni stihv̄ ní de táca ñayuu un jéé jíin ini jíin ánuá i na cóndihv̄ ní i squícu vāha i nuū máá Jítóho yō, te ma náyūhú i. 24 Chi tēe vāha cúu Bernabé, te ni cunuú Espíritu Santo jíin de, te cándíje nihin de. Te ni cacandíje cuehē ñayuu nuū máá Jítóho yō ni sáha de.

25 Yūcuán na te cuahān de nde ñuu Tarso cuananducú de Saulo. Te ni nanih̄in jnáhan de jíin Saulo, te ndéca de tēe un ní ndee de ñuu Antioquía. 26 Te ní ñin cuiyā ni candutútú de jíin ñayuu cá candíje yūcuán, te ni castéén de jñuhun ya nuū cuehē ñayuu. Te ñuu Antioquía cúu nuū xihna ñúhún gá ni caconaní ñayuu cristiano siqū jeē ní cacandíje i Cristo.

27 Te suni tiempo un ní quen-dacoo tēe cánacani jñuhun Yaā Dios ñuu Jerusalén cuango de nde ñuu Antioquía. 28 Te ñin jnáhan de jeē naní Agabo ni ndocuiñ̄ nuū hermano cá candíje. Te ni steén Espíritu Santo nuū de, te ni castūhún de jeē cóo ñin jnamā xeēn ní cáhnu. Te ni cuu jnamā

ún ñin parte tiempo jeē ní ndacu Claudio jniñu jeē ní cuu de rey. 29 Yūcuán na te ni candajnūhun tēe cá candíje ñuu Antioquía jeē cuáha ñin ñin de nasaa canda de cuáha de te tají de quih̄in cotecu hermano cáyūcú Judea. 30 Te súcuan ni casáha de. Te ni cataj́ de Bernabé jíin Saulo ni cajendēca de nuū tēe jéhnu cándiso jniñu nuū ñayuu cá candíje cáyūcú Judea.

Jeē ní jehni Herodes Jacobo, te ni chune de Pedro vecāa

12

1 Te suu tiempo un ní quejé rey Herodes jító xeēn de sava ñayuu cá candíje. 2 Te ni ndacu de jniñu jeē jíin espada na cáhni i Jacobo ñani Juan. 3 Te ni jini de jeē ní cacus̄ ni tēe hebreo jeē ni sáha de súcuan, te jeē yúcuan suni ni jñ̄ de Pedro. Te máá quiv̄ un ní cuu vico jeē yéji ñayuu pan jeē tu ȳhi levadura. 4 Te nuū ní jñ̄ de Pedro, te ni chune de vecāa, te ni jeni de cuñ grupo soldado jeē cóndito Pedro, cuñ cuñ soldado cúu jeē ñin ñin grupo. Chi cúní Herodes jeē na yáha vico un jéé cúu vico pascua te quenehen de Pedro vecāa un stéén de nuū ñayuu cuehē. 5 Te súcuan íne Pedro vecāa, te cándito soldado un de. Te ñayuu cá candíje chi nihin ni cajicān tahu i jehē Pedro nuū Yaā Dios jeē na cácu de.

Jeē ní quenehen Yaā Dios Pedro vecāa

6 Te jeni ni Herodes jeē na cundijin inga quiv̄ te quenehen de Pedro vecāa, te stéén de nuū ñayuu un núu. Te núhni Pedro jíin úu cadena, catú de quixí de mēh̄nu úu soldado jecuáa ún, te suni cáh̄in ga soldado cándito yéhyí vecāa ún. 7 Te suu jecuáa ún te sanaa-ni te ni jinū ñin ndajéhé máá Jítóho yō, te ni ndindéé ini vecāa. Te ni sqūhi ya Pedro, te ni natahū ni de. Te ni cahān yā:

Yach̄i ndocuiñ̄ rō, achí yá.

Te cadena nuhni ndaha de un ní canandaj̄i-ni. 8 Te ni cahān ndajéhé yā jíin de:

Nacuhni nīhin chīji ró, te nuquīhi ró ndíjēn rō, achí yá.

Te súcuan ni sáha de. Te ni cahān tucu ndajéhé yā jíin de:

Condii ticāchi ró, te condiquīn rō ruhū na quíhín yō, achí yá.

⁹ Te ni quenda de ndíquin de ya cuahān de jíin yá, te jéni ni de jeē násūu jéndaá cúu jeē sáha ndajéhé yā jíin de, chi jéni ni de jeē #n jeē ni stéén yā jíto ndijin de cúu. ¹⁰ Te ni yāha ya jíin de uū nuū cándito soldado. Te ni jinū yā jíin de yéhyí cáa nuū quénda de caca de calle, te yéhyí un ní nune iī-ni máá. Te ni quenda ya jíin de, te ni yāha de #n calle cuahān de. Yūcuán na te ni cujiyo-ni ndajéhé yā nuū de cuahān yā. ¹¹ Te ni nducájí ni Pedro te ni cahān maá ní cahān #n de:

Vijna te ni jini ndaā rī jeē ní tají máá Jítóho rī ndajéhé yā ni quiji, te ni jnama ya ruhū nuū Herodes jíin núu tāca ñáyuu hebreo jeē cáconi i sáha xeēn i jíin rí nuú, achí de.

¹² Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te yūcuan cáhiin tútú cuéhē ñáyuu cájicān tahu i jehē Pedro. ¹³ Te cáhán Pedro ni jinū de yéhyí fuera, te #n sūchi síhí nání Rode cuahān i jeē cúni i núu ndé #n cúu jeē cahán. ¹⁴ Te ni nacuni i tachí Pedro, te jeē ní cusī ni i te tu ní núne i yéhyí un, chi ni nandió cóo i te jínu i ni ndīvi i ini cuarto. Te ni castūhún i jeē ní quee Pedro índichi de yéhyí fuera. ¹⁵ Te ni cacahān jíin i:

Jeē cahán neé ró, achí.

Te máá i nīhin cáhán i jeē maá de cúu. Yūcuán na te ni cacahān:

Ndajéhé yā jeē ndíto Pedro cúu núu súcuan, achí.

¹⁶ Te víhyá gā cahán Pedro. Yūcuán na te ni canune i yéhyí, te ni canacuni i nuū de, te nahán ní canaa ni i cájito i. ¹⁷ Te máá de ni sáha de ndaha de jeē ma cúvaā gā i, te ni castūhún de ndese ni quenehen máá Jítóho yō de vecāa. Te ni cahān de:

Castūhun núu Jacobo jíin núu tāca gá hermano jeē ní quenehen ya ruhū vecāa, achí de.

Te ni quenda de cuahān de inga lugar.

¹⁸ Te nuū ní cundijin, te ni cacuvaā teyí soldado jeē tuá Pedro. ¹⁹ Te ni ndacu Herodes jniñu jeē na nánducú váha i Pedro. Te tu ní cánanihīn i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

Jeē ni jíhī Herodes

²⁰ Te yōhyo ni quīti ni rey Herodes nuū ñáyuu ñuu Tiro jíin ñuu Sidón. Te ñáyuu un ní candajnuhún i jeē inuú-ni quīvicoo ndihi i nuū rey un. Te ni casáha i amigo i jíin Blasto, tēe cújénu jéjníñu nuū rey un. Te ni cacahān ndahú i jíin de jeē na cáhán ndahú de jíin rey un jéē na ndéē ni de jíin i. Chi nde ñuu maá rey un cájeen i jeē cáyeji i. ²¹ Te ni jeni Herodes #n quivī. Te ni nucūhun de sahma yíñúhún de, te ni cucōo de mesa nuū ndácu de jniñu, te ni cahān de #n jnūhun jehū ni cajini sōho i. ²² Te ñáyuu un ní caquejéé i cacahān jee i jnūhun yíñúhún jíin de:

Nasūu tée-ni cúu ní, chi #n yaā cúu ní, achí i jíjnáhan i.

²³ Te máá hora un ní sáha-ni #n ndajéhé maá Jítóho yō jeē ní jni #n cuehyī xeēn rey Herodes, te ni cayejí tindácú de, te ni jihí de, chi ni sandúxí-ni de máá de te tu ní cáhán de jeē Yaā Dios cúu jeē cujénu.

²⁴ Te ni jítē gā jnūhun máá Jítóho yō, te cuehē ndasí ñáyuu ni cacandíje i tācá-ni lugar.

²⁵ Te ni jínu jniñu jeē ní quindecá Bernabé jíin Saulo jeē cótecu ñáyuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

Jeē ní caquejéé Bernabé jíin Saulo caca cuu de nacani de jnūhun ya

13

¹ Te mēhñu grupo ñayuu cácan díje ini ñuu Antioquía ni cahīyo tēe cástéén jíin tēe cácanani jñūhun Yaā Dios, te cácaní de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galilea. ² Te ñn quivī jeē cáhīyo ndite ni tēe yáha cáchiñúhún de nuū maá Jítóho yō, te ni cahān maá Espíritu Santo jíin de:

Cúni rī jeē sasín ró Bernabé jíin Saulo na quíngoo de jniñu jeē ní jeni ri de, áchí yá.

³ Yūcuán na te ni cajicān tahu ndite ni de, te ni casoó de ndaha de xinī Bernabé jíin Saulo, te súcuan ni catajī de ndíndúú tēe ún cuanacani de jñūhun nuū tāca ñáyuu.

Jeē ní canacani Bernabé jíin Saulo jñūhun ya nde Chipre

⁴ Te ni sáha Espíritu Santo jeē íchi ñū Seleucia cuango de. Te yūcuan ní quivīcoo de ñn barco cuango de nde Chipre, ñuhun jeē íne sín nuū ndúte. ⁵ Te ni jinūcoo de ñuu Salamina nuū cájecuñī barco, te ni canacani de jñūhun Yaā Dios ini tācá vehe íi sinagoga jnáhan hebreo de. Te suni cuahān Juan chindéé ñáhán jíin de. ⁶ Te ni cajica nuu de nā-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū ñn tēe hebreo nání Barjesús. Te tēe tásí cúu de, te cáhán stahú de jeē ñn tēe nácani jñūhun Yaā Dios cúu de. ⁷ Te tēe tásí un jéjníñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jñūhun Yaā Dios. ⁸ Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún. ⁹ Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū tēe tásí un. ¹⁰ Te ni cahān de:

Tēe sáha jniñu néé stahú ñáhán cúu ró, chí sēhe jexeén cúu ró te jési ró nuū tācá jniñu ndaā. Te tu jécuiñī ró jeē sáca núu ró síquī jñūhun ndaā maá

Jítóho yō návāha ma cándíje ñayuu nuū yā. ¹¹ Te máá Jítóho yō stóho ya rohó vijna, te cucuáá ró jeē ma cóto ga rō niāndii jecu quivī, achí Pablo.

Te ni cunee-ni nuū tēe tásí un, te quéndāha quéhiyú de cuahān de ndúcú de ndé vé jñí ndaha de stéén ichi nuū de quinhun de. ¹² Yūcuán na te ni jini gobernador jeē súcuan ni cuu, te ni cándíje de jñūhun máá Jítóho yō, te nāa ni de jini sōho de jñūhun ya.

Jeē ní coyūcu Pablo jíin Bernabé Antioquía ndañū Pisidia

¹³ Yūcuán na te ni quendacoo Pablo jíin Bernabé jíin Juan ñuu Pafos, te ni quivīcoo de barco te cuango de ñuu Perge ndañū Panfilia. Te yūcuan ní cusín Juan, te cuanhun de ñuu Jerusalén. ¹⁴ Te ni quendacoo Pablo jíin Bernabé ñuu Perge cuango de, te ni jinūcoo de ñuu Antioquía ndañū Pisidia. Te quivī ndétātu ní quivīcoo de ini vehe íi sinagoga, te ni cacucōo de. ¹⁵ Te ni cahu tutu ley yā jíin tutu ní catee tēe ni canacani jñūhun ya nde jenahán. Yūcuán na te tēe cácujeñnu ini vehe íi sinagoga, vii-ni ni catajī de tēe cahān jíin Pablo jíin Bernabé:

Amigo, núu íyó jñūhun cahān ni jēe stihví ni ni ñáyuu yáha, te cahān ní na cúni nahín i núu súcuan, áchí de.

¹⁶ Yūcuán na te ni ndocuñī Pablo te ni sáha de seña jíin ndaha de jeē nahín-ni coo ñayuu ún, te ni cahān de:

Níhín jnáhan ñuu yō Israel jíin níhín tēe jeē suni cáchiñúhún ní Yaā Dios, cuni nahín ní jijnáhan ní. ¹⁷ Máá Yāā Dios yohó ñáyuu Israel, ni nacāji ya jíi yō jijnáhan de. Te níni jēe cáyūcu tátú de ñuu Egipto, te ni sáha ya jeē ní nducuehē de. Yūcuán na te jíin poder maá yá ni quenehen ya de nación Egipto. ¹⁸ Te uū xico cuiyā ni cajica de nuū ñūhun téhé, te ni jendeyí ni yā jíin de jeē ní castívī de. ¹⁹ Te ni snāa yā uxā nación Canaán, te ni jēhe ya ñuhun un núu tāca jíi yō cúu tahū de. ²⁰ Yūcuán na te ni jeni ya tāca tēe ni candacu jniñu nuū de nájñūhun cuñ ciento uū xico uxī cuiyā, nde quivī ní cotecu Samuel, tēe ni nacani jñūhun

ya. ²¹ Yūcuán na te máá ñáyuu un ní cajicān i ñn rey, te ni jeni Yaā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl. ²² Te ni quenehen ya jniñu Saúl, te ni jeni ya David ni cuu de rey nuū i. Te ni cahān cají yá jnūhun de: Cúsiñ ni rī jín David sēhe Isai, chi sáha de tāca jéē cuní rī, achí yá.

²³ Te cáhán gā Pablo:

Te sēhe yucūn David ni cacu Jesús, Yaā ní jeni Yaā Dios jeē jnáma ya yohó ñáyuu Israel, chi súcuan ni jejnūhun ya. ²⁴ Te nde ná tu quejéé Jesús nacani ya jnūhun nuū ñáyuu, te ni nacani Juan jnūhun nuū tāca jnáhan ñuu yō Israel jeē na nácani ni i jeē stóo i cuēchi i, te cuandute i. ²⁵ Te nuū cuácuyajni jeē cúu Juan, te ni cahān de: Cándētu ró jéē quiji Cristo, te jéni ni rō jeē ruhū cúu, te nasūu rí cúu. Chi quiji ya, te cújéhnu ndasí yá jeē ni ndijēn yā tu cújéhnu ri tava rī, achí de.

²⁶ 'Amigo jijnáhan ní, tāca níhín jéē cácuu yó sēhe yucūn Abraham jín tāca níhín jéē suni cándiso Iyo ní núu Yaā Dios, chi cúní Yaā Dios jeē na cúní yō jnūhun yáha jeē cáhán ndese jnáma ya yohó. ²⁷ Chi tāca ñáyuu ñuu Jerusalén jín tāca téē cácujuhnu nuū i, tu ní cájecūhun ni i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahan quivī ndétātu ní cajini sōho i jnūhun ni cacahu jeē ní catee téē ni canacani jnūhun Yaā Dios nde jenahán. Te vēsú súcuan te tu ní cájecūhun ni i, te ni candonda i ni cacahān i jeē na cúu yā. Te súcuan ni casquícu i siquī tāca jnūhun jeē ní cacahān téē ni canacani jnūhun ya nde jenahán. ²⁸ Vēsú tu ní cánihín i ni ñn cuēchi siquī yā jeē cúu yā, te ni cacahān níhín i jín Pilato jeē na cúu yā. ²⁹ Te ná ni jīnu ni squícu siquī yā tāca jnūhun cáhán nuū tútu iī, te ni casnúu de ya jicā cruz, te ni cachindūji de ya ñn yaū ní jete jicā cáva. ³⁰ Te ni sáha Yaā Dios jeē ní natecu yā. ³¹ Te ñáyuu Galilea jeē ni jéngoo jín yá nde Jerusalén nde na técu yā, nuū maá i ni steén ndijin yā maá yá cuehē quivī

na ni natecu yā, te ñáyuu un cácuu jeē cánacani cájí jnūhun ya nuū tāca gā jnáhan yó hebreo vijna.

³² 'Te máá ná jijnáhan ná cánacani ná jnūhun vāha yáha núu ni jijnáhan ní jéē súcuan ni jejnūhun ya nuū tāca jí yō. ³³ Te jnūhun yáha ní squícu Yaā Dios nuū maá yó jeē cácuu yó sēhe yucūn de, chi ni nastécu yā Jesús. Chi suhva cáhán salmo uū jeē cahán yā jín Sēhe ya Jesús: Máá ró cúu Sēhe ri, te vijna ni sajéhnu ri rohó jéē cúu ri Tatá rō, achí yá. ³⁴ Te ni nastécu yā Sēhe ya Jesús návāha ma tehyú cuiti yā, chi suhva cáhán tutu iī jeē ní cáhán Yaā Dios nde jenahán: Te nihín maá ró tāca jéē vāha ni jejnūhun ri nuū David, achí. ³⁵ Te suni súcuan cáhán inga salmo jeē ní tee David jnūhun jeē cahán Jesús jín Yáā Dios: Ma cuáha ni jnūhun tehyū ná, chi jéjníñu ná núu ní te manī ni jín ná, achí. ³⁶ Te David chi jíní yō jeē ní jejníñu de nuū ñáyuu ní cotecu de jín, nájñūhun ni cuní Yaā Dios. Te ni jihī de, te ni quindūji de nájñūhun ni quindūji tāca jí yō, te ni tehyū de. ³⁷ Te Jesús, Yaā ní nastécu Yaā Dios, chi tu ní téhyú cuiti yā. ³⁸ Jeē yúcuan jíní ñūhún jecūhun ni ní, amigo, jeē Jesús cúu Yaā cóne cáhnu ni nuū tāca cuéchi yó. ³⁹ Chi ni canducú ní ndahva ni cuéchi ní jéē squícu ní ley jeē ni jéhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndáhva ndihī cuéchi ñáyuu jeē cácdíje i tāca jéē ni sáha ya jehē i. ⁴⁰ Núu súcuan te coto ní jijnáhan ní jéē ma ndóho ní tāca castigo jeē ní cacahān téē ni canacani jnūhun Yaā Dios nde jenahán, chi suhva ni cahān Yaā Dios:

⁴¹ Tāca róhó ñáyuu jeē casácatā, na cóto ró na castigo xeēn quiji siquī rō,

te naa ni rō coto ró, te cuu rō.

Chi tiempo maá ró te sáha ri jniñu xeēn

jeē ma cándíje cuiti rō jeē súcuan sáha ri vēsú nacani ñáyuu jnūhun un núu rō, achí yá.

Achí Pablo.

⁴² Te ni quendacoo Pablo jíin táca jnáhan de vehe i sinagoga jnáhan hebreo de. Te ñayuu sín nación ni cacahān ndahú i jíin de jeē inga quivī ndétātú nacani tucu de jnūhun yáha núu i. ⁴³ Te ni jitē ñayuu un cuángoo i. Te cuehē ñayuu hebreo jíin ñáyuu sín nación jeē ní cacandíje sahān hebreo te cáchiñúhún i nuū Yaā Dios, cuango i jíin Pablo jíin Bernabé. Te ni cacahān nīhin de jíin i jeē na cuíñi nīhin i jíin jnúhun jeē maní Yaā Dios jíin i.

⁴⁴ Te quivī ndétātú inga semana te je yajni ndihi ñayuu ñuu un ní candutútú i jeē cúni nahín i jnūhun Yaā Dios. ⁴⁵ Te nuū ní cajini tēe hebreo jeē ní candutútú cuéhē ñayuu, te ni cacucuésum ni de, te ni cacahān de jeē násūu jnúhun vāha cúu jeē steén Pablo, te ni cacahān neé de nuū Pablo. ⁴⁶ Yūcuán na te jéhnuni ni cacahān Pablo jíin Bernabé, áchí de:

Cánuú jéē xíhna gā nuū maá ní jeē cácuu ní jnáhan ñuu yō hebreo nacani ná jnúhun Yaā Dios, te tu ní cájetáhú ní. Núu súcuan te cuéchi máá ní cúu jeē ma nihín tahu ni cotecu ni ní cáni. Te vijna te quinacani ná jnúhun ya nuū ñáyuu táca nación jeē tu cájini i jnūhun ya. ⁴⁷ Chi suhva ni ndacu máá Jítóho yō jniñu nuū na jíjnáhan ná:

Ni jeni ri rohó jéē cúu ró nájjnūhun luz jeē steén ini anuá ñayuu táca nación,

chi ní ñayivī stéén rō jnūhun ri nuū ñáyuu jeē jnáma ri i, áchí yá.

Achí de.

⁴⁸ Te ñayuu sín nación, nuū ní cajini sōho i jnūhun yáha te ni cacusī teyí ni i. Te ni cacahān i jeē yōhyo vāha jnūhun cúu jnūhun máá Jítóho yō, te táca ñáyuu jeē ní nacāji Yaā Dios i jeē cótecu i ní cáni, ni cacandíje i. ⁴⁹ Te ni jitē jnūhun máá Jítóho yō cuahān ní región yūcuán. ⁵⁰ Te ñuu Antioquía cáyūcú ñahan cácuu nuū te cáchiñúhún ña Yaā Dios. Te tēe hebreo ni cascáhán de ña, te suni ni cascáhán de tēe cácujeñu ñuu ún, te ni cajito xeēn i Pablo jíin Bernabé te nde ni cascúnu i de cuango de. ⁵¹ Te ni

cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio. ⁵² Te vēsú súcuan te ñayuu cácuandíje un ní cunuú Espíritu Santo jíin i, te cácusī teyí ni i.

Jeē ní coyūcu Pablo jíin Bernabé ñuu Iconio

14

¹ Te ñuu Iconio ni quivīcoo Pablo jíin Bernabé ini vehe i sinagoga jnáhan de hebreo. Te jíin jnúhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sín nación ni cacandíje i. ² Te jnáhan de hebreo jeē tu ní cácuandíje, ni cascáhán de ñayuu sín nación, te ni cajeni ni i jeē násūu ñáyuu vāha cácuu ñayuu cácuandíje. ³ Te ni caquendōo Pablo jíin Bernabé yūcuán cuéhē gā quivī. Te jéhnuni ni canacani de jnūhun Jítóho yō, chi cácuahnu ni de ya jeē vāha quihīn jniñu un sáha ya. Te máá yá chi ni steén yā jeē iyó ndāā jnūhun jeē yōhyo vāha ni yā jíin i jeē canacani de, chi ni jēhe ya jeē sáha de jniñu jéhnuni jeē steén jeē cujéhnuni ya. ⁴ Te ñayuu ñuu un ní cacusīn ni i jíjnáhan i, sava i jíin tēe hebreo jeē tu cácuandíje de Jesús, te sava ga i jíin tēe apóstol. ⁵ Te ñayuu hebreo jíin ñáyuu sín nación jíin tēe cácuu tohō ni casquíjnáhan jnūhun jeē sáha xeēn jíin Pablo jíin Bernabé, jíin jéē cuáha yuū xinī de núu. ⁶ Te ni cajini de jeē súcuan cácuu sáha, te ni cajinu de cuango de nde ñuu Listra jíin ñuu Derbe ndañūu Licaonia jíin táca ñuu yajni yūcuán. ⁷ Te yūcuán ní canacani de jnūhun jeē jnáma ya yohó.

Jeē ní cajēhe i yuū xinī Pablo ini ñuu Listra

⁸ Te ñuu Listra néne ñin tēe jeē tu cúu caca, te tu jíca cuiti de chi nde quivī ní cacu de cácuójo de. ⁹ Tēe un ní jini sōho de jnūhun jeē cahán Pablo, te ni jito vāha Pablo nuū de, te ni jini de jeē candíje vāha tēe un jéē ndúvāha de. ¹⁰ Te ni cahān jee Pablo jíin de:

Ndocuñi, condichi rō, achí de.

Te ni scánda tēe un máá de ni nucōndichi-ni de, te ni quejéé de caca de. ¹¹ Te ni cajini ñayuu ún jniñu jéhu jeē ni sáha Pablo, te ni cacahān jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájñuhun cájica tēe, áchí i.

¹² Te ni cacahān i jeē Bernabé cúu yaā Júpiter, te Pablo cúu yaā Mercurio chí Pablo cúu tēe nácani jñuhun.

¹³ Te yajni yuñúu un néne veñuhun yaā Júpiter. Te máá sūtū jejniñu ini veñuhun un ní quihin de stiḡuḡ jñáhan ti te ni scutú de ti ita te vēji de nde nuū quívi i yuñúu, te máá de jíin ñáyuu ñuu un cécuni de cahni de stiḡuḡ un sócō de nuū Bernabé jíin Pablo nuú. ¹⁴ Te Bernabé jíin Pablo, tēe cácuu apóstol, ni cajito de jeē súcuan cécuni ñayuu un sáha i, te ni candatá de sahma de jeē steén de jeē castívi ndasí i jeē casáha i súcuan. Te ni quenendava de ni quívicoo de mēhñu ñáyuu cuehē ún, te ni cacana jee de:

¹⁵ Tátā jijnáhan ní, ma sáha cuiti ni súcuan, chí sañá suni tēe-ni cácuu ná nájñuhun máá ní jijnáhan ní. Te vējicoo ná nacani ná jñuhun vāha Yaā Dios nuū ní, chí cahān na jíin ní jeē ma sáha ga ni táca jniñu yáha jēé tu ndé jéjniñu cuiti, chí sa suhva na chíñúhún ní máá Yáa Dios, Yaā técu, Yaā ni sáha andívi jíin ñáyívi jíin ndute mar jíin táca gá jeē iyó ní cáhnu. ¹⁶ Te nde jenahán ní jēhe ya jñuhun jeē na sáha táca ñáyuu modo cécuni máá i. ¹⁷ Te vēsú súcuan te níni stéén yā ndese Yaā cúu ya, chí máni sáha ya jniñu vāha jíin yó, chí scúun ya saū, te sáha ya jeē cúu vāha itu yō, te jēhe ya jeē jíni ñúhún yó návāha caji yō te coo sī ni yō, achí ndíndúu de.

¹⁸ Te vēsú súcuan ni cacahān de, te yōhyo uhū ni cajesí de nuū ñáyuu un návāha tú socō i stiḡuḡ un núu de jeē chíñúhún i ndíndúu de.

¹⁹ Yūcuán na te ni quecoo jecu tēe hebreo ñuu Antioquía jíin ñuu Iconio, te ni cascáhán de ñayuu cuehē ún, te ni cajēhe i yuū xinī Pablo. Te ni caque-
nehen i de yatā ñúu ún, chí ni cajeni ni i jeē jé ni jihī de. ²⁰ Te tēe cécandíje

ni cacondúu de Pablo, te ni ndonda Pablo, te ni ndívi de ini ñuu. Te inga quívi ni quihin de ichi cuahān de jíin Bernabé nde ñuu Derbe.

²¹ Te ini ñuu un ní canacani de jñuhun jeē jnáma ya ñayuu, te ni cécandíje cuehē ñayuu ni casáha de. Te ni canandicó de cuanuhun de ñuu Listra jíin ñuu Iconio jíin ñuu Antioquía. ²² Te ni cahije ga ni ñayuu cécandíje yūcuan ní casáha de. Te ni castíhví ni de i jeē na cuíñi nihin i jíin jñuhun ya, chí ni cacahān de jeē níni quiji cuehē jñúndóho siḡuḡ yō te yūcuán na te jinū yō ñuu nuū ndácu Yaā Dios jniñu. ²³ Te tēcá ñuu ni cajeni de tēe jéhu cándiso jniñu condito de ñayuu cécandíje. Te ni cahíyo ndite ni Pablo jíin Bernabé nuū yā, te ni cajicān tahu de, te ni cacahān de jíin máá Jítoho yō jeē na cóto ya ñayuu ún chí cécandíje i máá yá.

Jeē cuánuhun tucu Pablo jíin Bernabé ñuu Antioquía ndañúu Siria

²⁴ Te ni cayāha de cuango de región Pisidia, te ni najinūcoo de región Panfilia. ²⁵ Te ni canacani de jñuhun ya ini ñuu Perge región Panfilia, te sáa te cuango de ñuu Atalia. ²⁶ Te yūcuan ní quívicoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahu ñayuu nuū Yaā Dios jehē de jeē na chíndéé ñáhán yá de jeē quíngoo de nacani de jñuhun. Te ni jīnu jniñu, te ni najinūcoo de ñuu ún. ²⁷ Te nuū ní najinūcoo de yūcuán, te ni casáha de junta jíin ñáyuu cécandíje, te ni canacani de jñuhun tēcá ndese cuehē jeē vāha ni sáha Yaā Dios jíin de, chí ni jēhe ya jñuhun jeē suni candíje ñayuu tēcá nación jeē tu ní cájini i jñuhun ya. ²⁸ Te ni caquendōo de yūcuan cuéhē quívi jíin ñáyuu cécandíje.

Síquḡ junta ñuu Jerusalén

15

¹ Yūcuán na te jecu tēe Judea ni quívicoo de ñuu Antioquía, te ni castéén de nuū tēcá hermano jeē núu tu sáha i circuncidar, nájñuhun cáhán ley jeē

ni jéhe ya nuū Moisés, te tú na modo cācu i. ² Te Pablo jíin Bernabé ni catejnáhan de jíin téé ún, te tu ní cúndaā. Te jeē yúcuan ní candajnūhún de jeē quíngoo Pablo jíin Bernabé jíin jecu gā tēe cācandíje un ndé ñuu Jerusalén, te yūcuán ndajnūhún de síquī jnúhun yáha jíin téé cācuu apóstol jíin téé jéhnú cāndiso jníñu nuū ñáyuu cācandíje yūcuán.

³ Te ñáyuu cācandíje un ní canachuhun íchí i de. Te ni cayāha de ichi Fenicia jíin Samaria, te canacani de jnūhun jeē suni ñáyuu tāca gá nación jeē tu ní cājini i jnūhun ya, ni castóo i jniñu jeē tu íyó ndāā te ni cacandíje i Yaā Dios. Te yōhyo ni cacusiñi tēcá hermano jeē ní canihīn de jnūhun jeē súcuan ni cacandíje ñáyuu ún.

⁴ Te ni najinūcoo de ñuu Jerusalén, te ñáyuu cācandíje yúcuan jíin téé apóstol jíin téé jéhnú cāndiso jníñu nuū ñáyuu un, ní cacusiñi de jeē ní najinūcoo jnáhan de ún. Te Pablo jíin Bernabé ni canacani de tāca jnúhun ndese cuehē jeē váha ni sáha ya síquī jníñu jeē ní canacani de jnūhun ya. ⁵ Te sava tēe grupo fariseo jeē cācandíje ni candocuiñi te ni cacahān:

Ñáyuu sīn nación jeē cācandíje i Jesús, jíini ñúhún jēé sáha i circuncidar nájñūhun cásáha máá yó, te cánuú ndacu yó jniñu nuū i jeē na squícu i ley jeē ni jéhe ya nuū Moisés, áchí.

⁶ Te tāca téé apóstol jíin táca téé jéhnú cāndiso jníñu nuū ñáyuu cācandíje, ni candutútú de junta návāha ndajnūhún de te sándaā de síquī jnúhun yáha. ⁷ Te tēcá de ni cacahān de ndese cājini ni de. Yūcuán na te ni ndocuiñi Pedro, te ni cahān de:

Hermano jijnáhan ní, je cājini vāha ni jēé je íyó tiempo jeē ní nacāji Yaā Dios sāña jēé quihín na núu ñáyuu sīn nación te nacani ná jnúhun nuū i jeē jnáma ya i, návāha candíje i Jesucristo.

⁸ Te Yaā Dios chí jíini yā ndese cāa ánuá ndihí ñáyuu, te ni steén yā jeē jetáhú yá i, chí suni ni jéhe ya Espíritu Santo nuū i jíjnáhan i, nájñūhun ni jéhe ya

nuū maá yó. ⁹ Te inuú-ni sáha ya jíin yó jíin máá i, chí síquī jeē suni ni cacandíje i jnūhun jeē jnáma ya i, te jeē yúcuan ní sándoo ya anuá i nuū tāca cuéchi i. ¹⁰ Te vijna ¿naun cācuni ní ndacu ní jniñu jeē na squícu i ley un? Chí tu nújnahan ni Yaā Dios jeē súcuan. Chí cācuni ní tee ní jniñu yí yáha síquī ñáyuu cācandíje ún, te ni tāca jíi yō tu ní cācundeyí de squícu de, te ni máá yó.

¹¹ Chí sa suhva cācandíje yó jēé jnáma ya yohó súcuan-ni síquī jeē yóhyo vāha ni maá Jítóho yō Jesús jíin yó, te suni súcuan-ni jnáma ya maá i, nasūu síquī jeē squícu i ley un, áchí de.

¹² Yūcuán na te tēe cuehē un ní cacuu nayúú de, te ni cajini nahín de jnūhun cacahān Bernabé jíin Pablo. Chí ni cacastūhún de jeē ni jéhe ya poder jeē ní casáha de tēcá jniñu jéhnú jeē steén jeē kujéhnú ya, ni cajito ñáyuu tēcá nación jeē tu cājini i jnūhun ya. ¹³ Te nuū ni jíinu ni cacahān Pablo jíin Bernabé, te ni cahān Jacobo:

Hermano jijnáhan ní, cuni sōho ní na cāhán na. ¹⁴ Ni nacani Simón Pedro jnūhun ndese ni quejéé nuú jniñu jeē jnáma Yaā Dios ñáyuu tēcá nación jeē tu cājini i jnūhun ya, chí suni mēhñu máá i nacāji ya ñáyuu jeē ndúu i ñáyuu maá yá. ¹⁵ Te quíjnáhan jnūhun ni cahān de yáha jíin jnúhun ni catee tēe ni canacani jnūhun Yaā Dios nde jenahán jeē yosó núu tutu i:

¹⁶ Achí Yāā Dios:

Nájñūhun ni cotúú vehe David cúu jeē tuá ndácu sēhe yucūn de jniñu, nájñūhun ni ndacu máá de jniñu nde jenahán.

Te ñn quivī te ndee rī

te jeē nasáha ri vehe de cúu jeē sáha ri jeē nandacu Sēhe yucūn de jniñu.

¹⁷ Súcuan sáha ri návāha tāca gá ñáyuu na nánducú i ruhū nde jíin ñáyuu tēcá nación jeē tu cājini jnūhun ri, tēcá i jeē cána ri i candíje i ruhū.

¹⁸ Súcuan cāhán máá Jítóho yō, te nde jenahán ní steén yā jnūhun yáha núu ñáyuu.

Achí tutu i.

¹⁹ Jeē yúcuán jéni ni na jéē ñáyuu t́aca gá nación jeē ní castóo i jniñu jeē tu íyó ndáa te ni cacandíje i máa Yáa Dios, ma stáhān yō i jeē ndácu yó jniñu jeē squícu i ley Moisés. ²⁰ Chi sa suhva na tée yó carta quihīn nuū i jeē ma cáji i ndeyu jeē ní sócō nuū ídolo, te ma cáca jnéni i, te ma cáji i cūñu quiti jeē jihí jeē tu jéti niñī tī, te ni ma cáji i niñī. ²¹ Jnūhun yáha-ni tee yó quihīn nuū i nájnūhun je cástéén nde jenahán. Chi nde jenahán je íyó tée cástéén jnūhun ley jeē ni jéhe ya nuū Moisés, te ndijnahan quivī ndétātu cácahu de ley un ini vehe iī sinagoga t́acá ñuu, áchí Jacobo.

²² Yūcuán na te tēe apóstol, jíin tée jéhnú cándiso jniñu, jíin ndivii ñáyuu cácaandíje, ni cacundaā ni de jeē nácāji de tēe quingoo jíin Pablo jíin Bernabé nde ñuu Antioquía. Te tēe ni canacāji de un cácuu Silas jíin Judas, te inga síhví de cúu Barsabás. Te cándiso jniñu de nuū t́acá hermano cácaandíje. ²³ Te ni cajendēca de carta jeē cahán suhva:

Máa ná cácuu tēe apóstol, jíin t́aca tée jéhnú cándiso jniñu nuū ñáyuu cácaandíje, jíin t́aca gá hermano yō. Te cátee ná carta yáha cuájeē nuū ni jíjnáhan ní, hermano, jeē cácuu ní ñáyuu sín nación jeē cáyūcu ní ñuu Antioquía jíin Siria jíin Cilicia. Cuandeyí ni ni jíjnáhan ní. ²⁴ Ni cajini jnūhun ná jéē ní quendacoo sava jnáhan ná yáha ní jengoo nuū ní, te jíin jnúhun jeē ní cacahān de te ni casáha jeē ní canacani ndasí ni ní, te ni cacuxíi ni ní, chi cándacu de jniñu jeē sáha ní circuncidar jíin jéē squícu ní jniñu cáhán ley jenahán jéē ni jéhe ya nuū Moisés. Te nasūu sáña ní cátají tée un jéē jeé de nuū ní. ²⁵ Jeē yúcuán ní cajeni ni ná, te inuú-ni ni cacundaā ni ná, te ni nacāji ná tée cuajēcoo nuū ni jíin úu hermano yō jeē maní yō jíin, cúu Bernabé jíin Pablo. ²⁶ Te ndindúú de je ni catana de máa de nuū jnúndóho vésú na cúu de jeē síquī jnūhun Jítoho yō Jesucristo. ²⁷ Núu súcuán te cátají ná Judas jíin Silas jeē nuū ní, te suni nájnūhun cáhán carta

yáha suni súcuán castūhún de nuū ni jíjnáhan ní. ²⁸ Chi máa Espíritu Santo ni steén yā ñn modo jeē ní cacundaā ni na jéē ma tée ná t́aca jniñu yí ley Moisés síquī ní, chi máa-ni jniñu yáha jéē cánuú gá: ²⁹ Ma cáji ni t́aca jéē ní casocō nuū ídolo, ni ma cáji ni níñī ni quiti jeē jihí jeē tu jéti niñī tī, te ma cáca jnéni ní. Te vāha squícu ní núu tuá sáha ní t́aca jéē yáha. Súcuán na cóo te sándeýí ni ní, áchí carta.

³⁰ Yūcuán na te tēe quingoo un cuángoo de nde ñuu Antioquía. Te ni cacana de xinī ñáyuu cácaandíje ni candutútú de junta, te ni cajēhe de carta un núu i. ³¹ Te ni cacahu i, te ni candusī ni i jeē ni níñī i jnūhun ndeyí ni nuū carta ún. ³² Te suni tēe cácanani jnūhun Yáa Dios cácuu Judas jíin Silas, te jíin cuéhē jnūhun ni cacahān de te ni candundeyí ni t́acá hermano un, te ni cahije ga ni i jíin jnúhun ya. ³³ Te ni coyūcú de yūcuán jecu quivī. Yūcuán na te hermano yúcuán ní canacuatáhu i nuū de jeē quinhun de nuū tée jeē ní catají de. ³⁴ Te Silas ni nujnahan ni de ni quendōo de yūcuán. ³⁵ Te suni ni caquendōo Pablo jíin Bernabé ñuu Antioquía, te máa de jíin sava ga tēe ni castéén de te ni canacani de jnūhun vāha máa Jítoho yō.

Jeē quihín Pablo inga jínu nacani de jnūhun ya

³⁶ Te ni cuu ga quivī, te ni cahān Pablo jíin Bernabé:

Vijna te na quícondēhe yó t́acá hermano yō ndijnahan ñuu nuū ní nacani yó jnúhun máa Jítoho yō, na cóndēhe yó ndese cáhīyo i, áchí de.

³⁷ Te Juan jeē suni nání de Marcos, cúní Bernabé jeē quihín tēe un jíin de. ³⁸ Te tu ní cúní Pablo jeē quihín tēe un jíin de, chi nde Panflia ni cusīn Marcos nuū Pablo jíin Bernabé, chi tuá ni chindéé ñáhán de ndindúú tée un síquī jniñu ya nde saá. ³⁹ Te nahán ní candajnūhun Pablo jíin Bernabé, te tu ní cácuandaā ni de síquī Marcos, te ni cacusīn de. Te Bernabé ni jeca de Marcos, te ni quivícoo de barco

cuango de nde Chipre, ñuhun jeē íne s̄in nuū ndúte. ⁴⁰ Te Pablo ni nacāji de Silas quih̄in jín de. Te t̄acá hermano cá candíje ni cajicān tahu de nuū maá Jítóho yō jeē siqūi jeē váha ni yā te na chindéé ñáhán yá Pablo. Te cuahān Silas jín Pablo. ⁴¹ Te ni cajica cuu de n̄í Siria jín Cilicia. Te t̄aca grupo ñayuu cá candíje ni cahije ga ni i jín jnúhun ya ni casáha de.

Jeē cuahán Timoteo jín Pablo jín Silas

16

¹ Yūcuán na te s̄aá te ni jinū Pablo jín Silas ñuu Derbe jín ñuu Listra. Te yūcuan néne ñin t̄e suchí cándíje, nání i Timoteo. Sēhe yí ñin ñahan hebrea cúu i, te ñahan cándíje cúu ña. Te tátá i chi t̄e griego cúu de. ² Te t̄acá hermano ñuu Listra jín ñuu Iconio cájejnúhún de Timoteo. ³ Te cúní Pablo condeca de Timoteo quih̄in de jín i. Te ni cahān Pablo jeē quih̄in i cuu i circuncidar, chi tu cúní Pablo jeē cahān ñayuu hebreo jeē tu ní squícu Timoteo costumbre un, chi ndih̄i ñayuu cájini i jeē t̄e griego cúu tátá i. ⁴ Te t̄acá ñuu nuū cuango de te ni castúhún de nuū ñayuu cá candíje jeē na squícu i máá jniñu jeē ní casāndaā t̄e apóstol jín táca t̄e jénu cáyúcú ñuu Jerusalén jeē cándiso jniñu nuū ñayuu cá candíje. ⁵ Te ñayuu cá candíje ni cahije ga ni i. Te ndijnahan quiv̄i ni cacandíje cuehē gā ñayuu.

Jeē ní jito ndijin Pablo ñin t̄e ñuu Macedonia

⁶ Te tu ní jéhe Espiritu Santo yā jnúhun jeē n̄acani de jnúhun ya n̄í Asia. Jeē yūcuan ní cayāha de ichi Frigia jín Galacia cuango de. ⁷ Te ni jinūcoo de nuū quijnáhan Misia jín Bitinia. Te cá cuni de quingoo de Bitinia, te máá Espiritu Jesús tu ní jéhe ya jnúhun quingoo de. ⁸ Te ni cayāha de ñin lado Misia cuango de ñuu Troas jeē íne yajni yumar. ⁹ Te ñin jecuáá te n̄ajnúhun ñin jēni ni jito ndijin Pablo, te ni jito de jeē índichi ñin t̄e ñuu Macedonia nuū de cáhán ndahú

jín de: Nehen ní ñuu ná Macedonia te chindéé ñáhán ní s̄aña jijnáhan ná, áchí. ¹⁰ Te súcuan ni jito ndijin de. Yūcuán na te s̄aña, Lucas, ni quijnáhan ná jín de. Te ni casátúhva ná jín de jijnáhan de jeē quingoo ná Macedonia, chi ni cajini cají ná jeē maá Yáa Dios táj yá s̄aña jijnáhan ná j̄eē castúhun ná nuū ñayuu yūcuan jnúhun jnama ya i.

Jeē ní coyūcu Pablo jín Silas ñuu Filipos

¹¹ Te jín barco ni quendacoo ná ñuu Troas, te cuango ndaā-ni ná ndé Samotracia, ñuhun jeē íne s̄in nuū ndúte. Te ñnga quiv̄i ni jinūcoo ná ñuu Neápolis. ¹² Te yūcuan ní quendacoo ná, te ni jinūcoo ná ñuu Filipos jeē cúu ñuu cuyénu ga íne Macedonia, chi máá ñayuu ñuu Roma ni casáha i ñuu i ún. Te ni coyūcu ná ñuu Filipos jecu quiv̄i. ¹³ Te ñin quiv̄i ndétātu ní quendacoo ná ñuu ún, te ni jengoo ná ñin yuyúte, chi yūcuan cúu ñin lugar nuū cájicān tahu ñayuu. Te ni cacucōo ná, te ni canacani ná jnúhun ya nuū t̄acá ñahan ní canataca yūcuán. ¹⁴ Te ñin ña nání Lidia jeē véji ña ñuu Tiatira, xico ña sahma ndih̄i j̄eē yáhu ga ndeé. Te máá ña níní chíñúhún ña Yáa Dios. Te ni jini sōho ña jnúhun canacani ná, te máá Jítóho yō Jesús ni s̄aha ya jeē ní candíje ña jnúhun jnama ya ña jeē ni cáhán Pablo. ¹⁵ Te ni jendute ña nde jín ñayuu cáyúcú vehe ña, te ni cahān ndahú ña jín ná:

Núu cá cucáhnu ni ni j̄eē candíje ndije ná máá Jítóho yō, te cuajeē ní coyūcu ní vehe ná, áchí ña.

Te ni cana fuerza ña s̄aña jijnáhan ná.

¹⁶ Te ñin quiv̄i te cuango tucu ná suu lugar nuū jéngoo ñayuu cájicān tahu. Te ni canajnáhan ná jín ñin sūchi síhí j̄eē ñúhun tach̄i ini i, te máá un s̄aha jeē cahán i t̄acá ndese coo te cúndaā jeē cahán i. Te sūchí un ní cajeen patrón i, návāha nih̄in de cuehē xūhun síqūi jeē cástúhún i nuū ñin ñin ñayuu ndese coo ichi núu. ¹⁷ Te sūchí un ndíquín i s̄aña jijnáhan ná cána jee i:

Tēe yáha cájejniñu de nuū Yaā Dios, Yaā cujénu téyí, te cácastūhún de ndese cācu ní nuū cuéchi ní jíjnáhan ní, áchí i.

¹⁸ Te cuehē quiví ni cuu súcuan te nde ni jnanini ni Pablo. Te ni ndió cóto de nuū i, te ni cahān de jíin táchí ún:

Jíin poder maá Jesucristo ndácu ri jniñu nuū rō jeē na quénda ró ini i quihīn rō, achí de.

Te hora un ní quenda-ni cuahān.

¹⁹ Yūcuán na te ni cajini patrón i jeē ma níhín gā i xūhún cuu de, te jeē yúcuan ní cajni de Pablo jíin Silas cuango jíin de nde vehe juzgado nuū cáyūcu tóhō. ²⁰ Te ni cajeni ún de nuū juez, tēe cásandaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i. ²¹ Te cájequin de inga costumbre jeē ma cúu cuatáhú cuiti yō, ni ma cúu sáha yó, chi tu jéhe ley nación yō jnūhun, chi ñayuu nación Roma cácuu yó, áchí.

²² Te suni ni candonda ñayuu siquī Pablo jíin Silas. Te tēe cácuu juez ni candacu de jniñu jeē na quénda sahma ndíndúú de te cani yujnu siquī de. ²³ Te nuū ni jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndíndúú tēe ún. ²⁴ Te jeē súcuan ni tahū jniñu nuū tēe ndíto vecāa te ni squíví de Pablo jíin Silas nde ichi íni gā, te ni squíví jehē de t̄sin yujnu ndéé yaū te ni cajihni de.

²⁵ Te nuū ní cuu sava ñuú, te cájicān tahū Pablo jíin Silas, te cájita de yaa íi nuū maá Yáa Dios. Te ñayuu cáhīn jíin de vecāa un ní cajini nahín i. ²⁶ Te sanaa-ni te ni jnāa nīhin téyí, te nde nuū cimienta vecāa un ní canā. Te ni canune-ni yéhyí vecāa ún, te ni canandajī-ni cadena jeē cánuhnī tāca ñayuu ún. ²⁷ Te ni natahū ni tēe ndíto vecāa, te ni jito de jeē núne yéhyí vecāa ún. Te ni tava de espada jeē cáhni de máa de núu, chi ni jeni ni de jeē ndivii cuiti ñayuu cáhīn vecāa un cuango i. ²⁸ Te ni cana jee Pablo:

Ma cáhni ni máa ní, chi cáhīn ndihí ná, áchí de.

²⁹ Yūcuán na te máa tēe ndíto vecāa ni cana de jeē na quíndeca i ñuhūn, te yachí ni quiví de ini vecāa. Te ni jecuiñi yití de nuū Pablo jíin Silas, te quísi i de jeē yūhú de. ³⁰ Te ni quenehen de Pablo jíin Silas, te ni cajnūhún de:

Tátā, ¿na vé cánuú sáha ná te jnama ya sãñá? áchí de.

³¹ Te ni cacahān de jíin tēe ún:

Candíje ní táca jēe ni sáha Jítoho yō Jesucristo jehē ní te cācu ní, te suni súcuan cācu ndihí ñayuu cáyūcú vehe ní, áchí de.

³² Te ni canacani de jnūhun máa Jítoho yō nuū tēe un jíin núu táca ñayuu cáyūcú vehe de. ³³ Te suu máa jecuaā yúcuan ní nacate tēe ndíto vecāa un núu ní catujī Pablo jíin Silas jeē ní cacani yujnu siquī de. Yūcuán na te ni jendute de jíin ndihí ñayuu cáyūcú vehe de. ³⁴ Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusī ni ndihí de vehe de jeē ní cacandíje de Yaā Dios.

³⁵ Te nuū ní cundijin, te tēe cácuu juez ni catajī de policía cuango jíin jnūhun jeē na siáá tēe ndíto vecāa un Pablo jíin Silas quingoo de. ³⁶ Te tēe ndíto vecāa un ní castūhún de jnūhun yáha núu Pablo:

Tēe cácuu juez ni catajī de jnūhun vēji jeē na siáá na níhín quingoo ní. Núu súcuan te quendacoo ní quihīn ní, te cuandeyí ni ní, áchí de.

³⁷ Te ni cahān Pablo jíin policía:

Cuehē ñayuu ni cajito i jeē ní cacani de sãñá, te ni tu ní cásandaā de xīhna gā núu ndaā jeē iyó cuéchi ná. Te ni cachuhun de sãñá vecāa, vēsú cácuu ná séhe nación Roma, te iyó ley jeē ma cúu sáha súcuan jíin ñayuu cácuu sēhe nación Roma. Te vijna ¿á quenehen sãhí de sãña cácuu de naún? Ma cúu cuiti. Na quícoo máa de quenehen de sãña jíjnáhan ná, áchí Pablo.

³⁸ Te ni canandió cóo policía ni castūhún de jnūhun yáha núu tēe cácuu juez, te ni cayūhú de jeē ní cajini sōho

de jnūhun jeē séhe nación Roma cácuu Pablo jíin Silas. ³⁹ Te ni quecoo tēe cácuu juez ún, te yōhyo ni cacahān ndahú jíin Pablo jíin Silas jeē na cóne cáhnu ni de. Te ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de. ⁴⁰ Yūcuán na te ni quendacoo de vecāa, te ni jengoo tucu de vehe Lidia, te ni cacahān de jnūhun ndeyí ni jíin táca hermano. Te ni caquihin de ichi cuangoo de.

Jeē ní cacuvaā ñayuu Tesalónica

17

¹ Te Pablo jíin Silas ni cayāha de ñuu Anfípolis jíin ñuu Apolonia cuangoo de, te ni jinūcoo de ñuu Tesalónica nuū iyó in vehe iī sinagoga jnāhan de hebreo. ² Te ni coyūcú de yūcuan únī semana, te tāca quívī ndétātu jéhén Pablo vehe iī sinagoga, nájnūhun sáha sáha de, te ni nacani de jnūhun ya nuū tēe un. ³ Te jíin jnúhun cáhán tutu iī ni steén de jeē súcuan ni jini ñúhún ndoho Cristo jeē cúu yā te natecu yā. Te ni cahān de:

Jnūhun nácani ná núu ni cúu jnūhun Jesús, te máa yá cúu Cristo, Yaā ní jeni Yaā Dios jeē jnáma ya yohó, áchí de.

⁴ Te ni cacandíje sava jnāhan de hebreo jíin cuéhē ñayuu griego jeē cáchiñúhún i Yaā Dios, jíin cuéhē ñahan cácuu nuū, te ni nduu inuú ni i jíin Pablo jíin Silas. ⁵ Yūcuán na te yōhyo ni cacucuésún ni jnāhan de hebreo jeē tu cacandíje, te ni castútú tēe cunéé jéé cájica cúxí-ni, te ni quejéé cácana ndee cuangoo. Te súcuan ni casaca núu de xiní ñayuu ñuu ún. Te ni jengoo de vehe Jasón cánanducú de Pablo jíin Silas jeē jnā de tēe un quíndēca de nuū ñayuu cuehē. ⁶ Te tu ní cánanihín de, te ni cañuhun de Jasón jíin sava ga hermano cuangoo de jíin núu tohó ñuu ún. Te jeē siquí Pablo jíin Silas ni cacana jee de:

Tēe jeē castívī xínī ñayuu ní ñáyiví, je ni quecoo de nde yāhá. ⁷ Te máa Jasón ni jēhe núu vehe cáyūcu tēe ún. Te tēe ún tu cájetáhú de ley maá

rey yohó ñayuu Roma, chi sa suhva cácahān de jeē cájetáhú de nuū inga rey jeē naní Jesús, achí de jíināhan de.

⁸ Te ñayuu jíin tēe cácuu tohó ni cajini sōho i jnūhun yāha, te ni cacuvaā i siquí. ⁹ Te Jasón jíin táca gá hermano ni castóo de xūhún de, chi ni cacahān tohó un jíin de jeē nde núu tají de Pablo jíin Silas quingoo de inga ñuu, yūcuán na te nacuāha tohó un xūhun de. Te súcuan te ni casiáá de Jasón jíin táca gá hermano cuangoo de.

Jeē ní coyūcu Pablo jíin Silas ñuu Berea

¹⁰ Yūcuán na te tācá hermano un, yachī-ni ni cascáca de Pablo jíin Silas jecuáa un, cuángoo de nde ñuu Berea. Te nuū ni jinūcoo de yūcuán, te ni quívīcoo de vehe iī sinagoga jnāhan ñuu de hebreo. ¹¹ Te jnāhan ñuu de hebreo cáyūcu yūcuan, vāha ga ni maá de vésú jnāhan ñuu de hebreo cáyūcú ñuu Tesalónica, chi vāha ni cacusí ni de jíin jnúhun ni cacahān Pablo jíin Silas. Te ndijnahan quívī cánanducú yúcún de nuū tutu iī núu súcuan cáhán chí tuú. ¹² Jeē yūcuan ní cacandíje cuehē jnāhan ñuu de hebreo te suni nde jíin cuéhē ñayuu griego, cúu tēe cúu ñahan cácuu nuū. ¹³ Te jnāhan ñuu de hebreo cáyūcú ñuu Tesalónica ni cajini jnūhun de jeē suni nde ñuu Berea nácani Pablo jnūhun Yaā Dios, te ni caquihin de ichi cuangoo de Berea, te suni yūcuan ní castóna de ñayuu siquí Pablo. ¹⁴ Yūcuán na te tācá hermano ni catajī-ni de Pablo cuahān de nde yumar. Te ni ndōo Silas jíin Timoteo ñuu Berea. ¹⁵ Te jecu hermano ni cajendēca de Pablo nde ñuu Atenas. Te ni cahān Pablo jíin de jeē cahān de jíin Silas jíin Timoteo jeē na quíngoo yachī de nuū Pablo. Te vendicoo de ñuu Berea.

Jeē ní ine Pablo ñuu Atenas

¹⁶ Te níni ndétu Pablo jeē jinúcoo Silas jíin Timoteo nuū de ñuu Atenas, te ni jini de jeē ñayuu ñuu ún yōhyo cáchiñúhún i ídolo, te ni nacani cuíhyá ni de. ¹⁷ Te ini vehe iī sinagoga ni cahān de jnūhun ya jíin jnāhan ñuu de

hebreo jiín táca gá tēe cáchiñúhún Yáa Dios. Te suni táca quíiví ni nacani de jnūhun ya nuū táca ñáyuu cáhīn nuū yáhu. ¹⁸ Te sava tēe cáscuáha jnūhun jeē castéén grupo epicúreo, jiín inga sava tēe cáscuáha jnūhun jeē castéén grupo estoico, ni caquejéé cacahān jiín Pablo. Te sava ni cacahān:

¿Na jnūhun cáhān tēe tlóhlé yáha? áchí.

Te sava ga de ni cacahān:

Tēe nácani jnūhun táca yáa jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndíyi. ¹⁹ Te ni cajeca de Pablo cuango de, te ni jinūcoo de nde lugar nuū naní Areópago nuū cándutútú ñáyuu cándacu jniñu, te ni cacahān de:

Cácuni ná cachi ni núu na jnúhun jeé jéē steén ni. ²⁰ Chi cáhān ni jnúhun jeé ná tu cuni cuiti na jíjnáhan ná, te jeé yúcuan cáculi ná jecūhun ni na síquī táca jnúhun yáha, áchí jíin de.

²¹ Chi táca ñáyuu ñuu Atenas jíin táca ñáyuu inga ñuu jeé cáyūcu núu i yūcuán, tuá na inga jniñu cácusīgā ni i jíin chi máa-ni jeé cuni nahín i jnūhun jeé chí jéē cahán i jnūhun jeé.

²² Te índichi Pablo mēhñu ñáyuu ní candutútú núu naní Areópago, te ni cacahān de:

Tēe ñuu Atenas jíjnáhan ní, jíto ná jéē yóhyo cáchiñúhún ní yaā maá ní. ²³ Chi ni jica nuu ná, te ni jecondēhe ná nuū jeé cáchiñúhún ní, te ni jito ná ñn altar jeé yosó jnúhun yáha: Yáha cúu altar yaā jeé ná tu cuni yō jnūhun ya, achí. Te máá Yáa un jéē cáchiñúhún ní, vésú ná tu cuni ni jnúhun ya, suu jnūhun Yaā un cúu jeé nácani ná núu ní vijna.

²⁴ 'Chi Yaā un cúu Yaā jeé ni sáha ñayiví jíin táca ndihí jeé iyó, te máá yá cúu Jitoho andiví jíin ñáyiví, te tu ndéé yá ini veñūhun cásáha ñayuu. ²⁵ Te ni tu cúmaní ni ñn nuū yā jeé cuáha ñayuu nuū yā, chi máá yá sáha jeé técu ñayuu, jíin jéē stáa i tachí i, jíin jéē nihín i ndihí jeé jíni ñúhún i.

²⁶ Te ni sáha ya jeé chíji ñn-ni yucūn ni tahū táca ñáyuu jeé ní nduu táca nación, návāha coyūcú i ñí cáhnu ñayiví, te ni tana yā cuiyā cotecu ñayuu jíin lugar coyūcú i jíjnáhan i. ²⁷ Te súcuan ni sáha ya chi cúni yā jeé nanducú yó yā, chi núu nanducú yó yā te cuni yō jeé iyó yá, chi yajni-ni cúu ya jíin ñn ñn yó. ²⁸ Chi máá yá sáha jeé iyó yó jíin jéē cátecu yō jíin jéē cáanda yō. Chi suni súcuan ni cacahān sava tēe ñuu ni jéē cáta yaa: Suni nde yucūn maá yá cácuu yó, áchí. ²⁹ Te núu yucūn Yaā Dios cácuu yó, te ma cáni ni yō jeé ídolo oro chí plata chí yūu cúu ya, chi cájeni ni ñayuu jeé súcuan cáa ya, te súcuan cásavāha i ídolo. ³⁰ Te ni jendeyí ni yā síquī jeé tu ní cájecūhun ni i ñí ndé saá, te vijna chi ndácu ya jniñu jeé ñáyuu ñí cáhnu ñayiví na nácani ni i jeé stóo i cuēchi i. ³¹ Chi Yaā Dios, je ni jeni ya quíiví jeé ndaā sándaā yā síquī ñayuu ñayiví, te ni jeni ya Jesús jeé maá yá sándaā. Te je ni steén cají Yaā Dios nuū táca ñáyuu jeé maá yá ni jeni Jesús, chi ni nastécu yā Jesús, achí Pablo.

³² Te jeé ní cajini sōho i jnūhun jeé nátecu ndíyi te sava i ni cacahān catá i, te sava ga i ni cacahān i:

Vāha te núu cuu cuni sōho na jnúhun cáhān ni ndé inga jínu, áchí i.

³³ Te ni quenda Pablo mēhñu ñáyuu un cuáhān de. ³⁴ Te cuahān jecu ñayuu jíin Pablo, te ni cacandíje. Te ñn de cúu Dionisio, tēe ndútútú jíin tēe cácejéhnu cásáha junta nuū naní Areópago, jíin ñn ñahan naní Dámaris, jíin jecu gā i.

Jeé ni íne Pablo ñuu Corinto

18

¹ Yūcuán na te ni quenda Pablo ñuu Atenas, te cuahān de nde ñuu Corinto. ² Te yūcuan ní jito de nuū ñn jnáhan ñuu de hebreo, naní Aquila, te tēe región Ponto cúu de. Te sáa jecu-ni tiempo ni quee de jíin ñasihí de Priscila jeé ní quenda de Italia, chi rey Claudio ni ndacu de jniñu jeé na quéndacoo táca ñáyuu hebreo ñuu

Roma, jeē cúu capital Italia. Te ni jinū Pablo vehe Aquila jiín Priscila jeē cáyūcú de ñuu Corinto. ³ Te suni jniñu sáha tēe un sáha Pablo, chi cáquicu de ñi cuu vehe. Te ni quendōo Pablo jiín tēe ún, te ni casájniñu de. ⁴ Te tāca quívī ndétātu ní jehēn Pablo vehe iī sinagoga ni nacani de jnūhun ya, te ni nducú ndéyí de jeē na cándíje ñayuu jnūhun Jesús, cúu jnáhan ñuu de hebreo jiín ñayuu tācá nación jeē tu ní cájini i jnūhun ya.

⁵ Te ni jinūcoo Silas jiín Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chi máni jnūhun ya nácani cáji de nuū ñayuu cácuu jnáhan de hebreo, jeē maá Jesús cúu ya Cristo, Yaā jeē cáñūhun ni i quiji ya. ⁶ Te ni caquejéé i ni cacahān i siquī jnúhun ún, te ni cacahān xeēn i nuū Pablo. Te máá de ni caja de sahna de jeē cúu seña jeē stóo de i jiín cuéchi i, te ni cahān de jiín i:

Cuéchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihīn na núu ñayuu tācá nación jeē tu cájini i jnūhun ya, te nacani ná jnúhun ya nuū i, áchí de.

⁷ Te ni quenda de ini vehe iī sinagoga, te ni jinū de vehe iñ tēe nání Justo ni condee de. Te chíñúhún tēe un Yáā Dios, te vehe tēe un néne yajni xiin véhe iī sinagoga. ⁸ Te Crispo, tēe cújéhnū ini vehe iī sinagoga, ni cándíje de máá Jítóho yō nde jiín ndihī ñayuu vehe de. Te cuehē ñayuu ñuu Corinto ni cajini nahín i jnūhun nácani Pablo, te ni cacandíje i, te ni cajendute i. ⁹ Te iñ jecuáá ni sáha máá Jítóho yō jeē ní jito ndijin Pablo yā ni cahān yā jiín de:

Ma yūhu ró ni ma cási rō yuhu ró, chi níni nacani ró jnúhun ri. ¹⁰ Chi ndító ri rohó, te ma cúu sáha xeēn ni iñ ñayuu jiín ró. Nacani ró jnúhun ri, chi coo cuehē ñayuu cándíje jnūhun ri ñuu yáha, áchí yá.

¹¹ Te ni condee Pablo yūcuán iñ cuiyā yosáva ni steén de jnūhun Yaā Dios nuū ñayuu ún.

¹² Te ná cúu Galión gobernador Acaya, te ñayuu hebreo jeē cúu jnáhan ñuu Pablo, iñ cáhnu-ni ni candonda i siquī Pablo. Te ni cajeca i de cuangoo i jiín de nde vehe juzgado. ¹³ Te ni cacahān i jiín Galión:

Tēe yáha yōhyo scáhán de tāca ñayuu jeē inga modo chíñúhún i Yaā Dios, suu iñ modo jeē cúu contra siquī ley, achí i.

¹⁴ Te quejéé Pablo cahān de núu, te ni cahān-ni Galión jiín ñayuu hebreo un:

Ñayuu hebreo jijnáhan ró, núu iñ cuéchi xeēn cúu, te cánuú cuni nahín rí jnūhun cácahān rō núu. ¹⁵ Te tuú, chí máni siquī jnúhun-ni jiín síquī ley maá ró jiín síquī tēe cástéén cúu. Te na sándaā maá ró siquī jniñu yáha, chi tu sándaā rí siquī maá iñ jeē súcuan-ni, áchí de.

¹⁶ Te ni cahān de nuū i jeē na quíngoo i fuera. ¹⁷ Yūcuán na te ñayuu griego ni cajni i Sóstenes, tēe cújéhnū ini vehe iī sinagoga, te máá fuera yehyí vehe juzgado ni cacani i de, te Galión chi tu ní sáha cuíti de cuenta.

Jeē ní najinū Pablo ñuu Antioquía, te cuahān de vuelta unī jeē nacani de jnūhun ya

¹⁸ Te cuehē gā quívī ni condee Pablo ñuu Corinto. Yūcuán na te ni nacuatáhú de nuū tācá hermano yúcuan, te Aquila jiín ñasihí de Priscila cuangoo de jiín Pablo, te ni jinūcoo de ñuu Cencrea. Te yúcuan ní saté lii Pablo xinī de, te súcuan stéén de jeē squícu de nuū Yaā Dios jeē ni jéjnūhun de. Te ni quívicoo de barco jiín Aquila jiín Priscila quihīn de región Siria. ¹⁹ Te ni jinūcoo de ñuu Efeso, te yúcuan ní caquendōo Aquila jiín Priscila. Te ni jehēn-ni Pablo vehe iī sinagoga, te ni cahān de jnūhun ya jiín jnáhan ñuu de hebreo jeē cándutútú yúcuan. ²⁰ Te ni cacahān ndahú i jiín de jeē na cónēne de jecu gā quívī jiín i, te tu ní jéhe de jnūhun. ²¹ Chi ni nacuatáhú de nuū i, te ni cahān de:

Cánuú jéē nuhūn ná ñuu Jerusalén cone ná vico. Te núu cúní Yaā Dios te ndee tucu ná núu ní, áchí de.

Te ni quenda de ñuu Efeso, te ni quiv̄i de barco cuahān de. ²² Te ni jinū de ñuu Cesarea, te ni jehēn de ñuu Jerusalén. Te nuū ní ndih̄i ni cahān de jín grupo ñayuu cá candíje yūcuán, te cuanuhun de ñuu Antioquía. ²³ Te ni coyūcú de yūcuán jecu quiv̄i, te sáa te ni quenda tucu de cuahān de ni jica cuu de ní Galacia jín Frigia. Te ñayuu cá candíje ni cahije ga ni i jín jnúhun ya ni sáha de.

Jeē ní nacani Apolos jnúhun Jesús ñuu Efeso

²⁴ Te ñuu Efeso ni quee ñn tē hebreo nání Apolos, te tē ñuu Alejandro cúu de. Te vāha nācani de jnúhun ya, chí vāha jín de jnúhun jeē cahán tutu i. ²⁵ Te je ni cutūhva vāha tē un jín jnúhun máa Jítoho yō Jesús, vēsú jín de máni máa jnúhun ya jeē ni stéén Juan ná ni scuándute de ñayuu, te ndih̄v̄i ni de stéén cají de jnúhun ya nuū ñayuu. ²⁶ Te jénu-ni ni nacani de jnúhun ya ini vehe i sinagoga. Te ni cajini sōho Aquila jín Priscila jnúhun nācani de, te ni cajeca de Apolos cuango s̄in de, te ni cacastūhun yúcún ndindúú de jnúhun ya jeē ná tu cuni Apolos. ²⁷ Te cúní Apolos quih̄n de nde región Acaya. Te je cá candíje sava ñayuu yúcuan ní sáha Yaā Dios siqūi jeē vāha ni yā. Te tācá hermano ñuu Efeso ni cachindéé ñáhán i de, chí ni catee i carta quih̄n de jín nuū ñayuu cá candíje cáyūcú Acaya jeē na cuátáhú i Apolos. Te nuū ni jín de yūcuán, te vāha ni chindéé ñáhán de tāca ñayuu cá candíje un jín jnúhun ya. ²⁸ Te nuū tāca ñayuu ñuu un ndé jín jnáhan ñuu de hebreo jeē cáyūcu yúcuan, ní steén cají de ndese cástiv̄i tāca jnáhan hebreo de siqūi jnúhun ya. Te tu ní canih̄n jnáhan de un jnúhun cahān siqūi jeē ni stéén de, chí jín jéē cahán tutu i ni steén de jeē Jesús cúu Cristo, Yaā jeē cáñuhun ni de quiji ya.

Jeē ni íne Pablo ñuu Efeso

19

¹ Te níní néne Apolos ñuu Corinto, te ni yāha Pablo ichi síqūi ñuu Efeso,

te ni nanuu de ni jinū de máa ñuu ún. Te yūcuan ní nijnáhan de jín tijni tē cá candíje. ² Te ni cajñuhún de tē ún:

¿A ní canih̄n ní Espiritu Santo ná ni cacandíje ní, chí ná tuú? áchí de.

Te ni cacahān de jín Pablo:

Tuú, chí ni ná tu nih̄n na jnúhun jeē iyó Espiritu Santo, achí de.

³ Yūcuán na te ni cahān Pablo:

¿Na siqūi ni cajendute ní núu súcuan? áchí de.

Te ni cacahān de:

Ni cajendute ná síqūi jnúhun ni steén Juan, achí de.

⁴ Te ni cahān Pablo:

Jeē ní scuándute Juan ñayuu cúu jeē ni stéén de jeē na nācani ni i jeē stóo i cuēchi i, te ni cahān de jeē na cándíje i máa Yāā quiji jeē cúu Cristo Jesús, áchí Pablo.

⁵ Te nuū ní cajini sōho tē un jnúhun yāha, te ni cajendute de jeē ní cá candíje de máa Jítoho yō Jesús. ⁶ Te ni soó Pablo ndindúú ndaha de xin̄i tāca tē ún, te ni quiv̄i ní Espiritu Santo ini anuá de jijnáhan de, te ni cacahān de s̄in s̄in yuhu te ni canacani de jnúhun ya. ⁷ Te ni iyo nájnūhun ux̄i uū jnahán tē.

⁸ Te un̄i yoō ni jehēn jehēn Pablo vehe i sinagoga. Te jénu ni nacani de jnúhun ya, te ni nducú ndéȳi de jeē na cándíje ñayuu jnúhun ndese ndácu Yaā Dios jniñu. ⁹ Yūcuán na te sava i ni cacun̄hni ni i te tu ní cá candíje i, chí sa ni cacahān neé i siqūi jnúhun vāha Yaā Dios jín ñayuu cánataca. Jeē yúcuan ní cujiyo-ni Pablo nuū ñayuu ún, te ñayuu cá candíje cuango i jín de. Te ndijnahan quiv̄i ni steén de nuū ñayuu ún ini escuela ñn tē nání Tiranno. ¹⁰ Te súcuan ni sáha de uū cuiyā, te tāca ñayuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jnúhun máa Jítoho yō Jesús. ¹¹ Te ni jēhe Yaā Dios poder nuū Pablo jeē sáha de cuehē jniñu jénu téȳi. ¹² Te nde pañú jín sahma jeē ní jñ de ni cajengoo jín nuū ñayuu cácuñu, te ni canduvāha-ni i cuehȳi cándoho i, te ni quendacoo tach̄i ini i cuango.

13 Te jecu tē hebreo cájica cuu de jeē quénehen de tachī ini ñayuu, te ni cajeni siquí ni de jeē suni jíin poder maá Jítóho yō Jesús quenehen de tachī, te suhva ni cacahān de jíin táca táchī:

Jíin poder Jesús jeē nácani Pablo jnūhun ya, cáhān nihin ri jíin ró jeē na quénda ró quíhīn rō, achí de.

14 Te súcuan ni casáha uxā sēhe yí ñn tē hebreo nání Esceva, cúu de ñn sutū cujéhnū. 15 Te ná ni casáha de, te ni cahān-ni tachī ún:

Je jíin rī Jesús, te suni jíin rī Pablo. Te róhó jíināhan ró ¿ndé tēe cácuu ró jeē cuatáhú rí rohó? achí jíin de.

16 Te tēe ndóho tachī un ní ndonda de, te ni cundeyí de siquí ndihúxá tēe ún. Te ni sáha xeēn ndasí de jíin ndé ni catujī te ni cacuvichí lí ni quendacoo vehe un ní cajinu cuangoo. 17 Te jnūhun yáha ní cajini táca ñáyuu cáyūcú ini ñuu Efeso, cúu ñayuu hebreo cúu ñayuu táca gá nación, te yóhyo ni cayūhú i, te ni cacahān i jeē yóhyo cújéhnū maá Jítóho yō Jesús.

18 Te cuehē ñayuu jeē ní cacandíje ni quijicoo i nuū Pablo ni nacani ndaā i jnūhun táca jniñu neé ní casáha i. 19 Te cuehē i jeē ní casáha jniñu tásí ní jinūcōo i cándiso i tutu i, te ni cajehmu i tutu un jíto nuū táca ñáyuu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xūhun plata cúu. 20 Te ni jite jnūhun maá Jítóho yō cuahān, te ndihí ñayuu ni cajini i jeē cujéhnū ndasí jnūhun ya.

21 Te nuū ní ndihí táca jniñu yáha, te jéni téyí ni Pablo jeē quihīn de Macedonia jíin Acaya, te sáa te najinū de ñuu Jerusalén. Te ni cahān de jeē na nájínū de ñuu Jerusalén, yūcuán na te jíiní ñúhún quíhīn de nde ñuu Roma. 22 Te uū tēe jeē cáchindéé ñáhán jíin Pablo cúu Timoteo jíin Erasto, te ni scánda de ndíndúú tēe yáha cuángoo de nde Macedonia, te ni quendōo maá de Asia jecu gā quiví.

Jeē ní cacuvaā ñayuu ñuu Efeso

23 Te suu quiví ún yóhyo ni candonda ñayuu siquí jnūhun ya. 24 Chi

ni iyo ñn tēe sájniñu siquí plata, nání de Demetrio. Te maá de jíin ndihí tēe cásájniñu jíin de, cánihīn de cuehē xūhún, chi jíin plata casáha de vehe lulí jéē modo veñūhun ídolo i jeē cúu yaā Diana. 25 Te Demetrio ni nastútú de tēe cásájniñu jíin de jíin táca gá tēe jeē suni jniñu yúcuan casáha, te ni cahān de:

Tátā, cájini ni jéē siquí jniñu casáha yó yáha vāha cánihīn yō xūhún. 26 Te cájito ní te cájini sōho ní jéē ñn tēe nání Pablo chi cáhān de jeē násūu yaā cácuu jeē casáha ñayuu. Te je ni scandíje de cuehē ñayuu, nasūu maá ñn-ni ñuu Efeso yáha chi ní cáhnu Asia. 27 Te quíyūhú ni na jéē cahān ñayuu jeē tu ndé jéjníñu jeē casáha yó. Te sanaa te suni súcuan cahān i coto i maá veñūhun yaā sihí Diana jeē cujéhnū, te suni sájéē ni i nuū yaā Diana, te ma cúu ga cujéhnū ya vésú ndivii ñayuu Asia jíin ñáyuu ní cáhnu ñayiví cáchiñúhún i ya vijna, achí de.

28 Súcuan ni cajini sōho de jnūhun yáha te yóhyo ni caquití ni de, te ni cacana jee de:

Cújéhnū téyí Diana, yaā cúu patrona ñuu yō Efeso, achí de.

29 Te ñayuu ñuu Efeso ni cacuvaā i, te ñn cáhnu-ni ni candonda i ni cajniñi i Gayo jíin Aristarco cuangoo i jíin de nde vehe nuū cándutútú ñáyuu casáha i junta. Te ndíndúú tēe un cácuu tēe Macedonia, te cájica de jíin Pablo. 30 Te cúni Pablo quiví de nuū ñáyuu cuehē un cáhān de jíin i, te ñayuu cácadíje tu ní cájēhe i jnūhun quihīn de. 31 Te suni sava tohō jeē cácuu amigo de cáyūcu Asia, ni catajī jnūhun cuahān nuū de, cácahān ndahú jíin de jeē ma quihín de nuū ní cacutútú ñáyuu ún. 32 Te ñayuu ní cacutútú un, sava i ni cacana jee i ñn jnūhun te sava ga i inga jnūhun, te súcuan ni cacuvaā teyí i, te cuehē i ni tu cájini cuiti i na siquí cúu jeē ní cacutútú i. 33 Te sava tēe hebreo ni cajeni de ñn jnāhan de jeē naní Alejandro nuū ñáyuu cuehē ún, te ni cacastūhún de nuū tēe ún na siquí cúu jeē cacuvaā i. Yūcuán na te

Alejandro ni sáha de seña jiín ndaha de jeē na cúnayúú ñáyuu, chi cúní de cahān de jíin i jeē násūu cuéchi tāca ñáyuu hebreo cúu. ³⁴ Te ni canacuni ñayuu un jéē téē hebreo cúu de, te jeē yúcuan ní cacana jee téyí gá i nájnūhun uū hora:

Cújéhnū téyí Diana, yaā cúu patrona ñuu yō Efeso, achí i.

³⁵ Yūcuán na te ni cacunahín ñáyuu ni sáha téē cúu secretario ñuu ún, te ni cahān de:

Nihín ñáyuu ñuu yō Efeso, ndihi ñayuu chi je cájini i jeē cándito vāha yó veñūhun yaā Diana jiín imagen Diana jeē ní ñinga nde andiví. ³⁶ Te ni ñn chi ma cúu cahān jeē tú ndaā jnūhun yáha. Núu súcuan te vāha ga na cási ní yuhu ní, te ma sáha yachí ní ñn jeē tu ní nacani vāha ni ní síquī. ³⁷ Chi téē yáha ní caquindeca ní de yāhá vēsú tu ní cásáha de ni ñn cuéchi síquī Diana yō, ni tu ní cácahān ndevāha de ni ñn jnūhun síquī. ³⁸ Te Demetrio jíin táca gá téē jeē ñn-ni jniñu cásáha jíin de, núu cacuní de cahān de cuéchi síquī ñn téē, te na quíngoo de nde vehe juzgado nuū cáyūcu juez, téē cásandaā jniñu, te yūcuán cundaā síquī de jíjnáhan de. ³⁹ Te núu íyó jnūhun jeē ma cúu cundaā yūcuán, te jíni ñúhún cundaā nuū ñn junta nájnūhun tájnúní ley. ⁴⁰ Chi yúhú ná jeē sanaa te cahān tāca tóhō Roma jeē síquí gobierno de ni candonda yó, chi ma nihín yō jnūhun castūhun yó na síquī cúu jeē ní cacutútú yó ni cacuvaā yō vijna, achí de.

⁴¹ Te nuū ní ndihi ni cahān secretario jnūhun yáha, te ni cajitē ñayuu un cuángoo.

Jeē ni jéhēn Pablo Macedonia jíin Grecia

20

¹ Te ná ni yáha jéē ní cacuvaā ñayuu, te ni cana Pablo ñayuu cácañdije, te ni jeni ichí de i. Te ni cañunundee jnáhan de jíin Pablo jeē ní nacuatáhú de, te cuahān de Macedonia. ² Te ni jica cuu de tācá ñuu yúcuan. Te jíin cuéhē jnūhun ni stihví ni de tācá hermano cácañdije. Te ni jinū de Grecia. ³ Te

ni condee de yúcuan únī yoō. Te je yajni quihín de jíin barco nde Siria nuú, te máá quívī ún te ni nihín de jnūhun jeē jnáhan ñuu de hebreo ni casquíjnáhan jnūhun jeē ndonda síquī de ichi nuū quihín de, te jeē yúcuan ní nacani ní de te cuahān tucu de ichi Macedonia. ⁴ Te ni cahīyo sava téē cájica jíin Pablo, te cánaní de Sópater ñuu Berea, Aristarco jíin téē nání Segundo nde ñuu Tesalónica, Gayo ñuu Derbe, Tíquico jíin Trófimo nde Asia, jíin Timoteo. ⁵ Te ni cacandu téē yáha, te cándetu de Pablo jíin sáña, Lucas, nde ñuu Troas. ⁶ Te nuū ni yáha vico jeē cáyeji i pan jeē tu yíhi levadura, te jíin barco ni quendacoo ná ñuu Filipos, te nde nuū uhún quívī te ni canajnáhan ná jíin de nde ñuu Troas. Te ñuu yúcuan ní coyūcu ná uxā quívī.

Jeē ni íne Pablo ñuu Troas

⁷ Te máá quívī domingo ni candutútú ñáyuu cácañdije jeē cáji i pan, nájnūhun ni steén maá Jítoho yō jeē núcūhun ni yō síquī yā. Te ni steén Pablo jnūhun nuū ñáyuu ún. Te síquī jeē ñga quívī un jíni ñúhún quenda de quihín de, te nahán ní nacani de jnūhun nde ni cuñuú. ⁸ Te vehe yósó jnáhan cúu vehe ún. Te nde cuarto xinī nuū ní candutútú ná un ní íyo cuehē lámpara ni cundijin. ⁹ Te ñn sūchi yí nání i Eutico, néne i yuhu ventana. Te jeē ní cunahán nacani Pablo jnūhun, te yōhyo jíi i máhná, te ni quixí-ni i. Te nde piso unī un ní ñinga i nde nuū ñúhún. Te je ni jihí i ní candonehen de i. ¹⁰ Yūcuán na te ni nuu Pablo te ni jita ndeyí de ni canehen de i ni ñunundee de i, te ni cahān de:

Ma yūhu ní jíjnáhan ní, chi ni natecu i, achí de.

¹¹ Te ni ndaa Pablo, te ni yeji de pan jíin i jíjnáhan i jeē cánuñhún ni de síquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de. ¹² Te Eutico chí íyó vāha i cuanuhún i jíin de jíjnáhan de, te ndivii ñayuu ún yōhyo cácusñ ni i.

Jeē ní quenda Pablo ñuu Troas cuahān de ñuu Mileto

¹³ Te ni quivicoo ná ini barco cuango ná. Te Pablo chi cúní de caca jéhé de, te ni cundaā jeē najnáhan ná jíin de nde ñuu Asón. ¹⁴ Te nuū ní canajnáhan ná jíin de ñuu Asón, te ni quiví de barco te cuango ná jíin de nde ñuu Mitilene. ¹⁵ Te yucuan ní quendacoo tucu ná jíin barco te inga quiví ni jinūcoo ná xiin Quío, ñuhun jeē íne sín nuū ndúte. Te quiví uní ni jinūcoo ná Samos jeē súni nuū ndúte íne, te ni caquendōo ná Trogilio. Te quiví cuún ni jinūcoo ná ñuu Mileto. ¹⁶ Te tu ní jéngoo ná ñuu Efeso, chi jéni ni Pablo jeē yáha-ni de ñuu un quihín de, návāha ma cucuéé de Asia te naa tiempo nuú, chi núú de jinū yachí de ñuu Jerusalén cone de máá quiví Pentecostés núu na cúu.

Jeē ní jeni ichí Pablo tēe jéhnu cándiso jniñu nuū ñáyuu cácandíje ñuu Efeso

¹⁷ Te ná íne ga Pablo ñuu Mileto, te ni tají de jnūhun cuahān nde ñuu Efeso jeē na quijicoo tēe jéhnu cándiso jniñu nuū ñáyuu cácandíje yūcuán. ¹⁸ Te nuū ní quecoo tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. ¹⁹ Chi ní tiempo jeē ni íne ná jíin ní te nde vijna, jéjniñu vāha na síquī jnúhun máá Jítóho yō, te tu ní sándúxí ná maá ná. Te íyó jínu ni ndahyū na jéhē ñáyuu. Te ni ndoho ná jnúndóho ni casáha jnáhan ñuu ná hebreo, chi ni casquijnáhan jnūhun i síquī ná. ²⁰ Te cájini ní jéē tu ní táñúhún ná ni ñn, vēsú ndese ga cácahān ñayuu síquī ná, chi ni nacani ná ndihí jnūhun ya jeē quéndōo vāha ní sáha. Te ni steén na jnúhun ya nuū ní jíjnáhan ní, cúu nuū chitú cúu tācá vehe ní. ²¹ Te inuú-ni jnūhun ni nacani ná núū ndihí ní, cúu jnáhan ñuu ná hebreo cúu ñayuu tāca gá nación, chi ni cahān na jéē na nacani ni ní jéē stóo ni cuéchi ní te na cándíje

ní máá Jítóho yō Jesucristo. ²² Te vijna chi ñúhun ichí ná quihín ná ñuu Jerusalén, chi stíhví ni Espíritu Santo sãña quihín ná. Te tu jíin ná ndese ga coo jíin ná yūcuán. ²³ Te íyó ñn jeē jíin na, cúu jeē chune i sãñá vecāa te quiji jnúndóho síquī ná, chi Espíritu Santo súcuan cáhān jíin ná ndijnahan ñuu nuū jíca ná. ²⁴ Te ni tu sáha ná cuenta vēsú na cáhni i sãñá, chi jeē cuní na cúu jeē na sínu vāha ná jniñu jeē ní tee máá Jítóho yō Jesús síquī ná, te súcuan cusí ni ná. Te jniñu un cúu jeē nácani ná jnúhun vāha ya nuū tāca ñáyuu ndese vāha ni Yaā Dios jíin yó.

²⁵ Te je ni jica cuu ná, ní nacani ná jnúhun ya nuū ní ndese ndácu Yaā Dios jniñu. Te vijna chi jíin na jéē ni ñn ní ma najnáhan ga yō nuū ñáyiví yáha. ²⁶ Jeē yucuan cástūhun cájí ná nuū ní jíjnáhan ní vijna jeē násūu cuéchi ná cúu núu ndé ñn ní stívi. ²⁷ Chi ni nacani ná núú ní ndihí jnūhun Yaā Dios jeē ni sándaā yā ndese coo, te tu ní quéndōo ni ñn jnūhun. ²⁸ Núu súcuan te coto vāha ní máá ní jíin ndihí ñayuu cácandíje, chi Espíritu Santo ni jeni ya nihín jéē cóndito ní ñáyuu maá Jítóho yō, chi ni nacuaan ya i jíin níñí yā. ²⁹ Chi jeē quihín na te jíin na jéē quijicoo tēe cástáhú quivicoo mēhñu ní, te nducú de snāā de jnūhun ni cajetáhú ñáyuu cácandíje, te xeēn sáha jnūhun stáhú de nájñūhun xeēn sáha yihí jeē cájehni tí lanchí. ³⁰ Te suni nuū grupo maá ní quejéé sava de cahān de jnūhun stáhú, te stáhú de sava ñayuu cácandíje jeē na cóndiquín i jnūhun stáhú stéén de. ³¹ Jeē yucuan condito ní jéē ma cóo súcuan. Te ma náā ni ní jéē uní cuiyā ndiquiví ndíñuu ni condíhví ndasí ni na ndé ndahyú na jéhē ni, ní jeni ichí ná ñn ñn ní jíjnáhan ní.

³² Te vijna, hermano, jícan tahu ná núu Yaā Dios jeē coto ya nihín. Chi jnūhun jeē vāha ni yā ndíso poder sáha jeē íje ga ni jíin, te suu sáha jeē ñn quiví te cuāha ya tahū jeē ndujéhnu luu ní ndé jíin ndihí ñayuu ní nacāji ya jeē cóo ndoo coo íi i nuū yā. ³³ Tu

ni ndúcú ná jeē nihín na xúhun chí sahma nuū ní ñn i. ³⁴ Chi je cájini vāha ni jēē sa suhva ni sájniñu nīhin ná návāha nihín na jēē cótecu na ndé jíin táca téē cájica jíin ná. ³⁵ Te níni ní steén na núū ni jēē súcuan jíni ñúhún sájniñu yó návāha nihín yō jeē cuáha yó núū ñayuu cúmanī nuū. Te ma náa ni ni jnúhun jeē ni cáhān maá Jítóho yō Jesús, chí suhva ni cahān yā: Ndetū gā quendōo yó jēē cuáha yó vēsú jeē nihín yō, achí yá. Achí Pablo.

³⁶ Te ni ndihi ni cahān de táca jnúhun yáha, te ni jecuiñī yití de, te ni jicān tahu de jíin ndihi téē ún. ³⁷ Yūcuán na te ndihi de ni cajecunundee jnáhan de jíin Pablo ni catechuhú de jeē canacuatáhú de, te ni candahyū de. ³⁸ Chi cácuquíhyá ndasí ni de jíin jnúhun ni cahān Pablo jeē ma ndácoto jnáhan ga de. Te cuangoo-ni de jíin Pablo nde núū íin barco.

Jeē cuánuhun Pablo ñuu Jerusalén

21

¹ Yūcuán na te ni caquendōo táca hermano ñuu Efeso, te ni quívicoo ná barco, te cuangoo ndaā-ní ná ndé Cos. Te inga quívī ní jinūcoo ná Rodas, te yūcuan ní quendacoo ná te ni jinūcoo ná ñuu Pátara. ² Te ni cane ñn barco jeē quihín Fenicia, te ni quívicoo ná cuángoo ná. ³ Te nuū ní cajito ná núū Chipre jeē íne sīn nuū ndúte, te ni quendōo ichi lado jecó barco, chí ni cayāha ná cuángoo ná nde Siria. Te ni jinūcoo ná ñuu Tiro, chí yūcuan ndóo jeē ndíso barco ún. ⁴ Te ni jenanducú ná ñayuu cácadíje, te ni caquendōo ná jíin i uxā quívī. Te máá Espíritu Santo ni steén nuū i jeē quíji jnúndóho síquī Pablo ñuu Jerusalén, te jeē yūcuan ní cacahān i jíin de jeē ma quihín de. ⁵ Te ni yāha uxā quívī ún, te ni quendacoo ná. Te táca téē cácadíje jíin ñasíhí de jíin séhe de ni cachuhun ichí de sāña ní jengoo de jíin ná nde yatā ñúū, te ni cajecuiñī yití ná jíin de yumar te ni cajicān tahu na. ⁶ Te ni cañunundee jnáhan ná ní canacuatáhú ná yūcuán,

te ni quívicoo ná barco cuangoo ná. Te ni canandió cóo de cuanungoo de vehe de.

⁷ Te ni quendacoo ná ñuu Tiro cuangoo ná jíin barco, te ni jinūcoo ná ñuu Tolemaida ni quendacoo ná ini barco. Te yūcuan ní jengoo ná ní cacahān na jíin táca hermano, te ni caquendōo ná jíin de ñn quívī. ⁸ Te inga quívī un ní cajica jéhé ná jíin Pablo, te ni jinūcoo ná ñuu Cesarea, te ni quívicoo ná vehe Felipe, téē nácani jnúhun vāha ya. Téē un cúu jnáhan jeē ndihúxá téē jeē ní casaja staā nuū ñáhan viuda. Te ni caquendōo ná jíin de. ⁹ Te téē un íyó cúun séhe síhí de jeē cáhiyo máá i, te canacani i jnúhun Yaā Dios. ¹⁰ Te ni coyūcu ná yūcuán tijni quívī. Te ichi Judea ni quíji ñn téē nácani jnúhun Yaā Dios, nání de Agabo. ¹¹ Te ni quee de nuū ná. Te ni quihin de sanchíi Pablo, te ni jihni de ndaha de jíin jéhé de, te ni cahān de:

Suhva cáhān Espíritu Santo. Jnáhan yó hebreo súcuan cuhni i téē chíi sanchíi yáha ini ñuu Jerusalén, te nastúu i de nuū ñayuu sīn nación, áchí de.

¹² Te jeē ní cajini sōho na jnúhun yáha te máá ná jíin táca téē cácadíje cáyúcú ñuu Cesarea ni cacahān ndahú ná jíin Pablo jeē ma quihín de ñuu Jerusalén. ¹³ Yūcuán na te ni cahān Pablo:

¿Najehē cándahyū ni jíin náhan ní, te casáha ní jēē cucuíhyá ni ná? Chí sāñá je íyó túhva ná jēē násūu máá jēē cónuhñí ná ini ñuu Jerusalén, chí suni jeē vēsú na cúu na jēē síquī maá Jítóho yō Jesús, áchí de.

¹⁴ Te jeē tu ní cúu cuiti casícoo ná, yūcuán na te sa suhva ni cacahān ná:

Na cóo ndese cúní maá Jítóho yō nuu súcuan, áchí ná.

¹⁵ Yūcuan na te sáá te ni casátūhva ná, te cuangoo ná ñuu Jerusalén. ¹⁶ Te suni jecu téē ñuu Cesarea jeē cácadíje cuangoo de jíin ná. Suni cuahān ñn téē Chipre nání de Mnasón, te je ni cuu cuehē cuiyā candíje de. Te ná ni jinūcoo ná ñuu Jerusalén, te ni coyūcu ná vehe de.

Jeē ni jécondēhe Pablo Jacobo

17 Te nuū ni jínūcoo ná ñuu Jerusalén, te hermano cáyūcú ñuu ún yōhyo ni cacusī ni de jeē ni jínūcoo ná. 18 Te inga quivī un ní cajengoo ná jijnáhan ná jín Pablo vehe Jacobo, te yūcuan ní candutútú táca tēe jéhnū cándiso jniñū nuū ñáyuu cácandije. 19 Te Pablo ni sáha de saludar tēe ún jijnáhan de. Yūcuán na te ni castūhún de ndihi jniñū ní sáha Yaā Dios ná ni nacani de jnūhun ya nuū ñáyuu tācá nación jeē tu cájini i jnūhun ya. 20 Te ni cajini sōho de jnūhun yáha, te ni cacahān de jeē yóhyo cújéhnū Yaā Dios. Te ni cacahān de jín Pablo:

Hermano, vijna te jíní ni náa cuehē mil jnáhan ñuu yō hebreo ni cacandije i Jesús, te cacahān nihin i jeē cánuú squícu yó ley jeē ni jéhe ya nuū Moisés. 21 Te ni canihīn i jnūhun cacahān jeē stívi ní steén ni núū tāca jnáhan yó ñáyuu hebreo cáyūcu jíca i tāca gá nación, chi ni steén ni núū i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i tāca gá jeē tajnúni jenahán. 22 ¿Ndesé sáha ní núú súcuan? Chi cuni ñayuu un jéē ní ndee ní te cutútú cuéhē i. 23 Suhva sáha ní núú súcuan. Yáha íyó cúūn tēe jeē ní cajejnūhun de ñn jeē squícu de nuū Yaā Dios. 24 Cueca ní tēe yáha quihīn ni jín de templo, te cuchi ní nasándoo ní máá ní jín de nuū yā, te cuaan ní jeē socó de nuū Yaā Dios jijnáhan de. Yūcuán na te cuu sāté de xinī de, te suu steén jeē ní casquícu de ndihi jeē ní cajejnūhun de nuū yā. Yūcuán na te cuni ndihi ñayuu jeē tú ndaā tāca jnūhun ni cajini sōho i síquī ní, chi coto i jeē suni máá ní sa squícu ní ley yā. 25 Te ñayuu tācá nación jeē násūu ñáyuu hebreo cácuu i te ni cacandije i ya, je ni cateé ná carta cuahān nuū i jeē tu cánuú squícu i ley un, chi máá-ni jeē ma cáji i cūñu jeē ni sóco nuū ídolo ni ññī ni quiti jeē jihí jeē tu jéti ññī tī, te ni ma cáca jnéni i, áchí de.

Jeē ní cajñi de Pablo ini templo

26 Yūcuán na te ni jeca Pablo tēe ún, te inga quivī un ní cajichi de ni canasándoo de máá de nuū yā. Te ni quivī Pablo ini templo ni cachi de nuū sutú na quivī jínu jeē nasándoo tēe un máá de nuū yā, te quindecá de quiti jeē socó de nuū yā.

27 Yūcuán na te cácuu de jeē sínu de ndihúxá quivī jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhán de ndihi ñayuu, te ni cajñi i Pablo. 28 Te ni cacana jee i:

Tēe ñuu yō Israel, cuāha núú ní ndaha jijnáhan ní na jni yó tēe yáha. Chi máá de cúu tēe jíca cuu ní cáhnu stéén de nuū tāca ñáyuu, te cáhán de síquī nación yō jín síquī ley jeē ni jéhe ya nuū Moisés jín síquī templo yáha. Te suni je ni quivicoo de jín jecu tēe griego ini templo i yáhá, te súcuan stívi de jnūhun i jeē cahán jeē ma cúu quivī ñayuu ini templo te núu nasūu ñáyuu hebreo cúu i, áchí.

29 Chi nde na íne Pablo ini ñuu un ní cajini tēe hebreo jeē jíca de jín Trófimo, tēe ñuu Efeso jeē násūu hebreo cúu de, te cájeni ni de jeē ni quivī tēe un jín Pablo ini templo.

30 Te ndihi ñayuu ñuu un ní cuvaā, te ni cacutútú-ni i, te ni cajñi i Pablo, te ni castáa i de ni quenehen i de ini templo un, te ni canacasi-ni i yéhyí.

31 Te ni cacuni i cahni i de núú. Te general, tēe cújéhnū nuū ndihi soldado, ni nihīn de jnūhun jeē ndihi ñayuu ñuu Jerusalén ni candonda i cácuvaā i.

32 Te ni jeca general tācá soldado jín capitán, te cájini de cuango de nde nuū cáhīn ñayuu cuehē ún. Te ná ni cajito ñayuu jeē ni jínūcoo general jín soldado, te ni cajecuiñī i jeē cácani i Pablo. 33 Yūcuán na te ni quivī general mēhñu ñáyuu, te ni jñi de Pablo, te ni ndacu de jniñu jeē conuhnī de jín úu cadena. Yūcuán na te ni cajnūhún general ndé tēe cúu Pablo te na cuēchi ni sáha de. 34 Te ni cacana ñayuu cuehē ún, sava i ñn jnūhun te sava ga i inga jnūhun, te tu ní cúu cuni de na

cuēchi ni sáha Pablo, chi cácuvaā i. Te ni ndacu de jniñu cuahān Pablo nde cuartel. ³⁵ Te nuū ni jínū Pablo escalera cuartel ún, te soldado ni cajni de Pablo cándiso de siquī jeē cácuni ñayuu ún jni i Pablo sáha xeēn i jín de. ³⁶ Chi ndihī i vējicoo i ichi yátá soldado, te cácana jee i:

Cahni ni téē jíñá, achí i.

Jeē ni cáhān Pablo jehē maá de nuū ñáyuu

³⁷ Te cáscuivī de Pablo ini cuartel nuú, te jín jnúhun griego ni cahān Pablo jíin general:

¿A cuáha ni jnúhun cahān ná ñ jnúhun jíin ní? achí de.

Te ni cahān general jíin de:

Te jíinī rō cahān rō yuhu griego jeē súcuan. ³⁸ Núu súcuan te nasūu róhó cúu tēe Egipto jeē jé ni cuu quiivī ni ndonda siquī gobierno te ni quenehen cuūn mil tēe jéhni ndīyī cuangoo jíin de nde nuū ñúhun téhé, achí.

³⁹ Yūcuán na te ni cahān Pablo:

Tuú, chi tēe hebreo cúu ná, te ni cacu ná ñuu Tarso, ñ ñuu jeē cujéhu ndañúu Cilicia. Te quiñúhun ni ni cuáha ní jnúhun na cáhān na jíin ñáyuu yáha jíināhan i, achí de.

⁴⁰ Te general ni jēhe de jnúhun jeē cahān de. Te ni jecondichi Pablo nuū escalera, te ni sáha de seña jíin ndaha de jeē na cúu nayúú ñáyuu ún. Te nuū ní cuu nayúú-ni i, te jíin jnúhun yuhu ñúu de hebreo ni cahān de:

22

¹ Ndihi níhín jeē cácuu ní jnáhan ñuu yō jíin ndihī níhín jeē cácujeéhu ní núu ñúu yō, cuni sōho ní jnúhun cahān na jehē maá ná, achí de.

² Te ni cajini sōho i jeē cahān Pablo yuhu hebreo jeē cúu yuhu ñúu i, te víhyá gā ni cacunahín i. Te ni cahān Pablo:

³ Máá ná cúu jnáhan ñuu yō hebreo, te ni cacu ná ini ñuu Tarso ndañúu Cilicia. Te ini ñuu Jerusalén yáha ní jehnu ná, te ni cutúhva ná núu Gamaliel, te ni steén de nuū ná ndihī siquī ley jeē ni jēhe ya nuū jíi yō. Te nde jíin ini jíin ánuá na ní nducú ndéyí

na squícu ná súcuan nuū Yaā Dios, nájnūhun cásáha máá ní vijna. ⁴ Te ni jito xeēn na ñáyuu cá candíje i jnúhun Jesús te nde cuní na jéē na cúu ndihī i núu. Chi cúu tēe cúu ñahan ni jni ná ni chuhun ná vecāa. ⁵ Te sutū cujéhu ga jíin táca tēe jéhu cándiso jniñu nuū ñúu yō, cácuu de testigo jeē súcuan ni sáha ná, te suni máá de ni cajēhe de tijni carta cuahān na jíin jéē cuáha na núu táca jnáhan yō cáyucú ñuu Damasco. Chi cuahān ná ñuu un jéē jni ná ñáyuu cá candíje i Jesús te quindeca ná i ñuu Jerusalén yáha, návāha ndoho i núu.

Jeē ní cachi Pablo ndese ni sama ya de

(Hch. 9.1-19; 26.12-18)

⁶ Te ni quihin ná ichi cuahān ná, te cuacuyajni ná ñuu Damasco, te nájnūhun caxū cúu. Te ichi ándivī ní quiji ñ nduva ní ndindēé ndaxín núu ná. ⁷ Te ni cotúú-ni ná núu ñúhun, te ni jini sōho ná ñ jnúhun cáhān jíin ná: Saulo, Saulo, ¿najehē jito xeēn rō ruhū? achí. ⁸ Yūcuán na te ni cahān ná: ¿Na nihín cúu jeē cahān, Tátā? achí ná. Te ni cahān yā jíin ná: Máá rí cúu Jesús jeē ní jehnu ñuu Nazaret, te jeē jito xeēn rō ñayuu cá candíje i ruhū cúu jeē jito xeēn rō ruhū, achí yá. ⁹ Te tēe cuangoo jíin ná ni cajini ndije de jeē ndindēé, te ni cayúhu de, te tu ní cájini sōho de ndese ni cahān yā jíin ná. ¹⁰ Yūcuán na te ni cahān ná: Tátā, ¿na vé cuní ní jéē sáha ná? achí ná. Te ni cahān maá Jítoho yō jíin ná: Ndocuiñī te quihīn rō ñuu Damasco, te yūcuan íyó ñ tēe jeē cachi nuū rō na vé cúu jeē cánuu sáha ró, achí yá jíin ná. ¹¹ Te jeē ní ndindēé un ní sacuaá núu ná, te tēe cuangoo jíin ná un ní cajni de ndaha ná cuangoo de jíin ná ní jinūcoo ná ndé ñuu Damasco.

¹² Te yūcuan ní condee ñ tēe nání Ananías, te táca jnáhan yō hebreo yūcuan cácahān jeē tēe vāha cúu Ananías, chi vāha squícu de ley jeē ni jēhe ya nuū Moisés. ¹³ Te ni quee tēe un núu néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndundijin-ni tinūu

ná, te ni jito ná núu de. ¹⁴ Te ni cahān Ananías: Máá Yáā Dios tāca jíi yō, je ni nacāji ya nihín návāha cuni ní na vé cuni yā jeē sāha ní, te coto ní núu maá Cristo, Yaā ndaā, te cuni sōho ni jnúhun jeē cahán yā. ¹⁵ Te nacani ní jnúhun ya nuū ndivii ñayuu tāca jéē ní jito ní jíin jéē ní jini sōho ní. ¹⁶ Ma cúhuun ni ní núu súcuan. Ndocuiñi ní, te cuandute ní te cahān ndahú ní jíin máá Jítóho yō, návāha nacate ya anuá ni núu cuéchi, áchí de jíin ná.

Jeē ní cachi Pablo ndese ni taji Yaā Dios de nuū ñayuu tāca gá nación

¹⁷ Te ni nandió cóo na ní ndee ná ñuu Jerusalén. Te jícan tahu na ini templo, te ni sāha máá Jítóho yō jeē ní jito ndijin ná. ¹⁸ Te ni jini na núu yā ni cahān yā jíin ná: Yachi quenda ró ñuu Jerusalén yāhá, chi ma cuatáhú ñayuu yāha jéē nacani ró jnúhun ri nuū i, áchí yá. ¹⁹ Te ni cahān na jíin yá: Tuú, chi cuatáhú i, Tátā, chi je cájini i jeē ni quiví ná ndijnahan vehe ii sinagoga ni jñi ná táca ñayuu cácan dije i nihín, te ni cani ná i, te ni chuhun ná i vecāa. ²⁰ Te je cájini i jeē quiví ní cajehni i Esteban, tēe ni nacani cáji jnúhun ní, suni ni índichi na yúcuan, te ni jejnúhún ná jeē na cúu de, chi ni condito ná sahma tēe ni cajehni Esteban, áchí ná jíin yá. ²¹ Te ni cahān yā jíin ná: Cuáhán, chi máá rí taji rí rohó quíhín jicá ró nde nuū ñayuu tāca nación jeē tu cájini i jnúhun ri, áchí yá jíin ná. Achí Pablo.

Jeē ni íne Pablo nuū general

²² Te tāca ñayuu ún vāha-ni ni cajini sōho i te nde jnúhun sandíhi yāha jéē ní taji yá de nuū ñayuu tāca gá nación. Yūcuán na te ni cacuvaā i, te ni cacahān jee i:

Na cúu tēe jíñá, chi tú vāha jeē cótecu gā de, áchí i.

²³ Te súcuan cácana jee i, te ni cascádoó i ticáchí i, te ni cascánda i ticachā. Te súcuan cástéén i jeē cáquiti xeēn ni i. ²⁴ Te ni ndacu general jniñu jeē na quiví Pablo ini cuartel, te ni cahān de jeē na stíchí soldado Pablo nde jíin cuarta ñi, návāha cujnúní ni

general na siquī cúu jeē ní candonda ñayuu un siquī de. ²⁵ Te ni cajihni de Pablo návāha súcuan te cani de. Te ni cahān Pablo jíin capitán jeē índichi tūhva:

¿A jéhe ley jnúhun jeē cani ní cuarta tēe cúu sēhe nación Roma núu ná tu sándaā ní núu íyó cuéchi de? áchí de.

²⁶ Te ni jini sōho capitán jnúhun yāha, te ni jecahān jíin general:

Coto vāha ní jéē ma stíví ní sāha ní jíin tēe yāha, chi cúu de sēhe nación Roma, áchí.

²⁷ Yūcuán na te ni jinū general nuū Pablo, te ni cajnúhún de:

Cachi núu jendaá cúu jeē séhe nación Roma cúu ró, áchí.

Te ni cahān Pablo:

Suu cúu ndije ná, áchí de.

²⁸ Te ni cahān general:

Ruhū chi nde jeē ni jéhe ri cuehē xūhún te ni nduu ri sēhe nación Roma, áchí.

Te ni cahān Pablo:

Te sãñá chi nde quiví ní cacu ná cúu ná séhe nación yō Roma, áchí de.

²⁹ Yūcuán na te tāca tēe jeē cácani cani Pablo nuú, ni cacujiyo-ni cuango, te suni nde general ni yūhú de, chi ni stíví de jeē ní jihni de Pablo, chi tu íyó vāha sāha súcuan jíin séhe nación Roma.

Jeē ni índichi Pablo nuū junta cujéhnu ga jnáhan ñuu de hebreo

³⁰ Te ñga quiví un cúní general cundaā vāha ni de na siquī cúu jeē ní candonda tēe hebreo siquī Pablo. Te ni ndají de cadena jeē nuhní Pablo, te ni ndacu de jniñu ni cacutútú táca sūtū cácujeñnu jíin táca tēe casáha junta cujéhnu ga, te ni quenehen de Pablo, te ni jeni de nuū tēe ni candutútú un.

23

¹ Yūcuán na te ni ndacoto Pablo nuū tēe ni candutútú junta un, te ni cahān de:

Tátā jijnáhan ní, ní ndé vijna vāha íyó ni anuá na jéē tú na cuéchi ná, jíto jínúu Yaā Dios, áchí de.

² Yūcuán na te Ananías, sutū cujéhnu ga, ni cahān jíin tēe cáhīn yajni nuū de jeē na cátu maá yuhu de.

³ Te ni cahān Pablo jín sūtū cujéhnū ga ún:

Yaā Dios stóho ya nihín chi tēe stáhú-ni cúu ní, chi néne ní jēe sándaā ni núu ni stívī ná ley yā, ¿te naun stívī máá ní ley jeē ndácu ní jniñū jeē cáni de sãñá? áchí de.

⁴ Te ni cacahān tēe cáhīn nuū de ún: ¿Naun cáhān rō súcuan jín sūtū cujéhnū ga? Chi nuū Yaā Dios jejnīñū de, áchí jín de.

⁵ Te ni cahān Pablo:

Tátā jijnáhan ní, tu ní jíní na jēe sutú cujéhnū ga cúu de, chi núu ní jíní na te ma cahán na súcuan núu, chi yósó núu tútu īi jeē ni cáhān yā jeē ma cahán neé yó coto yó táca tēe cácujehnū nuū yō, áchí Pablo.

⁶ Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu ñn jnáhan grupo fariseo, te suni súcuan ni īyo tátá na. Chi suni máá ná ñūhun ni na jēe nastécu yā ndīyī, te siquī yúcuan cúu jeē cácahān ni cuéchi siquī ná, áchí de.

⁷ Te jeē súcuan ni cahān de te ni cacusñn ni tēe junta jeē cácuu grupo fariseo jín grupo saduceo, te ni cacahān ñhīn. ⁸ Chi cácahān tēe grupo saduceo jeē ma nátecu ndīyī, ni tu cáhīyo ndajéhé yā ni ánuá, te tēe grupo fariseo cájejnūhún de ndīnúní jnúhun yáha. ⁹ Te yōhyo ni cuvaā. Te sava tēe cástéén jnúhun cáhān tutu ley yā jeē cácuu jnáhan grupo fariseo, ni candocuiñī de, te ni cacahān de:

Tú ni ñn cuéchi cánihīn na síquī tēe yáha. Sanaa te ni cahān ndije ñn ánuá jín de chí ñn ndajéhé yā. Ma sáníhni ni yō nuū Yaā Dios nuu súcuan, áchí.

¹⁰ Te yōhyo ni catejnáhan, te yúhú general jeē quende i chiyō Pablo, te ni ndacu de jniñū jeē na quívī soldado te quenehen de Pablo sava mēhñú i, te na ndívī de ini cuartel.

¹¹ Te jecuáā un ní quee-ni máá Jítóho yō nuū de, te ni cahān yā jín de:

Pablo, cuandeyí ni rō, chi nájnūhun ni nacani ró jnúhun ri ini ñuu

Jerusalén yáha, suni súcuan nacani nahín ró jnúhun ri ini ñuu Roma, achí yá.

Jeē ní casquíjnáhan jnúhun cahni Pablo

¹² Te nuū ní cundijin te ni cacutútú sava ñayuu hebreo, te ni casquíjnáhan jnúhun, te ni cacahān teyí i jeē ma cáji cuiñi i ni ñn ni ma cóho cuiñi i nde núu tu cahni i Pablo. ¹³ Te víhyá gā uū xico tēe hebreo ni cacahān teyí jnúhun yáha. ¹⁴ Te ni jengoo nuū sutú cácujehnū jín núu tēe jéhnū cándiso jniñū nuū ñayuu hebreo, te ni cacahān jín tēe ún:

Ni cacahān teyí ná jeē ma cáji cuiñi ná ni ñn níni nde ná tu cahni na Pablo. ¹⁵ Núu súcuan te máá ní jijnáhan ní jín táca gā tēe cásaaha junta cujéhnū ga, cuacáhān ni jín general jeē quenehen de Pablo na jéé de nuū junta sajnē, chí cachi ni jēe cácuñi ni stíchí vāha ga ní de. Te máá ná jijnáhan ná cotūhva ná cahni ná de nde ná tu quee de nuū cáhīn tútu ní, achí.

¹⁶ Te sēhe yí cuáha Pablo ni nihīn i jnúhun jeē súcuan ni cacahān, te ni jehēn i cuartel, te ni castūhún i nuū Pablo. ¹⁷ Te ni cana Pablo xinī ñn jnáhan capitán, te ni cahān de:

Condeca ní súchi yáha quíhīn ni jín i nuū general, chí íyó ñn jnúhun castūhún i nuū de, áchí de.

¹⁸ Te capitán un ní jeca de i cuahān i jín de nuū general, te ni cahān de:

Pablo, tēe íne vecāa, ni cana de sãñá, te ni cahān de jín ná jeē quíndeca ná súchi yáha núu ní, chí íyó ñn jnúhun cahān i jín ní, áchí de.

¹⁹ Te ni jniñ general ndaha i cuahān de jín i ñn lado, te yuhu-ni ni cajnūhún de i:

Na jnúhun cúni rō cahān rō jín rí, áchí de.

²⁰ Te ni cahān i:

Tēe hebreo ni casquíjnáhan jnúhun de jeē cahān ndahú de jín ní quenehen ní Pablo sajnē quíhīn de nuū táca tēe cásaaha junta cujéhnū ga, chí cahān-ni de jín ní jeē cácuñi de jeē stíchí vāha ga de Pablo. ²¹ Te ma cuáha ni jnúhun, chí víhyá gā uū xico de

cándētu sāhí de ichi, te ni cacahān teyí de jeē ma cáji cuiṭi de ni ḡn ni ma cóho cuiṭi de nde núu tú cahni de Pablo, te vijna je cándētu tūhva de jeē cuáha ni jnúhun quihīn Pablo nuū junta, áchí i.

²² Te ni cahān general jíin i jeē ma cáchi i nuū ní ḡn ñayuu jeē ní cáhān i jnúhun yáha jíin de, te ni tají de i cuanuhun i.

Jeē ní tají general Pablo cuahān de nuū Félix, tēe cúu gobernador

²³ Yūcuán na te ni cana general uū capitán de, te ni ndacu de jniñu jeē sātūhva de uū ciento soldado cájica jéhé jíin únī xico uxī jeē cáyōsó caballo jíin úu ciento jeē cándāha lanza, chi cahḡn jecuāá ún quendacoo de jíin Pablo quingoo de nde ñuu Cesarea.

²⁴ Te suni ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador.

²⁵ Te ni tee de ḡn carta jeē cahān jnúhun yáha:

²⁶ Máá ná cúu Claudio Lisias, te tēe ná carta yáha cuájeē nuū ní, señor Félix, gobernador kujéhu. Ndese tahū cúu ní. ²⁷ Ñayuu hebreo ni cajni i tēe yáha, te je yajni cahni i de núu, te ni jnama ná de jíin soldado, chi ni jini na jēe séhe nación Roma cúu de. ²⁸ Te ni jendeca ná de nuū junta maá i jíināhan i jeē sándaā i núu na cuēchi ni sáha de. ²⁹ Te ni jini na jēe siquī ley maá i cúu cuēchi cácahān i siquī de, te tu níhín na ni ḡn cuēchi siquī de jeē cúu de ni jeē cóne de vecāa. ³⁰ Te ni nihīn na jnúhun jeē sava tēe hebreo ni casquijnāhan jnúhun de jeē cahni de tēe yáha, te jeē yúcuan cúu jeē yachī ni tají ná de cuajeē de nuū ní. Te suni je ni cahān na jíin ñayuu cájicān cuēchi siquī de jecoo i nuū ní, te jiñā cahān i jíin ní na cuēchi ni sáha de. Je ni cahān yō, achí carta.

³¹ Te ni cajeca ñuú-ni soldado Pablo cuangoo jíin de nde ñuu Antípatris, nájnūhun ni tahū jniñu nuū de. ³² Te inga quivī ni canandió cóo-ni soldado cájica jéhé cuánungoo nde cuartel, te soldado cáyōsó caballo cuangoo de

jíin Pablo. ³³ Te ni jinūcoo ñuu Cesarea, te ni cachihí carta ndaha gobernador, te suni ni cajeni Pablo nuū de. ³⁴ Te ni cahu gobernador carta un. Te ni cajnūhún de ndé ñuu cúu Pablo, te ni jini de jeē tēe ndañúu Cilicia cúu Pablo. ³⁵ Te ni cahān de:

Nde na quécoo tēe cájequin cuēchi siquī rō te cuni nahín rí jnúhun cahān rō, áchí de.

Te ni cahān de jeē na quíndihyū Pablo ini palacio ndīyī Herodes.

Jeē ní cáhān Pablo jehē maá de nuū Félix

24

¹ Te nuū uhún quivī te Ananías, sutū kujéhu ga, ni quee de ñuu ún. Te suni ni quecoo sava tēe jéhu cándiso jniñu nuū jnáhan ñuu de hebreo jíin ḡn tēe cúu abogado, nání de Tértulo. Te ni quivīcoo de nuū gobernador jeē cahān de cuēchi siquī Pablo. ² Te ni cana gobernador Pablo ni quee de. Te ni quejéé Tértulo cahān de cuēchi siquī Pablo, chi suhva ni cahān de jíin Félix:

Tátā gobernador, siquī jeē cúu ní tóhō jeē váha ndíchí ndácu ní jniñu, te jeē yúcuan tú na jnúhun cájejnāhan íyó, chi cáyūcu váha yó. ³ Te na cútahū ná, chi tāca quivī váha cúu tāca núu ndácu ní jniñu jeē váha sáha ní, tátā Félix. ⁴ Te tu cúní na snāā na cuéhē tiempo ni, te cáhān ndahú ná jíin ní cuni nahín ní jecu-ni jnúhun cahān na jíin ní. ⁵ Chi ni cajini na tēe yáha jēe cúu de ḡn tēe tíxín, te sáha de jeē cánacuajnāhan máá jnáhan ñuu ná hebreo ni cáhnu-ni tāca lado, te cúu de tēe cújéhu nuū ñayuu cascuáha jnúhun tēe nání Jesús jeē ní jehnu ñuu Nazaret. ⁶ Te suni je ndúcú de jeē stívī de tācá jniñu ini templo īi, te ni cajni ná de. Te cácuni na sándaā na siquī de núu, nájnūhun cáhān ley ñuu ná. ⁷ Te ni jinū-ni general Lisias, te ni quende fuerza de tēe yáha núu na jíināhan ná. ⁸ Te ni ndacu de jniñu jeē tāca ná jeē cácahān na cuēchi siquī tēe yáha quijicoo ná ndé nuū ní. Te vijna cuu stíchí maá ní de, te jíin jnúhun cahān maá de te cuni ni jēe ni sáha

de cuēchi jeē cácahān na jín ní, áchí Tértulo.

⁹ Te suni ni cacahān tēe hebreo jeē ni jínūcoo jín de jeē iyó ndāā jeē súcuan cúu cuēchi Pablo. ¹⁰ Yūcuán na te ni sáha gobernador seña nuū Pablo jeē na cáhān de, te ni cahān Pablo:

Je jíní na jéē cuehē cuiyā cúu ní gobernador ñuu yáha, te jeē yúcuan nújnahan ni na jéē sándaā ni síquī ná. ¹¹ Chi máá ní cuu nanducú ní te cuni ni jéē sáá máá úxī uū quivī ni cuu jeē ni jéhēn ná ñuu Jerusalén jeē chiñúhún ná Yaā Dios. ¹² Te tu ní stáhān jnāhan ná jín ní ññ ñayuu, ni tu ní stóna ná ñáyuu ini templo ni ini vehe iī sinagoga ni ini maá ñuu. ¹³ Ni tú na jín stéen de jeē iyó ndāā jnūhun cácahān de síquī ná. ¹⁴ Te jnūhun cáhān cají ná jín ní cúu jeē chiñúhún ná Yaā Dios táca jíí na, te suu cúu jeē chiñúhún ná maá Jesucristo, te máá jnūhun yáha-ni cúu jeē cácahān de jeē stívī ná. Te cándije ná táca jnūhun yósó núu tútu ley yā jín núu tútu jeē ní catee tēe ni canacani jnūhun ya nde jenahán. ¹⁵ Te inuú ñúhún ni na jín de jeē sáha Yaā Dios jeē nátecu táca ndíyí, cúu ñayuu ní casáha vāha jín ñáyuu ní casáha néé. ¹⁶ Te jeē yúcuan máni jeē vāha ndíhvī ni na sáha ná. Súcuan te vāha íyó ni anuá na jéē tú na cuēchi ndéé síquī na núu Yaā Dios ni nuū ñáyuu.

¹⁷ Te ni jica cuu ná táca ñuu jicá jecu cuiyā, te sáá te ni ndee na jín xúhun jéē ní cajēhe táca ñáyuu jeē chindéé ñáhán i jnāhan ñuu na cáyūcú Jerusalén. Te suni ni ndee na jéē socó na quiti nuū Yaā Dios. ¹⁸ Te íne ná ini templo síquī jeē cuchi ná ndundoo ná núu Yaā Dios te socó ná. Te jecu jnāhan ñuu ná hebreo jeē véjicoo Asia ni cajito de sáná ini templo, te tú na ñayuu cuehē ni cóyūcu jín ná jeē sávaā i. ¹⁹ Te núu ni stívī ná ¿te naun tu ní quíjicoo tēe Asia un návāha suni cahān de ndese ni stívī ná? ²⁰ Chí tēe ni quecoo yáhá na cáhān maá de núu na cuēchi ni canihīn de síquī na ná ni indichi na núu junta tēe cácujuhnu ini ñuu ná. ²¹ ¿Te chí cájequin de cuēchi

síquī na jéē ni cáhān jee ná suhva ná ni iyo ná nuū junta naún? Chi ni achi na jéē cándije ná jéē nátecu táca ndíyí, te jeē yúcuan cájequin ni cuēchi síquī ná, ni achi na jín de. Achí Pablo.

²² Te Félix chi je jíní vāha de ndese cácañdije ñayuu Cristo. Te jeē ní jini sōho de jnūhun yáha te ni stétu de un jínáhan, te ni cahān de:

Nde na quée general Lisias te cajnūhun gá rī síquī jniñu yáha, áchí de.

²³ Te ni ndacu de jniñu nuū capitán jeē na cóne ga Pablo vecāa, te ma cási jeē sáha de jeē cuní de, te ni ma cási jeē quíjicoo jnāhan de jeē chindéé ñáhán i de.

²⁴ Te ni cuu jecu quivī, te ni quiiji tucu Félix jín ñasihí de Drusila, te ñahan hebreo cúu ña. Te ni ndacu de jniñu jeē na quiiji Pablo návāha nacani de jnūhun ndese cándije yó Jesucristo. ²⁵ Te ni cahān Pablo jín de jeē cánuú sáha yó jniñu ndaā, te cánuú coto yó máá yó jeē ma sáha yó jniñu stívī, chi quivī sándihí te sándaā Yaā Dios jniñu ndivii ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeē núne ri te cana ri rohó quiiji ró, áchí de.

²⁶ Te ñúhún ni de jeē cuāha Pablo xūhun núu de te siáá de quenda de vecāa. Jeē yúcuan tijni jínu ni cana de Pablo ni candajñúhún de. ²⁷ Te súcuan ni cuu uū cuiyā, te sáá te ni nucuiñi Porcio Festo nuū Félix. Te cuní Félix jeē na cúsi ni ñayuu hebreo jín de, te jeē yúcuan ní squéndōo de Pablo vecāa.

Jeē ni índichi Pablo nuū Festo

25

¹ Te sáá únī quivī jeē ni quivī Festo cuu de gobernador Judea, te ni quenda de ñuu Cesarea cuahān de ñuu Jerusalén. ² Te táca sūtū cácujuhnu jín tēe cácujuhnu nuū ñáyuu hebreo ni jinūcoo nuū Festo, te ni cajicān cuēchi síquī Pablo. ³ Te ni cacahān ndahú jín Festo jeē núu vāha ni de te na nátají de Pablo ndiji ñuu Jerusalén. Súcuan ni cacahān, chi je ní casquijnāhan jnūhun

jeē cahni Pablo ichi. ⁴ Te ni cahān Festo jeē yīndesi vāha Pablo nde ñuu Cesarea, te je jēni ni de jeē jecu na quivī te nuhūn maá de ñuu Cesarea. ⁵ Te jeē yūcuan ní cahān de jíin táca tēe ún:

Tāca níhín jeē cándiso jniñu, na quíngoo yó nde Cesarea, te yūcuan cácan ni cuēchi siquī de te núu iyó cuēchi de, áchí de.

⁶ Te ni ine de yūcuan únā chí úxī-ni quivī, te ni ndee de ñuu Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo. ⁷ Te je cáhīn tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndúu nuū de, te ni caquejéé-ni casájnuhún téyí siquī de, te tú na jíin ní cástéén jeē iyó ndáā jnūhun cácahān. ⁸ Te ni cahān Pablo jehē maá de:

Tu ní sáha ná ni ñin cuēchi siquī ley ñuu na jēe cácuu ná ñayuu hebreo, ni siquī templo, ni siquī rey nación Roma, achí de.

⁹ Te Festo chi cúní de jeē cusī ni ñayuu hebreo jíin de, te ni cajnuhún de Pablo:

¿A tu cúní rō quinhun rō Jerusalén te yūcuan sándaā rī siquī rō? achí de.

¹⁰ Te ni cahān Pablo:

Je índichi na núu cúndaā jniñu jeē ndácu máá tēe cúu rey nación Roma, te yāha cúu nuū cánuú cúndaā jniñu ná. Máá ní je jíiní vāha ni jēe tú na cuēchi ní sáha ná siquī táca jnáhan ñuu ná hebreo. ¹¹ Chi núu ni sáha ná ñin cuēchi xeēn jeē jíiní ñuhún cuu ná, te iyó váha jeē cúu na núu sūcuan. Te núu tu iyó ndáā jnūhun jeē casájnuhún tēe yáha siquī ná, te ni ñin tēe ma cúu chihi de sáñá ndaha tēe yáha jíinán de. Núu sūcuan te cúní na quihīn na núu maá rey nación Roma sándaā de siquī na, achí de.

¹² Te ni cajnuhún Festo ndese cájeni ni tēe cándiso jniñu jíin de. Yūcuán na te ni cahān de jíin Pablo:

Je ni cahān rō jeē cuní rō quihīn rō nuū maá rey nación Roma sándaā de siquī rō. Núu sūcuan te quihīn nahín rō nuū de, achí de.

Jeē ni índichi Pablo nuū rey Agripa

¹³ Te ni cuu jecu quivī, te rey Agripa jíin Berenice ni jecondéhé de Festo nde ñuu Cesarea. ¹⁴ Te tijni quivī ni coyūcú de yūcuán. Te ni nacani Festo jnūhun siquī Pablo nuū rey un. Te suhva ni cahān de:

Félix jeē ní cuu de gobernador, ni stóo de ñin tēe íne vecāa yāhá. ¹⁵ Te ná ni jehēn ná ñuu Jerusalén, te sutū cácujeñu jíin ñáyuu jēhnu cándiso jniñu nuū ñáyuu hebreo ni jinūcoo i nuū na cájequin i cuēchi siquī tēe ún, te cácuni i jeē na cúu de. ¹⁶ Te ni cahān na jíin i jeē tu iyó costumbre táca tóhō Roma jeē cahni de ñin tēe sūcuan-ni, chí jíiní ñuhún condichi de jíin ñáyuu cájequin cuēchi siquī de, návāha cahān de jehē maá de te cúndaā núu iyó cuēchi de. ¹⁷ Yūcuán na te ni quecoo tútú i yāhá. Te inga quivī ún tu ní cúcuéé ná, chí ni cucōo na mesa nuū sándaā na siquī cuēchi, te ni ndacu ná jniñu jeē na quíji tēe ún. ¹⁸ Te cáhīn ñayuu cájequin cuēchi siquī de. Te ni jeni ni na jēe iyó cuēchi xeēn cahān de siquī tēe un núu, te tú cuiti. ¹⁹ Chi jeē cácahān de cúu máni siquī jnūhun cácañje-ni máá de, jíin siquī ñin tēe nání Jesús jeē jé ni jihī de, te Pablo cahān ñihin de jeē ní natecu ndije tēe ún. ²⁰ Te tu ní cújnuñi cuiti ni ná ndese sándaā ná, te ni cajnuhún ná de núu cúní de quihīn de ñuu Jerusalén te yūcuán cúndaā siquī de. ²¹ Te máá Pablo ni cahān de jeē cuní de quihīn de nuū Augusto, rey yō nación Roma, te yūcuan sándaā rey cuēchi de, ni achí de. Te ni cahān na jēe na cóne de vecāa nde tají ná de quihīn de nuū rey un, achí Festo.

²² Yūcuán na te ni cahān Agripa jíin Festo:

Suni cúní maá ná cuni sōho ná jēe cahān tēe un, achí de.

Te ni cahān Festo:

Sajnē te cuni sōho ní jēe cahān de núu sūcuan, achí de.

²³ Te inga quivī un ní quecoo Agripa jíin Berenice. Te cáñuhun de sahma cújēhnu de, ni quivīcoo de ini vehe juzgado jíin táca general jíin tēe

cácujéhnú ini ñuu ún. Te ni ndacu Festo jniñu jeē na quíji Pablo. ²⁴ Te ni cahān Festo:

Cáhān na jíin ní, tátā rey Agripa, jíin ndihí níhín jéē cáyūcu jíin yó yāhá vijna. Yāha cúu tēe jeē síquī de ni candonda ndivii jnāhan de hebreo ñuu Jerusalén jíin ndé ñuu Cesarea yāhá, te máni cácahān i jeē tú vāha jeē cótecu gā de. ²⁵ Te jéni ni maá ná jéē tú na cuēchi xeēn ni sāha de jeē cúu de. Te je ni cahān de jeē cuní de quihīn de nuū rey Augusto jeē sándaā rey un síquī de, te jeē yúcuan ní cahān na jéē tají ná de quihīn de nuū rey un. ²⁶ Te tu cúcāhnu ni ná na jnūhun tee ná núu tútu quihīn jíin de nuū rey yō. Jeē yúcuan ní ndacu ná jniñu ni quee de nuū yō jijnāhan yó, te cánuú gā nuū maá ní, tátā rey Agripa. Te stíchí ni de návāha nihīn na jnūhun tee ná síquī de, te quihīn jnūhun un jíin de nuū rey. ²⁷ Chi tu jéjníñu cuítí jeē tají ná ñn preso quihīn te núu tú castūhun ná nuū tútu na cuēchi ni sāha de, áchí Festo.

Jeē ni cáhān Pablo jehē maá de nuū rey Agripa

26

¹ Yūcuán na te ni cahān rey Agripa jíin Pablo:

Vijna te jéhe ri jnūhun cahān rō jehē maá ró, achí de.

Te Pablo ni sāha de ndaha de jeē ní quejéé de cáhān de, te suhva ni cahān de:

² Tátā rey Agripa, cúshí ni ná vijna jeē cúu cahān na jíin ní síquī ndihí jeē casájnuhún ñayuu ñuu yō hebreo síquī ná. ³ Chi je jíiní vāha maá ní tāca jéē ní tajnúní ñayuu ñuu yō hebreo jíin tāca jnūhun jeē tu cáhīn inuú i jíin. Jeē yúcuan cáhān ndahú ná jíin ní jeē coo paciencia ni cuní sōho ní jnūhun cahān na jíin ní.

Jeē ní cachi Pablo ndese ni sāha de nde ná tu sama ya ini de

⁴ Je cájini tāca jnāhan ñuu yō hebreo ndese ni sāha ná ini ñuu nuū ní cacu ná jíin ini ñuu Jerusalén nde ná lulí ná. ⁵ Te núu cácuni maá de

cahān ndaā de, te je cájini de sāña jéē ndé lulí ná ni quívi ná nuū grupo fariseo, te grupo un níhin ga cánducú ndéyi de squícu de ley yā vēsú tāca gā grupo tēe nación yō. ⁶ Te ñūhun ni na jnūhun ni jejnūhun Yaā Dios nuū tāca jíi yō jeē nastécu yā ndíyi, te máa síquī tāca jnūhun yāha-ni cúu jeē cájequin de cuēchi síquī ná. ⁷ Chi máa yó jeē cácuu yó jnāhan ndihúxí uū yucūn ñayuu Israel, cáñūhun ni yō jnūhun ni jejnūhun ya jeē nastécu yā ndíyi, te jeē yúcuan nduú ñuú cáchiñuhún yó Yaā Dios te cájejniñu yó núu yā. Te suni súcuan ñūhun ni maá ná, tátā rey Agripa, te síquī jeē nácani ná jnūhun jeē natecu ndíyi cúu jeē cájicān jnāhan ñuu yō hebreo cuēchi síquī ná. ⁸ ¿Te chí má nastécu Yaā Dios tāca ndíyi cájeni ni ní naún?

Jeē ní cachi Pablo ndese ni jito xeēn de ñayuu cácañdije

⁹ Te máa ná chi ni jeni ni na jéē jíini ñūhún ndonda ná síquī ñayuu cácañdije i Jesús, Yaā ní jehnu ñuu Nazaret. ¹⁰ Te súcuan ni sāha ná ini ñuu Jerusalén, chí tāca sūtū cácujeñu ni cajēhe de jnūhun jeē cóndiso jniñu ná chuhun ná cuéhē ñayuu vecāa síquī jeē cácañdije i Jesús, te íyó vāha ni na núu cájehni de i. ¹¹ Te tijni jíinu ni sāha ndevāha na jíin i ini tācá vehe ñi sinagoga jeē ni sāha fuerza na i jeē na stóo i jnūhun cácañdije i. Te xeēn ni quítí ni na núu i, chí nde ñuu jicá ní jehēn ná ni sāha xeēn na jíin i.

Jeē ní cachi tucu Pablo ndese ni sama ya ini de

(Hch. 9.1-19; 22.6-16)

¹² Te sūtū cácujeñu ni cajēhe de jnūhun jeē cóndiso jniñu ná quihīn na sāha xeēn na jíin ñayuu cácañdije cáyūcú ñuu Damasco nuú. ¹³ Te cuahān ná ichi ún, tátā rey, te caxū cúu, te ichi ándiví ní quiji ñn nduva ni ndindēé ndaxín núu na jíin núu tēe cuango jíin ná, te víhyá gā ndí vēsú niāndii. ¹⁴ Te ndihí ná ní cacotúú ná nuū ñūhun. Te ni jini sōho ná ñn jnūhun ni cahān jíin ná jíin jnūhun

yuhu yó hebreo: Saulo, Saulo, ¿na-jehē jító xeēn rō ruhū? Chi jeē sáha ró súcuan cúu nájñuhun stiquī jeē tu jéndije ti, te jéñú yatá tí xinī pulla, te súcuan stóho ti maá tí, áchí. ¹⁵ Yūcuán na te ni cahān ná: ¿Na nihín cúu jeē cahán, Tátā? achí ná. Te máá Jítóho na ní cahān yā jíin ná: Máá rí cúu Jesús, te jeē jító xeēn rō ñayuu cácdíje i ruhū cúu jeē jító xeēn rō ruhū. ¹⁶ Ndonga condichi rō, chi vēji ri nuū rō jeē tejñiñu ri rohó sáha ró jniñu cúní rí, te nacani cájī ró jñuhun tāca jéē ní jito ró vijna, jíin jéē steén gā rī nuū rō tāca quívi quíji. ¹⁷ Te jnama ri rohó núu tāca jñahan ñuu rō jíin núu ñayuu tāca gá nación, chi nuū ñayuu un tájī rí rohó quíhñ rō. ¹⁸ Te tájī rí rohó quíhñ rō nuū i, chi nájñuhun nanune ró tñū i cúu jeē steén rō jñuhun ri nuū i te jecūhun ni i. Chi ñayuu ná tu candíje i ruhū, nájñuhun cájica i nuū néē. Te jeē candíje i ruhū, quívi i nuū luz rí, te tuá quíhi i chíji jniñu jeē cuní jexeén jeē cúu Satanás, chi sa suhva quíhi i chíji jniñu cúní maá rí. Te tájī rí rohó quíhñ rō nuū i, návaha candíje i ruhū te cone cáhnu ni rí nuū cuéchi i. Yūcuán na te inuú níhñ tahu i jíin tāca gá ñayuu jeē ni sándoo ri anuá i, áchí yá jíin ná.

Jeē ní cachi Pablo ndese ni jetáhú de jñuhun ni cahān yā

¹⁹ Jeē yúcuán tu ní sáníhni ni na núu jñuhun ni cahān yā ichi ándivi jíin ná, tátā rey Agripa. ²⁰ Chi ni jetáhú ná, te ni nacani ná jñuhun ya xihna gā nuū ñayuu ñuu Damasco, te sáa te ni nacani ná jñuhun ya nuū ñayuu ñuu Jerusalén jíin ní región Judea jíin núu ñayuu tāca gá nación. Te jñuhun ni nacani ná núu i cúu jeē na nácani ni i jeē stóo i cuéchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i. ²¹ Te siquī jeē súcuan ni nacani ná jñuhun te ni cajñi jñahan ñuu yō hebreo sñá ini templo, te ni cacuni i cahni i sñá núu. ²² Te ni chindéé ñáhán Yáa Dios sñá, te jeē yúcuán índichi níhñ na ndé vijna nácani cájī ná jñuhun ya

nuū ñayuu cácujeñhu jíin núu tāca-ni ñayuu. Chi tu chíso gá na jñuhun siquī jñuhun jeē ní nacani Moisés jíin tāca gá tēe ni canacani jñuhun Yaā Dios nde jenahán. ²³ Te ni cundaā jñuhun ni canacani de un jéē cánuú ndoho Cristo nde cuu yā, te xihna gā maá yá natecu vésú tāca gá ndíyi, te súcuan steén cají yá nuū ñayuu jeē jñama ya i, cúu ñayuu nación yō Israel jíin ñayuu tāca gá nación, áchí Pablo.

Jeē ní nducú ndéyi Pablo scandíje de Agripa jñuhun Jesús

²⁴ Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasí ró te jeē yúcuán ní tñvi xíní rō, áchí de.

²⁵ Te ni cahān Pablo:

Tu ní tñvi xíní na, tátā Festo, chi sa suhva íyo cájī ndáa jñuhun cáhán na. ²⁶ Te máá rey Agripa je jíiní vāha de tāca jniñu ní íyo jeē ní nacani ná, te tu yúhú ná cahān na tāca jñuhun yáha, chi je jíiní vāha na jéē jíiní de tāca jñuhun yáha, chi tú sáhi ní cúu tāca jniñu yáha. ²⁷ Tátā rey Agripa, ¿a cándíje ní jñuhun jeē ní cacahān tēe ni canacani jñuhun ya nde jenahán? Jéni ni na jéē candíje ní, áchí Pablo.

²⁸ Yūcuán na te ni cahān Agripa jíin Pablo:

Va jéni ni rō jeē jíin jecu jñuhun ni cahān rō te sáha ró jeē candíje ri Cristo, achí de.

²⁹ Te ni cahān Pablo:

Vésú jíin jecu-ni jñuhun chí jíin cuéhē, te jícán tahu na jéē maá ní jíin tāca gá tēe cájini sōho jñuhun cáhán na vijna, na cándíje ní nájñuhun cándíje máá ná, te tu cúní na jéē cónuhñi ni nájñuhun núhñi na.

³⁰ Te ni ndíhi ni cahān Pablo tāca jñuhun yáha. Te ni ndocuíñi rey jíin gobernador jíin Berenice jíin tāca gá tēe cácujeñhu cáyūcu jíin de. ³¹ Te ni cacujiyo de, te ni candajñuhun sñn máá de:

Tú ni ñn cuéchi ní sáha tēe yáha jéē cúu de ni jeē cóne ga de vecāa.

³² Te ni cahān Agripa jíin Festo:

Cuu siáá ni téé yáha núu jeē tu ní cáhán maá de jeē quihín de nde nuū rey yō nación Roma nuú, áchí de.

Jeē ní catajǐ de Pablo cuahān de ñuu Roma

27

¹ Te ni cundaā jeē quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhīn vecāa ni quivicoo de ndaha in capitán naní Julio jeē quíndēca de tēe un ndé Italia. Te Julio cúu in jnáhan grupo soldado naní Augusto. ² Te nde ñuu Adramitio nuū cájecuñi barco ni quenda in barco ni quee, te ni quivicoo ná, te quihín barco un táca ñuu jeē yíhi chíji Asia jeē yúcu yumar. Te suni cuahān Aristarco jíin ná, te máá de cúu tēe ñuu Tesalónica región Macedonia. ³ Te inga quiví ni jinūcoo ná ñuu Sidón nuū cájecuñi barco. Te Julio ni cundáhú ni de Pablo, te ni jēhe de jnūhun ni jecondēhe Pablo táca amigo de, te ni cachindéé ñáhán i de. ⁴ Te ñuu yúcuán ní quenda barco cuahān jíin ná. Te siquī jeē níhin yíhi tachī te tu ní cúu quihín yohó barco, te ni tee xíin barco cuahān jíin ná xiin isla Chipre, ñuhun jeē íne sīn nuū ndúte, te lado jecó barco ni quendōo Chipre. ⁵ Te ni cayāha ná yumar Cilicia jíin Panfilia cuahān ná, te ni jinūcoo ná ñuu Mira ndañúu Licia.

⁶ Te ñuu yúcuán ní nihīn capitán in barco jeē véji ñuu Alejandría te quihín ichi Italia, te ni cahān de jíin ná ni quivicoo ná barco un. ⁷ Te cuehē quiví ni cahīn na núu ndúte jíin barco, chi cuéé ní jica, te fuerza-ni ni jinūcoo ná yuñúu Gnido. Te tuá ni jēhe tachī un jnúhun quihín yohó barco, te ni cayāha ná núu jnúhma tachī xiin ñúu Salmón jeē íne nuū isla Creta. ⁸ Te yōhyo ni canducú ndéyí téé cáscaca barco un, ní yāha jíin ná ñí yumar xiin Creta. Te ni jinūcoo ná in lugar naní Buenos Puertos nuū cájecuñi barco, te yajni un íne ñuu Lasea.

⁹ Te je ni cuu cuehē quiví ni cajica ná jíin barco. Te je yajni quejéé vico

míjin, te yūcuán cúu tiempo jeē yí jíca barco te sanaa te coo jnūndóho nuū mar. Te ni cahān níhin Pablo jíin de:

¹⁰ Tātā jijnáhan ní, jíin na jēe yóhyo yí coo viaje yáha, te quiji jnūndóho siquī barco, te naa barco jíin ndajniñu, te nde maá yó sanaa te cuu yō, achí de.

¹¹ Te tu ní chúsóhó capitán jeē cahán Pablo, chi sa suhva jeē cahán tēe scáca barco un jíin téé chíi barco. ¹² Te siquī jeē tu íyó váha lugar nuū ni jécuiñi barco un jéé cóyucú de ñí vico míjin, te ni cajeni ni cuehē gā de jeē vāha ga núu quendacoo de yūcuán. Chi cajeni ni de jeē núu cuu te jinūcoo de ñuu Fenice te yūcuán coyucú de vico míjin. Chi Fenice suni íne yundúte isla Creta nuū cájecuñi barco, te ndijin ichi noroeste jíin suroeste.

Jeē ní jéquihí in tachī níhin jeē stónda ndute mar

¹³ Te ni jequihí vīta táchī ichi sur, te ni cajeni ni de jeē jinú de Fenice nuú, te ni cascáca ga de barco jíca jíin de xiin Creta. ¹⁴ Te ni cunúu jecu gā, te ni quejéé-ni in tachī níhin ndasí jeē naní táchī nordeste. ¹⁵ Te tuá ni cúu ga quihín yohó barco, chi ni chundahá-ni tachī cuahān jíin, te ni casiáá-ni de jeē cascáca de, te cháha chúcuán cuahān barco jíin ndihí ná sáha tachī. ¹⁶ Te ni yāha jíin ná xiin isla lulí jéé naní Clauda, nuū jnúhma tachī. Te vésú súcuán te yōhyo uhū ni cascáca ná barco lulí jeē ndiquín yatā barco cáhnu. ¹⁷ Te ni casquíví ná ini barco cáhnu. Te ni casucun núu de barco cáhnu jíin yoho. Te cáyūhú de jeē quihín barco nuū yaxín ndute nuū naní Sirte te jnī nuū ñíti, te jeē yúcuán ní casnúu de sahma cóquin jeē stechí te jíca barco. Te ni casiáá de jeē na quihín ndé chi chundahá táchī. ¹⁸ Te tu jécuiñi cuiti jeē yíhi tachī níhin. Te inga quiví un ní caquejéé de cájete de ndajniñu ndiso barco, návāha nduñama gā barco te ma quée chíji ndute. ¹⁹ Te quiví uní ni cajēhe núu ná ndaha ni cajete ná máá ndajniñu jéjiniñu barco. ²⁰ Te cuehē quiví tu ní cájito ná níandii

ni quim̄i siqūi jeē in vicō, ni tu jécuiñ̄i cuīti tach̄i níhin ún, te tuá cáñūhun ni na cácu ná.

²¹ Te ni cuu quiv̄i jeē tuá cáyeji cuīti na stáa. Te ni jecondichi Pablo sava mēhñu téé ún, te ni cahān de:

Tátā jijnáhan ní, núu ní cájetáhú ní jnūhun jeē ni cáhān ná te ma quéndacoo yó Creta nuú, te ni ma cóto yó jnúndóho yáha ni ma náa ndajññu núu. ²² Te vijna cáhān níhin na jíin ní jeē cuandeȳi ni ní jijnáhan ní, chi ní in ní má cúu ní, vēsú naa barco. ²³ Chi jeē cúni ní quiji in ndajéhé jeē ní tají máá Yáa Dios nuū ná. Chi máá yá cúu Jitoho ná, te jéjññu ná núu yā. ²⁴ Te ndajéhé yā ún suhva ni cahān yā jíin ná: Pablo, ma yūhu ró, chi vāha-ni jinū rō nuū rey nación Roma, te jeē siqūi rohó te sáha Yaā Dios jeē cácu ndih̄i tēe cáh̄in jíin ró ini barco yāhá, áchí yá jíin ná. ²⁵ Tátā jijnáhan ní, ma yūhu ní núu súcuan, chi máá ná cúcáhn̄u ni na Yáa Dios jeē coo nájnūhun ni cahān ndajéhé yā jíin ná. ²⁶ Te jinū nahín yó in isla, te ma jinú yach̄i yō nuū quíngoo yó, áchí de.

²⁷ Te ni cuu ux̄i cuñ̄ jecuáa nde jeē ní quejéé tách̄i, te jíca barco nuū mar Adria, te cháha chúcuan cuahān barco sáha tach̄i. Te máá jecuáa ún te jeē ní cuu sava ñuú te cájeni ni tēe cáscáca barco jeē jé cuacuyajni jinū barco ñuhun íchi. ²⁸ Te ni casínga de in jeē cáchicuāhá de nasaa cúnú ndute, te ni cajini de jeē iyó ócō xahūn in metro. Te ni jica barco jecu gā te ni casínga tucu de, te ni cajini de jeē iyó ócō ux̄a na metro. ²⁹ Te cáyūhú de jeē jécujnáhan barco jíin toto, te ni cajih̄ni de cuñ̄ cāa gancho náhn̄u yatā barco un, te ni cascāne de nde jehē ndúte návāha chituu te jecuiñ̄i barco. Te yōhyo jnāa de jeē na cundijin yach̄i. ³⁰ Te tēe cáscáca barco un ní canducú de cunu de quíngoo de jíin barco lulí te cácu de nuū jnúndóho quiji siqūi barco cáhn̄u núu. Jeē yúcuan ní casnúu de barco lulí un núu ndúte, te cásáha-ni de nájnūhun jeē snúu de inga cāa gancho ichi núu barco návāha tú cuni ñayuu jeē cácuni

de cunu de quíngoo de. ³¹ Te ni cahān Pablo jíin capitán jíin táca soldado:

Núu tú coyūcu téé yáha ini barco cáhn̄u jíin yó, te ma cácu cuīti maá ní jijnáhan ní, áchí de.

³² Yūcuán na te soldado ni ca-jehnde de yoho núhn̄i barco lulí, te ni jneni-ni cuahān.

³³ Te nuū cuácundijin te ni cahān Pablo jíin táca téé un jéē na cáji de staā. Te suhva ni cahān de:

Vijna iyó ux̄i cuñ̄ quiv̄i jeē cándito ní te tu cáyeji cuīti ni stáa. ³⁴ Te cáhān ndahú ná jíin ní jeē na cáji ni stáa, návāha nanih̄in ni ní te cácu ní, chi ni in yó má cúu, ni ma tují cuīti yō, achí de.

³⁵ Te ni ndih̄i ni cahān de jnūhun yáha, te ni quihin de in staā, te mēhñu táca ñáyuu un ní nacuatáhú de nuū Yaā Dios, te ni tahú sáva de staā ún, te ni quejéé de yéji de. ³⁶ Yūcuán na te ni candus̄i ni ndih̄i de, te suni ni cayej̄i de staā. ³⁷ Te ndiv̄i na jéē cáñūhun ná ini barco cúu uū ciento un̄i xico xahūn in ná. ³⁸ Te ni cayej̄i vāha ndih̄i ná. Yūcuán na te ni cajete de trigo cuahān nuū ndúte un, návāha na ndúñama gā barco.

Jeē ni quéé barco ch̄iji ndute

³⁹ Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuñ̄i ndute, te suni máá ññ̄ti cúu, te cájeni ni de jinū de yúcuan jíin barco núu na cúu núu. ⁴⁰ Te ni cajehnde de yoho núhn̄i cāa gancho yúcuan, te ni caque-ndōo cāa un núu mar. Te ni canandají de yujnu jeē scotú chíi barco, te ni nacata caa de sah̄ma cóquin ichi núu návāha chundahá tách̄i barco, te ni quejéé caca quih̄in jíin de ichi núu iyó ññ̄ti. ⁴¹ Te ni jinū barco nuú níhin náquijnáhan ndute. Te ni quēe barco nuū ññ̄ti ñūhun ch̄iji ndute, te ni jñ̄-ni ichi núu te tuá ni jíca cuīti, te yatā barco un ní cahya-ni jeē níhin ni cani suhmā ndute mar. ⁴² Yūcuán na te ni candajnūhún soldado jeē cáh̄ni de táca preso návāha ma súde i te cunu i quíngoo i. ⁴³ Te cúni capitán un jéē cácu Pablo, te ni jesicoo de. Chi sa ni

cahān de núu ndé ñáyuu jiní sūté te xīhna gā i na núngoo i sūté i nuū ndúte, te na quénda-ni i quihīn i nuū ñuhun íchi. ⁴⁴ Te suni súcuan na quécoco ndihī i quihīn i, sava i coso candá i jíin yujnu cúnu te sava ga i jíin pedazo yujnu barco. Te súcuan ni cacācu ndihī ná ní jinūcoo ná ñuhun íchi.

Jeē ni íne Pablo isla Malta

28

¹ Te nuū ní cacācu ná te ñayuu cáyūcu yúcuan ní cacachi i nuū na jéē isla un nání Malta. ² Te ñayuu un ní cacundáhú ni i sãña jíjnáhan ná, te ni cascáyú i ñn ñuhūn cáhnu, te ni cacahān i jíin ná jeē nasaā ná, chi mījin sáha jeē cúun saū. ³ Te ni stutú Pablo jecu tujnu íchi. Te jeē jnāa de tujnu un núu ñuhún te ñn coō xeén jínu tí ni quenda tí tujnu un jéē ní cujihní, te ni chiyuhú-ni tí ndaha de. ⁴ Te ñayuu cáyūcu yúcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyí núu súcuan, te vēsú je ni cācu de nuū mar, te máa yā sándaā jniñu ñayuu tu jéhe ga yā jnūhun jeē cótecu de, áchí i.

⁵ Te ni caja Pablo ndaha de, te ni ñinga coō un núu ñuhún, te tú na vé ni ndóho de. ⁶ Te cándetu tāca ñáyuu jeē chūhun i cuiñi de chí cotúú-ni de te cuu de. Te ni cunahán téyí cándetu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñn yaā cúu Pablo.

⁷ Te yajni yūcuan íyó ñuhun tēe cújéhnu ga Malta un, nání de Publio. Te ni cana tēe un sãña jíjnáhan ná, te ni jēhe núu de vehe de ni coyūcu ná jíin de unī quivī, te ni jito yúcún de sãñá. ⁸ Te tátá Publio cáa de, chi ndóho de cuehyī quīji jíin cuehyī niñī. Te ni jecondēhe Pablo tēe ún, te ni jicān tahu de te ni soó de ndaha de síquī tēe ún, te ni nduvāha-ni de. ⁹ Yūcuán na te ni quijicoo ndihī ga ñayuu cácuñu yūcuán, te suni súcuan ni canduvāha-ni i. ¹⁰ Te ñayuu un ní cajēhe i cuehē ndajniñu ni cacutahū

ná. Te nuū ni jíin quivī jeē quíngoo tucu ná jíin barco, te ni cajēhe i tāca ndajniñu cuu ná ichi.

Jeē ni jíin Pablo ñuu Roma

¹¹ Te unī yoō ni coyūcu ná Malta. Te ñn barco jeē véji ñuu Alejandría ni ine Malta ní vico mījin, te ichi núu barco un ndéé uū figura ídolo ñuu de nání Cástor jíin Pólux. Te ni quivīcoo ná barco un cuángoo ná. ¹² Te ni jinūcoo ná ñuu Siracusa, te yūcuan ní coyūcu ná unī quivī. ¹³ Te ni quenda barco cuahān jíin ná nduu nduu yundúte, te ni jinūcoo ná ñuu Regio. Te inga quivī ún vāha ni quiji tachī ichi sur, te ni quendacoo ná ñuu Regio, te uū quivī te ni jinūcoo ná ñuu Puteoli. ¹⁴ Te yūcuan ní caquijnáhan ná jíin jecu hermano cáandíje, te ni cacana de sãña ní coyūcu ná jíin de ñn semana. Yūcuán na te ni quendacoo ná jéē quihīn ná ñuu Roma. ¹⁵ Te hermano cáyūcú ini ñuu Roma, je ni canihīn de jnūhun jeē jinūcoo ná, te ni quendacoo de, te sava de ni caquijnahan de sãña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíjnáhan de, te ni nacuatáhú de nuū Yaā Dios, te ni ndundeyí ni de. ¹⁶ Te sáa te ni jinūcoo ná ini ñuu Roma, te capitán ni squivī de tāca preso ndaha tēe cújéhnu nuū tāca soldado ñuu Roma. Te ni cajēhe de jnūhun jeē cone sñn Pablo te condito ñn soldado de.

Jeē ní nacani Pablo jnūhun ya ini ñuu Roma

¹⁷ Te nuū unī quivī te ni cana Pablo tāca tēe cácuñu nuū jnáhan ñuu de hebreo cáyūcú ini ñuu Roma. Te ni cacutútú de, te ni cahān Pablo jíin de:

Tátá jijnáhan ní, tú cuiti na vé ni sáha ná síquī jnáhan yó hebreo ni síquī tāca jniñu ní catajnúní jíi yō. Te vēsú súcuan te ni cajni i sãña ndé ñuu Jerusalén ni casquivī i sãñá ndaha tēe ñuu Roma jijnáhan de. ¹⁸ Te tēe ñuu Roma jeē cácuñu cáyūcú Cesarea ni castíchí de sãñá, te cácuñu de siáa de sãña núu, chi ni cajini de jeē tú na cuēchi ná jéē cúu ná. ¹⁹ Te jnáhan ñuu

yō hebreo tu ní cájēhe de jnūhun. Jeē yúcuan ní cahān na jēē quiji ná núū maá rey cujéhnū ga nde ñuu Roma yāhá te sándaā maá de siquī ná. Te tú vēji ná jēē cáquin na cuéchi siquī ñayuu nación yō. ²⁰ Jeē yúcuan ní cana ná níhín jijnáhan ní, návāha cuni na táca ní te ndajnūhun yó. Chi yóhó ñáyuu Israel cáñūhun ní yō jeē nátecu ndīyi, te suu jnūhun un nácani ná, te jeē yúcuan cúu jeē nuhní na jíin cadena yáha, áchí de.

²¹ Te ni cacahān tēe un jíin Pablo:

Tú ni ñn carta ni cátaji ñáyuu cáyūcú Judea nuū na jēē cástūhún de jnūhun ní, te táca jnáhan yó Judea jeē ní quijicoo yāhá, tú ni ñn jnūhun néé ní cacahān de siquī ní. ²² Te cánujnahan ni ná cuni sōho ná ndese cúu jnūhun jeē cahán ni, chí je cájini na jēē táca-ni lado cacahān ñayuu contra siquī jnúhun jeē jēē steén ni, áchí de.

²³ Te ni cajeni de ñn quivī, te ni quijicoo cuehē de vehe nuū néne Pablo. Te ni nacani de jnūhun ndese ndácu Yaā Dios jniñu, te ni steén cají de jnūhun nde jenéhen te nde ni ini. Te súcuan ni nducú ndéyí de scándíje de táca tée un jnúhun Jesús, te ni steén de jeē suni súcuan cáhán ley jeē ní jéhe ya nuū Moisés jíin jnúhun jeē ní catee tēe ni canacani jnūhun Yaā Dios nde jenahán. ²⁴ Te ni cacandíje sava de jnūhun ni cahān Pablo, te sava ga de tu ní cájetáhú de. ²⁵ Chi tú ñnuú cáhīyo ni de. Te sáá cánducú de quingoo de te ni cahān Pablo:

Ndaā cahán jnūhun jeē ni cáhán Isaías, tēe ni nacani jnūhun Yaā Dios nde jenahán, chí suhva ni cahān de jíin táca jíi yō ni sáha Espíritu Santo:

²⁶ Ni cahān Yaā Dios:

Cuáhán núū jnáhan ñuu rō yāhá te cahān rō jíin i:

Vēsú cuni nahín váha ró te ma jécūhun ni rō,

te vēsú coto vāha ró te ma cúni rō.

²⁷ Chi yōhoyo níhni ni rō,

chí tu cácuni rō cuatáhú ró.

Te yōhoyo uhū cájini sōho ró,

chí tu cánujnahan ni rō cuni sōho ró jnúhun ri.

Te nájñūhun cájesi rō tinūu ró cúu jeē tu cácuni rō nanducú ró ndese cúu,

te tu cácuni rō jeē násāma ini rō návāha nasávāha ri anuá rō nuū cuéchi ró, ní achi Yaā Dios.

Achí tutu. ²⁸ Núu súcuan te na cástūhun ná nuū ní jēē jnúhun ní tají Yaā Dios jeē jnáma ya yohó, nde vjna te tájí yá jnūhun yáha quihín nuū ñáyuu táca nación jeē tu cájini i jnūhun ya, te máa i chí cuni sōho i, áchí de.

²⁹ Te ni jíinu ni cahān de jnūhun yáha, te cuangoo jnáhan de hebreo, te yōhoyo ni cacahān de siquī jnúhun yáha jijnáhan de.

³⁰ Te ni condee Pablo uū cuiyā vehe jeē ní quihin núu de ún. Te ni cusñ ni de cahān de jíin táca ñáyuu ní quijicoo nuū de. ³¹ Te jéhnū-ni ni nacani de jnūhun ndese ndácu Yaā Dios jniñu, te ni steén de jnūhun máa Jítoho yō Jesucristo, te tú ni ñn ní jési jeē nácani de jnūhun.

CARTA JEE NI TEE SAN PABLO APOSTOL NUU ÑAYUU ÑUU ROMA

¹ Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

² Te jnūhun un ní jejnūhun ya nde jenahán ndasí, te yósó núu tútu iī jeē ní catee tēe ni canacani jnūhun ya.

³ Te jnūhun un cáhán siquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David. ⁴ Te ni natecu yā mēhñu ndíyí ni sáha Espíritu iī, te súcuan ni steén Yaā Dios jeē cúu ya Sēhe ya jeē ndíso poder. ⁵ Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, návāha coo ñayuu táca nación jeē candíje i jeē sáha ya jehē i, te cuatáhú i nuū yā. ⁶ Te suni máá ró jijnáhan ró, suni ni cana ya rohó ní quívicoo ró ndaha Jesucristo.

⁷ Te tēe ri carta yáha cuajeē nuū rohó ñayuu ñuu Roma. Chi ni cundáhú ni Yaā Dios rohó, te ni cana ya rohó jéē coo ndoo coo iī rō nuū yā. Te ñúhun ni rī jeē maá Tátá yō Yaā Dios jíin Jitoho yō Jesucristo sáha ga yā jeē váha rōhó, te sáha ya jeē coo ndeyí coo sīr ni rō.

Jeē cuní Pablo quihñ de ñuu Roma

⁸ Te xīhna gā cástūhun rí nuū rō jeē nácuatáhú rí nuū Yaā Dios jeē siquī rohó jijnáhan ró, chi ni sáha Jesucristo jeē váha rōhó. Chi ní ñáyívi jité núu jnūhun cuahān ndese vāha cácadíje ró yá. ⁹ Te máá Yaā Dios jiní yā jeē niní jícán tahu rī jehē rō jijnáhan ró nuū jicán tahu rī. Chi yōhyo ndíhví ni rī jejníñu ri nuū yā jeē nácani ri jnūhun Sēhe ya. ¹⁰ Te niní jícán tahu rī nuū yā jeē núu cuní yā te nde vijna te cuu jecondēhe rí rohó. ¹¹ Chi cúu ni rī coto ri nuū rō jijnáhan ró, te steén gā rī jnūhun ya nuū rō, návāha quendōo

vāha ga anuá rō te cuiñi nīhin ga rō jíin. ¹² Súcuan cuní rī návāha sáha yó jéē inuú coo ndeyí ni yō jijnáhan yó siquī jeē inuú cácadíje yó yá.

¹³ Hermano jijnáhan ró, cuní rī jeē na jécūhun ni rō jeē tíjñi jínu ni cuu ni rī jecondēhe rí rohó, te nde vijna ná tu cuu. Chi cuní rī scuité núu ga rī jnūhun ya mēhñu ró, nájñūhun ni sáha ri mēhñu ñayuu táca gá nación.

¹⁴ Chi cúu ri tēe táu siquī jnúhun ya, chi táu rī nacuāha ri jnūhun ya nuū ndíhi ñayuu, cúu ñayuu jiní gā siquī ndíhi jeē iyó ñayívi jíin jéē tu jíni cuítí, cúu ñayuu tūhva jíin jéē tú tūhva. ¹⁵ Jeē yúcuan cúu jeē ndíhví ni rī jeē suni nuū rohó ñayuu ñuu Roma nacani ri jnūhun jnáma ya yohó.

Jeē ndíso jnūhun vāha ya poder

¹⁶ Chi tu cúcanu rī siquī jnúhun vāha ya, chi yúcuan cúu poder Yaā Dios jeē jnáma ya táca ñayuu cácadíje, xīhna gā ñayuu hebreo te suni táca gá ñayuu.

¹⁷ Chi jnūhun vāha ya un steén nuū yō jeē ndáhva Yaā Dios cuēchi yó siquī jeē candíje yó jéē sáha ya jehē yō, te máá jéē candíje yó ní cuahān yō. Chi súcuan cáhán nuū tútu iī: Ñayuu jeē ní ndahva yā cuēchi i, técu i jeē candíje i jeē sáha ya jehē i, áchí.

Siquī jeē iyó ndasí cuēchi ñayuu

¹⁸ Chi jíni vāha yó jéē Yaā Dios andiví, cuāha ya castigo xeēn nuū táca ñayuu tu cácadíje te máni cuēchi cásaha. Chi jíin jniñu néé cásaha i te cájesi i nuū jnúhun ndaā. ¹⁹ Te ma cúu cahān i jeē tu jécūhun ni i siquī ndese Yaā cúu Yaā Dios, chi máá yá ni steén nuū i. ²⁰ Chi jíin táca jeē ni sáha ya te cúu jécūhun ni ñayuu ndese Yaā cúu máá Yaā tu jito i nuū. Chi nde ni jecōo ñayívi jíin ndé vijna te cúu jécūhun vāha ni i jeē maá yá cúu Yaā Dios te iyó poder yā ní cáni. Te jeē yúcuan má cúu cuítí cahān i jeē tu jíni i jeē iyó yá. ²¹ Chi vésú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cáhá ni, chi ni

candunéé í i, te ni quendōo nee ini anuá i. ²² Cácahān i jeē ndichí i, te sa suhva cáacunéé i. ²³ Chi ni castóo i Yaā Dios jeē yóhoyo luu cújéhnú, jeē ma cúu cuiti. Te ni cajetáhú i tǎcá imagen jeē casáha i, jeē cáa nájnūhun tēe cájihí, te suni nde imagen saa jíin cóo jíin quiti cájica ndicúún ndaha.

²⁴ Te jeē yúcuan ní siaá Yaā Dios i jeē na sáha i tǎcá jniñu jnéhén jniñu néé jéé cuní i. Te casáha i jniñu néé jíin jnáhan i jeē cúu máa jnúhun canu. ²⁵ Chi tu ní cácañdije i jnúhun ndaā Yaā Dios, chi sa ni cacandije i jnúhun stáhú. Te cáhīyo yíñúhún i te cáchiñúhún i nuū tǎca jéé ni sáha ya, lugar jeē chiñúhún i máa Yaā ni sáha ún, Yaā jeē cánuú cahān yō jeē cujéhnú ya ní cáni. Amén.

²⁶ Jeē yúcuan ní siaá Yaā Dios i jeē na sáha i tǎcá jniñu néé jéé cándiyo ni i jeē cúu máa jnúhun canu. Chi nde ñahan ni casama ña modo síhí, te ni quiví ña jíin modo neé. ²⁷ Te suni súcuan tēe ni casiáa de modo chíjniñu jíin ñahan. Te nde ni nduquijí de ni casáha ndiyí de jíin jnáhan yí de, te tēe jíin tēe ni casáha de jniñu jnúhun canu. Te cándoho de castigo síquī jniñu néé ní casáha de.

²⁸ Te jeē tu ní cáconi i cuajnúhún i Yaā Dios, jeē yúcuan ní siaá yā i jeē na cáni néé ni i, te sáha i tǎcá jniñu jeē tu íyó váha. ²⁹ Te máni máa na jniñu jeē tu íyó ndáa cándihví ni, te cájica jnéni, casáha jniñu néé, cándiyo ni, cájito uhū jnáhan. Te máni jeē cáccuésún ni, cájehni ndíyi, cájehnan, cástáhú, cáshuhū jnáhan, cáajnúhún síquī jnáhan. ³⁰ Cácahān jnúhun néé síquī jnáhan, cájito uhū Yaā Dios, cáccujéé ni, cáсандúxí máa, cásatéyí máa, cájequin costumbre neé, tu cájendetū nuū tatá nuū naná. ³¹ Te tu cájecūhun cuiti ni, tu squícu jnúhun jéjnúhun, tu íyó mání jíin jnáhan, tu íne cáhnu ni nuū jnáhan, tu cúndáhú ni jnáhan. ³² Te je cájini váha i jeē ni sándaā Yaā Dios jeē ñayuu casáha súcuan, cánuú jnahnū ndetū i. Te vésú súcuan cájini í, te níni casáha i jniñu

néé un, te suni cánujnahān ni i jeē casáha jnáhan i súcuan.

Ndaā sándaā Yaā Dios síquī cuéchi

2

¹ Núu súcuan te róhó jéé cahán cuéchi síquī jnáhan, núu na-ni ñayuu cúu ró, ma cúu cahān rō jeē tú na cuéchi máa ró. Chi jeē cahán rō cuéchi síquī jnáhan ró cúu jeē ndénehen ró cuéchi síquī maá ró. Chi róhó jéé cahán cuéchi, suni súcuan sáha máa ró cuéchi. ² Chi jíni yō jeē Yaā Dios, ndaā sáha ya jeē ndóna ya síquī cuéchi ñayuu casáha súcuan. ³ Te róhó jéé cahán cuéchi síquī ñayuu casáha cuéchi, te suni súcuan sáha máa ró, ¿te á jéni ni rō jeē cácu máa ró quiví ndóna Yaā Dios síquī cuéchi, chí naún? ⁴ ¿A cújéé ni rō nuū jnúhun jeē yóhoyo váha ni Yaā Dios jíin ró, jíin jéé iyó paciencia yā jeē tú yachí cuāha ya castigo nuū rō? ¿Te á tu jécūhun ni rō jeē jnúhun jeē yóhoyo váha ni yā sáha jeē nácani ni rō síquī cuéchi ró? ⁵ Chi níhni ni rō te tu nácani ni rō síquī cuéchi ró. Te jeē yúcuan cáyā gā rō castigo síquī rō quiví sáha Yaā Dios juicio, máa quiví jeē cóo ndijin jeē ndaā sándaā yā síquī cuéchi. ⁶ Chi chunaa yā nuū ná ñn ná ñn ñayuu núu ndese jniñu ni casáha i. ⁷ Te ñayuu jeē tu jécuiñí i jeē sáha i jniñu váha, cuāha ya jnúhun jeē cótecu i ní cáni. Chi ndúcú i quiví i nuū ndujéhnú yíñúhún i, nuū ní cáni cotecu i. ⁸ Te quití ni yā te cuāha ya castigo nuū ñayuu cujéé ni nuū yā, te cúniñni ni nuū jnúhun ndaā, chí sa nuū jnúhun yacuá yóho jetáhú i. ⁹ Te tǎca ñayuu casáha jniñu néé, chí nihín i jnúndóho xeēn te cucuíhyá ndasí ni i, xíhna gā ñayuu hebreo te suni súcuan ñayuu tǎca gá nación. ¹⁰ Te sa suhva tǎca ñayuu casáha jniñu váha, chí quiví i nuū ndujéhnú yíñúhún i, te coo ndeyí coo sí ni i, xíhna gā ñayuu hebreo te suni súcuan ñayuu tǎca gá nación.

¹¹ Chi Yaā Dios tu sáha ya cuenta ndese cúu ñn ñn ñayuu, chí inuú sáha ya jíin i. ¹² Chi tǎca ñayuu jeē casáha cuéchi, vésú tu cáyihí i chíji ley jeē ni

jéhe ya nuū Moisés, te tu níni ley un te jnahnū ndetū i. Te tāca ñáyuu cáyihí chíji ley Moisés te cásáha cuēchi, jíin ley un sándaā yā cuēchi i. ¹³ Chi tu ndáhva Yaā Dios cuēchi ñáyuu jeē maá jéē cúni nahín-ni i jnūhun cáhán ley yā. Chi sa suhva ñáyuu squícu jeē cahán ley yā cúu jeē ndáhva yā cuēchi i. ¹⁴ Chi ñáyuu tācá nación jeē tu cánevāha tutu ley jeē ni jéhe ya nuū ñáyuu hebreo, te núu cásquícu máá i ley yā, suu cúu jeē cánevāha i ley yā ini anuá i, vēsú tu cánevāha i tutu ley un. ¹⁵ Te súcuan cástéén i jeē jnúhun ndácu ley un chí ñúhun ini anuá i. Te tāca jéē cájeni ni i jíin ánuá i, suu cúu jeē steén nuū i síquī núu ni sáha i cuēchi chí váha ni sáha i. ¹⁶ Te súcuan coo máá quívī jeē jíin Jesucristo sándaā Yaā Dios síquī tāca jéē tu íyó váha jeē ní cajeni sáhí ni tāca ñáyuu. Súcuan cáhán jnūhun vāha ya jeē nácani ri.

Síquī jeē tu cásquícu ñáyuu hebreo ley Moisés

¹⁷ Te róhó cácahān rō jeē téē hebreo cácuu rō, te cátenuū rō maá ley Moisés, te cácutéyí rō jeē síquí Yaā Dios. ¹⁸ Te cájeni ni rō jeē jíin rō ndese nújnahan ni yā, jíin jéē cúu nácāji vāha rō ndé-ni cúu jniñu váha, chí ni cacutūhva rō ley un. ¹⁹ Te cájeni ni rō jeē maá rō cácuu téē steén ichi Yaā Dios nuū ñáyuu tu cájini cuítī, jíin jéē cúu sáha rō jéē cúndijin ini anuá ñáyuu cájica nájnūhun nuū néē. ²⁰ Te cájeni ni rō jeē cúu steén rō nuū ñáyuu tú tūhva jnūhun ya, jíin jéē maá rō cácuu maestro nuū ñáyuu tu jécūhun ni. Chí jíin tutu ley yā te cájini rō ndese cúu jnūhun ndíchí jnūhun ndaā, cájeni ni rō. ²¹ Núu súcuan te máá rō jeē castéén nuū ñáyuu, ¿te naun tu cástéén rō nuū maá rō? Te máá rō jeē cácahān jeē ma sácúlná i, ¿te naun cásácúlná máá rō? ²² Te máá rō jeē cácahān jeē ma cósíquí ndéē i, ¿te naun cásíquí ndéē maá rō? Te máá rō jeē cácahān jeē cácuquini ni rō ídolo, ¿te naun cásácúlná rō ndajniñu jeē yúcu ini vehe ídolo? ²³ Te cácutéyí rō jíin ley Yaā Dios, te vēsú súcuan te

cásáha rō jéē cácahān ñáyuu síquī yā, chí tu cásquícu máá rō jnūhun ndácu ley yā ún. ²⁴ Chi súcuan yósó núu tútu íi: Ñáyuu tāca gá nación, máni cácahān ndevāha i síquī Yaā Dios, jeē síquí cuēchi róhó ñáyuu hebreo.

²⁵ Te núu cásquícu rō ley Moisés, yūcuán na te níhín jniñu ndije jeē ní canihín rō jnunī circuncidar. Te núu tu cásquícu rō ley un, te vēsú ni cuu rō circuncidar, te nájnūhun jeē tu ní cúu rō. ²⁶ Te téē tācá nación, núu cásquícu de jniñu ndácu ley un, vēsú tu ní cánihín de jnunī circuncidar, núu súcuan te nájnūhun ni canihín de jnunī circuncidar. ²⁷ Te téē jeē tu ní cúu circuncidar yíquí cúñu de, te cásquícu de ley yā, máá de cahán cuēchi síquí rō. Chí tu cásquícu rō, vēsú cánevāha rō tutu ley un, te ni cuu rō circuncidar. ²⁸ Chi nasūu jéē cáca ichi síquí ñn téē sáha jeē cúu ndije de téē hebreo. Te ni nasūu jéē cúu circuncidar yíquí cúñu ñn téē sáha jeē cúu de téē ndaā. ²⁹ Chi sa suhva téē cúu hebreo ndije, cúu jeē ini anuá de ñúhun jnūhun ndaā. Te téē cúu circuncidar ndije, chí nde jíin ini jíin ánuá de sáha de jniñu ndaā te nasūu jéē ndíso de jnunī circuncidar jeē cahán ley un cúu. Téē cándāa súcuan, nasūu ñáyuu cájejnúhún i de, chí máá Yaā Dios.

3

¹ ¿Núu súcuan te na vé íyó gá nuū ñáyuu hebreo jeē quéndōo vāha ga i? ¿Te ndé níhín jniñu jeē casáha i circuncidar? ² Vāha ndasí níhín jniñu. Xíhna gā nihín jniñu jeē ni jéhe Yaā Dios jnūhun ya nuū maá i. ³ Te vēsú sava i tu ní cácadíje, ¿te á suu sáha jeē ma squícu ga Yaā Dios jnūhun ni jejnūhun ya, chí naún? ⁴ Tú cuítī jeē súcuan, chí vēsú núu ndihí ñáyuu castáhú i, te Yaā Dios chí íyó ndáā yā. Chí suhva yósó nuū tútu íi jeē ni cáhān ñn téē jíin yá: Cahán ñáyuu jeē íyó ndáā ni jíin táca jnúhun cáhán ni, te cuni i jeē íyó ndáā ní vēsú núu cácahān i síquí ní. Achí tutu.

5 Te cácahān sava ñayuu jeē iyó váha jeē sáha yó cuéchi, chi cuéchi yó jéjníñu stéén jeē iyó ndáā Yaā Dios. Núu súcuan ¿te á cuu cahān yō jeē tú váha sáha Yaā Dios jeē jéhe ya castigo núu jéjníñu cuéchi yó súcuan? (Va cáhān-ni nde ri nájnūhun cácahān ñayuu ñayiví.) 6 Tú cuiti jeē súcuan. Chi núu jeē tú váha sáha Yaā Dios, ¿te ndese cuu sándaā yā cuéchi ñayuu ñayiví?

7 Te núu jnūhun stáhú cácahān ñayuu jéjníñu stéén jeē yóhyo cújéhu Yaā Dios siquī jeē máni cáhān ndaā yā, ¿te á cuu cahān yō jeē tú váha jeē cahān yā jeē cuéchi cúu jeē castáhú i? 8 Tuú, chi núu jeē súcuan cúu, te cuu cahān yō jeē vetū-ni sáha yó jéē neé návāha quee jeē váha núu. Te sava ñayuu cácahān ndevāha i siquī rī jeē súcuan cástéén rī, te tú ndaā. Ñayuu ún chi íyó váha jeē ndenehen ya cuéchi siquī i.

Ndivii yō iyó cuéchi

9 Núu súcuan ¿te á váha ga ñayuu cácuu yóhó ñayuu hebreo vésú inga ñayuu naún? Tú cuiti jeē súcuan. Chi je ni cacahān yō jeē vésú ñayuu hebreo chí ñayuu tāca gá nación, ndivii yō yíhi chíhi cuéchi. 10 Chi suhva cáhān tutu i: Tú cuiti na ñayuu ndaā iyó, ni ñn i.

11 Te tú cuiti ñayuu jécūhun ni iyó, te tú ni ñn i nánducú i Yaā Dios.

12 Ndihi i ni cascuíta i jnūhun ya, te inuú-ni ni castiví ndihi i máá i. Te tú cuiti ñayuu sáha jniñu váha íyó, ni ñn i.

13 Yaū sucūn i cúu nájnūhun yaū ndīyī jeē núne,

chi máni jnūhun stáhú cácahān i.

Te nájnūhun veneno coō yíhi yuhu i,

14 chí máni máá jnúhun ndevāha jnūhun uvuā cácahān i.

15 Te yóhyo ñama jehē i jeē cáhni i ndīyī.

16 Te ndé-ni cúu-ni nuū cájica i te squívī i jnūndóho jeē jnahnú ndetū ñayuu.

17 Te tu cájica cuiti i jíin jnúhun coyūcu mánī i,

18 te ni tu cánacani ni i jeē cónso īyo i nuū Yaā Dios.

Achí tutu.

19 Te jíni yō jeē tāca jnúhun cáhān ley jenahán, chi cáhān nuū ñayuu yíhi chíhi ley un, návāha ndihi i ma cúu cahān i jehē i. Chi ndenehen Yaā Dios cuéchi siquī i nde jíin ñayuu ní ñayiví. 20 Chi tú ni ñn ñayuu quendōo ndaā i nuū yā jeē nducú i squícu i jniñu ndácu ley un. Chi ley un jéjníñu máni návāha cuni yō jeē iyó cuéchi yó.

Jeē jnáma ya yohó siquī jeē candíje yó jéē sáha ya jehē yō

21 Te vijna te je cájini váha yó ndese ndáhva Yaā Dios cuéchi yó. Te nasūu ley un sáha jeē quendōo ndaā yō, vésú maá tutu ley jíin téé ni canacani jnūhun ya, ni cacahān ndese ndáhva yā cuéchi ñayuu. 22 Chi tāca ñayuu jeē cácaandíje i jeē ni jíhi Jesucristo jeē chúnaa yā cuéchi i, chí ndahva Yaā Dios cuéchi i siquī jeē súcuan cácaandíje i. Chi inuú-ni cúu táca ndihi ñayuu.

23 Chi ndihi yó ni casáha cuéchi, te jeē yúcuan tu ní cúu quendōo ndaā yō nuū Yaā Dios. 24 Te siquī jeē yóhyo váha ni Yaā Dios, jeē yúcuan ndáhva yā cuéchi yó súcuan-ni. Chi siquī jeē ni jíhi Cristo Jesús cúu jeē jnáma ya yohó. 25 Chi Yaā Dios ni jeni ya Cristo návāha socō yā maá yá chunaa yā cuéchi yó jéē ni jíhi yā. Te jnáma ya yohó núu súcuan cándíje yó. Te súcuan ni sáha Yaā Dios návāha stéén yā jeē Yaā ndaā cúu ya. Chi ichi yátá ni īyo paciencia yā, te tu ní chíhi ya cuenta cuéchi ñayuu. 26 Te tiempo yáha stéén yā jeē Yaā ndaā cúu ya, chí ndaā sáha ya jeē squéndōo ndaā yā ñayuu candíje vésú íyó cuéchi i, chí cácaandíje i jeē ní chunaa Jesús cuéchi i ni ndahva yā.

27 Núu súcuan ¿te á cuu cutéyī gá yō siquī maá yó? Ma cúu cuiti, chí ma cúu cutéyī yó cani ni yō jeē váha squícu yó ley yā. Chi jnáma ya yohó máá siquī jeē candíje yó jéē sáha ya jehē yō. 28 Núu súcuan te je jíni yō jeē ndáhva Yaā Dios cuéchi yó siquī jeē súcuan cándíje yó, te nasūu jéē nducú yó squícu yó jéē ndácu ley.

29 ¿Te á núu maá-ni ñayuu hebreo cúu ya Yaā Dios, chí naún? Tuú, chí suni cúu ya Yaā Dios jeē jnáma

ñayuu tāca gá nación. ³⁰ Chi ñn-ni Yaā Dios iyó, te ndáhva yā cuēchi ñayuu cácanđije jeē ni sáha ya jehē i, cúu ñayuu ndíso jnunī circuncidar, cúu ñayuu jeē tuú. ³¹ Te jeē candíje yó jéē jnáma ya yohó, ¿á sáha jeē tuá jíni ñúhún squícu yó ley yā, chí naún? Tú cuítí, chí sa suhva sáha jeē váha ga cuu squícu yó ley yā.

Abraham cúu ñn ejemplo nuū yō

4

¹ Núu súcuan ¿te ndese cahān yō síquī tāca jéē ní cuu jíin jíi yō Abraham? ¿Ndese ni ndahvā cuēchi de? ² Nasūu jéē ni sáha máa de cúu jeē ní ndahva Yaā Dios cuēchi de. Chi núu jeē súcuan cúu núu, te cuu cutéyí de jeē váha ni sáha de. Te tu ní cutéyí de, chí nasūu síquī jeē ni sáha máa de cúu jeē ní ndahva Yaā Dios cuēchi de. ³ ¿Chi ndese cáhán tutu íi? Cáhán jeē ní candíje Abraham jeē sáha ya jeē ní jéjnūhun ya nuū de, te jeē yúcuan ní ndahva yā cuēchi de. ⁴ Te ñn ñayuu sájniñu, te yāhu i chí nasūu jéē cútahū i cúu, chí jeē chúnaa yō nuū i cúu. ⁵ Te jeē jnáma Yaā Dios ñayuu, chí jeē cútahū i cúu. Chi vésú tu cúu squícu i táca jniñu váha, te núu candíje i jeē jnáma ya i nuū cuéchi i, yūcuán na te ndahva yā cuēchi i. ⁶ Te David suni ni cahān de ndese yōhyo ndetū ñayuu jeē ndáhva Yaā Dios cuēchi i, vésú tu cúu sáha i ni ñn jniñu jeē quéndōo ndaā i nuū yā. ⁷ Chi ni cahān de:

Nacā ndetū ñayuu jeē íne cáhnu ni yā
nuū jniñu néé ni sáha i,
te tu ndénehen ya cuēchi síquī i.

⁸ Te nacā ndetū tēe jeē tuá chíhi máa
Jítóho yō cuenta cuēchi de.

Achí tutu.

⁹ ¿Te á máni máa ñáyuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máa i quéndōo ndetū i. Chí je ni cahān yō jeē ní candíje Abraham jeē sáha ya jeē ní jéjnūhun ya, te jeē yúcuan ní ndahva yā cuēchi de. ¹⁰ Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu

jeē jé ni cuu de circuncidar, chí nde ná tuú. ¹¹ Te cuéé gá te ni nihīn de jnunī circuncidar. Te suu ni cuu ñn seña, nájñūhun ñn sello jeē ní ndahva yā cuēchi de síquī jeē súcuan ni candíje de. Te jeē yúcuan ní cahān yā jeē cuu de jíi nuū tāca ñáyuu jeē candíje i jeē sáha ya jehē i, suni nuū ñáyuu tu ní cúu circuncidar, chí suni ndahva yā cuēchi máa i. ¹² Te suni cúu de jíi nuū ñáyuu ní cuu circuncidar, te nasūu máni jeē ní cuu i circuncidar, chí suni jeē ní jñi i ejemplo de. Chí cácanđije i jeē sáha ya jehē i, nájñūhun ni candíje máa de nde ná tu cuu de circuncidar.

Núu candíje yó te sáha Yaā Dios jeē ni jéjnūhun ya

¹³ Chi ni jejnūhun Yaā Dios nuū Abraham jíin núu tāca yúcūn de jeē cuāha ya ní ñáyiví cuu tahū de. Te nasūu síquī jeē ní nducú de squícu de ley yā cúu jeē ní jejnūhun ya un núu de, chí sa suhva síquī jeē ní candíje de jeē ní jéjnūhun ya, te ni ndahva yā cuēchi de. ¹⁴ Chi núu jeē máni máa ñáyuu nducú squícu ley cúu jeē nihín jeē ni jéjnūhun ya, núu súcuan te cándíje cāha yó núu, te ma nihín jniñu jeē ní jéjnūhun ya ún. ¹⁵ Te ley chí sáha jeē nihín ñayuu castigo síquī jeē tu cúu squícu i. Te núu jeē tu ley, te suni tú na jñūhun stíví ñayuu síquī ley coo núu.

¹⁶ Núu súcuan te ni jejnūhun ya jeē sáha ya jeē váha jíin ñáyuu síquī jeē candíje i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núu maá-ni ñayuu jeē nducú squícu ley jenahán, chí suni nuū tāca ñáyuu cácanđije nájñūhun ni candíje Abraham. Te súcuan cúu de jíi nuū tāca yó jeē cácanđije yó. ¹⁷ Súcuan ni sáha Yaā Dios chí ni candíje de jeē sáha ya. Chí súcuan cáhán tutu íi: Ni jeni ri rohó cuu ró jíi nuū cuehē ndasí ñáyuu. Súcuan ni cahān maá Yaā jeē nastécu ndíyí te cáhán yā ndese coo tāca jéē ná tu coo.

¹⁸ Te ni candíje de, te ni cocuhun teyí ni de jeē ní jéjnūhun ya jeē coo

cuehē yucūn de, vēsú tuá na modo coo sēhe de núú. Te jeē yúcuan ní nduu de jíi nuū cuehē ndasí ñáyuu, nájnūhun ni cahān Yaā Dios: Súcuan nducuehē yucūn rō, achí yá jíin de. ¹⁹ Te je yajni jinū de ciento cuiyā, te vēsú súcuan te tu ní quéndā de nuū jnúhun cándíje de, vēsú jiní de jeē maá de jíin ñasíhí de Sara je jéhnū ndasí ndíndúú de jeē maá cóo sēhe de. ²⁰ Te tu ní nácani síquí ni de jeē ma cándíje ga de jnúhun ní jejnūhun Yaā Dios jeē coo sēhe de. Chi sa suhva ni candíje níhin ga de, te ni nacuatáhú de nuū Yaā Dios. ²¹ Chi ni cucáhnū vāha ni de jeē cóo sēhe de. Chi sa suhva ni candíje níhin ga de, te ni nacuatáhú de nuū Yaā Dios. ²¹ Chi ni cucáhnū vāha ni de jeē cóo sēhe de. Chi sa suhva ni candíje níhin ga de, te ni nacuatáhú de nuū Yaā Dios. ²² Te jeē yúcuan ní ndahva yā cuēchi de síquí jeē súcuan ni candíje de.

²³ Te nasūu máá-ni síquí Abraham cóo jeē yosó núú tútu jeē ní ndahva yā cuēchi de jeē ní candíje de. ²⁴ Chi suni yósó jéē síquí yohó jíjnāhan yó. Chi suni ndáhva yā cuēchi máá yó jéē candíje yó jéē cóo sēhe de. Chi sa suhva ni candíje níhin ga de, te ni nacuatáhú de nuū Yaā Dios. ²⁵ Chi ni jihí Jesús jeē chúnā yā cuēchi yó, te ni natecu yā návāha ndahva Yaā Dios cuēchi yó.

Ndese quéndōo ñayuu jeē ndáhva yā cuēchi

5

¹ Núu súcuan te je ni ndahva Yaā Dios cuēchi yó síquí jeē ní candíje yó jéē sáha ya jehē yō. Te jeē yúcuan ní sáha ya jeē ní ndívi yó núu jnúhun maní yā jíin yó, síquí jeē ni jihí Jitoho yō Jesucristo jehē yō. ² Chi máá Cristo ni sáha jeē ni quívícoo yó núu Yaā Dios, chi ni sáha ya jeē vāha yóhó síquí jeē súcuan cándíje yó. Te cáhīn níhin yó jíin jnúhun jeē sáha ya jeē vāha yóhó. Te cúsī ni yō chí ñúhun ni yō jeē jinú yō nuū lúu cujéhnū yó jíin Yaā Dios. ³ Te nasūu máá yāha-ni, chi suni cúsī ni yō jeē ndóho yó jnúndóho. Chi jíin yō jeē maá jnúndóho sáha jeē jéndeyí ni yō. ⁴ Te jeē jéndeyí ni yō sáha jeē íje vāha yó cuu yó ñáyuu ndaā. Te jeē íje vāha yó sáha jeē ñúhun ni yō tāca jéē vāha jeē cóo. ⁵ Te tāca jéē

ñúhun ni yō, chí níhīn nahín yó. Chi jnúhun cúndáhú ni Yaā Dios yohó, ni cunuú ini anuá yō, sáha Yaā Dios jeē jíin Espíritu Santo jeē ni jéhe ya nuū yō.

⁶ Chi náa ndóho yó jéē ma cóo cuíti jnama yó máá yó, te ni jihí Cristo jehē yohó jéē cóo sēhe de. Chi sa suhva ni candíje níhin ga de, te ni nacuatáhú de nuū Yaā Dios. ⁷ Te yí cóo sēhe de. Chi sa suhva ni candíje níhin ga de, te ni nacuatáhú de nuū Yaā Dios. ⁷ Te yí cóo sēhe de. Chi sa suhva ni candíje níhin ga de, te ni nacuatáhú de nuū Yaā Dios. ⁸ Te máá Cristo chí ni jihí yā jehē yō náa máni cuēchi sáha yó, te súcuan ni steén Yaā Dios jeē cundáhú ni yā yohó. ⁹ Te vijna je ni ndahva Yaā Dios cuēchi yó síquí jeē ni jihí Cristo jehē yō. Núu súcuan te suni jíin vāha yó jéē jnama Cristo yohó núu castigo quiiji quívi sáha Yaā Dios juicio. ¹⁰ Chi náa cóo ga yō enemigo Yaā Dios, te síquí jeē ni jihí Sēhe ya jehē yō, te ni sáha ya jeē ndívi yó núu jnúhun maní yā jíin yó. Te jeē súcuan ní ndívi yó núu jnúhun maní yā jíin yó, te suni jíin vāha yó jéē cācu yó síquí jeē técu Cristo, nduú yá jíin yó. ¹¹ Te nasūu máá yāha-ni, chí suni cúsī ndasí ni yō jíin Yaā Dios síquí jeē ni sáha Jitoho yō Jesucristo jehē yō, chí máá yá ni sáha jeē ní ndívi yó núu jnúhun maní Yaā Dios jíin yó.

Jnúhun Adán jíin jnúhun Cristo

¹² Núu súcuan te jíin yō jeē ni quívi cuēchi ini ñayívi ní sáha máá ñn-ni tēe Adán. Te jeē síquí cuēchi yúcuan te ni jecōo cuehyí jéhnī ñayuu. Te jeē yúcuan cóo jeē jihí ndívi ñayuu, chí ndívi i yíhi cuēchi. ¹³ Te nde ná tu cuāha ya ley nuū Moisés, te je íyó cuēchi ini ñayívi. Te síquí jeē ná tu coo ley yā, te tu ní chíhi ya cuenta jeē castívi i. ¹⁴ Te vēsú súcuan te nde tiempo Adán te nde tiempo Moisés ni yíhi ñayuu chíhi cuehyí jeē jéhnī i síquí jeē íyó cuēchi i. Chi ni jihí i síquí cuēchi ni casáha máá i, vēsú tu ní sáha i jnáhan cuēchi jeē ni sáha Adán jeē ní cuníhni ni de nuū ñn jníñu ní ndacu ya. Te Adán ni cuu de ñn muestra máá Yaā ní quiiji cuéé gá.

15 Te jñūhun jeē ni sāha Adán cuēchi, tu quíjnáhan cuiti jíin táhū jeē jnáma Yaā Dios yohó. Chi jeē ni stívi máá ñn-ni tēe ún, jeē yúcuan cúu jeē jihí ndihí yó. Te jñūhun jeē jnáma Yaā Dios yohó cújéhnū ndasí gá, chí síquī jeē ni sāha máá ñn-ni tēe Jesucristo cúu jeē súcuan-ni jnáma ya ndihí ñayuu candíje. 16 Te cuēchi jeē ni sāha máá ñn-ni Adán, tu quíjnáhan cuiti jíin jñūhun jeē jnáma Yaā Dios yohó. Chi síquī máá ñn-ni cuēchi ún te ni quívicoo ñayuu chíji jñūhun jnahnū ndetū i. Te jñūhun jeē jnáma ya ñayuu, sa suhva sāha jeē súcuan-ni ndáhva yā cuēchi i, vésú yóhyo cuehē cuēchi ni casáha i. 17 Chi síquī jeē ni sāha máá ñn-ni tēe Adán cuēchi, te ni nihīn poder cuehyí jéhní ñayuu. Te sa suhva síquī jeē ni jíhí maá ñn-ni tēe Jesucristo, te víhyá gā ni nihīn ñayuu maá yá poder jeē cótecu i caca ndaā i jíin yá. Chi ni ndahva yā cuēchi i síquī jeē yóhyo vāha ni yā.

18 Núu súcuan te síquī jeē ni sāha máá ñn-ni tēe Adán cuēchi, te ni quívicoo ndihí ñayuu chíji jñūhun jnahnū ndetū i. Te sa suhva síquī jeē ni sāha máá ñn-ni tēe Jesucristo ñn jniñu vāha ndasí, te ndáhva Yaā Dios cuēchi ndihí ñayuu te cotecu i ní cání. 19 Chi síquī jeē tu ní jéndije máá ñn-ni tēe, te ni quívicoo cuehē ndasí ñayuu chíji cuēchi. Te suni súcuan síquī jeē ní jéndije máá ñn-ni tēe Jesucristo, te ndáhva Yaā Dios cuēchi cuehē ndasí ñayuu.

20 Te ni jēhe ya ley yā návāha cuni yō jeē cuéhē cuēchi casáha yó. Te jeē ní nducuehē cuēchi yó, te víhyá gā cuehē cúu jñūhun jeē vāha ni yā jeē íne cáhnu ni yā nuū yō. 21 Núu súcuan te nájnūhun ni nihīn poder cuehyí jéhní ñayuu síquī jeē iyó cuēchi i, suni súcuan iyó poder jñūhun jeē vāha ni yā jíin yó. Chi ndáhva yā cuēchi yó te cotecu yō ní cání síquī jeē ni jíhí Jitoho yō Jesucristo jehē yō.

Jeē tuá yáhi yó chíji cuēchi chí yáhi yó ndaha Cristo

6

1 Núu súcuan ¿te ndese cahān yō? ¿A caca ga yō jíin cuēchi návāha víhyá gā sāha ya jeē vāha yóhó jéē cóne cáhnu ni yā nuū yō? 2 Ma cúu cuiti. Chi nájnūhun je ni jihí yō jeē tuá yáhi yó chíji cuēchi, te ma cúu ga caca yó jíin cuēchi núu súcuan. 3 ¿A tu cájecūhun ni rō jeē tāca yó jeē ní jendute yó síquī jeē ni quívi yó ndaha Cristo Jesús, suni ni jendute yó síquī jeē ni quívi yó chíji jñūhun jeē ni jíhí yō jíin yá? 4 Chi jeē ní jendute yó cúu nájnūhun ni quindūji yó jéē ni jíhí yō jíin yá. Te vijna te cuu caca yó jíin vida jeé jeē ní jēhe ya nuū yō, chí nájnūhun suni ni natecu yō jíin yá. Chi ni natecu yā ni sāha Tátá yā jíin poder jeē cújéhnū ndasí yá.

5 Chi núu ni cundúú yó jíin yá síquī jñūhun jeē ni jíhí yō jíin yá, te suni súcuan cundúú yó jíin yá síquī jñūhun jeē ní natecu yō jíin yá. 6 Chi jíin yō jeē ní naa modo maá yó jeē ni jíca yó jíin ichi yátá, chí ni quívi yó núu jñūhun jeē ni jíhí yō jíin Cristo jíca cruz. Te súcuan ni naa modo yō jeē cúu yó mozo nuū cuēchi, návāha tuá cuajniñu yó núu táca jniñu jeē máni cuēchi cúu. 7 Chi ñayuu jeē jé ni cajihí, je ni quendacoo i chíji tāca cuēchi. 8 Te núu je ni jihí yō jíin Cristo, te cándije yó jéē suni súcuan ni natecu yō jíin yá. 9 Chi jíin yō jeē ní natecu Cristo, te ma cúu cuiti ga yā, chí cuehyí jéhní yóhó, tuá na vé cúu sāha jíin yá. 10 Chi jeē ni jíhí yā, te ñn jínu-ni ni jihí yā jeē síquī cuēchi ñayuu. Te jeē técu yā vijna, chí sāha ya jeē cuní Yaā Dios. 11 Te suni súcuan róhó jíjnáhan ró, sāha ró cuenta jeē nájnūhun ni cajihí rō jeē ní quendacoo ró chíji cuēchi. Te cátecu rō návāha sāha ró jéē cuní Yaā Dios, chí ndúú ró jíin Jítoho yō Cristo Jesús.

12 Núu súcuan te ma cuáha ga rō jñūhun quíhi ró chíji cuēchi jíin yá quí cúñu rō jeē cúu. Chi cuēchi ún stíhví ni rohó jéē na sāha ró táca jéē ndíyo néé ni rō. 13 Te ma cuáha ró máá ró cuajniñu ró núu cuēchi jeē cócuu ró jíin jniñu néé. Chi sa suhva cuáha

ró máá ró nuū Yaā Dios, te sáha ró cuenta jeē nájnūhun je ni cajihī rō te ni canatecu rō nuū yā. Te cuāha ndihī ró máá ró nuū yā jeē cuajníñu ró núū jniñu ndaā. ¹⁴ Chi tuá na poder cuēchi jeē cundeyí jíin ró, chi tuá cáyihī ró chíji ley jenahán, chi sa cáyihī ró chíji jnūhun jeē váha ni yā jíin ró.

Jnūhun mozo jeē steén ndese quéndōo ñayuu cá candíje

¹⁵ ¿Ndesé sáha yó núu súcuan? ¿A caca ga yō jíin cuéchi síquī jeē tuá yíhi yó chíji ley jenahán, chi sa yíhi yó chíji jnūhun jeē váha ni yā jíin yó? Ma cúu cuítī. ¹⁶ Chi cájini rō jeē núu cuāha ró máá ró jeē cuatáhú ró sájniñu ró núū ñn tēe, núu súcuan te cácuu ró mozo nuū tée ún, te cánuú cuandije ró núu de. Te suni súcuan núu cuāha ró máá ró jeē sáha ró cuéchi, te mozo cuēchi cácuu ró, te cuu rō. Te núu cuatáhú ró nuū máá yá, te mozo yā cácuu ró jéé cáca ndaā rō. ¹⁷ Te na cútahū yō nuū Yaā Dios, chi vésú ni cacuu ró mozo nuū cuéchi, te vijna chi nde jíin ini jíin ánuá rō ni cajetáhú ró nuū jnūhun ya jeē ni quívicoo ró núu. ¹⁸ Te vijna te je ni nduu libre rō jeē tuá cácuu ró mozo nuū cuéchi, te cájejniñu ró núu jniñu ndaā. ¹⁹ (Ni cahán rī ñn jnūhun ndese cúu síquī mozo ini ñayívi yáha, chi tu cájecūhun yachī ni rō síquī jnūhun ya.) Núu súcuan te nájnūhun ni cajēhe ró máá ró nde saá jeē ní cajejniñu ró núu táca jniñu jnéhén jniñu néé, suni súcuan cuāha ró máá ró vijna jeē cuajniñu ró núu jniñu ndaā, návāha coo ndoo coo iī rō nuū Yaā Dios.

²⁰ Chi nde náa cácuu ró mozo nuū cuéchi, te tu ní cájejniñu ró núu jniñu ndaā. ²¹ ¿Te na vé ni canihīn rō síquī cuéchi ni casáha ró un jéé cácuu rō vijna sáha? Tú cuítī, chi máá jéé jnahnú ndetū rō ní cáni sáha. ²² Te vijna te je ni canduu libre rō jeē tuá cácuu ró mozo nuū cuéchi, te cájejniñu ró núu Yaā Dios. Te suu sáha jeē quéndōo vāha ró, chi cáhīyo ndoo cáhīyo iī rō nuū yā, te nde sandíhi te cotecu rō ní cáni. ²³ Chi yāhu jeē nihín ñayuu síquī cuéchi cúu jeē jnahnú ndetū i. Te sa tahū jeē jéhe Yaā

Dios cúu jeē cótecu yō ní cáni andívi, síquī jeē nduú yó jíin Jítoho yō Cristo Jesús.

Jnūhun ñasihí jíin yí jeē steén ndese quéndōo ñayuu cá candíje

7

¹ Hermano, je cájini rō ndese cáhán ley yā, te cájini rō jeē yíhi ñayuu chíji ley maá-ni núu técu i ñayívi yáha. ² Te yāha cúu nájnūhun ñn ñahan jeē ní quijnáhan, chi cáhán ley jeē yíhi ña ndaha yí ña maá-ni núu técu de. Te núu ni jihī yí ña, te je ni quenda ña chíji ley jeē ní quijnáhan ña jíin de. ³ Núu súcuan te núu quijnáhan ña jíin inga tēe ní ní técu gā yí ña, te cá síquī ndéé ña de. Te núu je ni jihī yí ña, te je ni quenda ña chíji ley un. Te cuu quijnáhan ña jíin inga tēe, chi nasūu jéé casíquī ndéé ña núu súcuan.

⁴ Te suni súcuan rōhó jíináhan ró, ñánī mánī, chi nduú ró jíin Cristo. Chi nájnūhun ni cajihī rō jíin Cristo, te ni quendacoo ró chíji ley jenahán. Te vijna chi nájnūhun ni quijnáhan ró jíin inga, cúu jeē ní quívicoo ró ndaha Cristo, Yaā ni natecu mēhñu ndíyi, návāha cuu sáha ró jniñu váha jeē cuní Yaā Dios. ⁵ Chi ná ni cajica yó jíin modo maá yó nde saá, te ley un ní sáha jeē ní ndíyo néé ni yō táca jéé cuní yíquī cúñu yō jeē sáha yó. Te yūcuan ní sáha jeē jnahnú ndetū yō nuú. ⁶ Te vijna te je ni quenda yó chíji ley jenahán, chi nájnūhun je ni jihī yō jeē ma nihín gā poder síquī yō. Te súcuan te íyó libre yō jeē cuajniñu yó núu Yaā Dios. Te jíca yó jíin modo jeé jéé cuní maá Espíritu, chi tuá yíhi yó chíji ley jeē ní tee Moisés jenahán.

Síquī cuéchi jeē ñūhun ini anuá yō

⁷ ¿Ndesé cahán yō núu súcuan? ¿A ley ndíso cuéchi? Tú cuítī jeē súcuan. Te núu jeē tú ley yā, te ma cúni cuítī rī jeē iyó cuéchi rī. Chi ma cúni rī jeē cuéchi cúu jeē ndíyo ni rī ndajniñu jnahan rī núu tu ní cáhán ley jeē ma ndíyo ni yō. ⁸ Te súcuan ni nihín cuéchi modo cocuu jíin rí. Chi síquī jeē ndácu ley jniñu jeē ma sáha yó cuéchi, te ni

quejéé ndíyo ni rī sáha ri tāca jéé neé. Te núu jeē tu ley, te suni tú na jnūhun stívi yó siquī ley nuú. ⁹ Chi ni iyo tiempo jeē técu rī jeē ná tu jecūhun ni rī jeē cahán ley. Te ná ni quejéé rí jécūhun ni rī jniñu jeē ndácu ley, te ni jecūhun ni rī jeē iyó cuéchi ri, te ni nduu ri nájnūhun ndīyi. ¹⁰ Chi ni jini rī jeē ley jeē sáha jeē cótecu anuá rī nuú, te tuú chi sa ni sáha jeē jnahnú ndetū rī nuú. ¹¹ Chi jíin jéé ndácu ley un jniñu, te ni nihīn cuéchi modo cocuu jíin rí, te ni stahú ruhū. Chi jíin jéé ndácu ley jniñu, te cuéchi ni sáha jeē ní quenda jnūhun jeē jnahnū ndetū rī.

¹² Núu súcuan te iyó ndáa maá ley, te tāca jniñu ndácu chi iyó ndoo iyó ndáa vāha. ¹³ Núu súcuan te ley jeē iyó vāha ún, ¿á suu sáha jeē jnahnú ndetū rī naún? Tú cuíti. Chi sa suhva maá cuéchi cúu jeē sáha jeē jnahnú ndetū rī, te súcuan stúu cuéchi ndese iyó maá. Chi jíin jniñu vāha jeē ndácu ley te ni natūu jniñu néé jéé cúu cuéchi.

¹⁴ Chi jíin yō jeē nuū maá Espíritu vēji ley. Te ruhū chi sa névāha ri in modo neé maá rí jeē ni squívi ruhū jejniñu cāha rí nuū cuéchi. ¹⁵ Chi tāca jéé sáha ri, tu jécūhun ni rī najehē cúu jeē sáha ri. Chi jniñu vāha jeē cuní rī sáha ri, tu ndé níhín rī fuerza sáha ri, chi sa suhva sáha ri jniñu néé jéé tu cúvāha ni rī sáha ri. ¹⁶ Te náa sáha ri jniñu néé jéé tu cuní rī sáha ri, núu súcuan te nácuni rī jeē iyó ndáa ley. ¹⁷ Núu súcuan te nasūu rúhū cúu jeē sáha jniñu néé un, chi modo neé jéé nūhun ini anuá rī cúu jeē sáha cuéchi. ¹⁸ Chi jíin rī jeē modo maá rí jeē névāha ri ini anuá rī, tú cuíti na vé jeē vāha iyó. Chi cuní rī sáha ri jniñu vāha, te tu ndé níhín rī fuerza sáha ri. ¹⁹ Chi jniñu vāha jeē cuní rī sáha ri, tu sáha ri. Te jniñu néé jéé tu cuní rī, sa yūcuan sáha ri. ²⁰ Te náa sáha ri jniñu jeē tu cuní rī sáha ri, te nasūu rúhū cúu jeē sáha, chi modo neé jéé nūhun ini anuá rī cúu jeē sáha.

²¹ Núu súcuan te ni jini rī jeē súcuan cúu jíin rí: Vēsú cuní rī sáha ri jniñu vāha, te sa máni modo neé cúu jeē

nūhun ini anuá rī. ²² Chi cúsi ni rī jíin ley Yaā Dios nde jíin ini anuá rī. ²³ Te ni nacuni rī jeē iyó inga modo neé maá rí jeē jési nuū jeē cuní rī sáha ri jeē vāha. Te cúu ri nájnūhun preso nuū cuéchi jeē jícu jíin rí.

²⁴ Nacā jeē ndahú gá cúu ri núu súcuan. ¿Ndé in jnama ruhū nuū modo neé maá rí jeē jícu jíin rí jeē jnahnú ndetū rí? ²⁵ Na cútahū ndasí rí nuū Yaā Dios, chi maá yá cúu jeē jnáma ruhū nuū modo neé rí siquī jeē ni jíhī Jitoho rī Jesucristo jehē rī. Núu súcuan te vēsú cuní yō squícu yó ley Yaā Dios, te jeē jíin fuerza maá yó ma cúu, chi modo neé maá yó sáha jeē jejniñu cāha yó nuū cuéchi.

Siquī jeē jíca yó jíin modo cuní Espíritu Yaā Dios

8

¹ Núu súcuan te ma ndénehen Yaā Dios cuéchi siquī ñayuu cáyihī ndaha Cristo. Chi tuá cájica i jíin modo neé maá i, chi sa suhva cájica i nájnūhun cuní maá Espíritu yā. ² Chi modo jeē sáha Espíritu cúu jeē técu yō siquī jeē yíhi yó ndaha Cristo Jesús. Te yūcuan ní sáha jeē ní nduu libre yō nuū jnūhun jeē ni yíhi yó chíji cuéchi jeē jnahnú ndetū yō nuú. ³ Chi ni sáha Yaā Dios jeē quéndōo vāha ñayuu jeē tu ní cúu quendōo vāha jíin ley Moisés, siquī jeē tú na fuerza i jíin modo maá i jeē squícu i ley un. Chi ni tají yá Sēhe ya ni quiji, te ni nduu ya nájnūhun ñayuu cáhīyo cuéchi, návāha socō yā maá yá siquī cuéchi, vēsú tú na cuéchi ya. Te súcuan ni ndonda Yaā Dios siquī cuéchi jeē ní casáha ñayuu jíin modo neé maá i. ⁴ Súcuan ni cuu návāha cuu squícu yó táca jniñu ndaā jeē ndácu ley, chi tuá jíca yó jíin modo neé maá yó, chi jíca yó nájnūhun cuní maá Espíritu.

⁵ Chi ñayuu jeē cájica jíin modo neé maá, chi máni ndíhví ni i siquī jeē cuní maá i. Te ñayuu jeē cájica nájnūhun cuní Espíritu, chi máni ndíhví ni i siquī jniñu cuní maá Espíritu. ⁶ Te jeē ndíhví ni yō siquī modo cuní maá yó sáha jeē

jnahnú ndetū yō. Te jeē ndihví ni yō síquī jniñu cúní maá Espíritu, sa suhva sáha jeē cotecu yō ní cáni te coo ndeyí coo sí ni yō. ⁷ Chi ñayuu jeē ndihví ni síquī modo neé cúní maá i, chi jító uhū i Yaā Dios, chi tu cúní i cuatáhú i ley Yaā Dios, te ni ma cúu squícu i. ⁸ Jeē yúcuan, ñayuu jíca jíin modo cuní maá, tu cúu sáha i jeē cúsi ni Yaā Dios jíin i.

⁹ Te máá ró jijnáhan ró, chi tuá cájica ró jíin modo cuní maá ró, chi cájica ró nájnūhun cúní Espíritu, chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihí i ndaha ya. ¹⁰ Te núu ndéé Cristo ini rō, te vésú in quiví te cuu yiquí cúñu rō jeē síquí cuēchi, te cotecu anuá rō síquī jeē ní ndahva Yaā Dios cuēchi ró. ¹¹ Te núu ini rō jijnáhan ró ndéé Espíritu maá Yaā jeē ní nastécu Cristo Jesús mēhñu ndíyí, yūcuán na te máá yá suni sáha ya jeē natecu yiquí cúñu rō jeē cúu. Te sáha ya súcuan jeē jíin máá Espíritu yā jeē ndeé ini rō.

¹² Núu súcuan, hermano jijnáhan ró, ndéé jniñu yó jéé caca ndaā yō, te nasūu jéé sáha yó modo neé cúní maá yó. ¹³ Chi núu caca ró jíin modo neé máá ró, te jnahnú ndetū rō. Te núu jíin fuerza maá Espíritu snāā rō tācá jniñu casáha ró jíin modo neé máá ró, te cotecu rō ní cáni.

¹⁴ Chi tāca ñayuu jeē cándiquin modo jeē steén Espíritu Yaā Dios, máá i cácuu sēhe Yaā Dios. ¹⁵ Chi Espíritu jeē ní canihin rō, tu ní sáha ya rohó jéé cuu ró nájnūhun mozo nuū yā jeē yūhú tucu ró núu yā, chi sa ni sáha ya jeē cúu yó séhe ya. Te jeē yúcuan cúu jeē cahán jee yó: Tátá maá ná. ¹⁶ Te máá Espíritu steén yā ini anuá yō jeē cúu ndije yó séhe Yaā Dios. ¹⁷ Te núu sēhe ya cácuu yó, te suni nihin yō maá táhū jeē ní jéjnūhun ya, te in cáhnu-ni coo tahū yō jíin Cristo. Chi núu ndóho yó jíin yá vijna, suni cujéhnu yó jíin yá andiví.

¹⁸ Núu súcuan te sáha ri cuenta jeē tāca jnúndóho jeē ndóho yó vijna, lúli ndasí cúu nuū jnúhun jeē cujéhnu luu yó jíin yá cucuéé gá. ¹⁹ Chi ndihí jeē

ni jécōo, yōhyo cándētu jeē na sáha Yaā Dios jeē nduvāha, quiví quenda ndijin jeē cujéhnu sēhe Yaā Dios jijnáhan i.

²⁰ Chi tāca jéé ni jécōo, chi ni quiví chíji jnúhun jeē tu quéndōo vāha. Te nasūu jéé ní castíví máá, chi ñayuu ni casáha cuēchi, te jeē yúcuan ní squéndōo Yaā Dios súcuan. Te máni cándētu jeē ndúvāha. ²¹ Chi in quiví te tāca jéé ni jécōo, chi quenda chíji jnúhun jeē tíví jíin jéé tehyú. Te nduluu ndasí nájnūhun coo tāca séhe Yaā Dios, chi cācu nuū jnúhun jeē tu quéndōo vāha.

²² Chi jíin yō jeē tāca jéé ni jécōo, chi nde vijna te nájnūhun inuú-ni cándoho te cájitū ni jeē na ndúvāha ndihí. ²³ Te nasūu máá-ni tāca jéé ni jécōo cúu jeē ndóho, chi suni nde maá yó ndóho yó, vésú je névāha yó Espíritu jeē cúu seña jeē in quiví te nihin yō ndihí tahū yō. Chi yōhyo ndóho yó jnúndóho, te ndétu yó jéé náquihin séhe ya yohó te jnama ya yiquí cúñu yō jeē tuá ndoho yó jíin. ²⁴ Chi ni jnama ya yohó síquī jeē ñúhun ni yō jeē súcuan coo. Te núu je ni sáha ya nájnūhun ñúhun ni yō, yūcuán na te tuá ñúhun ni yō jeē sáha ya súcuan jíin yó. Chi tuá ndétu yó te núu je ni cuu súcuan. ²⁵ Te núu ná tu coto yó jéé sáha ya jeē ñúhun ni yō, yūcuán na te jíin paciencia ndétu yó jéé sáha ya.

²⁶ Te suni súcuan máá Espíritu chindéé ñáhán yá yohó jéé tú na fuerza ini yō. Chi tu jíin yō cacān tahú yō nájnūhun cánuú. Te máá Espíritu cahán ndahú yá jíin Yaā Dios jehē yō síquī tāca jéé jítú ndasí ni yō te tu níhín yō jnúhun ndese cacān tahú yō. ²⁷ Te máá Yaā Dios jeē jító ndee anuá yō, chi jíin yā tāca jéé cuní maá Espíritu cahán yā jehē yō. Chi ñayuu cáyihí ndaha Yaā Dios, cáhán ndahú Espíritu jehē i nájnūhun cúní Yaā Dios.

Vāha-ni cúndeyí yó síquī ndihí jeneé

²⁸ Te jíin yō jeē tācá-ni jeē quíji nuū ñayuu maní jíin Yaā Dios, jeē váha chí jéé uhú, chi quéndōo vāha ga i nuū yā, sáha ya jíin tāca jéé yúcuan. Chi cácuu i ñayuu jeē ní cana ya i ni quivícoo i ndaha ya síquī jeē súcuan ni tee ni yā

nde jenahán. ²⁹ Chi nde ná tu coo i te je jíní yā i, te je ni jeni ya i jeē ndoo ndaā nduu ánuá i ndacu i máá Séhe ya, návāha na cúu Sēhe ya ñani jéhnú nuū cuehē ñayuu cácuu ñani cácdíje. ³⁰ Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē cujéhnú i.

³¹ ¿Te ndese ga cahān yō siquī jnúhun jéhnú yáha núu súcuan? Chi núu íne Yaā Dios jíin yó, ¿te ndé ñn cuu cahān siquī yō? Tú ni ñn. ³² Chi máá yá tu ní jnáma ya Sēhe ya jeē ma cúu yā, chi sa suhva ni jēhe ya Sēhe ya ni jihī yā jehē ndihī yó. Te núu súcuan ni jēhe ya Sēhe ya, te nagā ni cuu jeē ma cuáha ya tāca gá jeē jíni ñúhún yó. ³³ ¿Te ndé ñn cuu cahān cuēchi siquī ñayuu jeē ní nacāji Yaā Dios? Tú ni ñn. Chi máá yá ni ndahva yā cuēchi i. ³⁴ ¿Te ndé ñn cuu ndenehen cuēchi siquī yō núu súcuan? Tú ni ñn. Chi máá Cristo cúu jeē ni jihī yā jehē yō, te suni ni natecu yā. Te vijna te ndéé yá lado váha Yaā Dios nuū cujéhnú ya, te cáhán ndahú yá jíin Yaā Dios jehē yō. ³⁵ ¿Te ndé ñn cuu quenehen yóhó núu jnúhun cúndáhú ni Cristo yohó? ¿A jnúndóho, chí táca jéé yí sáha, chí jéé cájito xeēn ñayuu yohó, chí jnáma, chí jéé cúmanī sahma, chí jnúhun yúhú, chí jéé cáhni i yóhó naún? Ni ñn tāca jéé yáha. ³⁶ Chi súcuan yósó núu tútu ñi jeē cácahān ñayuu cácdíje jíin Yaā Dios:

Jeē siquī maá ní te ndihī-ni hora cácuu i cahni i sāñá.
Te cásáha i jíin ná nájnūhun cásáha i jíin lanchi, quiiti cúu.

Achí tutu. ³⁷ Te tuú chi vésú cándoho yó táca jéé yáha, te vāha-ni cúndeyí yó siquī ndihī-ni, sáha máá Yaā jeē ní cundáhú ni yohó. ³⁸ Jeē yúcuan cúcáhnú ni rī jeē tú ni ñn cuu quenehen yóhó núu jnúhun cúndáhú ni Yaā Dios yohó. Ni núu cuu yō, ni núu cotecu yō, ni tācá ndajéhé andiví, ni tāca jéé neé jéé cácujuhú jnū poder, ni jeē iyó vijna, ni jeē cóo, ³⁹ ni jeē iyó núu sūcún, ni jeē iyó núu cūnú, ni tāca gá jeē ní jecōo, ma cúu quiiti quenehen

yóhó núu Yaā Dios, jeē jíin Jítoho yō Cristo Jesús ni cundáhú ni yā yohó.

Siquī ndese ni nacāji ya yucūn Israel

9

¹ Te cáhán ndaā rī chi cúu ri tēe cándíje Cristo, te tu stáhú rí, te jíin rī ini anuá rī jeē cahán ndaā rī sáha Espíritu Santo. ² Yōhyo cúcuíhyá ni rī, te níni jnáhuhū ni anuá rī ³ jeē siquí tāca jnáhan ri ñayuu nación hebreo, chi ñn-ni yucūn rī jijnáhan ri. Chi jeē siquí máá i te cúu ni rī jeē núu na cúu te cujiyo ri nuū Cristo te jnahnū ndetū rī, návāha jíin yúcuan te cuu cácu ánuá maá i núú. ⁴ Chi cácuu i yucūn ñayuu Israel, te nde jenahán ni sáha Yaā Dios jeē cúu i sēhe ya, te mēhñu vícō jeē ndíndéé ní condee yā jíin i sáa. Te jíin máá i ni sáha ya tācá contrato, te ni jēhe ya ley yā nuū Moisés jeē cúu máá i, te ni steén yā ndese chiñúhún i ya ini templo, te nuū maá i ni jejnūhun ya cuehē jnūhun. ⁵ Te máá i cácuu yucūn tāca jíi yō jeē ní cacujéhnú, te suni yucūn maá i ni cacu Cristo jeē ní nduu ya tēe. Te máá yá cúu Yaā Dios jeē jnū ndihī-ni, te ní cáni cahān ñayuu jeē cujéhnú ya. Amén.

⁶ Te nasūu jéé tu ní quée ndaā tāca jnúhun jeē ni jéjnūhun Yaā Dios nuū ñayuu Israel. Chi ni quee ndaā nahín núu vésú jecu-ni i, chi tú ndihī-ni yucūn Israel cúu jeē cácdíje. ⁷ Chi nasūú ndihī yucūn Abraham cácuu ndije sēhe de jeē ni jéjnūhun ya. Chi ni cahān Yaā Dios jíin de: Nuū maá-ni sēhe ró Isaac cúu nuū coo yucūn rō jeē ni jéjnūhun ri nuū rō. ⁸ Te jnūhun yáha cúní cahān jeē ni ñn ñayuu tu cúu i sēhe Yaā Dios siquī jeē ní cacu i ñn yucūn jeē jéni ni i jeē váha ga cúu. Chi sa suhva máni yucūn jeē ni jéjnūhun ya cúu ndije yucūn jeē chíhi ya cuenta. ⁹ Chi yáha cúu jnūhun jeē ni jéjnūhun ya nuū Abraham: Máá tiempo jeē ní jeni ri te quiji ri, te cacu ñn sēhe yí ñasihí ró Sara, achí yá.

¹⁰ Te nasūu máá yáha-ni, chi suni Rebeca ni cacu uū sēhe yí ña, te ñn-ni tátá ndíndúú i, jeē ní cuu jíi yō Isaac.

11-13 Te nde ná tu cacu ndindúú i, te ná tu sáha i jeē váha jeē uhú, te je ni cahān yā jíin Rebeca: Sūchi ní cacu xīhna gā cuajníñu i nuū sūchi sándīhí, áchí yá. Chí suni sūcuan cáhān tutu i: Ni jito manī rī Jacob, te Esaú chí tuú, áchí Yaā Dios. Te sūcuan jíin yō jeē maá Yaā Dios cuu nacāji ya ñayuu núu ndese téé ni maá yá, te nasūu síquī jniñu jeē sáha i, chí sa suhva síquī ndese cúní maá yá nacāji ya i.

14 ¿Ndesé cahān yō núu sūcuan? ¿A jeē tu íyó ndāā Yaā Dios jeē sáha ya sūcuan, chí naún? Tú cuiti. 15 Chí nde jenahán ní cahān yā jíin Moisés: Ndé-ni cúu jeē cuní rī cundáhú ni rī, te cundáhú ni rī. Te ndé-ni cúu jeē cuní rī sáha ri jeē váha jíin, te sáha ri jíin, áchí yá. 16 Núu sūcuan te nasūu síquī jeē cuní maá ñayuu, ni nasūu jeē nducú ndéyí maá i cúu, chí síquī ndese cúní maá yá cundáhú ni yā i. 17 Chí suni sūcuan yósó núu tútu i jeē ni cáhān yā jíin rey ñuu Egipto: Ni jeni ri rohó jeē cúu ró rey, návāha jíin rohó te stéén rī poder rī, te návāha cuitē núu síhví rí ní ñáyíví, áchí yá. 18 Núu sūcuan te núu ndé ñn cúní yā cundáhú ni yā, te cundáhú ni yā. Te núu ndé ñn cúní yā jeē cunīhni ni, te sáha ya jeē cunīhni ni.

19 Te sanaa te cahān ñn ró jíin rí: Núu sūcuan cúu ¿te najehē cahān gā yā jeē cuēchi sáha yó? Chí ma cúu casi yō nuū yā jeē ndese cúní maá yá sáha ya. Achí rō. 20 Te sa suhva cáhān rī jíin ró: Róhó, ¿ndé ñn cúu ró jeē jéni ni rō stió cuñí rō nuū Yaā Dios? ¿A cuu cahān quīsí ñuhun jíin téé ni sáha: Najehē ni sáha ró rúhū sūcuan? achi. 21 Chí tēe sáha quīsí, cuu sáha de ndese cúní maá de, chí ñn-ni ñuhun cuu sáha de ñn quīsí fino te inga quīsí corriente.

22 ¿Te á tu jétáhú ró jeē suni sūcuan sáha Yaā Dios jíin ñayuu? Chí cúní yā steén yā ndese sáha ya juicio síquī ñayuu, te sūcuan te cuni i poder yā. Te vésú sūcuan te ni íyo paciencia ni yā jeē tu ní ndóna yachí yā síquī ñayuu jeē jnahnú ndetū. 23 Te sáha ya sūcuan návāha stéén yā ndese yōhyo luu cújéhnu ya síquī jniñu sáha ya jíin

yóhó ñayuu cundáhú ni yā. Chí nde jenahán je ni sátūhva ya yohó jéé luu cújéhnu yó jíin yá. 24 Chí ni cana ya yohó jéé candíje yó, te sava yó cúu ñayuu hebreo te sava yó cúu ñayuu tāca gá nación. 25 Chí suni sūcuan ni cahān yā, yósó núu tútu Oseas:

Ñayuu jeē tu ní cúu ñayuu maá rí, vijna te cahān rī jeē cácuu i ñayuu maá rí.

Te ñayuu jeē tu ní íyo manī rī jíin, vijna te cahān rī jeē cácuu i ñayuu jeē maní rī jíin.

26 Te máá lugar nuū ni cáhān rī jeē násūu ñayuu rī cácuu i,

suu yūcuan cáhān ñayuu jeē cácuu i sēhe Yaā Dios, Yaā técu ní cáni.

Achí yá. 27 Te Isaías sa suhva ni cahān de jnūhun ñayuu Israel: Vésú ni cayā yucūn Israel nájnūhun ñtí yumar, te jecu-ni i jnama ya. 28 Chí Jitoho yō Yaā Dios, yachí sínu ya jniñu jeē sándaā yā cuēchi ñayuu ñayíví. Achí tutu. 29 Chí nájnūhun ni cahān tucu Isaías:

Máá Yáá cúu Jitoho nuū tācá ndajéhé andiví, núu tu ní jnáma ya jecu yucūn yō nuú,

te je ni ndoho yó nájnūhun ñayuu ñuu Sodoma jíin ñuu Gomorra, jeē ní naa ndíhi.

Achí tutu.

Jeē tu cájetáhú ñayuu hebreo jnūhun jnama ya i

30 ¿Ndesé cahān yō núu sūcuan? Suu jeē ñayuu tāca gá nación, vésú tu ní cánducú i quendōo ndaā i nuū Yaā Dios, te ni ndahva yā cuēchi i. Chí síquī jeē ní candíje i jeē ni jíhí Cristo jehē i cúu jeē ní ndahva yā cuēchi i. 31 Te sa suhva ñayuu Israel, vésú cánducú i quendōo ndaā i nuū Yaā Dios sáha ley yā, te tu cúndeyí i quendōo ndaā i. 32 ¿Te najehē? Síquī jeē tu cánducú i jeē ndahva yā cuēchi i jeē candíje i jeē ni jíhí Cristo jehē i, chí sa jéni ni i jeē squícu máá i ley te quendōo ndaā i. Te jeē stívi i sūcuan cúu nájnūhun cácotúú i síquī maá yúu jeē cácachihí jehē, te suu cúu Cristo.

33 Chí sūcuan cáhān nuū tútu i:

Nde ñuu rī Sion sáha ri jeē cóne maá
Yaā jeē cúu nájñuhun yuū jeē
cácahihi i jehē i.
Te cúu ya nájñuhun toto jeē cotúú i
sáha.
Te sa suhva ñayuu cácaandíje Yaā ún, chi
jnama nahín yá i.
Achí Yaā Dios.

10

¹ Hermano jijnáhan ró, cúu ndasí
ni rī te jícán tahú rī nuū Yaā Dios
jehē ñayuu nación rī Israel, jeē na
jnama ya i jijnáhan i. ² Chi cáhán
rī jeē vāha cásáha i jeē ndihví ni
i cáchiñúhún i Yaā Dios. Te vēsú
súcuan te cáchiñúhún cáhá i. ³ Chi
tu cájecūhun ni i ndese ndáhva Yaā
Dios cuēchi ñayuu, te ndúcú i quendō
ndaā i máá-ni jeē squícu i ley. Te tu
cájetáhú i máá modo jeē ndáhva Yaā
Dios cuēchi i. ⁴ Chi siquī jeē ni sáha
Cristo te cuu quenda ñayuu chíji ley
Moisés. Te ndáhva Yaā Dios cuēchi
tāca ñayuu jeē candíje i jeē ni sáha
Cristo jehē i.

⁵ Chi súcuan ni tee Moisés jñuhun
ñayuu jeē cánducú quendō ndaā jín
ley: Núu ññ ñayuu cuu squícu i táca
jniñu ndácu ley, te cotecu i núú, achí.
⁶ Te jñuhun jeē ndáhva Yaā Dios cuēchi
ñayuu siquī jeē candíje i jeē sáha ya
jehē i, chi sa suhva cáhán: Ma cáni ni
rō jeē jini ñúhún caa ró andiví nasnúu
ró Cristo jeē ndahva yā cuēchi ró. ⁷ Ni
ma cáni ni rō jeē jini ñúhún cuun
ró ndé nuū cūnú ndonehen ró Cristo
mēhñu ndíyí, nájñuhun jeē tu ní nátecu
yā. ⁸ ¿Te ndese cáhán jñuhun un núu
súcuan? Yajni íyó jñuhun ya jín ró,
chi ñúhún ini yuhu ró jín ini anuá
rō, achí tutu. Te suu cúu jñuhun jeē
na cándíje yó jéé jnama ya yohó. Te
jñuhun yáha cúu jeē cánacani rī. ⁹ Chi
núu cahán rō jeē Jítoho rō cúu Jesús,
te núu candíje ró jín ini jín ánuá rō
jeē ní natecu yā mēhñu ndíyí ni sáha
Yaā Dios, yūcuán na te jnama ya rohó.
¹⁰ Chi jín ini jín ánuá yō cándíje yó jéé
ni jíhí yā jehē yō, te súcuan te ndáhva
Yaā Dios cuēchi yó. Te jeē cahán yō
jeē Jítoho yō cúu Jesucristo, te súcuan
te jnama ya yohó.

¹¹ Chi cáhán tutu i: Tāca ñáyuu jeē
candíje i ya, chi jnama nahín yá i, achí.
¹² Chi ñnuú-ni cúu ñayuu hebreo jín
tāca gá ñayuu, chi máá yá cúu Jítoho
nuū ndihí yó, te cuehē jeē váha sáha
ya jín ñáyuu cácahán ndahú jín yá.
¹³ Chi súcuan cáhán jñuhun ya: Ndihi
ñayuu cácahán ndahú jín máá Jítoho
yō, chi jnama ya i, achí. ¹⁴ ¿Te ndese
cahán ndahú i jín yá te núu tu ní
cándíje i jeē jnama ya i? ¿Te ndese
candíje i te núu tu ní jini sōho i jñuhun
ya? ¿Te ndese cuni sōho i te núu tú
na ñayuu nacani jñuhun nuū i? ¹⁵ ¿Te
ndese nacani ñayuu jñuhun ya te núu
jeē tu tájí yá i quihín i? Chi nájñuhun
cáhán tutu i: Yōhyo luu jniñu cásáha
ñayuu cájica jín jñuhun ndeyí sñ ni jeē
cánacani i jñuhun vāha ya, achí.

¹⁶ Te nasúú ndihí i jétáhú nuū
jñuhun jnama ya i. Chi ni cahán Isaías
nde jenahán: Tátā Yaā Dios, ¿ndé
ñáyuu ni candíje jñuhun jeē cánacani
ná ví? achí de. ¹⁷ Núu súcuan te núu
cuni nahín ñayuu te cuu candíje i. Te
jñuhun cuni nahín i cúu jñuhun Cristo.

¹⁸ Te cájnūhun rí: ¿A tu ní cájini sōho
i jñuhun un núu súcuan? Tuú chi ni
cajini sōho i, chi cáhán tutu i:
Ní ñáyiví ní cajini sōho ñayuu jñuhun
jeē ní canacani de.

Te nde nuū jicá gá tāca lado ni jinū
jñuhun ún.

Achí tutu. ¹⁹ Te suni cájnūhun rí: ¿A
tu ní cájecūhun ni ñayuu Israel jñuhun
ún? Tuú chi ni cájecūhun ni i, te tu
ní cájetáhú i. Chi xīhna gā Moisés ni
cachí de jeē ni cáhán Yaā Dios:

Cucuñí ró jijnáhan ró, chi cuāha ri
jñuhun ri nuū inga ñayuu jeē
násúú ññ nación cúu.

Te quití ni rō coto ró jéé cuāha ri
jñuhun ri nuū ññ nación jeē tu
jécūhun ni.

²⁰ Te suni Isaías ni chundeyí ni de ni
cachí cájí de jeē ni cáhán Yaā Dios:
Ñayuu jeē tu ní cánanducú rúhū, ni
cajini i ruhū.

Te nuū ñáyuu jeē tu ní cácajnūhún, ni
steén rī nuū i ndese Yaā cúu rī.

²¹ Te siquī ñáyuu Israel sa ni cahán de
jeē ni cáhán yā: Ndiquíví ni cana ri i

jeē quívicoo i nuū rī, te tu ní cácu ni i, chi ñayuu nīhni ni, ñayuu jeē ni cácuu i. Achí yá, achí Isaías.

Jeē iyó jecu na ñayuu Israel jeē jnáma ya

11

¹ Núu súcuan te cájnūhun rí: ¿A ní stóo Yaā Dios ñayuu maá yá Israel, chí naún? Tú cuítí. Chí ruhū suni tēe Israel cúu rí, te yucūn Abraham cúu rí, te Benjamín cúu jíí rí jenahán. ² Tu ní stóo Yaā Dios ñayuu maá yá, chí je ni nacāji ya i nde jenahán. ¿A tu cájini rō ndese cáhán tutu iī jnūhun Elías, tēe ni nacani jnūhun ya jenahán? Chí náa jícán tahu de, te ni cahān de síquī ñáyuu Israel: ³ Tātā Yaā Dios, ni cajehni i tāca tēe cánacani jnūhun ní, te ni cajenu i tāca altar ní. Te máñuhún na sãña ní quendōo, te vijna suni cácu ni i cahni i sãña, áchí de. ⁴ Te Yaā Dios ni nastió cuíñí yā: Iyó nahín úxā mil ñayuu cácuandíje ruhū jeē tu ní cájecuñí yítí i nuū ídolo naní Baal, achí yá. ⁵ Te suni súcuan vijna, chí iyó jecu na ñayuu jeē ní nacāji ya síquī jeē váha ni yā jíín i. ⁶ Te núu ni nacāji ya i síquī jeē váha ni yā jíín i, te nasūu síquī jeē ní sáha i jniñu váha cúu. Chí núu síquī jeē ní sáha i jniñu váha cúu, yūcuán na te nasūu síquī jeē váha ni yā cúu.

⁷ ¿Te ndese cúu núu súcuan? Cúu jeē ñáyuu Israel tu ní cúndeyí i quendōo ndaā i nájnūhun ni canducú i. Te sava i jeē ní nacāji ya, chí maá i ni ndahva yā cuēchi i. Te sava ga i ni ndunīhni ni i, ⁸ nájnūhun cáhán tutu iī: Ni sáha Yaā Dios jeē tu jécūhun cuítí ni i síquī yā, ni tu jíín i jíín tñūú i, ni tu jíín nahín i jnūhun ya, te súcuan cúu nde vijna. Achí tutu. ⁹ Te suni ni cahān David: Vico jeē casáha i, na cóo nájnūhun ñn trampa chí ñn xeyū,

návāha nihīn i castigo xeēn síquī jeē castívi i casáha i cuēchi.

¹⁰ Te ánuá i na ndúnee, nájnūhun jeē tuá cúu coto i, te na jécostíhí jnūndóho síquī i ní cáni. Achí tutu.

Síquī jeē jnáma ya ñayuu tāca gá nación

¹¹ Núu súcuan te cájnūhun rí: ¿A tuá cúu cuítí ndívi ñayuu Israel nuū Yaā Dios jeē súcuan ní castívi i? Tú cuítí. Chí sa suhva jeē ní cacunīhni ni i, te sa ñayuu tāca gá nación ní canihīn tahu máá i jnūhun jeē jnáma ya i. Te yūcuan sáha tucu jeē ñáyuu Israel condíhvī ni i jeē suni candíje máá i. ¹² Chí jeē ní castívi i, te sa ñayuu ní cáhnu ñayívi ní canihīn maá i jnūhun ya. Te jeē ní cajica yátá i, suu ní sáha jeē ní canihīn ñayuu tāca nación jnūhun ya. Núu súcuan te quíví jeē ndívicoo tucu ndíhi ñayuu Israel ndaha ya, te ñayuu ñayívi víhyá gá quendōo ndetū i sáha ún.

¹³ Te vijna te cáhán rí jíín róhó ñáyuu tāca nación jeē tu ní jíín jnūhun ya. Chí ní tají Yaā Dios ruhū jeē scáca rí jnūhun nuū rohó ñáyuu tāca nación. Te ndúcú rí jeē na cuájñuhún ró jíín náhan ró jniñu sáha rí jeē nácani rí jnūhun ya. ¹⁴ Chí cúni rí jeē jíín yúcuán te nacani ni sava jnáhan rí ñayuu Israel jeē suni candíje máá i, te jnama ya i. ¹⁵ Chí jeē ní stóo ya ñayuu Israel, jeē yúcuán cúu jeē sa ñayuu ñayívi ní sáha ya jeē ndívicoo i nuū jnūhun maní yā jíín i. Núu súcuan te quíví naquihīn tucu ya ñayuu Israel, quíví ún suni váha ndasí sáha ya jíín ñáyuu ní cáhnu ñayívi. Chí coo nájnūhun jeē natecu i jeē cúu i nájnūhun ndívi. ¹⁶ Te ñayuu Israel cásocō i nuū Yaā Dios pan jeē quénda xihna gá nuū ñujen, te súcuan stéén i jeē ndíhi un cúu cuenta yā. Te ñn yujnu, núu yíhi jeē cuenta yā cúu, te suu cúu nde yoho jíín ndé ndíhi ndaha. Te suni súcuan ñayuu Israel, yíhi cuenta i nuū yā, síquī jeē jíí i xihna ñuhún, ní quívicoo de ndaha ya.

¹⁷ Chí ñayuu Israel cácuu i nájnūhun ndayújnu olivo váha, te sava ndaha un ní quendē. Te róhó ñáyuu tāca nación jeē tu jíín jnūhun ya, cácuu ró nájnūhun ndayújnu olivo yucú, te ni nachuhun ya rohó núu ní quendē ñayuu cácuu ndayújnu váha ún. Te nájnūhun ñnuú-ni cástáa ró ndúxi jíín cajin jeē véji nde yoho yújnu ún.

¹⁸ Núu súcuan te ma sáha téyí ró maá ró nuū ñáyuu Israel jeē cácuu

nájnūhun ndayújnu jeē ni quéndē. Ma cutéyí ró, chi nucūhun ni rō jeē násūú jéē yoho stáa cajin nuū maá ró, chi sa maá ró stáa cajin jeē véji nde yoho.

¹⁹ Te sanaa te cahān rō: Tú chi sava ndaha ni quendē návāha nachuhun ya ruhū nuū ni quéndē ún, achi rō. ²⁰ Ndaā, te ni quendē i siquī jeē tu ní cá candíje i Cristo. Te rōhó chi máni siquī jeē cá candíje ró, jeē yúcuān cúu jeē ni quívicoo ró lugar i. Te ma sándúxí ró maá ró núu súcuān, chi sa suhva conso iyo ró núu Yaā Dios. ²¹ Chi tu ní íne cáhnu ni yā nuū maá ndaha jeē chíjniñu, te suni súcuān ma cóne cáhnu ni yā nuū rō jijnáhan ró te núu stívi ró. ²² Núu súcuān te sáha vāha ro cuenta ndese vāha ni Yaā Dios jíin ndese xeēn ni yā. Chi ni nduxeēn ni yā jíin ñayuu hebreo jeē ní castívi ún, te sa cúndáhú ni yā rohó. Te cánuú cuiñi nihin ro jíin jnúhun jeē váha ni yā jíin ró. Chi núu tuú, te suni quende yā rohó. ²³ Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i. ²⁴ Núu súcuān te rōhó ñayuu tācá nación jeē tu ní jíni jnúhun ya, ni quendē rō xinī yújnu olivo yucú, te ni nachuhun ya rohó xinī yujnu olivo váha, vēsú nasūú ndaha máá yujnu un cácuu ró. Te nagā ni cuu ñayuu hebreo jeē ma náchuhun ya i nuū ni quéndē i, chi cácuu i máá ndayújnu váha ún.

Īn quívī te jnama ya ndihī ñayuu nación Israel

²⁵ Hermano, cúní rī jeē na jécūhun ni rō jijnáhan ró ndese íyó jnúhun yáha jéē ní yisāhí, návāha ma cutéyí ró cani ni rō jeē ndichí xinī maá ró: Chi sava ñayuu Israel ni ndunīhni ni i, te súcuān coo máá-ni nde quívī jínu candíje ñayuu tācá nación jeē tu jíni jnúhun ya. ²⁶ Te sáá te jnama ya ndihī ñayuu nación Israel, chi cáhán tutu īi: Ichi ñuu rī Sión quiji Yaā jnama ñayuu, te sáha ya jeē tuá coo cuēchi nuū tāca yúcūn Jacob.

²⁷ Te yāha cúu contrato jeē sándaā rī jíin i, quívī jeē quende ri cuēchi i jijnáhan i, áchí Yaā Dios.

Achí tutu.

²⁸ Chi ñayuu hebreo un ní nduu i nájnūhun enemigo Yaā Dios siquī jeē tu ní cá candíje i jnúhun jnama ya i. Te jeē yúcuān te cuu cuitē núu jnúhun un núu tāca rōhó. Te vēsú súcuān te siquī jeē ní nacāji ya tāca jíi i jenahán, te cúndáhú gá ni yā i jeē ma stóo ya i ní cáni. ²⁹ Chi tu nácani yátá ni yā jeē cána ya ñayuu jíin jéē jéhe ya tahū i. ³⁰ Te rōhó jíináhan ró, suni ni cahīyo nihni ni rō nuū Yaā Dios nde saá. Te vijna jeē ní cacunīhni ni maá ñayuu hebreo, te cúndáhú ni yā rohó. ³¹ Te suni súcuān máá i, chi vēsú cacunīhni ni i vijna, te cúndáhú tucu ni yā i, nájnūhun cúndáhú ni yā maá ró jijnáhan ró. ³² Chi Yaā Dios ni sáha ya jeē ní quendōo ndivii ñayuu chíji jnúhun cúnīhni ni i, návāha suni cuu cúndáhú ni yā ndivii i.

³³ Núu súcuān te náhán náā ni yō jeē yóhoyo cuehē jnúhun ndichí íyó jíin Yaā Dios, te ndihī cuiti jíni yā. Te ni ma cúu cuiti castūhun yó ndese téē ni yā sáha ya tācá-ni, te ma cánda cuiti yō jecūhun ni yō ndese cúu tāca jéē sáha máá yá. ³⁴ Chi cáhán tutu īi: ¿Ndé ĩn ni jecūhun ni ndese jéni ni maá Jítóho yō? ¿Chí ndé ĩn ni steén nuū yā? ³⁵ ¿Ndé ĩn ni jéhe xīhna gā nuū maá yá, návāha nachunaa yā nuū i? ³⁶ Chi nde nuū maá yá vēji tāca jéē íyó, te máá yá ni sáha ndihī, te jeē cúu máá yá cúu. Te na cáhán yō jeē yóhoyo luu cújéhnu Yaā Dios ní cáni. Amén.

Jeē na cóo ndoo ánuá yō cuajniñu yó núu Yaā Dios

12

¹ Núu súcuān te cáhán ndahú rí jíin ró jijnáhan ró, hermano, jeē siquī jeē cúndáhú ni Yaā Dios yohó. Na sócō rō maá ró núu yā, coo ndoo coo īi rō cuajniñu ró núu yā, nájnūhun cúsiñi ni yā. Chi yāha cúu jeē chíñuhún ró yā nde jíin ini jíin ánuá rō. ² Te ma cáca ró jíin tāca modo casáha ñayuu ñayívi yáha, chi sa na sáma ró modo cani ni rō, te ndujeé jéē níjnūní rō. Te súcuān te cuu nacāji ró ndé-ni cúu jeē váha jeē

nújnahan ni Yaā Dios, jeē cúsī ni yā, jín jēē íje ni rō jín jnúhun ya.

³ Te síquī jeē váha ni yā ni jēhe ya jniñu nácani ri jnúhun ya, jeē yúcuan cáhán rī jín ndihí ró jēē ma cáni ni rō jeē váha ga ñayuu cúu ró núu cūhva jeē iyó ró. Chi ná ñn ná ñn ró na cáni ndaā ni rō síquī maá ró, te ma scáa ga rō caní ni rō jeē váha ga ñayuu cúu ró vésú nuū cūhva jeē ni jēhe Yaā Dios fuerza ini rō cándíje ró. ⁴ Chi cácuu yó nájñuhun ñn yiquí cúñu jeē iyó cuéhē parte, te sín sín jéjñiñu ñn ñn. ⁵ Chi vésú iyó cuéhē yō, te nájñuhun ñn-ni yiquí cúñu cúu yó jēē yíhi yó ndaha Cristo, chi ñn-ni ni nduu yó jínáhan yó.

⁶ Te sín sín tahū ni jēhe Yaā Dios nuū yō jeē cuajniñu yó núu yā, núu ndese ni nujnahan ni yā ni jēhe ya nuū ñn ñn yó. Núu súcuan te na cuajniñu váha yó jín táhū ún. Núu ni nihín yō tahū jeē nácani yó jnúhun ya, te cánuú sáha yó ndé maá cūhva ni jēhe ya cándíje yó. ⁷ Te núu ni nihín yō tahū jeē chindéé ñáhán yó jnáhan yó, te na sáha yúcún yó. Te núu ni nihín yō tahū jeē steén yō, te na cóndihvī ni yō steén yō. ⁸ Te ñayuu jeē stihvī ni inga ñayuu, suni na sáha yúcún i. Te ñayuu jēhe nuū jnáhan, na cuáha i súcuan-ni. Te ñayuu ndíso jniñu, na ndácu váha i jniñu. Te ñayuu jító ndáhú ñayuu ndahú, na cúsī ni i sáha i.

Ndese cánuú squícu ñayuu cácandíje

⁹ Te na cúndáhú ndije ni rō jnáhan ró, nasūu maá jēē cahán-ni ró. Te coto uhū rō jniñu néé, te condiquīn rō jniñu váha. ¹⁰ Te cánuú coo manī rō jín jnáhan ró nájñuhun jēē maní rō jín ñani rō. Te nducú ró jeē quéndōo yíñuhún gá jnáhan ró vésú maá ró.

¹¹ Te ma cucúxí ró jín jniñu casáha ró. Chi jín ini jín ánuá rō condihvī ni rō cuajniñu ró núu maá Jítóho yō.

¹² Te na cúsī ni rō jeē cáñuhun ni rō táca jēē váha jeē cóo. Te na cuándeýí ni rō núu ndóho ró jnúndóho. Te níní na cácan tahú rō.

¹³ Te coto ndáhú ró ñayuu cácandíje núu cúmanī nuū i. Te cuáha núu ró vehe nuū ñayuu cájica.

¹⁴ Te cacān tahú rō jehē ñayuu cájito xeēn rohó. Ma cahán ndevāha ro síquī i, chi sa cacān tahú rō jehē i.

¹⁵ Te núu cúsī ni ñayuu, te suni na cúsī ni rō jín i. Te núu cúcuíhyá ni ñayuu, te suni na cúcuíhyá ni rō jín i.

¹⁶ Na cóo ñnuú ni rō jín táca jnáhan ró. Te ma cundúxí ró, chi sa quijnáhan ró jín ñayuu núu ga. Ma cáni ni rō jeē ndichí xíní rō.

¹⁷ Te ma nasáha ndevāha ró jín ni ñn ñayuu, núu ni sáha ndevāha i jín ró. Na cóndihvī ni rō sáha ró jniñu váha, jító jínúu táca ñayuu. ¹⁸ Te na cóndihvī ni rō coyūcu manī rō jín táca ñayuu, vésú ndese cándāa maá i. ¹⁹ Nání maní jijnáhan ró, ma nácuāha ró jēē ndútahū ñayuu casáha ndevāha jín ró, chi sa cuáha ró jnúhun jeē maá Yaā Dios cuáha ya castigo i. Chi cáhán tutu i: Máá rí cuáha castigo i, máá rí nacuāha yāhu i, áchí Jítóho yō. ²⁰ Te suni cáhán tutu: Tēe jító uhū rohó, núu jí de sōco, te cuáha ró jēē cáji de. Te núu jíchí de, te cuáha ró jēē cóho de. Chi núu sáha ró súcuan, te cucanu de te nacani uhū ni de jeē ni jító uhū de rohó. ²¹ Ma cuáha ró jnúhun jeē cúndeýí jniñu néé jín ró, chi sa jniñu váha na sáha ró návāha ndahvā jniñu néé.

13

¹ Táca ñayuu na cuátáhú i nuū tohō cándiso jniñu ñuu. Chi ma cóo tēe cándiso jniñu te núu tu ní sáha maá Yaā Dios. Te tēe cándiso jniñu chi Yaā Dios ni tee jniñu síquī de. ² Te ñayuu jeē tu jétáhú núu tēe cándiso jniñu, núu súcuan te cúnihni ni i nuū jeē ní jeni Yaā Dios. Te ñayuu jeē cúnihni ni, chi cuēchi sáha i, te nihín i castigo. ³ Chi táca tēe ndíso jniñu, nasūu jēē ndíso jniñu de jeē yūhú ñayuu casáha jniñu váha, chi sa jeē yūhú ñayuu casáha jniñu néé. Te núu cúní rō jeē ma cúxeēn tēe cándiso jniñu nuū rō, na sáha ró jniñu váha núu súcuan. Yūcuán na te cuajnúhún de rohó. ⁴ Chi jéjñiñu

Yaā Dios de jíjnáhan de, návāha coyūcu váha ró jíjnáhan ró. Te núu sáha ró jniñu neé, te sa yūhu ró, chi nasūu cáha-ni cúu jeē cándiso jniñu de stóho de ñayuu. Chi jéjníñu Yaā Dios de, návāha cuāha de castigo ñayuu casáha jniñu neé. ⁵ Jeē yúcuan cánuú jéē cuatáhú ró núu tēe cándiso jniñu, te nasūu máni jeē ma níhín rō castigo, chi suni jeē tú na cuēchi coo ánuá rō. ⁶ Te jeē yúcuan cúu jeē suni cájēhe ró xúhun núu tēe cándiso jniñu cuu jniñu ñuu. Chi jéjníñu Yaā Dios de, te máni jniñu yúcuan casáha de.

⁷ Te chunaa rō ndihí jeē cátaū rō nuū tāca ñáyuu. Cuāha ró xúhun ñuu nuū tēe stútú xúhun ñuu, te cuāha ró xúhun renta nuū tēe stútú renta. Te na cóo respeto rō nuū ñáyuu cánuú coo respeto rō. Te na cóo yíñúhún ró nuū ñáyuu cánuú coo yíñúhún ró. ⁸ Ma cótaū rō nuū ní ñn. Te íyó ñn jeē taú rō jeē ma tahndé cuítí, suu jeē ni cáhān Yaā Dios jeē cundáhú ni rō jnáhan ró. Chi ñayuu cundáhú ni jnáhan, je ni squícu i ndihí jeē ndácu ley yā. ⁹ Chi súcuan ndácu ley jniñu: Ma cosíquí ndēē rō jnáhan ró, ma cáhni rō ndíyí, ma sacuíhná ró, ma sajnúhún ró, ma ndíyo ni rō jeē névāha jnáhan ró. Te tāca jnúhun yáha jíín táca gá jniñu ndácu ley, ndihí-ni yíhi chíji jnúhun yáha: Cundáhú ni rō jnáhan ró nájnūhun cundáhú ni rō maá ró, áchí tutu. ¹⁰ Te núu cundáhú ni yō jnáhan yó, te tu sáha yó ni ñn jeē tu íyó váha nuū i. Núu súcuan te jeē cundáhú ni yō jnáhan yó, yúcuan cúu jeē squícu yó ní ley yā.

¹¹ Súcuan sáha ró jíjnáhan ró, chi sáha ró cuenta jeē cuácuyajni quiví ndíji ya. Te ma cóo ga rō nájnūhun ñayuu quixí, jeē cúhuun ni rō. Chi vijna je ni cuyajni ga quiví jnáma ya yohó vēsú quiví ní candíje yó jnúhun ya. ¹² Chi nájnūhun je yajni yāha jecuaá, te cuacundijin quiví jnáma ya yohó. Núu súcuan te na stóo yó jniñu jeē ni sáha yó núu neé, te na cúcutú yó jíín táca jniñu ndaā jeē caca yó jíín luz yā. ¹³ Na cáca yíñúhún yó nájnūhun

cánuú caca yó jíín luz yā. Ma nájini ró, ma sáha ró táca vico neé, ma cáca jnéni ró, ma sáha ró jniñu neé, ma cuajnáhan ró, ma cucuésún ni rō. ¹⁴ Chi sa suhva cuiñi cutú ró jíín fuerza maá Jítoho yō Jesucristo, jeē ma cuáha ga rō jnúhun sáha ró jniñu cúni modo neé maá ró.

Ma cahán neé yó coto yó jnáhan yó

14

¹ Cuatáhú ró ñayuu jeē ná tu ije jíín jnúhun ya, te ma tejnáhan ró jíín i squí tāca jnúhun jeē sñn jéni ni i jíín maá ró. ² Chi íyó ñáyuu jeē jéni ni i jeē cúu caji i ndinuū-ni. Te íyó ñáyuu jeē ná tu ije jíín jnúhun ya, te cájeni ni i jeē tú váha caji i cūñu, chi jeē ní casocō ñayuu nuū ídolo cúu. ³ Te róhó tēe jeē yéji ndinuū-ni, ma cahán rō coto ró tēe jeē tu yéji ndinuū. Te róhó tēe jeē tu yéji ndinuū, ma cahán rō coto ró tēe jeē yéji ndinuū. Chi Yaā Dios ni jetáhú yá tēe ún. ⁴ Te róhó, ¿ndé ñn cúu ró jéē cahán neé ró jíto ró mozo Yaā Dios? Chi núu váha chí neé sáha de, te maá yá cúu jeē sándaā jíín de, nasūu maá ró. Te tuú chi cuiñi váha de, chi mozo maá Jítoho yō cúu de, te cuu sáha ya jeē ma stívi de.

⁵ Te suni íyó ñáyuu jeē jéni ni jeē íí gā ñn quiví vēsú inga quiví. Te inga ñayuu chi jéni ni i jeē inuú-ni cúu tāca quiví. Te tāca i na cúndaā váha ni maá i squí jeē jéni ni i. ⁶ Chi tēe jeē neé íí quiví, chíñúhún de maá Jítoho yō jeē sáha de súcuan. Te tēe jeē tu neé íí quiví, suni chíñúhún de Jítoho yō jeē sáha de súcuan. Te tēe jeē yéji ndinuū-ni, chíñúhún de maá Jítoho yō jeē sáha de súcuan, chi nácuatáhú de nuū Yaā Dios. Te tēe jeē tu yéji ndinuū, suni chíñúhún de Jítoho yō jeē sáha de súcuan, te suni nácuatáhú de nuū yā.

⁷ Chi ni ñn yó tu técu yō jeē váha maá-ni yó, te ni ñn yó tu jíhí yō jeē cuní maá yó. ⁸ Chi núu técu yō, te técu yō jeē cuajníñu yó núu maá Jítoho yō. Te núu cuu yō, te suni cuu yō squí jeē cuní maá Jítoho yō. Núu súcuan te núu jeē cótecu yō chí jéē cuu yō, te yíhi yó

ndaha Jítóho yō. ⁹ Chi ni jihī Cristo te ni natecu yā, návāha cuu ya Jitoho nuū ñáyuu ni jihī jíin ñáyuu técu.

¹⁰ Te róhó, ¿naun jéni néé ni rō jíto rō jnáhan rō núu súcuan? ¿Te naun cújéé ni rō jíto rō de? Chi tāca yó cuiñi yó yuhu mesa Cristo jeē sándaā yā jniñu yó. ¹¹ Chi suhva yósó núu tútu i:

Jendaá ndije chi nuū maá rí cuiñi yáti táca ñáyuu,

te ndihi i cahān jeē maá rí cúu Yaā Dios, áchí maá Jítóho yō.

¹² Núu súcuan te ná ñin ná ñin yó nacuāha yo cuenta nuū Yaā Dios ndese jniñu ni casáha yó.

Ma sáha yó jéé quívi jnáhan yó cuéchi

¹³ Te jeē yúcuan ma cahān neé gá yō coto yó jnáhan yó. Chi sa tee ni rō jeē ma sáha rō ni ñin jniñu jeē sáha jeē stívi jnáhan rō te quívi i cuéchi. ¹⁴ Te jíni rī jeē ni ñin jeē ni sáha Yaā Dios, tu stívi ánuá yō. Chi súcuan ni cucáhnu vāha ni rī siquī jeē candíje ri Jitoho yō Jesús. Te núu ñin ñáyuu jéni ni i jeē iyó jéé stívi ánuá i, yūcuán na te súcuan sáha un jíin maá i. ¹⁵ Te núu jnáhan rō tu cúvāha ni de jeē yéji rō cūñu ni casocō ñáyuu nuū ídolo, chi jéni ni de jeē stívi un ánuá rō, núu súcuan te tu cúndáhú ni rō de jeē sáha rō súcuan. Coto má snāā rō anuá jnáhan rō síquī jeē yéji rō ñin jeē jéni ni de jeē cuéchi cúu. Chi suni jehē maá de ni jihī Cristo. ¹⁶ Ma sáha rō jniñu jeē cahān i siquī, vésú jiní maá rō jeē iyó váha. ¹⁷ Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chi sa suhva siquī jeē na sáha yó jniñu ndaā, te coyūcu mánī yō jíin jnáhan yó, te cusī ni yō sáha Espíritu Santo. ¹⁸ Te ñáyuu jeē súcuan jéjníñu nuū Cristo, chi cúsi ni Yaā Dios jíin i, te suni cájejnūhún ñáyuu i.

¹⁹ Núu súcuan te na cóndihvī ni yō coyūcu mánī yō, návāha jíin yúcuan chindéé ñájnáhan yó ije yó jíin jnúhun ya. ²⁰ Te ma cuáha rō jnúhun jeē ndeyu yéji rō snāā jniñu ni sáha Yaā Dios jíin jnáhan rō. Chi iyó ndoo ndije ndihi jeē yéji yō, te vésú súcuan te tú váha jeē yéji rō ndeyu jeē sáha jíin

jnáhan rō jéé caji de jeē jéni ni de jeē cuéchi cúu. ²¹ Vāha ga ma cáji rō cūñu, ni ma cóho rō vino, te ni ñin ma sáha rō jéé stívi ánuá jnáhan rō, te quívi de cuéchi, te caca yátá de nuū jnúhun cándíje de. ²² Te núu cándíje rō jéé tú na vé sáha jeē yéji rō, te súcuan na cándíje máá-ni rō núu Yaā Dios. Te nacā ndetū tēe jeē tu sáha jíin ánuá de jeē cuéchi cúu núu caji de coho de. ²³ Te tēe yéji ñin jeē jéni ni de sanaa te stívi ánuá de, núu súcuan te sáha de cuéchi, chi tu cándíje de jeē iyó váha jeē yéji de. Chi tāca jéé sáha yó, núu tu cándíje yó jéé iyó váha, te cuéchi cúu.

Jeē na sáha yó jéé cúsi ni jnáhan yó

15

¹ Te yóhó jéé ni íje yó jíin jnúhun ya, cánuú condito yó ñáyuu jeē ná tu ije jíin jnúhun ya, návāha candíje vāha i. Te ma sáha yó jéé maá-ni yó cusī ni. ² Chi ná ñin ná ñin yó na sáha yó jéé cúsi ni jnáhan yó, návāha quendōo vāha i te ije i jíin jnúhun cándíje i. ³ Chi ni Cristo, tu ní sáha ya jeē cúsi ni maá yá, chi sa suhva jeē cúsi ni Tatá yā. Chi suhva cáhán tutu i: Tāca jnúhun ndevāha jeē cácahān ndevāha ñáyuu siquī ní, ni ndívi siquī maá ná, áchí Cristo jíin Tatá yā. ⁴ Chi tāca jnúhun jeē ni jécósō nuū tútu iī nde jenahán, chi ni jécósō návāha stéén nuū yō, te nihīn yō jnúhun jeē sáha jeē cuandeyí ni yō te ndusi ni yō. Te súcuan te cocuhun ni yō tāca jéé váha jeē cóo. ⁵ Te maá Yaā Dios jeē jéhe jnúhun cuandeyí ni jíin jnúhun ndúsi ni, na sáha ya jeē cóo ñinuú ni rō, nájnúhun cúní Cristo Jesús. ⁶ Te súcuan te ñin-ni coo rō te ñinuú-ni cuu cahān rō jeē yóhó vāha Yaā cúu Yaā Dios, Tatá Jitoho yō Jesucristo.

Jeē ni jítē jnúhun vāha ya nuū ñáyuu tācá nación

⁷ Núu súcuan te cuatáhú rō tāca jnáhan rō, nájnúhun ni jetáhú Cristo yohó, návāha cuni ñáyuu jeē luu cújéhnu Yaā Dios. ⁸ Chi cáhán rī jeē ní quiiji Cristo Jesús, ni sáha ya tācá jniñu jeē quendōo vāha ñáyuu hebreo, návāha cundaā tāca jnúhun jeē ni

jéjnūhun Yaā Dios nuū tāca jíi i. Te súcuan ni steén Cristo jeē squícu Yaā Dios tāca jéē ni jéjnūhun ya. ⁹ Te suni ni quiji ya návāha ñayuu tācá nación jeē tu jíni jnūhun ya, cahān i jeē yóhoyo vāha ni Yaā Dios jeē cundáhú ni yā i. Chi suhva cáhán tutu i:

Núu súcuan te cahān na jéē yóhoyo vāha ni ní, cuni ñayuu tācá nación, te cata ná yaa jeē chiñúhún ná nihín.

¹⁰ Te cáhán tucu tutu i:

Róhó ñayuu tācá nación, inuú na cúsiñ ní rō jíni ñayuu maá yá.

¹¹ Te cáhán tucu:

Róhó ñayuu tācá nación, na cáhán rō jeē yóhoyo vāha ni Jítoho yō Yaā Dios,

te róhó ñayuu tācá-ni ñuu, suni na cáhán rō jeē yóhoyo cújéhnú ya.

¹² Te suni ni tee Isaías jnūhun yáha:

Nuū yúcūn Isaí quiji ñn jeē cújéhnú, te ndacu ya jniñu nuū ñayuu tācá nación.

Te ñayuu ún chi cocuhun ni i tāca jéē sáha ya.

Achí tutu.

¹³ Te máá Yaā Dios jeē sáha jeē cáñuhun ni yō tāca jéē váha jeē coo, na sáha ya jeē cóo siñ ndasí ni rō jíni jéē cóo ndeyí ni rō siquí jeē cá candíje ñhin ró yá. Te súcuan te cocuhun teyí gá ni rō tāca jéē váha jeē coo, sáha poder maá Espíritu Santo.

¹⁴ Ñánī mánī, cúcáhnú ni rī jeē váha ndasí cándihvī ni rō jíni jniñu váha, te váha ndasí cájecūhun ni rō, te cúu stíhvī jnáhan ni rō. ¹⁵ Te ni jeni ni rī jeē tee ri carta yáha cáhán cají rí jíni ró jnánhan ró, návāha víhyá gā na cócuhun ni rō tāca jnūhun yáha. Chi súcuan sáha ri siquí jeē váha ni Yaā Dios te ni jēhe ya jniñu nuū rī ¹⁶ jeē jejniñu ri nuū Jesucristo, jeē nácani ri jnūhun nuū ñayuu tācá nación jeē tu jíni jnūhun ya. Te nácani ri jnūhun vāha Yaā Dios nuū i jeē jnáma ya i. Súcuan sáha ri návāha ñayuu tācá nación, cuu squívī ri i ndaha ya jeē cúu i nájnūhun ñn jeē socó rī nuū yā jeē cúsiñ ni yā jíni. Chi ni sáha Espíritu Santo jeē iyó ndoo iyó íi i nuū yā.

¹⁷ Núu súcuan te siquí jeē candíje ri Cristo Jesús, te cúsiñ ni rī jeē jejniñu vāha ri nuū Yaā Dios. ¹⁸ Chi ma cúu cahān rī siquí jniñu cásáha inga tēe, chi máá-ni siquí ndese ni jejniñu Cristo ruhū jeē sáha ri jeē ñayuu tācá nación tu ní jíni jnūhun Yaā Dios, vijna jétáhú i nuū yā. Chi súcuan ni cuu jíni jnūhun ni cahān rī jíni jniñu ni sáha ri. ¹⁹ Chi ni sáha ri jniñu jéhnú ndíso poder jeē steén jeē cújéhnú ya, te ni íyo poder Espíritu Santo jíni rí. Te súcuan ni nacani ndihī ri jnūhun ndese jnáma Cristo ñayuu. Te ni nacani ri nde ñuu Jerusalén, jíni ndihī tācá ñuu, jíni nde ní región Ilírico. ²⁰ Súcuan cúu jeē ní condihvī ni rī ni nacani ri jnūhun jeē jnáma ya ñayuu. Te ni jehēn rī nuū ñayuu jeē ná tu cuni jnūhun Cristo, chi tu ní cúni rī nacani ri nuū ñayuu jeē jé ni jini i ni canacani inga tēe. ²¹ Chi sa suhva ni sáha ri nájnūhun cáhán tutu i:

Tāca ñayuu jeē tu ní quíji jnūhun ya nuū i, vijna chí cuni i jnūhun ya,

te tāca ñayuu jeē tu ní jíni cuíti jnūhun ya, vijna chí jecūhun ni i.

Achí tutu.

Jeē ñúhun ni Pablo jeē quihín de Roma

²² Te jeē yúcuan cúu jeē cuehē jíni ni cújnéñu ri, te tu ní cúu jecondēhe rí rohó jíjnánhan ró. ²³ Te vijna chí ni ndihī jniñu ri ní cáhnú tācá región ndañúú yáha. Te je ni cuu cuehē cuiyā jeē cúni rī jeē rī nuū rō. ²⁴ Núu súcuan te ñúhun ni rī jecondēhe rí rohó jíjnánhan ró núu na yáha ri quihín rī España. Te ñúhun ni rī jeē núu je ni cúsiñ ni rī jeē ní jito jnánhan yó, yūcuán na te chindéé ñáhán ró ruhū jeē quihín gā rī. ²⁵ Te xíhna gā na quihín rī ñuu Jerusalén quindēca ri xūhún cuu hermano cáyūcu yúcuan. ²⁶ Chi ñayuu Macedonia jíni Acaya ni cajeni ni i jeē cáquin i xūhun quihín nuū hermano cándoho ndáhú ñuu Jerusalén. ²⁷ Chi súcuan ni cacusiñ ni i ni casáha i. Te íyó váha jeē súcuan, chí máá i jeē cácuu i ñayuu tāca gá nación, táu i jeē sáha vāha i nuū

ñayuu hebreo un. Chi ñayuu hebreo ni casáha jeē ní quiji jnūhun Yaā Dios nuū i jeē quéndōo vāha ánuá i sáha. Jeē yúcuan cánuú jéē chindéé ñáhán i ñayuu hebreo cáandíje jíin ndajniñu ñayiví yáha. ²⁸ Núu súcuan te jeē jínu jniñu yáha jéē quíndēca ri xūhun yáha nuū i, yūcuán na te jecondēhe rí rohó jíjnáhan ró jéē yáha ri quihīn rī España. ²⁹ Te jíni vāha ri jeē quiví jinú rī nuū rō, te vāha ndasí quendōo ró jéē nacani ga rī jnūhun vāha Cristo nuū rō.

³⁰ Hermano jijnáhan ró, cáhán ndahú rí jíin ró jeē chindéé ñáhán ró ruhū cacān tahu rō jehē rī nuū Yaā Dios siquī jniñu ndúcú ndéyí rí. Súcuan sáha ró síquī jeē candíje yó Jítoho yō Jesucristo, jíin síquī jeē cundáhú ni yō jnáhan yó sáha máa Espíritu. ³¹ Te cacān tahu rō jeē na cácu ri nuū téé región Judea jeē tu cáandíje, jíin jéē na cúsiñ ni tēcá hermano ñuu Jerusalén jeē quíndēca ri xūhun yáha cuu de. ³² Te súcuan te núu cúni Yaā Dios te jecondēhe rí rohó jíjnáhan ró, te cusī ni yō, te nanihīn ni rī jeē condee rī jíin ró. ³³ Te máa Yaā Dios jeē jéhe jnūhun ndeyí sī ni, na cóo ya jíin ró jijnáhan ró. Amén.

Jeē cahán Pablo jeē sáandeyí ni i

16

¹ Te vijna te cáhán rī jíin ró jijnáhan ró jéē na chindéé ñáhán ró hermana Febe, chi cúu ña ñahan jéjníñu jeē siquī jnúhun ya nuū ñayuu cáandíje ñuu Cencrea. ² Te cuatáhú ró ña nájnūhun cúni máa Jítoho yō, chi súcuan cánuú sáha hermano cáandíje. Te chindéé ñáhán ró ña na-ni vé cúu jeē jíni ñúhún ña, chi súcuan ni chindéé ñáhán máa ña cuehē ñayuu, te suni nde ruhū.

³ Cahán rō jíin Priscila jíin Aquila jeē sáandeyí ni ndíndúú de, áchí rí, chi cáchindéé ñájnañan de jíin rí siquī jniñu Cristo Jesús. ⁴ Chi ná ni iyo jnūndóho jeē cuu rī nuú, te ni cachundeyí ni de ni canducú de scácu de ruhū, vésú suni cuu máa de núu. Te nácuatáhú rí nuū ndíndúú de, te nasūu máa-ni ruhū, chi suni taca

grupo ñayuu cáandíje tēcá nación.

⁵ Te suni cahán rō jíin ñayuu cáandíje ndútútú vehe de, sáandeyí ni i, áchí rí. Te cahán rō jeē sáandeyí ni Epeneto, tēe manī rī jíin. Chi ñuu Acaya, máa de cúu jeē ní candíje xīhna gā nuū Cristo. ⁶ Suni cahán rō jeē sáandeyí ni María, ñahan jeē ní jejniñu ndasí jeē siquī jnúhun ya mēhñu ró jijnáhan ró. ⁷ Te cahán rō jeē sáandeyí ni Andrónico jíin Junias, tēe cácu jnáhan ñuu rī jeē ní cahīn jíin rí vecā. Te tēcá apóstol chi cájejnúhún de ndíndúú téé jíiná, te xīhna gā de ni cáandíje Cristo vésú máa rí.

⁸ Cahán rō jeē sáandeyí ni Amplias, tēe manī rī jíin, chi cándíje de Jítoho yō. ⁹ Te cahán rō jeē sáandeyí ni Urbano, tēe chindéé ñájnañan jíin yó siquī jniñu Cristo Jesús, te suni súcuan Estaquis, tēe jeē manī rī jíin. ¹⁰ Suni cahán rō jeē sáandeyí ni Apelles, tēe jeē ni stéen jeē candíje vāha de Cristo, te suni súcuan cahán rō jíin ñayuu vehe Aristóbulo. ¹¹ Cahán rō jeē sáandeyí ni Herodión, tēe cúu jnáhan ñuu rī. Te suni súcuan ñayuu vehe Narciso jeē cáandíje máa Jítoho yō. ¹² Te suni cahán rō jeē sáandeyí ni Trifena jíin Trifosa, ñahan cásajniñu siquī jnúhun máa Jítoho yō. Te suni sáandeyí ni Pérsida, hermana jeē manī yō jíin, chi suni ni sájniñu ndasí ña siquī jnúhun Jítoho yō. ¹³ Te cahán rō jeē sáandeyí ni Rufo, tēe cájejnúhún ñayuu jeē vāha cándíje de máa Jítoho yō. Te suni súcuan cahán rō jíin náná de, te máa ña suni ni jito ña ruhū nájnūhun jeē naná rī cúu ña. ¹⁴ Te cahán rō jeē sáandeyí ni Asíncrito jíin Flegonte jíin Hermas jíin Patrobas jíin Hermes jíin taca hermano jeē cáyūcu jíin de. ¹⁵ Te suni súcuan Filólogo jíin Julia jíin Nereo jíin cuáha de, jíin Olimpas jíin ndihí hermano cáandíje cáyūcu jíin de jíjnáhan de.

¹⁶ Te jeē cahán taca ró jíin jnáhan ró, te yíñúhún techūhu ró ndaha i. Te taca grupo ñayuu cáandíje nuū Cristo, cáhán i jeē na sáandeyí ni rō.

¹⁷ Te cáhán ndahú rí jíin ró, her-

mano jijnáhan ró, jéē cóto ró máá ró nuū ñáyuu cútucu ni te ndúcú stívi jnáhan jíin jnúhun tu quíjnáhan jíin jéē ní cacutúhva ró. Te cujiyo ró núū i jíjnáhan i. ¹⁸ Chi ñayuu súcuan, tu jéjníñu i nuū Jítóho yō Jesucristo, chi máni ndíhví ni i síquī jeē cáji i. Te yōhyo ndúxí i jíin jnúhun cácahān i, te súcuan stáhú i ñayuu jeē tu jíiní vāha. ¹⁹ Te máá ró jijnáhan ró, chi je cájini ndíhi ñayuu ndese vāha cájetáhú ró nuū yā, te jeē yúcuan cúsiñi rī. Te cúní rī jeē cóo listo vāha ró sáha ró jniñu vāha, te ma sáha ró jniñu néé. ²⁰ Te máá Yaā Dios jeē jéhe jnúhun ndeyí síñi, yachí sáha ya jeē cúndeyí ró síquī jexeén jeē cúu Satanás. Te ñúhun ni rī jeē Jítóho yō Jesucristo na sáha ya jeē vāha róhó jíjnáhan ró.

²¹ Sándeyí ni rō jijnáhan ró, áchí Timoteo, tēe chíndéé ñáhán jíin rí síquī jnúhun ya. Te suni súcuan cácahān jnáhan ñuu rī Lucio jíin Jasón jíin Sosípater.

²² Te ruhū jeē naní Tercio, jeē tée rí carta yáha jéē cahán Pablo, suni cáhán rī jeē sándeyí ni rō jeē cácahān ró Jítóho yō.

²³ Te Gayo, tēe ni jéhe núu vehe ndéé rúhū Pablo, cáhán de jeē sándeyí ni rō jijnáhan ró. Te suni jéhe núu de vehe nuū tāca ñáyuu cácahān. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

²⁴ Te ñúhun ni rī jeē máá Jítóho yō Jesucristo, na sáha ya jeē vāha róhó jíjnáhan ró. Amén.

Jnúhun sándíhi jéē cahán jeē yóhyo cújéhnu ya

²⁵ Te vijna na cáhán yō jeē yóhyo cújéhnu Yaā Dios. Chi máá yá cuu sáha jeē cuíñi ñihin ga rō jijnáhan ró jíin jnúhun jnáma ya rohó jeē nácani rí, jíin jnúhun Jesucristo jeē steén rī. Chi súcuan ni steén Yaā Dios jnúhun sáhi yá, jeē ní yisáhi ní cáni nde ná tu jecōo ñayíví. ²⁶ Te vijna te je ni nane cáji. Chi jíin tútu iñ jeē ní catee tēe ni canacani jnúhun ya, ni jité núu jnúhun sáhi yáha nuū ñáyuu táca

nación, návāha candíje i te cuatáhú i. Chi Yaā Dios jeē técu ní cáni, súcuan ni ndacu ya jniñu.

²⁷ Te ní cáni na cáhán yō jeē yóhyo cújéhnu Yaā Dios síquī jniñu ní sáha ya jeē jíin Jesucristo. Chi máá ñn-ni ya iyó te yóhyo ndíchí yá. Súcuan na cóo. Amén.

CARTA HN JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jnūhun ya. Te ndindúú rí jín hermano yō Sóstenes ² cátee ri carta yáha cuájeē nuū rohó ñáyuu ñuu Corinto jeē cácandíje ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jínáhan ró jéē coo ndoo coo iī ró nuū yā. Te ni cana ya rohó ndé jín táca gá ñayuu jeē ndácunehen i máá Jítoho yō Jesucristo, ndé-ni cúu nuū cáhīyo i. Chi Jítoho táca yó jín i cúu ya. ³ Te cáñuhun ni rī jeē Tatá yō Yaā Dios jín Jítoho yō Jesucristo na sáha ga yā jeē váha rohó, te sáha ya jeē coo ndeyí coo sī ni rō.

Cristo sáha ya táca jéē váha yóhó

⁴ Te níní nácuatáhú rí nuū Yaā Dios jeē síquí rohó jínáhan ró, chi jeē jín Cristo Jesús ni sáha ya jeē váha rohó. ⁵ Chi cáyihí ró ndaha Cristo, te jeē yúcuan ní sáha Yaā Dios jeē cáhīyo cúca ró jín táca jnūhun ya, chi cájecūhun vāha ni rō te cúu nácani ró. ⁶ Chi súcuan cúu jeē cáhīn nihin ró jín jnūhun Cristo jeē ní canacani ri nuū rō. ⁷ Te súcuan te tu cúmanī ni ñn tahū jeē jéhe ya cuu ánuá rō níní jéē cándetu ró quívī jeē quénda ndijin Jítoho yō Jesucristo. ⁸ Te máá yá chi sáha ya jeē cuiñi nihin ró nde na jínu quívī, návāha ma cóo cuēchi síquí rō quívī ndíji Jítoho yō Jesucristo. ⁹ Te squícu Yaā Dios táca jéē ni jéjnūhun ya, te ni cana ya rohó jínáhan ró návāha cuni jnáhan ró jín Séhe ya, Yaā cúu Jítoho yō Jesucristo.

Síquí jeē ma cóo sñn ni i jín jnáhan i

¹⁰ Hermano, nde jín síhví Jítoho yō Jesucristo cahán ndahú rí jín ró jeē ñnuú-ni na ndájnūhun ró jijnáhan ró, te ma cóo sñn ni rō. Chi vāha ñnuú

na cóo ni rō jín táca jéē cájeni ni rō. ¹¹ Súcuan cáhán rī, ñánī mánī, chi ni cacastūhun ñáyuu vehe Cloé nuū rī jeē cátejnáhan ró. ¹² Chi táca ñn ñn ró sñn sñn cácahān rō: Ruhū chi jín Pablo índichi rī, cácahān sava ró. Te sava ga rō: Ruhū chi jín Apolos. Ruhū chi jín Pedro. Ruhū chi jín Cristo. Cácahān rō. ¹³ Te jeē cácahān rō súcuan ¿te á cájeni ni rō jeē sñn sñn Cristo iyó jéē cánacani ri jnūhun? ¿Te á ruhū Pablo ni jihí jicā cruz jehē rō? ¿Chí jín síhví ruhū ni cajendute ró, chí naún? ¹⁴ Tú cuítí. Te na cútahū rī nuū Yaā Dios jeē tú cuehē rō ni scuándute rí, chí máá Crispo jín Gayo-ni, ¹⁵ návāha ma cahán ní ñn ró jéē jín síhví rí ni jendute ró. ¹⁶ Te sá núcūhun ni rī jeē suni ni scuándute ri Estéfanos jín ñáyuu vehe de. Te sanaa te súcuan-ni cúu ñayuu ni scuándute rí, jéni ni rī. ¹⁷ Chi tu ní téjníñu Cristo ruhū jeē scuándute rí, chí sa suhva jeē nácani ri jnūhun jeē jnáma ya ñayuu. Te tu ní ndúcú rí jeē steén rī nuū rō ñn modo ndichí jéē ma jécūhun ni rō, chí núu súcuan te ma cúu jecūhun vāha ni rō jnūhun jeē ni jihí Cristo jicā cruz.

Jín Cristo ni steén Yaā Dios poder yā jín jnūhun ndíchí yá

¹⁸ Te jnūhun jeē ni jihí yā jicā cruz jeē jnáma ya ñayuu, chí jnūhun cánéé íi cúu nuū ñáyuu cuango nuū jnahnú ndetū. Te máá yó jeē cuahán yō nuū cácu yó, chí jíní yō jeē jnūhun Yaā Dios jeē ndíso poder cúu. ¹⁹ Chi suhva yósó núu tútu iī jeē ni cáhān Yaā Dios:

Na snáa rī jnūhun ndíchí cácahān ñayuu ndichí cuenta ñayívi yáha,

te ma cuatáhú rí jnūhun cácahān ñayuu jeē jéni ni jeē jíní vāha.

Achí yá.

²⁰ Núu súcuan ¿te ndé cuajníñu tē ndíchí cuenta ñayívi yáha, jín tē cástéén tutu, jín tē cáncanducú yúcún síquí jeē steén ñayuu ñayívi yáha? Chí táca jnūhun ndíchí cuenta ñayívi yáha, ni cahán Yaā Dios jeē jnūhun cánéé íi cúu. ²¹ Te yóhyo ndíchí sáha Yaā Dios. Chí táca jnūhun ndíchí cájini

ñayuu ñayiví, ni cachi ya jeē tu jéjniñu jeē cúni i ndese Yaā cúu ya. Yūcuán na te ni nujnahan ni yā jeē jín jnúhun ya jeē cánacani ri te jnama ya ñayuu cácanáje, vésú cájeni ni ñayuu ñayiví jeē jnúhun cánéé íi cúu.

22 Chi ñayuu hebreo, máni cáconi i jeē sáha Yaā Dios cuehē jniñu jénu jeē steén poder yā. Te ñayuu griego chi máni síquī jnúhun ndíchí cándihvī ni i. 23 Te máá rí chi sa suhva cánacani ri jnúhun jeē ni jíhī Cristo jicā cruz jeē jnáma ya ñayuu. Te jnúhun yáha sáha jeē jnánini ni ñayuu hebreo, te ñayuu tāca gá nación chi cájeni ni i jeē jnúhun cánéé íi cúu. 24 Te ñayuu jeē ní cana ya ni quivicoo ndaha ya, vésú ñayuu hebreo chí ñayuu griego, chi jíní i jeē jín Cristo ni steén Yaā Dios poder yā jín jnúhun ndíchí yá. 25 Chi jnúhun Yaā Dios jeē cácahān ñayuu jeē jnúhun cánéé íi cúu, yōhyo ndíchí gá vésú jnúhun ndíchí ñayuu. Te cájeni ni ñayuu jeē tú na poder yā ná ni jíhī Jesús jeē jnáma ya yohó, te tuú chi níhin téyí gá poder yā ún vésú poder ñayuu. 26 Hermano, máá ró cácuu jeē ní cana ya ni quivicoo ró ndaha ya. Te condēhe ró jeē tú cuehē rō ndíchí jín jnúhun ñayiví, ni tú cuehē rō cándacu jniñu, ni tú cuehē rō cácuu sēhe ñayuu cujénu. 27 Chi sa suhva ni nacāji Yaā Dios tāca jéē cácahān ñayuu ñayiví jeē tu ndíchí cuiti, návāha coo jnúhun canu nuū tāca jéē ndíchí. Te ni nacāji ya ñayuu tu téyí ini ñayiví, návāha coo jnúhun canu nuū ñayuu teyí. 28 Te suni ni nacāji Yaā Dios tāca jéē tu cujénu ini ñayiví, jín táca jéē sajéē ni i nuū, nde jín táca jéē tú jniñu cájeni ni i, návāha snúu ya tāca jéē cujénu ini ñayiví. 29 Súcuan ni sáha ya návāha ni ññ ñayuu ma cúu sátéyí i máá i nuū yā. 30 Te máá ró jijnáhan ró chi ni sáha Yaā Dios jeē nduú ró jín Cristo Jesús. Chi nde nuū máá yá ni canihñ yō jnúhun ndíchí, te ni ndahva yā cuēchi yó, te ni sáha ya jeē iyó ndoo íyó íi yō nuū yā, chi ni jnama ya yohó. 31 Te jeē yúcuan na cóo nájñuhun cáhán tutu íi: Núu ññ ñayuu cuní i cutéyí i, te na cutéyí i síquī

jeē ni sáha máá Jítóho yō jehē i, áchí.

Jeē nácani Pablo jnúhun jeē ni jíhī Cristo

2

1 Te ruhū, hermano, ná ni jeē rī nuū rō jijnáhan ró jeē nácani ndaā rī jnúhun Yaā Dios, te tu ní nácani ri jnúhun ndíchí jeē ma jécūhun ni rō. 2 Chi ná ni iyo ri jín ró te tú na inga jnúhun ní ndúcú rí castūhun rí nuū rō, chi máni máá jnúhun Jesucristo jeē ni jíhī yā jicā cruz jeē jnáma ya yohó. 3 Te ná ni jinū rī nuū rō jijnáhan ró, chi tú na fuerza rī, te yúhú rí, te quísi i ruhū. 4 Te ná ni nacani ri jnúhun nuū rō, chi nasūu jín jnúhun ndíchí ñayuu ñayiví ní scándije ri rohó, chi sa suhva jín máá poder Espíritu yā ni steén rī nuū rō jijnáhan ró, 5 návāha ma cuíñi ró síquī jnúhun ndíchí cácahān ñayuu, chi cuiñi ró síquī poder Yaā Dios.

Jín Espíritu te steén Yaā Dios ndese Yaā cúu ya

6 Te ndaā chi ndíchí cácahān rī jín ñayuu jeē jé ni ije jín jnúhun cándije i ya. Te nasūu jnúhun ndíchí jéē iyó ini ñayiví yáha, ni nasūu jnúhun ndíchí cácahān tēe cácujeñu ñayiví yáha, chi tēe ún yāha-ni jeē cácujeñu de. 7 Chi jnúhun cácahān rī cúu jnúhun ndíchí máá Yaā Dios jeē ní yisāhí. Chi jnúhun ndíchí un jéē ní yisāhí, ni jequin Yaā Dios nde ná tu jecōo ñayiví, návāha cācu yó jéē cótecu yō ní caní sáha jnúhun ún. 8 Chi ni ññ tēe cújeñu nuū ñayiví yáha, tu ní jécūhun ni de jnúhun ndíchí un. Chi núu ni jécūhun ni de núu, te ma cáhni cuiti de máá Jítóho yō, Yaā cujénu luu. 9 Chi cúu nájñuhun cáhán tutu:

Tāca jéē ni sátūhva Yaā Dios jeē cúu ñayuu jeē maní jín yá,
ni ññ ún tu ní jító jínúu ñayuu, ni tu ní jíní sōho i,

ni tu ní quíji jeē súcuan caní ni i. Achí tutu. 10 Te máá yó jijnáhan yó chi ni steén Yaā Dios tāca un núu yō jeē jín Espíritu yā. Chi máá Espíritu jíní vāha ya te steén yā ndihí, chi nde ndihí jeē ndíchí gá máá Yaā Dios.

11 Chi ni ñn ñayuu ma cúu cuni i ndese jéni ni inga ñayuu, chi máá-ni i jín ánuá i cúu jeē jíní. Te suni súcuan ni ñn ñayuu tu jíní i ndese jéni ni Yaā Dios, chi máá-ni Espíritu Yaā Dios cúu jeē jíní. 12 Te máá yó chi ni nihñ yō Espíritu un jéē véji nuū Yaā Dios, te tu cájeni ni yō nájnūhun cájeni ni ñayuu ñayíví. Te jeē yúcuan cúu jeē cájecūhun ni yō ndese ni sáha Yaā Dios jeē váha yóhó síquī jeē váha ni yā. 13 Te suu síquī tāca jéē yáha cúu jeē cácahān rī, te nasūu jín jnūhun jeē castéén ñayuu ndichí, chi jín jnūhun jeē steén maá Espíritu. Chi cástéén rī jnūhun Espíritu nuū ñayuu cánevāha Espíritu.

14 Te ñayuu ñayíví tu cájetáhú i tāca jnūhun jeē véji nuū Espíritu Yaā Dios, chi cájeni ni i jeē jnūhun cánéé íi cúu. Te ma cúu jecūhun ni i, chi tu cánevāha i máá Espíritu jeē sáha jeē jécūhun ni i. 15 Te ñayuu cánevāha Espíritu, chi cájecūhun ni i ndese íyó ndihí-ni. Te ñayuu ñayíví ma cúu jecūhun ni i ndese ñayuu cácuu ñayuu ún. 16 Chi suhva cáhān tutu íi: ¿Ndé ñn cuu cuni ndese jéni ni maá Jítóho yō? ¿Te ndé ñn cuu stéén nuū yā? Ni ñn ma cúu. Achí tutu. Te vēsú súcuan te máá yó chi cájeni ni yō nájnūhun jéni ni Cristo.

Jeē cáchindéé ñájnáhan de cájejniñu de nuū Yaā Dios

3

1 Te ruhū, hermano, tu ní cúu cahān rī jín ró jijnáhan ró nájnūhun cáhān rī jín ñayuu jíca jín Espíritu. Chi ni cahān rī jín ró nájnūhun jín ñayuu cájica jín modo maá, chi cácuu ró nájnūhun sūchi lúlí jéē ná tu ije ró jín jnūhun Cristo. 2 Ni steén rī nuū rō jeē tú yí, chi cácuu ró nájnūhun sūchi lúlí jéē jéxin gā. Te tu ní cáhān rī jín ró jnūhun yí jeē cúu nájnūhun jeē ndáva jeē yéji ñayuu ni ije, chi ná tu canda ró jín ndé saá. Te ni vijna ná tu canda ró jín. 3 Chi cájica ga rō jín modo neé máá ró. Chi cácuuésún ni rō, te cácajnáhan ró, te cácusñn ni rō. Núu súcuan te cácuu ró nájnūhun ñayuu ñayíví jéē cájica jín modo neé máá. 4 Chi ñn ró cáhān: Ruhū chi jín Pablo

índichi rī. Te inga rō cahān: Ruhū chi jín Apolos. Te súcuan cúu jeē cájica ró jín modo neé máá ró

5 ¿Te ndé ñn cúu ruhū, te ndé ñn cúu Apolos núu súcuan? Chi máá mozo-ni Yaā Dios cácuu rī, te ni jejniñu ya ruhū návāha candíje ró máá Jítóho yō. Chi ná ñn ná ñn rī ni sáha jniñu ndese ni jēhe máá Jítóho yō nuū rī. 6 Ruhū, nájnūhun ni taji rī jnūhun ya ini anuá rō, te Apolos, nájnūhun ni chuhun de ndute cúu jeē ní steén gā de nuū rō. Te máá Yaā Dios cúu jeē ni scuéñu jnūhun ini anuá rō. 7 Núu súcuan te tú na vé cúu sáha tēe táji ni tēe chúhun ndute, chi sa suhva máá Yaā Dios cúu jeē scuéñu. 8 Te tēe táji jín tēe chúhun ndute, ñn-ni cácuu de. Te tācá de chi cuāha ya yāhu nuū de ndese jniñu ni casáha ñn ñn de. 9 Chi ruhū jijnáhan rī chi tēe chíndéé ñájnáhan cájejniñu nuū Yaā Dios cácuu rī. Te máá ró jijnáhan ró cácuu nájnūhun itu Yaā Dios jeē jícu ya jín.

Te suni nájnūhun ñn vehe jeē sáha Yaā Dios cácuu ró. 10 Te ruhū chi cúu rī nájnūhun ñn maestro albañil jeē ní jequin rī cimientu vehe ún, cúu jeē ni scándíje rī rohó. Te inga de cásama de síquī, cúu jeē castéén gā de nuū rō. Núu súcuan te ná ñn ná ñn de na cóo cuidado de ndese sáma de síquī. 11 Te Jesucristo cúu cimientu vehe ún, te ni ñn ma cúu caquin inga cimientu, chi máá yá cúu jeē ní ndahva cuēchi ró. 12 Te tāca ñayuu cácañíje, chi sáha i vehe síquī cimientu un, núu jín ndajniñu vāha nájnūhun oro chí plata chí yūu luu, chí jín jéē yachí naa, nájnūhun yujnu chí ite chí ndayóhō. 13 Te natūu jniñu un jéē ní sáha ñn ñn i, te suu cúu ndese ni condihvī ni i síquī maá yá. Chi máá quívī juicio jeē sándaā yā jniñu ñayuu, quívī ún natūu cáji jniñu i. Chi jín ññhñn quiji quívī ún, te nájnūhun sáha ññhñn jeē jéñmu tāca jéē cúu cayū, súcuan coto ndee ya jniñu ñn ñn i. 14 Te núu tú cayū jniñu ní sáha i síquī cimientu un, te nihñ i tahū i. 15 Te núu tu ní cóndihvī ni i jín jniñu ya, te ma nihñ i tahū i, chi nájnūhun cayū jniñu i. Te máá i

chi cācu ánuá i, vēsú nájñuhun je yajni cayū i nuū yáñuhūn.

¹⁶ ¿A tu cájini rō jeē cácuu rō nájñuhun templo Yaā Dios, chi ndéé Espíritu Yaā Dios ini anuá rō? ¹⁷ Te núu ñn tēe stívī de templo Yaā Dios, te snáhnú ndetū yā tēe ún. Chi ndoo ndasí cúu templo yā, te suu cácuu máá rō.

¹⁸ Ni ñn rō ma stahú rō maá rō jíin jeē jéni ni rō. Núu ñn ñayuu jéni ni i jeē ndichí i jíin jnúhun ñayīvī yáha, vāha ga na siāā i ún, návāha coo ndichí ndije i jíin jnúhun máá yá.

¹⁹ Chi jnúhun ndichí jeē iyó ini ñayīvī yáha, jnúhun cánéé íi cúu nuū Yaā Dios. Chi cáhán nuū tutu íi: Ñayuu ndichí cuenta ñayīvī, chi nájñi ya i siquī jnúhun ndichí i jeē jési i jnúhun ya, achí. ²⁰ Te cáhán tucu tutu: Máá Jítóho yō jiní yā tāca jeē jéni ni ñayuu ndichí, chi máni jeē jéni cāhá ni i, áchí.

²¹ Núu súcuan te ni ñn rō má cutéyí rō jeē siquí ni ñn tēe ndichí. Chi cuenta maá rō cúu ndihí-ni. ²² Cúu Pablo, cúu Apolos, cúu Pedro jeē castéén nuū rō. Cúu ndihí jeē iyó ini ñayīvī, jeē iyó vijna jíin jeē quíji. Te vēsú núu cotecu rō chí cuu rō, te ndihí-ni chi cuenta maá rō cúu. ²³ Te máá rō cácuu cuenta Cristo, te Cristo cúu cuenta Yaā Dios.

Jeē casájniñu apóstol siquī jnúhun ya

4

¹ Núu súcuan te na cáni ni rō jijnáhan rō jeē mozo-ni nuū Cristo cácuu ri, jeē ní tejniñu ya ruhū jeē steén rī jnúhun Yaā Dios jeē ní yisāhi ndé jehán. ² Te ndaā chi tēe jeē sájniñu siquī ún, iyó responsable ná ñn ná ñn de jeē squícu vāha de. ³ Te ruhū tu sáha ri cuenta núu cánanducú rō siquī rī ndese sáha ri, chí núu cánanducú ñayuu cácujuhnu ini ñayīvī. Te ni máá rí tu chíhi ri cuenta siquī maá rí. ⁴ Chi vēsú jiní rī jíin ánuá rī jeē tú na cuēchi rī, te nasūu yúcuan cúu jeē quéndōo ndaā rī, chi máá Jítóho yō cúu jeē jító ndee ruhū. ⁵ Jeē yúcuan ma nánducú rō siquī jniñu jnáhan rō, chi nde na quéé maá quívī te cuni rō. Chi nde na ndíji máá Jítóho yō te nastúu ndijin

yā tācá jniñu jeē yisāhi núu néē, te steén ndijin yā tāca jeē jéni ni ñayuu jíin ánuá i. Yūcuán na te máá Yaā Dios cuajnúhún yá ná ñn ná ñn i ndese ni casáha i.

⁶ Hermano, tāca jnúhun yáha ní cahān rī návāha quendōo vāha rō jijnáhan rō. Te ni cachi rī jeē maá rí jíin Apolos cácuu ri mozo-ni nuū yā, te súcuan cácuu ri ñn ejemplo nuū rō. Te cáhán rī jeē súcuan cácuu ri, návāha cutūhva rō caní ni rō maá-ni nájñuhun cáhán tutu íi. Chi ma sandúxí rō jeē cuajnúhún rō ñn tēe steén, te inga de tuú. ⁷ ¿Te naun cácutéyí rō nuū jnáhan rō núu súcuan? ¿Te na vé cúu jeē iyó núu rō jeē tu ní cácutahū rō nuū yā? Te núu ni cacutahū rō nuū yā, ¿te naun casátéyí rō maá rō jeē nájñuhun jeē nasūu jeē ní cacutahū rō cúu?

⁸ Va je ni cacucúca rō, chi je cánevāha rō ndihí, cájeni ni rō. Te je cándacu máá rō jniñu, te ni tuá cájini ñuhún rō ruhū, cájeni ni rō. Tú vāha jeē súcuan cácutéyí rō. Te nacā jeē váha núu jeē cándacu ndije nde rō jniñu núu, návāha suni cuāha rō jnúhun jeē ndacu nde ri jniñu jíin rō jijnáhan ri. ⁹ Te iyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájñuhun tēe núu ga nuū ñayuu, nájñuhun tēe jeē jé ni cundaā jeē cúu. Te nñí ñayīvī jíin andívī cándēhe vāha nuū rī, cúu ndajéhe Yaā Dios jíin ñayuu. ¹⁰ Chi jeē siquí Cristo te cácahān i jeē tēe cánéé cácuu ri. Te tāca róhó va ndichí rō jíin jnúhun Cristo, cájeni ni rō. Te tāca rúhū chí tu fuerza rī, te róhó va iyó fuerza rō, cájeni ni rō. Te róhó chí cáhīyo yíñuhún ñayuu nuū rō, te nuū rī chí casájéé ni i. ¹¹ Nñí véjicoo rī cájií rī sōco te nde vijna. Te cájichí rī ndute, te cúmaní sahma ri, te tu casáha vāha ñayuu jíin rí, te ni tu cánevāha ri vehe. ¹² Te nihin casájniñu ri jíin ndaha ri. Cácahān neé i nuū rī, te cácahān vāha ri jíin i. Cájito xeēn i ruhū, te cájendeyí ni rī. ¹³ Cácahān neé i siquī rī, te sa cácahān maní rī jíin i. Te cácuu ri nájñuhun yācá ini ñayīvī, te casquéhichí i ruhū nde vijna.

14 Te nasūu jēē tēe ri yāha jēē cúcanu rō, chi sa suhva jeē stihví ni rī rohó, chi cácuu rō nájñuhun sēhe ri chi maní rī jín rō. 15 Chi vēsú na cóo uxī mil tēe stēén jñuhun Cristo nuū rō, te ñn-ni tátá rō iyó. Te máá rí cúu nájñuhun tátá rō, chi ni scandíje ri rohó jēē ní nacani ri jñuhun vāha Cristo Jesús jeē jnáma ya yohó. 16 Núu sūcuan te cáhán ndahú rí jín rō jeē na ndácu rō rúhū jijnáhan rō.

17 Te jeē yúcuu cúu jeē tají rí Timoteo cuajeē de nuū rō. Chi cúu de nájñuhun sēhe ri jeē maní rī jín de, te squícu vāha de nuū máá Jítóho yō. Te máá de nacachi tucu de nuū rō ndese jíca rí jeē candíje ri Cristo, jín ndese stēén rī nuū tāca grupo ñayuu cácaníje tāca lado. 18 Te sava rō chi cásatéyí rō maá rō, chi cájeni ni rō jeē ma jéé cuítí gā rī nuū rō. 19 Te tuú chi yachí jeē rī nuū rō te núu sūcuan cúní máá Jítóho yō. Yūcuán na te nanducú rí siquí tēe cácutéyí, te ma sáha ri cuenta jñuhun cácahān-ni de, chi sa coto ndee rī de núu cuu squícu nde de. 20 Chi jeē ndácu Yaā Dios jniñu nuū yō, nasūu máá jéé cahán ñn-ni yó cúu, chi jini ñúhún condiso poder jñuhun cáhán yō jín jniñu sáha yó. 21 Núu sūcuan ¿te ndese cácuu rō? ¿A jéé cuxeēn rī nuū rō núu na jéé rī, siquí jeē tu cánacani ni rō, chí nacani ni rō te jeē rī jín jñuhun cúndáhú ni jín jñuhun vítá ni?

Jeē sándaā Pablo siquí ñn cuēchi

5

1 Te ni nihīn rī jñuhun jeē jíca jnéni ñn tēe jeē íne mēhñu rō, chi ndéca de naná uū de. Te xeēn ndasí sáha tēe ún, chi ni ñayuu jeē tu cájini jñuhun Yaā Dios, tu cása i sūcuan. 2 Te vēsú sūcuan te cásatéyí rō maá rō jijnáhan rō. Vāha ga jeē na cúcuíhyá ndasí ni rō. Te cánuú jéē na quénehen rō tēe sáha cuēchi ún na quénda de mēhñu rō. 3 Te ruhū, vēsú tu íyó rí jín rō, te nájñuhun jeē iyó rí jín rō cúu jeē ñúhún ni rī rohó. Te je ni sándaā rī siquí tēe ni sáha cuēchi ún, chi nájñuhun jeē iyó rí jín

rō cúu. 4 Núu sūcuan te na ndútútú rō jijnáhan rō, te máá Jítóho yō Jesucristo coo ya jín rō. Te máá rí chí nájñuhun cone ri jín rō, chí ñúhún ni rī rohó. Te poder máá Jítóho yō Jesús suni coo jín rō. 5 Te na chíhi yó tēe ún ndaha Satanás, návāha na ndóho yiquí cúñu de, te nacani ni de te cácu ánuá de quíví ndiji Jítóho yō Jesús.

6 Tuú vāha jeē casatéyí rō maá rō. ¿A tu cájini rō jñuhun cáhán suhva? Vēsú jecu-ni levadura te ndáa ní ñujen sáha, áchí. 7 Núu sūcuan te quenehen rō tēe un nájñuhun scáne rō levadura jeē ni tíví. Te sūcuan te cuu rō nájñuhun pan jeē cúvāha jín ñujen jéé tú na levadura yíhi, jeē cáyeji i vico pascua. Te ndaā jeē sūcuan cácuu rō. Chi je ni jihí Cristo jeē ni sócō yā máá yá jehē yō, chí cúu ya nájñuhun londe pascua jeē ni jhí. 8 Núu sūcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájñuhun pan jeē tú na levadura yíhi. Te ma sáha yó jniñu néé jín jniñu jnéhén, jeē cúu nájñuhun levadura jeē ni tíví.

9 Nuū inga carta jeē ní tee ri nuū rō jijnáhan rō ni cahán rī jeē ma quíví nduu rō jín ñáyuu cájica jnéni. 10 Te tu ní cáchi rī jeē ma quíjñahan cuítí rō jín ñáyuu tu cácaníje jeē cájica jnéni, jeē ndíyo ni, jeē sácuhná, jeē chíñúhún ídolo. Chi núu sūcuan te jini ñúhún jeē quénda rō ini ñayíví núú, chí tuá na inga modo jeē cújiyo rō núú i chí ndéé yó ñayíví jín i. 11 Chi sa suhva ni cachi rī jeē ma quíví nduu rō jín máá ñáyuu jeē cácahān i jeē cúu i hermano, te núu jíca jnéni i, chí ndíyo ni i, chí chíñúhún i ídolo, chí chísó jñuhun i siquí jñahan i, chí nájñi i, chí cuíhna i. Te ni ma cáji cuítí rō staā jín ñáyuu casáha sūcuan. 12-13 Chi nasúú jniñu ri cúu jeē sándaā rī siquí ñáyuu jeē tu cáhīn jín yó. Yaā Dios cúu jeē sándaā siquí i. Te ñayuu cáhīn jín rō chí cánuú jéé sándaā rō siquí i. Núu sūcuan te cánuú jéé quénehen rō tēe ni sáha cuēchi un jéé íne de mēhñu rō, na quénda de.

Jeē ma cáquin i cuēchi siquí jñahan i

nuū tohó tu cá candíje

6

¹ Te núu jnáhan ró jéē candíje ni sáha cuēchi siquī rō, ¿te naun jéngoo ró jíin de nuū tohó jeē tu cá candíje jíin yó? ¿Te naun tu cá sándaā rō nuū jnáhan ró cá candíje Yaā Dios? ² ¿A tu cájini rō jeē ñáyuu cá candíje Yaā Dios chí ñn quiivī te sándaā i jniñu ñayuu ñayīvī? Te núu ñn quiivī sándaā rō jniñu ñayuu ñayīvī, ¿te á má cúu sándaā rō vijna siquī tāca cuéchi lúli cá sáha jnáhan ró? ³ ¿A tu cájini rō jeē ñn quiivī te sándaā yō nde jniñu tāca ndajéhé andivī? Te nagā ni cuu jniñu ñayīvī yáha jeē ma cúu sándaā yō. ⁴ Núu súcuan te núu jnáhan ró sáha de ñn cuēchi siquī rō, ¿te naun jéngoo ró sa nuū tāca téē jeē tu cúu de jnáhan ñayuu cá candíje jeē sándaā de siquī cuéchi ún? ⁵ Súcuan cáhán rī návaha na cúcanu rō jijnáhan ró. ¿A tu íyó ni ñn tēe jécūhun ni mēhñu ró jeē cuu sándaā de siquī rō? ⁶ Tú vāha jeē ñn hermano caquin cuéchi siquī ñga hermano nuū tohó jeē tu cá candíje.

⁷ Te jeē cájequin rō cuéchi siquī jnáhan ró, chí jeē castívī íi rō cúu. ¿A tú vāha ga cuandeyí ni rō na sáha i cuéchi siquī rō chí quende i ndajniñu ró? ⁸ Te tuú chí sa máá ró cá sáha cuéchi te cáquende ró ndajniñu, te nuū tāca hermano rō cúu jeē casáha ró.

⁹⁻¹⁰ ¿A tu cájini rō jeē ñáyuu tu íyó ndáā, ma nihín tahú i quivī i ñuu nuū ndácu Yaā Dios jniñu? Ma stahú ró maá ró cani ni rō jeē nihín tahú rō, chí ni ñayuu jeē jíca jnéni, ni ñayuu chiñúhún ídolo, ni ñayuu casíqui ndéē jnáhan, ni tēe sáha ndiyī jíin jnáhan yí, ni ñayuu cuīhná, ni ñayuu ndíyo ni, ni ñayuu nájini, ni ñayuu chisó jnúhun siquī jnáhan, ni ñayuu stahú jnáhan siquī xúhun, ma nihín tahú i quivicoo i ñuu nuū ndácu Yaā Dios jniñu. ¹¹ Te súcuan ni candāa sava ró núu, te vijna chí je ni nacate ya rohó, te cáhīyo ndoo cáhīyo íi rō nuū yā. Chí je ni ndahva yā cuéchi ró jéē jíin máá Jítoho yō Jesús jíin Espíritu Yaā Dios.

Jeē iyó ndoo íyó lí yiqui cúñu ñayuu cá candíje

¹² Te ndaā cúu jeē cácahān jeē ndihi-ni jniñu íyó váha sáha yó núu ndese cúní yō. Te vēsú súcuan te nasūú ndihi sáha jeē quéndōo vāha ánuá yō. Ndihi chí cuu sáha yó, te vēsú súcuan te tu íyó váha jeē quivī yó núu jniñu jeē stívī ánuá yō. ¹³ Te ndaā cúu jeē cácahān jeē ndeyu cúu jeē cúhun chíji, te chíji cúu jeē cúhun ndeyu. Te ñn quiivī te tuá coo súcuan, chí naa ndíndúú un sáha Yaā Dios. Te nasūu siquī jeē cáca jnéni yó cúu jeē iyó yiqui cúñu yō, chí sa suhva jeē sáha yó jéē cúní maá Jítoho yō. Te Jítoho yō chí ndíto ya yiqui cúñu yō. ¹⁴ Te nájnūhun jeē ní nastécu Yaā Dios Jítoho yō, suni súcuan nastécu yā yohó jíin poder yā.

¹⁵ ¿A tu cájini rō jeē yiqui cúñu tāca ñn ñn ró cúu nájnūhun tāca parte yiqui cúñu Cristo? Núu súcuan ¿te á cuu quende yó ñn parte yiqui cúñu Cristo te squíjnáhan yó jíin ñn ñahan jíca jnéni? Ma cúu cuii súcuan. ¹⁶ ¿A tu cájini rō jeē tēe quíjnáhan jíin ñahan jíca jnéni, ñn na yiqui cúñu ni nduu de jíin ña? Chí cáhán tutu íi: Jeē ndíndúú chí ñn na yiqui cúñu cuu, áchí. ¹⁷ Te ñayuu jeē quíjnáhan jíin máá Jítoho yō, chí suni súcuan ñn na cúu i jíin yá siquī jeē candíje i ya.

¹⁸ Núu súcuan te cunu ró jéē ma quivī ró núu jnúhun jíca jnéni. Chí tāca gá cuéchi jeē sáha ñayuu, chí nasūú yiqui cúñu i stívī i. Te núu jíca jnéni i, te siquī yiqui cúñu i cúu jeē sáha i cuéchi. ¹⁹ ¿A tu cájini rō jeē yiqui cúñu rō cúu templo Espíritu Santo jeē ni jéhe Yaā Dios nuū rō, te ndéé yá ini rō? Te nasūu cuenta maá ró cácuu ró. ²⁰ Chí Yaā Dios yahu ni cuu jeē ní nacuaan ya rohó jijnáhan ró. Te jeē yúcuan cánuú jéē cáca yíñúhún ró nuū Yaā Dios jeē sáha ró jniñu váha nde jíin yiqui cúñu rō jíin ini jíin ánuá rō, chí máni cuenta Yaā Dios cúu.

Jnúhun cástūhun siquī tēe jíin ñasihí

7

¹ Vijna te na cáchi rī siquī tāca jnúhun jeē ní cacajnūhun ró ruhū nuū

carta. Jendaá jeē vāha ga quendōo ñn tēe núu tú condeca de ñahan. ² Te siquī jeē iyó jnúhun jnéni, te vāha ga jeē tāca tēe na cóo ñasihí máá de, te suni tāca ñahan coo yīi máá ña. ³ Te yīi na squícu vāha de nuū ñasihí de jeē cúu de yīi ña. Te suni súcuan ñasihí na squícu vāha ña nuū yīi ña. ⁴ Chi ñasihí chi tu cúu sáha ña jeē cuní ña jíin yīiqui cúñu ña, chi suni jeē cuní yīi ña. Te suni súcuan yīi tu cúu sáha de jeē cuní de jíin yīiqui cúñu de, chi suni jeē cuní ñasihí de. ⁵ Te ma sasáhán ró maá ró nuū jnáhan ró. Te núu cácu ni rō jeē vihyá gā cacān tahú rō jecu tiempo, te núu cáhīyo conforme ndindúú ró, te cuu sásáhán ró maá ró nuū jnáhan ró. Te yūcuán na te vāha ga naquijnáhan tucu ró, návāha ma cóto ndee Satanás rohó siquī jnúhun jnéni.

⁶ Te nasūu jēe ndácu ri jniñu jeē cánuú quijnáhan ró, chi jeē jēhe ri jnúhun cúu. ⁷ Chi nújnahan ni rī jeē tāca tēe na cóo máá ñn-ni de, nájnūhun íyó máá rí. Te sūn sūn ni sáha Yaā Dios jíin ñn ñn de ndese cúu máá de, chi sava de cuu quendōo máá ñn-ni de, te inga de chi tuú chi sūn ni sáha ya jíin de.

⁸ Núu súcuan te cáhán rī jíin ñayuu cáhīyo máá ñn-ni, jíin ñahan ní caquendōo ndáhú, jeē vāha ga te núu quendōo máá ñn-ni i, nájnūhun íyó máá rí. ⁹ Te núu jíin i jeē ma cánda i quendōo máá ñn-ni i, te na quijnáhan i núu súcuan. Chi vāha ga jeē quijnáhan i vēsú jeē ndúquīi i.

¹⁰ Te nuū ñayuu jeē jé ni quijnáhan chi ndácu ri jniñu jeē ñahan ma ndusūn ña jíin yīi ña. Te nasūu rúhū cúu jeē ndácu jniñu, chi máá Jítoho yō.

¹¹ Te núu ñn ñahan ndusūn ña jíin yīi ña, te na quendōo máá ñn-ni ña, chí cuu naquijnáhan ña jíin yīi ña. Te yīi suni ma ndusūn de jíin ñasihí de.

¹² Te jíin sava ga ñayuu chi cahān rī yāha jēe jéni ni máá rí, te nasūu jēe ní cachi máá Jítoho yō cúu. Núu ñn hermano ndéca de ñahan jeē tu cándije, te núu nújnahan ni ña condee ña jíin de, te ma ndusūn de jíin ña.

¹³ Te núu ñn ñahan ndéca ña tēe jeē tu

cándije, te núu nújnahan ni de condee de jíin ña, te ma ndusūn ña jíin de.

¹⁴ Chi tēe tu cándije, yīhi cuenta de nuū Yaā Dios siquī jeē ní quijnáhan de jíin ñahan cándije. Te ñahan tu cándije, yīhi cuenta ña nuū Yaā Dios siquī jeē ní quijnáhan ña jíin tēe cúu hermano cándije. Chi núu tu súcuan te sēhe i ma quīhi cuenta i nuū Yaā Dios, te vijna chi yīhi cuenta i nuū yā. ¹⁵ Te yīi chí ñasihí tu cándije, núu fuerza cuní i ndusūn i jíin jnáhan i, te na ndusūn i. Chi núu súcuan cuní i, te hermano chí hermana cándije tu cánuú casi i jeē ndusūn jnáhan i jeē tu cándije. Chi ni cana Yaā Dios yohó jēe condee manī yō jíin jnáhan yó. ¹⁶ Te rōhó jēe cácuu ñasihí, tu cájini rō, sanaa te cándije yīi ró sáha ró, te cácu de. Te suni súcuan rōhó jēe cácuu yīi, tu cájini rō, sanaa te cándije ñasihí ró sáha ró, te cácu ña.

¹⁷ Te ná ñn ná ñn ró na quendōo ró ndese ni sáha Jítoho yō jeē cúu ró, jíin ndese íyó ró ná ni cana ya rohó ní cándije ró. Te súcuan ndácu ri nuū tāca grupo ñayuu cáncándije. ¹⁸ Núu ni cana ya ñn tēe jeē ní cuu circuncidar, te súcuan na quendōo de. Núu ni cana ya ñn tēe jeē tu ní cúu circuncidar, te ma cúu de circuncidar. ¹⁹ Chi tú na vé sáha núu cúu yó circuncidar chí tuú, chí jeē cánuú gá cúu jeē na squícu vāha yó jniñu cuní Yaā Dios. ²⁰ Ná ñn ná ñn ró na quendōo ró ndese íyó ró ná ni cana ya rohó ní cándije ró. ²¹ Núu mozo jeē ní jeen ñayuu cúu ró ná ni cana ya rohó, te ma cóndihvī ni rō jeē quénda ró. Te núu íyó modo jeē quénda ró nduu libre rō, te íyó váha jeē sáha ró. ²² Chi tēe cúu mozo jeē ní jeen ñayuu, te núu ni cana Jítoho yō de, te vijna chí ni nduu libre de nuū cuéchi de, jéjníñu de nuū máá Jítoho yō. Te suni súcuan tēe sájniñu cuenta maá, te núu ni cana ya de, te vijna chí ni nduu de mozo jeen ñayuu nuū Cristo jeē ní nacuaan ya de. ²³ Chi yahu ni cuu jeē ní nacuaan Yaā Dios rohó jijnáhan ró, cúu jeē ni jhī Sēhe ya jehē rō. Núu súcuan te ma cuajniñu ró núu jniñu cáhá-ni jeē ndácu ñayuu ñayīví. ²⁴ Núu súcuan hermano, ná ñn ná ñn

ró na quéndōo ró núu Yaā Dios ndese íyó ró ná ni cana ya rohó.

25 Te vijna te siquī ñayuu jeē iyó máá-ni, tú na jnūhun ní ndácu Jitoho yō nuū rī. Te na cáhán rī jeē jéni ni maá rí, chi ni cundáhú ni Jitoho yō ruhū, te ni sáha ya jeē cúu cahān ndaā rī. 26 Jéni ni rī jeē vāha-ni núu quendōo-ni tēe ndese cáhīyo de, jeē siquī jeē iyó jnúndóho tiempo yáha. 27 Núu íyó ñasihí ró, te ma ndusñin ró jín ña. Te núu tu íyó ñasihí ró, te ma nducú ró ña. 28 Te núu quijnáhan ró, te nasūu cuéchi cúu. Te núu quijnáhan sūchi síhí, te suni nasūu cuéchi cúu. Te ñayuu quijnáhan, chi nihīn i jnūndóho ñayīvi yáha, te cúní rī jeē ma nihín rō jnūndóho.

29 Hermano jijnáhan ró, jnūhun jeē cahán rī yāha cúu jeē yachī-ni ndihí tiempo jeē sáha yó jniñu ya. Núu súcuan te nde vijna te tēe íyó ñasihí, na cóndihvī gā ni de siquī jniñu máá yá vēsú siquī ña. 30 Te ñayuu jeē ni jíhī jnáhan vehe i, na sáha i nájnūhun jeē tu cúcuíhyá ni i. Te ñayuu cúsiñ ni, na sáha i nájnūhun jeē tu cúsiñ ni i. Te ñayuu jéen, na sáha i nájnūhun jeē nasūú ndajniñu i cúu. Ma cuáha i jnūhun jeē casī tācá un jéē ma cúu condihvī ni i jniñu máá yá. 31 Te ñayuu jeē ní cacondihvī ni siquī ndajniñu ñayīvi yáha, ma cujnéñu ga i jín. Chi je yajni naa tāca jéē iyó ñayīvi yáha.

32 Cúní rī jeē ma nácani ndasí ni rō siquī tāca jéē iyó ini ñayīvi. Chi tēe cúu soltero, ndíhvī ni de jniñu máá Jitoho yō, ndese cusī ni Jitoho yō sáha de. 33 Te tēe íyó ñasihí chi ndíhvī ni de jniñu íyó ñayīvi, ndese cusī ni ñasihí de sáha de. 34 Te suni súcuan sñin sñin jéni ni ñahan íyó yñi jín ñahan íyó máá. Chi ñahan íyó máá, ndíhvī ni ña jniñu máá Jitoho yō, chi cúní ña jeē coo ndoo coo iī anuá ña jín yiqui cúñu ña cuajniñu ña nuū yā. Te ñahan íyó yñi chi ndíhvī ni ña jniñu íyó ñayīvi, ndese cusī ni yñi ña sáha ña.

35 Jeē vāha máá ró jijnáhan ró cúu jeē ni cáhán rī súcuan. Chi nasūu jéē nducú rí casī rī jeē quijnáhan ró, chi

sa suhva cúní rī jeē caca yñíhún ró te nune ró cuajniñu cutú ró núu maá Jitoho yō.

36 Te núu ñin tēe íyó sēhe síhí de, te núu cuayñi i, te núu jéni ni de jeē vāha ga jeē quijnáhan i, núu súcuan te na sáha de jeē jéni ni de, te cuáha de jnūhun quijnáhan i, chi nasūu cuéchi cúu. 37 Te núu ñin tēe ni cundaā ni de jeē cóndee sēhe síhí de súcuan-ni, jeē ma cuáha de i vēsú fuerza jícan ñayuu i, núu súcuan te cuu quendōo i nájnūhun cúní de, chi jeē vāha sáha de. 38 Núu súcuan te tēe jéhe jnūhun quijnáhan i, vāha sáha de. Te tēe tu jéhe jnūhun, chi vāha ga sáha de.

39 Te ñahan ní quijnáhan, chi yñi ña ndaha yñi ña níni jeē técu de. Te núu je ni jíhī yñi ña, yūcuán na te je ni cuu libre ña jeē quijnáhan tucu ña jín na-ni tēe cúu ni ña, te núu tēe cándije nuū Jitoho yō cúu de. 40 Te jéni ni rī jeē ndetū gā coo ña te núu quendōo ña súcuan-ni. Te suni jéni ni rī jeē jín Espíritu Yaā Dios cúu jeē cahán rī.

Siquī cūñu ni sócō nuū ídolo

8

1 Te vijna te na cáchi rī siquī cūñu ni sócō nuū ídolo. Ndaā chí tāca yó jéni ni yō jeē maá yó cúu jeē jiní ndese cúu. Te tāca jéē jiní yō ún, chi ndúcú sáha jeē cundúxí yó. Te sa suhva jeē cundáhú ni yō jnáhan yó, sáha un jéē íje i jín jnúhun ya. 2 Núu na-ni ñayuu jéni ni i jeē jiní vāha i, te tuú chí ná tu cuni cuiti i nájnūhun cánuú cuni i. 3 Te sa suhva ñayuu jeē maní i jín Yaā Dios, máá i cúu jeē jetáhú yá.

4 Núu súcuan te na cástūhun rí siquī cúñu jeē ní casocō ñayuu nuū ídolo. Ndaā chí jiní yō jeē tāca ídolo ñayīvi, tú ndaā cuiti. Te tú na inga yaā iyó, chí máá ñin-ni Yaā Dios. 5 Te ñayuu chí cájeni ni i jeē iyó táca yāā ini andiví jín ñayīvi, chí cácahān i jeē iyó ndije cuehē yaā i jín jítoho i. 6 Te nuū máá yó chí ñin-ni Yaā iyó, jeē cúu Tátá yō Yaā Dios. Te máá yá ni sáha tāca jéē iyó, te cuenta máá yá cúu yó jijnáhan

yó. Te suni íyó ñn-ni Jitoho yō Jesu-cristo, te nde nuū maá yá vēji tāca jēē iyó, te suni maá yá ni sáha yóhó.

⁷ Te ñayuu cácanđije, chi tú ndihi i jíní jnūhun yáha. Chi sava i ni cacān i ni chiñúhún i ídolo nde ná tu candije i. Te nde vijna núu cáyeji i cūñu ún te sáha i cuenta jeē ni sócō nuū ídolo cúu. Te siquī jeē ná tu ije i jín jnúhun Yaā Dios, te jéni ni i jeē cujnehén ánuá i sáha cūñu jeē ni sócō nuū ídolo ún. ⁸ Te ndaā chi nasūu jēē yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quéndō vāha ga yō nuū Yaā Dios. Te núu tu yéji yō, ni tu sáha jeē quéndō ndáhú gá yō nuū yā. ⁹ Te vēsú tú ni ñn jési jeē ma cúu caji rō cūñu ún, te coto rō jnáhan ró jēē ná tu ije jín jnúhun ya, te ma sáha ró jēē suni caji i jeē jéni ni i jeē cuēchi cúu. ¹⁰ Vāha ga ma cáji rō núu súcuan, chi sanaa te hermano rō jeē ná tu ije jín jnúhun ya, coto de róhó jēē yéji rō ini vehe ídolo, chi jíní vāha ró jēē tú na vé sáha. Te súcuan te sáha ró jēē cájni ni de jeē suni caji maá de cūñu jeē ni sócō nuū ídolo, vēsú jéni ni de jeē cuēchi cúu. ¹¹ Te súcuan stíví ró anuá hermano rō jeē ná tu ije jín jnúhun ya, vēsú jíní vāha maá ró jeē tú na vé sáha jeē cáji rō. Te tú vāha sáha ró, chi suni jehē maá de ni jihí Cristo. ¹² Te núu súcuan stíví ró anuá hermano rō jeē ná tu ije jín jnúhun ya, núu súcuan te siquī Cristo cúu jeē sáha ró cuéchi. ¹³ Núu súcuan te núu cūñu un sáha jeē quíví hermano rī cuēchi, te ma cáji cuiṭi ga rī cūñu ún, návāha ma sáha rī jeē quíví de cuēchi.

Siquī jeē iyó derecho tēe cácuu apóstol

9

¹ Te maá rí chi jíca libre rī, te íyó derecho rī siquī jeē cúu ri apóstol, tēe ni tají yá scāca jnūhun ya. Chi ni jito ri nuū maá Jítoho yō Jesús, te maá ró jijnáhan ró cácuu jniñu jeē ni sáha ri jeē ni squíví ri rohó ndaha Jítoho yō. ² Te núu sava ga ñayuu tu jétáhú i jeē cúu ri apóstol, te nuū maá ró chi suu

cúu ndije ri. Chi siquī jeē ní scandije ri rohó jijnáhan ró, te jeē yúcuan cácuu ró prueba jeē steén jeē ndíso jniñu ri cúu ri apóstol nuū maá Jítoho yō.

³ Te jnūhun yáha cáhán rī jehē maá rí nuū ñáyuu cácahān siquī rī. ⁴ Achí rí: Iyó derecho rī caji rī coho ri jeē cájēhe ñayuu núu cúní rī. ⁵ Te suni íyó derecho rī núu jeē cúní rī condeca ri ñn hermana candije cuu ñasihí rí, caca ña jín rí, nájñūhun íyó ñasihí Pedro jín táca gá apóstol jín tēe cácuu ñani maá Jítoho yō. ⁶ ¿Chí cájeni ni rō jeē maá rúhū-ni jín Bernabé tú na derecho rī jeē stóo ri jniñu cása ha ri jeē cótecu rī, návāha nune ga rī nacani ri jnūhun vāha ya, chí naún? ⁷ ¿A íyó soldado jeē técu de xūhún vehe de? ¿A íyó tēe jeē jítu uva te tu yéji de ndehē ún? ¿A íyó tēe jeē ndíto lanchi te tu jíhi de leche tī? Tú cuiṭi. ¿Te á suni tu íyó derecho rī cotecu rī siquī jnúhun ya naún? ⁸ Te ma cáni ni rō jeē tāca jēē cahán rī yāhá, máni maá jēē cácahān ñayuu ñayíví cúu. Chi nde maá ley yā jeē ni jēhe ya nuū Moisés, cáhán súcuan. ⁹ Chi cáhán nuū tútu ley yā: Ma chúhun ró ñunu yuhu stíquī, quiṭi jéxín trigo, achí. Te ndaā chi nasūu máni siquī stíquī cúu jeē ni cáhán yā súcuan. ¹⁰ Chi suni siquī maá yó ní cahán yā. Chi ley un ní jēhe ya jeē vāha maá yó, chí steén jeē tēe jítu jín tēe jéxín trigo cánuú jeē nihín de sava un quíví ndutútú. ¹¹ Te suni súcuan ruhū jijnáhan ri jeē ní cataji ri jnūhun Espíritu ini anuá rō, ¿te á véyí cúu jín ró núu nastútú rí jeē cótecu rī nuū rō? ¹² Te núu sava ga tēe cásteén nuū rō, íyó derecho de cacān de nuū rō, te nagā ni cuu ruhū jijnáhan ri jeē ma cóo derecho rī cacān rī.

Te tu ní cájicān rī derecho un, chi sa suhva ni jendeyí ni rī coto maá rí jeē cáji rī, návāha ma cási rī jeē cáca jnūhun vāha Cristo. ¹³ Te cájini rō jeē sutū ni cajejniñu ini templo, ni cacotecu de siquī jeē ní casocō ñayuu ini templo. Chi sutū ni cajejniñu nuū altar nuū ní casocō i quiṭi, suni ni cayejí de sava quiṭi ún. ¹⁴ Te suni súcuan

ni ndacu máá Jítóho yō jniñu jeē téé cānacani jñūhun jeē jnáma ya yohó, siquī jniñu un níhīn de jeē cótecu de. ¹⁵ Te ruhū tu ní jícán cuiti rī derecho rī yāhá, te suni nasūu jéē téé ri jñūhun yāha návāha cuāha ró núu rī jijnáhan ró. Chi jéni ni rī jeē vāha ga núu na cúu rī nasūu jéē quíhin ri jeē cuāha ró, chi casi jeē cúsi ni rī scāca ri jñūhun ya súcuan-ni.

¹⁶ Te tú vāha núu sátéyí rí maá rí siquī jeē nácani ri jñūhun jeē jnáma ya yohó. Chi ñin jeē ní tejniñu ya ruhū cúu, te cánuú squícu ri. Chi nacā ndahú cúu ri te núu tú nacani ri jñūhun ya. ¹⁷ Te núu jeē cúu ni maá rí sáha ri nuú, yūcuán na te cuu cacān rī yāhu ri. Te tuú chi cánuú sáha ri, chi máá Yaā Dios ni tee ya jniñu siquī rī. ¹⁸ Núu súcuan te yāhu ri cúu jeē cúsi ni rī jeē súcuan-ni nácani ri jñūhun jeē jnáma ya yohó, te tu jícán rī derecho rī jeē cotecu rī siquī jeē nácani ri jñūhun ya.

¹⁹ Chi vēsú tú ni ñin ñayuu ndácu jniñu nuū rī, te ni sáha ri maá rí mozo nuū tācá i jeē nácani ri jñūhun nuū i, návāha nihīn rī cuehē i candíje i Cristo. ²⁰ Núu íne ri jíin jnáhan ri hebreo te sáha ri nájnūhun cásáha i, návāha cuu scándíje ri i. Chi násáha ri maá rí nájnūhun téé cáyihī chīji ley Moisés, návāha cuu scándíje ri i jeē cáyihī i chīji ley un, vēsú tuá yíhi ri chīji ley un. ²¹ Te suni násáha ri maá rí nájnūhun ñayuu tu cáyihī chīji ley Moisés, návāha cuu scándíje ri ñayuu ún. Te vēsú súcuan te yíhi ri chīji ley Yaā Dios, chi suu cúu ley Cristo jeē squícu ri. ²² Te núu íne ri jíin ñayuu jeē ná tu ije jíin jñūhun ya, te sáha ri maá rí nájnūhun jeē ná tu ije ri jíin jñūhun ya, návāha cuu scándíje ga rī i. Núu súcuan te násáha ri maá rí núu ndese cāndāa tāca ñayuu, návāha tācá-ni modo un te cuu scándíje ri sava i. ²³ Tāca yāha sáha ri jeē siquī jñūhun jeē jnáma ya yohó, návāha suni nihīn rī tahū jeē ndíso jñūhun ya.

²⁴ Je cájini rō jeē téé cájину carrera, jendaá chi ndihī de cájину, te ñin-ni de cūndeyí níhīn premio. Te suni

súcuan nducú ndéyí máá ró squícu ró, návāha nihīn rō premio nuū yā. ²⁵ Te tāca téé cúní cūndeyí siquī ñin deporte, chi cáscuáha de te cāndito de máá de. Súcuan cásáha de návāha nihīn de ñin premio jeē cúu corona ndaha yújnu jeē náā yachī. Te máá yó chi sa suhva cānducú ndéyí yó návāha nihīn yō ñin premio jeē ma náā cuiti. ²⁶ Te máá rí suni nducú ndéyí rí nájnūhun téé cájину, te tu nducú ndéyí cāha rí. Te sáha ri nájnūhun téé cácajnáhan juego jeē tu jéhe iyú de, chi queé jniñu sáha ri. ²⁷ Chi sa suhva stóho ri yiquí cúñu rī, te stíhví ni rī maá rí squícu ri. Chi vēsú ni stíhví ni rī inga ñayuu jeē nducú ndéyí i, te núu tu nducú ndéyí máá rí te snāā rī premio rī.

Siquī jeē ma chíñúhún i ídolo

10

¹ Hermano jijnáhan ró, cúní rī jeē na jécūhun ni rō ndese ni cajica jíi yō jenahán. Chi ndihī de ni cajica chīji vicō jeē ni stéén ichi nuū de, te ndihī de ni cayāha mēhñú ndute Mar Rojo jeē ní cusñin, ni nune ichi. ² Súcuan cúu jeē ní canduu ñnuú ndihī i jíin Moisés, chi ni candiquīn i de chīji vicō jíin mēhñu mar. ³ Te ndihī i chī ñnuú-ni ni cayejī i alimento jeē ni jéhe máá Espíritu. ⁴ Te suni ndihī i ni cajihī ndute jeē ni jéhe Espíritu. Chi ni cajihī i ndute jeē ní cane jicā cáva nuū ní cajica cuu i. Te Cristo cúu nájnūhun cava un jéé jéhe ya ndute cotecu yō ní cáni. ⁵ Te vēsú súcuan te cuehē i ni cunihni ni i, te tu ní cúsi ni Yaā Dios jíin i, te jeē yúcuan ní cajihī i nuū ñúhun téhé.

⁶ Te tāca jéé ní cuu ún, ñin ejemplo cúu nuū yō, návāha ma ndíyo ni yō tāca jéé neé, nájnūhun ni candiyo ni ñayuu ún. ⁷ Te ma chíñúhún ró ídolo, nájnūhun ni casáha sava i. Chi súcuan cáhán nuū tútu i: Ni cacucōo ñayuu ún, ni cayejī i ni cajihī i vico ídolo, te ni ndocuiñī i ni cajita jéhe i, áchí. ⁸ Te ni ma cáca jnéni ró nájnūhun ni casáha sava i, te ni cajihī ocō unī mil i jeē ñin quivī-ni. ⁹ Te ni ma sáha ró jniñu jeē squití ni rō Jítóho yō, nájnūhun ni

casáha sava i, te ni cajihī i jeē ní catuu coō i, ni sáha ya. ¹⁰ Te ni ma cahán sōó ró siquī Yaā Dios, nájnūhun ni cacahān sōó sava i, te ni cajihī i jeē ní jehni ndajéhé yā i.

¹¹ Te tāca jeē ní cuu ún, chi ñn ejemplo cúu nuū yō. Te súcuan yósó nuū tútu návāha na chúhun vāha ni maá yó. Chi cácuu yó ñayuu cátecu quivī cuándihī ñayivī. ¹² Núu súcuan te róhó jeē cájeni ni rō jeē cáhīn ñhin ró jēē ma sáha ró cuéchi, coto má quivī ró cuéchi. ¹³ Chi máni iyó jēē nducú squivī róhó cuéchi, te inuú-ni cándoho ró súcuan nde jíin táca gá ñayuu. Te cuu cucáhnū ni rō Yaā Dios jeē ma cuáha ya jnūhun jeē vihyá gā coto ndee jexeén róhó vēsú jeē cúu cundeyí ró jíin. Chi sa suhva núu vēji jeē nducú squivī róhó cuéchi, te chindéé ñáhán yá rohó quenda ró te cundeyí ró siquī.

¹⁴ Ñánī mánī, ma chiñúhún cuiti rō ídolo núu súcuan. ¹⁵ Cáhán rī jíin ró jēē cúu ró ñayuu cájecūhun ni, te na sáha ró cuenta núu ndaā jnūhun cáhán rī. ¹⁶ Máá copa iī jeē cájicān tahu yō jehē, suu cájhi cáhnū yó jēē steén yō jeē inuú cúu ndihī yó, chi ni jeti ñiñī Cristo jeē siquī yō ná ni jihī yā jicā cruz. Te pan jeē sacuéchí yó cáyeji cáhnū yó, stéén jeē inuú cúu ndihī yó siquī jeē ni jéhe Cristo yiqui cúñu yā ni jihī yā jehē yō. ¹⁷ Te vēsú cuehē yō iyó, te ñn-ni ñayuu cácuu yó, chi ñn-ni pan un cáyeji cáhnū yó siquī jeē cácandíje yó.

¹⁸ Condēhe ró ndese casáha ñayuu Israel. Tāca téje jeē yéji quiti jeē ni sócō nuū yā, chi inuú-ni cúu ndihī de siquī jeē cáyeji de jeē ni sócō ún. ¹⁹ Núu súcuan te cáhán rī jeē tu ndé jéjñiñū ídolo, ni tu jéjñiñū cúñu jeē ni sócō nuū ídolo, chi inuú cúu jíin táca gá cúñu. ²⁰ Te suni cáhán rī jeē ñayuu tu cájini jnūhun Yaā Dios, núu cásocō i, te nuū tachī cásocō i, nasūu núu Yaā Dios. Te tu cúní rī jeē cuajniñū ró núu tachī. ²¹ Ma cúu coho ró copa maá Jítoho yō te núu cájhi ró jēē ni sócō nuū tachī. Te ma cúu caji rō nuū mesa Jítoho yō

te núu cáyeji rō jeē ni sócō nuū tachī. ²² Ma quivī nduu yō súcuan jíin táchī, návāha ma cucuñī Jítoho yō jíin yó. ¿Chí téyí gá maá yó vēsú maá yá jeē ma cúu stóho ya yohó, cájeni ni rō, chí naún?

Ndihī chi sáhayó jíin jnūhun cúndáhú ni

²³ Te ndaā cúu jeē cácahān jeē ndihī-ni jniñu iyó váha sáha yó núu ndese cúní yō. Te tuú chi nasūú ndihī sáha jeē quéndō vāha ánuá yō. Ndihī chi cuu sáha yó, te vēsú súcuan te nasūú ndihī sáha jeē ije jnáhan yó jíin jnūhun ya. ²⁴ Chi cánuú sáha yó jēē váha jnáhan yó, nasūu máni maá jēē váha maá yó.

²⁵ Cuu caji rō ndihī-ni cúñu cúyāhu nuū yáhu, te ma cájnūhun ró ni ma cáni ni rō núu jeē ni sócō nuū ídolo cúu. ²⁶ Chi cuenta maá Jítoho yō cúu ñayivī jíin ndivii jeē iyó ini, te cuu cuajniñū yó.

²⁷ Te núu ñn tēe tu cándíje, cana de róhó caji rō jíin de, te núu cácuu rō quihīn rō, núu súcuan te caji rō tāca jēē cáni de nuū rō. Te ma cájnūhun ró ni ma cáni ni rō núu jeē ni sócō nuū ídolo cúu. ²⁸ Te núu cachi ñn i nuū rō jeē cúñu ni sócō nuū ídolo cúu, yūcuán na te ma caji rō, chi siquī jeē jéni ni i jeē cuéchi cúu, te tu cúní rō sáha ró jēē quivī i cuéchi. ²⁹ Te súcuan cáhán rī siquī jeē inga i cájeni ni i jeē cuéchi cúu, te nasūu jēē súcuan cájeni ni maá ró.

Te sanaa te cahān ñn ró: ¿A tu iyó libre rī caji rī jeē cúní maá rí, vēsú cájeni ni inga i jeē cuéchi cúu? ³⁰ ¿Te núu nácuatáhu rí nuū Yaā Dios te yéji rī, te najehē cacahān i siquī rī jeē yéji rī? achi rō. ³¹ Tuú chi ndihī jeē sáha ró, vēsú jeē caji rō chí jēē coho ró, chí na-ni jniñu sáha ró, ndihī na sáha yñúhún ró jíin Yaā Dios, návāha cuni ñayuu jeē luu cújéhnū ya. ³² Te ma sáha ró jniñu jeē squivī ró ñayuu nuū cuéchi, cúu ñayuu hebreo, cúu ñayuu táca nación jeē tu jíní jnūhun ya, cúu ñayuu cácandíje Yaā Dios. ³³ Te ruhū chí ndúcú rí jeē na cúsiñ ni tāca ñayuu

jiín táca jniñu sáha ri. Tu ndúcú rí jeē váha máá-ni ri, chi sa ndúcú rí sáha ri jeē váha cuehē ñayuu, návāha cācu i.

11

¹ Te na ndácu ró rúhū jijnáhan ró, nájnūhun ndácu máá rí Cristo.

Siqui ndese cánuú sáha ñahan cándutútú

² Vāha cásáha ró, hermano, jeē niní cáncūhun ni rō ruhū, te cándihvī ni rō jiín táca jniñu jeē ni steén rī nuū rō. ³ Te cúní rī jeē na jécūhun ni rō jeē Cristo cúnuú yá nuū tāca té. Te tēe cúnuú de nuū ñasihí de. Te Yaā Dios cúnuú yá nuū Cristo. ⁴ Núu ñn tēe ñūhun de lélú te jícán tahu de chí nácani de jnūhun nuū ndutútú ñayuu cáncandíje, núu súcuan te jéhe de jnūhun canu máá de. ⁵ Te sa núu ñn ñahan tu ndési xinī ña te jícán tahu ña chí nácani ña jnūhun, núu súcuan te jéhe ña jnūhun canu máá ña, chi ñn-ni cúu un núu ní sáte xinī ña. ⁶ Chi núu tú casi ña xinī ña, váha ga na sáte ña ixi ña núu súcuan. Te núu cúcanu ña jeē sáte ña ixi ña chí jéē sáte ña ña, te na cási ña núu súcuan. ⁷ Te tēe chi ma cási de xinī de, chi máá de cúu muestra jeē steén ndese cúu Yaā Dios jeē cujéhnua. Te ñahan chi steén ña jeē cujéhnua tēe. ⁸ Chi ná ni sáha ya tēe, te nasūu jiín yiqui ñahan ni sáha ya, chi sa suhva jiín yiqui téte ni sáha ya ñahan. ⁹ Te ñahan chi ni cuvāha ña jeē siquí téte, nasūu téte jeē siquí ñahan. ¹⁰ Te jeē yúcuan cánuú jéē cóndesi xinī ñahan, te suu steén jeē cujéhnua tēe, chi suni cándehé ndajéhé yā ndese sáha ña. ¹¹ Te vēsú súcuan te yóhó jéē candíje yó, chí jíní yō jeē tu íyó téte núu jeē tu íyó ñahan, te tu íyó ñahan núu jeē tu íyó téte. ¹² Chi vēsú ni sáha ya ñahan jiín yiqui téte, te vijna cácu tēe chíji ñahan, te máá Yaā Dios cúu jeē sáha táca-ni.

¹³ Na sáha máá ró cuenta ¿á íyó váha núu tu ndési xinī ñahan te jícán tahu ña nuū Yaā Dios? ¹⁴ Chi sáha yó cuenta jeē ini ñayiví yáha, núu cáni ixi tēe te cúcanu de sáha. ¹⁵ Te ñahan chí sa váha jító ña te núu cáni ixi ña, chí suu ni jéhe ya jeē cóndesi xinī ña. ¹⁶ Te núu ndé ñn

ñayuu cuní i cahān i siquí jnūhun yáha, te ruhū jiín táca grupo ñayuu cáncandíje nuū Yaā Dios, tú na inga costumbre jejnūhún rí siquí jnūhun yáha.

Jeē castívi i siquí Cena Jitoho yō

¹⁷ Te íyó inga jnūhun cánuú cahān rī jiín ró, chí tu cúu cahān rī jeē váha cásáha ró. Chi nuū cándutútú ró te tu sáha jeē quéndōo váha ga rō, chí sa jeē castívi ró. ¹⁸ Xihna jnūhun yáha cáhān rī, jeē nihín rī jnūhun jeē nuū cándutútú ró te cácusín ni rō. Te jéni ni rī jeē ndaā cúu. ¹⁹ Chi níni coo sava ró jéē cusín ni, návāha natūu ndé-ni cúu jeē cáncandíje váha mēhñu ró. ²⁰ Te jeē cácusín ró súcuan nuū cándutútú ró, te nasūu cena máá Jitoho yō cúu jeē cáyeji rō núu súcuan. ²¹ Chi núu cáyeji rō, te táca ñn ñn ró cúní caji xihna gā vēsú jnáhan ró. Te súcuan te sava ró tu cánihñ, te cájii sōco, te sava ró cánajini jeē cájihi cuehē. ²² ¿A tu cánevāha ró vehe nuū caji rō coho ró, chí naún? Chi jeē casáha ró súcuan cúu jeē tu íyó yíñuhún ró ini vehe nuū cándutútú ñayuu cáncandíje Yaā Dios, chí cásáha ró jéē cáncuanu ñayuu jeē tú na vé névāha. ¿Ndese cahān rī jiín ró núu súcuan? ¿A cahān rī jeē váha cásáha ró? Tuú chí nasūu jéē váha cúu jeē casáha ró súcuan.

Siqui jeē ní jequin Jitoho yō Cena yā (Mt. 26.26-29; Mr. 14.22-25; Lc. 22.14-20)

²³ Chi jnūhun yáha jéē ní nastéén rī nuū rō, chí nuū máá Jitoho yō ni nihín rī: Jeē máá jecuáa jeē ní nastúu de Jitoho yō Jesús, te ni quihin ya pan. ²⁴ Te ni nacuatáhú yá, te ni tahu cuéchi yá, te ni cahān yā jiín téte cáscuáha jiín yá: Quihin te caji rō jijnáhan ró, chí yáha cúu yiqui cúñu rī jeē ni sócō rī jeē siquí rō. Te níni caji rō súcuan jeē cáñuhun ni rō ruhū jeē ni jíhī rī jehē rō. Achí yá. ²⁵ Te suni súcuan ni quihin ya copa ná ni cuu ni cuxíni ya jiín de, te ní cahān yā: Jeē ñūhun copa yáha cúu niñi rī jeē sácútu contrato jeē jeē jnáma ri ñayuu. Te táca jínu jeē cájihi ró, te nucūhun ni rō ruhū. Achí yá. ²⁶ Chi táca jínu jeē cáyeji

rō pan un te cájili ró copa un, súcuan cástéén rō jeē ní jíhī Jitoho yō jehē yō. Te súcuan na sáha ró ndé quivī ndíji ya.

Ndese caji yíñúhún i Cena yā

²⁷ Te núu na-ni ñayuu caji i pan un chí coho i copa Jitoho yō ún, te núu tu sáha yíñúhún i nuū Yaā Dios, núu súcuan te sáha i cuēchi jeē tu íyó yíñúhún i síquī yiqui cúñu maá Jitoho yō jíin síquī niñī yā. ²⁸ Núu súcuan te coto ndee rō maá ró núu íyó ndoo ánuá rō jeē tú cuēchi ró. Te sáa te cuu caji rō pan un te coho ró copa un. ²⁹ Chi núu ñn ñayuu tu yéji tu jíhi yíñúhún i te tu núcūhun ni i jeē yiqui cúñu yā cúu, ñayuu ún chi nihīn i castigo núu na cáji i coho i. ³⁰ Jeē yúcuan cúu jeē iyó cuéhē ñayuu cácuñu jíin jéé ní cacuxí, cáhīyo mēhñu ró. Te sava i je ni cajihi. ³¹ Te núu coto ndee yō maá yó nde ná tu caji yō, te Jitoho yō ma cuáha ya castigo yohó. ³² Te núu Jitoho yō jéhe ya castigo yohó, te súcuan stóho ya yohó návāha ma jnahnú ndetū yō jíin ñáyuu ñayīví.

³³ Nánī mánī, núu súcuan te jeē cándutútú ró jeē cáji rō Cena yā, te condetu ró te caji inuú ró. ³⁴ Te núu ñn ñayuu jíi i sōco, te xīhna gā na cáji i vehe i návāha ma stívi i nuū cándutútú ró. Te súcuan te ma cuáha ya castigo i. Te quivī jécondēhe rí rohó te cachi rī ndese coo sava ga jniñu.

Siquī tāca táhū jeē jéhe Espiritu

12

¹ Hermano, cúní rī jeē na jécūhun ni rō síquī tāca táhū jeē jéhe Espiritu nuū yō, suu tāca modo jejniñu ñn ñn yó núu Yaā Dios.

² Te cájini rō jeē ná ni cuu ró ñáyuu ná tu candíje, te ni cacondihvī ni rō ni cachiñúhún ró ídolo ñihín. ³ Te vijna te na jécūhun ni rō jeē núu ndé ñáyuu cahán ndevāha i síquī Jesús, te nasūu jíin poder Espiritu Yaā Dios cúu jeē cahán i súcuan. Te ni ñn i ma cúu cahán i jeē Jitoho i cúu Jesús, te núu tu ndéé poder Espiritu Santo ini i.

⁴ Te sñn sñn tahū jéhe ya jeē cua-jniñu ñn ñn yó núu yā, te ñn-ni máa

Espiritu cúu jeē jéhe. ⁵ Te sñn sñn jejniñu yó, te nuū maá ñn-ni Jitoho yō jejniñu yó. ⁶ Te sñn sñn modo sáha yó jniñu ya, te ñn-ni Yaā Dios cúu jeē sáha jniñu un jíin yó. ⁷ Te nuū ná ñn ná ñn yó ní jéhe Yaā Dios tahū jeē sáha Espiritu yā jíin yó, návāha na sáha yó jéé ije jnahan yó jíin jnūhun ya. ⁸ Chi sava yó ní canihīn tahū jeē ndichí cáhán yō jnūhun ya, sáha máa Espiritu. Te sava ga yō ni canihīn yō jeē cúu jécūhun vāha ni yō te castūhun yó, te suni máa Espiritu sáha. ⁹ Te nuū sava ga yō ni jéhe ya tahū jeē cúu cándíje nihīn yó jéé sáha ya jeē jicán yō, te sava ga yō cúu sáha yó jéé ndúvāha ñayuu cácuñu, te suni máa Espiritu sáha. ¹⁰ Te sava ga yō cúu sáha jniñu jéhnū jíin fuerza Yaā Dios. Te sava ga yō cúu nácani jnūhun ya. Te sava ga yō ni sáha ya jeē nácuni yō tāca jnūhun, núu vēji nuū Espiritu yā chí tuú. Te sava ga yō ni nihīn tahū jeē cahán yō tijni yuhu jeē tu jécūhun ni yō. Te sava ga yō cúu nacastūhun yó jnūhun ni cahán jnahan yó jíin inga yuhu ún. ¹¹ Te tāca táhū yáha, chí ñn-ni máa Espiritu sája, te sñn sñn jéhe ya nuū ñn ñn yó, ndese nújnahan ni maá yá.

Ndihī yó cúu nájñūhun ñn na yiqui cúñu

¹² Chi nájñūhun ñn yiqui cúñu iyó cuéhē parte, súcuan cúu yó jíin Cristo jeē cúu yó nájñūhun yiqui cúñu yā, chí ñn na cúu yó jíin yá. Te vēsú cuehē parte cácuu yó te ñn-ni cúu yó, nájñūhun ñn yiqui cúñu jeē iyó cuéhē parte. ¹³ Chi ñn na ni canduu yó jíin yá ni sáha ñn-ni máa Espiritu ná ni cajendute yó. Súcuan cúu vēsú cúu yó ñáyuu hebreo chí ñáyuu griego, vēsú mozo jeē ní jeen ñayuu chí téé sájñiñu cuenta maá. Te ndihī yó chí ñn-ni Espiritu ni canihīn yō.

¹⁴ Te ñn yiqui cúñu chí nasūú ñn-ni parte cúu, chí sa cuehē parte cúu. ¹⁵ Te núu jehē cahán: Nasūu cuenta yiqui cúñu cúu ri, chí nasūú ndaha cúu ri, te tuú chí parte yiqui cúñu cúu nahín. ¹⁶ Te núu sōho cahán: Nasūu cuenta yiqui cúñu cúu ri, chí nasūu

tinūu cúu ri, te tuú chi parte yiqui cúñu cúu nahín. ¹⁷ Núu ní yiqui cúñu yō cúu tinūú, ¿te ndese cuni sōho yó núu súcuan? Te núu ní yiqui cúñu yō cúu sōho, ¿te ndese cuaan yó xícō núu súcuan? ¹⁸ Te Yaā Dios ni chujnáhan ya ñn ñn parte yiqui cúñu, nájnūhun cúní yā jeē coo. ¹⁹ Chi núu ñn-ni parte cúu ndíhi, te nasūú ñn ní yiqui cúñu cúu núu súcuan. ²⁰ Te tuú chi cuehē parte iyó, te ñn-ni yiqui cúñu cúu.

²¹ Te ni ma cúu cahān tinūu jíin ndaha: Tu jíni ñúhún rí rohó. Te ni xiní ma cúu cahān jíin jéhē: Tu jíni ñúhún rí rohó. ²² Chi sa suhva tāca parte yiqui cúñu jeē jéni ni yō jeē núu ga fuerza, suu cúu jeē cánuú gá. ²³ Te tāca parte yiqui cúñu jeē jéni ni yō jeē tu cáa vāha, suu cúu jeē yucún gá chūhun yó sahma. Te parte jeē tú-ni luu cáa, sa vāha ga jési yō. ²⁴ Chi parte jeē lúu cáa, tu cánuú jéé condihyū. Chi súcuan ni chujnáhan Yaā Dios yiqui cúñu, jeē yucún gá ndító yó jéé tu cáa luu. ²⁵ Súcuan ni sáha ya návāha ma cusín tāca parte yiqui cúñu, chi sa chindéé ñájnáhan vāha jíin jnáhan. ²⁶ Te núu jétú ñn parte yiqui cúñu, te suni ní cáhnu-ni jétú. Te núu ñn parte ndító yucún yó, te suni ndíhi-ni parte quéndōo vāha.

²⁷ Te róhó jíjnáhan ró chi nájnūhun yiqui cúñu Cristo cácuu ró, chí ñn na cúu yó jíin yá. Te ná ñn ná ñn ró cúu ñn ñn parte yā. ²⁸ Núu súcuan te sín sín jniñu ni jēhe Yaā Dios nuū tāca ñáyuu cácañde jeē cácuu i nájnūhun ñn ñn parte yā: Te suu ñn parte yā cúu tācá apóstol jeē ní jeni ya xīhna gā jeē scáca de jnūhun ya. Yūcuán na te jeē uú, tēe cánacani jnūhun ya, te jeē uní, tēe cástéén. Yūcuán na te ñáyuu casáha jniñu jéhnu jíin fuerza yā, jíin ñáyuu casáha jeē ndúvāha ñáyuu cácuu, jíin ñáyuu cachíndéé ñájnáhan, jíin ñáyuu cándiso jniñu, jíin ñáyuu cácañ sín sín yuhu jeē tu cájecūhun ni. ²⁹ ¿A ndíhi yó cácuu apóstol, chí naún? ¿A ndíhi yó cánacani jnūhun? ¿A ndíhi yó cástéén? ¿A ndíhi yó cuu sáha jniñu jéhnu? ³⁰ ¿A ndíhi yó cuu sáha

jeē ndúvāha ñáyuu cácuu? ¿A ndíhi yó cuu cácañ sín sín yuhu? ¿A ndíhi yó cuu nacastūhún yuhu ún, chí naún? Tuú chí sín sín tahū ni canihín yō. ³¹ Núu súcuan te na cóndihvī ni rō cacān rō jeē cuáha Yaā Dios tahū cánuú gá nuū rō. Te vijna te na stéén rī nuū rō ñn jeē váha ga nuū tāca gá tahū ún, suu jnūhun cúndáhú ni jnáhan.

Jnūhun jeē cundáhú ni jnáhan

13

¹ Vēsú núu cuu cahān yō tijni yuhu jeē cácañ ñáyuu chí jéé cácañ ndajéhé Yaā Dios, te núu tu cúndáhú ni yō jnáhan yó, te jnūhun cahān yō un cúu nájnūhun ñn tambor jeē ndaxín cáján chí ñn platillo jeē ndaxín cáxín sánee sōho ñáyuu. ² Te vēsú cuu nacani vāha yó jnúhun ya, te cuu jecūhun ni yō tāca jnúhun sáhi yá jíin tāca jnúhun ndíchí, te núu tu cúndáhú ni yō jnáhan yó, te tu ndé jéjníñu cuíti yō núu súcuan. Te vēsú cuu candíje téyí yó jeē nde cuu cahān yō jeē cújiyo yucu, te núu tu cúndáhú ni yō jnáhan yó, te tu ndé jéjníñu cuíti. ³ Te vēsú na sája yó ndíhi jeē névāha yó cuu ñáyuu ndahú, te vēsú núu cuáha yó jnúhun cahmu ñáyuu yohó jéé siquí jnúhun ya, te núu tu cúndáhú ni yō jnáhan yó, te tu ndé jéjníñu cuíti.

⁴ Ñáyuu cundáhú ni chí iyó paciencia jíin jnáhan, te iyó mání ni, te tu cúcuésún ni. Te tu sándúxí, te tu sátéyí máa. ⁵ Tu sájéé ni, tu ndúcú jéé cúu máa-ni, tu quítí ni, tu ñúhun ni jnūhun quítí ni. ⁶ Tu cúsiñ ni jíto jniñu néé casáha jnáhan, chí sa cúsiñ ni jíin jniñu vāha. ⁷ Ñáyuu cundáhú ni chí ndíhi jéhnde ni ndoho jéhé jnáhan, te tu jécuiñí jeē candíje jnáhan, jíin jéé ñúhun ni jeē squícu jnáhan, jíin jéé jéndeyí ni jíin jnáhan.

⁸ Jnūhun cúndáhú ni chí ma náa cuíti. Te quiji quiví jeē tuá nacani i jnūhun, ni tuá cahān i tijni yuhu, ni tuá jíni ñúhún jnūhun ndíchí. ⁹ Chi tu jíni vāha vāha yó vijna, te jnūhun cánacani yó suni jecu-ni cúu. ¹⁰ Te núu

na quiji quiṽi jeē cúni yō ndihí, yūcuán na te tuá coo jeē jiní yō jecu-ni.

¹¹ Ná ni cuu yó súchi lúli te ni cahān yō, ni jeni ni yō, ni jecūhun ni yō nájnūhun sūchi lúli. Te ná ni jehnu yó te ni stóo yó modo sūchi lúli. ¹² Te suni súcuan, jecu-ni jécūhun ni yō vijna, nájnūhun jeē jíto yó núū ñn espejo jeē tú ndijin vāha. Te cúcuéé gá te jecūhun cáji ni yō ndihí. Te vijna chí jecu-ni jiní yō, te cúcuéé gá te cuni vāha yó ndese Yaā cúu ya, nájnūhun jiní vāha ya yohó ndese ñayuu cúu yó. ¹³ Núu súcuan te íyó únī jnūhun jeē quéndōo cutú ní cáni: Jeē candíje nīhin yó jéē squícu ya jeē ni jéjnūhun ya, jeē cócuhun ni yō tāca jéē vāha coo, jíin jéē cundáhú ni yō jnāhan yó. Te jnūhun cundáhú ni chí jéhnū ndasí gá cúu nuū tāca jéē yāha.

Siquí jeē cácahān i tijni yuhu

14

¹ Na cóndihvī ni rō cundáhú ni rō jnāhan ró, te suni condihvī ni rō cacān rō tāca tahū jeē jéhe Espíritu. Te tahū jeē cánuú gá cúu jeē nácani ró jnúhun ya. ² Chí tēe névāha tahū jeē cahán de tijni yuhu jeē tu jécūhun ni de, chí máá-ni Yaā Dios jiní jeē cahán de, nasūu ñayuu. Chí ni ñn i ma jécūhun ni jeē cahán de. Chí sáha Espíritu jeē cahán de tāca jnúhun yísāhí. ³ Te sa suhva tēe nácani jnūhun ya, chí jíin ñayuu cahán de návāha ije i jíin jnúhun ya, te stíhvī ni de i, te cahán ndeyí ni de jíin i. ⁴ Te tēe jeē cahán tijni yuhu, chí máá-ni de íje jíin jnúhun ya. Te tēe jeē nácani jnūhun ya, chí sa suhva sáha de jeē ñayuu cácaandíje íje i jíin jnúhun ya.

⁵ Nújnahan ni rī jeē ndihí ró cuu cahān rō tijni yuhu jeē tu jécūhun ni rō, te jeē cánuú ndasí gá cúu jeē nácani ró jnúhun ya. Chí jéhnū ga jniñu sáha tēe nácani jnūhun ya vēsú tēe cahán tijni yuhu. Chí núu tú tēe castūhun jnúhun cahán de, te ma cuajniñu jeē íje ñayuu cácaandíje. ⁶ Jeē yúcuan hermano jijnáhan ró, núu na jéé rī nuū rō, te núu cahān rī tijni yuhu jeē tu jécūhun

ni rō, ¿te ndé cuajniñu ún? Te núu na cáhán rī ñn jeē ni stéén yā, chí ñn jeē cútūhva ró jnúhun ndaā, chí ñn jeē nácani rī jnūhun ya, chí ñn jeē steén rī nuū rō, yūcuán cúu jeē cuajniñu.

⁷ Sáha yó cuenta jeē nájnūhun instrumento música, vēsú tu técu, te cuu cata, nájnūhun flauta jíin arpa. Te núu tu jíta sñn sñn nota, ¿te ndese cuni yō na yaa jíta? ⁸ Te núu corneta tu jécú cáji, te ni ñn tēe ma sátūhva de quihīn de guerra. ⁹ Te suni súcuan róhó jijnáhan ró, núu tu cáhán cáji ró jnūhun jecūhun ni ñayuu, ¿te ndese cuni i na vé cahán rō? Chí jnūhun cáhán rō ndíso tachī cuahān jíin. ¹⁰ Te ndaā chí íyó cuéhē yuhu ini ñayiví, te tācá yuhu chí íyó ñayuu jécūhun ni. ¹¹ Te núu tu jécūhun ni yō yuhu cahán ñn tēe, te cúu yó nájnūhun tēe ñuu jicá núu tēe cahán, te suni nájnūhun tēe ñuu jicá cúu de nuū maá yó. ¹² Jeē yúcuan róhó jéē cácu ni ndasí ró nihīn rō tahū jeē jéhe Espíritu, na cácan rō tahū jeē sáha jeē íje ñayuu cácaandíje jíin jnúhun ya.

¹³ Núu súcuan te ñayuu jeē cahán inga yuhu jeē tu jécūhun ni i, na cácan tahú i jeē cuu nacastūhún i yuhu ún. ¹⁴ Chí núu jicán tahú yō jíin inga yuhu, te máá ánuá-ni yó cúu jeē jicán tahú, te tu ndé jéjníñu nuū jeē níjnūní yō. ¹⁵ ¿Ndese sáha yó núu súcuan? Na cácan tahú yō jíin ánuá yō, te suni jíin jéé níjnūní yō. Na cáta yó yaa íi jíin ánuá yō, te suni jíin jéé níjnūní yō. ¹⁶ Chí núu nácuatáhú ró máni jnūhun jeē ní quiji nuū anuá rō te tu jécūhun ni rō, núu súcuan te tēe jíni sōho te tu jécūhun ni, ma cúu nacuatáhú de jíin ró. Chí tu jíiní cuiti de na jnūhun cahán rō. ¹⁷ Ndaā chí vāha nácuatáhú máá ró, te inga de chí tú na vé nihín de jeē íje de jíin jnúhun ya. ¹⁸ Na cútahū rī nuū Yaā Dios jeē cahán gā rī jíin tijni yuhu vēsú maá ró jijnáhan ró. ¹⁹ Te vēsú súcuan te núu íne rī nuū cáyūcu tútú ñayuu cácaandíje, te nújnahan gā ni rī cahān rī uhūn-ni jnūhun jeē jécūhun ni i te stéén nuū i, vēsú jeē cahán rī uxī mil jnūhun jíin inga yuhu jeē tu jíiní cuiti i.

²⁰ Hermano jijnáhan ró, ma cáni ni rō nájñuhun sūchi lúli, chi sa suhva na íje ró jēē jecūhun vāha ni rō. Te coo ró nájñuhun sūchi lúli jēē tu jíní i jniñu néé. ²¹ Te yósó núū tútu ley yā jenahán: Jíin jñuhun cácahān tēē inga yuhu, jíin jñuhun cácahān tēē ñūu jicá, sáha ri jeē cúni sōho ñayuu yáha jñuhun ri. Te ni jíin sūcuan ma sáha i cuenta jñuhun cahān rī, achí máá Jítoho yō. ²² Núu sūcuan te tahū jeē cahán yō tijni yuhu, yūcuan cúu ñin jeē steén poder Yaā Dios nuū ñáyuu tu cácañdije, nasūu núū ñáyuu cácañdije. Te jeē nácani yó jñuhun ya, yūcuan cúu jeē steén nuū ñáyuu cácañdije, nasūu núū ñáyuu tu cácañdije. ²³ Núu sūcuan te núu ndihí ró ñáyuu cácañdije cáhīyo tútú, te tāca ró cácahān sín sín yuhu, te quivicoo ñayuu tu jécūhun ni jíin ñáyuu tu cácañdije, ¿te á má cahán i jeē ní canduu loco rō? ²⁴ Te núu tāca ró cácañdije jñuhun ya, te núu quiví ñin tēē tu cácañdije chí ñin tēē tu jécūhun ni, yūcuán na te nacuni de jeē téē íyó cuéchi cúu de, te coto ndee de máá de jíin jñuhun cácañdije ró. ²⁵ Te nucūhun ni de tāca jēē ní jeni yuhu ni de jíin ánuá de. Yūcuán na te jecuiñí yití de te chíñuhún de Yaā Dios. Te cahān de jeē íne ndije Yaā Dios jíin ró jijnáhan ró.

Siquē jeē yucún yíñuhún na cóo nuū ndutútú yó

²⁶ Núu sūcuan hermano jijnáhan ró: Nuū cándutútú ró te tāca ró coo ñin yaa iī cata ró, chí ñin jñuhun steén rō, chí ñin jñuhun jeē ni sáha Yaā Dios jeē jécūhun ni rō, chí inga yuhu jeē cahán rō, chí jēē nácastūhun ró jñuhun inga yuhu ún. Te ndihí ún na sáha ró návāha ije ñayuu cácañdije jíin jñuhun ya. ²⁷ Te núu cáhīyo tēē cahān inga yuhu, te na cáhán uū de chí úní-ni de, te ná ñin ná ñin de na cáhán. Te suni jíní ñuhún jēē nacastūhún ñin tēē jñuhun ún. ²⁸ Te núu tu íyó téē jeē cúu nacastūhun jñuhun ún, te tēē cácahān inga yuhu, vāha ga ma cahán de nuū cándutútú ró, te na cáhán maá-ni de jíin Yaā Dios. ²⁹ Te suni sūcuan tēē cácañdije jñuhun, na cáhán uū de chí

úní de, te sava ga rō nacani ni rō núu íyó ndáā jeē cácahān tēē ún. ³⁰ Te núu inga tēē néne ni nihín de ñin jñuhun jeē ni steén yā nuū de, núu sūcuan te tēē cáhán na jécuiñí jeē cahán de, návāha cahān inga tēē ún. ³¹ Te sūcuan te ná ñin ná ñin ró cuu nacani ró jñuhun jeē steén yā nuū rō, návāha cutūhva ró te coo ndeyí ni rō. ³² Te tēē cácañdije jñuhun, jíní ñuhún cuatáhú de jeē nácani inga tēē jñuhun te jecuiñí jeē cahán maá de. ³³ Chi Yaā Dios cuní yā jeē coo nayúú méhñu ró, násūu jēē sacā núu cuvaā rō.

Te nájñuhun cácañdije tāca grupo hermano cácañdije, ³⁴ suni sūcuan tāca ñahan cándutútú jíin ñáyuu cácañdije, na cóo nayúú ña. Chí tú vāha jeē cahán ña, chí sa cuatáhú ña nájñuhun cáhán tutu ley yā. ³⁵ Te núu cuní ña cucáhnu ni ña ñin jñuhun, te nde vehe na cáñuhún ña yí ña. Chí jñuhun canu cúu jeē cahán ñin ñahan méhñu núu cándutútú ró.

³⁶ Te na sáha ró cuenta jeē tu ní quenda jñuhun Yaā Dios nuū maá ró jijnáhan ró, te nasūu máá ñin máá ró ní cánihín jñuhun ya. ³⁷ Núu ñin tēē jeni ni de jeē téē nácani jñuhun ya jíin téē névāha Espíritu cúu de, núu sūcuan te na cuáñuhún de jeē jniñu ní ndacu Jítoho yō cúu jeē téē ri yāhá. ³⁸ Te núu tu jétáhú de jñuhun yáha, suni ma cuatáhú yó de.

³⁹ Núu sūcuan, ñání mání jijnáhan ró, na cóndihvī ni rō nacani ró jñuhun ya, te ma cási rō nuū téē cácahān sín sín yuhu. ⁴⁰ Te yucún yíñuhún na sáha ró tāca jniñu.

Jñuhun jeē ní natecu Cristo

15

¹ Hermano jijnáhan ró, vijna te nucūhun ni rō jñuhun jnáma ya yohó jeē ní nacani ri nuū rō. Te jñuhun ún chí je ni cajetáhú ró, te suni cáhīn nihín ró jíin. ² Te suni jíin jñuhun ún te ni jnama ya rohó, te núu cáhīn nihín ró jíin jñuhun ni nacani ri nuū rō, te núu tu ní cácañdije cāha ró.

³ Chi jñuhun cánuú gá jeē ni níhín maá rí ni nastéén rī nuū rō: Jeē ni

jíhí Cristo síquī cuéchi yó, nájnūhun je cáhán tutu īī nde jenahán. ⁴ Te ni quindūji ya, te ni natecu yā nuū uní quivī, nájnūhun cáhán tutu īī. ⁵ Te ni nane ya nuū Pedro. Te sáá te ni nane ya nuū ndihúxí gā apóstol. ⁶ Te sáá te ni nane ya nuū vihyá gā uhūn ciento hermano jeē cáyūcu tūtú. Te sava i técu gā nde vijna, te sava i je ni jihí. ⁷ Te sáá te ni nane ya nuū Jacobo, yūcuán na te nuū ndihí ga apóstol.

⁸ Te jeē sándihí na te ni nane ya nuū maá rí. Te nájnūhun ĩn jeē ní cacu yúte, súcuan cúu jeē ĩn sanaa-ni te ni nduu ri apóstol. ⁹ Chi tēe núu ga nuū tāca gā apóstol cúu ri, te ni nasūu tēe vāha cúu ri jeē cónaní rí apóstol, chi ni jito xeēn rī ñayuu cávandíje nuū Yaā Dios. ¹⁰ Te síquī jeē ni sáha Yaā Dios jeē váha ruhū, jeē yúcuan cúu ri apóstol vijna. Te jeē ni sáha ya jeē váha ruhū, chí tú cāha ní cúu, chí sa ni scáca ga rī jnūhun ya vēsú tāca gā tēe apóstol. Te nasūu maá rí ni sáha, chí Yaā Dios ni sáha ya jeē váha un jíin rí. ¹¹ Núu súcuan te vēsú ruhū chí táca gā tēe ún, súcuan cánacani ri jnūhun, te súcuan ni cacandíje ró.

Jnūhun jeē natecu ndīyi

¹² Te jeē cánacani ri jnūhun Cristo jeē ní natecu yā mēhñu ndīyi, ¿te naun cácahān sava ró jēe ma nátecu ndīyi? ¹³ Chi núu jeē tú natecu ndīyi, te suni tu ní nátecu Cristo nuú. ¹⁴ Te núu jeē tu ní nátecu Cristo, te cánacani cāha rí jnūhun ya nuú, te suni cávandíje cāha ró núu. ¹⁵ Chi núu jeē súcuan cúu núu, te cácuu ri tēe jeē tu cácahān ndaā jnūhun Yaā Dios, chí ni cacachi rī jeē ní nastécu Yaā Dios Cristo. Te núu jeē tú natecu ndije ndīyi, núu súcuan te tú ndaā jeē ní nastécu Yaā Dios Cristo. ¹⁶ Chi núu tú natecu ndīyi, te ni Cristo suni tu ní nátecu yā nuú. ¹⁷ Te núu tu ní nátecu Cristo, te cávandíje cāha ró te cándiso īī gā rō cuéchi ró núu. ¹⁸ Te núu jeē súcuan cúu núu, te suni je ni cajnahñu ndetū ñayuu ni cacandíje Cristo. ¹⁹ Chi núu tú natecu ndīyi, te núu maá ĩn-ni síquī vida yáha ñūhun ni yō jeē sáha Cristo jeē váha yóhó,

núu súcuan te ndahú ndasí gā cácuu yó vēsú tāca gā ñayuu, chí cávandíje cāha yó nuú.

²⁰ Te tuú chí íyó ndaā jeē ní natecu Cristo mēhñu ndīyi. Te maá yá cúu jeē xihna gā ni natecu nuū tāca gā ndīyi jeē natecu. ²¹ Chi síquī jeē ni stívi ĩn-ni tēe Adán, te ni quejéé jíhí ñayuu. Te suni súcuan síquī jeē ni sáha ĩn-ni tēe Cristo, te natecu ñayuu. ²² Chi nájnūhun cájihí ndihí yó síquī jeē cácuu yó yúcūn Adán, suni súcuan natecu ndihí yó síquī jeē yíhi yó ndaha Cristo. ²³ Te ná ĩn ná ĩn ndese ndíquín jnáhan maá: Xihna gā Cristo ni natecu yā, te sáá te quivī ndíji ya te natecu tāca ñayuu yíhi ndaha ya. ²⁴ Yūcuán na te jíinu tiempo, te snáā yā poder tāca enemigo jeē kujéhnu jíin jēe ndácu jniñu jíin jēe iyó poder. Te ndihí jeē ndácu ya jniñu nuū, nacuaña ya nuū Tatá yā Yaā Dios. ²⁵ Chi cánuú jēe ndacu Cristo jniñu nde quiiji quivī jeē quénde Yaā Dios poder tāca jēe jíto uhū nuū Cristo, te stóho ya. ²⁶ Te jeē sándihí na te snáā yā cuehyi jéhni ñayuu. ²⁷ Chi cáhán tutu īī jeē sáha Yaā Dios jeē kujéhnu Cristo síquī ndihí, te cuatáhu núu yā. Te jeē cahán jeē kujéhnu ya nuū ndihí-ni, te jíiní vāha yó jēe maá Yaā Dios ma quíhi ya ndaha Cristo, chí Yaā Dios cúu jeē ni chíhi tāca un ndaha Cristo. ²⁸ Te ná ni quiví ndihí ún ndaha Cristo, yūcuán na te suni maá Cristo jeē cúu ya Sēhe, quiví ya ndaha Tatá yā, Yaā jeē ní chíhi tāca un ndaha ya. Te súcuan te maá Yaā Dios jniñi ya ndihí-ni.

²⁹ Te íyó ñayuu cájendute jehē ndīyi. Te núu tú natecu cuiti ndīyi, ¿te najehē cájendute i jehē ndīyi núu súcuan?

³⁰ Te ruhū jíinánhan ri, ¿najehē cúu jeē ndiquiví cájendeyí ni rī jíto ri jnūndóho cuu rī, te núu tú natecu ndīyi? ³¹ Hermano, nájnūhun íyó ndaā jeē cúsiñi ni rī síquī jeē cávandíje ró Jítoho yō Jesucristo, suni súcuan íyó ndaā jeē ndiquiví nducú ñayuu cahni ruhū síquī jniñu ya. ³² Te jeē ní ndoho ri ni casáha tēe xeēn ñuu Efeso, jeē

cácuu de nájnūhun quiṭi xéén, ¿te na vé nihín rī siquī un núu súcuan? Chi núu tú natecu ndīyī, te cuu cahān yō nájnūhun áchí ñn jnūhun: Na cúsiñ ni yō caji yō coho yó, chi sanaa te sajnē te cuu yō, achi yō nuú.

³³ Ma cuáha ró jnūhun stáhú ñáyuu rohó. Chi áchí ñn jnūhun: Núu cájica ró jíin ñáyuu neé, te stívi i róhó jéé tuá caca ndaā rō. ³⁴ Nachuhun ni rō jijnáhan ró, te sáha ró jniñu ndaā, te ma sáha ga rō cuēchi. Chi sava ró tu cájini cuiṭi rō ndese Yaā cúu Yaā Dios. Súcuan cáhán rī návāha na cúcanu rō.

Ndese natecu ndīyī

³⁵ Te sanaa te cahān ñn ró: ¿Ndese natecu ndīyī? ¿Ndese coo yiqui cúñu i? achi rō. ³⁶ Tu jécūhun cuiṭi ni rō núu súcuan. Chi cúu nájnūhun jeē cátají ró táca tata chíji ñuhun návāha nane yucū i. ³⁷ Te tata jeē quívi chíji ñuhun, núu trigo chí inga tata, chi nasūu yúcū cúu, chi máá núni-ni cúu. ³⁸ Te cuéé gá te cane, chi Yaā Dios ni jéhe ya yucū tata ún, ndese ni nujnahan ni maá yá, te ná ñn ná ñn tata chí sñn sñn cáa yucū ni sáha ya. ³⁹ Te suni súcuan tācá yiqui cúñu, chi tú inuú cándāa. Chi sñn cáa ñayuu, te sñn cáa quiṭi, te sñn cáa saa, te sñn cáa chācá. ⁴⁰ Te suni súcuan cúu tāca jéé ín andiví jíin táca jéé iyó ñáyiví. Te sñn luu cáa jeē ín andiví, te sñn luu cáa jeē iyó ñáyiví. ⁴¹ Te sñn ndíndēe níandii, te sñn ndíndēe yóo, te sñn ndíndēe táca quími. Te tācá ñn ñn quími chí suni sñn sñn ndíndēe. ⁴² Te suni súcuan coo jíin ndíyī jeē natecu. Ndīyī jeē chíndūji yó chí téhyū, te jeē nastécu yā chí ma cúu gā. ⁴³ Jeē chíndūji yó chí ndáhú cáa, te jeē nastécu yā chí luu cujéhu. Jeē chíndūji yó chí tú na fuerza, te jeē nastécu yā chí coo fuerza. ⁴⁴ Jeē chíndūji yó chí ñn yiqui cúñu cuenta ñayiví cúu, te jeē nastécu yā chí ñn yiqui cúñu cuenta Espíritu yā cúu. Chi iyó yiqui cúñu cuenta ñayiví, te suni iyó yiqui cúñu cuenta Espíritu.

⁴⁵ Chi súcuan yósó núu tútu ñn: Adán, tēe xīhna ñúhún, ni cuvāha de jíin vida cuenta ñayiví, áchí. Te Cristo cúu

nájñūhun inga Adán uū, te máá yá cúu Espíritu jeē jéhe vida. ⁴⁶ Te nasūu yiqui cúñu cuenta Espíritu cúu jeē ní cuvāha xīhna gā, chí sa suhva yiqui cúñu cuenta ñayiví, te sáa te nduu cuenta Espíritu. ⁴⁷ Te cuenta ñayiví cúu tēe xīhna ñúhún, chí ni cuvāha de jíin tícachā ñuhun. Te Adán uū jeē cúu máá Jítoho yō, chí nde andiví ní quiji ya. ⁴⁸ Te ñayuu ñayiví yáha, chí cúu i jnáhan Adán jeē ní cuvāha jíin tícachā ñuhun. Te ñayuu jeē quívicoo andiví, chí ndúu i nájnūhun máá Yaā ní quiji nde andiví. ⁴⁹ Chi jeē cáa yó nájnūhun tēe ni cuvāha jíin tícachā ñuhun, suni súcuan coo yó nájnūhun cáa máá Yaā ní quiji nde andiví.

⁵⁰ Jnūhun yáha cástūhun rí nuū rō jijnáhan ró, hermano, jeē yiqui cúñu yō cuenta ñayiví yáha, ma cúu quívi ñuu nuū ndácu Yaā Dios jniñu. Chí jeē jihí cúu, te ma cúu quívi nuū cótecu ní cáni. ⁵¹ Te cúní rī jeē na jécūhun ni rō jnūhun yáha jeē ní yisāhi: Nasūu ndíhi yó cuu, te ndíhi yó chí nasāma yiqui cúñu yō. ⁵² Chi quívi jeē cuécu sandíhi na trompeta, te ñn yachī-ni, nájnūhun ñn jeē nácuenī-ni yó, te nasama ya yohó. Chí cuécu trompeta un, te natecu tāca ndíyī jeē ma cúu gā i. Te tāca yó jeē cátecu yō quívi ún, chí nasama ya yiqui cúñu yō. ⁵³ Chí jeē tehyú yáhá, cánuú nucūhun jeē ma téhyú gā. Te jeē jihí cánuú nucūhun jeē ma cúu cuiṭi gā. ⁵⁴ Chí jeē jihí jeē tehyú, chí quiji quívi jeē nucūhun jeē ma cúu gā ma tehyú gā. Yūcuán na te cundaā jnūhun yósó núu tútu ñn: Jíin poder yā ni snáa yā cuehyí jéhni ñayuu. ⁵⁵ Cuehyí jéhni yóhó ¿ndese ga cuu sáha xeēn jíin yó? Chí natecu yō. ¿Te ndese ga cundeyí jíin yó? Chí snáa yā. Achi tutu. ⁵⁶ Chí cuēchi cúu jeē sáha jeē cundeyí cuehyí jéhni ñayuu. Te ley yā jenahán sáha jeē náne cuēchi siquī yō. ⁵⁷ Te na cútahū yō nuū Yaā Dios, chí jíin máá Jítoho yō Jesucristo sáha ya jeē cundeyí yó siquī cuéchi jíin siquī jnūhun cuu yō.

⁵⁸ Jeē yúcuan, ñání mání, cuiñi ñihni ró te ma cáca yátá ró jijnáhan ró.

Te níni na sájniñu vāha ró jíin jniñu máá Jítoho yō. Chi je cájini rō jeē tu cásájniñu cāha ró jíin máá Jítoho yō.

Siquī jeē cáquin i xūhún cuu tācá hermano

16

¹ Te vijna te cahān rī siquī xūhun jeē cáquin rō cuu hermano cácandíje cándoho ndáhú. Suni na sáha máá ró jíin náhnūhun ni ndacu ri nuū tāca grupo ñayuu cácandíje ichi Galicia. ² Tācá domingo te ná ñn ná ñn ró chuvāha sñn ró jecu xūhún, núu ndese ni nihñn maá ró, návāha quivī jeē jinú rī nuū rō te je íyó túhva. ³ Te jeē jeé rī, te cuāha ri carta nuū tāca tēe jeē nácāji ró, te tají rí de quingoo de nuū tācá hermano cáyūcú Jerusalén, quisiáha de xūhun jeē ní casocō rō. ⁴ Te núu íyó vāha jeē quihñn rī, te suni quihñn rī jíin de jíināhan de.

Jeē cahán Pablo siquī jeē quícondéhé de ñayuu cácandíje

⁵ Te jeē jeé rī nuū rō jíināhan ró, te jíni ñúhún jeē xihna gā jeē rī región Macedonia, yūcuán na te jeē rī ñuu rō Corinto. ⁶ Te sanaa te quendōo ri jíin ró jíināhan ró jecu tiempo, chí sanaa te coyūcu yó ní tiempo mījin. Yūcuán na te cuu chindéé ñáhán ró ruhū, núu ndé chí quihñn tucu ri. ⁷ Chí tu cúní rī jeē rī nuū rō vijna te yāha yachī rī quihñn rī, chí ñúhún ni rī jeē quendōo ri jíin ró jecu tiempo, te núu cuāha Jítoho yō jnūhun. ⁸ Te cone ri ñuu Efeso yāhá nde na yāha quivī Pentecostés. ⁹ Chí coo cuehē ñayuu scandíje ri, te vāha quihñn jniñu Jítoho yō. Te suni íyó cuehē ñayuu cácuu contra.

¹⁰ Te núu na jéé Timoteo, te sáha ró jeē coo sñn ni de mēhñu ró, te ni ñn ma cáni ni de siquī. Chí suni jniñu máá Jítoho yō sáha de, náhnūhun máá rí. ¹¹ Núu súcuan te ni ñn ró má sajéé ni rō nuū de. Chí sa suhva chindéé ñájnāhan ró jíin de jeē na quihñn gā de, te coo ndeyí coo sñn ni de, návāha ndiji de coto jnāhan ri jíin de. Chí ruhū jíin sava ga hermano cándetu ri de.

¹² Te hermano Apolos chi ni cahān ndahú rí jíin de jeē na jéé de jíin sava ga hermano, condéhé de róhó. Te ni jeni ni de jeē ma cúu jeē de vijna. Te núu na núne de te jeē de.

Saludo jeē sándihí

¹³ Ndito coo ni rō jíināhan ró, te cuiñi ñhin ro jíin jnūhun cácandíje ró. Te téyí na cóo ni rō, te na cóo fuerza ini rō. ¹⁴ Te tāca jeē casáha ró, na sáha ró jíin jnūhun cúndáhú ni jnāhan.

¹⁵ Hermano, cájini rō jeē xihna gā ñayuu vehe Estéfnas ni cacandíje ichi Acaya. Te ni cajēhe i máá i nuū jniñu jeē chindéé ñáhán i tācá hermano cácandíje. ¹⁶ Te cúní rī jeē suni máá ró jíināhan ró, cuatáhú vāha ró ñáyuu casáha súcuan, jíin tāca ñáyuu cachindéé ñájnāhan te cásájniñu siquī jniñu ya. ¹⁷ Cúsñn ni rī jeē ní quijicoo Estéfnas jíin Fortunato jíin Acaico, chí tēe yāha ni cajejniñu de nuū rī jehē rō jeē tu ní cáhīyo ró jíin rí. ¹⁸ Chí ni ndundeyí ni rī, te suni súcuan máá ró jíināhan ró, ni casáha de. Te cánuu cuajnúhún ró tāca tēe cándāa súcuan.

¹⁹ Sándeyí ni rō jíināhan ró, áchí tāca grupo ñayuu cácandíje cáyūcu Asia. Aquila jíin Priscila jíin ñáyuu cácandíje jeē cándutútú vehe de, cácahān i jeē sándeyí ndasí ni rō jíin jnūhun máá Jítoho yō. ²⁰ Te tācá hermano cácahān i jeē sándeyí ni rō. Te jeē cahán rō jíin tāca jnāhan ró, te yíñúhún techūhu ró ndaha i.

²¹ Ruhū Pablo, jíin ndaha máá rí tēe ri jnūhun yāha jeē na sándeyí ni rō jíināhan ró.

²² Te núu ndé ñn tu íyó mání jíin Jítoho yō Jesucristo, te na jnāhnú ndetū i núu súcuan. Te na cáhán yō: Jítoho ná, cúní na jéé yachī ndiji ní.

²³ Te ñúhún ni rī jeē máá Jítoho yō Jesucristo na sáha ga yā jeē vāha róhó jíināhan ró. ²⁴ Te maní rī jíin ró jíināhan ró jeē cácandíje ró Cristo Jesús. Súcuan na cóo. Amén.

CARTA UU JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jñūhun ya. Te ndĩndúú rí jín hermano yō Timoteo cátee ri carta yáha cuájeē nuū rohó hermano ñuu Corinto jeē cácañdije ró Yaā Dios, jín núu ndihi róhó jéē cáyihī ndaha Yaā Dios jeē cáyūcu ní cáhnu Acaya. ² Te cáñuhun ni rí jeē Tatá yō Yaā Dios jín Jítóho yō Jesucristo na sáha ga yā jeē váha róhó te sáha ya jeē coo ndeyí coo sī ni rō.

Siquī jeē ní ndoho Pablo jñūndóho

³ Na cáhán yō jeē yóhyo cújéhnu Yaā Dios, Yaā cúu Tatá maá Jítóho yō Jesucristo. Chi máá yá cúu Tatá yō jeē cundáhú ni yohó, te níni sáha ya jeē ndúsī ni yō. ⁴ Chi sáha ya jeē ndúsī ni yō siquī tāca jñūndóho ndóho yó, návāha suni cuu sáha máá yó jeē ndúsī ni jñáhan yó jéē cándoho jñūndóho. Chi nájnūhun ni sáha ya jeē ndúsī ni maá yó, suni súcuan sáha yó jéē ndúsī ni i. ⁵ Chi jeē ndóho yó cuehē jñūndóho nájnūhun ni ndoho Cristo, suni súcuan nihīn yō cuehē jñūhun ndusī ni, sáha Cristo. ⁶ Jeē yúcuan núu cándoho ri jñūndóho te súcuan te cuu sáha ri jeē ndúsī ni rō te quendōo vāha ga anuá rō. Te jeē sáha Yaā Dios jeē ndúsī ni rí, suu sáha tucu jeē ndúsī ni maá ró, te quéndōo vāha ga anuá rō. Te súcuan te nihīn rō fuerza jeē cuáñdeyí ni rō jín táca jñūndóho nájnūhun cándoho ri. ⁷ Te cáñuhun ndasí ni rí jeē cúu róhó, chi cájini rí jeē nájnūhun cándoho ró jñūndóho jín rí, suni súcuan ndusī ni rō jín rí sáha máá Yaā Dios.

⁸ Hermano, cáconi rí jeē na cúni rō jijnáhan ró ndese ni candoho ri ichi Asia. Chi yóhyo xeēn jñūndóho ni cajito ri, nde je yajni tuá canda ri, te ni jeni ni rí jeē cuu rí nuú. ⁹ Te

siquī jeē ní cajehnde ni rí cuu rí, te yúcuan ní sáha jeē ní cajecūhun ni rí jeē ma tenuū rí maá rí chi tú jniñu ri, chi sa suhva Yaā Dios jeē nastécu ndīyí tenuū rí. ¹⁰ Chi máá yá ni scácu ruhū jijnáhan ri nuū jñūndóho xeēn jeē jé yajni cuu rí nuú, te suni súcuan scácu ya ruhū vijna. Te ñūhun ni rí jeē suni scácu tucu ya ruhū ichi núu gā. ¹¹ Te suni na chindéé ñáhán ró ruhū jijnáhan ri jeē cacān tahú rō jehē rí. Chi núu cuehē ñayuu cacān tahú jehē rí, te suni cuehē i cuu nacuatáhú jehē rí jeē ni sáha ya jeē váha ruhū.

Jeē ní cucuéé Pablo quihīn de ñuu Corinto

¹² Iyó ñn jeē sáha jeē cácusī ni rí: Chi vāha íyó ni anuá rí jeē váha ndoo te ndaā ní cajica ri nuū ñayuu ñayīvī, te víhyá gā nuū maá ró jijnáhan ró. Chi siquī jeē váha ni Yaā Dios, te ni chindéé ñáhán yá ruhū, te nasūu siquī jéē ndichí máá rí cúu jeē ní cajica ri súcuan. ¹³ Te jñūhun cátee ri nuū tāca carta rí, chi máni jeē cúu cahu ró te jecūhun ni rō cúu. Te ñūhun ni rí jeē jecūhun vāha ga ni rō, ¹⁴ nájnūhun je cájecūhun ni rō jecu. Te súcuan te cuu cusī ni rō siquī rí quīvī ndíji Jítóho yō Jesús, nájnūhun cácusī ni rí siquī maá ró.

¹⁵ Te siquī jeē súcuan ni cucáhnu ni rí, te jeē yúcuan ní jeni ni rí jeē núu na quihín rí Macedonia te jeē rí nuū maá ró xīhna gā, návāha cusī ni rō jeē jécondēhe rí rohó úu jínu núu. ¹⁶ Chi ni jeni ni rí jeē jécondēhe rí rohó, te yāha ri quihīn rí Macedonia, te jeē náñdicó rí Macedonia te ndiji tucu ri nuū rō. Yūcuán na te cuu chindéé ñáhán ró ruhū jeē quihín rí ichi Judea nuú. ¹⁷ Te jeē súcuan ni jeni ni rí, ¿te á téé tu nácani vāha ni cúu ri jeē tu ní jéé rí nuū rō, chí naún? ¿A cájeni ni rō jeē cúu ri nájnūhun ñayuu ñayīvī jéé yachī cahán jeē cuu, yūcuán na te tuú, chí naún? ¹⁸ Tuú chi máá Yaā Dios jíní yā jeē tu cáhán rí jín ró jeē cuu, te yachī nácahān rí jeē ma cúu. ¹⁹ Chi ruhū jín Silvano jín Timoteo ni canacani ri jñūhun Jesucristo Sēhe Yaā Dios nuū rō jijnáhan ró. Te máá

yá tu cáhán yā jeē cuu te nacahān tucu ya jeē ma cúu. Chi squícu ya jeē cahán yā. ²⁰ Chi ndihí jeē ni jéjnūhun Yaā Dios, squícu máá Cristo. Te jeē yúcuan cácahān yō jeē yóhyo luu cújéhnū Yaā Dios, te cácahān yō Amén, chi ndihí squícu Cristo Jesús. ²¹ Te Yaā Dios cúu jeē sáha jeē ruhū jijnáhan ri jíin róhó jijnáhan ró, cáhīin nīhin yó jíin Cristo, te ni sándoo ya yohó jéē cuajníñu yó núu yā. ²² Te suni ni jēhe ya Espíritu yā jeē cóndee ini anuá yō, te cúu ya nájnūhun ñn sello jeē steén jeē cúu yó séhe Yaā Dios. Te sáha Espíritu jeē iyó ndáā ni yō jeē cuāha Yaā Dios tahū yō.

²³ Te jeē ná tu jeē rī nuū rō ñuu Corinto, nájnūhun ni jeni ni rī, suu cúu siquī jeē tu ní cúní rī cuxeēn rī nuū rō jeē tu cásáha vāha ró. Te máá Yaā Dios cúu Yaā jiní jeē cahán ndaā rī. Te iyó vāha jeē na cúu rī te núu tu cáhán ndaā rī. ²⁴ Te nasūu jéē cácu ni rī ndacu nīhin ri jniñu nuū rō siquī jnúhun cácu ndíje ró yá, chi je cáhīin nīhin ro jíin jnúhun ún. Chi sa suhva cácu ni rī chindéé ñáhán rī rohó jéē na cúsiñ gā ni rō.

2

¹ Núu súcuan te ni jeni ni rī jeē ma jéé rī inga jínu nuū rō jíin jnúhun cuxeēn rī te cucuíhyá ni rō sáha ri. ² Chi núu cucuíhyá ni rō sáha ri, ¿te ndé ñáyuu sáha jeē cusī ni maá rí? Tuá na inga ñáyuu, chi máni máá róhó, te ndese cuu te núu ni sáha ri jeē cucuíhyá ni rō. ³ Te jeē yúcuan cúu jeē ní tee ri carta un núu rō, návāha nacani ni rō siquī cuéchi ró sáha, te ma cucuíhyá ni rī sáha cuéchi ró quívī jeé rī nuū rō. Chi sa suhva sáha ró jéē cúsiñ ni rī. Te jíiní vāha ri jeē núu cusī ni rī, te suni ndihí ró jíináhan ró cusī ni rō. ⁴ Te jeē ní tee ri carta un núu rō, te yóhyo ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní téé ri jeē sáha ri jeē cucuíhyá ni rō, chi sa suhva návāha cuni rō ndese yóhyo maní rī jíin ró.

Jeē íne cáhnu ni Pablo nuū téé ni sáha cuéchi

⁵ Te jeē ní cucuíhyá ni rī ni sáha tēe jeē ni sáha cuéchi ún, te nasūu máá-ni ri, chi suni nde máá ró jijnáhan ró ni sáha de jeē ní cacucuíhyá ni rō jecu. Te cáhán rī jeē jecu-ni, chi tu cúní rī cuxeēn ndasí rí. ⁶ Te jíin jéē ní cacuxeēn rō nuū de ná ni candutútú ró, te jíin yúcuan-ni te ni cuu-ni. ⁷ Te vijna chi jíiní ñúhún jeē cóne cáhnu ni rō nuū de, te sáha ró jéē ndúsī ni de, chi sanaa te caa ga cucuíhyá ni de, te ma ndúsī gā ni de. ⁸ Núu súcuan te cáhán ndahú rí jíin ró jijnáhan ró jéē steén tucu ró jéē iyó maní rō jíin de. ⁹ Chi jeē siquī jniñu yáha cúu jeē ní tee ri carta un núu rō, návāha coto ndee rī rohó núu cuatáhú vāha ró jniñu ndácu ri nuū rō. ¹⁰ Núu súcuan te núu íne cáhnu ni rō nuū ñáyuu, te suni súcuan ruhū. Chi jeē íne cáhnu ni rī nuū ñáyuu núu ni sáha i cuéchi, te sáha ri súcuan siquī jeē maní rī jíin ró jíto jíinúu Cristo. ¹¹ Chi cánuu cone cáhnu ni yō, chi tu cúní yō jeē nihín Satanás cuéchi siquī yō, chi je jíiní vāha yó ndese ndúcú un stáhú yóhó sáha yó cuéchi.

Jeē tu ní íyo nayúú ni Pablo ini ñuu Troas

¹² Ná ni jehēn rī ñuu Troas jeē nácani ri jnúhun Jitoho yō Cristo, te vāha ni sáha ya jeē ní íyo modo jeē nácani ri jnúhun ya. ¹³ Te vésú súcuan te tu ní íyo nayúú ni anuá rī, chi tu ní níjnáhan ri jíin hermano yō Tito. Yūcuán na te ni nacuatáhú rí nuū ñáyuu yūcuán, te cuananducú rí de ichi Macedonia.

Jnúhun jeē cujéhnū ndúú yó jíin Cristo

¹⁴ Te na cútahū yō nuū Yaā Dios, chi níiní ndéca vāha ya yohó cuángoo yó jíin Cristo Jesús, te ndúú yó jíin yá jeē cujéhnū ndasí yá snāā yā poder ndihí enemigo yā. Te jéjníñu ya yohó jéē scuité núu yó jnúhun ya tãcá-ni lugar, nájnūhun jíte núu ñn xicō asñ. ¹⁵ Te cúu yó nájnūhun ñn sūje jeē jeén asñ nuū Yaā Dios sáha Cristo. Te nájnūhun jeē jinú xicō un núu ñáyuu cācu ánuá jíin núu ñáyuu jnahnu ndetū. ¹⁶ Nuū ñáyuu jnahnu ndetū chi cúu yó nájnūhun ñn xicō jeē

cúu i sáha, te nuū ñáyuu cācu ánuá chi cúu yó nájñuhun ñn xicō váha jeē cótecu i sáha. Te ni ñn yó ma cānda yó sáha yó jniñu yáha, te núu ma chindéé ñáhán yá yohó. ¹⁷ Te ruhū jijnáhan ri, tu cásáha ri nájñuhun cásáha cuehē tēe jeē cánducú de nihīn de xūhun síquī jñuhun Yaā Dios. Chi sa cánacani ndaā rī jñuhun ya, chi máá Yaā Dios ni tají rúhū, te máá yá jiní jeē cánacani ndaā rī síquī jeē cáandíje ri Cristo.

Jñuhun síquī contrato jeé

3

¹ Te jeē cácahān rī sūcuan, ¿te á cájeni ni rō jeē cánducú tucu ri cahān rī jeē váha ga tēe cácuu ri, chí naún? ¿Te chí jiní ññuhūn jeē steén rī carta recomendación nuū rō, chí jeē cacán rī cuāha ró núu rī jijnáhan ri, nájñuhun cásáha sava i? ² Tuú chi máá-ni ró cácuu nájñuhun ñn carta recomendación rī. Te jeē ññuhun ni rī jeē ní cacandíje vāha ró ni sáha ri, suu cúu nájñuhun jeē yosó jñuhun carta un ini anuá rī. Te ndihí ñayuu chi nájñuhun cáhu i, cúu jeē jiní i ndese ni nasāma ró. ³ Chi máá ró cácuu nájñuhun ñn carta jeē ní tee Cristo te cáscaca ri. Te nasūu jíin tinta ni tee ya, chi sa suhva jíin Espíritu Yaā Dios, Yaā técu. Te nasūu núu tabla yuū nájñuhun ni tee ya ley yā, chi sa suhva nuū anuá ñayuu ni tee ya.

⁴ Te cácahān rī sūcuan, chi cácucahnu ni rī Yaā Dios síquī jeē ni sáha Cristo. ⁵ Te nasūu jeē cájeni ni rī jeē cúu canda máá rí sáha ri jniñu ún. Chi sa suhva máá Yaā Dios sáha jeē cuu squícu ri. ⁶ Te máá yá ni sáha jeē cuu cuajniñu vāha ri síquī contrato jeé yá. Te contrato yáha tu cáhán jeē squícu yó ley jeē ní tee jíin letra, chi sa suhva jeē caca yó jíin vida jeé, suu jeē ni jéhe Espíritu yā. Chi contrato ley jeē yosó jíin letra, jñahnū ndetū ñayuu sáha. Te jeē sáha máá Espíritu cúu jeē cótecu yō ní cáni.

⁷ Te ley jenahán jeē ni jéhe ya nuū Moisés, ni yosō letra nuū tabla yuū. Te yōhyo ni cujéhnū, te ni ndindēé ndasí ni sáha, te nde Moisés ndíi nuū de ni sáha. Te tu ní cúu coto

vāha ñayuu Israel nuū de ni sáha. Te vēsú sūcuan te cuéé-ni cuéé-ni ni ndahvā jeē ndíndēe núu de. Te núu sūcuan ni cujéhnū ndasí ley jeē sáha jeē cuu ñayuu te jñahnū ndetū i, ⁸ te sa víhyá gā cujéhnū ndasí gā jñuhun cotecu yō jeē jéhe Espíritu nuū yō. ⁹ Chi núu yōhyo ni cujéhnū ley un jéé jñahnū ndetū ñayuu sáha, te sa víhyá gā cujéhnū jñuhun jeē ndáhva Yaā Dios cuéchi yó. ¹⁰ Chi ley un jéé ní cujéhnū nde saá, tuá cujéhnū cuítí, síquī jeē cujéhnū ndasí gā jñuhun Espíritu jeé iyó vijna. ¹¹ Te núu sūcuan ni cujéhnū ley jeē ni íyo jecu-ni tiempo, te sa cujéhnū ndasí gā jñuhun jeē coo ní cáni.

¹² Te jeē sūcuan cáñuhun ni rī, jeé yúcuu cáhīyo téyí ni rī nácani rī jñuhun yáha. ¹³ Chi tu cásáha ri nájñuhun ni sáha Moisés jeē ní jesi de ñn sahma nuū de, návāha tú coto ñayuu Israel ndese cuandahvā jeē ní ndíndēe núu de. ¹⁴ Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chi nájñuhun jesi sahma un núu jeé níjnūní i, te tu cújiyo cuítí. Chi nde jeé candíje i Cristo, yūcuán na te cújiyo. ¹⁵ Te suni sūcuan nde vijna núu cácahu i tutu ley Moisés, te nájñuhun jeé jesi ñn sahma nuū jeé níjnūní i. ¹⁶ Te jeé násāma ini ñn ñayuu quívi i nuū maá Jítóho yō Cristo, yūcuán na te cújiyo-ni jeé jesi ún. ¹⁷ Chi Jítóho yō cúu máá Espíritu. Te nuū íne Espíritu maá Jítóho yō, yūcuu cúu nuū iyó libre ñayuu jeé tuá yáhi i chíji ley jenahán. ¹⁸ Te jeé yúcuu máá yó jijnáhan yó, tuá jesi nuū jeé níjnūní yō. Chi cácuu yó nájñuhun espejo jeé jéhe nduva, cúu jeé cájica ndaā yō te suu stéén ndese yōhyo luu cújéhnū máá Jítóho yō. Te máá yó tāca quívi cuanasāma yó cuanduu luu ga anuá yō nájñuhun cáa máá yá. Chi máá Jítóho yō jeé cúu ya Espíritu, sūcuan sáha ya jíin yó.

4

¹ Núu sūcuan te tu ndínuu ni rī cánacani rī jñuhun ya. Chi síquī jeé

ni cundáhú ni yā ruhū jijnáhan ri te ni jēhe ya jniñu yáha nuū rī. ² Te tu cásaha ri jniñu néé jēé cúcanu yō sáha, ni tu cájica cuu ri jíin jnúhun ndíchi stáhú, ni tu cásama ri jnúhun Yaā Dios. Chi sa suhva cácahān rī máni jnúhun ndaā. Te súcuan te cuu cuni tāca ñáyuu ini anuá i jeē cácahān ndaā rī jíto jíinúū Yaā Dios. ³ Te núu íyó ñáyuu tu jécūhun ni jnúhun jnama ya yohó jēé cánacani rī, te súcuan cúu nuū máni máá ñáyuu jnahnū ndetū. ⁴ Te jeē tu cácañdije i, te máá jéxeén jeē ndácu jniñu ini ñayīví yáha, ní jesi nuū jeē níjnūní i, návaha ma ndíndēe jnúhun Cristo ini anuá i, te ma cúni i jeē yóhyo luu cújéhnu Cristo, Yaā jeē ínuú cáa jíin Yaā Dios. ⁵ Te jeē cánacani ri jnúhun, te nasūu jnúhun máá rí, chi sa suhva jnúhun Jítoho yō Jesucristo cánacani rī. Te máá rí chi cácuu ri mozo-ni nuū rō jijnáhan rō jēé síquī jeē maní rī jíin Jesús. ⁶ Chi ná ni sáha Yaā Dios ñayīví te ni cahān yā jeē na cundijin nuū néé. Te suni súcuan ni sáha ya jeē ní cundijin nuū anuá yō jeē cájecūhun ni yō síquī Jesucristo, ndese ndíndēe núu yā, cúu jeē yóhyo luu cújéhnu ya nájnūhun cúu Yaā Dios.

Jeē cándiquīn yō jnúhun cácañdije yó yá

⁷ Te tāca jnúhun yáha jeē yóhyo luu cújéhnu, chi nájnūhun jeē ñúhun ini ñn quīsī ñuhun. Chi cácuu yó nájnūhun quīsī ñuhun, chi tú na fuerza yō. Te jeē yúcuan cájini vāha ri jeē maá Yaā Dios cúu jeē jēhe poder síquī jnúhun yáha jeē yóhyo luu cújéhnu, te nasūu fuerza maá rí cúu. ⁸ Te jeē yúcuan, vēsú tāca lado cájito ri jnúndóho, te tu sáha jeē ma ndúsī gā ni rī. Te vēsú cácuuíhyá ni rī síquī jnúndóho, te cáñuhun ni rī jeē quee vāha jniñu ri. ⁹ Te vēsú cájito xeēn ñáyuu ruhū, te máá yá tu stóo ya ruhū jijnáhan ri. Te vēsú cánducú i snāá i ruhū jíin jniñu sáha ri, te ma cúu. ¹⁰ Te ndé-ni cúu nuū cuángoo ri, te nájnūhun ni ndoho Jesús jeē ni jíhī yā, suni súcuan cándoho ri jeē jé yajni cuu rī, návaha suni cuu stéén rī fuerza Jesús jeē técu yā ini yíqui cúñu

rī. ¹¹ Chi jeē niní cátecu rī, te tāca quíví je yajni cahni ñáyuu ruhū jeē síquī Jesús. Te súcuan te cájito ñáyuu jeē técu Jesús ini yíqui cúñu rī jeē cúu. ¹² Núu súcuan te ruhū jijnáhan ri, niní cúu jeē jé yajni cuu rī síquī jnúhun ya, te yúcuan sáha jeē cotecu maá rō ní cáni jijnáhan rō.

¹³ Te yósó núu tútu íi: Ni candíje ri te jeē yúcuan ní cahān rī, achí. Te suni jeē cácañdije máá rí cúu jeē cánacani ri jnúhun ya. ¹⁴ Chi cájini rī jeē maá Yaā jeē ní nastécu Jítoho yō Jesús, suni súcuan nastécu yā ruhū, te sáha ya jeē ñn cáhnu ni cuiñi ndíhi yó núu yā. ¹⁵ Chi tāca jnúndóho yáha cándoho ri návaha coo vāha rō jíináhan rō. Te súcuan te cayā cuehē gā ñáyuu jeē sáha ya jeē vāha i. Yūcuán na te suni yóhyo cuehē i nacuatáhú i nuū Yaā Dios, te cújéhnu ga yā sáha.

¹⁶ Jeē yúcuan cúu jeē tu ndínuu ni rī, te vēsú cuandíhi fuerza yíqui cúñu rī, te sa suhva cuanduu fuerza gā anuá rī tāca quíví. ¹⁷ Chi jnúndóho jeē ndóho yó ñayīví yáha, tú-ni xeēn cúu, te yachī yáha. Te sáha jeē níhín yō ñn tahū jeē cújéhnu yó ní cáni jeē cáa ndasí gā vēsú jnúndóho ún. ¹⁸ Te tu táñúhún yó nuū tāca jnúndóho jíto yó núu vijna, chi sa suhva táñúhún yó nuū tāca jēé jíto yó núu vijna, chi yachī ndíhi, te tāca jēé tu jíto yó núu, chi coo ní cáni.

5

¹ Chi yíqui cúñu yō jeē ndeé yó ñayīví yáha, cúu nájnūhun ñn vehe jeē náā. Te cájini yō jeē núu na náā, te cuāha Yaā Dios ñn yíqui cúñu jeé, te suu cúu nájnūhun ñn vehe jeē coo ní cáni ichi ándiví. Te nasūu ñn vehe jeē sáha ñáyuu cúu, chi jeē sáha Yaā Dios cúu. ² Te niní jēé ndeé yó vehe yáha jeē cúu yíqui cúñu yō, te cájitū ni yō sáha, chi yóhyo cúni yō jeē núcūhun yó yíqui cúñu jeé yó nde ándiví. ³ Chi jeē núcūhun yó un, te ma cóo máá na anuá yō jeē náā yíqui cúñu yō yáha. ⁴ Chi niní jēé iyó gā yō ini vehe yíqui cúñu yō yáha, te jítu ni yō te cúcuíhyá ni yō. Te nasūu jēé cuní yō jeē stóo yó

yiqui cúñu yō te coo máa-ni ánuá yō. Chi sa suhva cúní yō nucūhun yó jéē jeé, návāha ndahvā yiqui cúñu yō jeē náā, te coo máá jéē cótecu ní cáni. ⁵ Te Yaā Dios cúu jeē ni sáha ya jeē súcuan coo yó. Te ni jēhe ya Espíritu yā jeē cóndee ini anuá yō, te sáha Espíritu jeē iyó ndāā ni yō jeē cuáha Yaā Dios tahū yō.

⁶ Núu súcuan te níní cúu jeē cácucahnu ni rī. Chi cájini rī jeē niní ndéé gá rī chíji yiqui cúñu yáha, te jíca cúu ri jíin núū ndeé máá Jítóho yō. ⁷ Chi vijna chi cácucahnu ri jeē iyó yá jíin rí, vésú ná tu coto ri nuū yā. ⁸ Te cácucahnu ni rī, chi sáha ri cuenta jeē váha ga núu na quénda ri chíji yiqui cúñu yáha te quihīn rī condee rī jíin máá Jítóho yō. ⁹ Jeē yúcuan cúu jeē cánducú ndéyí rí sáha ri jeē cusī ni yā jíin rí, vésú núu ndéé gá rī yiqui cúñu rī chí vésú núu condee rī jíin yá. ¹⁰ Chi cánuú jéē ndihī yó cuiñi yuhu mesa Cristo jeē sándaā yā jniñu yó. Te ná ñn ná ñn yó níhīn yō siquī ndese ni casáha yó, á jéé váha chí jéé neé, ná ni condee yō chíji yiqui cúñu yō.

Siquī jeē ndívicoo yó núū jnúhun manī Yaā Dios jíin yó

¹¹ Núu súcuan te cándiso iyo ri nuū máá Jítóho yō, te jeē yúcuan ndúcú ndéyí rí scandíje ri ñayuu. Te jíiní Yaā Dios jeē cáhīyo ndaā rī, te ñúhun ni rī jeē suni súcuan cájini maá ró. ¹² Te nasūu jéē cánducú tucu ri cahān rī jeē váha ga tēe cácuu ri, chi sa suhva cástūhun rí jeē cuu cusī ni rō jeē siquī rī jijnáhan ri. Te súcuan te cuu stío cuiñí rō nuū ñáyuu jeē cutéyí i siquī ndese cáa ñayuu, te tu sáha i cuenta ndese cáa ini anuá ñayuu. ¹³ Te va sanaa te cájeni ni rō jeē té loco cácuu ri jeē cácahān rī súcuan. Te siquī jeē cándihvī ni rī jehē Yaā Dios cúu. Te tuú chi cáhīyo váha xinī rī, te jeē yúcuan cájiniñu ri jeē quéndōo váha ró. ¹⁴ Chi siquī jeē ní cundáhú ni Cristo ruhū jijnáhan ri cúu jeē cánuú nacani ri jnúhun ya. Chi cájini váha ri jeē ni jíhī mañúhún-ni ya jeē siquī ndihī yó, te jeē yúcuan nájnūhun ni jíhī ndihī yó

jíin yá. ¹⁵ Chi ni jíhī yā jeē siquī ndihī yó návāha tāca yó jéē técu, ma cótecu ga yō jeē sáha yó jéē cuní maá yó, chi sa suhva jeē cuní maá yá jeē ni jíhī yā te ni natecu yā jeē siquī yō. ¹⁶ Jeē yúcuan tuá casáha ri cuenta ndese-ni cándāa ñayuu, nájnūhun casáha ñayuu ñayīvī. Te vésú súcuan ni casáha ri cuenta siquī Cristo nde saá, jeē ñn tēe-ni cúu ya, te vijna chi cájini rī jeē cúu ya Sēhe Yaā Dios. ¹⁷ Chi núu ñn ñayuu yíhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndihī.

¹⁸ Te Yaā Dios cúu jeē sáha ndihī jeē yáha, chi jíin Cristo ni sáha ya jeē ní ndívicoo yó núū jnúhun manī yā jíin yó. Te ni tejníñu ya ruhū jeē cánacani ri jnúhun jeē ndívicoo ñayuu nuū jnúhun manī yā jíin i. ¹⁹ Chi jíin Cristo te ni sáha Yaā Dios jeē ñáyuu ñayīvī ndívicoo i nuū jnúhun manī yā jíin i. Te tu ndácunehen ya cuēchi ni casáha ñayuu. Te ni tejníñu ya ruhū jeē cánacani ri jnúhun yáha ndese ndívicoo i nuū jnúhun manī yā jíin i. ²⁰ Núu súcuan te cácuu ri tēe cájica jniñu máá Cristo. Te jeē cahān rī, te nájnūhun jeē maá Yaā Dios cahān ndahú yá jíin ró. Núu súcuan te cácahān ndahú rí jíin ró jeē cahān Cristo, jeē na ndívicoo ró núū jnúhun manī Yaā Dios jíin ró. ²¹ Te Cristo, vésú tú ni ñn cuēchi ya, te ni sáha Yaā Dios jeē ní nucondee cuēchi yó siquī yā. Te súcuan te yóhó jéé yíhi ndaha Cristo, ni nucondee siquī yō jeē iyó ndāā yō nájnūhun íyó ndāā Yaā Dios.

6

¹ Núu súcuan te siquī jeē cácuu ri tēe casájiniñu jíin yá, te cácahān ndahú rí jíin ró jeē ma stío uun ró jnúhun jeē ni sáha Yaā Dios jeē váha róhó. ² Chi áchí yá nuū tútu i:

Máá tiempo cuní maá rí te cuni sōho rí jnúhun cahān ndahú ró jíin rí. Te máá tiempo jnáma ri ñayuu, te jnama ri rohó.

Achí yá. Te vijna-ni cúu máá tiempo jeē cuní yā, chí vijna-ni cúu tiempo ni quiiji Yaā jnáma yóhó.

³ Te cánducú rí jeē ma sáha ri ni ñn jniñu jeē casi jeē candíje ñayuu, návāha ma cahán i síquī jniñu ndíso rí.

⁴ Chi sa suhva cánducú rí jeē ndíhi jeē sáha ri, steén jeē cácuu ri tēe cájejniñu nuū Yaā Dios. Jeē yúcuan cájendeyí ni rí jín jéē ndóho ri jnūndóho, jín jéē cúmaní nuū rí, jín jéē yí sáha jín rí.

⁵ Chi ni ñyo tijni jínu jeē ní cacani i ruhū, jeē ní cachune i ruhū vecāa, jeē ní candonda i síquī rí, jeē ní casájniñu nihin ri, jeē ní cajehni rí mähna máá rí, jeē ní cahíyo ndite ni rí. ⁶ Te suni cánducú rí jeē cuajnúhún i ruhū síquī jeē ndoo cájica ri, te cájecūhun vāha ni rí jnūhun ndaā, te cáhíyo paciencia ni rí, te vāha ni rí, te ndéé Espiritu Santo ini rí, te cákundáhú ndije ni rí jnáhan rí. ⁷ Te canacani ndaā rí jnūhun, te poder Yaā Dios íne jín rí. Te jín jnúhun ndaā cándahva rí tāca jniñu néé, chí nájnūhun jeē cájejniñan ri síquī. Chi nájnūhun jeē ndónnda un síquī rí te ndónnda ri síquī. ⁸ Iyó jínu yíñúhún ñayuu jín rí, te íyó jínu tuú. Iyó jínu jéjniñhún i ruhū, te íyó jínu cácahān i síquī rí. Iyó jínu cácahān i jeē tēe stáhú cácuu ri, te íyó jínu cácahān i jeē tēe ndaā cácuu ri. ⁹ Iyó jínu cásáha i nájnūhun jeē tu jín i ruhū jijnáhan ri, te íyó jínu jeē jini vāha i ruhū. Iyó jínu jeē cuní ñayuu cahni i ruhū, te cátecu nahín rí. Te vésú cástóho i ruhū, te tu cájihí rí sáha. ¹⁰ Te vésú iyó jéē cácuu hía ni rí, te níni cácusí ni rí. Te vésú tēe ndáhú cácuu ri, te sácúca rí cuehē ñayuu jín jnúhun ya. Te vésú tú na vé cánevāha ri, te jín máá yá te ndíhi-ni cúu jeē cánevāha ri.

¹¹ Hermano ñuu Corinto, súcuan cúu jeē cácahān cají rí jín ró jijnáhan ró, chí síquī jeē maní rí jín ró, jeē yúcuan cáhí ndíhi ri ndese cándoho ri. ¹² Máá rí jijnáhan ri cácahān cají rí síquī jeē maní ndasí rí jín ró, te máá ró jijnáhan ró sanaa te tu súcuan cúu. ¹³ Nájnūhun cáhān tatá jín séhe, súcuan cáhān ndahú rí jín ró jeē

nájnūhun íyó maní rí jín ró, súcuan na cóo maní tucu ró jín rí.

Síquī jeē cúu yó templo Yaā Dios

¹⁴ Ma quívi nduu rō jín jniñu néé cásáha ñayuu tu cácdíje, chí ma cúu coo ñuu ró jín i. ¿Chi ndese cuu qui-jnáhan jniñu cásáha ñayuu ndaā jín jniñu cásáha ñayuu tú ndaā? ¿Te ndese cuu coyūcú ñuu ñayuu cájica jín luz yá jín ñayuu cájica nájnūhun nuū néé?

¹⁵ ¿Ndesé cuu coo ñuu ni Cristo jín Satanás? ¿Te ndese cuu cuiñi cáhnu ñayuu cácdíje jín ñayuu tu cácdíje?

¹⁶ ¿Te ndese cuu qui-jnáhan templo Yaā Dios jín ídolo? Chi máá ró cácuu templo Yaā Dios, Yaā técu, chí ndéé yá ini anuá rō, nájnūhun ni cahān yā: Condee rí ini i te caca cuu ri mēhñú i, te cuu ri Yaā Dios máá i, te cuu i ñayuu máá rí.

¹⁷ Te jeē yúcuan ní cahān gā yā: Ma quívi nduu rō jín jniñu néé cásáha i,

te cusín ró jijnáhan ró, áhí Jítóho yō. Te ma jnó ró tāca jéé tú ndaā.

Yūcuán na te naquihin ri rohó,

¹⁸ te cuu ri Tatá rō jijnáhan ró, te cuu ró séhe yí rí jín séhe síhí rí, áhí Jítóho yō, Yaā jnó ndíhi poder. Achí tutu.

7

¹ Núu súcuan, ñání maní, cánevāha yó tāca jnúhun yáha jéé ni jéjniñun ya. Jeē yúcuan na sándoo yó máá yó tāca jéé sajnéhén yíquī cúñu yō jín ánuá yō. Te na cónso ñyo yó núu Yaā Dios, te coo ndoo coo ñi yō nuū yá jín ndíhi jniñu cúni yā.

Jeē ní canacani ni ñayuu Corinto síquī cuéchi i

² Coo maní rō jín rí jijnáhan ró víi. Chi tu ní sáha ri falta nuū ní ñn ró, te tu ní stívi rí anuá ni ñn ró, te ni ñn ró tu ní stáhú rí. ³ Te nasūu jéé nducú rí cahān rí nuū rō cúu jeē cahān rí súcuan, chí je ni cahān rí jeē yóhoyo maní rí jín ró. Te níni ñūhun ni rí rohó, vésú cuu yō chí cotecu yō.

⁴ Te cúcáhnu ndasí ni rí rohó jijnáhan ró, te cúsi teyí ni rí jeē síquí rō. Te vésú cájito ri tāca jnúndóho yáha, te íyó

ndeyí ni rī te cúsī ndasí ni rī jeē siquí rō.

⁵ Ná ni jengoo ri Macedonia te tu ní iyo nayúú ni anuá rī, chi sa suhva yí ní iyo jnūndóho jíin rí tāca lado. Chi ni iyo jeē ní castáhān jnáhan jíin rí, te ni cayūhu rí sanaa te caca yátá ñayuu cá candíje. ⁶ Te Yaā Dios jeē sáha jeē ndūndeyí ni ñayuu cá cucuíhyá ni, ni sáha ya jeē ní candūndeyí ni rī, chi ni quiji Tito ni sáha ya. ⁷ Te ni candusī ni rī, nasūu máá ñn-ni siquí jeē ní quiji de, chi suni jeē ní ndūndeyí ni de ni casáha ró. Chi ni castūhún de jeē cáñuhun ni rō coto tucu ró rúhū, jíin jéē cá cucuíhyá ni rō jeē siquí cuéchi ró, jíin jéē cá nacani ni rō jehē rī. Te jeē yúcuán ní cusī gā ni rī.

⁸ Te carta jeē ní tají rí nuū rō, vésú ni sáha jeē ní cacucuíhyá ni rō, te tuá nácani cuíhyá ni rī jeē ni sáha súcuán. Chi vésú ni cucuíhyá ni rī saá, te vijna te tuá, chi jíin rī jeē jecu-ni quiví ni cacucuíhyá ni rō ni sáha. ⁹ Te vijna te cúsī ni rī, te nasūu síquí maá jéē ní cacucuíhyá ni rō. Chi cúsī ni rī jeē ní jejníñu jeē ní cacucuíhyá ni rō, chi ni sáha jeē ní canacani ni rō siquí cuéchi ró. Chi ni cacucuíhyá ni rō nájnūhun cúní maá Yaā Dios, te nasūu jéē ni sáhuhū rī rohó. ¹⁰ Chi núu cúcuíhyá ni yō nájnūhun cúní Yaā Dios, te suu sáha jeē nácani ni yō siquí cuéchi yó te jnama ya yohó, te ma cóo ga jeē nácani cuíhyá ni yō. Te jeē cá cucuíhyá ni ñayuu tu cá candíje, tu jéjníñu jeē nácani ni i, chi sa jnahnū ndetū i. ¹¹ Te ni cacucuíhyá ni rō nájnūhun cúní Yaā Dios, te vijna te cájito ró náa vāha ni jejníñu. Chi ni canacani ndasí ni rō ni sáha, te ni canducú ró jeē quéndōo ndaā rō, te ni cacuxeēn rō nuū téē ni sáha cuéchi, te ni cayūhu ró jeē ní castíví ró núu yā. Yūcuán na te yōhyo ni cacuni rō coto tucu ró núu rī, te yōhyo ni candíhvī ni rō ni cacuxeēn rō nuū téē ni sáha cuéchi ún. Te súcuán ni castéén rō jeē tú cuéchi ró, chi tu ní cájejnūhún ró cuéchi ni sáha téē ún. ¹² Te jeē ní tee ri carta un, nasūu máá-ni jeē cúxeēn rī nuū téē ni sáha cuéchi ún, ni nasūu máá-ni jeē cahán

rī jehē téē ni ndoho ni sáha de. Chi sa suhva ni tee ri návāha nucūhun ni rō ndese yōhyo ni canacani ni rō jehē rī jíto jíinū Yaā Dios. ¹³ Jeē yúcuán ní candusī ni rī jeē siquí rō.

Te víhyá gā ni cacusī ni rī jeē ní jini rī jeē cúsī ni Tito, chi ni nduu nayúú ini de ni casáha ró. ¹⁴ Chi je ni cahān rī jíin de jeē cúsī ni rī jeē váha ñayuu cácuu ró, te vijna te tu ní quéndōo ri jnūhun canu jeē siquí rō. Chi nájnūhun ni cajini rō jeē iyó ndaā tāca jnūhun ni cacahān rī jíin ró, suni súcuán ni cundaā jnūhun ni cacahān rī jíin Tito jeē cúsī ni rī siquí rō jeē váha cá squícu ró. ¹⁵ Te víhyá gā manī de jíin ró vijna jeē ñūhun ni de jeē váha ni cajetáhú ró jeē cahán de, te ni cahīyo yíñūhún ró ni candiso iyo ró núu de. ¹⁶ Núu súcuán te cúsī ni rī siquí jeē cucáhnu ndasí ni rī rohó jíināhan ró.

Jeē na cúsī ni i socō i cuehē

8

¹ Hermano, vijna te suni cá cuni rī castūhun rí nuū rō jíināhan ró ndese cuehē jeē váha ni sáha Yaā Dios jíin ñayuu cá candíje cá yūcú Macedonia. ² Chi vésú yōhyo ni jíto ndee jnūndóho i, te suni yōhyo ni cacusī ni i jíin jnūhun ya. Te vésú ñayuu ndahú ndasí cácuu i, te yōhyo váha ni cajequin i cuehē xūhun jéē cúu ñayuu ndahú cá candíje. ³ Chi cúu ri testigo jeē ní cacusī ni maá i ni cajēhe i ndésaa ni canda i, te nde víhyá gā ni cajēhe i. ⁴ Chi ni cacahān ndahú ndasí i jíin rí jeē na cuáha ri jnūhun chindéé ñáhán i jíin yó cuáha i xūhún cuu hermano cándoho ndáhú. ⁵ Te víhyá gā ni casáha i vésú jeē ní cajeni ni rī, chi xīhna gā ni casocō i máá i nuū Jítoho yō, te saá te ni cajēhe i máá i sáha i tāca jéē cá cuni rī, ndíhi ndese nújnahan ni Yaā Dios. ⁶ Te jeē súcuán ni casáha ñayuu Macedonia, te ni castíhví ni rī Tito jeē na jéē tucu de nuū maá ró, sáha de jeē jíinu jniñu jeē ni squéjéé de jíin ró jeē suni caquin rō cuehē xūhún cuu ñayuu ndahú. ⁷ Chi máá ró yōhyo váha casáha ró táca-ni, chi váha

cácandíje ró, vāha cánacani ró jnúhun, vāha cájecūhun ni rō, vāha cándihvī ni rō, vāha manī rō jíin rí jijnáhan ri. Núu súcuan te suni cánuú sáha vāha ró jniñu yáha jéē cuáha ró jéē cúu ñayuu ndahú.

⁸ Te nasūu jéē cuní rī ndacu ri jniñu nuū rō, chi sa cástūhun rí nuū rō ndese yōhyo cácusī ni sava ga ñayuu jéhe i xūhún, te súcuan te cuní rī jeē suni máá ró cákundáhú ndije ni rō ñayuu ndahú. ⁹ Chi je cájini rō ndese yōhyo vāha ni Jitoho yō Jesucristo jíin yó. Chi siquī jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andiví núú. Te súcuan ni sáha ya jeē cá cucú cá ró ndihí jeē ndíso jnúhun ya, siquī jeē ní nasáha ndáhú yá maá yá.

¹⁰ Te jeē vāha máá ró cúu jeē na cáchi rī ndese jéni ni rī siquī jniñu yáha. Vāha ni caquejéé ró nde jendujin, chi nasūu máá-ni jeē ní cajequin rō xūhún, chi suni yōhyo ni cacusī ni rō sáha ró. ¹¹ Núu súcuan te vijna te sínu ró. Te nájnūhun ni cacusī ni rō ni caquejéé ró jíin, suni súcuan na cúsi ni rō sínu ró, chi cuāha ró núu ndese cánevāha ró. ¹² Chi núu cúsi ni yō cuāha yó, te jétáhú yá núu ndese névāha yó, chi tu jíicán yā jeē cuāha yó jéē tu névāha yó.

¹³ Te nasūu jéē cahán rī jeē cáhni ndahú ró máá ró jeē cáa ga nihīn i vēsú jeē ndóo nuū maá ró. ¹⁴ Chi sa suhva jeē ñin cūhva-ni cone vāha ró jíin i. Chi cánevāha cuehē rō vijna, te cuu cuāha ró jéē cúmanī nuū i. Yūcuán na te núu ndé ñin quivī cone vāha i, te suni cuu cuāha i te núu ni cumanī nuū rō. Te súcuan te ñin cūhva-ni cone vāha ró jijnáhan ró, ¹⁵ nájnūhun cáhán tutu ñi siquī ñayuu jeē ní canastútú maná nde jenahán: Tēe jeē ní nastútú cuehē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

Jnúhun Tito jíin úu gā jnáhan de

¹⁶ Te na cútahū rī nuū Yaā Dios jeē ni sáha ya jeē ndihví ni Tito jehē rō nájnūhun cándihvī ni maá rí. ¹⁷ Chi ni jetáhú de jeē ní cacahán rī jíin de jeē

jeē de nuū rō. Te siquī jeē ndihví ni de jehē rō, jeē yúcuan cuájeē de, chi súcuan cúu ni maá de.

¹⁸ Te suni cátají rí ñin hermano cuajeē jíin Tito nuū rō. Te tāca grupo ñayuu cá candíje cájejnúhún i tēe un jéē vāha jéjníñu de siquī jnúhun jeē jnáma ya yohó. ¹⁹ Te tāca grupo ñayuu cá candíje suni ni catee i jniñu siquī de jeē cáca de jíin rí chindéé ñáhán de quindēca de xūhun jíin rí jeē ní cajēhe ñayuu. Te jniñu yáha cá sáha ri návāha cahán ñayuu jeē yóhyo vāha Yaā cúu máá Jitoho yō, chi cuní i ndese yōhyo cácusī ni rō cá socō rō xūhún. ²⁰ Te quingoo ndindúú rí návāha ni ñin ñayuu ma tēe i cuēchi siquī rī siquī xūhun cá socō ñayuu. ²¹ Chi ndúcú rí jeē squícu ndaā rī tācá jniñu, nasūu máá ñin-ni nuū Yaā Dios, chi suni nuū ñayuu.

²² Te suni cátají rí ñin hermano yō cuajeē de jíin ndindúú tēe yáha. Te tijni jíinu ni steén de jeē yóhyo cúsi ni de ndihví ni de tācá jniñu. Te vijna chi ndihví gā ni de jehē rō, chi cúcá hnu ndasí ni de jeē cá squícu ró. ²³ Te núu cácajnúhún ñayuu siquī Tito, te achi rō jeē cúu de tēe chindéé ñáhán jéjníñu jíin rí nuū rō siquī jnúhun ya. Te uū gā hermano yō yáha, achi rō jeē cácuu de tēe jeē ní catejníñu ñayuu cá candíje, te cáhīyo yíñúhún de nuū Cristo. ²⁴ Núu súcuan te stéén rō nuū de jeē cáhīyo manī ndije ró jíin de, návāha na cuní tāca grupo ñayuu cá candíje. Te súcuan cuní i jeē tu ní cácusī cáhá ni rī siquī rō.

Siquī jeē cájequin i xūhún cuu tācá hermano

9

¹ Te vijna te tuá jíni ñúhún tee ri nuū rō siquī xūhun jeē cájequin rō cuu tācá hermano cándoho ndáhú. ² Chi je jíin rí jeē cánujnahan ni rō cuāha ró. Te jeē yúcuan máni cúsi ni rī cahán rī jíin ñayuu Macedonia jeē rohó ñayuu Acaya, je ni casátūhva ró xūhun ndé jendujin. Te jeē súcuan ni cacusī ni maá ró, te jeē yúcuan cuehē ñayuu Macedonia ni cacondihvī ni i

ni cajēhe máá i. ³ Te tájí rí ndinúni hermano yáha cuájeē maá de nuū rō xīhna gā, návāha jeē jinú maá rí te ma quéndōo néé rí siquī jnúhun ni cahān rī jeē squícu vāha ró jíin jniñu ún. Chi coo tūhva ndije ró jíin xúhun nájnūhun ni cahān rī jíin i. ⁴ Chi sanaa te jecoo jecu tē Macedonia jíin rí, te núu cuni de jeē tu cáhīyo tūhva ró, te coo jnúhun canu nuū rī, te suni nuū maá ró jijnáhan ró, chi ni cahān teyí rí jeē cáhīyo tūhva ndije ró. ⁵ Jeē yúcuan ní jeni ni rī jeē cánuú cahān rī jíin táca hermano yáha jecoo de xīhna gā, te sáa te jinū rī, návāha stíhví ni de róhó jéē yáchí na cóo tūhva xúhun jéē ní cacahān rō jeē cuáha ró. Te súcuan te coo tūhva siquī jeē váha ni rō, te nasūu jéē safuerza rī rohó.

⁶ Cocuhun ni rō jnúhun yáha, jeē núu jecu-ni cuāha ró te suni jecu-ni nanihīn rō: Chi tēe jeē tihlí-ni táji, suni tihlí-ni nastútú. Te tēe jeē táji cuehē, suni cuehē nastútú. Achí tutu. ⁷ Tācá ĩn ĩn ró cuāha ró ndésaa ni tee ni rō. Ma cúxī ni rō cuāha ró, chi nasūu fuerza cúu. Chi Yaā Dios manī yā jíin ñáyuu jeē cúsi ni cuāha. ⁸ Te máá Yaā Dios cuu sáha ya jeē nducuehē ndinuū jeē váha cuu ró jijnáhan ró, návāha níni coneváha ró ndihí tācá jeē jíni ñúhún ró, te coo sobra gā jeē cuāha ró jéē cúu tācá jniñu váha. ⁹ Chi súcuan cáhán tutu ĩ siquī tāca ñáyuu jéhe:

Ni scáa i ni jēhe i nuū ñáyuu ndahú.

Te tācá jniñu váha sáha i, chi quendōo ní cáni.

Achí tutu. ¹⁰ Te Yaā Dios jéhe ya tata nuū tēe táji, te nihīn de staā jeē cáji de. Te suni súcuan cuāha ya ndinuū jeē váha cuu ró, te sáha ya jeē cáyā te nducuehē jniñu váha cásáha ró. ¹¹ Súcuan cucúcá ró jíin táca-ni, návāha cuu cuāha cuehē rō. Te xúhun jéē cuáha ró quíhīn nuū hermano cándoho ndáhú, suu sáha jeē nácuatáhú i nuū Yaā Dios.

¹² Chi xúhun jéē cuáha ró núu i, nasūu máá ĩn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios. ¹³ Te cahān i jeē yóhoyo váha Yaā cúu Yaā Dios, chi xúhun jéē

ni cajēhe ró stéén jeē váha cá candíje ró jnúhun Cristo. Te suni sáha jeē cahān i jeē yóhoyo cújéhnu Yaā Dios siquī jeē ní cajēhe cuehē rō nuū i jíin núu sava ga ñayuu. ¹⁴ Te suni cacān tahú i jehē rō, chi coo manī ndasí i jíin ró siquī jeē yóhoyo váha ni sáha Yaā Dios jíin ró. ¹⁵ Te na cútahū yō nuū Yaā Dios, chi ni jēhe ya Sēhe ya nuū yō, jeē cúu ĩn tahū cáhnu ndasí jéē ma cánda cuiti yō castūhún ndihí yō.

Jeē ndiso jniñu Pablo cúu de apóstol

10

¹ Te ruhū Pablo, cáhán ndahú rí jíin ró jijnáhan ró jíin modo maá Cristo jeē vítá ni yā te vāha ni yā. Ruhū, chi cácahān rō jeē iyó suchí ni rī núu ndéé rí jíin ró, te núu ndéé jíca rí te tu yúhú cuiti rī cahān nihín rí jíin ró, cácahān rō. ² Núu súcuan te cáhán ndahú rí jíin ró jeē núu na jéé rī te ma cáhán rō jnúhun jeē sáha jeē cuxeēn rī nuū rō. Chi sava ró cácahān jeē casáha rí jniñu ya siquī jeē máni jeē na nihín rī siquī ún. Núu súcuan te íyó tūhva rí cuxeēn rī nuū ñáyuu cácahān súcuan. ³ Chi vēsú cácuu rí ñayuu cáyūcú ĩni ñayīví, te tu cájejnáhan rí modo cájejnáhan ñayuu ñayīví. Chi nájnūhun jeē cájejnáhan rí siquī tācá jniñu neé. ⁴ Chi nasūu ndajniñu ñayīví jéjníñu rí cájejnáhan rí, chi jíin poder Yaā Dios cájejnáhan rí snáa rī tāca fuerza jeē cúu contra siquī yā. ⁵ Súcuan cásnáa rī tāca jnúhun ndúxí jíin jnúhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi rí nuū ndihí jeē tú vāha jeē cájeni ni ñayuu, návāha cuandetū i nuū Cristo. ⁶ Te jeē jínu cuandetū váha máá ró, yūcuán na te coo tūhva rí cuāha rí castigo nuū tāca gā ñayuu jeē tu cájendetū.

⁷ Máá ró jijnáhan ró máni cájeni ni rō modo ñayuu tu cájecūhun ní. Núu na-ni tēe jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan rí. ⁸ Te núu ni cahān teyí rí jíin ró jeē ndiso jniñu rí, te tu cúcanu rī sáha.

Chi máá Jítóho yō ni tejníñu ya ruhū jijnáhan ri, návāha sáha ri jeē ije ánuá rō jín jnúhun ya, nasūu jéē snāā rī. ⁹ Nūu súcuan te tu cúní rī jeē cáni ni rō jeē nducú rí siúhú rí rohó jín carta rī. ¹⁰ Chi cácahān sava ró jéē tāca carta rī yōhyo stíhví ni te nīhin ndácu jniñu, te sa suhva nūu ndéé rí jín ró te tu cūndeyí ni rī ndacu nīhin rí jniñu, te suni tu cúu cahān vāvihí rí, achí ró. ¹¹ Te ñayuu cácahān súcuan na sáha i cuenta jeē nájnūhun nīhin cáhān carta rī jeē íne jícá rí, suni súcuan nīhin ndacu rí jniñu nuū rō jeē cóndee rī jín ró.

¹² Te va ma chūndeyí cuiti ni nde ri jeē sajhenu ri maá rí, nájnūhun cásáha sava tēe un jéē cájejnúhún nde de máá de. Tāca tēe ún chi cáacunéé de jeē cájeni ni de jeē cujéhnu ga de vēsú jnáhan de, te tu cásáha de cuenta ndese cúní Yaā Dios jeē caca de. ¹³ Te ruhū jijnáhan ri, chi cutéyí nde ri maá cúhva-ni jniñu jeē ni jéhe Yaā Dios nuū rī, te ma yáha ga rī. Máá Yaā Dios ni tee cūhva yá ndésaa cúu jeē sáha ri, te máá yá ni jéhe jnūhun jeē ni jínū rī nuū rohó ñáyuu ñuu Corinto. ¹⁴ Jeē yúcuan ná ni jinūcoo ri nuū rō jeē xíhna ñúhún te nasūu jéē ni yáha ri nuū cúhva jniñu ní jéhe ya nuū rī. Chi xíhna gā maá rí ni jinūcoo nuū rō ni canacani ri jnūhun vāha Cristo. ¹⁵ Te tu cácutéyí rí siquī jniñu ní casáha inga tēe, nájnūhun jeē jniñu máá rí cúu. Chi sa suhva cáñuhun ni rī jeē cuehē gā candíje ró, te súcuan te cuu sáha ri cuehē gā jniñu ya mēhñu ró, te níní máá cúhva jeē ni jéhe ya nuū rī. ¹⁶ Yūcuán na te cácuni rī scuité nūu ga rī jnūhun jnáma ya yohó nūu tāca gā ñuu yūcu ndé yūcuán gá. Te súcuan te ma quívi nduu rī cutéyí rí nuū jeē jé ni canacani inga tēe jnūhun.

¹⁷ Te nūu ndé tēe cúní de cutéyí de, na cutéyí de siquī jeē sáha máá Jítóho yō, nasūu siquī jéē sáha máá de. ¹⁸ Chi nasūu tēe jeē jejnúhún máá cúu jeē quéndōo yíñúhún, chi sa suhva tēe jeē jejnúhún máá yá.

Jeē cahán Pablo siquī tēe cánacani

jnūhun stáhú

11

¹ Cone cáhnu ni rō jijnáhan ró jeē cahán rī jecu jnūhun modo nájnūhun cácahān ñayuu canéé. Nūu súcuan te cáhnu coo ni rō víi. ² Chi cúcuíñí rí jehē rō jijnáhan ró, nájnūhun cúcuíñí Yaā Dios. Chi cácuu ró nájnūhun ñn sūchi síhí íyó ndoo, te ni sáha ri jeē quijnáhan ró jín Cristo, nájnūhun quijnáhan ñn sūchi síhí jín máñúhún-ni yí i. ³ Te yúhú rí sanaa te cuāha ro jnúhun stáhú tāca tēe un rohó, te siáá rō jnūhun jeē chiñúhún ndáā rō Cristo nde jín ini jín ánuá rō. Chi suni súcuan ni sáha Satanás jín Eva, chi ni quívi ini ñn coō, te ni stahú un ña jín jnúhun ndíchí stáhú. ⁴ Chi nūu quíjicoo tēe nuū rō jeē tu cánacani ndaā de jnūhun Jesús nájnūhun ni canacani ri nuū rō, te va yōhyo vāha cájetáhú nde ró de. Te suni súcuan vāha cájetáhú nde ró nūu inga espíritu jín nūu inga jnūhun jeē tu quijnáhan jín Espíritu jín jnúhun jeē ní cacandíje ró jéē jnáma ya rohó. ⁵ Te tāca tēe cácandíje ró un jéē cácahān jeē apóstol cujéhnu ga cácuu, tú cuiti jeē cujéhnu ga nde de nuū rī. ⁶ Chi vēsú tu níhín vāha nde ri modo cahān rī, te jécūhun vāha ni rī. Chi jín ndíhi jniñu ni casáha ri mēhñu ró ni castéén cají rí nuū rō jeē súcuan cúu.

⁷ Tu ní jícán rī xūhun nūu rō siquī jeē ní nacani ri jnūhun jnáma ya yohó. Te súcuan ni cotecu ndahú rí návāha quendōo vāha ga maá ró jín jnúhun ya. ¿Te va cuēchi ni sáha ri jeē ni sáha ri súcuan, chí naún? ⁸ Chi sava ga grupo ñayuu cácandíje ni quihin ri xūhun jéē ní cajēhe i nuū rī, návāha súcuan-ni nacani ri jnūhun ya nuū rō jijnáhan ró. ⁹ Te ná ni condee rī jín ró te ni ndíhi xūhun rí, te tu ní jícán cuiti rī nuū ní ñn ró. Chi hermano jeē ní quijicoo ichi Macedonia ni cajēhe de nuū rī jeē cúmanī. Te jeē súcuan tu ní stáhān rī rohó, te ni ma sáha cuiti rī. ¹⁰ Te nájnūhun cúcáhnu vāha ni rī jeē jíní rī jnūhun ndaā Cristo, suni súcuan jíní rī jeē ma quíhin ri xūhún nuū ni ñn ñayuu ní ndáñúū Acaya, návāha ma

cási i jeē cúsī ni rī jeē súcuan-ni nácani ri jnūhun ya. ¹¹ ¿Te á síquī jeē tú manī rī jín ró cúu jeē cahán rī súcuan, jéni ni rō, chí naún? Tuú chi máá Yaā Dios jiní yā jeē maní rī jín ró jijnáhan ró.

¹² Te sáha ri ná-ni sáha ri, chi ma quihín ri xūhun ró, návāha casi rī nuū jeē casátéyí téé un máá de jeē cácahān de jeē inuú casáha de jniñu ya jín rí. ¹³ Te tēe ún chi nasūú apóstol ndaā cácuu de, chi máni máá jnūhun stáhú cácahān de, te casáha de máá de jeē cácuu de apóstol Cristo. ¹⁴ Te tu náā ni yō jító yó jéé casáha de súcuan, chi je jíní yō jeē suni Satanás násama máá te stáhú jéé sáha máá nájñūhun in ndajéhé Yaā Dios jeē jíca jín luz yā. ¹⁵ Te jeē yúcuan suni tu náā ni yō jító yó jéé téé cájejniñu nuū Satanás, casáha de máá de jeē téé ndaā cácuu de. Te in quivī te nanihín de síquī jniñu néé casáha de.

Jnūndóho ni ndoho Pablo síquī jeē cúu de apóstol

¹⁶ Inga jínu cahán rī jín ró jeē ni in ró ma cáni ni rō jeē téé cánéé cúu rí. Te núu súcuan cájeni ni rō, te va cuatáhú nde ró jéé cahán rī nájñūhun tēe cánéé, návāha suni cuu cutéyí nde ri jecu nájñūhun casáha tēe ún. ¹⁷ Jeé cahán rī vijna chi nasūu jéé ní ndacu máá Jítóho yō cúu, chi sa nájñūhun tēe cánéé cahán rī jeē cutéyí nde ri. ¹⁸ Chi cuehē de casátéyí de máá de modo jeē iyó ini ñayiví, te suni súcuan na sátéyí nde ri máá rí núu súcuan. ¹⁹ Te va tēe cáhiyo cájí xíní cácuu nde ró, te jeē yúcuan cúu vāha ni nde ró cuatáhú ró in tēe cánéé núu súcuan. ²⁰ Chi va vāha-ni cájendeyí ni rō nuū téé un jéé casáfuerza de róhó cuajniñu ró núu de, chí casáha de jeē ndundáhú ró, chí cáquende de ndajniñu ró, chí casájéhnū de máá de nuū rō, chí ndé cácatu de nuū rō. ²¹ Te vēsú cúcanu nde ri cahán rī, te na cahán rī jeē tu ní cúndeyí ni nde ri satéyí rí máá rí nájñūhun casáha tēe ún.

Te vijna te núu iyó sava tēe chúndeyí ni de sátéyí de máá de, te va suni chundeyí ni nde máá rí núu súcuan.

Te va cahán rī nájñūhun cahán in tēe cánéé. ²² Núu cácutéyí de jeē téé hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū. ²³ Núu tēe cájejniñu nuū jnūhun Cristo cácuu de, te víhyá gā ruhū. Te va cahán rī nájñūhun tēe cánéé jéé cutéyí rí súcuan. Chi ni caa ga ni sájniñu ri vēsú maá de jijnáhan de, te ni caa ga ni cacani i ruhū, te cuehē gā jínu ni ine ri vecāa, te suni cuehē gā jínu ni cacuni ñayuu cahni i ruhū. ²⁴ Te jnáhan ri hebreo, uhūn jínu ni cacani xeēn de ruhū jín cuarta ñi, in cūhva jeē jé yajni cuu rī sáha. ²⁵ Unī jínu ni cacani de ruhū jín yujnu xí, te in jínu ni cajēhe de yuū xíní rī. Unī jínu ni quēe barco jeē ní jica ri síquī jnūhun ya. Te in jecuáa jín in ndiáca ni yosō candá rí nuū cunú ndute mar. ²⁶ Cuehē jínu ni ndoho ri ni jica ri ichi, te ni cācu ri nuū táca yúte, te ni cācu ri nuū táca ñácuīhná. Ni cācu ri nuū ñayuu nación rī jín núu ñayuu ñuu jíca. Ni cācu ri cháha chúcuan ná ni iyo ri ñuu jín rancho jín mar. Ni cācu ri nuū táca jnáhan ri jeē tu iyó ndáa. ²⁷ Ni sájniñu nihin ri te yí ní ndoho ri. Cuehē jínu ni jehni rí máá rí mahná. Ni jii rí sōco, ni jichí rí ndute. Cuehē jínu ni iyo ndite ni rí, ni cuijnu rí, ni cumanī sahma ri

²⁸ Te síquī táca jéé yáha chi iyó gá. Chi ndiquivī ndóho ri jeē nácani ndasí ni rí jehē táca grupo ñayuu cá candíje. ²⁹ Núu in ñayuu tu fuerza ini i, te suni ndóho ri jehē i. Te núu in ñayuu quiví i cuēchi sáha jnáhan i, te ndóho ri jnūhun cúcanu jín jnūhun náxeēn ni. ³⁰ Núu súcuan te núu cánuú cutéyí nde ri, te va cutéyí rí síquī táca jéé steén jeē tú na fuerza ini rí. ³¹ Te Yaā Dios, Yaā cúu Tátá máá Jítóho yō Jesucristo, jiní yā jeé cahán ndaā rí. Te ní cáni na cahán ñayuu jeé vāha ndasí Yaā cúu ya. ³² Ná ni iyo ri ñuu Damasco, te gobernador jeé ndácu jniñu ndañūu jeé jni rey Aretas, ni jeni de soldado ni cacondito táca yéhyí jeé ní condúu ndihyú ñuu ún, chí jni de ruhū quihín rí vecāa ni cuni de núu. ³³ Te ní quiví

ri chíji ñn jīca, te ñayuu cá candíje ni cascúun i ruhū ventana ñn vehe jeē néne jicā jeē ndihyú ñuu ún. Te súcuan ni cācu ri nuū tée ún.

Jeē ní jito ndijin Pablo jeē ni stúu ya nuū de

12

¹ Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítoho yō nuū rī te ni steén ndijin yā nuū rī. ² Jíní rī ñn tēe cándíje Cristo, te je ni cuu uxī cuñ cuiyā jeē ní sáha ya jeē ní caa tēe un ní jehēn de nde andíví únī. Te tu jíní rī núu ni jehēn rī jín yiqui cúñu rī, chí ní jehēn anuá-ni rí. Máa Yaā Dios cúu jeē jíní. ³ Te jíní rī jeē ní ndonehen ya ruhū. Te á ní jehēn rī jín yiqui cúñu rī, chí ní ndōo, tu jíní rī, chí máa-ni Yaā Dios cúu jeē jíní. ⁴ Chi ni sáha ya jeē ní caa ri ni jehēn rī nde jardín andíví. Te yūcuan ní jini sōho ri tāca jnúhun sáhi ndasí jeē ma cúu castūhun yóhó ñayuu. ⁵ Te siquī jeē ni sáha ya súcuan jín rí cúu jeē cutéyí rí, te ma cutéyí rí siquī ndese cúu máa rí. Chi cutéyí rí máni jeē tú na fuerza ini rí. ⁶ Te núu cúní rī cutéyí rí siquī maá rí nuú, te nasūu jéé canéé rí núu sáha ri súcuan núu, chí ndaā cúu jeē iyó jeē cutéyí rí. Te ni ma sáha ri, chí tu cúní rī jeē cani ni ñayuu jeē cujénu ga rī vésú jeē ní jito i chí jéé ní jini i jnúhun ri.

⁷ Te tu cúní yā jeē yáha ri cutéyí rí siquī jeē ni stéén ndijin yā jniñu jénu ndasí un núu rī, te jeē yūcuan ni quiji ñn jnúndóho jeē ndiquín ruhū te stóho ruhū. Te ñn jeē ni jéhe ya jnúhun ni tají Satanás cúu, ñn jeē stóho ruhū, návāha ma yáha ri cutéyí rí. ⁸ Te unī jínu ni cahān ndahú rí jín máa Jítoho yō jeē na téjiyo ya quihīn. ⁹ Te ni cahān yā jín rí: Tuú chí tu cúmanī jeē cundáhú ni rī rohó. Chi ñayuu jeē tú na fuerza ini, sáha ri jeē nducuehē gā fuerza maá rí ini i, ni achi yā. Núu súcuan te cúsiñ ni rī jeē tú na fuerza ini rī, chí súcuan te nducuehē gā fuerza Cristo ini rí. ¹⁰ Jeē yūcuan cúu jeē cúsiñ ni rī jeē tú na fuerza rī, jín jéé cácahān

ndevāha ñayuu jín rí, jín jéé cúmanī nuū rī, jín jéé cájito xeēn i ruhū, jín jéé ndóho ri jnúndóho siquī Cristo. Chi jeē tú na fuerza maá rí, yūcuan sáha jeē nihín rī fuerza maá yá.

Jeē nácani ni Pablo siquī ñayuu cá candíje ñuu Corinto

¹¹ Te va tēe canéé cúu ri jeē ni sátéyí nde ri maá rí. Te siquī jeē tu cá candíje ró ruhū, jeē yūcuan ní sátéyí rí maá rí. Chi cánuú jéé máa ró cuajnúhún ró ruhū nuú. Chi vésú tú jniñu ri jeē maá rí, te va tu núu cuiti nde ri nuū tāca tēe un jéé cácahān rō jeē apóstol cujénu cácuu de. ¹² Chi mēñu ró ní sáha ri tāca jniñu jeē steén jeē cúu ndije ri apóstol. Chi jín cuéhē paciencia ni sáha ri tāca jniñu jénu jeē steén poder Yaā Dios, jín táca jniñu jeē nahán ní canaa ni rō ni cajito ró. ¹³ Te tu ní sáha ri jeē núu ga cácuu ró núu tāca gā grupo ñayuu cá candíje, chí máa ñn-ni jeē tu ní stáhān rī rohó jéé cuáha ro jéé jini ñúhún rí. Cone cáhnu ni rō núu súcuan ni sáha nde ri falta nuū rō víi.

¹⁴ Te vijna je iyó túhva ri jecondēhe rí rohó vuelta unī. Te suni tú na vé cacán rī nuū rō, chí nasūu ndajniñu ró cúu jeē cuní rī, chí sa suhva jeē quendōo vāha ró jín jnúhun ya. Chi nájnūhun sēhe ri cácuu ró, te sēhe chí tu cánuú caya i jeē cúu tátá i, chí sa tátá cánuú cuáha de jeē quéndōo vāha sēhe de. ¹⁵ Jeē yūcuan cúsiñ ni rī stíhi ri jeē névāha ri, te nde stíhi ri fuerza maá rí, návāha sáha ri jeē quéndōo vāha ánuá rō jijnáhan ró. Te manī gā coo ri jín ró, vésú sanaa te jecu-ni cáhiyo manī rō jín rí.

¹⁶ Te iyó jecu rō cácahān jeē vésú tú na vé ní jícán rī nuū rō, te tēe stáhú cúu ri, chí ni nducú rí modo ndichí nihín rī xūhun ró, cácahān rō. ¹⁷ ¿A táca tēe ní tají rí nuū rō, á ñn máa de ni stahú de rohó jéé nihín de xūhun ró cuu máa rí, chí naún? Tú cuiti. ¹⁸ Ni cahān ndahú rí jín Tito jeē jécondēhé de rohó, te ni tají rí ñn hermano ni jeē jín de. ¿Te chí ní stahú Tito rohó ní quihin de xūhun núu rō jeē cuu máa de, chí naún? Tuú chí inuú-ni cásáha ndíndúú rí, te ñn-ni ánuá ndíndúú rí.

¹⁹ ¿Sanaa te cájeni ni rō jeē cahán rī jñūhun yáha návāha quendōo vāha rī jín rō, chí naún? Nasū sūcuan cúu, chí Yaā Dios jiní yā jeē cahán rī maá-ni jñūhun jeē cuní Cristo. Te ndihí jeē cahán rī chí ndúcú rí jeē ije rō jín jñūhun ya, ñánī mánī. ²⁰ Chí yúhú rí jeē núu na jée rī, te sanaa te cuni rī jeē tu cásáha rō jniñu nújnahan ni rī. Te máá rō jijnáhan rō, suni ma nújnahan ni rō ruhū. Chí sanaa te cátejnahán rō, cácuésún ni rō, cáquitī ni rō, cásándúxí rō, cásájñuhún rō, cácahān rō siquī jñáhan rō, cácutéyí rō, cájica néé rō. ²¹ Te yúhú rí jeē núu na jée tucu rī te cuāha Yaā Dios jñūhun canu nuū rī jeē sūcuan cásáha rō. Te sanaa te cucuíhyá ni rī núu iyó cuéhē rō jeē ní casáha cuēchi ichi yátá, te tu nácani ni rō stóo rō jniñu jnehén jniñu jíca jnéni jín jniñu néé ndasí ní casáha rō.

Saludo jín jñūhun cástūhun Pablo jeē sándihí

13

¹ Yáha cúu vuelta unī jeē jécondēhe rí rohó. Te sándaā yō jniñu nájnūhun cáhán tutu: Jín jñūhun jeē cahán uū chí únī testigo te cundaā tácá jniñu, áchí. ² Te vijna jeē íne jícá rí te cáhán tucu rī nájnūhun ni cahán rī ná ni ine rī jín rō. Cáhán rī nuū ñáyuu ni casáha cuēchi un jín núu ndihí rō, jeē núu na jée tucu rī te ma cóo vītá ni rī jín rō. ³ Te yūcuán cuu prueba jeē cánducú rō, suu núu jendaá jeē cahán rī jín fuerza Cristo. Chí Cristo tu cúmanī fuerza yā jeē sándaā yā jín rō, chí stéen yā poder yā mēhñu rō. ⁴ Te vésú tu ní stéen yā fuerza yā ná ni jihí yā jicá cruz, te vijna chí técu yā jín poder Yaā Dios. Te nájnūhun ni ndoho máá yá, suni sūcuan cándoho rī vijna jeē tu fuerza rī. Te vésú sūcuan te jín poder Yaā Dios cátecu rī jín yá jeē cuajniñu rī nuū rō jeē siquí jñūhun ya.

⁵ Coto ndee rō maá rō núu cáhīn nīhin rō jín jñūhun cácandíje rō yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije rō? ⁶ Te

ñūhun ni rī jeē suni cácuáhnu ni rō jeē maá rí cácandíje ndije rī. ⁷ Te cájicān tahu rī nuū Yaā Dios jeē ma sáha rō ni iin jniñu néé. Te vésú núu cuajnúhún rō jeē váha ndácu rī jniñu nuū rō, chí vésú núu ma cuajnúhún rō, te tú na vé sáha, chí máni jeē na sáha rō jniñu ndaā cúu jeē cánducú rí. ⁸ Chí tu jésí rī nuū jniñu ndaā, chí sa suhva scáca rī. ⁹ Núu sūcuan te cácusí ni rī núu tú na fuerza maá rí, te núu iyó fuerza maá rō. Te níni cácān tahu rī jeē na ije ga ni rō jijnáhan rō jín jñūhun ya. ¹⁰ Te tee rī carta yáha nuū rō nde ná tu jeē rī, návāha núu na jée rī te tuá jini ñūhún cuxeēn rī nuū rō. Chí ni jēhe Jitoho yō jniñu ndiso rī yáha jēé sáha rī jeē ije ánuá rō jín jñūhun ya, nasūu jée snáā rī.

¹¹ Je ni cahán yō núu sūcuan hermano, te na cóo jeē váha jín rō jijnáhan rō. Te na cóndihvī ni rō ije rō jín jñūhun ya, te coo ndeyí ni rō. Te na cóo inuú ni rō te coyūcu mánī rō jín jñáhan rō. Te Yaā ndiso jñūhun ndeyí sī ni jín jñūhun cúndáhú ni, coo ya jín rō jijnáhan rō. ¹² Te jeē cahán rō jín táca jñáhan rō, te yíñúhún techūhu rō ndaha i. ¹³ Sándeyí ni rō jijnáhan rō, áchí hermano cácandíje jeē cáyūcu yáha.

¹⁴ Te ñūhun ni rī jeē Jitoho yō Jesucristo na sáha ga yā jeē váha rohó jijnáhan rō, te Yaā Dios cundáhú ni yā rohó, te Espíritu Santo condee cáhnu ya jín rō. Sūcuan na cóo. Amén.

CARTA JEE NI TEE SAN PABLO APOSTOL NUU ÑAYUU GALACIA

¹ Máá rí cúu Pablo apóstol. Te nasūu ñáyuu ni jéni ruhū ni nasūu ñáyuu ni tájí ruhū jeē nácani ri jnūhun, chi sa suhva máá Jesucristo jíin Tátá yō Yaā Dios, Yaā ní nastécu Jesús mēhñu ndáyí. ² Te ruhū jíin táca hermano cáyūcu jíin rí yāhá, cátee ri carta yáha cuájeē nuū rohó ñáyuu cá candíje ní región Galacia. ³ Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo sī ni rō. ⁴ Chi Jesús ni socō yā maá yá jeē ni jíhī yā jeē siquī cuéchi yó, návāha jnama ya yohó nuū táca jéē neé íyó ñayívi yáha, chi súcuan ni nujnahan ni maá Tátá yō Yaā Dios. ⁵ Jeē yúcuan na cáhán yō jeē yóhoyo luu cújéhnū ya ní cáni. Súcuan na cóo. Amén.

Siquī jeē tuá na inga jnūhun cācu ñayuu

⁶ Te náhán náā ni rí jíto ri jeē yóhoyo yachī cánducú ró stóo ró Yaā Dios, Yaā ní cana rōhó jéē quívi ró ndaha ya siquī jeē cundáhú ni Cristo yohó. Chi ni candiquín rō inga jnūhun jeē sín cáhán. ⁷ Te tú cuíti na inga jnūhun jnama yóhó íyó. Te cáhīyo jecu ñayuu castáhán i rōhó, te cácuni i nasama i jnūhun ndese jnáma Cristo yohó. ⁸ Te núu ñin ñayuu nacani inga jnūhun nuū rō ndese jnáma ya rohó, te núu tu quíjnahan jíin jnūhun ni canacani ri nuū rō xihna gā, na jnáhnú ndetū ñayuu ún. Te vésú maá rí chí ñin ndajéhé jeē quíji nde andívi nacani inga jnūhun núu, na jnáhnú ndetū. ⁹ Je ni cahán rí jíin ró, te suni súcuan cáhán tucu ri vijna: Na-ni tēe nacani inga jnūhun nuū rō, te núu tu quíjnahan jíin jnūhun jeē ní cajetáhú ró, na jnáhnú ndetū tēe ún.

¹⁰ Te jeē cahán rí súcuan, ¿á ndúcú rí jeē cuajnúhún ñáyuu ruhū, chí Yaā Dios? ¿Chí ndúcú rí jeē cúsi ni ñayuu

jíin rí, cájeni ni rō? Núu ndúcú gá rí jeē cúsi ni ñayuu jíin rí, te nasūu mozo Cristo cúu ri núu súcuan.

Ndese ni jinū Pablo cúu de apóstol

¹¹ Te cástūhun rí nuū rō, hermano jijnáhan ró, jéē jnūhun jnáma ya yohó jéē nácani ri, nasūu jéē ní jeni ni maá rí jíin ñáyuu cúu. ¹² Chi nasūu ñáyuu ni steén nuū rí, ni nasūu ñáyuu ni sáha jeē ní cutūhva ri, chi sa suhva máá Jesucristo ni steén nuū rí.

¹³ Chi je ni cajini jnūhun ró ndese ni sáha ri nde saá, ná ni chíñúhún rí sahán jnáhan ri ñayuu hebreo. Te cájini rō jeē yóhoyo ni jito xeén rí ñayuu cá candíje nuū Yaā Dios, te ni condíhvī ni rí snāā rí i núu. ¹⁴ Te vāha ga ni cutūhva ri sahán ún vésú cuehē gā tēe nación rí jeē ní cajehnu jíin rí, chi ni condíhvī gā ni rí siquī táca jéē ní cajequin jíi rí. ¹⁵ Te vésú súcuan te Yaā Dios je ni nacāji ya ruhū nde ná tu cacu ri, te ñin quívi te ni cúsi ni yā ni cana ya ruhū jeē quívi ri ndaha ya, siquī jeē yóhoyo ni cundáhú ni yā ruhū. ¹⁶ Te ni steén yā Sēhe ya nuū rí, návāha nacani ri jnūhun ndese jnáma ya ñayuu táca nación jeē tu jíni jnūhun ya. Yūcuán na te tu ní cájnūhun rí ni ñin ñayuu, ¹⁷ ni tu ní jéhén rí ñuu Jerusalén nuū tēe cácuu apóstol xihna gā vésú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñuu Damasco.

¹⁸ Yūcuán na te nde ni yāha unī cuiyā, te ni jehēn rí Jerusalén. Te ni jíni jnáhan ri jíin Pedro, te ni condee rí jíin de xahūn-ni quívi. ¹⁹ Te tu ní jíto ri nuū táca gá apóstol, chi máá ñin-ni nuū Jacobo ñani maá Jítóho yō. ²⁰ Jnūhun yáha jéē tēe ri cuajeē nuū rō, chí jíni Yaā Dios jeē ndaā cúu.

²¹ Yūcuán na te ni jehēn rí ní región Siria jíin Cilicia. ²² Te ñayuu cá candíje jeē yáhi ndaha Cristo, jeē cáyúcú región Judea, ná tu coto cuíti i nuū rí saá. ²³ Chi máni jnūhun-ni ni cajini i cácahán ñayuu: Tēe ni jito xeén yohó ndé saá, vijna chí nácani de jnūhun cándíje yó jéē ní nducú de snāā de nde saá, áchí i. ²⁴ Te ni cacahán i

jeē yóhoyo cújéhnú Yaā Dios jeē súcuan ni sáha ya jíin rí.

Jeē ní cajetáhú táca gá apóstol un Pablo

2

¹ Yūcuán na te nde nuū uxí cuūn cuiyā, te ni jehēn tucu rí Jerusalén jíin Bernabé, te suni ni jeca rí Tito ni jehēn de jíin rí. ² Te ni jehēn rí chí máá Yaā Dios ni steén yā jeē jíni ñúhún quíhín rí. Te ni candutútú sín nene tēe cácujehnú nuū ñáyuu cácandíje ún. Te ni castúhun rí nuū de síquī jnúhun jnáma ya yohó jéē nácani rí nuū ñáyuu táca nación tu jíni jnúhun ya. Te súcuan ni sáha rí návaha cuajnúhún de jniñu rí, te ma quéndōo cāhá jniñu sáha rí jíin jéē ni sáha rí. ³ Te ni tu ní cásáha fuerza de Tito, tēe ni jica jíin rí, jeē cóndee jnunī circuncidar de, vésú nasūu tēe hebreo cúu de. ⁴ Te súcuan ni cundaā, vésú ni quívicoo jecu tēe stáhú jéē sáha de jeē hermano cácuu de. Te tēe un ní quívicoo de návaha yuhu-ni coto de ndese ni ndulibre yō nuū ley circuncidar síquī jeē yíhi yó ndaha Cristo Jesús. Chí cácuu de jeē squícu tucu yó ley un, nduu tucu yó mozo nuū ley un. ⁵ Te tu ní cajetáhú cuíti rí nuū tēe ún, chí cúni rí jeē quéndōo níhin ró jíjnáhan ró jíin jnúhun jnáma ya yohó.

⁶ Te máá tēe cácujehnú nuū ñáyuu cácandíje ún, tuá na inga jniñu jéé ní cándacu de nuū rí. Te máá rí chí tu ní chíhi rí cuenta síquī jeē cácujehnú de, chí suni Yaā Dios tu sáha ya cuenta, chí inuú-ni cúu ndivii tēe nuū yā. ⁷ Chí sa suhva ni cajini de jeē jnúhun jnáma ya yohó, ndíso jniñu rí nacani rí nuū ñáyuu táca nación jeē tu cásáha circuncidar, nájnūhun nácani Pedro jnúhun un núu ñáyuu hebreo jeē casáha circuncidar. ⁸ Chí Yaā Dios jeē ní tají Pedro jeē nácani de jnúhun nuū ñáyuu hebreo, suni máá yá ni tají rúhū jeē nácani rí jnúhun nuū ñáyuu táca nación tu jíni jnúhun ya.

⁹ Jeē yúcuan, Jacobo jíin Pedro jíin Juan, ni cajini de jeē Yaā Dios ni jēhe ya jniñu luu yáha nuū rí. Te

tēe un cácahān ñáyuu cácandíje jeē maá de cácujehnú ga. Te ni cajni de ndaha rí jíin ndaha Bernabé, jeē ní castéén de jeē cáhīyo manī de jíin rí, jíin jéē ní cacundaā ni de jeē maá rí quingōo nacani jnúhun nuū ñáyuu táca gá nación, te máá de jíjnáhan de nuū ñáyuu hebreo. ¹⁰ Te máá ñin-ni jeē ní cajicān de cúu jeē cónahán rí chindéé ñáhán rí ñáyuu cándoho ndáhú, te jniñu ún je ni condíhvī ni rí ni sáha rí.

Jeē ní cáhān Pablo nuū Pedro

¹¹ Te ná ni quiji Pedro ñuu Antioquía, te ni cahān cají rí nuū de, chí ni stívi de jniñu. ¹² Chí nde ná tu quecoo sava jnáhan de hebreo jeē ní tají Jacobo, te yéji de staā jíin ñáyuu jeē násūu hebreo cácuu. Yūcuán na te nuū ní quecoo tēe ún, te ni cusín de jeē tuá yéji de jíin i, chí yúhú de jeē cúni táca tēe un jéē tuá squícu de ley jnáhan de hebreo. Chí áchí ley jeē ma cúu cají de staā jíin ñáyuu jeē tu cásáha circuncidar. ¹³ Te sava ga tēe hebreo jeē cácandíje, suni ni cacujiyo de nuū i, nájnūhun ni sáha Pedro, chí cáyūhú de jeē cúni tēe ún. Te nde máá Bernabé ni cascáhán de ni cujiyo. ¹⁴ Yūcuán na te ni jini rí jeē ní canayūhú de cají de staā jíin ñáyuu ún, cúu jeē tuá jíca de jíin modo jeē cahán jnúhun jnáma ya yohó. Te ni cahān rí nuū Pedro, jíto jíinúu táca de: Róhó jéé cúu tēe nación yō hebreo, tuá squícu ró ley jnáhan yō hebreo, chí yéji rō jíin ñáyuu ún. ¿Te najehē safuerza rō i jeē squícu i ley jnáhan yo hebreo núu súcuan? ni achi rí.

Ñin-ni modo jnáma ya ñáyuu hebreo jíin táca gá nación

¹⁵ Te yóhó chí cúu yó ñáyuu hebreo, te cácahān yō jeē násūu ñáyuu táca gá nación casáha cuēchi cácuu yó. ¹⁶ Te vésú súcuan te jíni yō jeē ní ñin yó tu quéndōo ndaā yō nuū Yaā Dios jeē squícu yó jniñu ndácu ley Moisés jēnahán, chí máá jéē candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návaha ndahva yā cuēchi yó síquī jeē

candíje yó, nasūu jíin jéē nducú yó squícu yó ley un. Chi áchí tutu íi: Ni ññ ñayuu ma quéndōo ndaā i nuū Yaā Dios jíin jéē nducú i squícu i jniñu jeē ndácu ley, achí.

¹⁷ Te máá yó ñayuu hebreo, núu cúní yō jeē ndahva Yaā Dios cuēchi yó síquī jeē ni jíhī Cristo jehē yō, suu cúu jeē jécūhun ni yō jeē suni ñayuu casáha cuēchi cúu yó, nájnūhun tāca gá ñayuu. Núu súcuan ¿te á cuéchi ni sáha yó jeē ni stóo yó ley jenahán ná ni candíje yó Cristo? Tú cuíti jeē súcuan. ¹⁸ Chi sa núu naquihin tucu yó ley jeē ni stóo yó un, te súcuan tée yó cuéchi síquī maá yó. ¹⁹ Chi ruhū, nájnūhun ni jíhī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha ri jeē cuní Yaā Dios. ²⁰ Chi nájnūhun je ni jíhī rī jicā cruz jíin Cristo, te vijna chi tuá técu rī jeē maá rí, chi máá Cristo cúu jeē técu ini rī. Te jeē técu rī ini ñayīvi yáha vijna cúu jeē candíje ri jeē Sēhe Yaā Dios chindéé ñáhán yá ruhū. Chi ni cundáhú ni yā ruhū te ni socō yā maá yá jehē rī. ²¹ Núu súcuan te tu cúní rī casi rī nuū jnúhun jeē ndáhva Yaā Dios cuēchi yó síquī jeē yóhyo vāha ni yā jíin yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjníñu jeē ni jíhī Cristo nuú.

Jnúhun ley jíin jnúhun cándíje

3

¹ Róhó hermano ñuu Galacia, ¿naun tu cájecūhun ni rō? ¿Ndé tée ni saca núu xinī rō jeē tuá cájetáhú ró jnúhun ndaā? Chi ná ni canacani ri jnúhun ya nuū rō, te cájí ndasí ni cajecūhun ni rō jeē ni jíhī Jesucristo jicā cruz jehē rō. ² ññ-ni jnúhun yáha cájnūhun rí rohó: ¿Ndese ni canihīn rō Espíritu Santo? ¿A jéē ní cacundeyí ró squícu ró jniñu ndácu ley Moisés? Tú cuíti, chi jeē ní cacandíje ró jnúhun jnáma ya rohó jéē ní cajini sōho ró. ³ ¿Ndese cúu jeē tu cájecūhun cuíti ni rō? Chi xīhna gā ni cacandíje ró jéē ni jíhī Cristo jeē jnama ya rohó, te ni canihīn

rō Espíritu. Te vijna ¿á cájeni ni rō jeē stóo ró jnúhun ún te fuerza maá ró squícu ró ley un, te cācu ró naún? ⁴ Núu súcuan te tu ndé ní jéjníñu cuíti jeē ní castóho ñayuu rohó síquī jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē váha te núu jeē tu ní castóo ró, chi sa cáncandíje ndije ró yá. ⁵ ¿Te na síquī cúu jeē jéhe Yaā Dios Espíritu yā nuū rō te sáha ya jniñu jéhnū mēhñu ró? Tu sáha ya síquī jeē cánducú ró squícu ró ley un, chi síquī jeē ní cacandíje ró jnúhun jnáma ya rohó jéē ní cajini sōho ró.

⁶ Abraham ni candíje de jeē sáha Yaā Dios jeē ni jéjñūhun ya, te jeē yúcuan ní ndahva yā cuēchi de. ⁷ Núu súcuan te na jécūhun ni rō jijnáhan ró jéē ñáyuu cáncandíje jeē sáha Yaā Dios jehē i, ndívi i yucūn Abraham síquī jeē súcuan cáncandíje i. ⁸ Chi nde jenahán je cáhán tutu íi jeē ñáyuu tācá nación tu jíin jnúhun Yaā Dios, ndahva yā cuēchi i núu candíje i ún. Te nde ná tu cuu tāca jéē yáha te je ni jejnūhun ya jnúhun vāha yáha nuū Abraham: Jeē rohó cúu jeē quéndōo ndetū ñayuu tācá nación. ⁹ Núu súcuan te ñayuu cáncandíje, quéndōo ndetū i jíin Abraham, tée ní candíje jeē ni jéjñūhun ya.

¹⁰ Te sa jnahnū ndetū ñayuu jeē cánducú i quéndōo ndaā i jeē jíin ley Moisés. Chi súcuan yósó núu tútu íi: Jnahnū ndetū tāca ñáyuu jeē tu squícu ndíhi cuíti jnúhun yósó núu tútu ley, achí. ¹¹ Núu súcuan te cájí cúu jeē ni ññ ñayuu ma quéndōo ndaā i nuū Yaā Dios síquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sáha ya jehē i, achí. ¹² Te ley Moisés tu cáhán jeē cótecu yō ní cáni síquī jeē candíje yó, chi sa suhva cáhán: Núu ndé ñáyuu squícu jniñu yáha, te cotecu i sáha, achí.

¹³ Te Cristo ni jnama ya yohó núu jnúhun cáhán ley jeē jnahnú ndetū yō síquī cuéchi yó, chi máá yá ni ndoho síquī jnúhun jeē jnahnú ndetū yō. Chi yósó núu tutu íi: Tāca ñáyuu condita caa jicā yújnu, jnahnū ndetū i, achí.

14 Te Cristo Jesús ni jihī yā jicā yújnu cruz návāha quendōo ndetū ñayuu tācá nación sáha ya. Chi jnūhun jeē ni jéjñūhun ya quendōo ndetū Abraham, jinū nuū i. Te sūcuan te núu candíje yó jeē ni sáha Yaā Dios jehē yō, te nihīn yó Espíritu jeē ni jéjñūhun ya quiji.

Siquī ley jín siquī contrato jeē ni jéjñūhun ya

15 Hermano, na cāhán rī ñn jnūhun ndese cásáha ñayuu ñayīví: Núu ñn tēe sáha de ñn contrato chí ñn acta, te núu je ni cucutú ni sáha de firmar, te ma cúu ga najnanū, ni ma cúu jecosō gā. 16 Te suni sūcuan ni sáha Yaā Dios ñn contrato jeē ni jéjñūhun ya nuū Abraham jín yúcūn de jeē quíji. Te tu cāhán tutu ñ siquī cuehē yucūn de, chi sa cāhán siquī ñn-ni yucūn de, te suu cúu Cristo. 17 Núu sūcuan te jnūhun jeē cāhán rī yāha cúu jeē xīhna gā ni sáha Yaā Dios ñn contrato jín Abraham, jeē quiji Cristo jnama ya yohó, te ni sácutú yá. Yūcuán na te ni yāha cuñ ciento ocō uxī cuiyā, te sáa te ni jēhe ya ley nuū Moisés. Te ley un jēe ní quee cueé gá, ma cúu nacanū contrato un, ni ma cúu casi nuū jnūhun jeē ni jéjñūhun ya jeē jnama ya yohó. 18 Chi núu jeē jín ley Moisés jnama Yaā Dios ñayuu, yūcuán na te nasūu siquī contrato jeē ni jéjñūhun ya cúu. Chi sa suhva siquī maá jēe ni jéjñūhun Yaā Dios nuū Abraham cúu jeē ní jnama ya de.

19 Núu sūcuan ¿te ndese jéjñūhun ley Moisés? Jéjñūhun chi ni jēhe ya un cueé gá návāha nastúu cuēchi i. Te ni ndacu jniñu maá-ni nde ná tu quiji Cristo, Yaā cúu yucūn jeē ni jéjñūhun Yaā Dios jeē quiji. Te nde ná ni jēhe Yaā Dios ley un núu ñayuu, te ni tají yá tācá ndajéhé yā ni cacastūhun núu Moisés, te Moisés ni nacachī nuū i. 20 Te sñn cúu jnūhun jeē ni jéjñūhun ya nuū Abraham jeē quiji Cristo, chi máñuhún-ni ya ni jejnūhun, te tu ní jini ñuhún ni ñn jeē nacachī nuū Abraham.

Siquī ndese jéjñūhun ley jenahán

21 Núu sūcuan ¿te á cúní cahán jeē ley jeē ni jēhe Yaā Dios nuū Moisés, téjiyo jeē ni jéjñūhun ya ún? Tú cuiti jeē sūcuan. Chi núu jeē ni jēhe Yaā Dios ñn ley jeē cótecu ñayuu ní cāni sáha, yūcuán na te quendōo ndaā i nuū yā siquī jeē squícu i jniñu ndácu ley un núu. 22 Te tuú chi yósó núu tutu ñ jeē ndihī ñayuu ñayīví, nájnūhun yíndihyū i vecāa chi cáyihī i chíji cuēchi. Te sūcuan cúu návāha tācá i jeē candíje i jeē ni jíhī Jesucristo jehē i, nihīn i máá jēe ni jéjñūhun ya nuū i siquī jeē candíje i ún.

23 Chi nde ná tu quee jnūhun candíje yó Cristo, te nájnūhun ni yíndihyū yō ni sáha ley jenahán, návāha condetu yó quívi quiji Cristo, Yaā candíje yó. 24 Núu sūcuan te ley ni cuu ñn jeē ndíto yóhó nájnūhun ñn mozo ndíto sūchi lúlí, te ni jejníñu nde quívi ní quiji Cristo, návāha candíje yó jēe ni jíhī yā jehē yō, te ndahva Yaā Dios cuēchi yó. 25 Te vijna jeē ní quee Cristo, Yaā candíje yó, te tuá yíhī yó ndaha ley jeē cúu nájnūhun mozo ndíto yóhó.

26 Chi ndivii rō cácuu sēhe Yaā Dios siquī jeē ní cacandíje rō Cristo Jesús. 27 Chi tāca rō jeē ní jendute rō siquī jeē ni quívi rō ndaha Cristo, ni sáha ya jeē ní nduu rō nájnūhun cúu máá yá. 28 Te vijna chi tuá cúu rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sájniñu cuenta maá, ni tēe ni ñahan. Chi ñn na cúu rō núu yā jeē cáyihī rō ndaha Cristo Jesús. 29 Te núu cáyihī rō ndaha Cristo, núu sūcuan te yucūn Abraham cácuu ndije rō, te nihīn rō maá táhū jeē ni jéjñūhun ya.

4

1 Jeē cāhán rī jín rō jijnáhan rō cúu jeē yáha: ñn sūchi chíí táhū, vésú maá i naquihin ndihī jeē névāha tátá i, te núu lúlí i chi inuú cúu i jín mozo. 2 Chi yíhī i ndaha tāca jēe ndíto i jín jēe ndíto ndajniñu i, nde quee quívi jeē ní jeni tátá i, te sáa te nihīn i. 3 Te suni sūcuan yóhó, chi nde ná tu jecūhun ni yō siquī Cristo te ni cuu yó nájnūhun sūchi lúlí, te ni yíhī yó chíji

tācá costumbre jeē ní cajequin ñayuu ñayiví. ⁴ Te nde ná ni quee quiví jeē ní jeni Yaā Dios, te ni tají yá Sēhe ya, ni cacu ya chíji ñn ñahan, te ni cacu ya yucūn ñayuu nación hebreo jeē cáyihí chíji ley Moisés. ⁵ Súcuan ni cacu ya návāha jnama ya yohó jéē tuá quihí yó chíji ley un, te návāha naquihin Yaā Dios yohó cuu yó séhe ya.

⁶ Te siquī jeē cácuu ró séhe ya, te ni tají Yaā Dios Espíritu Sēhe ya ni quiví ini anuá rō, te sáha ya jeē cácahān jee ró: Tátá maá ná. ⁷ Núu súcuan te tuá cácuu ró nájnūhun mozo, chí séhe ya cácuu ró. Te jeē cácuu ró séhe Yaā Dios, te suni nihín rō maá táhū jeē ní jéjnūhun ya jeē jíin Cristo.

Jeē nacani ni Pablo siquī ñayuu cácadíje

⁸ Chi nde saá, nde ná tu jecūhun ni rō ndese Yaā cúu Yaā Dios, te ni cacu ró mozo nuū tāca jéē násūu yāā ndaā cúu. ⁹ Te vijna chí je cájini rō ndese Yaā cúu ya, te vāha ga na cáhán rī jeē maá yá je jíni yā rohó. Núu súcuan ¿te najehē cácuu rō nandió cóo ró nduu tucu ró mozo nuū tācá costumbre ñayuu ñayiví jéē tu níhín jníñu cuiti? ¹⁰ Chi máni jeē cánēe iī rō quiví jíin yóo jíin vico jíin cuiyā. ¹¹ Te yúhú rí sanaa te tu ní jéjníñu cuiti jeē ní nacani rí jnūhun nuū rō.

¹² Cáhán ndahú rí jíin ró hermano, jeē na cáni ni rō nájnūhun jéni ni maá rí jeē tuá squícu rí costumbre ñayuu hebreo. Chí ruhū ni nasáha rí maá rí nájnūhun máá ró jeē tu ní cáyihí ró núu ley costumbre ñayuu hebreo. Te tú na vé ni casáha ró jéē cucuíhyá ni rī nde saá. ¹³ Chi cájini rō ndese ni cuu ná ni nacani núu rí jnūhun nuū rō ndese jnáma ya yohó. Chí siquī jeē cuhú rī te ni jecuiñí rī ñuu rō ni nacani rí jnūhun. ¹⁴ Te vésú jnūndóho ni cuu jeē ní cocuhū rī, te tu ní casájéē ni rō nuū rī, ni tu ní casquéhichí ni rō ruhū. Chí sa ni cajetáhú ró ruhū nájnūhun jeē cúu rí ñn ndajéhé Yaā Dios, chí nájnūhun jeē cúu rí maá Cristo Jesús. ¹⁵ Núu súcuan ¿te najehē cúu jeē tuá cácuu rí ni rō jíin rí vijna? Chí náhán rí

jeē vāha ni casáha ró jéē ní cajnahuhū ni rō núu jeē cúu te tava rō tinūu vāha máá ró, cuāha ró nduu tinūu rí nuū. ¹⁶ Te vijna ¿á ní nduu rí enemigo rō siquī jeē cachí rí máni jnūhun ndaā nuū rō, chí naún?

¹⁷ Te cáhīyo tēe jeē cándihvī ni siquī rō jijnáhan ró, te nasūu jéē quéndōo vāha ánuá rō, chí sa jeē cácuu de nasásūn de rōhó jíin rúhū, návāha condihvī ni rō jeē cúu máá de. ¹⁸ Te íyó vāha jeē cándihvī ni de jehē rō, te núu jeē quéndōo vāha ánuá rō cúu núu. Chí níni jíni ñúhún sáha de jeē vāha rōhó, vésú núu íne rí jíin ró chí núu tú rí íne. ¹⁹ Séhē máni jijnáhan ró, jeē siquí rohó cúu jeē inga jínu jnáhuhū ni rī, chí nájnūhun ñn ñahan scácu séhe, súcuan ndóho rí jehē rō. Te suu cúu jeē jnáhuhū ni rī ndétu rí jeē na ndúndaā anuá rō ndacu ró Cristo. ²⁰ Nacā jeē vāha núu jeē ndeé rí jíin ró vijna ñúhún, návāha cuu cahān manī rí jíin ró. Te tu cújnúní cuiti ni rī ndese ga cúu jeē cáni ni rí siquī rō.

Jnūhun yátá siquī Agar jíin Sara

²¹ Róhó jíjnáhan ró jéē cácuu rí quihí ró chíji ley Moisés, cachi nuū rí: ¿A tu ní cájini sōho ró ndese cáhán ley un? ²² Chí cáhán tutu iī jeē Abraham ni iyo uū séhe yí de. Te ñn i cúu séhe Agar, ñahan cúu mozo vehe de. Te inga i cúu séhe ñahan íyó libre, suu ñasihí de Sara jeē ní cuu ña ñahan numá. ²³ Te séhe ñahan cúu mozo, ni cacu i nájnūhun cácu tāca gá sūchi lúlí. Te séhe ñahan cúu libre, ni cacu i máá siquī jeē súcuan ni jéjnūhun Yaā Dios. ²⁴ Te yāha cúu ñn jnūhun yátá, chí ndíndúú ñahan un cúu ña nájnūhun ndíndúú contrato jeē ní sáha Yaā Dios jíin ñayuu. Máá ñahan nání Agar, cúu ña nájnūhun contrato ley jeē véji nde yucu Sinaí. Te ñayuu cáyihí chíji contrato ley, cácuu i mozo nuū ley un. ²⁵ Chí Agar cúu nájnūhun ley jeē ní jéhe Yaā Dios xiní yucu Sinaí jeē íin nde Arabia. Te cúu ña nájnūhun Jerusalén, ñuu ñayuu hebreo, jeē iyó vijna, chí tāca séhe ñuu Jerusalén, cácuu i nájnūhun mozo nuū ley un.

26 Te Jerusalén jeē iyó andiví, chi sa suhva iyó libre nájñuhun Sara. Te yóhó ñayuu cá candíje, nájñuhun sēhe un cácuu yó, chi iyó libre yō nuū contrato ley. 27 Chi suhva yósó núu tútu ii: Róhó jeē ní cuu ró ñahan numá jéē tú sēhe ró, na cúsiñ ní rō. Róhó jéē tu ní jéñde chíji ró jéē scácu ró, na cána jee ró jéē cúsiñ ní rō. Chi coo cuehē gā sēhe róhó jéē ní cuu ró ñahan numá vēsú ñahan jeē jé ní scácu sēhe.

Achí tutu.

28 Hermano, sēhe Yaā Dios cácuu yó, chí súcuan ní jeññuhun ya nuū yō, nájñuhun ní jeññuhun ya nuū Abraham jeē cacu sēhe de Isaac. 29 Te nde saá te inga sūchi ní cacu nájñuhun cácu tāca gā ñayuu, ní jito xeēn i Isaac, sūchi ní cacu ní sáha Espíritu. Te nájñuhun ní iyo saá, suni súcuan cájito xeēn ñayuu tāca sēhe Yaā Dios nde vijna. 30 ¿Te ndese cáhán tutu ii? Achí: Quenehen ró ñahan cúu mozo na quíhín ña jíin sēhe ña. Chi sēhe ñahan cúu mozo, ma nihín i tahū jíin sēhe ñahan libre, achí yá jíin Abraham. 31 Núu súcuan hermano, tu cúu yó nájñuhun sēhe ñahan cúu mozo, chí nájñuhun sēhe ñahan libre cúu yó.

Na cuñiñi ñihin yó jíin jñuhun jeē ní sáha libre yohó

5

1 Te Cristo ní sáha libre yā yohó jéē tuá yíhi yó chíji ley Moisés. Núu súcuan te cuñiñi ñihin ró jíin jñuhun jeē ní sáha libre yā yohó, te ma ndivícoo tucu ró cuu ró mozo nuū ley un.

2 Sáha ró cuenta jijnáhan ró, chí ruhū Pablo cahán rī jíin ró jeē núu squícu ró ley circuncidar, yūcuán na te tu nihín jñiñu cuiti jeē ní candíje ró jéē ní jíhī Cristo jehē rō. 3 Te inga jíinu cáhán ñihin rī jíin táca téē cánducú cuu circuncidar, jeē núu súcuan te suni cánuú jéē squícu de ndivíi cuiti gā jñuhun cáhán ley Moisés. 4 Róhó jéē cánducú ró quendōo ndaā rō jeē squícu ró ley un, je ní casiáá rō Cristo núu súcuan. Je ní castóo ró jñuhun jeē

ndahva yā cuēchi ró síquī jeē cundáhú ní Yaā Dios rohó. 5 Te máá yó chí cájica yó jíin Espíritu, te cá candíje yó jéē ní ndahva yā cuēchi yó, te jeē yúcuán ñuhun ní yō jeē quendōo ndaā yō quiví cuñiñi yó núu Yaā Dios. 6 Chi yóhó jéē cáyihí ndaha Cristo Jesús, vēsú núu jeē cúu yó circuncidar chí tu cúu yó, tú na vé nihín jñiñu. Jeē nihín jñiñu cúu jeē candíje yó jeē sáha ya jehē yō. Te yūcuán sáha jeē cundáhú ní yō jñáhan yó.

7 Vāha ní cacandíje ró núu. ¿Te ndé ñin ní jesi jeē tuá cájetáhú ró jñuhun ndaā núu súcuan? 8 Jñuhun jeē ní cascáhán de róhó, chí tú vēji nuū máá Yaā ní cana róhó ní quivícoo ró ndaha ya. 9 Te ma náā ní rō jeē téē cástáhú róhó, jñuhun cástéén de cúu nájñuhun levadura, chí vēsú jecu-ni levadura, te ndaā ndihí ñujen sáha. 10 Te cúcáhnú ní rī jeē máá Jítoho yō sáha ya jeē ma cándíje ró jíjñáhan ró inga jñuhun jeē síin cáhán. Te máá Yaā Dios cuāha ya castigo téē jeē sáca núu xinī rō, núu na-ni téē cúu de.

11 Te ruhū, hermano, núu jeē nácani ga rī jñuhun ley circuncidar nde vijna, te jñáhan rī ñayuu hebreo ma cóto xeēn i ruhū nuú. Chí ma quití ní i jeē nácani rī jñuhun jeē ní jíhī Cristo jíicā cruz, núu jeē súni nácani rī jñuhun circuncidar nuú. 12 Te táca téē jeē sáca núu xinī rō síquī jñuhun ún, vāha ga na cáhnde gā de máá de núu súcuan.

13 Chi máá ró jijnáhan ró hermano, ní cana ya rohó návāha coo libre rō nuū ley un. Te vēsú iyó libre rō, te ma cáni ní rō jeē cúu quivícoo ró táca cuēchi jeē cúu modo neé cúní máá ró, chí sa suhva na sáha ró máá ró mozo jeē chindéé ñáhán ró jñáhan ró síquī jeē cundáhú ní rō i. 14 Chi je ní squícu ró ndihí ley núu squícu ró ñin-ni jñuhun ndácu jñiñu yáha: Cundáhú ní rō jñáhan ró nájñuhun cundáhú ní rō máá ró, achí. 15 Te núu máni jeē ndóna xeēn rō síquī jñáhan ró jéē cuajnáhan ró, te coto ma snāā rō jñiñu jeē ní sáha ya mēhñu ró jijnáhan ró.

Modo cuní ñayuu tu cándíje jíin modo sáha Espíritu

¹⁶ Súcuan cáhán rī jíin ró jijnáhan ró: Caca ró nájnūhun cuní maá Espíritu, te yūcuán na te ma sáha ga rō modo jeē cuní maá ró. ¹⁷ Chi tāca jēē cuní maá yó, yūcuan jési nuū jeē cuní maá Espíritu. Te jeē cuní Espíritu, jési nuū modo neé jēē cuní maá yó. Te jeē ndindúú yáha chi cájesi nuū jnáhan, te jeē yúcuan tu cúu sáha ró jniñu váha jeē cuní rō sáha ró. ¹⁸ Te núu máá Espíritu steén nuū rō, núu súcuan te tuá cáyihí ró chíji ley jenahán.

¹⁹ Te iyó ndijin tācá jniñu cásáha ñayuu cájica jíin modo neé máá, te yáha cúu: Cásiquí ndēē jnáhan i, cásáha i jniñu jnéhén, cásáha neé ndasí i. ²⁰ Cáchiñúhún i ídolo, cásáha tásí i, cájito uhū jnáhan i, cájejnáhan i, cácuquíñí ni i. Te yachí cáquití ni i, te cándihví ni i jeē cúu máá-ni i, te cátejnéhan i cásásín i máá i. ²¹ Te cácuquésún ni i, cájehni i ndíyi, cánajñi i, cásáha i vico neé, jíin táca gá jeē súcuan. Te cáhán nihin ri jíin ró, nájnūhun je ni cahān rī jíin ró saá, jeē ñayuu casáha súcuan, ma nihín tahu i quívicoo i ñuu nuū ndácu Yaā Dios jniñu.

²² Te ñayuu jeē nduú i jíin Espíritu, tācá jniñu yáha sáha ya jíin i: Jeē cundáhú ni jnáhan, jeē cúsiñi ni, jeē iyó ndeyí sñi ni, jeē iyó paciencia, jeē maní ni, jeē váha ni, jeē squícu váha, ²³ jeē tu sáha jeē kujénu, jíin jēē jési modo jeē cuní maá. Te tú na ley cacān cuēchi síquí rō núu sáha ró táca jniñu yáha. ²⁴ Te ñayuu cáyihí ndaha Cristo, nájnūhun je ni cajehni i modo neé máá i jicā cruz, nde jíin táca jēē ndíyo neé ni i te cútíndí i. ²⁵ Te jeē súcuan ni jēhe máá Espíritu ñn vida jeé núu yō, te suni na cáca yó jíin modo steén Espíritu.

²⁶ Te ma sandúxí yó jēē squítí ni yō jnáhan yó, te ni ma cucuésún ni yō síquí jnáhan yó.

Jnúhun jeē chindéé ñáhán yó jnáhan yó

6

¹ Hermano, núu ñn jnáhan ró ni sáha cuēchi, te rōhó jēē cájica jíin Espíritu, na náchuhun ichí ró i. Te jíin jnúhun vītá cahān rō jíin i, te suni condito ró máá ró jeē ma cacān ini rō sáha ró táca cuéchi. ² Te chindéé ñáhán ró jnáhan ró núu na vé cúu jeē ndóho i, chí súcuan cúu jeē squícu ró ley Cristo.

³ Chi núu ñn ñayuu jéni ni i jeē ñayuu teyí cúu i, vēsú nasūu súcuan cúu, te stáhú i máá i núu súcuan. ⁴ Te tācá ñn ñn ró na cóto ndee rō ndese cáca jniñu sáha ró. Te núu váha sáha ró, yūcuán na te cuu cusñi ni rō jíin jēē sáha máá ró, te tu níni jēē scáni jnáhan ró máá ró jíin jnáhan ró. ⁵ Chi tācá ñn ñn yó cánuú squícu yó jíin jniñu ní jēhe ya nuū maá yó.

⁶ Te rōhó jēē cascuáha jnúhun váha ya, na chindéé ñáhán ró tēe cástéén nuū rō jíin táca jēē váha cáneváha ró.

⁷ Ma stívi ró caní ni rō jeē cuu sáha ró cuéchi. Chi ma cúu sácatā rō nuū Yaā Dios caní ni rō jeē tu sáha ya cuenta. Chi tāca núu ndese sáha ñayuu, suu yūcuán nanihín i. ⁸ Chi ñayuu jeē sáha i jeē cuní modo neé máá i, nihín i jeē jnahnú ndetū i sáha modo jeē cuní maá i ún. Te ñayuu jeē sáha jeē cuní maá Espíritu, chí nihín i jeē cótecu i ní cáni andívi sáha Espíritu. ⁹ Te ma cuíta yó jeē sáha yó jniñu váha núu súcuan, chí jeē quéé maá quívi te nanihín yō, te núu ma cuíta yó. ¹⁰ Núu súcuan te tāca jínu jeē cúu sáha yó, te na sáha váha yó jíin táca ñayuu, te hermano yō jeē cándíje cúu jeē cánuú gá.

Saludo jíin jnúhun cástūhun Pablo jeē sándíhí

¹¹ Condēhe ró jeē náhnu letra tēe ri cuajeē nuū rō jijnáhan ró, chí ndaha máá rí tēe ri yáhá. ¹² Te tēe jeē casáfuerza de rōhó cuu ró circuncidar, cásáha de síquí jeē cácuñi de cuajnúhún ñayuu de. Te cásáha de náváha ma cóto xeēn ñayuu de jeē cánacani de jnúhun jeē ní jíhí Cristo jehē yō. ¹³ Te ni máá de jeē casáha de circuncidar, suni tu squícu váha de ndíhí ga ley

jenahán. Te cáconi de jeē cuu ró circuncidar, návāha cuu sátéyí de máá de núu quihin ró jnúnī circuncidar sáha de. ¹⁴ Te ruhū tu cúní rī satéyí rí máá rí siquī ní ñn jeē yúcuan, chí máá ñn-ni siquī jeē ní jíhī Jitoho yō Jesucristo jicā cruz. Chí siquī yúcuan cúu nájñūhun ni jihī rī, chí ni siaá rī tāca jée iyó ini ñayīví, te suni nájñūhun ñn ndīyí cúu ri nuū ñayīví. ¹⁵ Chí núu yíhi yó ndaha Cristo Jesus, te tu níhín jníñu núu cúu yó circuncidar chí tuú. Chí jeē níhín jníñu cúu jeē ní nasájeé yá anuá yō. ¹⁶ Te ñúhun ni rī jeē tāca ró jeē jíca ró jíin modo yáha, na sáha ga yā jeē coo ndeyí coo sñ ni rō, te cundáhú ni yā rohó. Te suni ñúhun ni rī jeē súcuan sáha ya jíin táca gá i jeē cúu ndije i ñayuu cácandíje Yaā Dios.

¹⁷ Te vijna jíin nñ gá cuahān yō, cúní rī jeē ma stáhān gā ni ñn ñayuu ruhū. Chí yiqui cúñu rī ndíso seña jeē ni tújī rī ni ndoho ri jeē cúu ri mozo máá Jítoho yō Jesús.

¹⁸ Hermano, ñúhun ni rī jeē na sáha ga Jitoho yō Jesucristo jeē váha rōhó jíjnáhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU EFESO

¹ Máá rí cúu Pablo, apóstol Jesu-cristo, chi súcuan ni nujnahan ni Yaā Dios ni taji yá ruhū. Te téé ri carta yáha cuájeē nuū rohó ñáyuu ñuu Efeso, jeē cácuu ró ñáyuu maá yá jeē cácandíje ró Cristo Jesús. ² Te ñúhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha rōhó, te sáha ya jeē coo ndeyí coo sī ni rō.

Jeē sáha Cristo jeē quéndōo vāha ánuá yō

³ Na cáhán yō jeē yóhyo cújéhnū Yaā Dios, Yaā cúu Tatá Jítoho yō Jesucristo. Chi ni jēhe ya táca jēé váha íyó andiví jēé quéndōo vāha ánuá yō, chi yíhi yó ndaha Cristo. ⁴ Chi nde ná tu jecōo ñayiví te ni nacāji ya yohó jēé quívi yó ndaha Cristo, návāha coo ndoo ánuá yō te caca ndaā yō nuū yā. ⁵ Je ni cundáhú ni yā yohó nde saá, te ni tana ya yohó jēé náquihin séhe ya yohó. Te jíin Jesucristo ni sáha ya súcuan, chi ni nujnahan ni yā sáha ya. ⁶ Te jeē yúcuan níní na cáhán yō jeē yóhyo cújéhnū ya, chi yóhyo vāha ni sáha ya yohó jíin táca jēé váha ni yā, síquī jeē yíhi yó ndaha Cristo, Séhe ya jeē maní yā jíin. ⁷ Te síquī jeē yóhyo vāha ni yā jíin yó, te Séhe ya un ní jnama ya yohó jēé ni jíhi yā jehē yō, te ni ine cáhnu ni yā nuū cuéchi yó. ⁸ Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchí yó jíin jnúhun ya. ⁹ Te ni sáha ya jeē cuni yō ñn jnúhun ya jeē ní yisāhí, jeē tu ní sáha ya jeē cuni ñayuu jenahán. Chi súcuan ni tee ni yā nde saá, te nujnahan ni yā sáha ya. ¹⁰ Te yāha cúu jnúhun ún: Nde na quée tiempo te sáha ya jeē ndihi jeē yúcu andiví jíin jēé yúcu ñayiví, inuú-ni nduu, quíhi ndaha Cristo.

¹¹ Te síquī jeē yíhi yó ndaha Cristo, te nihīn yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya táca-ni jeē jé ni cundaā ni yā jeē nujnahan ni yā sáha ya. ¹² Súcuan ni sáha ya návāha máá rí jeē xíhna gā ni cacandíje ri Cristo, caca ndaā rī te súcuan sájéhnū ri yā jeē yóhyo luu cújéhnū ya. ¹³ Te suni máá ró jíinahan ró, ni cajini ró jnúhun ndaā jnúhun vāha jeē jnáma ya rohó, te ni cacandíje ró Cristo. Te ni canihīn rō Espíritu Santo jeē ni jéjnūhun ya jeē cuáha ya. Te ndéé Espíritu yā ún ini anuá yō, te cúu ya nájnuhun sello jeē steén jeē cúu yó séhe Yaā Dios. ¹⁴ Te sáha ya jeē jíiní ndije yó jēé cucuéé gá te cuáha Yaā Dios tahū yō, nde na sínu ya jniñu jeē jnáma ya ñayuu yā. Te quiví ún cahān yō jeē cújéhnū ya, chi yóhyo luu cújéhnū ya.

Jeē jíicán tahú Pablo jehē ñáyuu cácandíje

¹⁵ Te ruhū ni jini jnúhun ri ndese cácandíje ró jēé ni sáha Jítoho yō Jesús jehē rō, jíin ndese cácundáhú ni rō ndihi ñayuu cáyihí ndaha Yaā Dios. ¹⁶ Te jeē yúcuan tu jécuiñī rī jeē nácuatáhú rí jehē rō, te jeē jíicán tahú rī te tu náā ni rī cacān tahú rī jehē rō. ¹⁷ Chi jíicán tahú rī jeē na sáha Yaā Dios jeē jécūhun vāha ni rō te ndundíchí ró jíin jnúhun ya, te cuni gā rō ndese Yaā cúu ya. Chi máá yá cúu Yaā Dios Jítoho yō Jesucristo, te cúu ya Tatá yō jeē lúu ndasí cújéhnū. ¹⁸ Te jíicán tahú rī jeē na sándijin gā yā nuū jeē níjnūní rō, návāha jécūhun ni rō ndese cáa ndihi jeē cáñuhun ni rō nihīn rō síquī jeē ní cana ya rohó. Te jécūhun ni rō ndese cúca cácuu ró jíin táca jnúhun jéhnū luu ndíso jnúhun ya jeē cúu ñayuu maá yá. ¹⁹ Te jíicán tahú rī jeē na jécūhun ni rō ndese yóhyo jéhnū poder yā jeē sájniñu ya ini anuá yohó jēé cúu yó ñáyuu cácandíje. Chi tu ndihi cuiti poder yā. ²⁰ Te suu poder un cúu jeē ni steén yā ná ni sáha ya ñn jniñu jéhnū ga jeē ní nastécu yā Cristo mēhñu ndíyí te ni scúcoo ya lado váha ya nde andiví. ²¹ Te ni

jeni ya Cristo siquī tāca jēē cujéhu, jíin jēē ndíso jniñu, jíin jēē jnñ poder, jíin jēē ndácu jniñu, jíin siquī tāca jeē cácahān ñayuu jeē cujéhu, cúu tiempo yáha, cúu tiempo quiiji. ²² Te ni jēhe ya jeē cujéhu Cristo siquī ndivii. Te ni sáha ya jeē cúnuú yá cujéhu ya nuū ñáyuu cácañdije. ²³ Te ñayuu cácañdije un cácuu i nájñuhun yiqui cúñu ya, chi ñn na cúu i jíin yá te ñúhun chitú yá ini anuá i, chi Yaā jeē ñúhun chitú ní cáhnu-ni cúu ya.

Ni cácuu yó siquī jeē ní cundáhú ni yā yohó

2

¹ Te ni sáha ya jeē cotecu rō ní cáni jíin Cristo. Chi je ni cacuu ró nájñuhun ndiyi nuū yā, ni sáha cuēchi ró jíin jniñu néé ní casáha ró. ² Chi ni cajica ró jíin jniñu yúcuau nde saá, ná ni cacondiquin rō jniñu ñayuu ñayiví, ná ni cajetáhú ró núu jexeén jeē ndácu jniñu nuū tāca táchī xeén, te jíca nuū tachí. Te suu cúu jeē scánda ini ñayuu nīhni ni nuū Yaā Dios. ³ Te máá rí jijnáhan ri, suni súcuau ni cajica ri, chi ni casáha ri jniñu néé jēē cuní máá rí, jíin táca jēē jicán yiqui cúñu rí, jíin jēē cájeni néé ni rí nde saá. Jeē yúcuau suni ni cacuu ri ñayuu jeē nihin castigo xeén jeē cuáha ya nuú, chi inuú-ni ni casáha ri nájñuhun casáha máá i. ⁴ Te Yaā Dios chi yōhyo cuehē ni cundáhú ni yā yohó, te vāha ndasí ni yā jíin yó. ⁵ Te náa cúu yó nájñuhun ndiyi nuū yā ni sáha cuēchi yó, te ni nastécu yā yohó jēē cótecu yō ní cáni jíin Cristo. Chi siquī jeē yóhyo vāha ni yā cúu jeē ní jnama ya yohó. ⁶ Te ni nastécu yā yohó jēē cótecu inuú yó jíin Cristo Jesús, te scúcoo ya yohó jíin yá nde andiví. ⁷ Súcuau ni sáha ya návāha ní gá tiempo jeē quiiji, te stéén yā ndese yōhyo manī yā jíin yó, jíin ndese vāha ni yā jíin yó jeē siquī Cristo Jesús. ⁸ Chi siquī jeē yóhyo manī yā jíin ró cúu jeē ní jnama ya rohó, chi ni cacandije ró jēē sáha ya jehē rō. Te nasūu siquī jeē ní casáha máá ró cúu, chi tahū jeē ni jēhe ya nuū rō cúu.

⁹ Chi tú na jniñu vāha ní casáha yó jēē jnama ya yohó, te jeē yúcuau ni ñn yó ma cúu sátéyí yó maá yó. ¹⁰ Chi cúu yó ñn jniñu luu jeē ní nasáha máá yá, chi ni nasáha ya yohó jēē cundúú yó jíin Cristo Jesús, návāha sáha yó táca jniñu vāha jeē jé ni sátūhva Yaā Dios jeē sáha yó.

Jeē sáha Cristo jeē ndiví yó núu jñuhun manī Yaā Dios jíin yó

¹¹ Núu súcuau te na núcūhun ni rō ndese ñayuu ni cacuu ró ndé saá. Chi tu ní cácuu ró ñáyuu hebreo, chi sa suhva ni cacuu ró ñáyuu tāca nación jeē tu jíin jñuhun ya. Te ñayuu hebreo jeē casáha circuncidar yiqui cúñu, ni cacahān i jeē cácuu ró ñáyuu tu sáha circuncidar. ¹² Na núcūhun ni rō jeē ndé saá tu ní cáhīn ró jíin Cristo, te ni cacuu ró ñáyuu ñuu jicá núu nación Israel. Te tu ní cájini rō tāca jñuhun contrato jeē ni jéjñuhun Yaā Dios. Te tu ní íne Yaā Dios jíin ró ñayiví yáha, te tú na vé jeē vāha ní cáñuhun ni rō jeē cóo. ¹³ Te vijna chi ni ndivicoo ró núu Yaā Dios jeē tu ní cájini rō jñuhun ya nde saá, chi ni quivicoo ró ndaha Cristo siquī jeē ní jíhī yā jehē rō. ¹⁴ Chi Cristo cúu Yaā sáha jeē ndúmanī jnáhan yó. Chi ni sáha ya jeē ñáyuu hebreo jíin ñáyuu tāca gá nación, ni nduu yó ñn na nuū yā. Chi ni sáha ya jeē tuá jíto uhū jnáhan yó, te suu cúu nájñuhun jeē ní jenu ya ñn jeē ndihyú sava mēhñu yó jeē sásñn yóhó. ¹⁵ Chi ni socō yā máá yá ni jíhī yā, te súcuau ni ndahva yā ley jenahán jíin jñuhun ndácu jniñu jíin jēē tajnúni ndíso máá. Chi ley un ní sásñn ñayuu hebreo jíin táca nación jeē tu ní jíin i ley un. Te ni nasquijnáhan ya ndihí yó jēē ní nduu yó ñn na nación jeé, yíhí yó ndaha ya. Te súcuau ni sáha ya jeē ní ndumanī jnáhan yó. ¹⁶ Te jíin jēē ní jíhī yā jicá cruz, te ni snāā yā jñuhun cájito uhū jnáhan ñayuu hebreo jíin táca gá nación. Te ni sáha ya jeē ndivicoo yó núu jñuhun manī Yaā Dios jíin yó, te ni nduu yó ñn na ñayuu máá yá.

¹⁷ Chi ni quiiji Cristo ni nacani ya jñuhun vāha nuū tāca ñáyuu jeē na

ndívi i nuū jnúhun manī yā jín i, cúu róhó ñáyuu tu ní cájini jnúhun ya, te suni ñayuu jnáhan ri hebreo jeē cájini jnúhun ya. ¹⁸ Te vijna te siquī jeē ní jhī Cristo, te ndihī yó, cúu ñayuu hebreo chí ñáyuu tāca gá nación, cuu quívicoo yó núu Tatá yō Yaā Dios, te ñn-ni Espíritu yā sáha. ¹⁹ Núu súcuan te tuá cúu ró nájnūhun ñayuu ñuu jicá ní ñayuu tatú, chí ñn na ní nduu ró jín ñáyuu ñuu maá yá. Te jnáhan ñayuu vehe Yaā Dios cácuu ró. ²⁰ Te cácuu ró nájnūhun ñn ñn parte ñn vehe cáhnu jeē cúvāha siquī cimientu, te cimientu un cúu jnúhun Cristo jeē ní canacani tācá apóstol jín tēe ní canacani jnúhun ya jenahán. Te máa Jesucristo cúu nájnūhun yuū cánuú gá jeē yítuu vehe. ²¹ Te ñí vehe cúvāha vāha siquī maá yá, cúsucún cuáhān, cúu ñn templo ñi jeē ndeé maá Jítoho yō. ²² Te suu cúu máa ró jijnáhan ró, chí ndúú ró jín Cristo, te ñnuú-ni sáma ya rohó jín tāca ñáyuu cácanđije, cácuu ró nájnūhun ñn ñn yuū templo. Te suu cúu jeē ndeé Espíritu Yaā Dios ini rō nájnūhun ini ñn templo.

Jeē ndíso jníñu Pablo nácani de jnúhun nuū ñáyuu tu jín jnúhun Yaā Dios

3

¹ Te jeē yúcuan ruhū Pablo, jícán tahu rī nuū yā. Te íne ri vecāa siquī jeē ní nacani ri jnúhun Cristo Jesús nuū rohó ñáyuu tācá nación jeē tu ní jín jnúhun ya nuú. ² Te jín rī jeē ní cajini ró jnúhun ndese yōhyo vāha ní sáha Yaā Dios jín rí, chí ní jēhe ya jniñu nuū rī jeē nácani ri jnúhun vāha ya nuū rō. ³ Te jnúhun ya jeē ní yisāhí, ní nastúu ya nuū rī, nájnūhun je ní tee ri jecu siquī un núu rō. ⁴ Te núu na cáhu ró te cuu jecūhun ní rō jeē ní jini vāha ri jnúhun Cristo jeē ní yisāhí un. ⁵ Te tu ní stéén yā jnúhun sáhi un núu ní ñn ñayuu tāca cuíyā ní quiji ichi yátá. Te vijna cúu jeē steén ndijin yā jín Espíritu yā nuū tācá apóstol jeē ní jeni ndoo ya, jín núu tēe canacani jnúhun ya. ⁶ Te súcuan cáhān jnúhun

ní yisāhí un: Ñayuu tāca gá nación, ñn cáhnu-ni nihīn i tahū i jín ñáyuu hebreo, chí ní cacandije i jnúhun jeē jnáma ya i. Te ñnuú-ni ní nduu ndihī i, te ñn cáhnu-ni quéndōo ndetū anuá i sáha Cristo, nájnūhun ní jejnūhun Yaā Dios. ⁷ Te jeē siquī jnúhun yáha cúu jeē ní jeni ya ruhū jeē nácani ri jnúhun nuū rō. Chí ní cutahū rī jniñu luu yáha jeē ní jēhe ya nuū rī. Te jín poder yā ní sáha ya un jín rí. ⁸ Te ruhū chí cúu ri tēe núu ga nuū tāca ñáyuu núu ga jeē yíhi ndaha ya. Te vésú súcuan te nuū maá rí ní jēhe ya jniñu luu yáha jē nácani ri jnúhun vāha ya nuū ñáyuu tācá nación jeē tu jín, ndese yōhyo cúcá yó ndihī jeē ndíso jnúhun Cristo, jeē ma cánda cuíti yō jecūhun ní yō. ⁹ Chí ní jeni ya ruhū jeē steén cají rí jeē suni máa i jnama ya i. Te yúcuan cúu jnúhun Yaā Dios jeē ní yisāhi ndé jenahán ndasí, chí máa yá ní sáha ndihī-ni. ¹⁰ Te súcuan ní sáha ya jín ñáyuu, návāha vijna te tāca jēe cácujuhnu jín jēe ndíso jniñu nuū sucún, na cúni ndese ndíchí ndasí Yaā Dios. Chí ndíchí ndasí ní sáha ya jín ñáyuu cácanđije. ¹¹ Chí súcuan ní tee ní yā nde ñí cáni, te ní sáha ya jeē Jítoho yō Cristo Jesús ní squícu ya ún. ¹² Te siquī jeē ní sáha Cristo, te vijna te jín ndije yó jēe cúu quívi yó cáhān yō jín Yaā Dios siquī jeē candije yó Cristo. ¹³ Núu súcuan te cáhān ndahú rí jín ró jeē ma cucuíhyá ní rō siquī jnúndóho jeē ndóho ri jehē rō. Chí suu sáha jeē quéndōo ndetū anuá rō jijnáhan ró.

Cristo yōhyo cúndáhú ní yā yohó

¹⁴ Te jeē yúcuan cúu jeē jécuiñí yití rí nuū maá Yaā cúu Tátá Jítoho yō Jesucristo. ¹⁵ Te máa yá cúu Tátá nuū ndihī ñayuu yā jeē yúcu andiví jín ñáyiví. ¹⁶ Te jícán tahu rī jeē jín poder yā jeē cujuhnu ndasí yá, na sáha ya jeē íje vāha ní rō jín jnúhun ya, te coo fuerza ini anuá rō, sáha Espíritu yā. ¹⁷ Te jícán rī jeē candije níhin ró Cristo, návāha condee yā ini anuá rō, te jni vāha ró jnúhun jeē cundáhú ní yā rohó, te cuíñi níhin ró jín. ¹⁸ Te súcuan te cuu jecūhun vāha ní rō jín

táca ñáyuu candíje, ndese cáa jnūhun cúndáhú ni Cristo yohó. Chi yōhyo jíté, cáni, cúnú, súcún jnūhun ún, chi yōhyo cuehē sáha. ¹⁹ Te jícán rī jeē na cúní vāha ró ndese cúndáhú ni yā yohó, vēsú tu cúu cuiti jecūhun ni yō ndihí ndihí. Te súcuan te cundúú ró jíin Yaā Dios jeē cunuú yá ini anuá rō.

²⁰ Núu súcuan te na cáhán yō jeē yóhyo luu cújéhnú ya, chi máá yá cúu Yaā iyó poder jeē sáha ya jeē váha ndasí gá vēsú ndihí jeē jicán yō chí jéé jéni ni yō. Te sáha ya un jíin poder yā jeē sájniñu ini anuá yō. ²¹ Te na cáhán yō jeē yóhyo luu cújéhnú ya jeē siquí jeē ni sáha ya jehē ñayuu cácandíje jíin jéé siquí Cristo Jesús. Te súcuan na cóo nde ñí cáni cuiti tiempo jeē quíji. Amén.

Inuú-ni cácuu ñayuu cácandíje sáha Espíritu

4

¹ Te ruhū jeē íne ri vecāa siquí jnūhun maá Jítóho yō, cáhán ndahú rí jíin ró jeē na cáca ndaā rō nájnūhun cánuú caca ró jéé cácuu ró ñáyuu ni cana ya. ² Te níni na cóo suchí ni rō, te coo vítá ni rō. Te na cóo paciencia rō, te cuandeyí ni rō jíin jnáhan ró jéé cundáhú ni rō i. ³ Te na cóndihvī ni rō coyūcu mánī inuú ró, sáha máá Espíritu nuū véji jnūhun manī ni. ⁴ Chi ñn-ni cácuu ñayuu maá yá, te íyó ñn-ni Espíritu, te inuú cáñūhun ni yō jeē cóo jeē váha siquí jeē ní cana ya yohó. ⁵ Te íyó ñn-ni Jítóho yō, jíin ñn-ni jnūhun cándíje yó, jíin ñn-ni jnūhun jéndute yó. ⁶ Te íyó ñn-ni Yaā Dios jeē cúu Tátá yō jijnáhan yó. Te máá yá cujéhnú siquí ndihí yó, te sájniñu ya jíin ndihí yó, te ndéé yá ini ndihí yó.

⁷ Te tǎcá ñn ñn yó ní cacutahū yō sǎn sǎn jniñu sáha yó, núu ndese ni tana Cristo cūhva tahū un núu yō. ⁸ Jeé yúcuan cáhán tutu ñí:

Ná ni ndaa ya cuanuhun yā andiví, te ni stutú yá cuehē jeē yíndihyū, cuahān yā jíin.

Te ni saja ya tahū nuū tǎca ñáyuu.

⁹ Te jeē cahán tutu jeē ní ndaa ya, suni cúní cahān jeē xǎhna gā nde andiví ni cuun ya nde nuū cunú gá ñayīvi yáha. ¹⁰ Te Yaā ní cuun, suni máá yá cúu jeē ní ndaa nde nuū súcún gá andiví, návāha cuhun chitú yá ñí cáhnu-ni. ¹¹ Te ni tana ya sǎn sǎn jniñu sáha ñayuu. Chi ni jeni ya sava ñayuu cuu apóstol, te sava ga nacani jnūhun ya, te sava ga scándíje ñayuu jnūhun jeē jnáma ya i, te sava ga coo pastor condito ñayuu cácandíje, te sava ga steén. ¹² Súcuan ni jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jíin jnūhun ya. ¹³ Te súcuan coo nde nduu inuú-ni ndihí yó jíin jnūhun cándíje yó, te cuni vāha yó ndese Yaā cúu Sēhe Yaā Dios. Te súcuan ije vāha yó ndé na cúchitú yó jíin ndihí jnūhun jeē ñūhun chitú ini Cristo. ¹⁴ Te súcuan te ma cóo ga yō nájnūhun sūchi lúli jéé yachí jéni yāha jéni yūcuán ni i, ni ma quívi nduu yō cháha chúcuan jíin sǎn sǎn jnūhun jeé cástéén tēe stáhú jéé yóhyo ndito de squívi de yóhó nuū jnūhun stáhú. ¹⁵ Chi sa suhva na cóndiquīn yō jnūhun ndaā jíin jnūhun cúndáhú ni. Te súcuan cuehnu yó jíin táca jniñu cúní Cristo, Yaā cujéhnú nuū ñáyuu cácuu nájnūhun yiquí cúñu yā, chí ñn na cúu i jíin yá. ¹⁶ Te sáha ya jeē nduu inuú ni tǎcá i jeē cáhije i cuahān i, chí cácuu i nájnūhun ñn na yiquí cúñu jíin yá. Te jéjniñu vāha tǎcá ñn ñn i ndese ni nihīn jniñu i, návāha scuéhnú jnáhan te ije jíjnáhan jíin jnūhun cúndáhú ni.

Jeē ndújeé yó sáha Cristo

¹⁷ Núu súcuan te yāha cúu jnūhun cáhán rí jíin ró, te jeē achí Jítóho yó cúu jeē cahán nihin ri jíin ró: jeē ma cáca ga rō nájnūhun cájica sava ga ñayuu jeē tu jíin i ndese Yaā cúu Yaā Dios, chí cájica i jíin jnūhun jeē jéni sáa-ni máá i. ¹⁸ Te íyó nee nuū jeē níjnūní i, te tu névāha i Espíritu jeē véji nuū Yaā Dios, chí tu jíin i jnūhun ya, siquí jeē níhni ni i. ¹⁹ Te tuá cúcanu i, chí ni quívicoo i jíin jniñu néé ndasí, te ndíhví ni i sáha i tǎcá jniñu jnéhén.

20 Te rohó jíjnáhan ró, nasūu súcuan ní cáscuáha ró jnúhun Cristo, 21 te núu ndaā jeē ní cajini ró jnúhun ya jíin jéē ní cacutūhva ró jíin jnúhun ndaā Jesús. 22 Núu súcuan te na stóo ró táca jniñu ní casáha ró ichi yátá, ná ni casáha ró modo cuní maá ró jeē ní cujnehén ánuá rō ni sáha jniñu neé stáhú jéē ní ndiyo ni rō. 23 Te na ndújeé ánuá rō jíin jéē níjnūní rō. 24 Te na cuáha ró jnúhun ndujeé ró, chi nasáha Yaā Dios rohó nájnūhun cuní maá yá jeē cáca ndaā rō jíin jniñu váha jniñu ndoo.

25 Núu súcuan te ma cahán gā rō jnúhun stáhú, te na cáhán ndaā rō jíin táca jnáhan ró, chi ñn-ni cácuu ndihí yó.

26 Núu vēji ñn jeē squití ni rohó, te ma quití neé ni rō. Te ma quití ni rō nde quēe niāndii. 27 Ma cuáha ró jnúhun jeē sáha jexeén jeē quíví ró cuéchi.

28 Ñayuu ní sacuíhná, ma sacuíhná gá i, chi sa suhva na sájniñu i, te na cócuu i jíin jniñu váha, návāha nihīn i jeē cuáha i nuū ñáyuu cúmanī nuū.

29 Ni ñn jnúhun neé ma cahán rō, chi sa suhva na cáhán rō jnúhun vāha jeē scuéhnu jnáhan jíin jnúhun ya, te sáha jeē quéndōo vāha ñayuu jíni sōho. 30 Ma sáha ró cuéchi návāha ma cucuíhyá ni Espíritu Santo Yaā Dios. Chi Espíritu yā cúu nájnūhun sello jeē steén jeē cúu yó séhe Yaā Dios, nde quiji quíví jínu jniñu jeē jnáma ya rohó.

31 Te na siáá rō táca jnúhun cútucu ni, jíin jnúhun xeēn ni, jíin jnúhun quítí ni, jíin jnúhun cáhán ndevāha, jíin táca jnúhun neé. 32 Chi sa suhva na cóo vāha ni rō jíin jnáhan ró, te cundáhú ni rō i. Na cóne cáhnu ni rō nuū jnáhan ró, nájnūhun ni ine cáhnu ni Yaā Dios nuū rō siquī Cristo.

Ndese cánuú caca ndaā séhe Yaā Dios

5

1 Núu súcuan te na ndácu ró Yaā Dios, chi cácuu ró séhe ya jeē maní yá jíin. 2 Te níni cundáhú ni rō jnáhan ró, nájnūhun ni cundáhú ni Cristo yohó, te ni socō yá maá yá jehē yō, ni cuu ya

nájnuhun ñn londe jeē jeén asīn nuū Yaā Dios jeē ni sócō yá maá yá.

3 Te vijna jeē cácuu ró séhe Yaā Dios, te ni ma sáha ró ni ma ndájnuhun ró siquī jnúhun jíca jnéni, ni táca jniñu jnéhén, ni jnúhun ndiyo ni ndajniñu.

4 Te ni ma cahán rō táca jnúhun sáha jeē cúcanu jnáhan, ni jnúhun cánéé íi, ni jnúhun jeē tu ndé jéjniñu cuítí. Chi táca un tu níhín jniñu. Chi sa suhva na nácuatáhú ró nuū Yaā Dios. 5 Chi je cajini rō jeē ní ñn ñayuu cájica jnéni, ni jeē sáha jniñu jnéhén, ni jeē ndiyo ni táca ndajniñu, ma nihín tahu i quíví i ndaha Cristo jíin Yaā Dios jeē ndacu ya jniñu nuū i. Chi táca jéē ndiyo ni i cúu nájnūhun ídolo i jeē cáchiñúhún i. 6 Te coto ró jéē ma stahú ni ñn i rohó jíin táca jnúhun cáhán saá ni i, chi siquī táca jnúhun neé yáha cúu jeē quiji castigo xeēn Yaā Dios nuū táca ñáyuu nihni ni. 7 Ma quíví nduu rō jíin i núu súcuan.

8 Chi táca quíví saá ni coyūcu ró nájnūhun nuū neé, te vijna chi cáyūcu ró jíin luz maá Jítoho yō, cúu jeē cájecūhun ni rō siquī yá. Te na cáca ró nájnūhun cájica ñayuu jeē steén luz yá ini anuá i. 9 Chi jniñu sáha luz yá jíin yó cúu táca jniñu maní ni, jniñu ndaā, jíin jniñu váha. 10 Scuáha ró sáha ró táca jniñu jeē nújnahan ni maá Jítoho yō. 11 Te ma quíví nduu rō jíin táca jeē tu níhín jniñu jeē casáha ñayuu cáyūcu nájnūhun nuū neé. Chi sa suhva steén rō nuū i jeē tú vāha casáha i. 12 Chi cúcanu yō cahán yō siquī jniñu casáha yuhu maá i. 13 Te luz yá sáha jeē nátūu táca jniñu neé casáha i. Te núu cuatáhú i luz yá te caca i jíin luz ún. 14 Jeē yúcuan cáhán tutu:

Rohó jeē cúhuun ni, jeē nájnūhun quíxí, natahū ni, te quenda ró méhñu ñáyuu jeē cácuu nájnūhun ndíyí.

Te Cristo steén yá luz yá ini anuá rō. Achí tutu.

15 Núu súcuan te coto vāha ró ndese caca yúcún ró. Te ma cáca ró nájnūhun cájica ñayuu canéé, chi caca ró nájnūhun cájica tēe ndíchí. 16 Ma snáa rō tiempo, chi condíhví ni rō jíin

jniñu ya, chi íyó cuéhē cuēchi quivī yáha. ¹⁷ Núu súcuan te ma cóo néé xínī rō, chi sa suhva na jécūhun vāha ni rō na jniñu nújnahan ni maá Jítóho yō. ¹⁸ Te ma nájini ró, chi tīvi ró sáha. Chi sa suhva na ndúcú ró jeē cúnuú Espíritu Santo ini anuá rō. ¹⁹ Te cahān rō jíin jnáhan ró jíin salmo jíin himno, yaa ií jeē cahān jnūhun ya. Te ini anuá rō cahān rō jíin yá jíin táca yaa, chi yūcuan cúu jeē jíta ánuá rō nuū yā chíñúhún ró yā. ²⁰ Te níni nacuatáhú ró síquī tācá-ni nuū Tatá yō Yaā Dios te ndacunehen ró síhvī máá Jítóho yō Jesucristo.

Ndese squícu vāha ñayuu cá candíje nuū jnáhan i

²¹ Te cuatáhú ró nuū jnáhan ró síquī jeē cáhiyo yíñúhún ró nuū Cristo.

²² Róhó ñahan cácuu ñasihí, cuatáhú ró nuū yí ró, nájnūhun jétáhú ró nuū Jítóho yō. ²³ Chi yíi cújéhnú nuū ñasihí, nájnūhun cújéhnú Cristo nuū yohó ñayuu cá candíje, jeē cácuu yó nájnūhun yíqui cúñu yā, chi ñn na cúu yó jíin yá. Te máá yá jnáma ya yohó. ²⁴ Chi nájnūhun ñayuu cá candíje cájetáhú i nuū Cristo, suni súcuan ñasihí cuatáhú ña ndíhi jeē cahān yí ña.

²⁵ Te róhó téé cácuu yíi, cundáhú ni rō ñasihí ró, nájnūhun ni cundáhú ni Cristo yohó ñayuu cá candíje, te ni socō yā maá yá jehē yō. ²⁶ Súcuan ni sáha ya jeē cóo ndoo coo ií yō nuū yā, te ni nacate ya anuá yō jíin jnúhun ya jíin jéé ní jendute yó. ²⁷ Te yóhó ñayuu cá candíje chi cuiñi yó núu yā, te luu kujéhnú yó. Te ma cóndee cuēchi ánuá yō, ni jeē tú luu, ni ñn jeē súcuan, chi sa suhva coo ndoo coo ií yō nuū yā, te tú na vé cumanī gā. ²⁸ Te nájnūhun Cristo ni cundáhú ni yā ñayuu cá candíje, suni súcuan cánuú jéé cundáhú ni yí ñasihí de, nájnūhun cundáhú ni de máá de. Chi téé cundáhú ni de ñasihí de, máá de cundáhú ni de. ²⁹ Chi ni ñn téé tu jíto uhū de máá de, chi sa suhva yéji de te ndító yúcún de máá de. Te suni súcuan sáha Cristo jíin yóhó ñayuu cá candíje nuū yā. ³⁰ Chi cácuu yó nájnūhun yíqui

cúñu yā, te ñn ñn yó cácuu nájnūhun ñn ñn parte yíqui cúñu yā. ³¹ Te suu cúu nájnūhun téé jeē stóo de tátá de náná de, te quijnáhan de jíin ñasihí de, te ñn na cúu ndíndúú de. ³² Yóhyo jéhnú jnūhun sáhi yáha, te cáhān rī jeē ñáyuu cá candíje suni súcuan quijnáhan i jíin Cristo. ³³ Te suni súcuan ná ñn ná ñn ró cundáhú ni rō ñasihí ró, nájnūhun cundáhú ni rō maá ró. Te ñasihí na cúu yíñúhún ña jíin yí ña.

6

¹ Te róhó séhe jíjnáhan ró, cuandíje ró núu tátá rō nuū naná rō, chi yūcuan cúu jeē váha sáha ró jéé candíje ró Jítóho yō. ² Chi yáha cúu ñn jnáhan jeē uxí jnūhun ndácu jniñu jeē ni jéhe ya, te xíhna gā jnūhun yáha ndíso tahū: Coó yíñúhún ró nuū tátá rō nuū naná rō, ³ návāha quendōo ndetū rō, te nāhān cotecu rō ini ñayívi yáha. Achí.

⁴ Te róhó tátá jíjnáhan ró, ma squítí ni rō séhe ró, chi sa suhva scuéhnú ró i jíin jnúhun cuandíje i, te stéén rō nuū i jeē candíje i máá Jítóho yō.

⁵ Te róhó mozo jíjnáhan ró, cuandíje ró núu patrón rō ñayívi yáha, te coo yíñúhún ró te conso íyo ró núu de. Te na sájniñu ndaā sájniñu ndíje ró, cani ni rō jeē nuū Cristo cájejniñu ró. ⁶ Ma sájniñu ndúxí ró jeē máá jéé coto de te cuajnúhún de róhó. Chi sa suhva sáha ró cuenta jeē mozo Cristo cácuu ró. Te sáha ró jéé nújnahan ni Yaā Dios nde jíin ini jíin ánuá rō. ⁷ Te na cúsi ni rō sájniñu ró, te na cáni ni rō jeē nuū máá Jítóho yō cájejniñu ró, nasūu núu ñáyuu. ⁸ Chi je cájini rō jeē jniñu váha sáha ñn ñn ró, te nihīn rō yáhu jniñu yúcuan núu máá Jítóho yō, vésú cúu ró mozo chí téé sájniñu máá.

⁹ Te róhó patrón jíjnáhan ró, suni súcuan sáha ró jíin mozo rō, te ma cahān xeēn rō jíin i. Chi na cócuhun ni rō jeē suni máá ró jíin máá i yíhi ró ndaha Jítóho yō, Yaā ndeé andívi. Te tu sáha ya cuenta ndese cúu ñn ñn ñayuu, chi inuú sáha ya jíin i.

Na cúcutú yó jíin táca fuerza Yaā Dios

10 Te íyó inga jnūhun, hermano jinnáhan ró. Nducú ró jeē na cóo fuerza ini ró jín fuerza maá Jítóho yō jeē nduú yá jín ró, chi íyó téyí poder yā. 11 Na cúcutú ró jín táca fuerza Yaā Dios, návāha cuu cuiñi nihin ró jeē ma stahú jexeén rōhó. 12 Chi nájñuhun jeē cájejnáhan yó jín táca jeē neé. Te nasūu ñáyuu cóu jeē cájejnáhan yó jín, chi sa suhva jín táca táchī cájica nuū sucún. Te yūcuan cóu jeē cácujeñmu, jín jeē cándiso jniñu, jín jeē cándacu jniñu nuū ñáyuu ñayiví yáha jeē nájñuhun cájica i nuū neé. 13 Núu súcuan te na cúcutú ró jín ndihi fuerza Yaā Dios, návāha cuu cuiñi nihin ró quíví jito ndee jexeén rohó. Te súcuan coo tūhva ró jín táca ndihi jeē cuiñi nihin ró jín. 14 Núu súcuan te cuiñi nihin ró jín jnūhun ndaā jeē cóu nájñuhun jeē yíhi nihin sanchíi chíji ró. Te sácutú ró maá ró jín jnūhun caca ndaā rō, te suu cóu nájñuhun jeē cúcutú soldado jín sahma cáa jeē ndihyú de. 15 Te níni cotūhva ró nacani ró jnūhun ndeyí jnūhun sīi ni jeē véji nuū Yaā Dios. Te suu cóu nájñuhun jeē chíhi soldado ndijēn jehē de. 16 Te jeē cánuú gá cóu jeē candíje ró jeē iyó yá jín ró. Te yūcuan cóu nájñuhun jeē tūhva ró máa ró yatā ñin escudo. Chi jín jnūhun cándíje ró un te cuu ndahva rō ndihi jeē tají máa jéxeén, jeē cóu nájñuhun nduva jeē cayú yáñuhūn punta. 17 Te cuiñi ró jín jnūhun ni jnama ya rohó, jeē cóu nájñuhun ñin lélú cāa. Te cuajniñu ró jnūhun jeē yosó núu tútu Yaā Dios jeē ni jéhe Espíritu Santo nuū rō. Chi yūcuan cóu nájñuhun jéjñiñu soldado espada de. 18 Te níni cácan tahú rō nuū Yaā Dios siquī ndihi-ni, te cahān ndahú ró jín yá jín fuerza Espíritu. Núu súcuan te ndito na cóo ni rō, te ma jécuiñi rō jeē cacán tahú rō jehē táca ñáyuu maá yá. 19 Te suni cahān rō jehē rī, návāha nihīn rī jnūhun cahān rī, te coo téyí ni rī nacani cájī rī jnūhun jeē jnama ya yohó, suu jnūhun jeē ní yisāhí un. 20 Chi ni tají yá ruhū jeē jíca ri nacani ri jnūhun ya ún, te jeē

siquí un cóu jeē íne ri vecāa. Te na cacán tahú rō jeē coo téyí ni rī cahān rī jnūhun ya, nájñuhun cánuú cahān rī.

Saludo jeē sándihí

21 Tíquico cóu ñin hermano jeē maní yō jín, te cóu de tēe squícu vāha chíndéé ñájñáhan jín rí nuū jniñu máa Jítóho yō. Te máa de castūhún ndihi ndese cuahān jniñu ri te ndese íyó rí. 22 Jeē yūcuan ní tají rí de cuajeē de nuū rō, návāha cachi de ndese cáhīyo ri, te coo ndeyí ni rō jinnáhan ró sáha de.

23 Te ñūhun ni rī jeē Tatá yō Yaā Dios jín Jítóho yō Jesucristo, na sáha ya jeē coo ndeyí coo sīi ni táca rōhó jéé cácuu hermano, te coo maní gā rō jín yá, te candíje vāha ró. 24 Te ñūhun ni rī jeē na sáha ga yā jeē vāha rōhó jinnáhan ró jéé maní ndije ró jín Jítóho yō Jesucristo. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU FILIPOS

¹ Máá rí cúu Pablo jín Timoteo, mozo Jesucristo. Te cátee ri carta yáha cuájeē nuū tāca róhó hermano cáyūcú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee ri nuū tēe cándiso jniñu cándito róhó, jín nuū tēe cájejniñu mēhñu ró. ² Te cáñuhun ni rī jeē Tatá yō Yaā Dios jín Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sñi ni rō.

Jeē jicán tahu Pablo jehē ñáyuu cácandíje

³ Tāca jínu jeē núcūhun ni rī rohó jijnáhan ró, te nácuatáhú rí nuū Yaā Dios. ⁴ Te náa jicán tahu rī, te níni cúsi ni rī jicán tahu rī jehē rō. ⁵ Chi ni chindéē ñájnáhan ró jín rī jeē scáca yó jnúhun váha ya, nde quiví ní cacandíje ró te nde vijna. ⁶ Te jíní ndije ri jeē maá Yaā ní squéjéé jniñu váha jín ró, cocu ya jín ndé quiví ndíji Jesucristo, te sínu ndihí ya. ⁷ Te íyó váha jeē súcuan jéni ni rī siquí tāca róhó, chi yóhyo maní rī jín ró, te inuú-ni ni sáha ya jeē váha yóhó. Te súcuan cúu vésú íne ri vecāa chí vésú cuiñi ri nuū tāca tēe cújéhnu, cahān rī jehē jnúhun jeē jnáma ya yohó jéē jnúhun ndaā cúu. ⁸ Chi Yaā Dios jíní yā ndese yóhyo maní rī jín ró jijnáhan ró, nájnūhun yóhyo maní Jesucristo jín yó. ⁹ Te jicán tahu rī jeē na cáa ga jeē cundáhú ni rō jnáhan ró, jín jéē na jécūhun ga ni rō te cundíchí ró jín táca jnúhun ya. ¹⁰ Te súcuan te cuu nacāji ró táca jéē váha condiquín rō, te caca ndaā rō, te ma cóo ni ñn cuēchi siquí rō quiví ndíji Cristo. ¹¹ Te súcuan te cayā cuehē jniñu váha jeē sáha Jesucristo jín ró. Te sáha jeē coo yíñuhún ñáyuu jín Yaā Dios te cahān i jeē yóhyo luu cújéhnu ya.

Jnúhun jeē técu nduú yó jín Cristo

¹² Hermano, cúni rī jeē na cúcáhnu ni rō jijnáhan ró ndese ni sáha jnúndóho ni ndoho rī. Chi ni sáha jeē ni jítē núu ga jnúhun jeē jnáma ya yohó. ¹³ Chi táca soldado cáyūcú ini palacio, jín táca gá ñáyuu, cájini i jeē íne ri vecāa jeē siquí Cristo. ¹⁴ Te siquí jeē íne ri vecāa, jeē yúcuan cúu jeē vihyá gā nihín ndeyí ni cuehē táca hermano cácandíje nuū Jítóho yō. Te cáhīyo téyí gá ni de nácani de jnúhun ya, te tu ndé ndínuu ni de.

¹⁵ Te ndaā chi sava tēe cánacani de jnúhun Cristo siquí jeē cuesún ni de jín jéē nduxí de. Te sava ga de chi sa suhva cánacani de jnúhun ya siquí jeē váha ni de. ¹⁶ Sava de cánacani jnúhun Cristo siquí jeē nducú de jeē váha máa-ni de, te tú ndije de, chi cácuni de jeē nihín gā rī jnúndóho jeē íne ri vecāa. ¹⁷ Te sava ga de chi cánacani de jnúhun siquí jeē cundáhú ni de ruhū, chi cájini de jeē íne ri vecāa siquí jeē cahān rī jehē jnúhun jeē jnáma ya yohó. ¹⁸ Tú na vé sáha núu súcuan, chi táca-ni modo cascuíté núu de jnúhun Cristo, vésú núu ndije de chí tuú. Te yāha cúu jeē cúsi ni rī sáha.

Te suni cusí gā ni rī, ¹⁹ chi jíní rī jeē tāca jéē yáha sáha jeē váha ga coo jín rí, chi cájicān tahu rō jehē rī, te Espíritu Jesucristo chindéē ñáhán yá ruhū. ²⁰ Chi ñúhun ni rī te cúu ndasí ni rī jeē ma sáha ri ni ñn jeē sáha jeē cucanu ri nuū yā. Chi sa suhva coo téyí ni rī cahān rī jnúhun ya, návāha ndujéhnu ga Cristo sáha máa rí vijna, nájnūhun je ni sáha ri ní véji ri, te vésú na cótecu rī chí vésú na cúu rī. ²¹ Chi jeē técu rī cúu jeē nduú rí jín Cristo, te jeē cúu rī cúu jeē vihyá gā váha coo jín rí. ²² Te núu cotecu gā rī, te cuu scáca ga rī jniñu máa Jítóho yō. Núu súcuan te tu cúcáhnu ni rī ndé ñn cúu jeē váha ga, núu jeē cótecu rī chí jéē cúu rī. ²³ Chi mēhñú ndíndúú jnúhun yáha íne nīhin rī. Chi ñn cúu jeē cuní rī quihín rī condee rī jín Cristo, chi yúcuan cúu jeē vihyá gā váha coo jín rí. ²⁴ Te suni cánuú gá jeē cótecu gā

rī jeē siquí rohó jíjnáhan ró. ²⁵ Núu súcuan te íyó ndáā ni rī jeē quéndōo ri condee gā rī jíin ró, návāha stéén gā rī nuū rō ndese caca vāha ga rō jíin yá, te cusī gā ni rō jíin jnúhun cá candíje ró. ²⁶ Núu súcuan te condee tucu ri jíin ró, te cusī teyí ni rō jeē siquí ruhū, sáha máá Cristo Jesús.

²⁷ Te máá ĩn-ni jeē condihvī ni rō caca ndaā rō, nájnūhun cánuú caca ró siquí jeē cá candíje ró jnúhun Cristo. Yūcuán na te vēsú na jíin rī coto jnáhan yó, chí condee jíca rí, te nihīn rī jnúhun ro jēe cáhīn nihin ró jíin jnúhun ya, te cáhīyo ĩnuú ni rō, te ĩnuú-ni cánducú ndeyí ró siquí jnúhun jeē cá candíje yó jēe jnáma ya yohó. ²⁸ Te ma yūhú cuiti rō sáha jeē cájito uhū rohó. Chi jeē jíto uhū i rōhó, yūcuan stéén jeē jnahnú ndetū i, te suni stéén jeē cácu ánuá máá ró jíjnáhan ró sáha Yaā Dios. ²⁹ Chi ni jēhe Cristo uū jeē váha nuū rō: nasūu máá ĩn-ni jeē candíje ró yá, chi suni jeē na ndóho ró jēe siquí yā. ³⁰ Chi máá rí jíin rōhó jíjnáhan ró, nájnūhun jeē cájejnáhan yó jíin táca jēe neé. Chi ni cajito ró jēe súcuan ni sáha máá rí, te cánihīn rō jnúhun jeē sáha ga rī nde vijna.

Jeē ni sáha suchí yá maá yá te ni ndujénu ya

2

¹ Núu súcuan te sáha Cristo jeē cáhīyo ndeyí ni rō, jíin jēe cúsi ni rō siquí jeē váha ni yā jíin ró. Te ndéé Espíritu yā jíin ró, te manī rō jíin jnáhan ró, te cájito ndáhú ró i. ² Núu súcuan te na cócu ga rō jíin táca jnúhun yáha, návāha cusī teyí ni rī. Te ĩnuú-ni na cóo ni rō, te coyūcu manī rō, te ĩnuú na cóo ánuá rō, te ĩnuú cani ni rō. ³ Te ni ĩn jniñu ma sáha ró jēe nducú ró jeē váha máá-ni ró, ni jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jnáhan ró vēsú máá ró. ⁴ Te ma cóndihvī ni rō máá-ni jniñu jeē quéndōo vāha máá-ni ró, chí suni na cóndihvī ni rō jniñu jeē quéndōo vāha jnáhan ró.

⁵ Te na cáni ni rō jíjnáhan ró nájnūhun ni jeni ni Cristo Jesús. ⁶ Chi máá yá kujénu ĩnuú yá jíin Yaā Dios, te vēsú súcuan te tu ní jéni ni yā jeē kujénu ĩnuú yá jíin Yaā Dios. ⁷ Chi ni siaá yā jeē kujénu ya, te ni nduu ya nájnūhun índāa mozo, te ni cacu ya ni nduu ya tēe. ⁸ Te ná ni nduu ĩnuú yá jíin tēe, te ni sáha suchí yá maá yá. Te ni jendije ya nde jíin jnúhun jeē cúu yā, te nde jíin jnúhun canu jeē cúu yā jíca cruz. ⁹ Jeē yúcuán ní sáha Yaā Dios jeē yóhyo ni ndujénu luu ya, te síhví yá kujénu ndasí gá nuū táca gá síhví. ¹⁰ Te táca jēe cáhīn andiví jíin ñáyiví jíin chíji ñáyiví, núu na cúni i síhví Jesús te jecuiñi yití i. ¹¹ Te cahān ndaā ndivii i jeē Jesucristo cúu máá Jítoho. Te súcuan stéén i jeē yóhyo cújénu máá Tátá yā Yaā Dios.

Ñayuu cá candíje cúu i nájnūhun quimi jeē ndíndēe

¹² Núu súcuan hermano jíjnáhan ró, nájnūhun níni ní cajendije ró jnúhun ni cahān rī ná ni condee rī jíin ró, suni súcuan víhyá gā cuandije ró vijna jeē ndeé jíca rí jíin ró. Te condihvī ni rō jeē caca ndaā rō jíin jnúhun ní jnama ya rohó, te caca yíñuhún ró conso ĩyo ró núu yā. ¹³ Chi Yaā Dios jícu ya jíin ró jeē cúu ni rō sáha ró jniñu váha, te chíndēe ñáhán yá rohó jēe squícu ró jniñu nújnahan ni yā.

¹⁴ Ndihi jeē sáha ró, ma cahān sōo ró, ni ma tejnáhan ró, ¹⁵ návāha cuu ró séhe Yaā Dios jeē tú na cuēchi coo siquí rō te coo ndaā rō. Te caca ndoo ró méhñu ñáyuu nīhni ni jeē casáha neé. Chi méhñu ñáyuu un stéén rō jniñu váha ró, te súcuan cácuu ró nájnūhun quimi jeē ndíndēe núu neé ñáyiví. ¹⁶ Te stéén rō jnúhun ya nuū i jeē cótecu i ní cáni sáha. Te súcuan te cusī teyí ni rī quiví ndíji Cristo, chí cuni rī jeē tu ní jíca cáhá rí, ni tu ní sájniñu cáhá rí. ¹⁷ Te vēsú na cúu rī jeē socō rī máá rí nuū yā jeē siquí rohó, te yūcuan cúu jeē nducú rí scandíje ga rī rohó, návāha socō rō máá ró sáha ró jniñu váha jeē cá candíje ró yá. Jeē yúcuán cúsi ni rī, te cúni rī jeē suni cusī ni rō

jiín rí jijnáhan ró. ¹⁸ Núu súcuan te na cúsī ni maá ró jiín rí, te inuú na cúsī ni yō jijnáhan yó.

Jnūhun Timoteo jiín Epafrodito

¹⁹ Te ñūhun ni rī jeē cuáha máá Jítóho yō Jesús jnūhun jeē tají yáchī rī Timoteo jeē de nuū rō, návāha ndusī ni rī núu na níhín rī jnūhun ndese cáhīyo ró. ²⁰ Chi tuá na inga tēe íyo yáha jēe inuú jéni ni jiín rí, nájnūhun máá de jeē ndihví ndije ni de jehē rō. ²¹ Chi tācá de cánducú de jeē cúu máá de, te nasūu jēe cuní Cristo Jesús. ²² Te je cájini rō jeē tēe vāha cúu Timoteo. Chi nájnūhun sēhe jíin tátá, súcuan ni jejniñu de jeē nácani de jnūhun vāha ya jiín rí. ²³ Núu súcuan te ñūhun ni rī tají rí de jeē de nuū rō, te núu je ni cucáhnū ni rī ndese coo jíin rí. ²⁴ Te jéni ndije ni rī jeē cuāha Jítóho yō jnūhun jeē suni máá rí jinū yachī rī nuū rō jijnáhan ró.

²⁵ Te suni jéni ni rī jeē cánuú tají rí hermano yō Epafrodito jeē de, chí tēe sájniñu jíin rí siquī jnūhun ya cúu de te chindéē ñájnáhan de jíin rí. Chi máá ró ni catají ró de jeē cuajniñu de nuū rī tāca jēe cúmanī nuū rī. ²⁶ Chi yōhyo cúu ni de ndacoto tucu de nuū rō jijnáhan ró. Te ni cucuíhyá ndasí ni de, chí ni canihín rō jnūhun jeē ní cocuhū de. ²⁷ Chi jendaá ni cocuhū de, te je yajni cuu de núu. Te Yaā Dios ni cundáhú ni yā de, te nasūu máñúhún-ni de, chí suni ruhū, návāha tú caa ga cucuíhyá ni rī jehē de núu. ²⁸ Jeē yúcuan cúu jeē ndihví gā ni rī tají rí de nuū rō, návāha ndusī ni rō jeē ndácoto tucu ró núu de. Te suni ruhū ma cucuíhyá ndasí gā ni rī. ²⁹ Núu súcuan te na cúsī ni rō jeē nájinū de nuū rō, chí cúu de hermano yō jeē candíje de maá Jítóho yō. Te coo yíñúhún ró jíin táca tēe índāa nájnūhun cáa de. ³⁰ Chi jeē siquī jniñu Cristo cúu jeē jé yajni cuu de núu. Chi ni chundeyí ni de jeē cúu de siquī jeē chindéē ñáhán de ruhū jíin jniñu jeē tu ní íyo modo sáha máá ró jijnáhan ró.

Jnūhun jeē cáca ndaā vāha yó

3

¹ Te vijna, hermano jijnáhan ró, na cúsī ni rō jíin máá Jítóho yō. Ruhū chí tu jnánini ni rī jeē tēe tucu rī jnūhun yáha núu rō, chí cuajniñu jeē quéndōo vāha ga rō. ² Condito ró máá ró nuū tēe casáha jniñu néé, jeē cándāa ná cándāa ina. Chí cánducú de stújí de róhó jēe casáha de circuncidar, te tu casáha de jniñu ndaā. ³ Te máá yó cácuu ñayuu ni cuu circuncidar ndije, chí cáchiñúhún yó nuū Yaā Dios nde jíin ini jíin ánuá yō, te cácusī ni yō jeē yihí yó ndaha Cristo Jesús, te tu tenuū yō jeē quéndōo ndaā yō jíin jniñu jeē sáha máá-ni yó. ⁴ Núu jeē súcuan cúu te ruhū chí suni cuu tenuū rī jniñu jeē sáha máá-ni ri nuú. Chí núu ndé tēe jéni ni de jeē cuu tenuū de máá de, te ruhū chí víhyá gā cuu tenuū rī maá rí. ⁵ Chí ni casáha circuncidar ruhū nuū uná quívi ná ni cacu rī. Te yucūn Israel cúu rī, te suni jnáhan yucūn Benjamín, te in hebreo sēhe hebreo cúu rī. Te suni ni cuu rī tēe grupo fariseo jeē ni squícu rī tāca ley jnáhan ñuu rī hebreo. ⁶ Te ni jito xeēn rī ñayuu cá candíje, chí yōhyo ni condihví ni rī jeē ma sáma i modo ley jenahán. Te ni in tu ní cúu cahán jeē tu squícu rī ley un, chí ni squícu vāha rī. ⁷ Te tāca jēe ní tenuū rī ún, chí sáha ri cuenta jeē tu ndé níhín jniñu cuiti, chí vijna te ni candíje rī Cristo. ⁸ Te suni chíhi rī cuenta jeē vāha ga na náa ndihí jeē ní tenuū rī ún, chí vāha ndasí gā cúu jeē ni quívi rī ndaha máá Jítóho rī Cristo Jesús. Te jeē siquí maá yá te ni siaá rī ndihí ún, te sáha ri cuenta jeē nájnūhun yācá-ni cúu. Chí ni quívi rī ndaha Cristo, ⁹ te ndúú yá jíin rí. Te tuá nducú rí quéndōo ndaā rī jeē jíin ley un, chí sa suhva Yaā Dios ni ndahva yā cuēchi rī jeē ní candíje rī Cristo. Chí súcuan squéndōo ndaā yā ñayuu cá candíje. ¹⁰ Te vijna te cúní rī jecūhun vāha ni rī ndese Yaā cúu ya. Te cúní rī jeē poder jeē ní natecu yā cone jíin rí. Te cúní rī ndoho rī jíin yá, te nde jinū rī ndoho rī nájnūhun ni ndoho máá yá jeē ni jíhī yā. ¹¹ Chí yōhyo ñūhun ni rī natecu rī nájnūhun

ni natecu yā.

Jeē nducú ndéyí Pablo sínu de carrera de

¹² Te ná tu nihīn rī ndihī jeē ni cáhān rī ún, ni ná tu ije ri jíin. Te nducú ndéyí rí síquī ún, chi ñúhun ni rī jeē nihīn rī tāca un, chi jeē yúcuān cúu jeē ni níhīn Cristo Jesús ruhū xīhna gā. ¹³ Hermano jijnáhan ró, tu sáha ri cuenta jeē jé ni nihīn rī ndihī ún. Te iyó ñn jeē sáha ri, cúu jeē squéndōo ri tāca jéé ní cuu ichi yátá, te nducú ndéyí rí nihīn rī tāca jéé iyó ichi núú. ¹⁴ Chi cúu un nájnūhun jeē jínu ri ñn carrera cuahān rī nde jínu rī andiví, te nihīn rī premio jeē cuáha Yaā Dios. Chi ni cana ya yohó jéé quihín yō nuū yā andiví síquī jeē yāhi yó ndaha Cristo Jesús.

¹⁵ Te tāca yó jeē jé ni ije vāha yó jíin jnúhun cándíje yó, súcuān na cáni ni yō. Te núu ndé ñn ró sñn jéni ni rō, te Yaā Dios suni stéén yā nuū rō jeē násūu súcuān cúu. ¹⁶ Te jíni ñúhún cani ni yō te caca yó modo jeē quijnáhan jíin jéé ni nihīn yō.

¹⁷ Hermano, na ndácu ró rúhū jijnáhan ró. Te condēhe váha ró ndese cájica ñayuu ndaā, chi cájica i nájnūhun ni castéén rī nuū rō. ¹⁸ Te je ni cuu tijni jínu ni cahān rī jíin ró, te nde ndahyú rī cahān tucu ri vijna, jeē iyó cuéhē ñayuu cájica i ñn modo jeē steén jeē jíto uhū i jnúhun jeē ni jíhī Cristo jicā cruz. ¹⁹ Te ñn quiví te jnahnū ndetū ñayuu ún. Chi máni jeē cáji vāha i cúu jeē cáchiñúhún i. Te sátéyí i máá i jíin jniñu néé jeē jéhe jnúhun canu. Te máni máá jéé iyó ini ñayiví cúu jeē ndihví ni i. ²⁰ Te máá yó chi ñayuu coyūcú andiví cúu yó, te cándetu yó jéé nde yūcuān ndiji Jítoho yō Jesucristo, Yaā jnáma yohó. ²¹ Te máá yá nasama ya yiqui cúñu ndahú yó, návāha nduu yó nájnūhun cáa máá yá jeē lúu cújéhnu ya. Te súcuān sáha ya jíin poder yā jeē cújéhnu ya síquī ndihī-ni.

Níní na cúsiñ ni yō jíin Jítoho yō

4

¹ Núu súcuān hermano jijnáhan ró, cuiñi ñhin ró jíin jnúhun máá Jítoho yō. Chi yōhyo manī rī jíin ró, te cúní rī jeē coto jnáhan yó, te cúsiñ ni rī jíin ró, te nájnūhun premio rī cácuu ró.

² Te cáhān ndahú rí jíin róhó Evodia jíin Síntique jeē ñnuú na cóo ni rō, chi cácuu ró hermana jeē cácuandíje ró máá Jítoho yō. ³ Te suni cáhān ndahú rí jíin róhó, téé jeē ní chindéé ñájnañan vāha jíin rí, jeē na chindéé ñáhán ró hermana un, chi ni casájniñu ñhin ña jíin rí síquī jnúhun jeē jnáma ya yohó. Te suni súcuān ni sáha Clemente jíin sava ga ñayuu ni sájniñu jíin rí. Te ni jecosō síhví i nuū libro jeē yosó síhví ñayuu cotecu ní cáni.

⁴ Te níní na cúsiñ ni rō jijnáhan ró jíin máá Jítoho yō. Te inga jínu cáhān rī jeē na cúsiñ ni rō. ⁵ Sáha vāha ró jíin táca ñayuu, návāha cuni i jeē súcuān vāha ni rō. Chi máá Jítoho yō, yajni-ni cúu ya jíin ró.

⁶ Ma nácani ndasí ni rō síquī ni ñn. Chi sa cahān rō jíin Yaā Dios síquī tāca jéé nácani ni rō. Chi cacān tahu rō, te cahān ndahú ró, te suni nacuatáhú ró nuū yā. ⁷ Yūcuān na te sáha Yaā Dios jeē cóo ndeyí coo síñ ndasí ni rō, te súcuān coo jíin ró nde cūhva jeē ma jécūhun ni rō ndese cúu jeē sáha ya ún. Te condito vāha ya anuá rō jíin jéé níjnūní rō, coo cuehē jnúhun ndeyí jnúhun síñ ni jíin ró, síquī jeē yāhi ró ndaha Cristo Jesús.

Jeē na cáni ni yō síquī tāca jéé vāha

⁸ Te ñn na jnúhun iyó, hermano jijnáhan ró. Na cáni ni rō síquī tāca jéé iyó ndaā, jíin jéé sáha yíñúhún, jíin táca jniñu sáha vāha, jíin jniñu iyó ndoo, jíin táca jéé iyó manī ni, jíin jéé lúu sáha. Te máni na núcūhun ni rō tāca jéé vāha jeē sáha jeē nácuatáhú ró nuū yā.

⁹ Tāca jéé ni stéén rī nuū rō, jeē ní cacutūhva ró núu rī, jíin jéé ní cajini ró ní cahān rī, jíin jéé ní cajito ró ni sáha ri, tāca yúcuān suni na sáha máá ró. Yūcuān na te máá Yaā jeē jéhe jnúhun ndeyí síñ ni, coo ya jíin ró.

Jeē ní casocō ñayuu Filipos nuū Pablo

¹⁰Te yōhyo cúsiñ ni rī sáha máá Jítóho yō, chi vijna te ni canucūhun tucu ni rō jeē chindéé ñáhán ró rúhū. Te nasūu jéē ní naa ni rō sáha ró súcuan, chi siquī jeē tu ní íyo modo. ¹¹Te nasūu jéē cahán rī siquī jeē ndóho ndáhú rí, chi je ni cutūhva ri cusīñ ni rī jíin jéē névāha ri. ¹²Jíní rī cotecu ndahú rí, te jíiní rī cotecu cucá rí. Chi ni cāan ri jíin táca-ni, núu jeē ndutú chíji ri chí jéē ndóho ri sōco, núu jeē cónevāha cuehē rī chí jéē cúmanī nuū rī. ¹³Ndihī-ni cúu sáha ri, chi máá Cristo jéhe ya fuerza ini rī. ¹⁴Te vēsú súcuan te vāha ni casáha ró jéē ní chindéé ñáhán ró ruhū jíin jnúndóho jeē ndóho ri.

¹⁵Te róhó ñáyuu ñuu Filipos, je cájini rō ndese ni cuu. Chi nde quivī ní quejéé rí nácani ri jnūhun jeē jnáma ya yohó, ná ni quenda ri Macedonia vēji ri, te ni casocō rō xūhun núu rī siquī jeē ní canihīn rō jnūhun ya ni nacani ri. Te ni ñn grupo ñayuu cá candíje tu ní sáha súcuan, chi máá-ni róhó jíjnáhan ró. ¹⁶Te ná íne ri ñuu Tesalónica, te ni catají ró jecu jeē jíni ñúhún rí, ni jíinū ñn uū jíinu. ¹⁷Te nasūu jéē nducú rí jeē cuáha ró núu rī, chi sa nducú rí jeē na cáyá gā jniñu vāha ró, návāha cayā tahū rō nuū Yaā Dios. ¹⁸Chi je ni nihīn rī ndihī jeē jíni ñúhún rí, te ndóo ga. Te íyó cuéhē nuū rī, chi ni nihīn rī jeē ní catají ró vēji jíin Epafrodito. Te jeē ní catají ró cúu nájñūhun ñn ofrenda jeē asín jeén, ni casocō rō nuū Yaā Dios, te cúsiñ ni yā jíin. ¹⁹Te Yaā Dios chi cuāha ya nuū rō tāca jéē cúmanī nuū rō, chi cucá ndasí yá jíin táca jéē vāha jeē lúu íyó núu Cristo Jesús. ²⁰Te na cáhán yō jeē yóhyo luu cújéhnū Tátá yō Yaā Dios ní cáni. Amén.

Saludo jeē sándihí

²¹Cachi rō nuū tāca ñáyuu maá yá jeē sándeyí ni i, áchí rí, chi cá candíje i Jesucristo. Te hermano yō cáyūcu jíin rí yáha, cácahān de jeē sándeyí ni rō jíjnáhan ró. ²²Te tāca ñáyuu maá yá jeē cáhīyo yáha, suni cácahān i jeē

sándeyí ni rō. Te ñayuu cáyūcu vehe rey cújéhnū ñuu Roma yáha, máá i cácahān gā súcuan.

²³Te ñúhun ni rī jeē maá Jítóho yō Jesucristo, na sáha ga yā jeē vāha róhó jíjnáhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU COLOSAS

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo ² cátee ri carta yáha cuájeē nuū rohó ñáyuu ñuu Colosas, jeē cácuu ró ñáyuu maá yá jeē cá candíje vāha nuū Cristo. Te cáñuhun ni rī jeē Tatá yō Yaā Dios na sáha ga yā jeē váha róhó, te sáha ya jeē coo ndeyí coo sī ni rō.

Jeē jicán tahu Pablo jehē ñáyuu cá candíje

³ Te jeē cájicān tahu rī nuū Yaā Dios, Yaā cúu Tatá maá Jítóho yō Jesucristo, te níni cánacuatóhú rí nuū yā jeē síquí rohó jíjnáhan ró. ⁴ Chi ni cajini jñuhun ri ndese vāha cá candíje ró Cristo Jesús, jíin ndese cá cundáhú ni rō tāca ñáyuu maá yá. ⁵ Chi cáñuhun ni rō nihīn rō jeē ñuhun vāha nde andiví cuu ró. Chi ná ni cajini ró jñuhun ndaā jeē jnama ya rohó, te ni caquejéé ró ñuhun ni rō. ⁶ Te jñuhun un jéē ní canacani nuū rō, chi ndúcuehē cuahān te níhín jñíñu ní cáhnu ñayiví. Te suni súcuan ni sáha jíin róhó jíjnáhan ró ndé quiví ní cajini ró te ni cajecūhun ni rō jeē ndaá cúu jeē yóhoyō vāha ni Yaā Dios jíin ró. ⁷ Te jñuhun un cúu jeē ni stéén Epafras nuū rō, tēe sájñíñu jíin rí jeē maní rī jíin. Chi cúu de tēe jéjñíñu síquícu vāha nuū Cristo jeē ndíto de róhó. ⁸ Te máá de ni castūhun núu rī síquí rohó, ndese cá cundáhú ni rō jnáhan ró sáha máá yá.

⁹ Jeē yúcuan suni tu cájecuñī rī jeē cájicān tahu rī jehē rō, nde quiví ni níhín rī jñuhun ún te nde vijna. Te cájicān rī nuū yā jeē na jécūhun vāha ni rō te coo ndíchí ró jíin jñuhun ya, sáha máá Espíritu, návāha cuni rō ndihí ndese nujnahan ni maá yá. ¹⁰ Te cájicān rī jeē caca ndaā rō nájnūhun cánuú caca ró jéē cácuu ró ñáyuu maá

Jítóho yō. Te súcuan te sáha ró ndihí jeē nujnahan ni yā, te nihīn jñíñu ró jíin táca jñíñu váha, te jecūhun ga ni rō ndese Yaā cúu Yaā Dios. ¹¹ Te cájicān rī jeē cuáha ya fuerza ini rō, nájnūhun íyó fuerza maá yá jeē cújéhnu luu ya. Te súcuan te cuu cuandeyí ni rō jíin táca-ni jñúndóho, te cusī teyí ni rō. ¹² Te cuu nacuatáhú ró nuū Tatá yō, chi máá yá ni chihi fuerza yohó jéē ñn cáhnu-ni jíin táca ñáyuu maá yá nihīn yō tahu yō. Chi cájica yó jíin luz yā jeē yíhi yó ndaha ya. ¹³ Chi ni jnama ya yohó jéē ni yíhi yó ndaha máá jéē jñí poder nuū néē, te ni squíví ya yohó ndaha Séhe ya jeē maní yā jíin, ndácu ya jñíñu nuū yō. ¹⁴ Chi Séhe ya un ní jnama ya yohó jéē ní jíhí yā jehē yō, te ni ine cáhnu ni yā nuū cuéchi yó.

Jeē ni sáha Cristo jeē ní ndiví yó núu jñuhun maní Yaā Dios jíin yó

¹⁵ Yaā Dios jeē tu cúu coto yó, ni sáha ya jeē ní quiji Séhe ya, te súcuan ni jito yó máá yá. Te Séhe ya ún, je íyó yá nde ná tu jecōo tāca jéē iyó. ¹⁶ Chi jíin Séhe ya ni sáha Yaā Dios ndihí jeē ni jécōo, ndihí jeē iyó andiví jíin jéē iyó ñayiví, jeē jiní yō nuū jíin jéē tu jíin yō nuū. Te suni ni sáha ya tācá ndajéhé jeē cándacu jñíñu, jíin jéē cándiso jñíñu, jíin jéē cá cújéhnu, jíin jéē cá jñí poder. Jíin Cristo ni sáha Yaā Dios jeē ni jécōo ndihí, te jeē cúu Cristo cúu. ¹⁷ Te je íyó Cristo nde ná tu coo ndihí jeē iyó. Te ndaha máá yá yíhi vāha ndihí-ni. ¹⁸ Te máá yá cújéhnu nuū ñáyuu cá candíje, nájnūhun cújéhnu xiní nuū yiquí cúñu, chí nájnūhun yiquí cúñu yā cácuu i, cúu jeē ñn na cúu i jíin yá. Te máá yá sáha jeē cotecu i ní cáni, te xīhna gā maá yá ni natecu mēhñu ndíyí, návāha cújéhnu ya nuū tācá-ni. ¹⁹ Chi ni cusī ni Yaā Dios jeē ndihí ndese cúu máá yá, suni súcuan cúu Cristo. ²⁰ Te síquí jeē ní jíhí Cristo, te ni cusī ni Yaā Dios sáha ya jeē ndivícoo tācá-ni nuū jñuhun maní yā jíin, táca jéē yúcu ñayiví jíin jéē yúcu andiví. Chi jíin jéē ní jíhí Cristo jicā cruz, te ni sáha Yaā Dios jeē ndivícoo tācá-ni nuū jñuhun maní yā jíin.

21 Te máá ró jijnáhan ró, chi sín siquī ni cahīn ró ndé saá, te ni cajito uhū rō yā ini anuá rō, chi máni jniñu néé ní casáha ró. Te vijna chi je ni sáha Yaā Dios jeē ní ndivicoo ró nuū jnūhun manī yā jín ró. 22 Súcuan ni sáha ya siquī jeē ni sócō Cristo maá yá ni jihī yā, návāha coo ndoo coo īī rō cuiñi ró nuū yā, te ma cóo jnéhén ró, te tú na cuēchi coo siquī rō. 23 Te súcuan sáha ya núu cuiñi nihin ró jéē candíje vāha ró, te núu quendōo nihin ró jín jnūhun vāha jeē cáñuhun ni rō jeē jnáma ya rohó, te ma siaá cuiñi rō. Chi jnūhun un ní cajini ró, te ni jite núu ní cáhnu ñayiví. Te ruhū Pablo suni jéjníñu ri jeē nácani ri jnūhun ún.

Jeē jejniñu Pablo siquī ñayuu cá candíje

24 Te vijna te cúsi ni rī jeē ndóho ri jehē rō jijnáhan ró. Chi jín yiqui cúñu rī ndóho ri jeē cúmanī gā ndoho ri jín Cristo jehē ñayuu cá candíje, suu ñayuu cúu nájnūhun yiqui cúñu yā. 25 Te cúu ri tēe jéjníñu siquī ñayuu cá candíje, chi súcuan ni tejníñu Yaā Dios ruhū, návāha nacani ndihī ri jnūhun ya nuū rō te quendōo vāha ró. 26 Te nácani ri jnūhun ya jeē ní yisāhí, jeē tu ní cájini ñayuu nde jenahán ndasí te nde ní cáni vēji. Te vijna te je ni steén cají yá jnūhun un núu ñayuu maá yá. 27 Chi ni cusī ni yā jeē steén yā nuū i ndese cúcúca ndasí i jín ndihī jeē ndiso jnūhun sāhi yáha jéē lúu cújéhnu, te cuiñi núu quihīn nuū tāca nación jeē tu jíní. Te jnūhun sāhi yáha cúu jeē ndeé Cristo ini anuá rō, ndúú yá jín ró, te jeē yúcuan cáñuhun ni rō tāca jéē lúu jéhnu jeē coo.

28 Te jnūhun Cristo un cúu jeē cánacani ri, te cásthví ni rī tāca ñayuu, te cástéén rī jnūhun ya návāha jecūhun vāha ni i. Te súcuan te ije vāha ni ndivii i jeē yíhi i ndaha Cristo Jesús. 29 Te siquī yúcuan cúu jeē sájniñu ri, chi ndíhví ni rī nácani ri jnūhun jín tāca fuerza Cristo jeē chindéé ñájnáhan ya jín rí.

2

1 Chi cúni rī jeē na jécūhun ni rō ndese yōhyo ndúcú ndeyí rí jehē rō, jín jehē ñayuu ñuu Laodicea, jín ndé tāca ñayuu jeē tu ní cájini cuiñi nuū rī. 2 Chi cúni rī jeē coo ndeyí ni anuá i, te inuú-ni coyūcu manī i, te jecūhun ndihī ni i ndese yōhyo cúca i jín jnūhun jeē candíje nihin i. Chi cuni i ndese Yaā cúu Cristo, chi máá yá cúu jnūhun Yaā Dios jeē ni yísahí un. 3 Te ini Cristo yísahí tāca jnūhun jeē cucúca ró jín, suu jnūhun ndíchí jín jnūhun jécūhun ni. 4 Te jnūhun yáha cáhán rī jín ró jijnáhan ró, návāha ma stahú ni ñin i rohó jín tāca jnūhun stahú jéē lúu cáhán. 5 Chi vésú ndeé jíca rí jín ró, te ñūhun ni rī rohó, te cúsi ni rī jeē jiní rī ndese cájica ndaā rō te cá candíje nihin rō Cristo.

6 Núu súcuan te nájnūhun ni ca-jetáhú ró jeē Jítoho rō cúu Jesucristo, suni súcuan na cáca ndaā rō jín yá. 7 Te na jnī vāha jnūhun ya ini rō, te na ije vāha ró jín jnūhun cá candíje ró yá, nájnūhun je ni cajini rō. Te níni nacuatáhú ró nuū Yaā Dios.

Jeē ndújeé yó sáha Cristo

8 Coto má cuāha ró jnūhun jeē stahú ni ñin ñayuu rohó jín jnūhun ndíchí jéē tu jéjníñu, jín jnūhun ndúxí stahú. Chi tu cá candíje i jnūhun Cristo, chi sa cá candíje i tāca jéē tajnúni ñayuu, modo jeē castéén ini ñayiví yáha.

9 Chi ndihī ndese cúu máá Yaā Dios, suni súcuan cúu Cristo. 10 Te ndihī ndese cúu Cristo, suni súcuan cúu ró jijnáhan ró, chi cáyihī ró ndaha ya. Te máá yá cújéhnu nuū tāca jéē cújéhnu jín jéē ndiso jníñu andiví. 11 Te siquī jeē cáyihī ró ndaha ya, suu cúu jeē nájnūhun ni cuu ró circuncidar. Te jeē súcuan ni sáha ya circuncidar rohó, chi nasúú ñin jnuni jeē yíhi yiqui cúñu rō cúu, chi sa suhva jeē ní sándoo ya tāca cuéchi ni casáha ró jín modo neé máá ró. Chi súcuan cúu jeē sáha Cristo circuncidar rohó. 12 Te jeē ní cajendute ró cúu nájnūhun jeē ní quindūji ró jín Cristo, te suni nájnūhun jeē ní natecu rō jín yá. Chi ni cacandíje ró jéē jín poder Yaā Dios ni nastécu yā

Cristo mēhñu ndíyí. ¹³ Chi ni cacuu ró nájñuhun ndíyí nuū yā síquī cuéchi ró, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ñí cáni jín Cristo, chi ni ine cáhnu ni yā nuū tāca cuéchi ró. ¹⁴ Te nájñuhun jeē iyó ñn acta jeē jicán cuéchi síquī yō jeē ni stíví yó ley yā. Te ni ndahva yā acta un, chi ni chunaa Cristo cuéchi yó jéē ni jíhí yā jicā cruz. ¹⁵ Chi ná ni jíhí yā jicā cruz, te ni quende yā ndíhi poder tāca jéneé jéē cácujeñhu jín jéē cájni poder. Te ni quende yā jeē tuá cujeñhu, chi ni sáha ya jeē cuángoo nuū quíndihyū, te súcuan ni steén yā poder yā.

Na ndúcú yó jeē quéndōo vāha yó ndé andíví

¹⁶ Núu súcuan te ma cuatáhú ró núu cácahān ñayuu cuéchi síquī rō, síquī ñn jeē yéji rō chí síquī ñn jeē jíhí ró, chí jéē tu nées ñ rō quíví víco jín quíví núcósō yoō jín quíví ndétátú. ¹⁷ Chi tāca ley síquī un ní jejñíñu máá ndé ná tu quiji Cristo. Te vijna te ni quiji ya te tuá jíní ñúhún tāca ún. ¹⁸ Ma cuáha ro jnúhun jeē cásí ni ñn ñayuu jeē nihín rō tahū rō. Chi cáchiñúhún i tācá ndajéhé yā, te cácahān i jeē súcuan cásáha suchí i máá i. Te cácahān i jeē cájini ndije i jeē iyó ndāā jñuhun cánacani i, te tuú. Te súcuan cásáha téyí sáá-ni i máá i, chí cájeni néé ni i. ¹⁹ Te tu cáhīn i jín Cristo, Yaā cujeñhu nuū ñayuu cácuu nájñuhun yiqui cúñu yā chí ñn na cúu i jín yá. Chí máá yá scuéhnu ya i jín jnúhun ya, te nduu ñnuú ni tācá i jeē cáhije i cuahān i, nájñuhun ni jeni ni Yaā Dios.

²⁰ Núu súcuan te nájñuhun jeē je ni cajihí rō jín Cristo, cúu jeē ní casiáá rō tāca jéē tajnúní jeē castéén ini ñayíví. Núu súcuan ¿te naun cásáha ga rō nájñuhun cásáha ñayuu ñayíví jéē jéndije ró tāca jéē tajnúní i? ²¹ Chi cácahān i: Ma quehé ró ma cáji rō jeē yáha chí jéē yúcuan, ni ma jñí ró, áchí i. ²² Te máni jeē tajnúní ñayuu jín costumbre máá i cúu te tu níhín jñíñu jeē quéndōo ndāā ñayuu. ²³ Te ndāā chí cájeni ni i jeē jnúhun ndíchí cúu ún,

chí sáha jín i jeē chíñúhún níhín i, jín jéē sáha suchí i máá i, jín jéē stóho i yiqui cúñu i. Te tu níhín jñíñu cuítí jeē casi tācá jñíñu néé jéē cuní i sáha i.

3

¹ Núu súcuan te nájñuhun ni natecu Cristo, suni súcuan ni canatecu rō jeē ní cuu ró nájñuhun ndíyí ni sáha cuéchi ró. Te na cóndihvī ni rō síquī tāca jéē iyó andíví núu ndeé Cristo lado váha Yaā Dios nuū cujeñhu ya. ² Te na cáni ni rō síquī tāca jéē iyó andíví, nasūu síquī jeē iyó ini ñayíví. ³ Chi nájñuhun je ni cajihí rō jín Cristo, te vijna chí nájñuhun cátecu rō jín yá andíví, chí cáyihí ró ini ndaha Yaā Dios. ⁴ Te quíví ndíji Cristo, Yaā sáha jeē cótecu yō ñí cáni, yūcuán na te suni quendacoo ndijin maá ró jín yá, te cujeñhu luu ró jín yá.

Ñayuu jíca jín modo cuní maá, jín ñayuu ní ndujeé

⁵ Núu súcuan te casi rō tāca modo cuní maá ró jeē cáhíyo ró ini ñayíví yáha. Chí ma cáca jnéni ró, ma sáha ró jñíñu jnéhén, ma ndíyo ni rō sáha ró tāca jñíñu néé, ma cutóo ró, ma ndíyo ni rō ndajñíñu. Chí tācá ndajñíñu jeē ndíyo ni yō cúu nájñuhun ídolo yō jeē chíñúhún yó. ⁶ Chí síquī tācá jñíñu yáha cúu jeē cuāha Yaā Dios castigo xeēn nuū ñayuu ñihni ni nuū yā. ⁷ Te suni jín jñíñu yáha ní cajica ró ndé saá, ná ni casáha ró súcuan. ⁸ Te vijna te na stóo ró tāca jéē yáha: jeē quití ni, jeē xeēn ni, jeē sáha jñíñu néé, jeē cahán ndevāha nuū jnáhan, jín jéē cahán tāca jnúhun tú vāha. ⁹ Ma stahú ró jnáhan ró, chí yūcuan cúu modo maá ró jeē ní cajica ró jín ndé saá, te je ni castóo ró. ¹⁰ Te ni canduu ró ñayuu jeé, cuandacu ró máá Yaā ni sáha róhó, te cuajecūhun vāha ni rō ndese Yaā cúu ya. ¹¹ Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jeē ní indāa néé, ni mozo jeē ní jeen ñayuu, ni ñayuu sájñíñu cuenta maá, chí ñnuú

cúu ndihí i nuū yā. Chi Cristo cúu Jitoho ndihí i, te ndéé yá ini anuá ndihí i, ndúú yá jíin i.

¹² Chi ni nacāji Yaā Dios rohó jíjnáhan ró jeē cúu ró ñáyuu maá yá jeē maní yā jíin. Núu súcuan te níni cundáhú ni ró jnáhan ró, te coo vāha ni ró jíin jnáhan ró. Te coo suchí ni ró, te coo vítá ni ró, te coo paciencia ni ró. ¹³ Cuandeyí ni ró jíin jnáhan ró, te cone cáhnu ni ró nuū i te núu na vé ni sáha i nuū ró. Chi nájnūhun ni ine cáhnu ni Cristo nuū ró, suni súcuan sáha máá ró. ¹⁴ Te jeē cánuú gá cúu jeē cundáhú ndasí ni ró jnáhan ró. Chi yūcuan sáha jeē ndúu inuú ni ró te íje vāha ni ró jíin jniñu vāha. ¹⁵ Te jnūhun coyūcu mání na cúnuú ini anuá ró sáha Yaā Dios. Chi ni cana ya rohó jéē nduu ró ñn na ñayuu jéē cóyūcu mání ró. Te níni na nacuatáhú ró núu yā.

¹⁶ Te scuáha vāha ró jnúhun Cristo návāha cunuú jnúhun ún ini anuá ró. Te stéén ró nuū jnáhan ró, te stíhví ni ró i jíin táca jnúhun ndíchí yá. Te jíin salmo jíin himno, yaa íi jeē cahán jnūhun ya, na cáta luu ró jéē nacuatáhú ró ini anuá ró nuū Yaā Dios. ¹⁷ Te tēcá jniñu sáha ró, núu jeē cahán ró chí jéē sáha ró cúu, ndihí na sáha ró jéē ndujéhnu síhví máá Jítoho yō Jesús, te nacuatáhú ró núu Tatá yō Yaā Dios sáha ya.

Ndese cánuú squícu ñayuu cácandíje nuū jnáhan i

¹⁸ Róhó ñahan cácuu ñasihí, cuatáhú ró nuū yíi ró, chí súcuan cánuú sáha ró síquí jeē candíje ró Jítoho yō. ¹⁹ Te róhó téé cácuu yíi, cundáhú ni ró ñasihí ró, te ma cútucu ni ró jíin ña. ²⁰ Róhó séhe jíjnáhan ró, tēcá-ni jniñu cuandíje ró núu tatá ró nuū naná ró, chí súcuan cúsi ni maá Jítoho yō. ²¹ Te róhó tátá jíjnáhan ró, ma squítí ni ró séhe ró, návāha ma cucuíhyá ni i. ²² Róhó mozo jíjnáhan ró, tēcá-ni jniñu cuandíje ró núu patrón ró ñayívi yáha. Ma sájniñu ndúxí ró jeē maá jéē coto de te cuajnúhún de róhó. Chi na sájniñu ndaā sájniñu ndíje ró, te conso íyo ró núu Yaā Dios. ²³ Te tēcá jniñu

sáha ró, na cúsi ni ró sáha ró, te na cáni ni ró jeē nuū Jítoho yō cájejniñu ró, nasūu núu ñáyuu. ²⁴ Chi je cájini ró jeē maá Jítoho yō cuāha ya cuehē tahū cuu ró ní cáni. Chi nuū maá Cristo cájejniñu ró, chí máá yá cúu Jítoho ró. ²⁵ Te ñayuu casáha jniñu néé, chí sa suhva ndutahū i síquí jeē ni sáha i. Chi tu sáha Yaā Dios cuenta ndese cúu ñn ñn ñayuu, chí inuú sáha ya jíin i.

4

¹ Róhó patrón jíjnáhan ró, vāha ndaā na sáha ró jíin mozo ró. Te na núcūhun ni ró jeē suni íyó Jítoho maá ró, Yaā ndéé andiví.

² Te ndivíi ró ma jécuiñí ró jeē jicán tahú ró, chí coo ndito ni ró jíin, te nacuatáhú ró núu Yaā Dios. ³ Te suni cacān tahú ró jehē rí jíjnáhan rí, jeē na sáha Yaā Dios jeē cóo ga modo nacani rí jnūhun, návāha cuu cahán rí jnūhun Cristo jeē ní yisāhí, jeē tu ní cájini ñayuu jenahán. Te síquí jnúhun un cúu jeē íne rí vecā. ⁴ Te cacān tahú ró jeē cuu cahán cají rí ndese cánuú cáhán rí.

⁵ Sáha yúcún vāha ró jíin ñáyuu tu cácandíje. Ma cúhuun ni ró síquí i, chí condíhví ni ró scandíje ró i. ⁶ Te máni cahán vāha ró jíin ñáyuu, te cahán ró jnūhun cuajniñu jeē quéndōo vāha i sáha. Te caní ni ró ndese vāha nastío cuíñí ró jnūhun nuū ñn ñn i.

Saludo jeē sándihí

⁷ Tíquico cúu ñn hermano jeē maní yō jíin, te tēe squícu vāha chéndéé ñájnañan jíin rí cúu de, te jéjniñu de jíin rí nuū maá Jítoho yō. Te máá de castūhún ndihí nuū ró ndese cuahán jniñu rí. ⁸ Jeē yúcuan ní tají rí de cuajeē de nuū ró jíjnáhan ró, návāha cuni ró ndese cáhíyo rí jíin jniñu, te coo ndeyí ni ró sáha de. ⁹ Te suni cuajeē Onésimo jíin de, tēe cúu jnáhan máá ró jíjnáhan ró. Te cúu de hermano jeē squícu vāha jeē maní yō jíin. Te ndíndúú de castūhun núu ró ndese cuahán tēcá jniñu ichi cháha.

¹⁰ Sándeyí ni ró jíjnáhan ró, áchí Aristarco, tēe íne jíin rí vecā. Te suni súcuan cáhán Marcos, ñani primo Bernabé. Te je ni ndacu rí jniñu

nuū rō siquī Marcos, te núu ni je-condēhé de rōhó te sáha vāha ró jíin de. ¹¹ Te suni súcuan cáhán Jesús, tēe jeē suni nání Justo, jeē sándeyí ni rō. Te máá-ni de cácuu tēe hebreo cáandíje jeē chindéé ñáhán cánacani jnūhun jíin rí siquī ndese ndácu Yaā Dios jniñu. Te yōhyo ndeyí íyó ni rí casáha de. ¹² Sándeyí ni rō jíinánhan ró, áchí Epafra, tēe cúu jnánhan máá ró, te mozo Cristo cúu de. Te níni jíicán tahu ndasí de jehē rō, jeē na cuñi ñihin ró, te ije vāha ni rō jeē squícu vāha ró ndihi jniñu cúni Yaā Dios. ¹³ Chi cáhán ndaā rí jeē yóhyo ndíhvi ni de jehē rō jíinánhan ró, jíin jéhē ñáyuu ñuu Laodicea jíin Hierápolis. ¹⁴ Lucas, tēe cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

¹⁵ Cachi rō nuū táca hermano ñuu Laodicea jeē sándeyí ni i, áchí rí. Te suni súcuan cahán rō jíin Ninfas, jíin táca ñáyuu cáandíje cándutútú vehe ña. ¹⁶ Te ná ni jīnu ni cacahu ró carta yáha, te suni tají ró na cáhu ñayuu cáandíje ñuu Laodicea. Te suni cahu máá ró carta jeē cuahán nuū ñáyuu Laodicea te ndiji nuū rō. ¹⁷ Te cachi rō nuū Arquipo jeē na ndúcú ndeyí de squícu de jniñu ní tee Jitoho yō siquī de, áchí rí.

¹⁸ Ruhū Pablo, yāhá-ni cúu jeē tée ri jíin ndaha máá rí, jeē sándeyí ni rō. Te nucūhun ni rō ruhū jeē íne ri vecāa. Te ñúhun ni rí jeē na sáha ga Yaā Dios jeē vāha rōhó jíinánhan ró. Súcuan na cóo. Amén.

CARTA HN JEE NI TEE APOSTOL SAN PABLO NUU ÑAYUU ÑUU TESALONICA

¹ Máá rí cúu Pablo jíin Silvano jíin Timoteo, te cátee rí carta yáha cuájeē nuū rohó ñayuu cácanđije ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sñ ni rō jijnáhan rō.

Ñayuu Tesalónica cúu i ñn ejemplo vāha

² Níní cánacuatahú rí nuū Yaā Dios jeē siquí rohó jijnáhan rō, te tu náa ni rí cacān tahu rí jehē rō jeē cájicān tahu rí. ³ Te níní ndácunehen rí rohó nuū Tátá yō Yaā Dios, jeē váha cásáha ró táca jniñu chi cácanđije ró, jíin jéē váha cájejniñu ró nuū yā chi manī rō jíin yá, jíin jéē cájendeyí ni rō chi cáñuhun ni rō jeē coo jeē váha sáha Jítóho yō Jesucristo. ⁴ Chi manī Yaā Dios jíin ró jijnáhan ró hermano, te cájini rí jeē ní nacāji ya rohó. ⁵ Chi ná ni canacani rí jñuhun nuū rō jeē jnáma ya rohó, te nasūu jéē ni cáhān rí súcuan-ni, chi ni nacani rí jíin poder Espíritu Santo, te ni cacucáñnu vāha ni rí jeē jnúhun ndaā cúu. Te cájini rō ndese ní casáha vāha ri ná ni coyūcu rí jíin ró, chi ni nducú rí jeē quéndōo vāha rō.

⁶ Te róhó jijnáhan ró chi ni candacu ró rúhū, te suni ni candacu ró máá Jítóho yō. Chi ni cajetáhú ró jñuhun ya, te ni cacusñ ni rō ni sáha Espíritu Santo, vēsú ni cajito ró cuehē jñundóho siquí ún. ⁷ Te súcuan cácuu ró ñn ejemplo nuū ndihí ñayuu cácanđije jeē cáyūcú región Macedonia jíin Acaya jiñā. ⁸ Chi jeē siquí rohó jijnáhan ró cúu jeē ní jite núu jñuhun Jítóho yō, te nasūu máni Macedonia jíin Acaya, chi suni ní cáhnu-ni ni jite núu jñuhun ndese cácanđije ró Yaā

Dios. Te jeē yúcuu tuá jíni ñúhún jeē nácani máá rí jñuhun nuū i. ⁹ Chi sa máá i cánacani ndese ni cajetáhú váha ró rúhū ná ni jecoo ri nuū rō, jíin ndese ni castóo ro ídolo te ni quivicoo ró ndaha Yaā Dios, Yaā ndaā Yaā técu, jeē cuajniñu ró núu yā. ¹⁰ Te cánacani i jeē cándetu ró jéē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núu castigo xeēn jeē quíji.

Jniñu jeē ni sáha Pablo ñuu Tesalónica

2

¹ Chi cájini rō hermano, jeē tu ní jecoo cáhá-ni ri nuū rō. ² Te cájini rō jeē ní castóho i ruhū te ni cacahān ndevāha i nuū rí ini ñuu Filipos. Te vēsú súcuan te máá Yaā Dios ni chindéē ñáhán yá ruhū, ni sáha ya jeē ni iyo ndeyí ni rí, te ni jecoo ri ñuu rō ni canacani rí jñuhun jeē jnáma ya rohó. Súcuan ni casáha ri vēsú xeēn ni iyo jñundóho. ³ Te jñuhun ni canacani ri, nasūu jnúhun ni castíví ri cúu, ni nasūu jéē nihín rí siquí rō, ni nasūu jéē ní castáhú rí rohó. ⁴ Chi máá Yaā Dios ni jito ndee yā ruhū, te ni tejniñu ya ruhū jeē nácani rí jñuhun jeē jnáma ya rohó. Te jeē yúcuu cúu jeē cácahān rí. Te tu cácahān rí jñuhun jeē nújnahan ni ñayuu, chi sa jeē nújnahan ni Yaā Dios, chi máá yá jito ndee anuá rí. ⁵ Te cájini rō jeē tu ní cánducú rí cuajnúhún rí rohó ñn modo stahú, ni tu ní cácahān rí jeē cúsn ni rí jíin ró návāha nihín rí xūhun ró. Te jíní Yaā Dios jeē súcuan cúu. ⁶ Te ni tu ní cánducú rí jeē cuajnúhún ró ruhū, ni jeē cuajnúhún inga ñayuu ruhū, vēsú súcuan cánuú coo núu, chi apóstol Cristo cácuu rí. ⁷ Chi sa suhva vīta ní cacahān rí jíin ró, nájnñuhun sáha ñahan ndéca yiquín jéē yucún ndíto ña sēhe ña. ⁸ Te siquí jeē cácondáhú ndasí ni rí rohó, jeē yúcuu ní cacondihvī ni rí nacani rí jñuhun vāha Yaā Dios nuū rō. Te nasūu máá yúcuu-ni, chi suni nde vida rí cuāha ri jeē siquí rō nuú, chi yōhyo manī rí jíin ró. ⁹ Te cánahan ró hermano, jeē tú ni ñn ró ní stáhān rí jeē cacān rí nuū

rō ná ni canacani ri jnūhun vāha Yaā Dios nuū rō. Chi ni canducú ndeyí rí ni casájniñu ndasí rí siquī jeē cótecu rī. Te nduú ñuú ni casájniñu ri.

¹⁰ Máá ró cájini rō, te suni Yaā Dios jiní yā ndese ndaā ndoo ni cajica ri nuū rohó ñáyuu cá candíje. Te ni ñn tu cúu cahān cuēchi siquī rī. ¹¹ Te suni cájini rō ndese ni castíhví ni rī ná ñn ná ñn ró, te ni cacahān rī jnūhun ndeyí ni jíin ró, nájñūhun sáha ñn tátá jíin séhe de. ¹² Te ni cacahān ñihin ri jíin ró jeē na cáca ndaā rō nuū Yaā Dios nájñūhun cánuú caca ró. Chi ni cana ya rohó jéē quíngoo ró núu ndácu ya jniñu, nuū luu cujéñu ró jíin yá.

¹³ Te jeē yúcuan níni nácuatáhú rí nuū Yaā Dios, chi ni cajetáhú ró jnūhun ya jeē ní canacani ri. Chi ni cajini rō jeē násūu jnúhun ñn tēe cúu, chi jnūhun Yaā Dios cúu. Te máá jéndaá jeē jnúhun un sájniñu ini anuá rohó ñáyuu cá candíje nde ndacu ró yá. ¹⁴ Hermano, ñayuu ñuu rō ni cajito xeēn i róhó, te súcuan ni candoho ró nájñūhun ni candoho ñayuu cá candíje cáyucú región Judea jeē cáyihí ndaha Yaā Dios jíin Cristo Jesús. Chi nájñūhun ni candoho i ni sáha jnáhan i ñayuu hebreo, suni súcuan ni candoho ró. ¹⁵ Chi suu ñayuu hebreo ni cajehni de máá Jítoho yō Jesús, nájñūhun ni cajehni de tāca téē ñuu de jeē ní canacani jnūhun ya nde jenahán. Te suni nde ruhū jijnáhan ri ni cascúnu de. Te cásáha de jniñu jeē tu nújnahan ni Yaā Dios, te cúu de contra siquī tāca ñáyuu. ¹⁶ Chi jésicoo de jeē ma nácani ri jnūhun nuū ñáyuu tācá nación jeē tu jíiní, návāha tú cācu i. Te súcuan sáha de jeē nducuehē gā cuēchi siquī de. Te vijna te yachí quiiji quiví jeē cuāha Yaā Dios castigo xeēn nuū de.

Jeē cuní Pablo quicōndēhé tucu de ñayuu Tesalónica

¹⁷ Hermano, ni cacujiyo ri ñn núnúu-ni nuū rō jijnáhan ró. Te vésú tu cájito jnáhan yó, te níni cáñuhun ni rī rohó. Te yōhyo ni cacuu ni rī ndacoto ri nuū rō jijnáhan ró. ¹⁸ Te jeē

yúcuan ní cajeni ni rī jecoo ri nuū rō nuú. Te ruhū Pablo, tijni jínu ni nducú rí modo jeē rī, te Satanás ni jesi ichi ri jijnáhan ri. ¹⁹ Chi tuá na inga cáñuhun ni rī, te tuá na inga cácusí ni rī, chi suu máá ró jijnáhan ró. Te jeē siquí maá ró cúu jeē nihín rī premio rī te cusí teyí ni rī cuiñi yó núu maá Jítoho yō Jesucristo quiví ndíji ya. ²⁰ Suu jeē siquí rohó cúu jeē cácusí teyí ni rī.

3

¹ Te jeē yúcuan tuá ni cáanda ri condetu ri nde nihín rī jnūhun ndese cáhīyo ró. Te ni casánda rī jeē quéndōo máa-ni ri ñuu Atenas. ² Te ni catají rí hermano yō Timoteo, tēe jéjníñu jíin rí nuū Yaā Dios siquí jnúhun jeē jnáma Cristo yohó. Te ni jecondēhé de róhó návāha sáha de jeē cuiñi ñihin ró te coo ndeyí ni rō jíin jnúhun cá candíje ró. ³ Te ni jeē de návāha ma náyūhú ni ñn ró siquí tāca jnúndóho jeē sáha ñayuu. Chi je cájini rō jeē súcuan cánuú ndoho yó. ⁴ Chi nde ná ni coyūcu rí jíin ró, te ni castūhun rí nuū rō jeē nihín nahín yó jnúndóho. Te je cájini rō jeē súcuan ni cuu, nájñūhun ni cacahān rī. ⁵ Te jeē yúcuan, náa tuá ni cánda ri condetu ri jeē nihín rī jnūhun ndese cáhīyo ró, te ni tají rí de ni jeē de, návāha cuni rī núu cá candíje nahín ró. Chi ni jeni ni rī á sanaa te jexeén jeē jító ndee yohó ní cundeyí jíin ró, te naa cāhá-ni jniñu jeē ní casáha ri jíin ró.

⁶ Te vijna chi je ni ndee Timoteo nuū rī jijnáhan ri jeē ni jéē de ñuu rō Tesalónica. Te ni nacani de jeē cá candíje vāha ró, te cá cundáhú ni rō jnáhan ró. Te ni cachi de jeē cáñuhun ni rō ruhū, chi cáhīyo maní rō jíin rí. Te cá cuni rō ndacoto ró núu rī, nájñūhun cá cuni rī ndacoto ri nuū rō. ⁷ Te jeē yúcuan ní candusí ni rī siquí jeē cá candíje vāha ró, hermano, vésú xeēn iyó jnúndóho siquí rī. ⁸ Te vijna je ni cananihin ni rī, chi cáhīn ñihin ró jíin máá Jítoho yō. ⁹ Núu súcuan te tu jínu cuiñi nácuatáhú rí nuū Yaā Dios jeē siquí rohó jijnáhan ró. Chi jító ya jeē cá cusí ndasí ni rī jeē súcuan cáhīyo

ró. ¹⁰ Te nduú ñuú cájicān tahu ndasí rí jeē ndácoto tucu ri nuū rō, te steén gā rī na-ni jnūhun cúmanī jecūhun ni rō siquī jnūhun cá candíje yó.

¹¹ Te cá cuni rī jeē maá Tátá yō Yaā Dios jíin Jítóho yō Jesucristo, na núne ya ichi jeē cuu jecoo tucu ri nuū rō.

¹² Te na sáha máá Jítóho yō jeē cuehē ndasí gá cundáhú ni rō jnāhan ró jíin táca gá ñayuu, nájnūhun cá cundáhú ni rī rohó jíjnāhan ró. ¹³ Te na sáha ya jeē íje ánuá rō jeē cuiñi nīhin ró, návāha coo ndoo ró jéē ma cóo cuēchi ró núū maá Tátá yō Yaā Dios, quivī ndíji Jítóho yō Jesucristo jíin táca ñayuu yíhi ndaha ya.

Siquī jeē cacandaā yō modo jeē cúsi ni yā

4

¹ Te vijna hermano, íyó inga jnūhun jeē cácahān ndahú rí jíin ró te cáhān nīhin rí jíin ró, chi súcuan cúni máá Jítóho yō Jesús. Je ni castéén rī nuū rō ndese cánuú caca ndaā rō návāha cusī ni Yaā Dios. Te cácahān ndahú rí jíin ró jeē sa víhyá gā na cáca ró súcuan.

² Chi je cájini rō na jniñu ni candacu ri nuū rō jeē ní ndacu máá Jítóho yō Jesús. ³ Te cúni Yaā Dios jeē na cóo ndoo coo iī rō nuū yā, te ma cáca jnéni ró. ⁴ Te ná ñn ná ñn ró na cóndeca yíñuhún ró ñasihí máá ró, te súcuan caca ndoo ró. ⁵ Te ma sáha ró jniñu néé jéē ndíyo ni rō jesihí, nájnūhun cá sáha ñayuu táca nación jeē tu cájini i jnūhun Yaā Dios. ⁶ Ni ñn ró ma sáha ró cuēchi jeē quénde rō ñasihí jnāhan ró. Chi máá Jítóho yō cuāha ya castigo xeēn nuū ñayuu casáha táca jniñu súcuan, nájnūhun je ni cacahān nīhin rí ni castūhun rí nuū rō. ⁷ Chi tu ní cána Yaā Dios yohó jéē sáha yó jniñu jnéhén, chi sa jeē caca ndoo yó. ⁸ Núū súcuan te ñayuu jeē squéhichī jnūhun yáha, nasūu jnūhun ñn tēe squéhichī i, chi sa jnūhun Yaā Dios, Yaā ni jéhe Espiritu Santo nuū yō.

⁹ Te tu jíni ñuhún jéē téé rí nuū carta yáha jéē coo manī rō jíin táca hermano, chi je ni steén Yaā Dios

nuū rō jeē coo manī rō jíin jnāhan ró.

¹⁰ Te je cáhīyo manī rō súcuan jíin táca hermano cáyūcu ní cáhnu Macedonia jíñā. Te cáhān ndahú rí jíin ró hermano, jeē sa víhyá gā na cóo manī rō jíin i. ¹¹ Te na cóndihvī ni rō coyūcú nayúú ró, te ma cóndihvī ni rō siquī ndese cá sáha jnāhan ró, chi condihvī ni rō sáha ró jniñu máá ró, nájnūhun ni candacu ri nuū rō. ¹² Súcuan na sáha ró návāha ñayuu tu cándíje, cuatáhú i rohó, te suni ma cúmanī jeē cotecu rō.

Siquī jeē ndíji Jítóho yō

¹³ Suni cá cuni rī, hermano, jeē na jecūhun ni rō jíjnāhan ró siquī ñayuu cájihī, návāha ma cucuíhyá ni rō nájnūhun sava ga ñayuu jeē tu cáñuhun ni i jeē nátecu ndíyi. ¹⁴ Chi nájnūhun cá candíje yó jéē ni jíhī Jesús te ni natecu yā, suni súcuan cá candíje yó jéē nastécu Yaā Dios táca ñayuu ni cá candíje nuū Jesús te ni cajihī.

¹⁵ Jeē yúcuan cá castūhun rí ñn jnūhun jeē ní castūhun máá Jítóho yō nuū rī: Jeē yohó jéē cátecu gā quivī ndíji máá Jítóho yō, nasūu máá yó cosnūu jéē ndaa yó quíhīn yō. Chi xīhna gā ñayuu je ni cajihī ndaa i quíhīn i. ¹⁶ Chi máá Jítóho yō nuu ya quiji ya ichi ándiví, te cana jee ya jeē maá yá ndácu jniñu, te cana jee ndajéhé cujéhnu ga, te cuecu trompeta Yaā Dios. Te xīhna gā natecu táca ndíyi jeē ní cacandíje Cristo. ¹⁷ Yūcuán na te yohó jeē cátecu gā yō quivī ndíji ya, suni ndonehen ya yohó jíin i, quíhīn yō mēhñu vícō. Te naquijnāhan yó jíin máá Jítóho yō sava ándiví. Te súcuan condee yō ní cáni jíin máá Jítóho yō. ¹⁸ Núū súcuan te jíin jnūhun yáha cahān ndeyí ni rō jíin táca jnāhan ró.

5

¹ Te tu jíni ñuhún jéē téé rí nuū carta yáha siquī cuiyā chí quivī jeē coo táca un, hermano. ² Chi je cájini vāha ró jéē ñn sanaa ni yō te quee quivī ndíji máá Jítóho yō, nájnūhun ñn sanaa ni yō te quíji ñacuñhá jecuáa. ³ Chi ná-ni cácahān ñayuu jeē

nayúu-ni ìn te tú na jnūndóho coo, te ná-ni cácahān i sūcuan te ìn sanaa ni i te quiiji jnūndóho siquī i jeē náā i, te ma cácu cuiṭi i. Chi quiiji quiivī un nájñūhun ìn sanaa-ni te quéjéé jéhdē chíji ìn ñahan scácu sēhe. ⁴ Te róhó hermano, tu cácuu ró ñayuu cájica nájñūhun nuū néē jeē ìn sanaa-ni te quiiji quiivī un siquī rō nájñūhun quiiji ñacuīhná. ⁵ Chi ndihī ró cácuu ñayuu jeē nájñūhun cájica ró nduú, chi stéén luz yā ini anuá rō. Chi tu cácuu yó nájñūhun ñayuu jeē tu jécūhun ni siquī Yaā Dios, jeē nájñūhun cájica i nuū néē. ⁶ Núu sūcuan te ma cúhuun ni yō nájñūhun ñayuu cáquixī, chi sa ndito na cóo ni yō te coo cáji xínī yō. ⁷ Chi jecuáa cúu jeē cáquixī ñayuu, te suni jecuáa cúu jeē nájñi i. ⁸ Te máá yó chi nájñūhun jeē cájica yó nduú, te na cóo cáji xínī yō. Te na cúcutú yó jíin jnúhun cándíje nihin yó jíin jnúhun cúndáhú ni yō jnáhan yó, nájñūhun cúcutú soldado jíin sahma cáa. Te na cúcutú yó jíin jnúhun jeē cáñuhun ni yō jeē cácu yó, nájñūhun cúcutú soldado jeē ñúhun lélú cāa xinī de. ⁹ Chi Yaā Dios tu ní jéni ya yohó jéē cuáha ya castigo yohó, chi sa suhva jeē jnama ya yohó sáha máá Jítóho yō Jesucristo. ¹⁰ Te máá yá ni jihī yā jehē yō, návāha cotecu inuú yó jíin yá, vēsú núu cotecu gā yō ñayivī yáha chí cúu yō. ¹¹ Núu sūcuan te cahān rō jñūhun ndeyí ni jíin táca jnáhan ró, te scuéhnu jnáhan ró jíin jnúhun ya, nájñūhun je casáha ró.

Jeē jéni ichí Pablo tācá hermano

¹² Te cácahān ndahú rí jíin ró hermano, jeē cuatáhú ró tēe cájeñiñū cándito róhó, jeē cácujeñnu de nuū rō jíin jniñū máá Jítóho yō, te cájeni ichí de róhó. ¹³ Te coo yíñúhún ndasí ró nuū de, te coo manī rō jíin de siquī jniñū ya jeē casáha de. Te na cóyūcu manī rō jíin táca jnáhan ró.

¹⁴ Te suni cácahān ndahú rí jíin ró hermano, jeē na stíhvī ni rō ñayuu cájica cúxí. Te cahān rō jñūhun ndeyí ni jíin ñayuu jeē yachī ndínuu ni i. Te

chindéé ñáhán ró ñayuu jeē tu fuerza ini. Te cuandeyí ni rō jíin ndihī ñayuu.

¹⁵ Te coto má nasáha ndevāha ro jíin ni ìn ñayuu te núu sáha ndevāha i jíin ró. Chi máni jeē váha nducú ró sáha ró jíin táca jnáhan ró jíin ndihī-ni ñayuu.

¹⁶ Níní na cóo sī ni rō jijnáhan ró. ¹⁷ Te níní na cácan tahu rō. ¹⁸ Te nacuatáhú ró jeē siquī tācá-ni. Chi sūcuan cúní Yaā Dios jeē sáha ró jéē cácañíje ró Cristo Jesús.

¹⁹ Te ma cási rō nuū jniñū jeē sáha Espiritu Santo jíin ró. ²⁰ Te ni ma cujéē ni rō nuū jnúhun cácahān tēe cánacani jñūhun Yaā Dios. ²¹ Chi coto ndee rō tāca jnúhun, te núu jeē váha cúu, te cuatáhú ró. ²² Te ma quívi nduu rō jíin ni ìn jniñū néé.

²³ Te máá Yaā Dios jeē jéhe jñūhun ndeyí sī ni, ñúhun ni rī jeē sáha ndihī ya jeē cóo ndoo coo ìi rō nuū yā. Te ñúhun ni rī jeē cóndito váha ya anuá rō jíin jéē níjnūnī rō, jíin yiqui cúñu rō, návāha tú na cuēchi coo siquī rō quiivī ndíji máá Jítóho yō Jesucristo. ²⁴ Chi Yaā jeē ní cana róhó, sáha ya ndihī un jíin ró, chi squícu ya jeē ni jéjñūhun ya.

Saludo jíin bendición jeē sándihí

²⁵ Hermano jijnáhan ró, cacān tahu rō jehē rī jijnáhan rí.

²⁶ Te núu na cáhán rō jíin táca hermano, te techūhu yíñúhún ró ndaha i.

²⁷ Te cáhán nihin rí jíin ró, chi sūcuan cúní maá Jítóho yō, jeē na cáhu ró carta yáha núu tācá hermano.

²⁸ Te ñúhun ni rī jeē maá Jítóho yō Jesucristo na sáha ga yā jeē váha róhó. Sūcuan na cóo. Amén.

CARTA UU JEE NI TEE APOSTOL SAN PABLO NUU ÑAYUU ÑUU TESALONICA

¹ Máá rí cúu Pablo jíin Silvano jíin Timoteo, te cátee rí carta yáha cuájeē nuū rohó ñayuu cácanđije ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. ² Te cáñuhun ni rī jeē Tátá yō Yaā Dios jíin Jítóho yō Jesucristo, na sáha ga yā jeē váha rohó, te sáha ya jeē coo ndeyí coo sī ni rō jijnáhan ró.

Jeē sándaā yā cuēchi quivī ndíji Cristo

³ Cánúú jeē niní nacuatáhú rí nuū Yaā Dios jeē síquí rohó jijnáhan ró hermano. Chí súcuan íyó váha, chí yōhyo váha cuahije ró jíin jnúhun jeē cácanđije ró yá, te yōhyo cuanducuehē jeē cácanđáhú ni rō táca jnánhan ró. ⁴ Te jeē yúcuan cúu jeē cácusī teyí ni rī cácanani rí jnúhun ró núú táca grupo ñayuu cácanđije nuū Yaā Dios. Chí váha cácanđije ró, te váha cájendeyí ni rō jeē cájito xeēn ñayuu rohó jíin jéē cándoho ró táca gá jnündóho. ⁵ Te jíin táca jéē yáha chíhi ya cuenta jeē cácuu ró ñayuu váha jeē quívicoo ró ñuu nuū ndácu ya jniñu. Chí síquī ñuu un cúu jeē cándoho ró. Te jeē súcuan chíhi ya cuenta síquī rō, yáha stéén nuū yō jeē váha Yaā cúu ya.

⁶ Te suni íyó váha jeē nastóho ya ñayuu castóho rohó. ⁷ Te quivī ndíji Jítóho yō Jesús, quivī un sáha Yaā Dios jeē ndétātu rohó jéē cándoho, te suni ruhū jijnáhan rí. Chí jíin yáñuhūn quiiji Jesús ichi ándiví jíin táca ndajéhé yā jeē ndíso poder. ⁸ Te cuáha ya castigo nuū ñayuu jeē tu ní cájēhe i jnúhun cuni i ndese Yaā cúu Yaā Dios, te tu ní cájetáhú i jnúhun máá Jítóho yō Jesucristo jeē jnáma ya i. ⁹ Te ñayuu ún chí ndoho i ní cáni, chí cujiyo i nuū máá Jítóho yō, te ma cúu quívicoo i nuū lúu ndasí cújéhnú ya jíin poder yā. ¹⁰ Súcuan sáha ya quivī ndíji ya jeē

lúu cújéhnú ya sáha ñayuu cácanđije jeē yíhi ndaha ya. Te nahán naa ni i coto i nuū yā. Te suni súcuan rohó jijnáhan ró, chí ni cácanđije ró jnúhun jeē ní canacani rí nuū rō.

¹¹ Te jeē yúcuan cúu jeē niní cájicān tahú rī jehē rō, jeē na cúu ró ñayuu váha jeē ní cana ya rohó. Te jíin fuerza yā na sáha ya jíin ró jeē síquí ró táca jniñu váha jeē ní catee ni rō sáha ró síquī jeē cácanđije ró. ¹² Te súcuan te cújéhnú máá Jítóho yō Jesucristo sáha ró, te suni cújéhnú máá ró jijnáhan ró sáha ya. Chí Yaā Dios yō jíin Jítóho yō Jesucristo, súcuan cúu jeē sáha ya jeē váha yóhó.

Jnúhun síquī maá té sáha xeēn cuēchi

2

¹ Vijna te cahān rī síquī jeē ndíji máá Jítóho yō Jesucristo jíin jéē ndutútú yó núú yā. Cácahān ndahú rí jíin ró jijnáhan ró hermano, ² jeē ma cuáha ró jnúhun sacā nuu cani ni rō, ni ma cunéé ni rō núu cácahān ñayuu jeē jé ni quee quivī ndíji máá Jítóho yō. Ma candíje cuiti rō vēsú núu cahān i jeē ni níhīn i ñn jnúhun síquī un núu Espíritu, chí ñn jnúhun jeē ni cáhān ñga, chí núu cachi i jeē ruhú jijnáhan rí ni tají ñn carta jeē cahān súcuan. ³ Ma cuáha cuiti rō jnúhun jeē stahú ni ñn i rohó. Chí nde ná tu quiiji quivī ún te xihna gā ndunihni ni cuehē ñayuu nuū yā, te quenda ndijin máá té sáha xeēn cuēchi, te tē jnáhnū ndetū cúu máá té ún. ⁴ Chí tē jító uhū Yaā Dios cúu de, te ndonda de contra síquī táca jéē casnání i yaā i jíin táca jeē cáchiñúhún i. Te xeēn gā sáha de, chí nde cucōo de ini templo Yaā Dios jeē iyó Jerusalén, te cahān de jeē maá de cúu Yaā Dios.

⁵ ¿A cánahān ró jnúhun yáha? Chí súcuan ni cahān rī jíin ró ná ni íyo rí jíin ró. ⁶ Te je cájini rō ndé vé cúu jeē jési jeē ná tu quenda ndijin tē ún, chí nde na quée quivī maá de. ⁷ Chí je jícu sáhi táca cuēchi xeēn ini ñayiví, te vijna chí íyó jéē jési nuū, návāha ma cáa ndasí gá cuēchi, chí nde na

cújiyo máá jéē jési nuū. ⁸ Te sáá te quenda ndijin maá téē xeēn ún. Te máá Jítóho yō Jesús cahni ya tēe un jíin táchī yuhu-ni ya, te jíin jéē ndíndēe yá ndiji ya te snáhnú ndetū yā de. ⁹ Te jeē quiji tēe xeēn ún chi máá Satanás sáha. Te quiji de jíin cuéhē poder, te sáha de táca jniñu jéhu jeē stahú de, jeē nahán naa ni ñayuu coto i. ¹⁰ Te jíin táca jniñu néē te stáhú ndasí de ñayuu jeē jnahnú ndetū, chi tu ní cúní i cuatáhú i jnūhun ndaā jeē cácu i núú. ¹¹ Te jeē yúcuan cuāha Yaā Dios jnūhun jeē cuatáhú i jnūhun jeē tú ndaā cuiti, te candíje i jnūhun stáhú un. ¹² Te súcuan te jecondee cuēchi siquī ndihi i jeē tu ní cá candíje i jnūhun ndaā, chi sa jniñu néē ni cacusiñi ni i jíin.

Ñayuu jeē ní nacāji ya jeē cācu i

¹³ Te cánuú jéē niní nacuatáhú rí jijnáhan ri nuū Yaā Dios jeē siquí rohó jéē cácuu ró hermano jeē maní Jítóho yō jíin. Chi nde ná ni jecōo ñayiví, te je ni nacāji Yaā Dios rohó jéē jnáma ya rohó. Chi sáha Espíritu yā jeē cáhiyo ndoo cáhiyo iñi ró nuū yā te cá candíje ró jnúhun ndaā. ¹⁴ Chi jeē yúcuan ní cana ya rohó jíin jnúhun jeē jnáma ya yohó jeē ní canacani ri, návāha quivicoo ró núú cujéhu luu ró jíin máá Jítóho yō Jesucristo.

¹⁵ Núu súcuan te cuiñi nihin ró hermano, te conahán váha ró jnúhun jeē ní cacutūhva ró núu rí, núu jeē ní cacahán rí chí jéē ní tee ri nuū carta. ¹⁶ Máá Jítóho yō Jesucristo jíin Tátá yō Yaā Dios ni cundáhú ni yā yohó, te ni sáha ya jeē coo siñi ni yō ní cáni, jíin jéē ñúhun ni yō táca jéē váha jeē coo siquí jeē váha ni yā jíin yó. ¹⁷ Te na sáha ga yā jeē cóo ndeyí ni anuá ró jijnáhan ró, te na sáha ya jeē íje ró cáhán ró táca jnúhun váha ya, te sáha ró táca jniñu váha.

Jeē na cácan tahú i jehē de

3

¹ Te íyó inga jnūhun cánuú, hermano. Na cácan tahú ró jehē rí jijnáhan ri, návāha yachí cuité núu jnūhun máá Jítóho yō, te cuatáhú váha

ñayuu, nájñūhun ni cajetáhú máá ró. ² Te suni cacān tahú ró jeē na cácu ri nuū táca téē cásáha néē jéē cátejnáhan jíin rí. Chi tú ndihi tēe cá candíje jnūhun ya. ³ Te máá Jítóho yō chi váha squícu ya jeē ni jéjnūhun ya, te sáha ya jeē íje ni táca ró jíin jnúhun ya, te coto ya rohó núu jeneé. ⁴ Te cá cucáhnú ni rí sáha máá Jítóho yō, jeē cócuu ró jíin jniñu jeē ní candacu ri nuū ró, te suni cocuu ga ró jíin. ⁵ Te ñúhun ni rí jeē máá Jítóho yō steén gā yā ndese coo maní gā ró jíin Yaā Dios nde jíin ini jíin ánuá ró, jíin jéē cuándeyí ni ró nájñūhun ni sáha Cristo.

Jeē cánuú sájniñu yó

⁶ Te cándacu ri jniñu nuū ró hermano, chi súcuan ni ndacu máá Jítóho yō Jesucristo, jeē na cújiyo ró núu táca hermano cájica cúxí te tu cájica váha de nájñūhun ni castéén rí nuū ró. ⁷ Chi je cájini ró ndese cánuú ndacu ró rúhū jijnáhan ri, chi tu ní cájica cúxí rí ná ni cáhiyo ri jíin ró. ⁸ Ni tu ní cáyeji rí staā ni ñni ró súcuan-ni, chi ni cachunaa rí. Chi sa ni canducú ndeyí rí ni casájniñu téyí rí nduú ñuú, návāha ma stáhán rí ni ñni ró. ⁹ Te vésú íyó derecho rí jeē cacán rí nuū ró nuú, te tu ní cájicān rí, chi súcuan ni casáha ri návāha cuu ri ñni ejemplo nuū ró ndese sáha ró jijnáhan ró. ¹⁰ Chi ná ni coyūcu rí jíin ró, te ni candacu ri jniñu yáha nuū ró: Núu ndé ñni ñayuu tu cúní i sájniñu i, te suni ma cáji i núu súcuan. ¹¹ Chi ni canihín rí jnūhun jeē cájica cúxí sava ró, te tu casájniñu ró, chi yáha yúcuan-ni sáha ró. ¹² Te cándacu ri jniñu nuū rohó jéē casáha súcuan, te cástíhví ni rí rohó jeē na cóo nayúú ró te sájniñu ró, návāha nihín ró jeē cáji ró siquí jniñu sáha máá ró. Chi súcuan ndácu máá Jítóho yō Jesucristo jniñu.

¹³ Hermano, ma ndínuu ni ró jijnáhan ró sáha ró táca jniñu váha. ¹⁴ Te núu ndé ñni i tu jétáhú i jnūhun jeē cahán rí nuū carta yáha, te condēhe váha ro ndé-ni i cúu, te ma quijnáhan ga ró jíin i, návāha na cúcanu i te nacani ni i. ¹⁵ Te nasūu jéē cóto uhū

rō i, chi sa cahān rō jiín i nájnūhun jiín
ñani rō jeē na sájniñu vāha i.

Bendición jeē sándhí

¹⁶ Te ñúhun ni rī jeē maá Jítóho yō,
Yaā jeē jéhe jnūhun ndeyí sñ ni, níni na
sáha ya jeē coo ndeyí coo sñ ni rō siquī
tácá-ni, te coo ya jiín ró jijnáhan ró.

¹⁷ Ruhū Pablo, yāhá-ni cúu jeē té
ri jiín ndaha máá rí jeē cahán rī jeē
sándeýí ni rō jijnáhan ró. Te súcuan
jéhe ri firma nuū tāca carta rī, návāha
cuni rō jeē carta maá rí cúu. Súcuan
cáa letra rī. ¹⁸ Te ñúhun ni rī jeē maá
Jítóho yō Jesucristo, na sáha ga yā jeē
váha ró jijnáhan ró. Súcuan na cóo.
Amén.

CARTA HN JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi Yaā Dios jeē jnáma yóhó, jíin Jítóho yō Jesucristo jeē ñúhun ni yō coto yó, ni catají yá ruhū jeē nácani ri jnūhun ya. ² Te tée ri carta yáha cuájeē nuū rō Timoteo, chi cúu ndije ró nájñūhun sēhe ri siquī jeē ni scándíje ri rohó. Te ñúhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sī ni rō.

Jeē ma candíje i tāca jnúhun stáhú

³ Ná ni quihin ri ichi jeē quihín rī Macedonia, te ni cahān ndahú rí jíin ró jeē quéndōo ró ñuu Efeso. Te suni súcuan cáhān rī jíin ró vijna, návāha cahān nihin ró jíin sava ñayuu yúcuan jeē ma stéén i inga jnūhun jeē tú ndaā. ⁴ Te ma cuatáhú i tāca jnúhun jeē cúu máá cuento-ni, jíin jnúhun jeē cahán siquī ndese vēji yucūn tāca jíi yō. Chi tāca jéē yúcuan sáha jeē nahán cándajnūhún i siquī, te tu ndé jéjñíñu, te tu sáha jeē íje i squícu i nuū Yaā Dios siquī jnūhun cáncandíje yó.

⁵ Te ndácu ri jniñu yáha chi cúní rī jeē na cundáhú ni i jnáhan i siquī jeē iyó ndoo iyó ndáā anuá i, te cáncandíje ndije i ya. ⁶ Te sava ñayuu chi ni cajica yátá i, te ni cascuíta i jnūhun ya, ni quívicoo i nuū tāca jnúhun jeē tu ndé jéjñíñu. ⁷ Chi cáncuni i cuu i maestro ley yā, te ni tu cájecūhun ni i na jnūhun cúu jeē cácahān i, jíin na vé cúu jeē castéén nihin i.

⁸ Te jíni yō jeē iyó váha ley un, te núu jecūhun ni yō ndese jéjñíñu. ⁹ Chi cánuú sáha yó cuenta jeē tu ní jécōo ni ñn ley jeē siquí ñayuu ndaā, chi sa suhva siquī ñayuu jeē tu cájetáhú, jeē níhni ni, jeē casáha jniñu néé, jeē casáha cuēchi, jeē tu cáchiñúhún Yaā Dios ni tu cáncandíje ley yā, jeē cájehni tatá jíin náná, jíin jéē cájehni ndíyi.

¹⁰ Te suni ni jecōo siquī ñayuu cájica jnéni, jíin tée casáha ndíyi jíin jnáhan yí, jíin ñayuu casácuíhná inga ñayuu, jíin ñayuu castáhú, jíin ñayuu cácahān nihin jnūhun yáá. Te ni jecōo siquī tāca gá ñayuu jeē casáha jniñu tu quíjñáhan jíin jnúhun ya jeē steén ndaā vāha.

¹¹ Te jnūhun ya un cúu jnūhun yōhyo jéhu jeē jnáma Yaā Dios yohó. Te yōhyo ndetū Yaā cúu ya. Te ni tejníñu ya ruhū nácani ri jnūhun ya.

Jeē nácuatáhú Pablo siquī jeē ní cundáhú ni yā de

¹² Te nácuatáhú rí nuū Jítóho yō Jesucristo, Yaā ni jēhe fuerza ini rī, chi ni quihin ya ruhū ni sáha ya jeē cuu squícu ri, te ni tejníñu ya ruhū nácani ri jnūhun ya. ¹³ Te súcuan ni sáha ya jíin rí vésú ni cahān ndevāha ri siquī yā nde saá, te ni sáha ndevāha ri jíin ñayuu cáncandíje, te xeēn ni sáha ri. Te vésú súcuan te ni cundáhú ni yā ruhū, chi ná tu candíje ri yā nde saá, te tu ní jécūhun ni rī na vé cúu jeē sáha ri. ¹⁴ Súcuan ni sáha Jítóho yō jeē váha ndasí jíin rí. Te ni sáha ya jeē candíje ri jíin jéē cundáhú ni rī jnáhan ri siquī jeē ni quívi ri ndaha Cristo Jesús.

¹⁵ Te ndaā ndije cúu jnūhun yáha, te jeē cánuú candíje ndíhi ñayuu cúu: jeē ní quiji Cristo Jesús ini ñayívi návāha jnama ya ñayuu iyó cuéchi. Te ruhū cúu tée jeē vihyá gā ni sáha cuéchi. ¹⁶ Te ni cundáhú ni Yaā Dios ruhū, návāha jíin rúhū jeē vihyá gā ni sáha cuéchi te stéén Jesucristo ndese yōhyo íne cáhnu ni yā. Te súcuan ni sáha ya jeē cúu ri ñn ejemplo nuū tāca ñayuu candíje ní cuáhān yō, návāha nihin tahú i cotecu i ní cáni. ¹⁷ Núu súcuan te ní cáni na cáhān yíñúhún yó jeē yóhyo luu cújéhu máá Yaā jeē cúu Rey siquī ndíhi, jeē técu ní cáni, jeē tu náā cuíti. Te tu cúu coto yó núu yā vijna, te máá ñn-ni ya iyó, te ndíchí yá. Amén.

¹⁸ Nájñūhun sēhe ri cúu ró Timoteo, te jniñu yáha téjñíñu ri rohó, jéē na ndúcú ndeyí ró siquī jniñu váha. Te na cáncandíje váha ró, te na cóo ndaā anuá

rō. Chi nde saá je ni cacahān tācá hermano jíin jnúhun Yaā Dios jeē súcuan condiso jníñu ró. ¹⁹ Chi sava ñayuu tuá iyó ndáā anuá i nuū yā, te ni casnáā i jnúhun cá candíje i. ²⁰ Himeneo jíin Alejandro cúu uū tēe ni casáha súcuan. Te je ni siaá rī de nuū Satanás, jeē stóho ún de, návāha jíin jnúndóho ún te cutúhva de jeē ma cáhán ndevāha ga de siquī Yaā Dios.

Siquī ndese cacān tahú yō

2

¹ Núu súcuan te xīhna gā ndácu ri jeē cacán tahú rō jehē tāca ñáyuu. Te cahān ndahú ró jehē i, te cacān rō na-ni na vé jíni ñúhún i, te nacuatáhú ró nuū yā jeē siquī i. ² Te cacān tahú rō jehē tāca tēe cácujeñhu jíin jéē ndácu jniñu, návāha sáha de jeē cuu coyūcu váha yó te tú na jnúndóho coo siquī yō, te cuu chiñúhún váha yó Yaā Dios te sáha yíñúhún yó jíin táca-ni. ³ Chi yāha cúu jeē váha jeē nújnahan ni Yaā Dios, Yaā jnama yóhó. ⁴ Chi máá yá cuni yā jnama ya tāca ñáyuu te cuni i ndese íyó jnúhun ndaā yā. ⁵ Chi íyó ñn-ni Yaā Dios, te suni íyó ñn-ni Yaā jeē cahán jíin Yaā Dios jehē ñáyuu. Te Yaā un cúu máá Jesucristo jeē ní nduu tēe. ⁶ Te ni socō yā maá yá ni jihī yā jeē ní chunaa yā cuēchi ndihī yó. Te ná ni quiji máá quívī ún, te ni quejéé ní canacani jnúhun ún. ⁷ Te jeē siquī yúcuani ní jeni ya ruhū cúu ri apóstol jeē nácani ri jnúhun ya, návāha stéén rī nuū ñáyuu tācá nación jeē tu jíni jnúhun ya, jeē na cándíje i jnúhun ún te sáha i jniñu ndaā. Te siquī jeē candíje ri Cristo te ndaā cúu jeē cahán rī.

⁸ Núu súcuan te cúní rī jeē ndihī-ni lugar na cacán tahú tāca tēe. Te na cóo ndoo ánuá de jeē ma quití ni de ni ma tejnáhan de. ⁹ Te suni súcuan tācá ñahan, na cási váha ña máá ña nájñuhun cánuú, návāha ma cóo jnúhun canu. Te ma cóndihvī ni ña jeē sáha luu ndasí ña xinī ña, chí jéē cuhun ña siquī oro chí perla chí sahma váha ga. ¹⁰ Chi sa suhva na quéndōo luu ánuá ña jíin jniñu váha

sáha ña, nájñuhun cánuú sáha ñahan ndoo ánuá jeē cájejniñu nuū Yaā Dios. ¹¹ Te núu cáhīn ña jíin ñáyuu cascuáha jnúhun ya, te na cúní nahín ña te cuatáhú ña. ¹² Chi tu jéhe ri jnúhun jeē steén ñahan nuū ñáyuu ndutútú, ni jeē ndácu ña jniñu nuū tēe. Chi sa suhva na cúní nahín ña. ¹³ Chi xīhna gā Adán ni sáha ya, te saá te ni sáha ya Eva. ¹⁴ Te tu ní stáhú jexeén Adán, chí sa suhva ni stahú un ñasihí de, te ni sáha ña cuēchi. ¹⁵ Te jeē scácu tācá ña sēhe te coo váha ña, te núu na quéndōo ña jíin jnúhun cándíje ña ya, jíin jéē cundáhú ni ña jnáhan ña, jíin jéē cóo ndoo ánuá ña, jíin jéē sáha yíñúhún ña.

Ndese cánuú coo tēe cándiso jniñu nuū ñáyuu cá candíje

3

¹ Ndaā cúu jnúhun yáha: Núu ñn tēe cúní de condiso jniñu de condito de ñayuu cá candíje, te váha jniñu ndúcú de sáha de. ² Núu súcuan te tēe ndíso jniñu nuū ñáyuu cá candíje, cánuú jeē ma cóo ni ñn jeē nihín ñayuu cuēchi siquī de. Te na cóo ñn-ni ñasihí de, te cájí coo ni de, te ndito coo xinī de, te sáha yíñúhún de. Te cánuú jeē níni cuanúu de vehe nuū ñáyuu cájica, te níni stéén váha de jnúhun ya. ³ Te ma cúu de tēe nájini, te ma tejnáhan de, te ma ndíyo ni de xúhún. Chi sa suhva coo váha ni de, te coo vítá ni de, te ma cutóo ni de siquī xúhún. ⁴ Te cánuú jéē na ndácu váha de jniñu ini vehe de, te sáha de jeē squícu váha sēhe de te coo yíñúhún i nuū de. ⁵ Chi núu ñn tēe tu jíni de ndacu váha de jniñu ini vehe de, ¿te ndese cuu condiso jniñu de nuū ñáyuu cá candíje nuū Yaā Dios? ⁶ Núu súcuan te tēe ndíso jniñu nuū ñáyuu cá candíje, ma cúu de tēe jeē saá ní candíje, chí núu súcuan te sanaa te sándúxí de máá de, te ñnuú-ni cuēchi jecondee siquī de jíin jexeén. ⁷ Te cánuú cuu de tēe jeē suni nde ñayuu tu cá candíje, cuajnúhún i de, návāha ma nihín i cuēchi siquī de, te ma cúndeyí jexeén jíin de.

Ndese cánuú coo tē cájejniñu mēhñu ñáyuu cá candíje

⁸ Te suni súcuan tē cájejniñu mēhñu ñáyuu cá candíje, cánuú jéē na cóo yíñuhún de, te na squícu de jíin jnúhun cáhán de. Te ma cóo de tēe nájini, te ni ma ndíyo ni de xuhún. ⁹ Te na cuñi niñin de jíin jnúhun cándíje yó jéē ní yisáhi ndé jenahán, te na cóo ndoo anuá de. ¹⁰ Te cánuú jéē xihna gā coto ndee rō de, te núu ni jini rō jeē tú na cuēchi de, yūcuán na te cuu cuajniñu de mēhñu ñáyuu cá candíje. ¹¹ Te suni súcuan ñasihí de jíin náhan ña, cánuú coo yíñuhún ña, te ma sajnúhún ña, te cáji coo ni ña, te squícu vāha ña tācá-ni jniñu. ¹² Te tēe cájejniñu mēhñu ñáyuu cá candíje, na cóo in-ni ñasihí de, te na ndácu vāha de jniñu nuū séhe de jíin nuū ñáyuu vehe de. ¹³ Chi tāca tēe cájejniñu vāha mēhñu ñáyuu cá candíje, chi vāha quéndōo yíñuhún de, te níhín de modo jeē cají gá nácani de jnúhun Cristo Jesús jeē cá candíje yó.

Jnúhun sāhi yá jeē cá candíje yó

¹⁴ Te vēsú ñuhún ni rī cuajeē yachī rī coto jnáhan yó, te tēe ri jnúhun yáha cuájeē nuū rō, ¹⁵ návāha núu cucuéé rí, te je jíin rō ndese cánuú sáha vāha ñáyuu cácuu séhe Yaā Dios. Chi máá i cácuu ñáyuu cá candíje nuū Yaā Dios, Yaā técu. Te máá i cásáha jeē iyó cutú jnúhun ndaā, chi cáhīn niñin i jíin. ¹⁶ Te jendaá ndije chi jéhu ndasí cóo jnúhun yáha jeē cá candíje yó, jeē ní yisáhi ndé jenahán:

Yaā Dios ni steén yā maá yá, chi ni nduu ya tēe,
te Espíritu ni steén jeē iyó ndaā jniñu ni sáha ya,
te tācá ndajéhé andiví ní cajito jniñu ní sáha ya.
Te ni jitē núu jnúhun ya nuū ñáyuu tācá nación,
te ni cacandíje ñáyuu ní ñáyiví nuū yā,
te ni ndaa ya cuanuhun yā andiví.

Siquí ñáyuu cájica yátá nuū jnúhun cá candíje yó

4

¹ Te cáji steén Espíritu Yaā Dios jeē quiví cuándihi te coo sava ñáyuu caca yátá i nuū jnúhun cá candíje yó. Te cutáhú i tāca jéē cácahān jnúhun stáhú jíin jnúhun ní castéén tachī. ² Chi cuni nahín i jnúhun cástéén tēe cástáhú-ni, jeē tu cácahān ndaā de. Chi tēe un ní cahije ndasí ni de jíin jnúhun stáhú, te tuá sáha jíin ánuá de jeē nácani ni de. ³ Te cahān de jeē cuēchi cóo jeē coo ñasihí tēe, te suni súcuan núu cají ñáyuu sava ndeyu. Te ndeyu ún chi ni sáha Yaā Dios jeē cóo ñáyuu cá candíje jeē jíin jnúhun ndaā, návāha cají i te nacuatáhú i nuū yā. ⁴ Chi ndihi jeē ní sáha Yaā Dios, iyó vāha, te ma squexícó yó ni in, chi sa nacuatáhú yó te cají yó. ⁵ Chi jíin jéē cáhu yó jnúhun Yaā Dios jíin jéē nácuatáhú yó nuū yā, te iyó ndoo ndihi-ni.

Tēe jéjniñu vāha nuū Jesucristo

⁶ Te núu steén rō jnúhun yáha núu tācá hermano, núu súcuan te cuu ró tēe jéjniñu vāha nuū Jesucristo, te ije ró jíin jnúhun vāha ya jeē candíje ró, chi ni cutúhva ró te ndíquín rō. ⁷ Te ma quiví nduu rō jíin tāca jnúhun jeē cóo cuento-ni jeē cájeni cáhá ni ñáyuu. Chi níin na scuáha ró ndese chiñuhún vāha ró Yaā Dios. ⁸ Chi jeē scuáha yó ejercicio jeē cóo ndacuí yiquí cúñu yó, jecu-ni níhín jniñu. Te jeē scuáha yó chiñuhún vāha yó yá, suu yūcuán cóo jeē vāha níhín jniñu siquí tācá-ni, jeē cóo vida yáha jíin vida quiji. ⁹ Te ndaā ndije cóo jnúhun yáha, te jeē cánuú candíje ndihi ñáyuu cóo. ¹⁰ Te jeē siquí yáha cóo jeē sájniñu niñin yó siquí jnúhun ya te ndóho yó jéē cácahān ndevāha i nuū yó. Chi ñuhún ni yó jeē coto yó núu maá Yaā Dios, Yaā técu. Te máá yá cóo Yaā jnáma tāca ñáyuu, te ñáyuu cá candíje jnúhun cúndáhú ni yā i, máá i cóo jeē jnáma ya.

¹¹ Tāca jnúhun yáha cánuú jéē ndacu ró núu i te steén rō. ¹² Ma cuáha ró jnúhun jeē cujéē ní in i nuū rō siquí jeē suchí ró. Chi sa coo ró in ejemplo nuū ñáyuu cá candíje, jeē cóo i ndese vāha cáhán rō, ndese vāha sáha ró,

ndese cándáhu ni rō jnáhan ró, ndese cándije ró, ndese íyó ndoo ánuá rō. ¹³ Te níní ndé ná tu jinū rī nuū rō, te condihvī ni rō jeē cáhu ró tutu īi nuū hermano cándutútú, jín jeē stihvī ni rō i, jín jeē steén rō nuū i. ¹⁴ Ma cúhuun ni rō jín táhū jeē ni jéhe Yaā Dios nuū rō jeē nácani ró jnúhun ya. Chi tāca tée jéhu cándiso jniñu nuū ñáyuu cándije, ni casóo de ndaha de xinī rō, te ni sáha Yaā Dios jeē ní cacahān de jeē súcuan condiso jniñu ró.

¹⁵ Núu súcuan te cocuu ró jín táca jniñu yáha, te condihvī ni rō jín, návāha cuni tāca ñáyuu jeē váha íje ró cuáhān rō jín. ¹⁶ Coó cuidado rō jeē caca ndaā rō jín jeē steén vāha ró jnúhun ya, te cuiñi nihin ró jín ndihi. Chi núu súcuan sáha ró te quendōo vāha ánuá maá ró jín ñáyuu chuhun ni jnúhun cáhān rō.

Ndese sáha vāha yó jín ñáyuu cándije

5

¹ Ma cúxeēn rō nuū tāca tée jéhu, chi sa cahān vāha ró jín de jeē ma stívī de, nájnūhun cáhān rō jín tátá rō. Te tāca tée suchí, suni cahān vāha ró jín de nájnūhun jín ñani rō. ² Te suni súcuan cahān rō jín táca ñahan jéhu, nájnūhun jín náná rō. Te suni súcuan jín táca ñahan súchí, nájnūhun jín cuáha ró, te yíñuhún ndajnūhun ró jín ña.

³ Te ñayuu cándije na cuáha i jeē jini ñúhún ñahan ni caquendōo ndáhú, te núu ni quendōo ndáhú ndije ña jeē tú na ñayuu condito ña. ⁴ Chi ñin ñahan ní quendōo ndáhú, núu íyó séhe ña chí séhe chání ña jeē jévāha, te na cóto máá i ña. Chi cánuú cutūhva i jeē xíhna gā nuū ñáyuu vehe i squícu i coto i. Te na nácoto i náná i tátá i squícu jeē ní cacondito ña i. Chi yáha cúu jniñu vāha jeē núnahan ni Yaā Dios. ⁵ Te ñin ñahan ní quendōo ndáhú ndije jeē máá ñin na ña, ñúhun ni ña jeē maá Yaā Dios condito ya ña, te tu jécuiñi ña jeē jicán tahu ña nduú ñuú. ⁶ Te

sa suhva núu máni ndihvī ni ña squícu tāca jeē cúsiñi ni maá-ni ña, yūcuán na te vésú técu ña, te nájnūhun je ni jihī ña. ⁷ Jniñu yáha ndacu ró nuū ñáyuu, návāha ma cóo cuēchi squícu i. ⁸ Te núu ñin ñayuu tu ndíto i jnáhan vehe i, te víhyá gā ñayuu ini vehe i, núu súcuan te sáha i jniñu jeē tu quíjnahan jín jnúhun cándije yó, te cúu i ñin jeē neé gá vésú ñáyuu tu cándije.

⁹ Te ñahan viuda cuu quívi síhvī ña nuū lista ñayuu jeē cáchindéé ñáhán ró jín xúhun, te núu je ni jīnu ña unī xico cuiyā, te núu ni íyo ñin-ni yí ña. ¹⁰ Te suni cánuú jéé cuajnúhún ñayuu ña jeē váha jniñu ni sáha ña, núu jeē ni scuéhu vāha ña sēhe ña, jín jeē ní jéhe núu ña vehe nuū ñáyuu cájica, jín jeē ní jejniñu ña nuū hermano cándije, jín jeē ní chindéé ñáhán ña ñayuu cándoho jnúndóho, jín jeē ni sáha ña tāca gá jniñu vāha.

¹¹ Te tācá ñahan viuda jeē iyó suchí gá, chí ma soó ró síhvī ña nuū lista. Chi sanaa te nducú ña jeē cúsiñi ni maá-ni ña, te ma cóndihvī ni ña squícu Cristo, chí cuu ni ña condeca tucu ña tée. ¹² Te súcuan jecondee cuēchi squícu ña, chí tu ní squícu ña jeē ni jéjnūhun ña ná ni jecosó síhvī ña nuū lista. ¹³ Te suni caca cuu ña tācá-ni vehe te quee cúxí ña. Te nasūu máni jeē cáca cúxí ña, chí suni squícu jeē sajnúhún ña, te quívi nduu ña cahān ña jnúhun jeē tu íyó vāha jeē cahān ña. ¹⁴ Jeē yúcuán cúni rī jeē tācá ñahan viuda jeē iyó suchí, na nándāha ña, te scuéhu ña sēhe, te coto vāha ña vehe ña, návāha ñayuu cácuu contra ma cúu cahān i squícu ña. ¹⁵ Chi sava ñahan viuda je ni cajica yátá ña te sáha ña jniñu jeē cuní Satanás.

¹⁶ Te núu ñin tée chí ñin ñahan cándije, núu íyó ñahan viuda vehe i, te na cóto máá i ña. Te ma cóndee gasto ña squícu grupo ñayuu cándije, návāha cuu cuáha vāha i nuū ñahan viuda jeē tu ndé ñin coto ña.

¹⁷ Te tāca tée jéhu cándito ñayuu cándije, na jécunaā doble yāhu de, te núu cándihvī ni de cásteén de cáncani vāha de jnúhun ya. ¹⁸ Chí

cúu nájnūhun cáhán tutu i: Ma cánda s̄iquī caxīn t̄i trigo, núu ma cuáha ró jēē cáji t̄i. Te suni cáhán: Tēe jeē sájniñu tátú, jíni ñúhún quiyāhu de, áchí.

¹⁹ Ma cuajnúhún ró te núu jéquin ñayuu cuēchi s̄iquī iin tēe jéhnú cándito ñayuu cácandíje te núu tu íyó úu chí únī testigo. ²⁰ Te núu cásáha ñayuu cuēchi, te cánuú cuxeēn rō nuū i, jíto jínúu ndihí ñayuu, návāha na cónso iyo sava ga i. ²¹ Te cáhán nihin ri jíin ró, jíto máá Yaā Dios jíin Jítóho yō Jesucristo jíin táca ndajéhé yā jeē ní nacāji ya: Squícu vāha ró jniñu yáha, te ma sáha ró cuenta ndese cúu iin i, chí inuú-ni sándaā rō s̄iquī ndihí-ni i. ²² Ma cáni yachī rō iin tēe jeē condiso jniñu de nuū ñayuu cácandíje, chí xīhna gā coto ndee rō de. Chí sanaa te st̄iví de, te cuēchi de suni condee s̄iquī rō jíin de. Te coto ró máá ró jeē ma quívi ró jíin jniñu néé.

²³ Te s̄iquī jeē núu-ni núu-ni cúhú ch̄iji ró, te ma cóho ga rō máni ndute, chí suni coho ró jecu vino.

²⁴ Cuēchi sava ñayuu chí je íyó ndijin nde ná tu quívi i nuū cúndaā cuēchi i. Te cuēchi sava ga i chí cúcuéé te natū nahín. ²⁵ Te suni súcuan t̄acá jniñu vāha, chí íyó ndijin. Te vēsú ná tu natū jniñu vāha ún, te ma cúu quisāhi ní cáni, chí natū nahín.

6

¹ Táca ñayuu cácuu mozo, na cóo yíñúhún vāha i nuū patrón i, návāha ma cahán neé ñayuu s̄iquī Yaā Dios jíin s̄iquī jnūhun ya jeē castéén yō. ² Te mozo jeē yíhi nuū patrón cácandíje, ma cáni ni i jeē cūhva-ni sáha yíñúhún i nuū de s̄iquī jeē hermano cácandíje cácuu de. Chí sa cuajniñu vāha ga i nuū de, chí tēe cándíje tēe maní i jíin cúu táca tēe un jēē sájniñu i nuū. Jnūhun yáha stéén rō te st̄ihví ni rō i.

S̄iquī jeē chíñúhún vāha yó yá te cus̄i ni yō jíin cúhva jeē névāha-ni yó

³ Te núu ndé tēe stéén de jnūhun tú ndaā jeē tu quíjnáhan jíin jnūhun vāha ndaā maá Jítóho yō Jesucristo, jíin

jnūhun ni steén Yaā Dios jeē cácandíje yó, ⁴ núu súcuan te máni tēe ndúxí tēe tu jécūhun cuiti ni cúu de. Chí cánéé xíní de, chí máni cúni de tejnáhan de s̄iquī táca jnūhun steén de. Te t̄acá un sáha jeē cáccuésún ni, jíin jēē cátejnéhan, jíin jēē cácahán ndevāha, jíin jēē cájeni néé ni s̄iquī jnáhan, ⁵ jíin jēē máni cástáhán jnáhan. Súcuan cásáha tēe jeē ní ndunéé xíní, jeē tu cájini jnūhun ndaā. Te cájeni ni de jeē nihín de cuehē xūhun s̄iquī jnūhun cácandíje de stéén de. Na cújiyo ró núu ñayuu cándāa súcuan. ⁶ Te jendaá jeē yóh̄yo vāha quéndōo yó te núu chíñúhún vāha yó yá, te núu cúsi ni yō jíin cúhva jeē névāha-ni yó. ⁷ Chí tú na vé ni cácu yó jíin ñayívi yáha, ni tú na vé condiso yó quíh̄n yō jíin núu na cúu yō. ⁸ Te núu íyó jēē cáji yō jeē cusúcún yó, te na cúsi ni yō jíin yúcuan-ni. ⁹ Chí ñayuu jeē cuní cucúca, chí yachī quívi i cuēchi jeē jíto ndee jexeén i. Te quívi i jíin cuehē jniñu cánéé jniñu st̄iví jēē ndíyo ni i. Te t̄acá un sáha jeē t̄iví ñayuu te jnahnū ndetū i. ¹⁰ Chí jeē ndíyo ni yō xūhún, yúcuan sáha jeē quejéé táca jniñu néé. Te sava ñayuu jeē ndíyo ni xūhún, ni castóo i jnūhun cácandíje i, te ni canih̄n i cuehē ndasí jnúndóho.

Jeē na ndúcú ndéyí yó s̄iquī jnūhun cándíje yó

¹¹ Te róhó chí tēe jéjníñu nuū Yaā Dios cúu ró, te cunu ró coto ró táca cuēchi yáha. Te condiquín rō jniñu ndaā, te chíñúhún vāha ró Yaā Dios, te candíje vāha ró, te cundáhú ni rō jnáhan ró, te cuandeyí ni rō, te coo v̄itá ni rō. ¹² Te nducú ndéyí ró s̄iquī jnūhun cándíje yó yá. Te cuiñi nihin ró jíin jnūhun jeē ni níh̄n tahu yō cotecu yō ní cáni. Chí jeē yúcuan cúu jeē ní cana ya rohó, te cáji ní cahán rō jeē vāha cándíje ró yá, jíto jínúu cuehē ñayuu. ¹³ Te cáhán nihin ri jíin ró, jíto máá Yaā Dios, Yaā jeē sáha jeē técu t̄acá-ni, jíin Jesucristo, Yaā jeē cáji ní cahán yā ni nacani ya jnūhun vāha nuū Poncio Pilato. ¹⁴ Squícu vāha ró jniñu ndácu ya nuū rō, te ma st̄iví

ró sáha ró, návāha ma cahán ñayuu cuēchi siquī rō. Te súcuan sáha ró ní ndé quívi ndíji Jitoho yō Jesucristo. ¹⁵ Chi quiji ndijin yā maá quívi jeē ní jeni Yaā Dios. Te Yaā Dios chi máá ñni-ni ya cúu Yaā yōhyo ndetū, te jñi ya ndihi poder. Te cúu ya Rey nuū tāca rey, jín Jitoho nuū tāca jítoho. ¹⁶ Te máñuhún-ni ya cúu jeē iyó ní cáni. Te ndéé yá ñni lugar nuū ndí ndaxín, nuū ma cúu quívi yó. Te ni ñni ñayuu ñayivi yáha tu ní jito cuiti i nuū yā, te ni ma cúu coto i nuū yā. Te ní cáni na cóo yíñuhún yó nuū yā, chi jñi máá yá poder ní cáni. Amén.

¹⁷ Te cahán rō jín ñayuu cucá nda-jniñu ñayivi yáha, jéé ma cundúxi i. Te ma ténuū i xuhún i, chi yachi naa ún. Chi sa suhva na ténuū i jeé coo vāha i sáha Yaā Dios, Yaā técu, chi máá yá jéhe cuehē yā tāca-ni jeé cúsi ni yō jín. ¹⁸ Te ndacu ró jniñu nuū i jeé na sáha vāha i, chi jeé sacúca ndije i máá i cúu jeé sáha i tāca jniñu vāha. Te na cúu i ñayuu vāha ni jeé cuáha i jeé cúu jnáhan i. ¹⁹ Te súcuan caya i cuehē jniñu vāha jeé coo cúca i nuū yā ní tiempo jeé quíji. Te nihín tahu i cotecu i ní cáni.

Jniñu sándihi ndácu Pablo nuū Timoteo

²⁰ Te róhó Timoteo, condito ró táca jniñu ní chihí ya ndaha ró. Te ma quívi nduu rō jín táca jnúhun cāhá-ni, cuenta ñayivi yáha, jín táca jnúhun stáhu jéé cácahán i jeé jnúhun ndíchi ndáa cúu. ²¹ Chi sava ñayuu cándiquín tāca jnúhun yáha, ni cajica yátá i ni castóo i jnúhun cá candíje i ya.

Te ñnúhun ni rī jeé Yaā Dios na sáha ga yā jeé vāha róhó. Súcuan na cóo. Amén.

CARTA UU JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō ní cáni siquī jeē yíhi yó ndaha Cristo Jesús. ² Te téé ri carta yáha cuájeē nuū rō Timoteo, chi cúu ro nájnūhun sēhe ri jeē maní rī jíin. Te ñúhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sīh ni rō.

Jeē nácani de jnūhun Cristo

³ Níní tu náā ni rī cacān tahu rī jehē rō nuū Yaā Dios nduú ñuú, te nácuatáhú rí nuū yā jeē siquī rō. Chi nuū maá yá jejniñu ri, nájnūhun ni casáha táca jíi rī, te íyó ndoo ánuá rī nuū yā. ⁴ Te núcūhun ni rī jeē ni ndáhyū rō ná ni quenda ri cuahān rī. Te cúu ni rī ndacoto jnáhan yó, návāha cusī ndasí ni rī. ⁵ Te núcūhun ni rī jeē váha ndije cándije ró Cristo, nájnūhun ni cándije náná jéhnú ró Loida, jíin náná rō Eunice xihna gā. Te cúcáhnú ni rī jeē suni súcuan cándije máá ró vijna.

⁶ Te jeē yúcuan nástíhví ni rī rohó jéē na cóndíhví gā ni rō jíin táhū jeē ni jéhe Yaā Dios nuū rō jeē nácani ró jnúhun ya. Te tahu un ní nihīn rō ná ni tee ri ndaha ri xinī rō. ⁷ Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnúhun, chi sa sáha jeē iyó fuerza ini yō, jíin jéē cundáhú ni yō jnáhan yó, jíin jéē ndíto íyó xíní yō. ⁸ Núu súcuan te ma cúcanu rō nacani ndaā rō jnūhun máá Jítóho yō. Te suni ma cúcanu rō jeē siquī maá rí jeē íne ri vecāa siquī jnúhun ya. Chi sa cuāha ró jnúhun ndoho ró jíin rí siquī jeē cánacani yó jnúhun jnáma ya yohó, núu ndese ni jéhe Yaā Dios fuerza ini yō. ⁹ Chi ni jnama ya yohó, te ni cana ya yohó jéē coo ndoo ánuá

yō cuajníñu yó núu yā. Te tu ní cána ya yohó siquī jeē váha ni sáha yó, chi siquī jeē ní tee ni maá yá jeē cundáhú ni yā yohó jéē yíhi yó ndaha Cristo Jesús. Chi nde ná tu jecōo ñayíví, te je cundáhú ni yā yohó. ¹⁰ Te vijna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yā yohó. Chi máá Cristo ni snáa yā poder cuehyí jéhní yóhó, chi jíin jnúhun jnáma ya yohó ni steén cají yá nuū yō jeē cótecu yō ní cáni chi ma jnahnú ndetū yō.

¹¹ Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rī nuū ñáyuu táca nación jeē tu jíin jnūhun ya. ¹² Te siquī un cúu jeē ndóho ri táca jnúndóho yáha íne ri vecāa. Te tu cúcanu rī, chi jíin rī ndese Yaā cúu Yaā cándije ri, te cúcáhnú ni rī jeē cúu coto ya jniñu jeē ní chihi ya ndaha ri nde vijna te nde quiví ndíji ya.

¹³ Te cuiñi nihīn ró jíin táca jnúhun ya jeē steén ndaā, suu jnūhun jeē ni steén rī nuū rō. Te caca ró jíin jnúhun cándije yó, te cundáhú ni rō jnáhan ró siquī jeē yíhi ró ndaha Cristo Jesús. ¹⁴ Te condito ró táca jniñu váha jeē ní chihi ya ndaha ró, sáha poder maá Espíritu Santo jeē ndeé ini yō.

¹⁵ Je jíin rō jeē táca ñáyuu cáyūcu Asia ni castóo i ruhū. Te uū i cúu Figelo jíin Hermógenes. ¹⁶ Te jíicán tahu rī jeē cundáhú ni Jítóho yō ñáyuu vehe Onesíforo, chi cuehē jíinu ni nanihīn ni rī ni sáha de, te tu ní cúcanu de siquī rī jeē ní ine ri vecāa. ¹⁷ Chi sa suhva ná ni quiji de ñuu Roma, te ni nanducú yúcún de ruhū nde ni nanihīn de ruhū. ¹⁸ Te jíicán tahu rī jeē maá Jítóho yō cundáhú ni yā de quiví ndíji ya. Te je jíin váha máá ró ndese yóhyo ni chindéé ñáhán de ruhū ná ni cahíyo ri ñuu Efeso.

Jeē cúu yó nájnūhun soldado vāha nuū Jesucristo

2

¹ Núu súcuan te róhó, séhē mání, na cóo fuerza ni rō siquī jeē yíhi ró ndaha

Cristo Jesús te sáha ya jeē váha róhó. ² Te tāca jnúhun jeē ní jini ró ní cahān rī, jító jínúū ñayuu cuehē, jnúhun ún na nástéén rō nuū tēe cásquícu vāha, návāha suni cuu stéén tucu máá de nuū sáva ga i.

³ Te róhó na cuándeýí ni rō coto ró jnúndóho, chí cúu ró nájnuhun ñn soldado vāha nuū Jesucristo. ⁴ Ni ñn soldado jeē íin nuū guerra, tu sájnēñu de máá de jín jniñu máá de, chí cánuú jeē sáha de máni máá jēē ndácu tēe ní tejniñu de. ⁵ Te suni súcuan tēe cásiquí deporte, ma nihín de premio te núu tú condihví ni de cosíquí váha de máá modo chíjniñu. ⁶ Te tēe sájniñu ñihin ñuhun, máá de cúu jeē nihín xihna gā jeē cuáha itu. ⁷ Nacani ni rō siquí jeē cahán rī, te máá Jítoho yō sáha ya jeē jécūhun ni rō siquí ndihí.

⁸ Te cocuhun ndasí ni rō Jesucristo, Yaā ní quiji yucūn rey David, te ni natecu yā mēhñu ndíyí, nájnuhun cáhán jnúhun jnáma ya yohó jēē nácani ri. ⁹ Te jeē siquí jnúhun un ndóho ri jnúndóho, te nde ni cajihni i ruhū íne ri vecāa nájnuhun ñn tēe ni sáha cuēchi xeēn. Te jnúhun Yaā Dios chí ma cúu cuhni i jeē ma cuité núu. ¹⁰ Núu súcuan te jéndeýí ni rī jító ri tāca jnúndóho yáha síquí jeē cundáhú ni rī ñayuu jeē ní nacāji ya, návāha suni cācu máá i jeē quívi i ndaha Cristo Jesús, te quihín i nuū kujéhnu i ní cáni.

¹¹ Chí ndaā cahán jnúhun yáha: Núu vēsú na cúu yō jeē siquí yā, te suni cotecu yō jín yá,

¹² te núu cuandeyí ni yō ndoho yó, te suni ndacu yó jniñu jín yá.

Te núu ma cuajnúhún yó yā, te suni ma cuajnúhún yá yohó.

¹³ Te vēsú tu squícu vāha yó, te máá yá chí máni squícu ya, chí tu cúu sáfalta yā, chí squícu ya jeē ní cahān yā.

Tēe sájniñu squícu vāha jín jnúhun ya

¹⁴ Jnúhun yáha na nástíhví ni rō ñayuu, te cahān ñihin ro jín i, jító máá Jítoho yō, jeē ma téjnanhan i siquí tāca jnúhun sáa-ni. Chí tu ndé jéjniñu cuíti, chí sa stívi ñayuu jíni sōho. ¹⁵ Te nducú

ndéyí ró jeē cuajnúhún Yaā Dios rohó, jēē cúu ró tēe sájniñu squícu vāha jín jnúhun ya, návāha ma cúcanu rō nuū yā siquí ní ñn, chí vāha nacani ró jnúhun ndaā yā. ¹⁶ Te ma quívi nduu ró jín táca jnúhun sáa-ni ñayívi yáha, chí suu sáha jeē ndúcuehē gā jniñu néé quívicoo ñayuu cácahān. ¹⁷ Te tāca jnúhun cástéén i chí cúu nájnuhun ñn ndíhyi xeēn jeē sacáhú gā cuahān. Te Himeneo jín Fileto cúu uū tēe jeē casáha súcuan. ¹⁸ Chí tēe un ní cajica yátá de nuū jnúhun ndaā, te cácahān de jeē jé ni cuu ni canatecu ndíyí. Te súcuan cásaca nuu de xiní sava ñayuu cácandíje. ¹⁹ Te Yaā Dios ni jeni ya ñayuu maá yá, te íyó cutú ndaā i jeē ma cáca yátá i, nájnuhun yósó núu tútu ñi: Je jín Jítoho yō Yaā Dios tāca ñayuu jeē yíhi ndaha máá yá. Te suni cáhán: Tāca ñayuu jeē ndácunehen síhví Cristo, na cújiyo i nuū jniñu néé, áchí.

²⁰ Te ini ñn vehe cáhnu íyó cuéhē cohō, nasūu máni cohō oro cohō plata, chí suni cohō yujnu cohō ñuhun. Te íyó jēē fino te íyó jēē corriente. ²¹ Te núu ñn ñayuu sándoo i máá i jeē quénda i nuū tācá jniñu néé, te cuu i nájnuhun ñn cohō fino. Te coo ndoo coo ñi i nuū Jítoho yō, te nihín jniñu i ndese cúní maá yá. Te coo túhva i jeē sáha i tācá jniñu váha.

²² Núu súcuan te cunu ró coto ró táca jēē tú vāha jeē cándiyo ni tēe suchí. Te condiquín rō jniñu ndaā, jín jnúhun cándíje ró yá, jín jnúhun cundáhú ni, jín jnúhun coyūcu máni jín jnáhan. Te súcuan sáha ró ndé jín táca ñayuu ndoo ánuá jeē ndácunehen síhví máá Jítoho yō. ²³ Te ma quívi nduu ró jín táca jnúhun cánéé íi jeē tu íyó cájí, chí je jín rō jeē sáha jeē tejnanhan ñayuu. ²⁴ Te mozo máá Jítoho yō, tú vāha jeē tejnanhan de, chí sa suhva cánuú jēē coo vāha ni de jín táca ñayuu. Te coo vāha ni de stéén de, te cuandeyí ni de jín i. ²⁵ Te jín jēē víta ni de te cani ichí de ñayuu ñihni ni. Chí sanaa te nacani ni i sáha Yaā Dios, te jecūhun ni i ndese íyó jnúhun ndaā. ²⁶ Te nducájí ni i te

cācu i nuū jexeén jeē ní jn̄i ún i, chi ni cundeyí jíin i jeē sáha i jeē cuní maá.

Siquí ndese coo ñayuu sáha néé quívi cuándihi

3

¹ Te suni na jécūhun ni rō jeē quívi cuándihi te quee quívi coo jn̄undóho. ² Chi coo ñayuu jeē chiñúhún máá, te ndiyo ni i xūhún, te sátéyí i máá i, te sándúxí i máá i. Te cahān neé i siquí Yaā Dios, te cunīhni ni i nuū tatá i nuū naná i, te ma nácuatáhú i, te ma chiñúhún i Yaā Dios. ³ Te ma cóo manī i jíin jnáhan i ni ma cundáhú ni i. Te sájnúhún i, te ma cúu casi i tāca jéē ndíyo néé ni i, te yōhyo xeēn coo i, te quiṭi ni i coto i tācá jniñu váha. ⁴ Te suni nastúu i jnáhan i, te ma yūhú i sáha i cuēchi, te coo ndúxí ndasí i, te nducú i jeē cúsi ni maá-ni i, te ma nducú i quívi i nuū Yaā Dios. ⁵ Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quívi nduu rō jíin ñayuu casáha súcuan. ⁶ Chi sava tēe ún quívi de vehe te stáhú de tācá ñahan cánéé jéē iyó ndasí cuéchi. Te yachi quívi coo ña jíin tāca jnúhun tú ndaā jeē cúsi ni ña jíin. ⁷ Te vésú niní scuáha ña na-ni jn̄uhun, te tu cúu cuiṭi jecūhun ni ña jn̄uhun ndaā yā. ⁸ Te nájn̄uhun ni casáha tēe tásí Janes jíin Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnúhun ndaā. Chi coo nee jeē níjn̄uní de, chi ma candíje ndije de jn̄uhun cándíje yó. ⁹ Te ma quéé jniñu sáha de, chi cuni tāca ñayuu jeē tēe cánéé xíní cácuu de, nájn̄uhun ni cajini ñayuu jeē ni íyo néé xíní ndindúú tēe jeē ní nducú casi nuū Moisés.

Jniñu sándihi ndácu Pablo nuū Timoteo

¹⁰ Te rōhó chi je ni cutūhva vāha rō ndese stéén rī, ndese jíca ndaā rī, ndese tēe ni rī sáha rī, ndese cándíje rī yā, ndese néé rī paciencia, ndese cúndáhú ni rī jnáhan rī, jíin ndese jéndeyí ni rī. ¹¹ Chi ni cajito xeēn ñayuu ruhū, te ni ndoho rī jn̄undóho. Te jíin rō tāca jéē ní ndoho rī ñuu Antioquía,

ñuu Iconio, jíin ñuu Listra. Te jíin rō ndese ni cajito xeēn i ruhū. Te máá Jítóho yō ni jnama ya ruhū nuū ndihi ún. ¹² Chi ndaā cúu jeē tāca ñayuu jeē ndihví ni cuajniñu vāha nuū Cristo Jesús, ndoho i jeē coto xeēn ñayuu i. ¹³ Te ñayuu casáha jniñu néé jíin ñayuu castáhú, chi sa víhyá gā cocuu i jíin jniñu néé, chi stáhú i ñayuu, te suni candíje máá i jn̄uhun stáhú.

¹⁴ Te rōhó chi sa cuiñi nihin rō jíin jéē ní cutūhva rō jíin jéē ní cucáhnū vāha ni rō. Chi jíin rō ndese ñayuu cúu jeē ní castéén nuū rō. ¹⁵ Chi nde ná lulí rō, te je jíin rō ndese cáhán tutu i jeē steén nuū rō ndese candíje rō jeē ni jíin Cristo Jesús jehē rō návāha cācu rō. ¹⁶ Te ní tutu i cúu jn̄uhun jeē ni cáhān Yaā Dios, te vāha níhín jniñu jeē steén nuū yō, jeē cahán nuū yō, jeē náchuhun ichí yóhó, jíin jéē scuéhnū yóhó jíin jniñu ndaā, ¹⁷ návāha tēe cájejniñu nuū Yaā Dios, ije ni de te coo tūhva vāha de sáha de tācá jniñu váha.

4

¹ Te cáhán rī jíin rō, jito Yaā Dios jíin Jítóho yō Jesucristo, Yaā quiṭi ndacu jniñu, te sándaā yā jniñu ñayuu cátecu jíin ñayuu ní cajihí. ² Cáhán nihin rī jeē na nácani rō jnúhun ya, te stíhví ni rō i candíje i. Te níiní sáha rō súcuan núu núne i chí vésú tu núne i. Te sáha rō jéē na jécūhun ni i, te cahān rō nuū i, te caní ichí váha rō i, te jíin cuéhē paciencia steén rō nuū i. ³ Chi quee tiempo jeē ma cuájnúhún cuiṭi ñayuu jn̄uhun ya jeē steén ndaā vāha, chí sa cuajnúhún i jn̄uhun cúsi ni maá i, te nducú i cuéhē maestro jeē steén nuū i máni jn̄uhun jeē nújnahan ni i cuni nahín i. ⁴ Te cujiyo i nuū jnúhun ndaā, te condihví ni i tāca jnúhun jeē maá cuento-ni cúu. ⁵ Te rōhó chi níiní coo ndito ni rō, te cuandeyí ni rō jíin jn̄undóho, te condihví ni rō nacani rō jnúhun jnáma ya yohó, te squícu vāha rō jíin jniñu ya jeē sáha rō.

⁶ Te ruhū chí je ni socō rī maá rí jeē cúu rī, te je cuacuyajni quívi cuu rī. ⁷ Te je ni cundeyí rí jeē ní nducú ndéyí rí siquí jniñu váha, te je ni jíinu

ni jica ri ñayiví yáha, te tu ní siáá rī jnūhun cándije ri yā. ⁸ Te vijna je íyó tūhva premio jeē nihín rī siquī jeē ní jica ndaā rī. Chi Jitoho yō cuāha ya un núū rī maá quívī sándaā yā jniñu, chi máá yá cúu juez ndaā. Te nasūu núū maá ñn ruhū cuāha ya, chi suni cuāha ya nuū tāca ñáyuu jeē cúu ni i jeē ndíji ya chi manī i jíin yá.

Jeē cána Pablo quiji Timoteo nuū de

⁹ Nducú ndéyí ró quiji yachī rō nuū rī. ¹⁰ Chi Demas ni stóo de ruhū, chi ndíyo ni de ndajniñu ñayiví yáha, te cuahān de ñuu Tesalónica. Te Crescente chi cuahān de Galacia, te Tito cuahān de Dalmacia. ¹¹ Te máá ñn na Lucas íne jíin rī. Te jeē quiji ró, te condeca ró Marcos quiji ró jíin de, chi vāha cuajniñu de jeē chindéé ñáhán de ruhū jíin jniñu ya. ¹² Tíquico ni tají rí de cuahān de ñuu Efeso. ¹³ Te jeē quíji ró, te condaha ró cotón jeē ni stóo ri vehe Carpo ñuu Troas. Te suni condaha ró tāca libro, te jeē cánuú gá cúu tācá tutu ní tee máá rí.

¹⁴ Alejandro, tēe cúu herrero, yōhyo xeēn ni sáha de jíin rí. Te máá Jítoho yō cuāha ya yāhu de jeē súcuan ní sáha de. ¹⁵ Te condito ró máá ró nuū de, chi yōhyo ni cuu de contra siquī jnūhun cástéén yó.

¹⁶ Te ná ni ine ri jeē xíhna ñúhún núū tāca tóhō, te tú ni ñn tēe ní índichi jíin rí, chi ndíhi de ni castóo de ruhū. Te ñúhún ni rī jeē Yaā Dios cone cáhnu ni yā nuū de. ¹⁷ Te vēsú súcuan te máá Jítoho yō ni chindéé ñáhán yá ruhū, te ni jēhe ya fuerza ini rī, te súcuan ni sínu ri ni nacani ndíhi ri jnūhun jnáma ya yohó, ni cajini nahín ñáyuu tācá nación tu jíin jnūhun ya. Súcuan ni jnama Jitoho yō ruhū nuū tāca tēe xeēn. ¹⁸ Te jnama ga yā ruhū nuū tācá jniñu néé, te condito ya ruhū nde quíví ri andiví núū ndácu ya jniñu. Te na cáhán yō jeē yóhyo luu cújéhnu ya ní cáni. Amén.

Saludo jíin bendición jeē sándihí

¹⁹ Te cahān rō jeē sándeyí ni Prisca jíin Aquila, jíin ñáyuu vehe Onesíforo, achí rí. ²⁰ Erasto ni quendōo de ñuu

Corinto. Te ni quendōo Trófimo ñuu Mileto, te cúhú de. ²¹ Te condihvī ni rō quiji ró nde ná tu quejéé vico míjin. Sándeyí ni rō, achí Eubulo jíin Pudente jíin Lino jíin Claudia jíin táca gá hermano.

²² Te ñúhún ni rī jeē maá Jítoho yō Jesucristo na cóo ya jíin ró, te Yaā Dios sáha ga yā jeē vāha róhó jíináhan ró. Súcuan na cóo. Amén.

CARTA JEE NI TEE SAN PABLO APOSTOL NUU TITO

¹ Máá rí cúu Pablo, mozo Yaā Dios jíin apóstol Jesucristo, chi ni tají Yaā Dios ruhū jeē scándije ri ñayuu ní nacāji ya, návāha jecūhun ni i jnūhun ndaā yā jeē candije yó, ² te cocuhun ni i jeē cótecu i ní cáni. Chi nde ná tu jecōo ñayiví te ni jejnūhun Yaā Dios jeē cótecu yō, te íyó ndāā jnūhun ni cahān yā. ³ Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejniñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya. ⁴ Te téé ri carta yáha cuájeē nuū rō Tito, chi nájnūhun sēhe ri cúu ndije ró síquī jeē ínuú-ni cándije yó yá. Te ñūhun ni rī jeē Tatá yō Yaā Dios jíin Jítóho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sī ni rō.

Jniñu ya jeē ni sáha Tito nde isla Creta

⁵ Te ni stóo ri rohó ndé isla Creta, návāha sándaā rō síquī jniñu jeē cúmanī gā cundaā, te caní ró táca téé jéhnū condito ñayuu cácandije táca ñuu, nájnūhun ni ndacu ri jniñu nuū rō. ⁶ Te téé jéhnū un cánuú jeē ma cóo ni ñn jeē nihín ñayuu cuēchi síquī de. Te cánuú coo ñn-ni ñasihí de. Te sēhe de cánuú cuu i sūchi cácandije jeē ma nihín ñayuu cuēchi síquī i jeē tu sáha váha i chí jéé níhni ni i nuū de. ⁷ Chi téé cácujehnū cándiso jniñu nuū ñayuu cácandije, cánuú caca ndaā de chí cándiso jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de téé nájini, ma cuajnáhan de, te ma ndiyo ni de xūhún. ⁸ Chi sa cánuú jéé niní cuāha núu de vehe nuū ñayuu cájica, te níní sáha de jniñu váha, te ndito coo xiní de, te coo de téé ndaā, te coo ndoo ánuá de, te casi de modo jeē cuní máá de. ⁹ Te cánuú cuiñi níhin de jíin jnúhun ndaā jeē ni scuáha de, návāha

cuu stíhví ni de ñayuu jíin táca jnúhun ndaā váha, te suni cuu sáha de jeē jécūhun ni ñayuu cácuu contra, te casi i yuhu i.

¹⁰ Chi íyó cuéhē ñayuu níhni ni, te cástéén i inga modo jéni ni máá i jeē súcuan cácu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan. ¹¹ Te cánuú jéé casi rō yuhu táca téé ún, chí cástéén de jnūhun jeē tu íyó váha stéén de, chí cúní de nihín de xūhun síquī ún. Te súcuan sáca nuu de xiní ndihí ñayuu táca vehe.

¹² Te ñn téé isla Creta jeē nácani jnūhun, ni cahān de síquī jnáhan ñuu de: Jnáhan yó ñayuu Creta, chí máni ñayuu stahú cácuu i, te nájnūhun quití xéén casáha i, te máni ndíhví ni i cají cuehē i, te cúxí i, áchí de. ¹³ Te ndaā cúu jnūhun ni cahān téé ún. Jeē yúcuan na cúxeén rō nuū i, návāha ndaā váha na cándije i. ¹⁴ Te ma sáha i cuenta táca jnúhun ni catava jnáhan yó hebreo, jeē máá cuento-ni cúu, ni ma squícu i jniñu cándacu téé ni quendacoo nuū jnúhun ndaā.

¹⁵ Te ñayuu jeē ní ndundoo jeē níjnūní, máni modo iyó ndoo íyó váha jéni ni i jíto i táca-ni. Te ñayuu tu cándije jeē tu ní ndúndoo jeē níjnūní, máni jéni ni i ñn modo tú ndoo tú váha síquī táca jéé jíto i. Chi nde jeē níjnūní i jíin ánuá i íyó jnéhén. ¹⁶ Te vésú cácahān i jeē jiní i Yaā Dios, te jíin jniñu casáha i te jiní yō jeē tú ndije i. Chi ñayuu ndevāha ñayuu níhni ni cácuu i, te tu cúu sáha i ni ñn jniñu váha.

Jnūhun ya jeē steén ndaā váha

2

¹ Te máá ró chí níní na cáhán rō táca jnúhun jeē quijnáhan jíin jnúhun ya jeē steén ndaā váha. ² Te cahān rō jíin táca téé jéhnū jeē na cóo cájī ni de, te sáha yíñúhún de, te ndito coo xiní de, te candije níhin de jnūhun cundáhú ni yā de, te cundáhú ni de jnáhan de, te cuandeyí ni de. ³ Te suni súcuan táca ñahan jéhnū, na sáha yíñúhún ña, te ma sajnúhún ña, te ma nájini ña. Te na

stéén ña tāca jéē váha. ⁴ Te na stéén ña nuū tācá ñahan súchí jéē coo manī ña jíín yí ña jíín séhe ña. ⁵ Te ndito coo xinī ña, te coo ndoo ánuá ña, te coto váha ña jniñu vehe ña, te coo váha ni ña, te cuatáhú ña nuū yí ña, návāha ma cahán neé ñáyuu siquī jnúhun Yaā Dios.

⁶ Te suni súcuan stíhví ni rō tāca téē suchí jeē ndito na cóo xinī de. ⁷ Te róhó, cuu ró ñin ejemplo nuū de jeē sáha ró táca jniñu váha. Te jeē steén rō nuū de te ndaā steén rō te coo ndije ni rō. ⁸ Te ndaā váha steén rō, návāha ma cúu cahán ñayuu siquī. Te súcuan te cucanu ñayuu cácuu contra, chi ma cúu cahán i ni ñin cuēchi siquī rō.

⁹ Te cahán rō jíín ñáyuu cácuu mozo jeē na cuatáhú i nuū patrón i, te na sáha i tācá jniñu jeē nújnahan ni de, te ma cahán maá i núu ndácu de jniñu nuū i. ¹⁰ Te ma sacuíhná i ndajniñu de, chi na cúu i ñayuu ndaā ndije, návāha jíín táca jniñu jeē sáha i, te cuni tāca ñáyuu jeē yóhyo luu cúu jnúhun jeē steén siquī Yaā Dios, Yaā jnáma yóhó.

¹¹ Chi vijna je ni steén Yaā Dios ndese sáha ya jeē váha ñayuu, chi cúní yā jnama ya ndíhi ñayuu ñayíví. ¹² Te jnúhun jeē váha ni yā jíín yó, suu steén nuū yō jeē na siáá yō jniñu neé jíín táca jéē ndíyo neé ni yō. Te ndito na cóo xinī yō ini ñayíví yáha, te caca ndaā yō, te chiñúhún váha yó Yaā Dios. ¹³ Te suni steén nuū yō jeē cocuhun ni yō jeē quéndōo ndetū yō jeē quíji maá quíví jénu jeē quénda ndijín Yaā Dios, Yaā cujénu ndasí, suu Jesucristo, Yaā jnáma yóhó. ¹⁴ Chi ni socō yā maá yá jehē yō, návāha jnama ya yohó núu táca jniñu neé, te sándoo ndíhi ya anuá yō jeē cuu yó ñáyuu maá yá, te condíhví ni yō sáha yó jniñu váha.

¹⁵ Tāca jnúhun yáha cánuú steén rō, te stíhví ni rō i, te cahán rō nuū i, chi súcuan ndíso jniñu ró. Te ma cuáha ro jnúhun jeē sajeē ni ni ñin i nuū rō.

Ndese cánuú sáha ñayuu cácandíje

3

¹ Te na nástíhví ni rō i jeē cuatáhú váha i nuū téē cácujeñnu jíín téē cándiso jniñu ñuu. Te na squícu i jniñu cándacu de, te coo ñamā ni i sáha i tācá jniñu váha. ² Te ma cahán neé i siquī ni ñin ñayuu, te coyūcu mání i jíín ñáyuu, te coo váha ni i, te coo víta ni i jíín ndíhi ñayuu.

³ Chi maá yó suni ni cuu yó ñáyuu canéé jeē tu jécúhun ni nde saá, te ni cacuníhni ni yō nuū Yaā Dios. Te ni cacandíje yó táca jnúhun tú ndaā, te ni cajejniñu sáa-ni yó núu tāca jéē ní ndiyo neé ni yō jíín na-ni jniñu ni cusí ni yō. Te ni cajica yó jíín jniñu neé jíín jnúhun cuésún ni. Chi ni cajito uhū ñayuu yohó, te ni cajito uhū yō i. ⁴ Yūcuán na te Yaā Dios, Yaā jnáma yóhó, ní steén yā jeē váha ni yā te cúndáhú ni yā ndíhi ñayuu ñayíví. ⁵ Te ni jnama ya yohó, te tú na jniñu váha ní cásáha yó jéē jnáma ya yohó, chi sa siquī jeē ní cundáhú ni yā yohó. Chi ni nacate ya anuá yō, te súcuan ni nacacu jeé yó, te ni ndujeé yó ni sáha ya jíín maá Espíritu Santo. ⁶ Te yóhyo ni cunuú Espíritu Santo ini anuá yō, jeē ni sáha Yaā Dios jeē jíín Jesucristo, Yaā jnáma yóhó. ⁷ Te súcuan te ni ndahva yā cuēchi yó síquī jeē váha ni yā, te nihín tahu yō cotecu yō ní cáni, nájnúhun ñúhun ni yō.

⁸ Ndaā cúu jnúhun yáha, te cúní rí jeē niní cáhán ñin ro táca jnúhun yáha, návāha ñayuu cácandíje Yaā Dios, na cóndíhví ni i cocuu i jíín jniñu váha. Chi íyó váha tāca jéē yáha, te níhín jniñu jeē quéndōo vāha ánuá ndíhi ñayuu. ⁹ Te ma quíví nduu rō jíín táca jnúhun cánéé íí, jíín jnúhun siquī ndese véji táca jíí yō, jíín táca jnúhun sáha jeē cátejñahan i cácahán i jeē cánuú squícu yó ley Moisés. Chi máni jnúhun cáhá-ni jeē tu níhín jniñu cúu.

¹⁰ Te núu íyó ñáyuu jeē sáha jeē ndusín ini ñayuu cácandíje, te cahán rō nuū i ñin uū jínu, te núu ma chúhun ni i, te quenehen ró i. ¹¹ Chi jíín rō jeē ñin ñayuu sáha súcuan, stíví ndasí i chi

jíni i jeē tú vāha sáha i, te jeē yúcuan jécondee cuēchi siquī i.

Jeē cána Pablo quiji Tito nuū de

¹² Te jeē tají rí Artemas chí Tíquico cuajeē de, yūcuán na te nducú ndéyí ró quiji ró núū rī ñuu Nicópolis, chí je ni cundaā ni rī jeē yúcuan condee rī tiempo mījin. ¹³ Te condihvī ni rō chindéé ñáhán ró Zenas, tēe cúu abogado, te suni súcuan Apolos. Chí cuāha ró jéé jíni ñúhún de jeē quíngoo ga de ichi nuū quihín de. Te coto ró jéé ma cúmanī ni ñn nuū de. ¹⁴ Te ñayuu cáhīn jíin yó, cánuú cutūhva i sáha i tācá jniñu váha, te chindéé ñáhán i ñayuu cúmanī nuū, návāha ma cótecu saá-ni i.

Saludo jíin bendición jeē sándihí

¹⁵ Tāca ñayuu cáyūcu jíin rí yáha, cácahān i jeē sándeyí ni rō. Te cahān rō jeē achí rí jeē sándeyí ni ñayuu jíñā jeē maní yō jíin síquī jeē cácandíje yó. Te ñúhun ni rī jeē na sáha ga Yaā Díos jeē váha róhó jíjnáhan ró. Súcuan na cóo. Amén.

CARTA JEE NI TEE SAN PABLO APOSTOL NUU FILEMON

¹ Máá rí cúu Pablo, te íne ri vecāa jeē siquí jnúhun Cristo Jesús. Te jíin hermano yō Timoteo cátee ri carta yáha cuájeē nuū rō Filemón. Chi cúu ró téee jeē cáhīyo manī rī jíin, chi chéndéé ñájnaahan ró jíin rí siquí jníñu Yaā Dios. ² Te suni cátee ri carta yáha nuū ñáyuu cáandíje cándutútú ini vehe ró, te suni nuū hermana yō Apia, jíin núu Arquipo, tēe chéndéé ñájnaahan jíin yó siquí jníñu cánducú ndeyí yó jíin. ³ Te cáñuhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó jíinaahan ró, te sáha ya jeē coo ndeyí coo sī ni rō.

Tēe cundáhú ni te cándíje vāha cúu Filemón

⁴ Te jeē jíicán tahu rī nuū Yaā Dios te tu náa ni rī cacān tahu rī jehē rō, te níni nácuatáhú rí nuū yā jeē siquí rō. ⁵ Chi níhín rī jnúhun jeē váha cándíje ró jnúhun cundáhú ni Jítóho yō Jesús rohó, te cundáhú ni rō tāca ñáyuu yíhi ndaha Yaā Dios. ⁶ Te jíicán tahu rī jeē ñáyuu ni cacandíje siquí jeē candíje máá ró, na jécūhun vāha ga ni i siquí tāca jéē váha jeē sáha ya yohó jeē jíin Cristo Jesús. ⁷ Chi cúsiñ ndasí ni rī te íyó ndeyí ni rī, hermano, siquí jeē cundáhú ni rō ñáyuu cáandíje. Chi máá ró ni sáha jeē ní ndusiñ ni i.

Jeē jíicán Pablo ñin favor jehē Onésimo

⁸ Núu súcuan te cáhán ndahú rí jíin ró, vésú cuu ndacu rí nuū rō ndese cánuú sáha ró, chi cúu ri apóstol Cristo. ⁹ Te tuú chi sa cáhán ndahú rí jíin ró siquí jeē cáhīyo manī yō. Te cundáhú ni rō ruhū sáha ró jéē cuní ruhū Pablo, chi je jéhu ri, te íne ri vecāa jeē siquí jnúhun Cristo Jesús. ¹⁰ Te cáhán ndahú rí jíin ró jehē mozo rō Onésimo jeē ní jeen ró te ni jinu. Te vijna te cúu i nájnūhun sēhe ri, chi ni scándíje ri i ini vecāa yāhá.

¹¹ Te nde saá chi tu ní cúu i mozo squícu nuū rō, chi ni jinu i. Te nde vijna chi vāha cuajníñu i nuū rō jíin núu rī. ¹² Te nátají rí i najeē i nuū rō. Núu súcuan te cáhán vāha ró jíin i, te sáha ró cuenta jeē nájnūhun máá rí ni najinū, chi yōhyo manī rī jíin i. ¹³ Te cusí ni rī núu jeē na cúu quendōo i jíin rí yāhá, návāha cuajníñu i nuū rī lugar maá ró níni jéē íne ri vecāa jeē siquí jnúhun vāha ya. ¹⁴ Te tu ní cuní rí sáha ri súcuan, chi nde cuāha máá ró jnúhun. Chi nasūu jéē safuerza rī rohó, chi jeē váha ni rō te sáha ró favor jíin rí, nájnūhun cúsiñ ni máá ró. ¹⁵ Chi sanaa te jeē siquí yáha cúu jeē ní jinu i ni cujiyo i nuū rō jecu-ni tiempo, suu návāha ví quendōo i jíin ró sáha Yaā Dios. ¹⁶ Te vijna tuá cúu i ñin mozo jeē ní jeen ró, chi ni nduu i ñin jeē váha ga, suu ñin hermano jeē maní rō jíin. Te ruhū chi yōhyo manī rī jíin i, te nagā ni cuu máá ró jeē ma cóo manī rō jíin i. Te nasūu jéē maní rō jíin ñin tēe súcuan-ni, chi siquí jeē cúu i ñin hermano jeē candíje nuū Jítóho yō.

¹⁷ Te núu sáha ró cuenta jeē ruhū cúu jnáhan ró cándíje, núu súcuan te cáhán vāha ró jíin i jeē jinú i nuū rō, nájnūhun jeē ruhū cáhán rō jíin. ¹⁸ Núu na-ni falta ni sáha i nuū rō, chí núu táu i nuū rō, te cacān rō chunaa máá rí. ¹⁹ Ruhū Pablo, jíin ndaha máá rí téee ri yāha jéē máá rí nachunaa. Súcuan cáhán rī vésú cuu cáhán rī jeē sa máá ró taú nuū rī sáha ró jéē cúsiñ ni rī siquí jeē ni scándíje ri rohó te ni cācu ánuá rō. ²⁰ Núu súcuan, hermano, sáha ró favor yáha jíin rí siquí jeē candíje ró Jítóho yō. Sáha ró jéē ndusiñ ni rī, siquí jeē cúu ró hermano candíje Cristo.

²¹ Te téee ri yáha núu rō, chi cúcáhnū vāha ni rī jeē cuatáhú ró, te nde vihyá gā sáha ró vésú jeē ni jíicán rī. ²² Te suni jíicán rī jeē sátūhva ró núu cóndee rī, chi ñúhun ni rī jeē quénda ri yāhá te jeē rī nuū rō sáha Yaā Dios siquí jeē cájicān tahu rō jehē rī.

Saludo jíin bendición jeē sándíhí

²³ Epafra, tēe íne jíin rí vecāa jeē síquí jnúhun Cristo Jesús, cáhán de jeē sándeyí ni rō. ²⁴ Te suni súcuan cácahān Marcos, jíin Aristarco, jíin Demas, jíin Lucas, tēe cáchindéé ñájnáhan jíin rí síquí jníñu ya.

²⁵ Te ñúhun ni rí jeē Jítóho yō Jesucristo na sáha ga yā jeē váha róhó jíjnáhan ró. Súcuan na cóo. Amén.

CARTA JEE CUAHAN NUU ÑAYUU HEBREO

Jeē ní tají Yaā Dios Sēhe ya ni nacani ya jnūhun

¹ Tijni jínu te tijni modo ni cahān Yaā Dios jíin táca jíi yō nde jenahán, chi ni tají yá tēe ni canacani jnūhun ya. ² Te vijna te tiempo cuándihi yāha ní tají yá maá Sēhe ya ni nacani ya jnūhun nuū yō. Te jíin Sēhe ya ni sáha ya ñayīvi jíin táca gá, te ndīvii jeē iyó ní chihi ya ndaha Sēhe ya. ³ Te Sēhe ya yōhyo luu cújéhnu ya, nájnūhun luu cújéhnu maá yá. Te ndihi ndese cúu maá yá, suni súcuan cúu Sēhe ya. Te jíin poder jnūhun ni cahān Sēhe ya te iyó cutú ndihi-ni. Te ni sándoo ya yohó táca cuéchi yó, te sáa te ni cucōo ya lado váha mesa maá Yaā cujéhnu nde andiví.

Jeē cujéhnu ga Sēhe Yaā Dios vēsú táca ndajéhé yā

⁴ Te ni ndujéhnu ndasí gá Sēhe ya vēsú táca ndajéhé andiví, chi ni nihīn yā tahū jeē ndiso ya jniñu jéhnu ndasí gá vēsú jniñu cándiso ndajéhé. ⁵ Chi súcuan ni cahān Yaā Dios jíin Sēhe ya, te nasūu jíin ndajéhé yā:

Maá ró cúu Sēhe ri,
te vijna te ni sajuhnu ri rohó jéē cúu ri
Tatá rō.

Te suni ni cahān yā jnūhun Sēhe ya, te nasūu jnūhun ndajéhé yā:

Maá rí cúu Tatá nuū Sēhe ri,
te maá i cúu Sēhe nuū rī.

⁶ Te suni ná ni tají yá Sēhe ya cujéhnu, ni quiji ini ñayīvi yáha, te ni cahān yā: Ndihi ndajéhé rī na chíñuhún i Sēhe ri.

⁷ Te ni cahān tucu ya jnūhun ndajéhé yā:

Nájnūhun quée tachī, súcuan cájica
ndajéhé rī sáha ri,

te táca un jéē cájejniñu nuū rī,
nájnūhun yáñuhún cácuu.

⁸ Te jnūhun Sēhe ya chi sa suhva cáhán yā:

Maá ró cúu Yaā Dios, te ndacu ró jniñu
nñí cáni,

te jniñu ndácu ró, máni jniñu ndaā
cúu.

⁹ Cúsiñ ni rō jíin jniñu váha, te jíto uhū
rō jniñu néé.

Jeē yúcuan ruhū, Yaā Dios maá ró, ni
sáha ri

jeē yóhyo ga cúsiñ ni rō vēsú táca gá jeē
iyó andiví.

¹⁰ Te suni cáhán yā:

Maá ró cúu Jítoho, te nde xīhna ñúhún
ni sáha ró jéē ni jécōo ñayīvi.

Te andiví chi suni jeē ni sáha ró cúu.

¹¹ Te táca un chi naa, te maá ró chi nñí
cáni iyó ró.

Te táca un chi cutúhú nájnūhun
cútúhú ñn sahna,

¹² te nacaquin jnahnū rō te nasama
ró jíjnáhan.

Te maá ró chi ma sáma cuiti rō,
te quiví cótecu rō ma ndíhi cuiti.

¹³ Te súcuan ni cahān tucu yā jíin Sēhe
ya, te nasūu jíin ndajéhé yā:

Cucōo ró lado váha ri nuū cujéhnu ró,
te na sáha ri jeē quende rō poder táca
jéē cájito uhū rohó.

Achí yá. ¹⁴ Te táca ndajéhé yā chi
mozo-ni cácuu, te tájí yá cuango jeē
chindéé ñáhán ñayuu jeē nihín tahū
jeē jnama ya.

*Jeē ma cúhuun ni yō jíin jnūhun
jnáma ya yohó*

2

¹ Núu súcuan te cánuú jéē váha ga
chuhun ni yō táca jnūhun ya jeē ní
cajini yó, chi núu tuú te sanaa te
scuíta yó. ² Chi nde jenahán ní je-
jniñu ya ndajéhé yā ni cacastūhun
jnūhun ya, te ni cajini ñayuu jeē iyó
ndaā. Te ñayuu nihni ni jíin ñayuu
tu ní cájendetū jnūhun ún, vetū-ni ni
canihīn i castigo. ³ Te núu súcuan
ni cuu, te yohó, ¿ndese cácu yó núu
ma chúhun ni yō jnūhun cánuú gá jeē
jnáma ya yohó? Chi xīhna gá maá
Jítoho yō ni nacani ya jnūhun yáha,
te sáa te tēe jeē ní cajini nahín ni
canacani ndaā tucu maá de nuū yō.

⁴ Te Yaā Dios suni ni chindéé ñáhán
yá de jeē ní canacani de jnūhun ya.
Chi ni sáha ya jíin de jeē ní casáha de
sín sín jniñu jéhnu jeē nahán náa ni

yō jító yó poder yā. Te suni ni jēhe ya Espíritu Santo yā nuū ññ yó, ndese ni nujnahan ni maá yá sáha yó.

Jeē ní nduu Jesús jnáhan ñayuu

⁵ Te Yaā Dios nasūu núū ndajéhé yā ni jēhe ya jñūhun jeē condiso jñíñu siquī ñayívi jéē quíji, chi sa suhva nuū Séhe ya Cristo ni jēhe ya. Te siquī ñayívi un cúu jeē cahán rī yāhá.

⁶ Chi suhva yósó núū tútu jeē ni cáhān David jín yá:

¿Na vé cúu ñayuu jeē ñūhun ni ní i?

Te ndíhví ni ni siquī i, te máá ñayuu cúu i.

⁷ Chi jecu-ni tiempo ni sáha ní jeē núu i nuū tācá ndajéhé ni.

Yūcuán na te sajéhnū ní i te squéndōo yíñúhún ní i,

te cani ní i jeē ndacu i jñíñu nuū tāca jéē ni sáha ní.

⁸ Te ndíhi jeē iyó chi sáha ní jéē cujéhnū i siquī.

Achí tutu. Te jeē ni sáha Yaā Dios jeē cujéhnū i siquī ndíhi, núu súcuan te ma quéndōo ni ññ jeē ma cujéhnū i siquī. Te vésú súcuan te vijna te ná tu coto yó jéē cujéhnū i siquī ndíhi jeē iyó. ⁹ Te jeē jíní yó vijna cúu Jesús, Yaā jeē ní nduu núu jecu-ni tiempo nuū tācá ndajéhé yā. Chi ni ndoho ya jeē ni jíhī yā jehē yō, te jeē yúcuán ní ndujéhnū luu tucu ya, te ndíhi cáhīyo yíñúhún núū yā. Chi jeē váha ni Yaā Dios jín yó, jeē yúcuán ní jíhī Jesús jehē yó.

¹⁰ Te ndíhi jeē iyó chi cuenta Yaā Dios cúu, chi máá yá ni sáha. Te suni ndéca ya cuehē ndasí séhe ya jeē quihín i andívi núū luu cujéhnū i jín yá. Te váha níhín jñíñu jeē ni jēhe ya jñūndóho nuū Jesús, chi jeē ní ndoho ya súcuan te cuu condeca váha ya ñayuu ní jnama ya. ¹¹ Chi Jesús jeē ni sándoo ya i te máá i jeē ní candundoo i, chi ññ-ni Tátá i jín yá. Te jeē yúcuán tu cúcanu Jesús jeē cahán yā hermano yā jín i, vésú ndasí núu i.

¹² Chi yósó núū tútu jeē ni cáhān yā jín Tátá yá:

Cachi na jñúhun ní núū tācá hermano na,

te mēhñu núū cándutútú i cata ná ndese cujéhnū ní.

¹³ Te suni cáhān yā nájnūhun cácahān hermano yā:

Ruhū chi cándíje ri yā.

Te cáhān tucu yā:

Yāha íne ri jín táca gá séhe Yaā Dios jeē ni jēhe ya nuū rī.

Achí Jesús.

¹⁴ Te nájnūhun cácacu ñayuu jeē cúu i yiquí cúñu, suni súcuan ni cacu Jesús, návāha cuu yā jehē yō. Te súcuan ni snāā yā poder jexeén jeē squívi ñayuu nuū cuéchi te jíhī i. ¹⁵ Te ni cacu ya súcuan návāha cuu quenehen ya tāca ñayuu chíji jñūhun jeē yuhú i cuu i. Chi ní vida i ndóho i sáha ún. ¹⁶ Te jendaá tu ní quíji ya jeē chindéé ñáhān yá tācá ndajéhé yā, chi sa suhva jeē chindéé ñáhān yá ñayuu cácaandíje jeē ní nduu yucūn Abraham.

¹⁷ Jeē yúcuán ní jini ñúhún nduu inuú yá jín táca hermano yā, návāha cuu ya sutū cujéhnū jeē squícu váha ya tācá jñíñu jehē i nuū Yaā Dios. Chi ni cundáhú ni yā i, te ni ndahva yā cuéchi i jeē ni sócō yā maá yá jehē i. ¹⁸ Chi suni máá yá ni ndoho ya jeē ní jito ndee jñūndóho ya, te jeē yúcuán cuu chindéé ñáhān yá ñayuu jeē jító ndee jñūndóho i.

Cujéhnū ga Jesús vésú Moisés

3

¹ Hermano, ni cana Yaā Dios rohó, te cácuu ró ñayuu ndoo máá yá. Núu súcuan te na nácani váha ni rō siquī Cristo Jesús, Yaā cúu apóstol jeē ní tejníñu Yaā Dios, te suni cúu ya sutū cujéhnū siquī jñúhun cácaandíje yó.

² Chi ni squícu váha ya nuū Yaā Dios, Yaā ní tee jñíñu un siquī yā, nájnūhun ni squícu váha Moisés nuū ñayuu jeē ni cáhān Yaā Dios jeē cácuu i ñayuu vehe ya. ³ Chi cujéhnū ndasí gá Jesús vésú Moisés, nájnūhun cujéhnū ndasí gá tēe sáha vehe nasūu máá vehe.

⁴ Chi tācá vehe iyó tēe ni sáha. Te máá Yaā Dios cúu jeē ni sáha tāca jéē iyó. ⁵ Te Moisés ni squícu váha de

jín jniñu jeē ní cuu de mozo ni condito de ñayuu vehe Yaā Dios. Te ni castūhún de siquī tāca jnúhun jeē steén yā tiempo quiji. ⁶ Te Cristo chi sa cúu ya maá Séhe jeē ndácu jniñu nuū ñáyuu vehe Tátá yā, te vāha squícu ya jeē ni jéjnūhun ya nuū i. Te suni máá yó cácuu ñayuu vehe ya, te núu na cuíñi nīhin yó jín jnúhun cándíje yó ndé quiṽi sándīhí, te núu cúsiñi ni yō jeē ñúhun ni yō tāca jéē váha jeē coo.

Jnúhun jeē ndetātu ñáyuu Yaā Dios

⁷ Núu súcuan te na chúhun ni yō jeē cahán Espíritu Santo nuū tútu i:

Vijna te núu cuni sōho ró jéē cahán Yaā Dios,

⁸ te ma cúnihni ni rō nájnūhun ni cacunihni ni ñayuu jenahán.

Chi tu ní cájendetū i nuū yā ná ni cajica i nuū ñúhun téhé.

⁹ Chi yūcuan ní casáha jíi rō jniñu jeē ni quiṽi ni rī, achí yá,

vēsú ni cajito i tācá jniñu ni sáha ri uū xico cuiyā.

¹⁰ Jeē yúcuu ní quiṽi ni rī jín ñáyuu tiempo un.

Te ni cahán rī jeē máni jeē castóo i ichi ndaā,

chi tu cácuu i condiquín i jnúhun ri.

¹¹ Te jeē yúcuu ní quiṽi ni rī, te ni cahán teyí rí

jeē ma quiṽicoo cuiṽi i nuū ndetātu i sáha ri.

Achí yá.

¹² Núu súcuan hermano, coto má conéé ánuá ni ñn ró jéē cáca yátá ró jeē tuá candíje ró Yaā Dios, Yaā técu. ¹³ Chi sa suhva tāca quiṽi na stíhví jnáhan ni rō, níni gá iyó tiempo, návāha ma cúnihni ni ñn ró te stáhú róhó sáha ró cuéchi. ¹⁴ Te núu na cuíñi nīhin yó ndé quiṽi sándīhi jín jnúhun jeē ní quejéé yó jín, yūcuán na te cuu yó jnáhan Cristo.

¹⁵ Chi cáhán tutu:

Vijna te núu cuni sōhó ró jéē cahán Yaā Dios,

te ma cúnihni ni rō nájnūhun ni cacunihni ni ñayuu jenahán.

Achí. ¹⁶ ¿Te ndé-ni cúu ñayuu jeē ní jini jnúhun ya te ni cunihni ni? Suu ndíhi ñayuu jeē ni scácu Moisés jeē ní

quendacoo Egipto. ¹⁷ ¿Te ndé-ni cúu ñayuu jeē ni quiṽi ni yā nuū uū xico cuiyā? Suu ñayuu jeē ní casáha cuéchi, te ni cajihí i nuū ñúhun téhé. ¹⁸ ¿Te ndé-ni i cúu jeē ni cáhán teyí yá jeē ma quiṽicoo cuiṽi i nuū ndetātu i sáha ya? Suu máá ñáyuu jeē tu ní cájendetū nuū yā. ¹⁹ Núu súcuan te jín yō jeē tu ní cúu quiṽicoo i nuū ndetātu i, siquī jeē tu ní cácuandíje i ya.

4

¹ Te níni iyó gá jnúhun jeē ni jéjnūhun ya jeē quiṽicoo ñayuu nuū ndetātu i sáha ya, te na cónso ñyo yó jéē ma stívi yó, návāha tú coo jín sava ró jéē ma nihín rō quiṽi ró. ² Chi suni máá yó ni cajini sōho yó jnúhun jeē jnáma ya yohó, nájnūhun ñayuu jenahán un. Te nuū maá i tu ní jéjníñu jnúhun ni cajini i ún, siquī jeē tu ní cácuandíje i. ³ Te yóhó jéē cácuandíje, máá yó cúu jeē quiṽicoo yó núu ndetātu yó. Te siquī ñáyuu tu cácuandíje ni cahán yā suhva:

Jeē yúcuu ní quiṽi ni rī, te ni cahán teyí rí

jeē ma quiṽicoo cuiṽi i nuū ndetātu i sáha ri.

Te súcuan ni cahán yā vēsú je iyó túhva nuū ndetātu i nde ná ni jecōo ñayívi.

⁴ Chi súcuan yósó jnúhun nuū tútu ñ siquī quiṽi uxá:

Ni sínu Yaā Dios tāca jéē ni sáha ya, te ni ndetātu yá quiṽi uxá.

⁵ Te suni nuū tútu un yósó tucu: Ma quiṽicoo cuiṽi i nuū ndetātu i sáha ri.

Achí yá. ⁶ Núu súcuan te sava ñayuu chi quiṽicoo nahín i nuū ndetātu i. Te ñayuu jenahán jéē ní cajini jnúhun jeē jnáma ya i, tu ní quiṽicoo i siquī jeē tu ní cájendetū i nuū yā. ⁷ Jeē yúcuu ní jeni tucu ya inga quiṽi jeē quiṽicoo ñayuu, te quiṽi un cúu vijna. Chi ná ni yāha cuehē tiempo jeē ní cahán yā jín ñáyuu jenahán, te yósó núu tútu jeē ní sáha ya jeē suni ni cahán David suhva: Vijna te núu cuni sōho ró jéē cahán yā, te ma cúnihni ni rō núu súcuan. Achí tutu. ⁸ Te nde jenahán ní squívi Josué ñayuu Israel un ñuu nuū

ndetātú i. Te tu ní cúu squívi de i nuū ndetātu ánuá i sáha ya. Chi núu súcuan te ma cahán gā Yaā Dios jíin táca ñáyuu jeē vijna cúu quívi jeē quívicoo i nuū ndetātú i. ⁹ Núu súcuan te íyó túhva nahín ñn nuū ndetātu ñáyuu Yaā Dios, nájnūhun ni ndetātu máá yá. ¹⁰ Chi ñáyuu jeē quívicoo nuū ndetātú i jíin yá, chí ndetātú i jeē ní casájniñu i, nájnūhun ni ndetātú Yaā Dios nuū jniñu ni sáha máá yá. ¹¹ Núu súcuan te na ndúcú ndéyí yó quívi yó núu ndetātu yó un, te ma sáha ni ñn yó cuéchi jeē ma cándíje yó, nájnūhun ni casáha i nde saá.

¹² Chi jnūhun Yaā Dios ndíto técu te íyó poder. Chi cúu nájnūhun ñn espada jeē xeén ndindúú lado, chí nástúu cájí ndese íyó jéē níjnūní yō jíin ánuá yō, nájnūhun sáha espada jeē jénde te nástúu nuū ñujnáhan yíqui jíin meque. Te jnūhun ya nástúu ndíhi ndese jéni ni yō jíin ndese cúni yō sáha yó. ¹³ Te tu íyó ni ñn jeē yísáhi jeē tu jíni máá Yaā jeē náquihin cuenta, chí ndíhi-ni jíni vāha ya, te ndíhi-ni túu ndijin nuū yā.

Jesús cúu sutū cujéhnú ga

¹⁴ Te cánevāha yó ñn sutū cujéhnú ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuíñi níhin yó jíin jnúhun jeē ní candíje yó. ¹⁵ Chi névāha yó ñn sutū cujéhnú jeē jíto ndáhú yóhó jeē tu fuerza yō squícu vāha yó. Chi nájnūhun ndóho yó jéē jíto ndee jexeén yohó, suni súcuan ni ndoho ya jeē ní jíto ndee un yá, vésú tú cuíti cuéchi ya. ¹⁶ Núu súcuan te ma yūhu yó, chí na quívi yó yuhu mesa yā, cúu jeē cacān tahu yō. Chi maní yā jíin yó, te cúndáhú ni yā yohó, te siquí jeē vāha ni yā te chindéé ñáhán yá yohó táca jínu jeē jíni ñúhún yó.

5

¹ Chi táca sūtú jeē ní cujéhnú jenahán, ni nacāji Yaā Dios de mēhñu ñáyuu, te ni jeni ya de jeē cuíñi de nuū yā jehē ñáyuu, te socō de ndajniñu jíin quíti nuū yā jeē siquí cuéchi i. ² Te cuu

cahán víta de jíin ñáyuu tu jécūhun ni jíin ñáyuu castívi, chí máá de suni tú na fuerza ini de squícu vāha de. ³ Jeē yúcuan cúu jeē suni cánuú sócō de quíti nuū yā jeē siquí cuéchi máá de, nasūu máá-ni jeē siquí cuéchi ñáyuu.

⁴ Te ni ñn tēe tu cúu sájéhnú de máá de jeē cuu de sutū cujéhnú, chí sa máá Yaā Dios cúu jeē nacāji ya de, nájnūhun ni nacāji ya Aarón nde jenahán. ⁵ Te suni súcuan Cristo, tu ní sájéhnú ya máá yá jeē cuu ya sutū cujéhnú, chí sa Yaā Dios ni sáha, chí ni cahán yā jnūhun yáha:

Máá ró cúu Sēhe ri,

te vijna te ni sájéhnú ri rohó jéē cúu ri
Tatá rō.

⁶ Te suni cáhán tucu ya nuū tútu ñ:

Ní cáni cúu ró sūtú,

nájnūhun sutū Melquisedec jenahán.

⁷ Te Cristo, ná ni condee ya ñayívi, te ni jicān tahu yā, te nde ni ndahyū yā te ni ndahyū cohó yá. Te ni cahán ndahú yá jíin Yaā Dios, Yaā jeē cúu jnama ya jeē ma cúu yā nuú. Te siquí jeē yíñúhún ní chíñúhún yá Yaā Dios, te ni chindéé ñájnañan Yaā Dios jíin yá nuū jnūndóho ún. ⁸ Chi vésú Sēhe Yaā Dios cúu ya, te ni jendetū yā ni ndoho ya ini ñayívi, te súcuan ni jíni yā ndese cúu jnūhun jendetū. ⁹ Te ná ni cuu ni squícu ndíhi ya jeē ní jendetū yā, te ni cucutú jnúhun jeē jnáma ya táca ñáyuu jendetū nuū yā, te cotecu i ní cáni. ¹⁰ Chi ni jeni Yaā Dios yā jeē cúu ya sutū cujéhnú nájnūhun sutū Melquisedec.

Siquí jeē ma cáca yátá i

¹¹ Te íyó cuéhē jnūhun jeē castūhun rí siquí táca jéē yáha. Te yí cúu jeē jécūhun ni rō sáha ri, siquí jeē tu cáconi rō chuhun ni rō. ¹² Te je ni cunahán cácandíje ró, te jíni ñúhún jéē cúu ró tēe stéén nuú. Te tuú chí sa cájini ñúhún tucu máá ró tēe stéén nuū rō táca jnúhun Yaā Dios jeē tú yí cuíti. Chí sa ni canduu ró nájnūhun sūchi yíquin jéē jíni ñúhún caxin i, chí ná tu ije i caji i jeē ndáva. Súcuan cácuu ró chí ná tu ije ró jíin jnúhun yí gá. ¹³ Chi núu máni máá nájnūhun sūchi

yíquin jéxin cácuu ró, núu súcuan te tu cúu jecūhun vāha ni rō jnūhun ndaā. ¹⁴ Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nácāji i jeē vāha jíin jéē neé.

6

¹ Núu súcuan te na yáha yó núu tāca jnúhun Cristo jeē tú-ni yí, te na quíhín yō nuū jnúhun yí gá, návāha na íje vāha ni yō jíin jnúhun ya. Te ma nde-jéé tucu yó jíin jnúhun jeē ni scuáha yó xíhna gā, suu jnūhun jeē nácani ni yō stóo yo cuéchi yó jéē cúu yō sáha, jíin jéē candíje yó Yaā Dios, ² jíin síquī jeē jéndute, jíin síquī jeē soó ndaha xinī ñáyuu, jíin síquī jeē nátecu ndíyí, jíin síquī jeē jnahnú ndetū ñayuu ní cáni. ³ Núu súcuan te na yáha yó núu tāca jéē yáha te quívi yó núu jnúhun yí gá, te núu cuāha Yaā Dios jnūhun.

⁴ Chi íyó ñáyuu jeē jé ni jecūhun ni i, te je ni jini i tāca jéē jéhe Yaā Dios, te je ni quívi i nuū jnúhun stéen Espiritu Santo, ⁵ te suni je ni jini i jnūhun vāha Yaā Dios jíin ndese coo poder yā tiempo quiiji. ⁶ Te ñayuu un núu caca yátá i, te ma cúu ga ndejéé jeé i jeē nácani ni i. Chi jeē cáca yátá i cúu nájñūhun jeē nácanni tucu i Sēhe Yaā Dios jicā cruz, te cájēhe i jnūhun canu yā cájito ñayuu. ⁷ Te ñayuu chi cácuu i nájñūhun ñūhun jeē cúun vāha saū nuū te ndóyo vāha. Te núu cánecoo jeē vāha caji tēe cásajniñu, yūcuán na te cúsiñi ni Yaā Dios jíin. ⁸ Te núu máni iñu yóquin jíin yucū sajnéñu cánecoo nuū, núu súcuan te tu jéjñiñu cuiñi, te squéndōo íi yā, te ñn quívi te cayū. Súcuan jnahnú ndetū ñayuu cájica yátá.

Jeē ñúhun ni yō tāca jéē vāha jeē coo

⁹ Te máá ró jijnáhan ró hermano, vēsú cácahān rī súcuan jíin ró, te cácuahnu ni rī jeē cácuu ró ñayuu cuiñi ñihin, chi ñayuu ni jnama ya cácuu ró. ¹⁰ Te Yaā ndaā cúu Yaā Dios, te tu náā ni yā jniñu cásáha ró. Chi síquī jeē cáhīyo manī rō jíin yá te ni cacadáhú ni rō hermano rō cácaandíje, te ni cachindéé ñáhán ró i, te súcuan cásáha ró ndé vijna. ¹¹ Te cáconi rī

jeē niní súcuan sáha ga ná ñn ná ñn ró ndé quívi sándihí, chi jeē sáha ró súcuan te ñihin rō ndihi jeē cáñuhun ni rō. ¹² Te cáconi rī jeē ma cúhuun ni rō, chi sa ndacu ró ñáyuu cácaandíje jeē jíin paciencia cándetu i, te jeē yúcuan níhin tahu i tāca jéē ni jéjñūhun ya.

¹³ Chi quívi jeē ni jéjñūhun Yaā Dios nuū Abraham, te ni ndacunehen ya maá yá jeē ni jéjñūhun téyí yá, chi tuá na inga ndacunehen ya jeē cujéhnu ga vēsú maá yá jeē cuu testigo yā. ¹⁴ Te ni cahān yā: Jendaá ndije jeē vāha ndasí sáha ri jíin ró, te sáha ri jeē nducuehē ndasí yúcūn rō, achí yá jíin Abraham. ¹⁵ Te jíin paciencia ni condetu de, te súcuan te ni ñihin de jeē ní jejnūhun ya. ¹⁶ Te núu cáhán teyí ñáyuu, te ndacunehen i síhví ñn jeē cujéhnu ga vēsú maá i. Te núu íyó ñn jnūhun jeē tu cácaandíje jnáhan, te núu ñn tēe cáhán teyí de jíin síhví Yaā Dios, yūcuán na te jécuiñi jeē cátejñáhan. ¹⁷ Te suni súcuan Yaā Dios, chi ni jejnūhun téyí yá nuū ñáyuu jeē cuāha ya tahu i. Chi ni cuni yá jeē cucáhnu vāha ni i jeē ma nácani yátá ni yā síquī jeē ni jéjñūhun ya nuū i. ¹⁸ Chi ma nácani yátá cuiñi ni yā síquī jnúhun jeē ni cáhān yā uū jínu, ñn jeē ni jéjñūhun ya, te inga jeē ni cáhān teyí tucu ya síquī suni jnūhun ún. Chi tu stáhú cuiñi yā. Te jeē yúcuan máá yó jeē ní tūhva yó yá, chi yōhyo íyó ndeyí ni yō, te cáñuhun teyí ni yō jeē squícu ya jeē ni cáhān yā. ¹⁹ Te síquī jeē súcuan ñūhun ni yō, te suu sáha jeē quéndōo ñihin ánuá yō jíin jnúhun ya, te quéndōo ndaā ni yō, nájñūhun quéndōo ñihin barco jeē jñí gancho yuū. Te sáha jeē cúu quívi yó andiví núu íi gā, nájñūhun cuarto íi gā jeē ni íyo ichi yátá sahma ni ndita caa ini vehe íi jenahán. ²⁰ Te ini yūcuán chi xíhna gā Jesús ni quívi, návāha nune ya ichi quívi coo yó. Te jeē yúcuan ní cáni cúu ya sutū cujéhnu nájñūhun sutū Melquisedec.

Jeē cúu Jesús sutū nájñūhun Melquisedec

7

¹ Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéhnū téyí. Te ni jejnahan de Abraham ná ni nandicó Abraham jeē ní cundeyí de ni cajejnahan de jíin táca rey. Te ni jicān tahu de jehē Abraham. ² Te tāca úxī ndajniñū jeē ní quende Abraham nuū tāca rey un, ni jēhe de ñn ñn siquī un núū Melquisedec. Te sñhví Melquisedec cuní cahān: rey jeē sāha jniñū ndaā. Te suni nání de rey Salem, te jñūhun Salem cuní cahān: jeē iyó ndeyí sñ ni. Te jeē yúcuan suni nání de: rey jeē sāha jeē iyó ndeyí sñ ni ñayuu. ³ Te tu cáhán tutu jñūhun tátá de ni náná de ni tāca jíí de. Ni tu cáhán núu ni cacu de, ni núu ni jihí de. Chi cúu de nájnūhun Jesús, Sēhe Yaā Dios, chi nñ cáni cúu de sutū.

⁴ Te condēhe jíjnahan ró náa jéhnū ni cuu Melquisedec, chi jíí jéhnū yó Abraham ni jēhe de ñn ñn siquī tāca jéē uxí nuū de siquī tāca jéē ní quende de nuū rey un. ⁵ Te jíí yō jeē tāca úxī ndajniñū ni canihín ñayuu, ni cajēhe i ñn ñn siquī un ní caquihin tēe cácuu sutū yucūn Leví, nájnūhun cáhán ley Moisés. Te ni caquihin de nuū ñayuu cácuu jnahan de, chi ñn-ni yucūn Abraham cácuu de jíin i. ⁶ Te Melquisedec nasūu yúcūn Leví cúu de, te vēsú súcuan te ni quihin de ñn ñn siquī tāca jéē uxí nuū Abraham. Te suni ni jicān tahu de jehē Abraham, vēsú cúu Abraham tēe jeē ni jéjnūhun ya nuū. ⁷ Te jíí vāha yó jéē tēe cújéhnū ga cúu jeē jicān tahu jehē tēe núu ga. ⁸ Te ñayívi yáha chi tāca sūtū cáquihin de ñn ñn siquī tāca jéē uxí nuū ñayuu, vēsú cácuu te tēe cájihí. Te Melquisedec suni ni quihin de, te máá de chi cáhán tutu íí jeē técu de. ⁹ Te suni cuu cahān yō jeē Leví, tēe jeē ní quihin ñn ñn siquī tāca jéē uxí nuū ñayuu, suni nájnūhun nuū maá de ni quihin Melquisedec ñn ñn siquī tāca jéē uxí. Chi jeē ni jēhe Abraham nuū Melquisedec, suu cúu nájnūhun jeē suni ni jēhe de jeē siquí Leví jíin ndihí ga yucūn de jeē quií. ¹⁰ Chi yucūn

Abraham cúu Leví, te vēsú ná tu cacu de quií jeē ní jéjnahan Melquisedec Abraham, te nájnūhun jeē ni jēhe máá de cúu jeē ni jēhe Abraham.

¹¹ Te yucūn Leví ni cane sutū Aarón jíin táca gá sutū ní quiícoo. Te ni castéén de ley yā nuū ñayuu Israel jenahán. Te núu ní cúu sāha de jeē quendōo ndaā ñayuu jíin ley un núú, te tuá cánuú jeē núcuíñí inga clase sutū lugar Aarón jíin yúcūn de. Te inga clase sutū cúu Cristo jeē cúu ya nájnūhun sutū Melquisedec. ¹² Te núu núcuíñí inga clase sutū, te suni cánuú sáma ley siquí yucūn de. ¹³ Núu súcuan te ni sáma ley un, chi cáhán tutu íí jeē Jítoho yō Jesús cúu inga clase sutū ún, te ni cacu ya chíji inga yucūn. Te yucūn ní quií ya ún, tú ni ñn ní cúu sutū. ¹⁴ Chi jíí vāha yó jéē chíji yucūn Judá ni cacu Jítoho yō. Te yucūn ún chi tu ní cáhán cuítí Moisés jeē cánecoo sutū.

¹⁵ Te cájí cúu jeē ní núcuíñí Cristo jeē cúu ya inga clase sutū nájnūhun sutū Melquisedec. ¹⁶ Te tu cúu ya sutū jeē ní cacu chíji yucūn Leví nájnūhun cáhán ley jenahán. Chi cúu ya sutū siquí jeē ndíso ya poder cotecu yā ní cáni te ma cúu cuítí yā. ¹⁷ Chi súcuan ni cahān Yaā Dios jñūhun ya:

Nñ cáni cúu ró sūtū,
nájnūhun sutū Melquisedec.

¹⁸ Núu súcuan te jniñū jeē ní ndacu ley jenahán siquí sutū, chi ni naa víjna, chi tu ní níhín jniñū quendōo nñ cáni. ¹⁹ Chi ley Moisés tu ní sāha jeē quendōo ndaā ñayuu. Te ni nihín yō ñn jñūhun vāha ga jeē ñúhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

²⁰ Te jíin jéē ni cáhán teyí Yaā Dios te cúu Jesús sutū. ²¹ Chi tāca gá tēe ún, nasūu jíin jñūhun jeē ni cáhán teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhán tutu:

Ni cahān teyí máá Jítoho yō Yaā Dios,
te ma nácani yátá ni yā:

Nñ cáni cúu ró sūtū,
nájnūhun sutū Melquisedec.

Achí yá. ²² Núu súcuan te jíin Jesús ni cucutú ñn contrato vāha ga vēsú ley jenahán. ²³ Te tāca gá sutū ún, chi ni íyo cuehē de, chi siquī jeē cájihī de te tu ní cúu cuiñi de ní cáni. ²⁴ Te Jesús chi cúu ya sutū jeē cuiñi ní cáni, chi técu yā ní cáni. ²⁵ Jeē yúcuan ndíso jniñu ya jnama ya ñayuu quijicoo nuū Yaā Dios, cotecu i ní cáni. Chi ní cáni técu yā te cáhán yā jehē i jíin Yaā Dios.

²⁶ Núu súcuan te vāha ndasí sutū kujéhnú cúu Jesús, jeē nájñūhun jíni ñúhún yó. Chi sutū ñi cúu ya, te tú na cuēchi ya, te íyo ndoo ya, te tu cúu ya jnáhan ñayuu casáha cuēchi, te kujéhnú téyí yá nde nuū sucún gá andiví. ²⁷ Te máá yá tu jíni ñúhún sáha ya nájñūhun ni casáha sutū cácujeñu jenahán, jeē ndiquiví ni casocō de quití siquī cuēchi máá de xihna gā, te sáá te siquī cuēchi ñayuu. Chi ñn jínu-ni ni socō yā máá yá jehē yō, te ni cuu-ni. ²⁸ Chi ni jeni ley Moisés tāca sutū kujéhnú jeē tú na fuerza squícu vāha. Yūcuán na te cuéé gá te ni cahán teyí Yaā Dios. Te jíin jéē ni cáhán teyí yá, te ni jeni ya Sēhe ya jeē cúu ya sutū kujéhnú, te sutū ndaā sutū vāha cúu ya ní cáni.

Jeē ndíso jniñu Cristo siquī ñn contrato jeé

8

¹ Núu súcuan te jñūhun cánuú gá jeē jé ni cahán rī cúu yāhá: Névhā yó ñn sutū kujéhnú nájñūhun ni cahán rī, te ndéé yá lado váha mesa nuū ndácu jniñu máá Yaā kujéhnú nde andiví. ² Te vijna te cúu ya sutū nde andiví, jeē cúu ndije lugar ñi jeē ni sáha máá Jítóho yō Yaā Dios, nasūu ñáyuu. Chi tu cáa nájñūhun vehe ñi jenahán jeē ní casáha ñayuu. ³ Te tāca sutū kujéhnú ni jeconā de jeē socó de ndajniñu jíin quití nuū Yaā Dios. Núu súcuan te Jesucristo suni ni jíni ñúhún jeē socó yā jeē cúu ya sutū. ⁴ Te núu ní íyo ga yā ini ñayiví, te ni ma quijnáhan jeē cúu ya sutū jíin táca gá sutū, chi níni cásocō gā de quití nájñūhun cáhán ley Moisés. ⁵ Te jniñu casáha de, tu

quijnáhan jíin jéē iyó andiví. Chi cúu ñn muestra-ni jeē steén siquī andiví. Te cúu nájñūhun jeē ni cáhán Yaā Dios jíin Moisés quiví ní quejéé de sáha de vehe ñi jenahán: Coto vāha ró jéē sáha ró táca ndajniñu nájñūhun jíto jeē ni steén rī nuū ró nde xiní yúcu, áchí Yaā Dios jíin de. ⁶ Te vijna te sáha Cristo jniñu jéhnú ndasí gá vēsú jeē casáha tāca sutū ún, chi ndíso jniñu ya siquī contrato jeé jéē yóhō vāha ga, chi ndíso jñūhun jéhnú ga jeē ni jéjñūhun Yaā Dios.

⁷ Chi contrato ley xihna ñúhún, núu jeē ni sáha jeē queé vāha jniñu núu, te tuá cánuú jéē cóo contrato uū. ⁸ Chi ñayuu jenahán un jéē tu ní cáquendō ndaā, suhva ni cahán Yaā Dios jíin i, áchí tutu:

Quiji quiví jeē nasáha rī ñn contrato jeé

jíin ñáyuu Israel jíin ñáyuu Judá, áchí Jítóho yō Yaā Dios.

⁹ Te ma cóo nájñūhun contrato jeē ni sáha rī jíin jíi i jenahán, quiví jeē ní jñi rī ndaha de jíjnáhan de, te ni quenehen rī de ini nación Egipto. Chi tu ní cásquícu vāha de jíin contrato ley rī.

Jeē yúcuan tuá ni táñúhún rí de, áchí Yaā Dios.

¹⁰ Núu súcuan te suhva cóo contrato jeé nasáha rī jíin ñáyuu Israel, nde na quiji quiví yúcuan, áchí Jítóho yō Yaā Dios:

Sáha rī jeē jécūhun ley rī nuū jeé níjnūní i,

te suni ini anuá i tee rī jñūhun ley rī.

Te cuu rī Yaā Dios máá i, te máá i cuu ñayuu máá rí.

¹¹ Te tuá jíni ñúhún steén i nuū jnáhan i nuū ñáni i,

návāha cuni i ndese Yaā cúu Jítóho i.

Chi ndihí i cuni ndese Yaā cúu rī, nde ñayuu núu ga jíin ndé ñayuu kujéhnú ga.

¹² Chi cone cáhnu ni rī nuū i jeē ní casáha i jniñu néé,

te ni ma núcūhun ga ni rī cuēchi ni casáha i.

Áchí Yaā Dios. ¹³ Te jeē ni cáhán yā jeé cuáha ya ñn contrato jeé cúu jeé

ní cachi yā jeē tuá cuajníñu contrato xīhna ñúhún. Te ñn jeē ní cutúhú jéē tuá jejniñu, chi jíní yō jeē je yajni naa.

Vehe iñ ñayiví yáha ní steén ndese cáa andiví

9

¹ Te ndaā chi contrato xīhna ñúhún ní ndacu jniñu ndese chiñúhún i ya, jín ndese coo ñn vehe iñ ini ñayiví yáha. ² Te ni cuvāha vehe iñ ún, te ni iyo uū cuarto. Te cuarto xīhna ñúhún jéē naní cuarto iñ, ni iñ candelero oro jín mesa oro jín pan iñ. ³ Te ni iyo sahna jeē ndíta caa jeē ndihyú inga cuarto jeē naní cuarto iñ ndasí gá. ⁴ Te ini un ní iyo ñn altar oro nuū cayú sūje cútú, jín yéjnū jeē ñúhún contrato ley, te máni oro cúu ñí síquī yejnú. Te ini yejnū un íne ñn tijehēn oro jeē ñúhún maná jeē ní cuun andiví. Te suni íne vara Aarón jeē ní nane numa, jín tabla yuū jeē yosó jnúhún contrato ley. ⁵ Te síquī yejnú un ní cahīn ndíndúú figura ndajéhé querubín jeē steén jeē íne Yaā Dios. Te ni sáha cuandahū síquī tapa yejnū nuū ni cóso yuyú ñíñi jeē ndáhva cuēchi. Te tu núne yó cáhān gā yō síquī tāca yúcuan vijna.

⁶ Te ná ni jīnu tācá un, te núu-ni núu-ni quívicoo sutū ini cuarto xīhna ñúhún jéē casáha de jniñu jeē cúu de sutū. ⁷ Te ini cuarto uū, chi tu cúu quívicoo na-ni sutū jín inga ñayuu, chi máñúhún-ni sutū kujéhnu ga cúu jeē quíví, te suni ñn-ni vuelta jeē cuiyá. Te suni ma cúu quíví de núu tú ñíñi quiti jeē socó de nuū Yaā Dios jeē síquī cuēchi máá de jín síquī cuēchi ñayuu. ⁸ Te jín yúcuan steén Espíritu Santo nuū yō jeē ná ni iyo ga cuarto iñ xīhna ñúhún ini ñayiví, te tu ní núne ichi jeē quíví ñayuu ini lugar iñ ndasí jeē cúu andiví. ⁹ Chi tāca yúcuan cúu jeē ni steén ndese cúu tiempo vijna. Chi jeē ní casocó i ndajniñu jín quiti nuū Yaā Dios, chi tu ní cúu cuiti sáha jeē quéndōo ndoo ánuá ñayuu ní casocó ún. ¹⁰ Chi tācá un ní steén máni síquī yiqui cúñu yō, ndese caji yō, ndese coho yó, ndese ndundoo

yó. Te ni jejniñu máá-ni nde ni quiji Cristo jín ñn modo vāha ga.

¹¹ Chi vijna je ni quiji Cristo, te cúu ya sutū kujéhnu ga jeē ndíso jniñu ya síquī tāca jéē vāha jeē ní quiji vijna. Te cúu ya sutū ini lugar iñ nde andiví jéē kujéhnu ga te vāha ga vēsú cuarto iñ jenahán. Te nasūu jéē ní casáha ñayuu cúu, chi nasūu cuenta ñayiví yáha cúu. ¹² Te jeē ni quíví ya ini lugar iñ ndasí gá nde andiví, te nasūu jín ñíñi ndixúhú ni ñíñi becerro, chi jín ñíñi máá yá ni quíví ya, ni socó yā ñn jīnu-ni jeē ñí cáni. Te súcuan ni jnama ya yohó jéē cótecu yō ñí cáni. ¹³ Chi nde jenahán te ñíñi síquī jín ñíñi ndixúhú jín yā becerro jeē ni cáyū nuū altar, ni cacosó yuyú de síquī ñáyuu jeē tu íyó ndoo ánuá i, te súcuan ni ndundoo i nuū yā. ¹⁴ Te núu ni nihīn jniñu ñíñi tācá quiti ún, te nagā ni cuu ñíñi máá Cristo. Chi Yaā ndoo cúu ya, te ni socó yā máá yá nuū Yaā Dios, ni sáha Espíritu jeē iyó ñí cáni. Te ñíñi yā nácate ánuá yō nuū jniñu néé jéē cúu yō sáha. Te súcuan te cuu cuajniñu yó núu Yaā Dios, Yaā técu.

¹⁵ Jeē yúcuan cúu jeē ndíso jniñu ya síquī ñn contrato jeé. Chi ni jihí yā, te súcuan ni quende yā cuēchi ni casáha ñayuu ná ni iyo i chíji contrato xīhna ñúhún. Te ñayuu jeē cána Yaā Dios i quívicoo i ndaha ya, nihīn i tahū i jeē cóo ñí cáni, nájñúhún ni jejnúhún ya. ¹⁶ Chi cúu nájñúhún núu sáha ñn tēe acta jeē cahán síquī tahū, te nde na cúu de te níhín jniñu. ¹⁷ Chi núu técu gā tēe ni sáha, te tu níhín jniñu. Te nde núu ni jihí de, te sáa te jéjniñu. ¹⁸ Te suni súcuan contrato xīhna ñúhún, suni ni jini ñúhún cucutú jín ñíñi quiti ní jíhí. Te contrato jeé chi ni cucutú jín ñíñi Cristo jeē ni jíhí yā. ¹⁹ Chi ná ni cuu ni cachi Moisés tācá jniñu ndácu contrato ley un núu ndivii ñayuu, te ni quihin de ñíñi becerro jín ñíñi ndixúhú jín ndute, te jín ixi cácuéhé jín yúcū hisopo ni cóso yuyú de síquī libro ley jín síquī ndivii ñayuu. ²⁰ Te ni cahān de: Yāha cúu ñíñi jeē cúcutú contrato ley jeē ní

sáha Yaā Dios jíin yó, achí de. ²¹ Te suni niñi un ní cosó yuyú de nde maá vehe ií jíin táca ndajniñu ni cajejniñu de jeē cáchiñúhún de ya. ²² Te je yajni ndihí ndajniñu, chí cáhán ley un jeē jíni ñúhún ndundoo jíin niñi. Te núu ma cáti niñi te ma cóne cáhnu ni yā nuū cuēchi núu.

Jeē ni sócō Cristo maá yá jeē quēnde yā cuēchi

²³ Núu súcuan te tãcá ndajniñu un jéē cácuu muestra tãca jéē iyó andiví, ni jini ñúhún ndundoo jíin niñi quiti. Te tãca máá jéē iyó andiví, chí ni jini ñúhún ndundoo jíin niñi Cristo jeē yóhyo vāha ga. ²⁴ Te Cristo chí tu ní quivi ya ini lugar ií jeē ní casáha ñayuu, chí ñn muestra-ni ni cuu un jéē steén ndese iyó lugar ií ndije nde andiví. Chí máá andiví ní quivi ya, te vijna íne ya nuū Yaā Dios jeē cahán yā jehē yō. ²⁵ Te máá sūtū cujehnu ga quivi de tãca cuiyā ini cuarto ií gā jeē sócō de niñi quiti. Te Cristo tu ní sócō yā maá yá cuehē jínu, chí ñn jínu-ni. ²⁶ Chí núu jeē súcuan te cánuú jéē cuehē jínu ndoho ya nde ná ni jecōo ñayiví te nde vijna núu. Te tuú chí sa tiempo cuándihí yāhá ni quenda ndijin yā ñn jínu-ni jeē ní cáni, ni sócō yā maá yá jeē ní quēnde yā cuēchi. ²⁷ Te nájnūhun ni cundaā jeē cúu tãca ñayuu ñn jínu-ni, yūcuán na te sándaā Yaā Dios jniñu i, ²⁸ suni súcuan Cristo ni jihí yā ñn jínu-ni jeē ní sócō yā maá yá jeē ní quēnde yā cuēchi cuehē ñayuu. Yūcuán na te ndiji ya inga jínu, te nasūu jéē sócō tucu ya maá yá jeē quēnde yā cuēchi, chí sa suhva jeē jnáma ya ñayuu jeē cándetu i jeē ndíji ya.

10

¹ Chí ley Moisés ni cuu ñn muestra-ni tãca jéē váha jeē ní quiñi jíin Cristo, ñn jeē steén-ni ndese coo máá jéē váha. Jeē yúcuan tu cúu cuiti sáha ley un jéē quēndōo ndaā ñayuu jeē quíjicoo i nuū Yaā Dios jeē cásocō i quiti nuū cuiyá nuū cuiyá. ² Chí núu ní cúu sáha ley un jéē quēndōo ndaā

i, te jecuiñi jeē cásocō i quiti núu. Chí núu ní cúu, te ñn jínu-ni te je ni quēndōo ndoo ánuá ñayuu cásocō ún, te ma yūhu gá anuá i jeē ni sáha i cuēchi núu. ³ Te tuú chí jeē cásocō i quiti ún táca cuiyā, sa sáha jeē núcūhun ni i cuēchi i. ⁴ Chí niñi síquī jíin niñi ndixúhú, ma cúu cuiti quēnde cuēchi.

⁵ Jeē yúcuan ná ni quiñi Cristo ini ñayiví, te ni cahán yā jíin Yaā Dios: Jeē jéhni i quiti jíin jéē jéhe i ofrenda nuū ní, chí tu ní nújnahan ni ní. Te ni sátūhva ní yiqui cúñu maá ná jeē sócō na.

⁶ Te tu ní cúsi ni ni jéē jéhmū i quiti te sócō i ti jeē ndúndoo cuēchi i núu.

⁷ Yūcuán na te ni cahán ná: Yāha véji ná jéē squícu ná jniñu jeē nújnahan ni ní, Tátā Yaā Dios.

Chí súcuan je yósó jnúhun na nuū tútu. Achí Jesús. ⁸ Xihna gā ni cahán yā jeē tu ní nújnahan ni Yaā Dios te tu ní cúsi ni yā jeē jéhni i quiti te jéhe i ofrenda, jíin jéē jéhmū i ti te sócō i ti jeē ndúndoo cuēchi i núu, nájnūhun ndácu ley jenahán jniñu. ⁹ Te ni cahán gā yā: Yāha véji ná jéē squícu ná jniñu jeē nújnahan ni ní, Tátā Yaā Dios. Te jeē ni cáhán yā súcuan, te ni sáha ya jeē jecuiñi jeē cásocō i quiti, chí ni sócō yā maá yá. ¹⁰ Te ni sáha Yaā Dios jeē iyó ndoo iyó íi yō nuū yā síquī jeē ni sáha Jesucristo jeē nújnahan ni Yaā Dios, suu jeē ní sócō yā yiqui cúñu yā ñn jínu-ni jeē ní cáni.

¹¹ Te tãca sūtū ún ndiquiví ni cahán de ni cajejniñu de nuū yā, te cuehē jínu cájehni de suu quiti jeē sócō sócō de. Te tãcá un chí ma cúu cuiti quēnde cuēchi. ¹² Te Cristo chí ñn jínu-ni jeē ní cáni ni sócō yā maá yá jeē síquī cuēchi yó. Te sáa te ni cucōo ya lado váha Yaā Dios nuū cujehnu ya. ¹³ Te yūcuán ndétu ya vijna nde quiñi quiví jeē quēnde yā poder tãca jéē jító uhū nuū yā. ¹⁴ Chí jeē ní sócō yā maá yá ñn jínu-ni, te ni sáha ya jeē ní cáni quēndōo ndaā ñayuu ni sándoo ya. ¹⁵ Te máá Espíritu Santo suni cáji cáhán yā síquī jnúhun yáha, chí xihna gā cahán yā:

16 Suhva coo contrato jeē nasáha ri jíin i,

nde na quíji quívi yúcuán, áchí Jítóho yō Yaā Dios:

Sáha ri jeē jécūhun ley rī ini anuá i, te suni nuū jeē níjnūní i tee ri jnūhun ley rī.

17 Yūcuán na te cáhán gā yā:

Ma núcūhun cuiṭi gā ni rī tāca cuéchi jíin jniñu neé ní casáha i.

Achí yá. 18 Núu súcuán te núu je ni ine cáhnu ni yā nuū cuéchi yó, te tuá cánuú jéē socó gā yō jeē siquí cuéchi yó.

Jeē ní nune ichi quívi yó núu Yaā Dios

19 Jeē yúcuán hermano, ma ñn jeē cáni ni yō, chi cuu quívi yó lugar iī ndasí ndé nuū iyó Yaā Dios, siquí jeē ní jeti niñi Jesucristo. 20 Chi ni nune ya ñn ichi jéé jéé cótecu yō ní cáni sáha ya. Chi ná ni jihī yā te ni tahndē sahna ndíta caa jeē ndihyú lugar iī ndasí gá ini vehe iī. Te súcuán ni steén Yaā Dios jeē nune quívi yó lugar iī ndasí gá nuū iyó yá. 21 Te Jesús cúu sutū kujénu ndasí jeē ndíto yóhó ñayuu cácuu sēhe Yaā Dios. 22 Núu súcuán te na quívicoo yó núu Yaā Dios, te na cóo ndíje ndaā anuá yō, te na cándíje níhin yó jéé iyó ndaā ndihī jnūhun ya. Chi jíin níñi Cristo ni ndundoo ánuá yō nuū tāca cuéchi ni casáha yó, nájnūhun ni ndundoo yó núu yā jeē ní jendute yó jíin ndute. 23 Te na cuiñi níhin yó jíin jnūhun jeē cácahān yō jeē ñūhun ni yō jeē sáha ya jeē váha jíin yó. Te ma cáca yátá yó, chi váha squícu máá Yaā Dios jeē ni jéjnūhun ya nuū yō. 24 Te na nácani ni yō ndese stíhví jnáhan ni yō jeē cundáhú gá ni yō jnáhan yó, jíin jéé sáha yó jniñu váha. 25 Te níni na ndútútú yó chiñúhún yó yā, te ma cúhuun ni yō nájnūhun cása sava i, chi sa víhyá gā na stíhví jnáhan ni yō, chi je cájini yō jeē cuácuyajni quívi ndíji ya.

26 Te núu je ni jecūhun ni yō te ni jetáhú yó jnūhun ndaā, te núu máni sáha sáha-ni yó cuéchi, núu súcuán te tuá na inga iyó jéé cúu siquí cuéchi

yó. 27 Chi sa quéndōo máni ga jnūhun xeēn siquí yō jeē quiji quívi juicio te quiji yáñuhūn xeēn jeē cayū ñayuu jeē cájito uhū i ya. 28 Ñayuu squéhichī ley Moisés, te núu uū chí únī ñayuu cahán cuéchi siquí i, te cuu nahín i, te tuá na jnūhun cundáhú ni iyó. 29 Te nagā ni cuu jeē ma ndóho xeēn gā ñayuu jeē squéhichī i máá Séhe Yaā Dios, chi nájnūhun jeē jeñú níhnu i siquí yā. Te sáha i jeē tu ndé jéjnūni niñi yā jeē ní jeti siquí contrato jeē ndúndoo i nuū yā nuú. Te súcuán sáha ndevāha i nuū maá Espíritu Yaā Dios jeē sáha jeē váha yóhó. 30 Chi je jíni yō jeē ni cáhān maá yá: Máá rí sáha jeē ndutahū i siquí cuéchi i, máá rí cuāha castigo i, áchí Jítóho yō. Te suni cáhān: Máá Jítóho yō sándaā yā siquí cuéchi ñayuu yā. 31 Núu súcuán te xeēn ndasí cúu jeē quívi ñayuu ini ndaha Yaā Dios, Yaā técu, jeē ndútahū i siquí cuéchi i.

32 Te na núcūhun ni rō ndese ni cuu ichi yátá, nde náa sá ní quejéé ró caca ró jíin luz yā, te ni cajendeyí ni rō ni candoho ró tijni jnūndóho xeēn. 33 Chi sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe ró jnūhun cuiñi ró jíin ñayuu ni candoho súcuán. 34 Chi ni cacundáhú ni rō ñayuu ní cahīn vecāa jeē siquí yā, te ni cacusiñi ni rō vésú ni caquende ñayuu ndajniñu ró. Chi ni casáha ró cuenta jeē ndé andívi cánevāha ró ñn tahū jeē váha ndasí gá jeē coo ní cáni. 35 Núu súcuán te ma siaá rō jnūhun jeē ní cándíje ndíje ró jéé váha ni yā, chi cuehē ndasí táhū níhin rō siquí ún. 36 Chi cánuú jéé cuándeyí ni rō návāha sáha ró jéé nújnahan ni Yaā Dios, te níhin rō jeē ni jéjnūhun ya. 37 Chi cáhān tutu iī:

ñn núnúu-ni te ndee Yaā ndíji, te ma cucuée yá.

38 Te ñayuu jeē ní ndahva rī cuéchi i, cotecu i jeē cándíje i jeē sáha rí jehē i.

Te núu na cáca yátá i, te ma cúsiñi ni rí jíin i.

Achí Yaā Dios. 39 Te yóhó tu cácuu yó jnáhan ñayuu cájica yátá jeē jnahnú

ndetū i. Chi sa cácdíje yó jéē nihín tahū yō cotecu anuá yō.

Siquī jnūhun cándíje

11

¹ Te jeē candíje yó, suu cúu jeē cúndaā ndije ni yō jeē nihín yō tāca jéē ñúhun ni yō, jíin jéē jiní vāha yó jéē iyó ndije tāca jéē tu cájito yó núū vijna.

² Te ñayuu jenahán chi ni jejnúhún yá i siquī jeē súcuan ni cacandíje ñihin i.

³ Siquī jeē candíje yó cúu jeē jécūhun ni yō jeē ni sáha Yaā Dios ñayīvi jíin jnúhun ni cahān-ni ya. Te jíin poder Yaā Dios jeē tu jító yó núū, ni jecōo tāca jéē jító yó núū.

⁴ Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vésú Caín. Te jeē yúcuan ní jejnúhún yá jeē iyó ndāā de, chi ni jetáhú yá jeē ni sócō de quiti nuū yā. Te vésú ni jihī de, te cáhán gā ejemplo de jíin yó nde vijna, chi ni candíje ndaā de.

⁵ Ni candíje Enoc jeē sáha ya jehē de, te jeē yúcuan ní naquihin ya de cuahān de andiví, te tu ní jihí de. Te tu ní cánanihīn ñayuu de, chi ni ndoñúhún-ni de ni sáha ya. Te áchí tutu jeē nde ná tu naquihin ya de te ni cusī ni yā jíin táca jéē ni sáha de.

⁶ Te núu tu cándíje yó jéē sáha ya jehē yō, te tú na modo cusī ni Yaā Dios jíin yó. Chi ñayuu jeē cuní quīvicoo ndaha ya, cánuú jéē candíje ndaā i jeē iyó yá jíin jéē cuáha ya tahū nuū ñayuu jeē nducú i candíje i ya.

⁷ Te Noé ni candíje de jeē sáha Yaā Dios jehē de, ná ni castūhun yá nuū de jeē coo jnūndóho jeē ná tu coto de jeē coo. Te jeē yúcuan ní jendetū de ni sáha de barco cáhnu jeē naní arca, návāha cācu de jíin ní vehe de. Te jeē súcuan ni candíje de, te ni cane cuēchi siquī ñayuu jeē tu ní cándíje i ya. Te ni ndahva yā cuēchi de siquī jeē ni candíje de jeē sáha ya jehē de.

⁸ Te Abraham ni candíje de jeē sáha ya jehē de, te jeē yúcuan ní jetáhú de ná ni cahān yā jíin de jeē quihín de ñn lugar nuū cuáha ya cuu tahū de.

Te ni quenda de cuahān de, vésú tu jíin de ndé nuū quihín de. ⁹ Ni candíje de jeē sáha ya jehē de, te jeē yúcuan ní condee tatú de nuū ñúhun jeē ni jéjnūhun ya jeē cuáha ya nuū de. Te ni condee de vehe ñī, te suni súcuan Isaac jíin Jacob, chi sēhe de ún suni inuú níhīn tahū i jíin de jeē ni jéjnūhun ya. ¹⁰ Chi ni ñuhun ni de condee de máá ñuu andiví jéē iyó cutú cimientó, te máá Yaā Dios ni jequin yā ni sama ya ñuu ún.

¹¹ Te suni ni candíje máá Sara jeē sáha ya jehē ña, te jeē yúcuan ní nihīn ña fuerza jeē ní jecūhun sēhe ña. Chi nde ná ni yāha ndasí cuiyā ña, te ni cacu ñn sēhe yí ña, chi ni candíje ña jeē squícu Yaā Dios jeē ni jéjnūhun ya. ¹² Te súcuan ni cuu jeē ni táhū cuehē ñayuu ni sáha ñn-ni Abraham, vésú je jéhnú ndasí de. Te yucūn de ni nducuehē ndasí, nájnūhun quīmi andiví, jíin ñīti yumar, jeē ma cúu cuiiti cahu yó.

¹³ Te tāca téē cándíje un, ní cajihī de. Te vésú tu ní cájito de jeē ni jéjnūhun ya, te ni cajini vāha de jeē cóo, te ni cacusī ni de jeē cóto de inga tiempo. Te súcuan ni cacahān de jeē ñayuu ñuu jicá ñayuu tatú cácuu de ini ñayīvi yáha. ¹⁴ Te tāca téē jeē cahán súcuan, chi stéén cají de jeē nducú de ñn ñuu jeē cúu andiví núū cúu ñuu maá de. ¹⁵ Chi núu jeē cánacani ni de siquī ñūū nuū ní quendacoo de, te iyó modo jeē nándicó cóo de te núu jeē cácuni de núū. ¹⁶ Te tuú chi ni cacuu ndasí ni de coyūcú de inga ñuu váha ga jeē cúu ñuu andiví. Jeē yúcuan tu cúcanu Yaā Dios jeē naní yá Yaā Dios de jíjnāhan de, chi je ni sátūhva ya ñn ñuu nuū cóyūcú de.

¹⁷ Ni candíje Abraham jeē sáha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni iyo tūhva de jeē socó de sēhe de un jéē mañúhún ni i nuū de, vésú ni nihīn de jnūhun jeē ni jéjnūhun ya suhva siquī i. ¹⁸ Isaac cúu téē jeē squejéé rí yucūn rō quihīn, achí jnúhun ni jejnūhun ya. ¹⁹ Te ni

sáha de cuenta jeē cúu nastécu Yaā Dios i. Te nájñuhun súcuan ni cuu, chi cuu cahān yō jeē nájñuhun ni jihī i te ni natecu i nuū de, chi ni jesi-ni ya jeē ma cáhni de i.

20 Ni candíje Isaac jeē sáha ya jehē de, te jeē yúcuan ní cahān de jeē vāha tahū nihīn sēhe de Jacob jíin Esaú tiempo quiji. 21 Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū nihīn ndindúú séhe yí José. Te yítuu de vara de, ni chiñúhún de Yaā Dios. 22 Te suni súcuan ni candíje José, te jeē yúcuan, náa cuacuyajni cuu de, te ni cahān de jeē tāca yúcūn Israel, in quivī quendacoo i nación Egipto. Te ni ndacu de jniñu jeē chindūji i yiqui de ñuu nuū quívicoo i.

23 Te ná ni cacu Moisés, te tátá i náná i ni cacandíje de jeē sáha ya jehē de, te jeē yúcuan ní cacondito sáhi de i unī yoō. Chi ni cajito de jeē lúu cáa i, te tu ní cáyuhú de siquī acta jeē ni sáha rey jeē na cúu tāca súchi yí. 24 Te suni súcuan ni candíje Moisés, te jeē yúcuan ná ni jehnu de te tuá ni jéhe de jñuhun cuu de sēhe ñahan cúu sēhe síhí rey Egipto. 25 Chi sa ni cuu ni de ndoho de jíin táca jñáhan de ñayuu Yaā Dios, nasūu jéē cusī ni de jecu-ni tiempo jíin cuéchi. 26 Chi ni sáha de cuenta jeē núu cahān neé ñayuu siquī de jeē siquí Cristo, te yúcuan sáha jeē cucá ndasí gá de ndihí jeē ndíso jñuhun Yaā Dios, vēsú jeē nihīn de ndihí ndajníñu cucá íyó nación Egipto. Chi ni ñuhun ni de jeē cuáha ya tahū de. 27 Te jeē súcuan ni candíje de, jeē yúcuan ní quenda de nación Egipto cuahān de. Te tu ní yúhú de jeē quití ni rey nuū de. Chi ni ĩin nīhin de siquī jniñu sáha de, chi ni sáha de cuenta jeē je jíto de nuū Yaā jeē tu cúu coto yó núu vijna.

28 Te jeē súcuan ni candíje de, te jeē yúcuan ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i niñī tī yehyí i, návāha núu na quíji ndajéhe jeē cáhni yā tāca séhe nuú ñayuu Egipto, te ma cáhni yā sēhe nuú ñayuu Israel.

29 Te siquī jeē ní cacandíje ñayuu Israel jeē sáha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núú, te ni nandihyū-ni ndute siquī de ni cajihī de.

30 Ni cacandíje soldado jeē sáha ya jehē de, te jeē yúcuan ní cotúú jeē ní condúu ndihyú ñuu Jericó, ná ni cajicó ndúu de uxā quivī. 31 Te Rahab, vēsú ñahan tíjni ni ni cuu ña, te ni candíje ña jeē sáha ya jehē ña. Te ni chindéé ñáhán ña tēe Israel jeē ní quijicoo ni condéhe yuhu ndese íyó ñuu ña. Te jeē yúcuan tu ní jíhí ña jíin ñayuu nīhni ni ñuu ña ún.

32 ¿Te ndé jñuhun ga cahān rī núu súcuan? Chi tuá na tiempo jeē nácani ga rī jñuhun Gedeón jíin Barac jíin Sansón jíin Jefté jíin David jíin Samuel jíin táca tēe ni canacani jñuhun ya nde jenahán. 33 Ni cacandíje de jeē sáha ya jehē de jíjñahan de, te jeē yúcuan ní cacundeyí de ni canajni de tāca ñuu náhnu, te vāha ni candacu de jniñu nuū, te ni chindéé ñáhán yá de nájñuhun ni jejnūhun ya. Te nuū sava de ni jesi Yaā Dios yuhu ndícaha jeē tu ní cáyeji tī de. 34 Te sava de tu ní cáyú de sáha ñuhūn jeē cayú xeēn. Te sava de ni cācu de jeē tu ní jíhí de jíin espada. Te sava de ni nanihīn ni de náa tuá fuerza de núú, te ndacuī teyí ní ĩyo de nuū guerra, te ni cacundeyí de siquī soldado tāca ñuu jicá jéé jíto uhū ún de. 35 Te sava ñahan ni natecu sēhe ña jeē ni jíhí i.

Te sava ga ñayuu chi sa suhva ni candoho xeēn i nde ni cajihī i. Te tu ní cájēhe i jñuhun jeē siaá i jñuhun ya te cācu i, chi ni catee ni i jeē natecu i coyūcu váha ga i andiví. 36 Te sava ga i ni casácatā ñayuu nuū i, te ni cacani ñayuu i, te nde ni caconuhnī cadena i ni cahīn i vecāa. 37 Te ni cajēhe yuū xinī i, te ni cajehnde i jíin sierra, te ni cajito ndee i jíin jñundóho, te ni cajehni i jíin espada. Ni cajica cuu i cháha chúcuan, te máá ñi lánchi máá ñi ndíxuhú ní cañuhun i. Ni candoho ndáhú i, ni cajito i jñundóho,

ni castóho ñayuu i. ³⁸Vāha ndasí ñáyuu ni cacuu i jeē tú cuiti ñayuu ñayīvi súcuan, te vēsú súcuan te ni casáha ñayuu jeē ní cajica cuu i nuū ñúhun téhé jíin chíji yucu, ni cahīin i yaū cava jíin yáū ñuhun. ³⁹Te tāca ñáyuu yáha, vēsú ni jejnúhún yá i jeē ní cacandíje nīhin i jeē sáha ya jehē i, te tu ní cájito i nuū jeē ni jéjnúhun ya. ⁴⁰Chi ni sátúhva Yaā Dios ñn jniñu váha ga, te suu cúu jeē sáha Cristo jíin yó, návāha ñn cáhnu-ni nihīn yō tahū yō jíin i, te jeē yúcuan cúu jeē ná tu nihīn i ndihī tahū i.

Jeē na cócunuū yō nuū maá ñn-ni Jesús

12

¹Te íyó cuéhē ndasí ñáyuu un jeē ní cacandíje nīhin i jeē sáha ya jehē i, te nájñuhun ni jicó ndúū i yóhó, cástéén gā i nuū yō nde vijna jeē suni súcuan na cándíje yó. Núu súcuan te suni máá yó, na téjiyo yó táca jéē sajnēñu jíin cuéchi jeē ni cáan yó jíin. Te na cuándeyí ni yō cunu yó jíin carrera jeē ni jéhe ya jeē cunu yó. ²Te na cócunuū vāha yó Jesús, Yaā jeē ni scándíje yóhó te sáha ya jeē íje vāha yó jíin jnúhun ya nde jíinu ije yó. Chi máá yá ni jendeyí ni yā ni ndoho ya jicā cruz. Te vēsú jnúhun canu cúu jeē súcuan cuu yā, te tu ní sáha ya cuenta. Chi ni ñuhun ni yā jeē sa cusī ndasí ni yā ná ni cuu ni ndoho ya. Yūcuán na te ni cucōo ya lado váha mesa nuū ndácu Yaā Dios jniñu.

³Te na nácani ni rō ndese ni jendeyí ni yā ni ndoho ya jeē ni sáha ndevāha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jnúndóho. ⁴Chi ni ná tu ndoho ró jéē ndé cuu rō jeē cánducú ndéyí ró snāā rō cuéchi. ⁵Te sanaa te je ní canaa ni rō jnúhun cáhán tutu iī, jeē stihví ni Yaā Dios rohó jéē cácuu ró séhe ya:

Séhē, ma quití ni rō jeē snahnú Jitoho yō rohó,
te ni ma ndínuu ni rō núu cáhán yā nuū rō.

⁶Chi Jitoho yō snahnú yā ñayuu jeē maní yā jíin,

te jéhe ya castigo tāca jéē náquihin ya cuu séhe ya.

Achí tutu. ⁷Núu súcuan te na cuándeyí ni rō jeē snahnú Yaā Dios rohó, chí sáha ya jíin ró nájñuhun sáha tátá jíin séhe. Chi tú na séhe íyó jéē tu snahnú tátá i. ⁸Te núu ma snahnú yā rohó, nájñuhun ndóho tāca séhe, núu súcuan te nájñuhun séhe ndáhú cácuu ró, nasūu séhe ndije ya. ⁹Te tátá yō ñayīvi yáha, suni ni snahnú de yóhó, te ni íyo yíñuhún yó jíin de. Te nagā ni cuu jeē ma cuándetū yō nuū maá Tátá yō andiví jeē snahnú yā yohó, te cotecu yō ní cáni. ¹⁰Te ndaā chí máá de ni casnahnú de yóhó jecu-ni quivī, ndese ni cuu ni maá de. Te máá yá chí snahnú yā yohó ñn modo jeē quéndōo vāha ga yō, návāha coo ndoo yó nájñuhun íyó ndoo máá yá. ¹¹Te ndaā chí tu cácusī ni yō maá hora jeē ndóho yó castigo, chí sa cúcuíhyá ni yō. Te cúcuéé gá te cuni yō jeē ní quendōo ndaā yō te coo ndeyí sī ni yō jeē ni snahnú yā yohó.

Siquī ñáyuu jeē casquéhichī i jnúhun cáhán Yaā Dios

¹²Núu súcuan te ma cóo ró nájñuhun tēe ni cuíta í ndaha te quísi i xinī yití, chí sa ndacuī na sáha ró máá ró nuū jnúndóho. ¹³Te sáha ró ichi ndóo caca ndaā rō, návāha nduvāha rōhó jéē tu fuerza ini, jeē cácuu ró nájñuhun tēe chácuá jeē tu cúu caca vāha.

¹⁴Te na cóndihvī ni rō jeē condee manī rō jíin táca ñáyuu, jíin jéē cóo ndoo coo iī rō nuū yā. Chi ma cúu coto ni ñn ñayuu nuū maá Jitoho yō te núu tu íyó ndoo i. ¹⁵Te coto má cáca yátá ni ñn ró te scuíta ró jnúhun jeē sáha Yaā Dios jeē váha rōhó, návāha tú cuu ró nájñuhun ñn yucū uvuá jeē stívi te sáha daño jíin cuéhē ñayuu. ¹⁶Te ni ñn ró ma cáca jnéni. Te ni ma cóo jéē ni rō nuū Yaā Dios, nájñuhun ni íyo Esaú. Chi máá ñn cohō ndeyu ni jicān de nuū ñáni de, ni sama de jíin derecho de jeē cúu de sūchi núú, te súcuan ni xícó de derecho de. ¹⁷Te cájini rō jeē cucuéé gá te ni cuni de jeē na cáhán tátá de jeē váha tahū nihīn de, te tu

ni cúu, chi tuá ni táñúhún Yaā Dios de. Chi tu ní nihīn jniñu jeē ní nacani ni de, vēsú ni nducú ndéyí de te ndeahyú de.

¹⁸ Te rōhó jijnáhan ró tu ní quíjicoo ró núu íyo cúu, nájñuhun íyo ni cuu máa yucu nuū ni jéhe ya ley yā nuū ñayuu Israel. Chi ni cane yáñuhūn yucu Sinaí, te nee lúchi jnúú jíto, te quée tachī xeén. ¹⁹ Te ni jecu trompeta, te ni cahān Yaā Dios. Te ñayuu jeē ní cajini sōho jeē cahán yā, ni cacahān ndahú i jeē ma cahán gā yā jíin i. ²⁰ Chi tu ní cundeýí i jíin jnúhun jeē ní ndacu ya jniñu nuū i, chi ni cahān yā: Vēsú ñn quiti-ni núu quiví ti yucu yáha, jíni ññuhún cuu tī jíin yūú chí jíin lanza, achí yá. ²¹ Te síquī jeē íyo ndasí cúu jeē cájito i ún, te ni cahān Moisés: Quisí i ruhū jeē yuhú rí, achí de.

²² Te vijna rōhó jéē cávandíje, tu ní quíjicoo ró núu yúcu yúcuan. Chi sa suhva nuū maá yucu Sion jíin núu maá ñuu Yaā Dios, Yaā técu, ni quivícoo ró. Te ñuu un cúu Jerusalén jeē iyó andiví, nuū cáhīyo tútú cuéhē ndasí mil ndajéhé cáchiñúhún Yaā Dios. ²³ Te ni quivícoo ró núu cáyūcu tútú ñayuu cávandíje jeē cácuu sēhe Yaā Dios, jeē iyó lista i andiví. Te ni quivícoo ró núu Yaā Dios, Yaā sándaā jniñu ndihí ñayuu, jíin núu cáhīyo ánuá ñayuu vāha jeē jé ni squéndōo ndaā yā i. ²⁴ Te suni nuū maá Jesús, Yaā ndiso jniñu síquī contrato jeē ní quivícoo ró. Te yahu ndasí gá jniñu sáha niñi yā jeē ni jéti jeē ndáhva cuēchi yó, nasūu níñi Abel jeē ni jícān cuēchi.

²⁵ Núu súcuan te coto má squéhichī rō jñuhun jeē cahán yā jíin ró jijnáhan ró. Chi ñayuu jeē tu ní cájetáhú ná ni cahān yā jíin i ñayiví yáha, tu ní cácācu i. Te xeén gā ndoho yóhó te núu ma cuatáhú yó nuū yā jeē cahán yā nde ichi andiví núu súcuan. ²⁶ Te nde saá ní quisí i ñayiví jéē ni cahān yā. Te vijna chí cáhán yā: ñn na jínu quisí rí ñayiví, te nasūu máa-ni ñayiví, chí suni táca jéē ín andiví, achí yá. ²⁷ Te jñuhun yáha jéē cahán, ñn na jínu, chí cúní cahān jeē téjiyo ya táca jéē tu íyó cutú,

suu jeē ní cuvāha, návāha na quéndōo jeē cóo cutú ní cáni. ²⁸ Núu súcuan te cuāha Yaā Dios ñn ñuu nuū yō jeē cóo cutú ní cáni. Te jeē yúcuan, na nácuatáhú yó nuū yā, te na chíñúhún yó yā, te na cóo yíñúhún yó, návāha cusí ni yā jíin yó. ²⁹ Chi Yaā Dios maá yó cúu nájñuhun ñn ñuhūn jeē snāā ndihí jeē neé.

Ndese sáha yó te cusí ni Yaā Dios

13

¹ Ma jécuiñi rō jijnáhan ró jéē cundáhú ni rō hermano rō cávandíje. ² Conahán ró jeē cánuú cuáha núu ró vehe nuū ñayuu cájica. Chi íyó jínu jeē súcuan ni cajēhe núu ñayuu vehe, te tu ní cajini i jeē nuū maá ndajéhé andiví ní cajēhe núu i vehe.

³ Te conahán ró chindéé ñáhán ró ñayuu cáhīn vecāa, chí sáha ró cuenta jeē nájñuhun cáhīn cáhnu ró jíin i vecāa. Te suni nacani ni rō jehē jnáhan ró jéē cándoho i sáha ñayuu, chí núu súcuan coo jíin máa ró te suni ndoho ró.

⁴ Coo yíñúhún ró síquī jnúhun quíjñáhan ñayuu, te ma cosíquí ndéē jnáhan ró. Chi máa Yaā Dios sándaā yā cuēchi ñayuu tijni ni jíin ñayuu casíquí ndéē jnáhan.

⁵ Te ma ndíyo ni rō xūhún, chí na cóo sī ni rō jíin jéē cánevāha ró. Chi máa yá ni cahān: Ma siaá cuiti rī rohó, ni ma stóo cuiti rī rohó, achí yá. ⁶ Núu súcuan te ma ñn jeē cáni ni yō, chí cuu cahān yō:

Máa Jítoho rī chindéé ñáhán yá ruhū, te ma yūhu rí núu na vé cuní ñayuu sáha i jíin rí.

Achí yō.

⁷ Te na núcūhun ni rō táca pastor rō, jeē ní castéén de jñuhun Yaā Dios nuū rō. Te sáha vāha ro cuenta ndese ni nihīn jniñu jeē ní casáha de, te na ndácu ró de jeē ní cacandíje de jeē sáha ya jehē de.

⁸ Te Jesucristo chí ñn-ni cáa ya ichi yátá jíin vijna jíin ní cáni. ⁹ Núu súcuan te ma cuáha ró jnúhun candíje ró táca jnúhun jeē sīn cáhán jeē tu quíjñáhan jíin jnúhun máa yá. Chi íyó

váha jeē na íje ánuá yō sáha jnūhun jeē váha ni yā jíin yó. Te tu jíni ñúhún yó jnūhun jeē tajnúni siquī jeē yéji yō, chi tu níhín jniñu cuiti jíin ñayuu cáhín jíin.

¹⁰ Te máá yó chi cánevāha yó ñn jeē ni sócō maá jéhē yō, cúu Cristo. Te tāca sūtū jeē cásocō gā de modo jeē cahán ley jenahán, tú na vé nihín de nuū yā jeē ni sócō yā maá yá. ¹¹ Te sutū kujéhnū ga, ná ni sócō de ñiñi tācá quití ini cuarto iī gā jeē siquí cuéchi, te yiquí cúñu tī ni cajehmu de ichi yátá ñuu. ¹² Te suni súcuan ni ndoho máá Jesús ichi yátá ñuu, návāha jíin ñiñi maá yá te sándoo ya ñayuu. ¹³ Núu súcuan te ma cóo inuú gá ni yō jíin ñayuu tu cácañdije, chi nájnūhun quihín yō jíin yá ichi yátá ñuu, te na ndóho yó jíin yá jeē sácatā i. ¹⁴ Chi ñayivi yáha tu íyó ñuu nuū coo yó ñi cáni, chi sa cánducú yó máá ñuu nuū cóyūcu yó quiví quíji. ¹⁵ Núu súcuan te jeē jíin Jesucristo te níni na cáhán yō jeē yóhyo cújéhnū Yaā Dios, chi suu cúu nájnūhun ñn jeē sócō yō nuū yā, suu jeē nácuatáhú yó nuū yā. ¹⁶ Te ma náā ni rō sáha vāha ró núu jnāhan ró, te cuāha ró jéē cúmanī nuū i. Chi nájnūhun ñn jeē cásocō rō nuū Yaā Dios cúu tāca jéē yáha, te cúsiñi ni yā jíin.

¹⁷ Te cuandije ró núu tēe cácuu pastor rō, te cuandetū rō nuū de. Chi cándito de rōhó jéē quéndōo vāha ánuá rō, chi cájini de jeē cánuú nacuāha de cuenta nuū yā. Te condihvī ni rō sáha vāha ró, návāha cusī ni de siquī rō te ma cucuíhyá ni de siquī rō. Chi núu tu súcuan te ma cóo jeē váha jíin ró.

¹⁸ Te cacān tahu rō jehē rī jijnáhan rī. Chi vāha íyó ni anuá rī jeē tú na cuēchi rī. Chi cácuni rī caca yíñúhún rī jíin táca jniñu. ¹⁹ Te suni cáhán ndahú rī jíin ró jeē cacān tahu ndasí ró jehē maá rī, návāha cuāha ya jnūhun jeē yachī gā cuajeē tucu rī nuū rō.

Bendición jíin saludo jeē sándihí

²⁰ Te máá Yaā jeē jéhe jnūhun ndeyí sī ni nuū yō, ni nastécu yā Jitoho yō Jesucristo mēhñu ndíyi. Te Jesús cúu

pastor kujéhnū jeē ndíto ñayuu cácuu nájnūhun lanchi ya. Chi jíin ñiñi yā ni sácutú yá contrato jeé yá jeē coo ñi cáni. ²¹ Te ñúhún ni rī jeē Yaā Dios na sáha ya jeē ije ni rō jijnáhan ró, návāha cuu sáha ró táca jniñu vāha ndese nújnahan ni yā. Te ñúhún ni rī jeē jíin fuerza Jesucristo jeē ndeé yá ini yō, na sáha Yaā Dios jeē cuu yó ñayuu cúsiñi ni yā jíin. Te na cáhán yō jeē yóhyo luu cújéhnū ya ñi cáni. Amén.

²² Hermano jijnáhan ró, cáhán ndahú rī jíin ró jeē cone cáhnu ni rō jeē stihví ni rī rohó jíin jecu-ni jnūhun ni tee rī nuū carta yáha. ²³ Te cástūhun rī jeē hermano yō Timoteo, je ni quenda de vecāa. Te núu yachī quíji de yāhá, te cuajecoo ndíndúú rī nuū rō coto jnāhan yó.

²⁴ Te cahán rō jíin táca tēe cácuu pastor rō jíin táca hermano cácañdije jeē sándeyí ni de, áchí rī. Te ñayuu Italia suni cácahán i jeē sándeyí ni rō.

²⁵ Te ñúhún ni rī jeē na sáha ga Yaā Dios jeē váha rōhó jijnáhan ró. Súcuan na cóo. Amén.

CARTA JEE NI TEE SANTIAGO NUU ÑAYUU CACANDIJE

¹ Máá rí cúu Santiago, mozo Yaā Dios jíin Jítoho yō Jesucristo. Te téé rí carta yáha cuájeē nuū rohó ñáyuu cacandije jeē cácuu ró ndihúxí uū yucūn Israel, te ni cajitē núu ró ní ñáyíví. Sándeyí ni rō jijnáhan ró.

Yaā Dios sáha jeē jécūhun ni yō

² Ñání mání, na cúsiñ ndasí ni rō jijnáhan ró núu quiji tijni tāca jnúndóho siquí rō. ³ Chi cájini rō jeē núu jíto ndee jnúndóho rōhó núu cacandije vāha ró, te yūcuan sáha jeē cútūhva ró cuándeyí ni rō. ⁴ Te na cuándeyí ni rō nde ije vāha ró jíin, návāha cuu sáha ró ndihi jniñu vāha, te ma cúmaní jeē squícu vāha ró núu yā.

⁵ Te núu ndé ñin ró cúmaní jecūhun ni rō caca ndíchí ró jíin jnúhun Yaā Dios, na cácan rō nuū yā, te sáha ya jeē jécūhun ni rō. Chi sáha ya ndihi jeē cájicān ñayuu, te tu cúxeēn yā nuū i jeē jicán i. ⁶ Te jeē jicán rō, te cánuú candije ró jéē sáha ya jeē jicán rō, te ma cáni siquí ni rō. Chi ñayuu jéni siquí ni, cúu i nájnūhun ndute mar jeē ndóna jísó cóyo cuahān cháha chúcuan sáha tachí. ⁷ Ñayuu ún ma cáni ni i jeē sáha Jítoho yō jeē jicán i. ⁸ Chi ñayuu jeē jéni ñin jéni uū ni, chi máni násāma ni i jíin tāca jniñu cásáha i.

⁹ Tācá hermano ndahú, na cúsiñ ni de jeē sáha Yaā Dios jeē cujéhnū de. ¹⁰ Te hermano cucá, na cúsiñ ni de núu ni ndundáhú de. Chi tāca téé cucá, yachí naa jeē cucá de, nájnūhun náā ita yucū. ¹¹ Chi núu ni cane niāndii te cújihní, te íchí-ni yucū, te cóyo-ni ita, te náā-ni jeē lúu cáa. Te suni súcuan ndoho tāca téé cucá níni sá jícu de jíin jniñu de.

Siquí jeē jíto ndee jnúndóho yóhó

¹² Yōhyo ndetū tēe jeē jéndeyí ni de núu jíto ndee jnúndóho de. Chi núu je ni cundeyí de jíin, te nihīn de premio

jeē cujéhnū de cotecu de ní cáni. Chi súcuan ni jejnūhun Yaā Dios jeē cuáha ya nuū ñáyuu jeē maní jíin yá. ¹³ Núu ñin ñayuu jicán ini i jeē sáha i cuēchi, te ma cáni ni i jeē nuū Yaā Dios vēji jeē jicán sáha i cuēchi. Chi ni ñin ma cúu cuiti sáha jeē quívi Yaā Dios cuēchi, te ni máá yá tu squívi ya ni ñin ñayuu nuū cuéchi. ¹⁴ Chi sa suhva jeē ndíyo néé ni máá i, suu sáha jeē jicán ini i sáha i cuēchi, te scánda ini i chí stáhú un i. ¹⁵ Te jeē ndíyo néé ni i, yūcuan quéjéé cuéchi. Te cuēchi ún, núu je ni cunihin, te sáha jeē jnahnú ndetū ñayuu. ¹⁶ Núu súcuan te ma stívi ró caní ni rō jijnáhan ró, ñání mání.

¹⁷ Tāca jéē cútahū yō jeē váha jeē lúu íyó, chí vēji nde andívi núu maá Yaā Dios, Yaā ni sáha tāca jéē ndíndē ín andívi. Te máá yá tu násāma cuiti ini yā nájnūhun násāma nduva jíin cuándahū. ¹⁸ Te ni sáha ya jeē cótecu yō ní cáni, chí ni candije yó jnúhun ndaā yā. Te ni nduu yó nájnūhun sēhe nuū yá nuū tāca gá sēhe ya jeē quiji, chí súcuan ni nujnahan ni yā sáha ya.

Siquí ndese chiñúhún ndaā yō yā

¹⁹ Núu súcuan te tāca rōhó ñání mání, ñama na chúsohó ró jnúhun ya, te sa suhva ma cahán yachí rō, ni ma quití yachí ni rō. ²⁰ Chi ñayuu cáquití ni, tu sáha i jniñu ndaā jeē cuní Yaā Dios. ²¹ Núu súcuan te na siáá rō tācá jniñu jnéhén jíin jniñu néé jéē ni cáyā jíin ró. Te na cóo vítá ni rō te cuatáhú ró jnúhun ya jeē ni quívi ini anuá rō. Chi jnúhun un ndíso poder jeē cácu ánuá rō.

²² Te na squícu ró jéē steén jnúhun ún, te nasūu máá jéē cúni sōho ró súcuan-ni, chí núu súcuan te cástáhú ró maá ró, chí tu níhín jniñu núu tu squícu ró. ²³ Chi tēe jeē jíni sōho de jnúhun ya súcuan-ni, te tu squícu de, cúu de nájnūhun ñin tēe jeē jíto de nuū espejo ndese cáa nuū de. ²⁴ Te jíto vāha de nuū de, te cuahān-ni de, te náā ni de ndese cáa nuū de. ²⁵ Te núu ñin tēe tu náā ni de jnúhun jíni sōho de, chí sa suhva chúhun vāha ni de jeē cahán maá ley ndaā Jesús jeē ni sáha libre yohó, te núu cuiñi níhin de jíin,

te squícu de jeē ndácu, yūcuán na te quéndōo ndetū de jíin jniñu váha jeē sáha de.

²⁶ Te núu ndé ñn ró jéni ni rō jeē chiñúhún váha ró Yaā Dios, te núu tu ndíto ró yáá ró, núu súcuán te stáhú ró maá ró, te tu ndé jéjniñu jeē chiñúhún ró yā. ²⁷ Ñayuu jeē chiñúhún ndoo chíñúhún ndáā i máá Tátá yō Yaā Dios, chí jniñu yáha sáha i: Chíndéé ñáhan i sūchi ní caquendōo ndáhú jíin ñahan ní caquendōo ndáhú, núu na-ni jnūndóho íyó. Te tu sájnéhén i ánuá i jíin jniñu neé íyó ñáyiví.

Ma cúhichī ni yō coto yō ñayuu ndahú

2

¹ Ñánī mánī, cácuandíje ró Jítoho yō Jesucristo jeē cujéhnū luu ya. Núu súcuán te ma sáha ró cuenta ndese cúu ñn ñn ñayuu, chí ñnuú sáha ró jíin ndihí i. ² Chí íyó jínu quívi ñn tēe ini vehe nuū cándutútú ró, te yíhi xehyu oro ndaha de, te ñúhun de sahma váha. Te suni íyó jínu quívi ñn tēe ndáhú, te ñúhun de sahma tahndé. ³ Te tú váha núu sáha yíñúhún ró jíin tēe ñúhun sahma váha, te cahān rō jíin de: Cucōo ní lugar váha yáhá. Te cahān rō jíin tēe ndáhú: Yūcuán cuiñi ní, chí yáha cucōo ní nuū ñúhun, achi rō. ⁴ Chí núu cásáha ró súcuán, te tu jéni vāha ni rō síquī jnáhan ró, chí sñn sáha ró jíin tēe cúcá jíin tēe ndáhú.

⁵ Ñánī mánī, chusóhó ró jnūhun cáhān rī: Yaā Dios ni nacāji ya ñayuu ndahú ini ñayiví yáha jéē cóo cúcá i jíin jnúhun cácuandíje i ya, te nihīn i tahū i ñuu nuū ndácu ya jniñu. Chí ni jejnūhun ya cuāha ya un núu ñáyuu jeē maní jíin yá. ⁶ Te máá ró chí sa suhva cájēhe ró jnúhun canu ñayuu ndahú. ¿Te á násūu tēe cúcá cúu jeē castáhú róhó síquī jeē nihín de xūhun ró, te yachī jéquin de cuēchi síquī rō nuū tohó? ⁷ Te suni cácahān neé de síquī Cristo, te suu síhví máá yá cúu jeē cánani ró cristiano.

⁸ Váha cásáha ró te núu cásquícu ndije ró máá jnúhun jéhnū ga jeē cahān ley, nájnūhun yósó núu tútu i:

Cundáhú ni rō jnáhan ró nájnūhun cundáhú ni rō maá ró, achi. ⁹ Te núu sñn sáha ró jíin ñáyuu cucá jíin ñáyuu ndahú, núu súcuán te cuēchi cásáha ró, te jécondee cuēchi síquī rō jeē stívi ró ley Yaā Dios. ¹⁰ Chí núu ñn ñayuu stívi i ñn-ni jniñu ndácu ley, te vēsú na squícu i ndihí ga, te nájnūhun ni stívi i ndihí ley, te ndihí un jécondee cuēchi síquī i. ¹¹ Chí Yaā jeē ni cáhān jeē ma cósíquī ndéē jnáhan ró, suni ni cahān yā jeē ma cáhni rō ndīyi. Te vēsú tu ní cásíquī ndéē jnáhan ró, te núu ni jehni rō ndīyi, núu súcuán te je ni stívi ndihí ró ley. ¹² Te tāca jéē cahān rō jíin jéē sáha ró, chí sáha ró cuenta jeē sándaā yā ndihí un jíin máá ley Jesús jeē ni sáha libre rohó. ¹³ Chí quívi sándaā yā jniñu, te ñayuu jeē tu ní cundáhú ni jnáhan, suni ma nihín i jnūhun cundáhú ni. Te ñayuu ni cundáhú ni jnáhan, cusñi ni i jeē ní ndahva yā cuēchi i máá quívi sándaā yā jniñu.

Tu jéjniñu jeē candíje yó núu tu squícu yó

¹⁴ Ñánī mánī, núu cáhān ñn tēe jeē candíje de jeē sáha ya jehē de, te núu tu sáha de jniñu váha, ¿te ndé jéjniñu jeē candíje de ún? ¿A cuu cācu ánuá de jíin jéē cahān-ni de jeē candíje de, te núu tu sáha de jniñu váha? ¹⁵ Te núu ñn hermano yō chí hermana yō, cúmanī sahma i jíin jéē cáji i tāca quívi, ¹⁶ te núu ñn ró cáhān jíin i: Cuandeyí ni rō, te cusúcún váha ró te caji vāha ró, achi rō jíin i, te núu tu ní jéhe ro jéē jíni ñúhún i cotecu i, ¿te ndé jéjniñu jeē cahān rō súcuán? ¹⁷ Te suni súcuán cúu jeē núu áchí ró jeē candíje ró jeē sáha ya jehē rō, te núu tu sáha ró jniñu váha, núu súcuán te tu ndé jéjniñu cuiñi jeē cahān-ni ró jéē candíje ró.

¹⁸ Te sanaa te cahān ñn ñayuu: Róhó chí cándíje ró jéē sáha ya jehē rō, te ruhū chí sáha ri jniñu váha. ¿Na jíin stéén rō jeē candíje ró jeē sáha ya jehē rō, te núu tú na jniñu váha sáha ró? Te ruhū chí sáha ri jniñu váha te súcuán stéén rī jeē candíje ri jeē sáha ya jehē rī. ¹⁹ Ndaā chí cándíje ró jeē íyó ñn-ni

Yaā Dios. Te va íyó váha núu súcuan. Te tachī chi suni súcuan cá candíje, te cáquísí i jeē cáyūhú, chi tu cásáha jniñu váha. ²⁰ ¿Te naun tu jécūhun ni rō? ¿A tu jíni rō jeē núu tu sáha ró jniñu váha, te tu ndé jéjníñu cuiñi jeē cahán rō jeē candíje ró? ²¹ Te jíi yō Abraham, ni ndahva yā cuēchi de síquī jeē ni sáha de jniñu váha. Chi ni jetáhú de jeē ni cáhān yā jeē cahni de sēhe de Isaac socō de i nuū altar. ²² Te jécūhun ni rō jeē síquī jeē ní candíje de jeē sáha ya jeē ni jéjnūhun ya nuū de, jeē yúcuan ní jetáhú de jeē ni cáhān yā jeē socó de sēhe de. Te jeē ní jetáhú de, suu ni steén jeē candíje ndije de jeē sáha ya jeē ni jéjnūhun ya nuū de. ²³ Te súcuan ni cundaā jnūhun cáhān tutu īi: Abraham ni candíje de jeē ni jéjnūhun ya nuū de, te jeē yúcuan ní ndahva yā cuēchi de, áchí tutu. Te ni conaní de amigo Yaā Dios.

²⁴ Núu súcuan te je ni cajini rō jeē ndáhva Yaā Dios cuēchi ñayuu jeē casáha i jniñu váha síquī jeē cá candíje i jeē sáha ya jehē i, te nasūu máá jéē cahán-ni i jeē candíje i. ²⁵ Te suni súcuan Rahab, vēsú ñahan tíjini ni ni cuu ña xīhna gā, te ni ndahva yā cuēchi ña síquī jeē ni sáha ña jniñu váha. Chi ni jēhe núu ña vehe nuū tāca mozo ni tají Josué, te ni chuhichí ña de inga ichi, návāha cācu de nuū téē cánducú cahni de. Te jeē yúcuan ní ndahva Yaā Dios cuēchi ña. ²⁶ Te ñayuu núu tuá anuá i nuū yíquī cúñu i, te ndīyí cúu i. Te suni súcuan núu cándíje yó jeē sáha ya jehē yō, te núu tu sáha yó jniñu váha, te nájnūhun ndīyí cúu yó.

Jnūhun síquī yá yó

3

¹ Ñánī mánī, ma cáni ni cuehē rō cuu ró maestro steén jnūhun ya. Chi cájini rō jeē yóhó jéē steén jnūhun, cuehē gā cuēchi ndenehen ya síquī yō. ² Chi ndíhi yó stívi cuéhē jniñu. Te núu ñn tēe cuu condito de yáá de jeē ma stívi de jíin ni ñn jeē cahán de, núu súcuan te yōhyo vāha tēe cúu de,

te suni cuu condito de ní gá de jeē ma stívi de. ³ Chi cúu nájnūhun jeē chíhi yó freno yuhu caballo, te súcuan snáhnú yō ní tí jeē quihín tī jíin yó ndé nuū cuní yō. ⁴ Te suni súcuan tāca barco, vēsú náhnu ndasí, te vēsú ñihin chūndahá táchī, te jíin ñn timón lulí-ni te cuu scuícó téē scáca, te quihín de jíin ndé nuū cuní de. ⁵ Te suni súcuan cúu yáá yó, chi vēsú lulí-ni, te cuehē teyí sáha yó jíin. Te suni jíni yō jeē ñn ñuhūn lulí cuu jniñi jeē cayú ñn yucu cáhnu ndasí. ⁶ Te suni súcuan yáá yó, chi sáha nájnūhun ñn ñuhūn, chi scuíquín cuehē teyí jniñu néé. Te yáá yó cúu ñn parte lulí yíquī cúñu yō, te sáha jeē quívi ní yó cuēchi. Te infierno cúu jeē scuíquín jnūhun néé jíin yáá yó, te yáá yó scuíquín cuehē jniñu néé ní tiempo jeē iyó yó ini ñayívi. ⁷ Te ñayuu chí cuu snáhnú i tācá quiti jíin saa jíin cóo jíin quiti ñuhūn nuū mar, te je ni snáhnú i cuehē tī. ⁸ Te ni ñn ñayuu ma cúu condito i yáá i. Chi ñn jeē neé jéē ma cúu condito i cúu. Te nájnūhun yuhu cóo jeē ñuhūn chitú veneno jeē jéhni, súcuan cúu yáá yó. ⁹ Jíin yáá yó chíñuhún yó Tatá yō Yaā Dios, te suni jíin yáá yó cahán ndevāha yo síquī ñayuu jeē ni sáha ya ánuá i nájnūhun íyó máá yá. ¹⁰ ñn-ni yuhu cáne jnūhun chíñuhún yó yá jíin jnūhun cáhān ndevāha yó. Ñánī mánī, tu íyó váha cuiñi jeē súcuan. ¹¹ ¿A ñn-ni tesōcó cáne ndute váha jíin ndute úvuá, chí naún? ¹² Ñánī mánī, ¿a cuu cuun ndehē oliva xinī yújnu higo, te á cuu cuun ndehē higo xinī yoyúcú uva, chí naún? Te suni súcuan ñn tesōcó ma cúu cane ndute úvuá jíin ndute váha.

Jnūhun ndíchí jéē véji nuū Yaā Dios

¹³ Te núu ndé ñn ró ndíchí te jécūhun vāha ni, núu súcuan te jíin jéē jíca ndaā rō steén rō jeē súcuan cúu ró. Te na cóo suchí ni rō modo jeē jéhe jnūhun ndíchí yá. ¹⁴ Te núu cácuésún teyí ni rō te ndúcú ró jéē cujéhnu máá ró, núu súcuan te ma cutéyí ró cani ni rō jeē ndíchí ró. Chi suu cúu jeē stahú ró, te cúu ró contra síquī jnūhun ndaā.

15 Chi ñayuu cándāa súcuan, nasūu núu Yaā Dios vēji jeē ndichí i. Chi cuenta ñayīví, jíin cuenta anuá neé ñáyuu, jíin cuenta maá jéxeén cúu. 16 Chi nuū iyó ñáyuu cucuésún ni jíin ñáyuu nducú jéē cujéhnū máá, suni yūcuan iyó jnúhun sáca núu jíin táca jniñu neé. 17 Te jnúhun ndichí jeē vēji nuū Yaā Dios, núu ni sáha jeē ní ndundichí ñáyuu, yūcuán na te iyó ndoo ánuá i. Te suni yúcu manī i jíin jnáhan i, te vītá ni i, te tú nīhni ni i. Te cúndáhú ni i jnáhan i, te sáha i jniñu váha. Te suni iyó ndāá i, te tu stáhú i. 18 Te ñayuu cáyūcu mánī jíin jnáhan, jíin jnúhun manī casáha i táca jniñu ndaā, te nanihīn i jeē quéndōo ndaā i.

Jeē ma cutóo ni yō jeē iyó ini ñayīví

4

1 ¿Te ndese quéjéé jéē cájejnáhan ró jíin jéē cátejnéhan ró? Quéjéé síquī jeē cándiyo neé ni rō, te yōhyo scánda ini anuá rō. 2 Chi cándiyo ni rō, te tu cánevāha ró, te suu sáha jeē cájehni rō ndīyī. Cándiyo ni rō jeē névāha jnáhan ró, te tu níhín rō, te suu sáha jeē cátejnéhan ró te cájejnáhan ró. Te tu cánihīn rō jeē cuní rō, chí tu cájicān rō nuū Yaā Dios. 3 Te núu cájicān rō, te tu cánihīn rō, chí tu cájicān vāha ró, chí mánī jeē cusī ni maá ró cúu jeē cájicān rō nuū yā. 4 Ñayuu castóo Yaā Dios cácuu ró. ¿A tu cájini rō jeē núu cutóo ni rō jeē iyó ini ñayīví, yūcuan cúu jeē cájito uhū rō Yaā Dios? Chi ñayuu jeē cutóo ni jeē iyó ñayīví, ndúu i ñayuu jíto uhū nuū Yaā Dios. 5 Te tu cáhán saá-ni jnúhun yáha jéē yosó núu tútu i: Máá Espíritu jeē ni jéhe Yaā Dios jeē ndeé ini yō, cúcuñí ni yā jeē súcuan casáha yó, chí manī yā jíin yó, achí. 6 Te jeē váha ni Yaā Dios, te jéhe ya fuerza ini yō jeē ma sáha yó súcuan. Chi cáhán tutu i: Yaā Dios jési yā nuū ñáyuu casáha téyí máá, te vāha ni yā chindéé ñáhán yá ñayuu casáha suchí máá, achí. 7 Núu súcuan te cuandetū rō nuū Yaā Dios. Te cuiñi níhin ró jéē ma cuátáhú ró jexeén, te cunu coto róhó jíjnáhan ró. 8 Manī gā coo ró jíin

Yaā Dios, te víhyá gā steén yā jeē manī yā jíin ró. Róhó jéē casáha cuēchi, na sándoo ró máá ró, stóo ró cuēchi. Te róhó jéē cácuu rō coo manī rō jíin Yaā Dios níni jéē cácuu rō cutóo ni rō jeē iyó ini ñayīví, na sándoo ró ánuá rō jeē tuá coo ró súcuan. 9 Na jnáhuhū ni rō, te cucuíhyá ni rō, te na ndáhyú rō síquī jeē iyó cuēchi ró. Te vēsú ni cajecū rō, te vijna na ndáhyú cohó ró. Te vēsú ni cacusī ni rō, te vijna na ndúcuíhyá ni rō. 10 Na sásuchí ró maá ró nuū Yaā Dios, te sájéhnū ya rohó.

Ma cóndihvī ni yō síquī cuēchi jnáhan yó

11 Hermano jíjnáhan ró, ma cahán neé ró síquī jnáhan ró. Chi tēe jeē cahán neé síquī jnáhan, chí jéē ndihví ni síquī cuēchi jnáhan, nájnūhun jeē síquī ley yā cahán neé de, chí tu squícu de ley jeē cundáhú ni yō jnáhan yó, te nájnūhun cáhán de jeē tu iyó ndāá ley yā. Te núu cáhán rō jeē tu iyó ndāá ley yā, núu súcuan te nasūu jéē squícu ró, chí sa jeē cahán rō síquī. 12 Iyó ñin-ni Yaā jeē ni jéhe ley, te máá-ni ya cúu jeē sándaā síquī cuēchi. Te jnama ya ñayuu cácuu jéhe te snáhnú ndetū yā ñayuu tu cácuu jéhe. Núu súcuan ¿te na jniñu ndíso ró jéē sándaā rō síquī jnáhan ró?

Tú vāha jeē satéyí yó maá yó

13 Vijna te cáhán rī jíin róhó jéē cácahān: Vijna chí sájnē te quihīn yō ñuu yúcuu, te coyūcu yó ñin cuiyā, te cuaan yó xíco yó, te níhín yō síquī, achí ró. 14 Te tu jíin cuiñi rō ndese coo sajnē. ¿Chi na vé va víhí cúu vida rō? Cúu nájnūhun ñin vicō nūhún jéē ñin núnúu-ni núcūhun, te yūcuán na te ndéchí-ni cuahān. 15 Chi sa vāha ga na cáhán rō: Núu cuní maá Jítoho yō te cotecu yō te sáha yó jéē yáha chí jéē yúcuu, achí ró. 16 Te sa suhva mánī cácutéyí ni rō cácahān rō. Te tú vāha jeē súcuan cácutéyí ni rō. 17 Te núu ñin ñayuu jíin i sáha i jniñu váha, te núu tu sáha i, te cuēchi cúu núu súcuan.

Jnúhun cáhán nuū tēe cúca

5

¹ Te cáhán rī jín táca róhó téé cúcá, jéé na ndáhyú rō te ndahyū cohó ró síquī jnūndóho jeé quíji nuū rō. ² Chi ndajniñu cúcá cánevāha ró, je téhyú. Te sahma váha ró, je téé tiquíxin. ³ Te oro jín plata cánevāha ró, chí je cáne xehyu. Te xehyu un stéén jeé ní casáha ró jniñu stáhú jín xúhun ró. Te yūcuan cúu jeé ndúnihín cuēchi síquī rō, nájñuhun ññuhūn jeé snáá yiqui cúñu rō. Chí ni cacaya cuehē rō ndajniñu váha quivī cuándihí yáha. ⁴ Te táca téé ni cajehnde trigo rō, tu ní cáchunaa váha ró yáhu de. Te vijna cácana jee de nuū Yaā Dios, Yaā cúu Jitoho nuū táca ndajéhé andiví, jeé súcuan ní casáha ró. Te jini sōho ya jeé cácana jee tēe ni cajehnde ún. ⁵ Cátecu váha ndasí ró ini ñayiví yáha, te casáha ró táca jéé cácusī ní maá ró. Te cájito yúcún ró maá ró, te cúu ró nájñuhun quiti néñu jeé ndétu quiví cúu. ⁶ Te ní catee ró cuēchi síquī ñayuu ndaā, te nde ní cajehni rō i. Te tu ní cúu casi i jeé casáha ró.

Jeé na cóo paciencia ni yō te cacān tahú yō

⁷ Hermano, núu súcuan te coo paciencia ní rō condetu ró ndé quiví ndíji máá Jitoho yō. Tēe sájniñu ñuhun, cánuú coo paciencia ní de condetu de nde quíji saū néhen jín saū néñu isa, te sáá te nihín de nuní váha jeé jéhe itu. ⁸ Te suni súcuan coo paciencia ní rō, te ndeyí coo ní rō condetu ró, chí cuacuyajni ndee maá Jitoho yō. ⁹ Te ma cahán sōo ró síquī jeé sáha jnáhan ró, hermano, návāha ma jécondee cuēchi síquī rō. Chí máá Yaā jeé sándaā cuēchi, je yajni ndíji ya. ¹⁰ Ñánī mánī, conahan ró jijnáhan ró ndese ní casáha tēe ní canacani jñuhun máá Jitoho yō nde jenahán, chí ní cacuu de ññ ejemplo nuū yō. Chí vésú ní candoho de, te ní iyo paciencia ní de. ¹¹ Te cáhán yō jeé ñayuu cájendeyí ní jín jnūndóho, ndetū cúu i sáha Yaā Dios. Chí ní cajini ró jñuhun ndese ní jendeyí ní Job jín jnūndóho, te suni cájini ró jeé yóhyo váha ga ní

quendōo de ní sáha máá Jitoho yō ná ní yáha jnūndóho. Chí yóhyo cúndáhú ní yā yohó, te váha ndasí ní yā jín yó.

¹² Ñánī mánī, jeé cánuú gá cúu jeé ma cahán cáha ró síhví Yaā Dios jín jñuhun cácahán teyí ró. Ma cahán rō verdad de Dios, Yaā ndeé andiví, ní ma cahán rō verdad de Dios, Yaā chí ñayiví, te ní ññ ga jñuhun súcuan ma cahán teyí ró. Chí núu cahán rō jeé cuu, te súcuan-ní cahán rō. Te núu cahán rō jeé tuú, te súcuan-ní cahán rō, ma scáa gā rō cahán rō, návāha ma ndénehen Yaā Dios cuēchi síquī rō.

¹³ Te núu iyó ññ ró jéé ndóho jnūndóho, te na cácan tahú rō. Te núu iyó ññ ró jéé cúsi ní, te na cáta ró yaa jeé chiñuhún ró yá. ¹⁴ Te núu iyó ññ ró jéé cuhú, te na cána ró téé jéñu cándito ñayuu cácandíje. Te na cácan tahú de jehē ñayuu cuhú. Te jín síhví máá Jitoho yō na chíhi de aceite i. ¹⁵ Te núu cácandíje de jeé sáha Jitoho yō jeé cájicān tahú de, yūcuán na te jnama ya ñayuu cuhú. Chí nasávāha ya i, te núu ní sáha i cuēchi, te cone cáhnu ní yā nuū i. ¹⁶ Núu súcuan te nacani ndaā rō cuēchi ró núu jnáhan ró, te cacān tahú rō jehē jnáhan ró návāha nduvāha ró jijnáhan ró. Chí núu ññ tēe ndaā ndíhví ní de jicān tahú de, te yóhyo váha níhín jniñu, chí sáha ya jeé jicān de. ¹⁷ Chí Elías, tēe ní nacani jñuhun Yaā Dios jenahán, suni ññ tēe jeé nájñuhun iyó máá yó ní cuu de. Te ní jicān tahú ndasí de jeé ma cúun saū, te tu ní cúun saū uní cuiyā iñu yō. ¹⁸ Yūcuán na te ní jicān tahú tucu de, te ní cuun saū, te ní canecoo tucu táca jéé jéhe ñuhun. ¹⁹ Ñánī mánī, núu ññ ró ní stóo ichi ndaā, te núu ññga rō nachuhichí ró jnáhan ró, ²⁰ núu súcuan te cuni rō jeé núu ní nachuhichí ró tēe ní quiví cuēchi, te je ní jnama ró de jeé jnahnú ndetū de núu, te súcuan iyó jñuhun cáhnu ní nuū cuehē cuēchi de.

CARTA HN JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Pedro, apóstol jeē ní tají Jesucristo, te téé rí carta yáha cuájeē nuū rohó ñayuu ní cajitē núu, te cáyūcu jíca ró ní Ponto, Galacia, Capadocia, Asia, jíin Bitinia. ² Te máá Tátá yō Yaā Dios ni nacāji ya rohó, chi súcuan ni tee ni yā nde ná tu jecōo ñayīví. Te jíin Espíritu Santo ni sáha ya jeē iyó ndoo iyó íi rō cájetáhú ró núū yā, te ni nacate ya anuá rō jíin níñi Jesucristo. Te ñūhun ni rī jeē na cáyá gā tāca jēé váha jeē sáha ya rohó, jíin jēé coo ndeyí coo sīi ni rō jíinahan ró.

Jeē ñūhun ni yō tāca jēé váha jeē cóo andiví

³ Na cáhán yō jeē yóhyo cújéhu Yaā Dios, Yaā cúu Tátá maá Jítoho yō Jesucristo. Chi ni cundáhú ndasí ni yā yohó, te ni sáha ya jeē ní nacacu jeé yó, síquī jeē ní natecu Jesucristo mēhñu ndiyí. Te jeē yúcuan níni cáñuhun ni yō tāca jēé váha jeē coo. ⁴ Chi nihīn rō tahū jeē ñūhun váha ini andiví jeē cúu ró jíinahan ró. Te tahū un má náā cuítī, ni ma tívi cuítī, ni ma ndīhi cuítī. ⁵ Chi cácandije ró jēé sáha Yaā Dios jehē rō, te jeē yúcuan ndíto ya rohó jíin poder yā, návāha jnama ya rohó quívī sándīhí, chi ni sándaā yā jeē súcuan coo.

⁶ Jeē yúcuan cácusīi ndasí ni rō, vēsú cájito ró cuéhē ndinuū jnūndóho jecu-ni quívī. ⁷ Chi nájnūhun jeē stuhvá ñayuu oro jíin ñūhūn, jíto ndee i núu jeē váha cúu, suni súcuan cánuú coto ndee jnūndóho róhó núu cácandije níhin ró chí tuú. Chi jeē cácandije níhin ró, chi yahu ndasí gá cúu vēsú oro, ndajniñu jeē náā. Te yúcuan cúu jeē cuajnúhún yá rohó, te sájéhu ya rohó, te squéndōo yíñúhún yá rohó quívī quenda ndijin Jesucristo.

⁸ Te vēsú tu ní cájito ró núū yā, te cáhīyo manī ndasí ró jíin yá. Te cácandije níhin ró yá vēsú tu cájito ró núū yā vijna. Te yóhyo luu cácusīi ndasí ni rō, chi nde tuá níhín cuítī yō jnūhun castūhun yó ndese cúsi ni yō. ⁹ Te nihīn tahú rō jeē cācu ánuá rō, chi jeē yúcuan cúu jeē cácandije ró.

¹⁰ Te tēe ni canacani jnūhun Yaā Dios nde jenahán, ni cananducú yúcún de ní cacajnúhun váha de síquī jnūhun ndese jnama ya yohó. Te ni cacachi de ndese sáha Yaā Dios jeē váha róhó jíinahan ró. ¹¹ Chi nde ná tu coo, te ni steén Espíritu Cristo nuū de jíinahan de ndese quiji jnūndóho síquī Cristo jíin ndese luu ndujéhu tucu ya jeē yáha jnūndóho ún. Te ni cananducú yúcún de jeē na jécūhun ni de ndé quívī quiji Cristo te ndese coo tāca jēé ní cáhān maá Espíritu jeē ndeé ini de. ¹² Te ni steén Yaā Dios nuū de jeē násūu máá de coto jniñu jeē ní canacani de ún, chi sa máá yó cúu jeē cóto. Te vijna je ni cajini sōho máá ró jnūhun ún, chi tāca téé nácani jnūhun jnama ya yohó, ni canacani de nuū rō, ni sáha poder Espíritu Santo jeē ní quiji ichi andiví. Te jnūhun ún chi nde maá ndajéhé Yaā Dios cánanducú návāha na jécūhun ni.

Cúni yā jeē coo ndoo ánuá yō

¹³ Jeē yúcuan ndito na cóo xinī rō jíinahan ró, te cájí coo ni rō. Te cocuhun ndasí ni rō jeē níhín rō tāca jēé váha jeē sáha Yaā Dios rohó quívī quenda ndijin Jesucristo. ¹⁴ Te na cúu ró séhe jeē cájetáhú váha. Te ma sáha ga rō tācá jniñu jeē ní cacusi ni rō sáha ró nde ná tu jecūhun ni rō jnūhun Yaā Dios. ¹⁵ Chi sa suhva na cóo ndoo ánuá rō jíin táca jniñu casáha ró, chi Yaā ní cana róhó, Yaā iyó ndoo cúu ya. ¹⁶ Chi súcuan cáhán tutu íi: Na cóo ndoo ró jíinahan ró, chi ruhū iyó ndoo ri, achí yá.

¹⁷ Te núu cácahān rō Tátá rō jíin Yaā Dios, núu súcuan te na cáca yíñúhún ró nuū yā tāca quívī jēé cájica ró ñayīví yáha. Chi máá yá sándaā síquī ndese ni casáha ñn ñn yó, te tu sáha ya

cuenta ndese cúu ñn ñn yó, chi inuú sáha ya jíin ndíhi yó. ¹⁸ Chi ni jnama ya rohó núu tācá costumbre jeē ní cajequin jíi rō, jeē ní cajejníñu cāha rō núu. Te cájini vāha rō jēe yahu cúu jeē ní jnama ya rohó. Chi tu ní chúnaa yā jíin ndajníñu jeē nāa, nájnūhun oro jíin plata, ¹⁹ chi sa suhva jíin níñi Cristo jeē yahu ndasí gá cúu. Chi ni socō yā maá yá nájnūhun ñn londe, quiti íyó vāha íyó ndoo. ²⁰ Chi jeē yúcuan ní jeni Yaā Dios maá Cristo nde ná tu jecōo ñayiví, te ni cane ndijin Cristo maá tiempo cuándíhi yāha, návāha quendōo vāha ánuá rō jijnáhan rō. ²¹ Te jeē jíin Cristo te cávandíje rō Yaā Dios. Chi ni sáha Yaā Dios jeē ní natecu yā mēñu ndíyi jíin jēe ní ndujéhu ya. Te jeē yúcuan cávandíje rō Yaā Dios, te cáñuhun ni rō coto rō yá.

²² Te vijna chi je ni candundoo ánuá rō, chi ni cajetáhú rō jnūhun ndaā ni sáha Espíritu jíin rō, návāha cundáhú ndije ni rō hermano cávandíje. Núu súcuan te na cundáhú ndasí ni rō jnáhan rō nde jíin ini jíin ánuá rō. ²³ Chi je ni canacacu jeé rō, te nasūu chíji yucūn ñayuu jeē cúu. Chi sa jnūhun Yaā Dios jeē ndíto técu ní cáni ni sáha jeē ní nacacu rō. ²⁴ Chi súcuan cáhán tutu i:

Nájnūhun yucū cúu ndíhi tāca ñáyuu, chi jecu-ni quiví técu i.

Te nájnūhun ita yucū cúu jeē kujéhu i.

Chi íchí-ni yucū, te ndáhvá-ni ita.

²⁵ Te jnūhun Jitoho yō Yaā Dios, sa quéndōo ní cáni. Achí tutu. Te jnūhun un cúu máa jnúhun jnáma ya yohó jēe ní canacani ri nuū rō.

2

¹ Núu súcuan te na siáá rō tācá jniñu née, tāca jēe stahú, jēe tú ndije, jeē cucuésún ni, jíin jēe sajnúhún síquī jnáhan. ² Te nájnūhun sūchi yíquīn sá ní cacu jeē jéxin te jéhu, súcuan na cóndihvī ni rō scuáha rō jnúhun ndaā yā, návāha cuehnu rō jíin te cācu ánuá

rō. ³ Chi je cájini rō jeē yóhoyo vāha ni maá Jítoho yō.

Cristo cúu nájnūhun yuū yítuu vehe

⁴ Núu súcuan te manī gā coo rō jijnáhan rō jíin Jítoho yō Cristo. Chi cácuu rō nájnūhun templo nuū ndeé Yaā Dios, chi ndeé yá ini anuá rō. Te Cristo cúu nájnūhun ñn yuū cánuú gá jeē yítuu yíquī templo, te sáha ya jeē cótecu rō ní cáni. Te ñayuu vēsú ni casquéhichī i ya, te Yaā Dios chi je ni nacāji ya Cristo chi cánuú ndasí yá, nájnūhun nacāji yó ñn yuū vāha jeē quítuu yíquī vehe. ⁵ Te máa rō chí cácuu rō nájnūhun ñn ñn yuū jeē cúvāha templo Yaā Dios, te cotecu rō ní cáni. Te na cuáha rō jnúhun jeē sama ya rohó jijnáhan rō jēe cúvāha templo yā, cúu jeē ndeé Espíritu yā ini anuá rō nájnūhun ini ñn templo. Te suni cúni Yaā Dios jeē cuu rō sūtū cáhīyo ndoo cájejníñu nuū yā. Chi síquī jeē ni sáha Jesucristo jehē rō, te na sócō rō maá rō jeē cuajníñu rō núu yā sáha rō táca jniñu vāha jeē nújnahan ni Yaā Dios. ⁶ Chi súcuan cáhán tutu i:

Vijna te nde ñuu rī Sion jéquin rī ñn yuū jeē cánuú gá jeē quítuu yíquī vehe,

chi ni nacāji ri yā nájnūhun ñn yuū vāha jeē cánuú téyí.

Te ñayuu jeē candíje i ya, jnama nahín yá i.

Achí Yaā Dios, áchí tutu. ⁷ Te máa rō jeē cávandíje rō, chí yuū vāha jeē cánuú téyí cúu ya nuū rō. Te nuū ñáyuu tu cávandíje chí tuú, chí sa cúndaā jeē cahán tutu i:

Máa yúu jeē ní casquéhichī tēe cásama vehe,

suu cúu yuū cánuú gá yítuu yíquī vehe.

⁸ Te suni cúndaā jnūhun jeē cahán tutu síquī ñayuu tu cávandíje:

Cúu ya nájnūhun ñn yuū jeē cácachihí i jehē i,

nájnūhun toto jeē cotúu i sáha.

Achí. Chi jeē cácachihí i jehē i cúu jeē casánihni ni i nuū jnúhun ya. Te je ni cundaā jeē jnahnú ndetū i síquī jeē cáacunihni ni i.

Jñūhun ñayuu maá Yaā Dios

⁹ Te maá ró cácuu ñayuu jeē ní nacāji Yaā Dios. Te suni cácuu ró sūtū cájejniñu nuū maá Yaā cúu Rey, te ñayuu cáhīyo ndoo, jíin ñayuu maá yá cácuu ró. Súcuan ni sáha Yaā Dios rohó návāha nacani ró jñūhun ndese yōhyo jéhnū jniñu sáha ya, chi maá yá ni cana rohó ná ni coyūcu ró nájñūhun nuū néē. Te ni squívicoo ya rohó núu luz yā jeē yóhyo vāha stéén yā ini anuá rō. ¹⁰ Chi nde saá te nasūu ñayuu Yaā Dios cácuu ró, te vijna je ni nduu ró ñayuu maá yá. Te nde saá chi ná tu cundáhú ni yā rohó, te vijna je cundáhú ni yā rohó jíjnáhan ró.

Jeē cuajniñu vāha yó núu Yaā Dios

¹¹ Nánī mánī, ini ñayīvi yáha cácuu ró nájñūhun ñayuu ñuu jicá jéē cájica cuu tátú. Núu súcuan te cáhán ndahú rí jíin ró jéē ma sáha ró táca jniñu jeē ndíyo néé ni rō jíin modo maá ró. Chi tēcá un cájejnáhan jíin ró, ndúcú jéē jnahnū ndetū anuá rō. ¹² Te ndaā na cáca ró méhñu ñayuu tu jíin jñūhun Yaā Dios. Chi vēsú cácahān i siquī rō, nájñūhun cácahān i siquī ñayuu casáha jniñu néé, te núu na cóto i jniñu vāha casáha ró, te quívī sándaā Yaā Dios jniñu te cahān i jeē yóhyo cújéhnū ya.

¹³ Jeē siquī maá Jítoho yō te cuatáhú ró nuū tāca tóhō cándiso jniñu nuū ñayuu. Cuatáhú ró nuū maá rey, chi tēē cújéhnū ga cúu de. ¹⁴ Te cuatáhú ró nuū tēcá gobernador jeē ní jeni rey návāha stóho de ñayuu casáha jniñu néé te cuajnúhún de ñayuu casáha jniñu vāha. ¹⁵ Chi cúní Yaā Dios jeē sáha ró jniñu vāha, te jeē súcuan sáha ró te tēcá ñayuu canéé jéē tu cájecūhun ni, casi i yuhu i.

¹⁶ Te na cáca ndaā rō jeē cácuu ró ñayuu ni nduu libre anuá, te nasūu jéē ní nduu libre rō jeē sáha ró jniñu néé. Chi sa cácuu ró mozo Yaā Dios, te cuajniñu vāha ró núu yā. ¹⁷ Coo respeto rō nuū tēcá ñayuu. Cundáhú ni rō hermano cácañdije. Conso īyo ró núu Yaā Dios. Coo yíñúhún ró nuū maá rey.

Jeē na ndóho yó jéē jnáhan yó nájñūhun ni ndoho Cristo

¹⁸ Rohó jéē cácuu mozo, cuatáhú ró nuū patrón rō, te coo respeto rō nuū de. Te nasūu maá-ni nuū tēē vāha ni jíin tēē vītá ni, chi suni nuū tēē xeēn ni. ¹⁹ Chi ñin jeē vāha cúu núu jéndeýí ni ñin tēē jeē stóho cáha ñayuu de siquī jeē squícu de nuū Yaā Dios. ²⁰ Chi núu cástóho i rohó jéē casáha ró cuēchi, te ni ñin ma cuajnúhún rohó núu jéndeýí ni rō jíin jeē ndóho ró. Te núu cástóho i rohó jéē casáha ró jniñu vāha, te núu jéndeýí ni rō jíin, yāha cúu jeē vāha jeē nújnahan ni Yaā Dios. ²¹ Chi jeē yúcuan cúu jeē ní cana ya rohó jíjnáhan ró. Chi suni maá Cristo ni ndoho ya jeē siquī rō, te súcuan ni cuu ya ñin ejemplo nuū rō jeē na ndóho ró jéē jnáhan ró, te súcuan condiquīn rō ichi ya. ²² Te maá yá tú cuítī na cuēchi ní sáha ya, ni tú cuítī na jñūhun stáhú ní cáhán yā. ²³ Ná ni cacahān neé i nuū yā, te tu ní nácahān neé yá. Te ná ni castóho i ya, te tu ní téjnáhan ya jíin i, chi sa ni chihī ya maá yá ndaha Yaā Dios, Yaā sándaā vāha siquī ndihī ún. ²⁴ Te ni condiso maá Cristo cuēchi yó jíin yiquí cúñu yā ná ni jihī yā jicá cruz, návāha quenda yó chíji cuēchi te caca ndaā yō. Chi ni tujī yā, te jeē yúcuan ní canduvāha ánuá rō. ²⁵ Chi ni casana ró nájñūhun lanchi, te vijna je ni candicó ró ni ndīvicoo ró núu Cristo, Yaā cúu pastor rō te ndíto vāha ya anuá rō.

Ndese cánuú coyūcu vāha yī jíin ñasihí

3

¹ Suni súcuan rohó ñasihí jíjnáhan ró, cuatáhú ró nuū yī ró, návāha núu cúu de tēē tu cándije jñūhun ya, te cuu scándije ró de, jeē tuá niní jíin jéē cahán rō, chi maá jíin jéē casáha vāha ró. ² Chi cuni de jeē cájica ndaā rō te cáhīyo respeto rō. ³ Te jeē casáha luu ró maá ró, chi nasūu máni maá ichi siquī rō sáha ró, jeē sáha luu ndasí ró xinī rō, chí jéē cúhun ró siquī oro chí sahma vāha ga. ⁴ Chi sa nducú ró jeē quéndōo luu ánuá rō, te coo luu ró

in modo jeē ma náā cuiti, suu jeē cóo vītá ni rō te coo nahín ni rō. Chi yāha cúu jeē yahu ndasí gá nuū Yaā Dios. ⁵ Chi ñahan ní cahīyo ndoo ánuá nde jenahán, suni súcuan ni casáha luu ña ánuá ña. Chi ni cañuhun ni ña Yaā Dios, te ni cajetáhú ña nuū yī ña. ⁶ Te súcuan ni sáha Sara, chi ni jetáhú ña nuū yī ña Abraham, te ni cahān yīñúhún ña jíin de. Te róhó jíinahan ró, núu sáha vāha ró te núu ma yūhu ró ni in, yūcuán na te coo ró nájnūhun ni Iyo Sara.

⁷ Te suni súcuan róhó yī, na cóo vītá ni rō jíin ñasihí ró. Te yīñúhún coo ró jíin ña, síquī jeē núu ga fuerza ña vēsú rohó, te suni síquī jeē inuú ní canihín tahu rō cotecu rō ní cáni síquī jeē váha ni Yaā Dios. Te súcuan sáha ró návāha tú casi nuū jnúhun jíicán tahu rō.

Jnúhun ñayuu cándoho síquī jeē cájica ndaā

⁸ Núu súcuan te inuú na cáni ni rō jíinahan ró, te cucuíhyá ni rō jeē ndóho jnahan ró, te cundáhú ni rō i nájnūhun ñani rō. Te na cóo manī rō te caní suchí ni rō. ⁹ Núu casáha neé ñayuu jíin ró, te ma nasáha neé ró jíin i. Te núu cácahān neé i nuū rō, te ma nácahān neé ró núu i. Chi sa suhva cacān tahu rō jeē na quéndōo vāha i. Chi Yaā Dios ni cana ya rohó jéē suni súcuan quéndōo vāha ró. ¹⁰ Chi súcuan cáhán tutu i:

Ñayuu cácuni cotecu vāha te cusī ni tāca quívī,
na cóto i yuhu i jeē ma cáhán neé i,
te na cóto i jeē ma cáhán i jnúhun stáhú.

¹¹ Na cújiyo i nuū jniñu neé, te na sáha i jniñu váha.

Na ndúcú i coyūcu mánī i, te na cóndihvī ni i jíin.

¹² Chi máá Jítoho yō ndíto ya ñayuu ndaā,

te jíni nahín yá jeē cájicān tahu i.
Te ñayuu casáha jniñu neé, chi tu jétáhú yá i.

Achí tutu.

¹³ Te ni in ma sáha neé jíin ró te núu mánī jniñu váha cándihvī ni rō sáha ró. ¹⁴ Te vēsú núu ndóho ró síquī jeē

cájica ndaā rō, te yōhyo ndetū cácuu ró. Núu súcuan te ma yūhu ró coto ró i, ni ma cunéé ni rō. ¹⁵ Chi sa jíin ini jíin ánuá rō chiñúhún ró maá Jítoho yō Cristo. Te níni coo tūhva ró nastió cuíñí vīta ró te cahān yīñúhún ró jíin ñayuu jeē castíhí rohó síquī tāca jéē cañuhun ni rō. ¹⁶ Te caca ndaā rō jeē tú na cuēchi condee anuá rō, návāha ñayuu cácahān neé síquī rō, cucanu i jeē ni stáú yáhu i róhó jéē cájica ndaā rō chi cácañíje ró Cristo. ¹⁷ Chi núu cúní Yaā Dios te vāha ga jeē ndóho ró síquī jeē casáha ró jniñu váha vēsú síquī núu sáha ró jniñu neé.

¹⁸ Chi máá Cristo suni ni ndoho ya, te in jínu-ni ni jihī yā jeē síquí cuēchi ndihī yó. Yaā vāha cúu ya, te ni ndoho ya jehē yohó ñayuu ní casáha jniñu neé, návāha quívicoo yó núu Yaā Dios sáha ya. Chi ni jihī yíquí cúñu yā, te ánuá yā chi técu-ni ní cáni. ¹⁹ Te ná ni jihī yā te ni jehēn anuá yā ni nacani ya jnúhun nuū anuá ñayuu cáyindihyū.

²⁰ Chi nde jenahán tu ní cájetáhú i, ná ni Iyo paciencia ni Yaā Dios te ni condetu ya níni sáha Noé barco jeē naní arca. Te jíin arca un ní cácu jecu-ni ñayuu, chi unā-ni i ni cácu nuū ndúte.

²¹ Te nájnūhun ni cacācu i nuū ndúte, súcuan cúu jeē jéndute yó vijna te cácu ánuá yō. Te jeē jéndute yó, nasūu jéē ndúndoo yíquí cúñu yō, chi sa jeē jíicán yō nuū Yaā Dios jeē ndúndoo ánuá yō. Te súcuan te cácu yó, chi ni cundúú yó jíin Jesucristo nuū jnúhun ni natecu yā. ²² Te ni ndaa ya cuanuhun yā andiví, te ndéé yá ichi ndávāha Yaā Dios nuū cujéhnu ya. Te tācá ndajéhé andiví, jíin jéē cándacu jniñu, jíin jéē cájni poder, cájendetū nuū yā.

Jeē na cuájniñu yó jíin táhū jeē ni jéhe ya nuū yō

4

¹ Núu súcuan te nájnūhun ni ndoho Cristo jehē yō jíin yíquí cúñu yā, suni súcuan na táva ni maá ró ndoho ró. Chi ñayuu jeē ní ndoho jíin yíquí cúñu, tuá sáha i cuēchi. ² Núu súcuan te ní tiempo jeē cuahán gā rō, na sáha ró jniñu jeē cúní Yaā Dios, te ma sáha ga

rō jniñu jeē ndíyo neé ni rō jíin modo maá ró. ³ Chi nde ní véji ró, te ni casáha ró cuéhē cuēchi jeē cánujnahan ni rō siquī jeē tu ní cájini rō jnūhun Yaā Dios. Te tiempo un máni máá jéē neé ni casáha ró, te ni candiyo ni rō tāca jéē neé, ni canajini ró, ni casáha ró vico neé, ni cajihí ndasí ró nuū víco ró, te ni cachiñúhún ró ídolo jeē ni cáhān Yaā Dios jeē ma chíñúhún yó. ⁴ Te cáacunéé ni i jeē tuá cájica ró jíin i jeē sáha ró táca cuēchi xeēn jíin i. Te jeē yúcuān cúu jeē cácahān neé i siquī rō. ⁵ Te máá i chi ñn quivī te nacuaāha i cuenta nuū maá Yaā jeē iyó túhva ya sándaā yā jniñu ñayuu técu jíin ñáyuu ní cajihī. ⁶ Chi jeē yúcuān suni ni quiji jnūhun vāha ya nuū tāca ndíyi ná ni cotecu i. Te ni cundaā siquī cuēchi ni casáha i ñayivī yáha, nájnūhun cundaā siquī ndihī ñayuu, návāha nacani ni i te cotecu anuá i ní cáni nájnūhun técu Yaā Dios.

⁷ Te je cuacuyajni quivī jeē náā tāca jéē iyó. Núu súcuān te ndito na cóo xinī rō jijnáhan ró, te condihvī ni rō cacān tahú rō. ⁸ Te jeē cánuú gá cúu jeē cundáhú ndasí ni rō jnáhan ró. Chi núu cundáhú ni yō jnáhan yó, te iyó jnúhun cáhnu ni nuū cuehē cuēchi. ⁹ Sáha vāha ró jíin ñáyuu jeē jinú i vehe ró, te ma cúxī ni rō. ¹⁰ Tāca ró cuajniñu ró núu jnáhan ró, núu ndese iyó máá táhū rō jeē ni jéhe Yaā Dios jeē cuajniñu ró núu yā. Te squícu vāha ró jíin táhū jeē sín sín ni jéhe ya nuū ñn ñn ró. ¹¹ Núu tahū jeē nácani ró jnúhun cúu, te na cáhān rō nájnūhun jeē maá Yaā Dios cahán. Te núu tahū jeē chindéé ñáhán ró jnáhan ró cúu, te na sáha ró jíin fuerza jeē ni jéhe ya nuū rō, návāha jíin ndihī jeē casáha ró te cahān ñayuu jeē yóhyo cújéhnu Yaā Dios siquī jeē ni sáha ya jíin Jesucristo. Te na cáhān yō jeē luu cújéhnu Cristo te jnī ya poder ní cáni. Amén.

Jeē ndóho yó siquī jeē candíje yó Cristo

¹² Nánī mánī, núu véji jnūndóho xeēn jeē coto ndee rohó, te ma cunéé ni rō cani ni rō jeē maá ró ni nihīn

jnūndóho xeēn gā. ¹³ Chi sa cusī ni rō jeē cándoho ró jecu jnūndóho jeē ní ndoho Cristo, návāha suni cusī ndasí ni rō quivī quénda ndijin yā jeē cujéhnu luu ya. ¹⁴ Te yóhyo ndetū rō te núu cácahān neé i nuū rō siquī jeē cácandíje ró Cristo. Chi máá Espíritu Yaā Dios jeē cujéhnu ndasí, ndéé yá ini rō. Máá i chi cácahān neé i siquī yā, te máá ró chi cáchiñúhún ró yā. ¹⁵ Te núu ndoho ró, te na ndóho ró síquī jeē cácandíje ró Cristo. Te ma ndóho ró síquī tāca cuēchi nájnūhun cándoho ñayuu jéhni ndíyi, ñayuu sacuíhná, ñayuu sáha jniñu neé, jíin ñáyuu quivī nduu nuū jniñu jnáhan jeē tu cánuú quivī nduu. ¹⁶ Te sa núu ñn ró ndóho siquī jeē candíje ró Cristo, te ma cúcanu rō, chi sa nacuatáhú ró nuū Yaā Dios siquī jeē cúu ró cristiano.

¹⁷ Chi je ni jinū quivī jeē quejéé sándaā Yaā Dios cuēchi, te xihna gā ñayuu cácuu sēhe ya sándaā yā cuēchi. Te núu xihna gā cuēchi máá yó quejéé yá sándaā yā, núu súcuān te xeēn gā coo jeē ndénehen ya cuēchi siquī ñáyuu jeē tu ní jétáhú jnúhun vāha ya. ¹⁸ Te núu yóhyo yí cácu ñayuu vāha, núu súcuān ¿te ndese cácu ñayuu casáha jniñu neé jíin táca cuēchi? ¹⁹ Núu súcuān te róhó jéē cándoho siquī jeē súcuān cúní Yaā Dios, ma jécuiñī rō sáha ró jniñu vāha, te na chíhi ró máá ró ndaha máá Yaā jeē ni sáha róhó, chi squícu ya jeē ni jéjnūhun ya.

Jeē jéhe de consejo ñayuu cácandíje

5

¹ Vijna te na cáhān rī jíin táca róhó téé jéhnu cándito ñayuu cácandíje, chi suni téé jéhnu ndíto ñayuu cácandíje cúu máá rí. Te cúu ri testigo jeē ní jito ri ndese ni ndoho Cristo. Te suni ndujéhnu ri jíin ró sáha Cristo quivī quénda ndijin yā. ² Na cóto yúcuān ró ñayuu jeē ndéé jniñu ró condito ró, jeē cácuu i nájnūhun lanchi Yaā Dios. Te na cúsi ni rō condito ró i, chi súcuān cúní Yaā Dios. Te nasūu siquī jeē sáfuerza yā rohó, ni nasūu siquī jeē nihín rō xuhún, chi sa siquī jeē cuní

rō cuajniñu ró. ³ Te nasūu jēē ndacu nīhin ró jniñu nuū ñáyuu cándito ró, chi sa nducú ró cuu ró ñn ejemplo nuū i jeē cácuu i lanchi ya. ⁴ Yūcuán na te quivī quēnda ndijin maá Yaā cúu Pastor cujéhnū nuū rohó téē cácuu pastor lanchi ya, te cuāha ya premio nuū rō jijnáhan ró jēē yóhyo luu te ma nāa cuiti.

⁵ Te suni róhó táca téē suchí, na cuándetū rō nuū tāca téē jéhnū jiñā. Te ndihí róhó ñáyuu cácandíje, cuandetū rō nuū jnáhan ró, te caní suchí ni rō. Chi suhva cáhán tutu:

Yaā Dios jési yā nuū ñáyuu casáha téyí máá,

te vāha ni yā chindéé ñáhán yá ñayuu casáha suchí máá.

Achí. ⁶ Núu súcuan te na cáni suchí ni rō, chi cáyihí ró ndaha Yaā Dios jeē jnī poder. Te sájéhnū ya rohó, na jínú maá quivī. ⁷ Tāca jēē cánacani ndasí ni rō siquī, chihí ró ndaha máá yá te máá yá coto, chi ndíto ya rohó.

⁸ Te cájí na cóo xinī rō te ndito coo ni rō. Chi jexeén jeē jíto uhū rohó, jíca cuu ndúcú squivī róhó jijnáhan ró núu cuéchi. Te xeēn gā sáha vēsú ndícaha jeē iyo ndáhyú. ⁹ Te cuiñi nīhin ró jēē ma cúndeyí jexeén jíin ró, te nīhin candíje ró jnúhun cundáhú ni yā rohó. Chi cájini rō jeē suni súcuan cándoho hermano rō jeē cáyūcu ní cáhnu ñayiví. ¹⁰ Te núu ni jīnu jeē ndoho ró jecu-ni tiempo, te Yaā Dios chi sáha ya jeē ije vāha ni rō jíin jnúhun ya, jíin jēē cuiñi nīhin ró, te cuāha ya fuerza ini rō, te quendōo cutú ró ní cáni. Chi máá yá cúu jeē sáha tāca jēē váha yóhó, te ni cana ya yohó jēē cujéhnū luu yó jíin yá ní cáni, siquī jeē nduú yó jíin Jesucristo. ¹¹ Te na cáhán yō jeē yóhyo luu cújéhnū ya te jnī ya poder ní cáni. Amén.

Saludo jeē sándihí

¹² Jíní rī jeē Silvano cúu ñn hermano jeē squícu vāha. Te máá de cuajeē nuū rō jíin carta yáha jēē ní tee ri jecu jnúhun. Te jíin yáha stíhví ni rī rohó, te cáhán rī jíin ró jeē ndaá cúu jeē tāca jēē váha ni sáha Yaā Dios rohó, suu stéén

nuū rō jeē cundáhú ndije ni yā rohó. Te na cuiñi nīhin ró jíin jnúhun yáha.

¹³ Ñayuu cácandíje jeē cáyūcú ñuu Babilonia, jeē ní nacāji ya i nájñūhun ni nacāji ya rohó, cácahān i jeē sándeyí ni rō. Te Marcos, téē cúu nájñūhun sēhe ri, suni súcuan cáhán de. ¹⁴ Te núu na cáhán rō jíin jnáhan ró, te techūhu mánī rō ndaha i.

Te na cóo ndeyí coo sīni ndihí ró jēē cáyihí ró ndaha Jesucristo. Súcuan na cóo. Amén.

CARTA UU JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Simón Pedro, te cúu ri mozo Jesucristo, te cúu ri apóstol jeē ní tají yá. Te tée ri carta yáha cuájeē nuū rō jijnáhan rō, jeē ni sáha Yaā Dios jeē inuú-ni jíin rí jijnáhan ri ni canihīn rō jnūhun luu váha jeē cá candíje yó yá. Chi Yaā ndaā cúu Yaā Dios, suu máá Jesucristo jeē jnáma yóhó. ² Te ñúhun ni rī jeē na sáha ga yā jeē váha ndasí róhó jíin jéē yóhoyo coo ndeyí coo sī ni rō siquī jeē cájecūhun váha ni rō ndese Yaā cúu Yaā Dios jíin Jítóho yō Jesús.

Siquī ndese cánuú coo ñayuu cá candíje

³ Te Yaā Dios, jíin poder yā ni jēhe ya nuū yō tāca jéē sáha jeē cúu caca ndaā yō nuū yā jíin jéē chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquī jeē yóhoyo cújéhnú ya jíin tāca jniñu jéhnú sáha ya. ⁴ Jeē yúcuan ní jejnūhun ya tāca jéē yóhoyo jéhnú yóhoyo váha sáha ya yohó, návāha jíin tāca ún te nduu ró nájñūhun íyó máá yá, te cācu ró núu jniñu jeē cándiyo néé ni ñayuu casáha i ini ñayīvi yáha. ⁵ Núu súcuan te na ndúcú ndeyí ró jíin jnúhun yáha. Te jeē cá candíje ró, te siquī ún na chisóó ró jeē caca ndaā rō. Te jeē cájica ndaā rō, te siquī ún chisóó ró jeē cóndihví ni rō jecūhun váha ni rō. ⁶ Te siquī ún chisóó ró jeē casi rō modo jeē cuní maá ró. Te siquī ún chisóó ró jnūhun cuandeyí ni rō, te siquī ún chisóó ró jeē chiñúhún váha ró Yaā Dios. ⁷ Te siquī ún chisóó ró jeē cóo manī rō jíin jnáhan rō, te siquī ún chisóó ró jeē cundáhú ni rō jnáhan rō.

⁸ Chi núu cayā tācá jniñu yáha jíin ró, te suu sáha jeē ma cótecu saá-ni ró, chi sa quee váha jniñu sáha ró, siquī jeē cájecūhun ni rō ndese Yaā cúu Jítóho yō Jesucristo. ⁹ Te ñayuu jeē tu

casáha jniñu yáha, nájñūhun jeē cáhīyo cuáá i, chi tu jécūhun ni i jnūhun ya, te je ni naa ni i jeē ni sándoo ya i tāca cuéchi ni casáha i ichi yátá. ¹⁰ Jeē yúcuan na ndúcú ndeyí ró hermano, návāha coo seguro jeē ní cana ya rohó jíin jéē ní nacāji ya rohó. Chi núu sáha ró tāca jniñu yáha, te ma cáca yátá cuiṭi rō. ¹¹ Yūcuán na te nune váha ichi quiví ró ini ñuu maá Jítóho yō Jesucristo, Yaā jnáma yóhó, nuū ndácu ya jniñu ní cáni.

¹² Jeē yúcuan ma jécuiñi rī sáha ri jeē núcūhun ni rō tāca jnúhun yáha, vésú je cájini rō te cáhīn nihin ró jíin jnúhun ndaā jeē cá candíje ró. ¹³ Chi jéni ni rī jeē iyó váha stihví ni rī rohó vijna técu gā rī, návāha nucūhun ni rō. ¹⁴ Chi máá Jítóho yō Jesucristo ni castūhun yá nuū rī jeē tuá cotecu nahán rí ñayīvi yáha. ¹⁵ Jeē yúcuan na ndúcú ndeyí gá rī stihví ni rī rohó, návāha núu je ni jihī rī, te níni nucūhun ni rō tāca jnúhun yáha.

Jeē ní cajito de jeē cújéhnú Cristo

¹⁶ Ná ni castéén rī jnūhun máá Jítóho yō Jesucristo nuū rō, ndese ndiji ya jíin poder yā, te tu ní cácahān rī ñn cuento-ni jeē ní catava ndichí ñayuu. Chi ná ni cahīyo ri jíin yá xinī yúcu, te ni cajito jíin núu rī jeē tucu ni nduu ya jeē ní nduloo jéhnú ya. ¹⁷ Chi ni cajini rī jeē Tatá yō Yaā Dios ni cahān yñúhún yá jíin Jesús, te ni sajehnú ya Jesús. Chi ichi ándiví ní quiji jnūhun luu, ni cahān Yaā Dios: Yáha cúu Sēhe ri jeē maní ndasí rí jíin, te cúsi ni rī jíin, áchí yá. ¹⁸ Te ni cajini sōho ri jnūhun un jéē ni cáhān ichi ándiví, chi ni cahīn ri jíin máá Jítóho yō xinī yúcu ií ún.

¹⁹ Te súcuan cájini yō jeē iyó ndaā ndije tāca jnúhun ni catee tée ni canacani jnūhun ya nde jenahán. Te váha jeē na chúhun ni rō jnūhun un jijnáhan rō, chi suu cúu nájñūhun ñn luz jeē cayú nuū néē, nde na cundijin quiví ndíji ya, te steén yā ini anuá ró nájñūhun jeē ndíndéé lucero. ²⁰ Te xīhna gā na jécūhun ni rō jeē ni ñn jnūhun cáhān tutu ií, nasūu jéē

súcuan-ni ni cajeni ni tēe cúu. ²¹ Chi tāca tēe ndoo jeē ní canacani jnūhun ya nde jenahán, tu ní cácahān cuiti de jnūhun jeē cúu ni maá de. Chi sa suhva ni canacani de jnūhun Yaā Dios jeē ni stéén Espíritu Santo nuū de.

Siquī tēe cástéén jnūhun stáhú
(Judas 4-13)

2

¹ Te mēhñu ñáyuu Israel ún suni ni cahīyo tēe ni canacani jnūhun stáhú. Te suni súcuan coo tēe stéén jnūhun stáhú méhñu ró. Te squívi de jnūhun stáhú jéē tívi ñáyuu sáha. Te ni ma cuajnúhún de Jitoho yō jeē jnáma ya de, te súcuan sáha de jeē jnahnú ndetū yachī de. ² Te cuehē ñáyuu condiquīn i modo neé jéē castéén de. Te sáha de jeē cahán neé ñáyuu siquī jnūhun vāha ya jeē cúu ichi ndaā. ³ Te siquī jeē cándiyo ni de xūhún, te quende de xūhun ró siquī jnūhun stáhú stéén de nuū ró. Te tu quíxín jnūndóho jnahnū ndetū de, chi nde jenahán je ndétu jnūhun ndonda ya siquī cuéchi de.

⁴ Chi tu ní íne cáhnu ni Yaā Dios nuū tēcá ndajéhé yā jeē ní casáha cuéchi, chi sa ni jnaa yā infierno cáyindihyū nuū néē, cánuhnī jín cadena. Te ni chindihyū yā nde quivī sándaā yā siquī. ⁵ Te suni tu ní íne cáhnu ni yā nuū ñáyuu jenahán, chi sa ni scúun ya saū xeén siquī ñáyuu ni casáha néē un. Te máá-ni Noé, tēe ni nacani jnūhun ndaā, ni scácu ya de jín úxā gā ñáyuu. ⁶ Te suni ni ndonda ya siquī cuéchi ñáyuu ñuu Sodoma jín ñuu Gomorra, te ni cayū ñuu i ni nduu máá yáa na. Te súcuan cúu i ñn ejemplo nuū tēcá gā ñáyuu sáha néē jéē quíji ga. ⁷ Te ni scácu ya Lot, chi tēe ndaā ni cuu de, te ní cucuíhyá ndasí ni de ni jito de jniñu néē ní casáha ñáyuu neé un. ⁸ Chi tēe vāha un ní condee de mēhñu ñáyuu ún, te ndiquivī ni nacani cuíhyá ni de jeē ní jini sōho de ni jito de tēcá jniñu néē ní casáha i. ⁹ Núu súcuan te máá Jitoho yō chi jnáma ya ñáyuu cáchiñúhún núu yā, te núu vēji jnūndóho siquī i. Te chindihyū

yā ñáyuu casáha néē, návāha ndoho i castigo quivī sándaā yā cuéchi i.

¹⁰ Te víhyá gā stóho ya tēe casáha jniñu jnéhén jéē ndíyo néē ni de, te cácuu jéē ní de siquī jniñu ndácu máá Jitoho yō. Nihni ndasí ni de, te cáchundeyí ni de sáha de jeē cácuu maá de, te tu cáyūhú de cahán ndevāha de siquī tēcá jéē cácujuhnu nuū sucún. ¹¹ Te ni máá ndajéhé jeē cáhīn nuū Jitoho yō, vēsú cácujuhnu ga yā jín fuerza jín jniñu ndíyo ya, te tu cácahān ndevāha ya siquī tēcá jéē cácujuhnu ún.

¹² Te tēe ún chi cácuu de nájñūhun quiti yúcú jéē ni jéconā tī jín modo sáha tí, te cátahū tī návāha nihīn ñáyuu tī cahni i tí. Chi cácahān neé de siquī tēcá jéē tu cájecūhun ni de. Te cuu de nájñūhun jíhí tēcá quiti ún. ¹³ Te jeē ní castóho de ñáyuu, suni súcuan nanihīn de ndoho de. Te cácusī ni de jín tēcá jéē cácajni ni de, te casáha de tēcá jniñu jeē cándiyo néē ni de. Te cácuu de tēe quini jeē casáha jniñu cúcanu ñáyuu. Te jeē cándutútú de jín ró vico ró, te ní ní cácusī ni de jín jniñu néē jniñu stáhú.

¹⁴ Te cándiyo ni de cájito de ñahan, te tu cájecuīñī de sáha de cuéchi. Te cástáhú de ñáyuu tahya ni. Chi ni cacāan de jín jnūhun ndíyo ni de tēcá ndajniñu. Te tēe jnahnū ndetū cácuu de. ¹⁵ Te ni casana de, chi ni castóo de jnūhun jeē cúu ichi ndaā. Te ni candiquīn de modo Balaam, tēe ni nacani jnūhun nde jenahán, séhe Beor. Chi tēe un ní cusī ni de nihīn de xūhun siquī jnūhun néē jéē cahán de. ¹⁶ Te ñn burro ni cahán tī nájñūhun ñn ñáyuu, vēsú quiti ñihín cúu tí. Te ni cahán tī nuū tēe ún, te súcuan ni jesi tī jeē ma quihín de cahán de tēcá jnūhun néē stívi.

¹⁷ Te tēcá tēe súcuan chi cácuu de nájñūhun tesōco íchi, nájñūhun vicō jeē stechí táchī. Te jnahnū ndetū de quívicoo de nuū néē nuū lúchi jnúú coyūcú de ñí cáni. ¹⁸ Chi yōhyo casándúxí de máá de jín jnūhun cácahān saá-ni de. Te cánducú de squívi tucu de sava ñáyuu nuū jniñu

néé jniñu ndíyo ni. Te súcuan cástáhú de ñayuu jeē sa ní quenda i ni cācu i nuū ñáyuu casáha jniñu néé. ¹⁹ Te cácahān de jeē cáhiyo libre i sáha i ndese-ni cúní maá i, te ni máá de tu cáhiyo libre de, chi cácuu de mozo nuū cuéchi, chi máni jniñu jnéhén casáha de. Chi tācá jniñu jeē cúndeyí jíin ñn tēe jeē sáha de, suu yūcuan ndúu de mozo nuū. ²⁰ Chi núu je ni cajini de ndese Yaā cúu máá Jítóho yō Jesu-cristo, Yaā jnáma yóhó, te núu súcuan ni quenda de ni cācu de nuū jniñu jnéhén íyó ini ñayívi, te yūcuán na te núu ndívicoo tucu de nuū jniñu un jéē cúndeyí tucu jíin de, núu súcuan te néé gá quendōo de jeē sándihí vēsú jeē xíhna ñuhún. ²¹ Chi vāha ga núu jeē tu ní cajini de jnūhun ichi ndaā nuú, vēsú jeē ní cajini de, te stóo tucu de jniñu ndoo jeē ní ndacu ya nuū de. ²² Chi cūndaā jíin de nájnūhun cáhān ñn jnūhun jenahán: Ina ni nacaji tē jeē ní ndujen ti. Te quíni ní ndundoo, ni nacuchi tucu ti ndehyū, achí.

Siquí jeē ndíji Jítóho yō

3

¹ Ñání mání, yāha cúu carta uū jeē tēe rí nuū rō. Te jíin ndíndúú carta yáha cúní rí jeē nacani ni rō siquí ndihí jeē váha ndaā jeē jéni ichí rí rohó. ² Te na núcūhun ni rō tāca jnúhun jeē ní canacani tēe ndoo Yaā Dios nde jenahán, jíin jniñu ní ndacu máá Jítóho yō, Yaā jnáma yóhó. Te suu cúu jeē ní castéén tēe cácuu apóstol nuū rō.

³ Te xíhna gā jnūhun yáha na jécūhun ni rō: Jeē nuū cuándihí quívi te quíjicoo tēe sácatā siquí jnúhun ndaā yā, chi sáha de tācá jniñu néé jéē ndíyo ni maá de. ⁴ Te cahān de jíjnáhan de: ¿Najehē cúu jeē tu ndíji Cristo nájnūhun ni jejnūhun ya? Chi nde quívi ní cajihí jíi yō te nde vijna, tu ndé sáma cuíti ndihí jeē iyó ndé ná ni jecōo ñayívi, achí de. ⁵ Chi tu cácuu de jécūhun ni de jeē ndé jenahán ní cuvāha andívi jíin jnúhun ni cahān Yaā Dios. Te ni ndacu ya jniñu jeē na cuvāha ñayívi jíin ndute, te mēhñú ndute ni nane

ñuhun íchi. ⁶ Te suni jíin ndute ni naa ñayívi jenahán, chi ni ndaa ndute jeē ní cuun saū xeén. ⁷ Te suni súcuan jíin jnúhun ni cahān Yaā Dios ni sátūhva ya jeē cayú andívi jíin ñayívi íyó vijna. Chi máá quívi juicio te cayū ndihí, te jnahnū ndetū ñayuu ni casáha néé.

⁸ Te suni ma náa ni rō jnūhun yáha, ñání mání: Jeē nuū maá Jítóho yō chi ñn quívi cúu nájnūhun mil cuiyā, te mil cuiyā cúu nájnūhun ñn quívi-ni. ⁹ Chi nasūu jéē cucuéé máá Jítóho yō siquí jnúhun ni jejnūhun ya, nájnūhun cájeni ni sava ñayuu. Chi sa suhva íyó paciencia ni yā nuū yō, chi tu cúní yā jeē jnahnú ndetū ni ñn yó, chi sa cúní yā jeē ndihí yó nacani ni yō stóo yó cuéchi yó.

¹⁰ Te quívi ndíji máá Jítóho yō, ñn sanaa-ni te quée, nájnūhun ñn sanaa-ni te quée ñacuíhná jecuáa. Te quívi ún chi ñhín ndasí andívi, te naa-ni. Te ndihí jeē iyó andívi chi naa sáha ñuhún. Te ñayívi jíin táca jéē iyó ini, ndihí cayū.

¹¹ Te núu súcuan naa tācá un, te cánuú ndasí jéē coo ndoo ánuá rō te chiñuhún váha ro yá jijnáhan rō. ¹² Te condetu ró te condíhví ni rō jeē na quée yachí quívi ndíji Yaā Dios. Te quívi ún cayū andívi te naa-ni, te tāca jéē iyó chi ndute sáha yáñuhún. ¹³ Te máá yó chi cándetu yó andívi jéē jíin ñayívi jéé, chi súcuan ni jejnūhun Yaā Dios. Te yūcuán chi máni jniñu ndaā jíin jniñu váha coo.

¹⁴ Núu súcuan, ñání mání, níni jéē cándetu ró jéē squícu tācá jniñu yáha, te na ndúcu ndéyí ró návāha quívi ndíji ya te nihín yā rohó jéē cáyūcu mání rō, te coo ndoo ró jéē tú na cuéchi ró. ¹⁵ Te na jécūhun ni rō jeē siquí jeē iyó paciencia ni maá Jítóho yō, jeē yūcuan cácu yó. Chi hermano yō Pablo jeē maní yō jíin, suni súcuan ni tee de nuū rō, chi súcuan ni steén Yaā Dios jnūhun ndíhí yá nuū de. ¹⁶ Te cáhān de siquí jnúhun yáha núu tāca carta jeē ní tee de. Te nuū carta de un íyó jecu jnūhun jeē yí jécūhun ni yō. Te ñayuu tu jécūhun ní jíin ñayuu tu

Íje jíín jnúhun cándíje, cánasama i modo steén jnúhun yí un, nájnūhun násama i jeē cahán sava ga tutu iī. Te súcuan sáha i jeē jnahnú ndetū maá i.

¹⁷ Te róhó ñánī mánī, vijna te je ni cajini rō ndese coo tācá jniñu yáha. Núu súcuan te coto má condiquīn rō jnúhun stáhú cástéén ñayuu casáha neé. Chi núu tuú te snáa rō jnúhun cáhīn nīhin ró jíín. ¹⁸ Chi sa na cóndihvī gā ni rō cuni rō ndese Yaā cúu máá Jítóho yō Jesucristo, Yaā jnáma yóhó. Te na íje ga ni rō jíín jnúhun cúndáhú ni yā rohó. Te na cáhán yō jeē yóhyo luu cújéhu ya nde vijna jíín ní cáni. Súcuan na cóo. Amén.

CARTA HN JEE NI TEE SAN JUAN APOSTOL NUU ÑAYUU CACANDIJE

Jnūhun cotecu yō nñ cáni

¹ Jnūhun cátee ri cuajeē nuū rō jijnáhan ró cúu jnūhun máá Yaā jeē je íyó ndé ná tu jecōo tāca jéē iyó. Te ni cajini sōho ri jeē ni cáhān yā, te ni cajito jínúu rī yā, chi ni cajito vāha ri nuū yā, te ni cajni ri yā. Te máá yá cúu Jnūhun cotecu yō nñ cáni. ² Chi Yaā yáha jéē sáha ya jeē cótecu yō, ni quenda ndijin yā. Te cácahān rī jnūhun ya, chí ni cajito ri yā. Te cácastūhun rí nuū rō jijnáhan ró síquī Yaā cúu Jnūhun cotecu yō nñ cáni, Yaā ni condee jín Tátá yō Yaā Dios, te ni quenda ndijin yā nuū rī jijnáhan ri. ³ Jeē ní cajito ri jín jéē ní cajini sōho ri, yūcuan cúu jeē cácastūhun rí nuū rō, návāha coo inuú ni rō jín yó jijnáhan yó. Te jendaá chi cáhiyo inuú ni yō jín máá Tátá yō Yaā Dios jín Séhe ya Jesucristo. ⁴ Te jnūhun yáha cátee ri cuajeē nuū rō, návāha cusñ teyí ni rō jijnáhan ró.

Yaā Dios cúu luz

⁵ Te yāha cúu jnūhun ni steén Jesucristo nuū rī, te vijna cácastūhun rí nuū rō: Yaā Dios cúu luz, chí yōhyo ndaā yā, te tú cuiti na jniñu néé íyó jín yá. ⁶ Núu cácahān yō jeē cáhiyo inuú ni yō jín yá, te núu cájica yó nájñūhun nuū néē jeē sáha yó jniñu néé, núu súcuan te cástáhú yó, te nasūu jniñu ndaā casáha yó. ⁷ Te núu cájica yó jín luz yā jeē casáha yó jniñu ndaā, nájñūhun íyó máá yá jín luz yā jeē sáha ya jniñu ndaā, yūcuán na te cáhiyo inuú ni yō jín táca jnáhan yó. Te niñí maá Séhe ya Jesucristo sándoo yóhó núu ndihí cuēchi yó.

⁸ Núu cácahān yō jeē tú na cuēchi yó, te cástáhú yó máá yó jeē jéni ni yō súcuan, te tu ñūhun jnūhun ndaā ini yō. ⁹ Te núu nacani ndaā yō cuēchi

yó núu yā, te cone cáhnu ni yā nuū cuēchi yó, te sándoo ya yohó ndihí jeē neé casáha yó. Chi jíní yō jeē Yaā vāha Yaā ndaā cúu ya. ¹⁰ Te núu cácahān yō jeē tú na cuēchi yó, te nájñūhun sáha yó jéē Yaā stahú cúu ya, te tu cándije ndije yó jnūhun ya.

Cristo cúu Yaā cahán jehē yō

2

¹ Tāca jnūhun yáha tée ri cuajeē nuū rohó jéē cácuu ró nájñūhun sēhe ri, návāha ma sáha ró cuēchi jijnáhan ró. Te núu ndé in ró ní sáha cuēchi, te íyó máá Yaā cahán jehē yō nuū maá Tátá yō Yaā Dios. Jesucristo Yaā ndaā cúu ya. ² Te ni socō yā maá yá jeē ndahva yā cuēchi yó, te nasūu cuēchi máa-ni yó, chí suni cuēchi ñayuu nñ ñáyiví.

³ Núu squícu yó jniñu ndácu Yaā Dios nuū yō, jín yūcuan cúcáhnu ni yō jeē jíní ndije yó ndese Yaā cúu ya. ⁴ Te núu cáhán in ñayuu: Ruhū chí jíní rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhán i jnūhun ndaā. ⁵ Te sa ñayuu squícu jnūhun ya, je ni ije vāha ni i jeē maní i jín yá. Súcuan te cuni yō núu ndúú yó jín yá chí tuú. ⁶ Núu cáhán in ñayuu jeē nduú i jín yá, cánuú jéē caca ndaā i nájñūhun ni jica Jesucristo.

Jniñu jéé ndácu ya nuū yō

⁷ Hermano, nasūu in jniñu jéé ndácu ri nuū rō jeē cahán rī jeē na cundáhú ni rō jnáhan ró. Chi jniñu jeē je cájini rō nde ná ni quejéé ró candije ró cúu. Te jniñu yáha jeē ndácu ya, vēji nde jenahán, te suu cúu jnūhun ni cajini sōho ró ndé quiví ní quejéé ró candije ró. ⁸ Te vésú súcuan, te níní jniñu jéé cúu, te jniñu ndaā cúu nuū Cristo jín núu maá ró jijnáhan ró. Chi je cuayāha jniñu néé jéé iyó núu néé, te je stéén maá luz ndaā ini anuá yō vijna.

⁹ Núu in ñayuu cahán i jeē jica i jín luz yā, te núu jíto uhū i jnáhan i, ñayuu ún chí jica ga i nájñūhun nuū néē jín cuēchi. ¹⁰ Te ñayuu jeē cundáhú ni jnáhan, chí jica i jín luz yā, cúu jeē sáha

i jniñu váha. Te ni ñn ma cúu sáha jeē quívi i cuēchi. ¹¹ Te ñayuu jíto uhū jnáhan, chi íyó i nuū néē, te jíca i nuū néē. Te tu jíni i ndé chi quíhín i, chi nuū néē un ní jesi jeē tu jécūhun ni i.

¹² Róhó jéē cácuu sēhe, tée ri jnūhun yáha cuájeē nuū rō, chi jeē síquī Jesucristo te ni ine cáhnu ni Yaā Dios nuū cuéchi rō. ¹³ Róhó tátá jijnáhan rō, suni tée ri nuū rō, chi cájini rō ndese Yaā cúu Yaā iyó ndé xíhna ñúhún. Róhó tée suchí jijnáhan rō, suni tée ri nuū rō, chi ni cacundeyí rō jeē tu ní cúu squívi jexeén rohó cuéchi.

Róhó jéē cácuu sēhe, tée ri jnūhun yáha cuájeē nuū rō, chi cájini rō ndese Yaā cúu máá Tátá yō Yaā Dios. ¹⁴ Róhó tátá jijnáhan rō, suni tée ri nuū rō, chi cájini rō Yaā iyó ndé xíhna ñúhún. Róhó tée suchí jijnáhan rō, suni tée ri nuū rō, chi cáhín nihin rō, te cácandíje rō jnúhun Yaā Dios, te ni cacundeyí rō síquī jexeén.

¹⁵ Ma cutóo ni rō síquī ñayívi, ni táca jéē iyó ini ñayívi. Chi núu ndé ñayuu cutóo ni i síquī ñayívi, ñayuu ún tu íyó mání i jíni Tátá yō Yaā Dios. ¹⁶ Chi táca jéē cúu cuenta ñayívi, nasūu ndé nuū Tátá yō Yaā Dios vēji, chi cuenta ñayívi cúu. Te yūcuan cúu táca jéē cájni ni yō jeē cuní modo neé máá yó, jíni jéē ndíyo ni yō jeē jíto yó núu, jíni jéē sandúxí yó máá yó síquī ndajniñu névaha yó. ¹⁷ Te cuandíhi ñayívi jíni táca jéē ndíyo neé ni yō. Te ñayuu casáha jeē cuní maá Yaā Dios, chi cotecu i ní cáni.

Jnūhun ndaā jíni jnúhun stáhú

¹⁸ Róhó jéē cácuu nájñūhun sēhe ri, cáhán rī jíni rō jeē cuandíhi quívi. Te je ni cájini jnūhun rō jéē quíji máá tée cuu contra síquī Cristo. Te nde vijna je ni canecoo cuehē tée jeē cácuu contra síquī Cristo. Te jeē yūcuan jíni yō jeē cuandíhi quívi. ¹⁹ Mēhñu máá yó ni quendacoo de, te nasūu jnáhan yó cácandíje cácuu de. Chi núu jeē jnáhan yó cácuu de, te quendōo de jíni yó núu. Te ni quenda de cuangoo de, návaha cuni cáji yó jéē násūu jnáhan yó cácuu ndíhi de.

²⁰ Te máá rō jijnáhan rō, chi Cristo ni jēhe ya Espíritu Santo, ndeé yá ini anuá rō, te jeē yūcuan cájini rō jnūhun ndaā. ²¹ Núu súcuan te tée ri yáha cuájeē nuū rō, síquī jeē cájini rō jnūhun ndaā, nasūu síquī jeē tu cájini rō. Te cájini rō jeē tú na jnūhun stáhú íyó nuū jnúhun ndaā.

²² ¿Ndé ñn cúu jeē cahán mání jnūhun stáhú? Suu tée jeē cahán jeē Jesús, tu cúu ndíje ya Cristo, Yaā ní tají Yaā Dios. Yūcuan cúu tée jeē cúu contra síquī Cristo, chi tu jéjñúhún de máá Tátá yō Yaā Dios jíni Séhe ya. ²³ Táca ñayuu jeē tu jéjñúhún i Séhe ya, suni tu íyó máá Tátá jíni i. Te ñayuu jeē jéjñúhún i Séhe ya, suni íyó máá Tátá jíni i.

²⁴ Núu súcuan te chuhun vāha ni rō maá jnúhun ni cájini sōho rō ndé jeē xíhna ñúhún. Te núu ñúhún vāha ni rō jnūhun ní cájini sōho rō ndé jeē xíhna ñúhún, yūcuán na te suni ndúú rō jíni máá Tátá yō jíni Séhe ya. ²⁵ Te yáha cúu jnūhun jeē ni jéjñúhun Jesucristo nuū yō: jeē cótecu yō ní cáni sáha ya.

²⁶ Jnūhun yáha ní tee ri nuū rō jeē cástūhun rī síquī ñayuu cánducú stáhú rōhó. ²⁷ Te máá rō jijnáhan rō, chi ni jēhe Jesucristo Espíritu Santo, ndeé yá ini anuá rō. Te jeē yūcuan tu jíni ñúhún jéē steén ni ñn ñayuu nuū rō ndé vé cúu jendaá, chi máá Espíritu cúu jeē steén ndíhi nuū rō, te steén yā jnūhun ndaā, chi tu stáhú cuítí yā. Núu súcuan te caca ndúú rō jíni Cristo, nájñūhun steén Espíritu nuū rō.

²⁸ Séhē jijnáhan rō, vijna te na cáca ndúú rō jíni Cristo, návaha núu na quénda ndíjin yā, te ma yūhu yó, ni ma cúcanu yō nuū yā quívi ndíji ya. ²⁹ Chi je cájini rō jeē Yaā ndaā cúu Jesucristo, te suni na jécūhun ni rō jeē táca ñayuu casáha jniñu ndaā, sēhe Yaā Dios cácuu i.

Jnūhun ñayuu cácuu sēhe Yaā Dios

3

¹ Nacā jeē yóhoyo ni cundáhú ni Tátá yō Yaā Dios yohó, chi ni nihín yō jnūhun cuu yó séhe ya, te suu cúu ndíje yó. Jeē yūcuan, ñayuu ñayívi tu

cájini i jeē cúu yó séhe ya, chi tu jíní i ndese Yaā cúu máá yá. ² Ñání mání, vijna te cúu yó séhe Yaā Dios, te ná tu cuni yō ndese coo yó ní cáni. Te je jíní yō jeē quiṽi quénda ndijin Jesucristo, te nduu yó nájñuhun íyó máá yá, chi coto yó núū yā ndese íyó yá. ³ Te tāca ñáyuu jeē súcuan ññuhun ni i, chi sándoo i ánuá i, nájñuhun íyó ndoo Jesucristo.

⁴ Te ñayuu casáha cuēchi, chi stívi i ley Yaā Dios. Chi núu sáha yó cuéchi, te stívi yó ley yā. ⁵ Te je cájini rō jeē ní quiji Jesucristo ini ñayṽi návaha quende yā cuēchi yó. Te máá yá tú na cuēchi ya. ⁶ Te tāca ñáyuu jeē nduú i jíin yá, tu cájica i jíin cuéchi. Te tāca ñáyuu cájica jíin cuéchi, tu jíní i ya, ni tu jécūhun ni i ndese Yaā cúu ya. ⁷ Séhé jijnáhan ró, coto ró jéē ma stáhú ni ññ i róhó. Chi na jécūhun ni rō jeē ñáyuu casáha jniñu ndaā, máá i cácuu ñayuu ndaā, nájñuhun íyó ndaā maá yá. ⁸ Te ñayuu casáha cuēchi, máá i cácuu sēhe jexeén. Chi jexeén cúu jeē sáha cuēchi vēji nde jeē xíhna ññuhún. Jeē yúcuan ní quiji Séhe Yaā Dios, jeē snáa yā tāca jniñu néé sáha jexeén.

⁹ Ni ññ ñayuu jeē cúu sēhe Yaā Dios, tu jíca i jíin cuéchi, chi ni sáha Yaā Dios jeē ní nduu i nájñuhun íyó máá yá. Te ma cúu ga caca i jíin cuéchi, chi sēhe Yaā Dios cácuu i. ¹⁰ Súcuan cuni yō ndé ññ cúu sēhe Yaā Dios jíin séhe jexeén: Tāca ñáyuu jeē tu sáha jniñu ndaā, jíin jéē tu cundáhú ni jnáhan, nasūu séhe Yaā Dios cúu i.

Jeē na cundáhú ni yō jnáhan yó

¹¹ Yāha cúu jñuhun jeē ní cajini sōho ró ndé jeē xíhna ññuhún: jeē na cundáhú ni yō jnáhan yó. ¹² Te ma sáha yó nájñuhun ni sáha Caín, jeē ní cuu de sēhe jexeén, te ni jehni de ññani de. ¿Te najehē ni jehni de ññani de? Siṽi jeē ññani de ni sáha jniñu ndaā te máni jniñu néé ní sáha máá de.

¹³ Hermano jijnáhan ró, ma cunéé ni rō te núu ñayuu ñayṽi cáquití ni i nuū rō. ¹⁴ Te máá yó chi siṽi jeē cundáhú ni yō jnáhan yó, súcuan jíní yō jeē jé ni cācu yó jéē cótecu yō ní cáni. Te ñayuu jeē tu cundáhú ni

jnáhan, íyó i jíin jñuhun jnahnū ndetū i. ¹⁵ Chi tāca ñáyuu quití ni nuū jnáhan, nájñuhun ñayuu jéñni ndíyi cúu i. Te cájini rō jeē ñáyuu jéñni ndíyi, ma nihín tahú i cotecu i ní cáni. ¹⁶ Jeē ni jíin Cristo jehē yō, yūcuan cúu jeē steén cají ndese cúu jñuhun cundáhú ni. Te máá yó, chi suni súcuan jíin ññuhún cundáhú ni yō jnáhan yó vēsú na cúu yō jehē i. ¹⁷ Te núu névāha yó jéē cótecu yō ñayṽi, te núu jíní yō jeē cúmaní nuū jnáhan yó, te núu tú cundáhú ni yō i cuāha yó jéē jíin ññuhún i, núu súcuan ¿te á íyó mání yō jíin Yaā Dios, chi naún? ¹⁸ Séhé jijnáhan ró, ma cundáhú ni yō jíin máá jñuhun cáhán-ni yó, chi sa suhva na cundáhú ndije ni yō nde jíin jniñu sáha yó.

Ndese cucáhnu ni yō jeē váha sáha yó núū Yaā Dios

¹⁹ Te súcuan cundaā ni yō jeē squícu yó jñuhun ndaā, te cucáhnu ni yō jeē váha sáha yó núū yā. ²⁰ Chi núu ánuá yō tú vāha sáha siṽi jeē iyó cuéchi yó, te Yaā Dios chi cújéñnu ga yā vēsú anuá yō, te jíní ndíhi ya tācá un. ²¹ Núu súcuan ññaní mání, núu vāha sáha ánuá yō siṽi jeē tú na cuēchi yó, yūcuán na te cúcáhnu ni yō jeē váha sáha yó núū Yaā Dios. ²² Te tāca jéē cacán yō nuū yā, te sáha ya jeē cahán yō, chi squícu yó jniñu ndácu ya te sáha yó jniñu jeē cúsi ni yā. ²³ Te yāha cúu jniñu ndácu ya: jeē na cándije yó jéē ni sáha Séhe ya Jesucristo jehē yō, jíin jéē na cundáhú ni yō jnáhan yó, nájñuhun ni ndacu ya jniñu nuū yō. ²⁴ Te tāca ñáyuu squícu jniñu ndácu Yaā Dios, ndúu i jíin yá, te ndéé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuan te jíní yō jeē ndeé Yaā Dios ini yō.

Jñuhun jeē véji nuū Espíritu jíin jñuhun cáhán contra Cristo

4

¹ Ñání mání, ma candíje ró tāca téé jéē cáhán de jeē jíin Espíritu Yaā Dios cánacani de jñuhun. Chi sa suhva coto ndee rō de, núu nde nuū Yaā Dios vēji

jnūhun cácahān de, chí tuú. Chi ini ñayīví je ni canecoo cuehē tēe cánacani jnūhun stáhú, te cácahān de jeē ndé nuū Yaā Dios vēji. ² Te sūcuan nacuni rō ndé-ni i cúu jeē jíin Espíritu Yaā Dios cahán: tāca ñáyuu jeē cácahān ndaā jeē ní quiji Jesucristo, ni nduu ya tēe, máá i cúu jeē jíin Espíritu Yaā Dios cácahān. ³ Te tāca ñáyuu jeē tu cájejnūhún jeē sūcuan ni nduu ya tēe, máá i chí nasūu jíin Espíritu Yaā Dios cácahān i. Chi sa suhva cácuu i contra síquī Cristo. Te je ni cajini jnūhun ró jéē quíjicoo ñayuu sūcuan, te vijna je cáhīyo i ini ñayīví.

⁴ Séhe jíināhan ró, máá ró cácuu séhe Yaā Dios, te je ni cacundeyí ró síquī tēe cástáhú un. Chi jéhu ga cúu poder maá Yaā jeē ndeé ini rō, vēsú poder maá jéē ndeé jíin ñáyuu ñayīví jéē castáhú. ⁵ Máá i cácuu cuenta ñayīví, te jeē yúcuu cácahān i jnūhun cuenta ñayīví. Te ñayuu cácuu cuenta ñayīví, cájini nahín i jnūhun ún. ⁶ Te máá yó chí séhe Yaā Dios cácuu yó. Te ñayuu jeē cájini i ndese Yaā cúu Yaā Dios, máá i cájini nahín i jnūhun cácahān yō. Te ñayuu jeē násūu séhe Yaā Dios cácuu, máá i tu cájini nahín i jnūhun cácahān yō. Te sūcuan nacuni yō ndé-ni cúu jeē cahán jnūhun ndaā jíin ndé-ni cúu jeē cahán jnūhun stáhú.

Máni jnūhun cundáhú ni iyó jíin Yaā Dios

⁷ Ñánī mánī, na cundáhú ni yō jnáhan yó, chí jnūhun cundáhú ni, nde nuū Yaā Dios vēji. Te tāca ñáyuu cundáhú ni jnáhan, chí séhe Yaā Dios cúu i, te jíin i ndese Yaā cúu Yaā Dios. ⁸ Te ñayuu jeē tu cundáhú ni jnáhan, tu jíin i ndese Yaā cúu Yaā Dios, chí máni jnūhun cundáhú ni iyó jíin Yaā Dios. ⁹ Sūcuan ni steén Yaā Dios ndese cundáhú ni yā yohó, chí ni tají yá Séhe ya ni quiji ini ñayīví yáha, vēsú mañúhún-ni ya iyó, návāha cotecu yō ní cáni sáha ya. ¹⁰ Te yáha cúu jnūhun cundáhú ni: nasūu jéē xihna maá yó ni íyo manī yō jíin Yaā Dios, chí sa suhva máá yá cúu jeē ní cundáhú ni yā yohó. Te ni tají yá Séhe ya ni quiji, návāha

socō yā maá yá jeē quende yā cuēchi yó.

¹¹ Ñánī mánī, núu sūcuan ni cundáhú ni Yaā Dios yohó, te suni sūcuan cánuú jeē cundáhú ni yō jnáhan yó. ¹² Ni ñin ñayuu tu ní jíto cuiti nuū Yaā Dios. Te núu cundáhú ni yō jnáhan yó, te ndeé Yaā Dios ini anuá yō, te je ni ije vāha ni yō jíin jnūhun cundáhú ni. ¹³ Te máá Espíritu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndeé Yaā Dios ini yō. ¹⁴ Te ni cajito ri te cácastūhun rí jeē maá Tátá yō ni tají yá Séhe ya ni quiji návāha jnama ya ñayuu ñayīví. ¹⁵ Te núu ndé ñáyuu jejnūhún i jeē Séhe Yaā Dios cúu Jesús, te nduú i jíin Yaā Dios, te Yaā Dios ndeé yá ini i.

¹⁶ Te máá yó, je ni jini yō te ni candíje yó jéē cundáhú ni Yaā Dios yohó. Chí máni jnūhun cundáhú ni iyó jíin Yaā Dios. Te ñayuu cundáhú ni jnáhan, nduú i jíin Yaā Dios, te ndeé yá ini anuá i. ¹⁷ Te sūcuan cúu jeē íje vāha ni yō jíin jnūhun cundáhú ni, návāha ma yūhu yó quiví sándaā yā jniñu yó. Chí nájnūhun cundáhú ni Cristo, suni sūcuan cándāa máá yó ini ñayīví yáha. ¹⁸ Te núu manī yō jíin yá, te tu yúhú yó nuū yā. Chí núu ni ije yó jíin jnūhun manī yō jíin yá, te tú na síquī yuhú yó nuū yā. Chí jnūhun yúhú un cúu jeē yuhú yó ndoho yó castigo. Jeē yúcuu ñayuu cáyūhú chí ná tu ije vāha i jíin jnūhun manī i jíin yá.

¹⁹ Te yohó chí manī ndasí yó jíin Yaā Dios, chí xihna gā maá yá ni cundáhú ni yā yohó. ²⁰ Te núu ñin ñayuu cahán i jeē maní i jíin Yaā Dios, te núu quítí ni i nuū jnáhan i, núu sūcuan te ñayuu stahú-ni cúu i. Chí núu ñin ñayuu tu íyo mánī i jíin jnáhan i jeē jíto i nuū, te ni ma cúu coo manī i jíin Yaā Dios jeē tu jíto i nuū yā. ²¹ Chí je ni ndacu ya jniñu yáha nuū yō: Ñayuu jeē maní i jíin Yaā Dios, suni na cóo manī i jíin jnáhan i.

Jeē cundeyí yó síquī jeneé íyo ini ñayīví

5

¹ Tāca ñáyuu jeē cá candíje i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu manī jiín Yaā cúu Tátá, suni cá cundáhú ni i ñayuu cácuu sēhe ya. ² Súcuan jíní yō jeē cundáhú ni yō ñayuu cácuu sēhe ya, núu manī yō jiín yá te squícu yó jniñu ndácu ya. ³ Chi jeē squícu yó jniñu ndácu Yaā Dios cúu jeē maní yō jiín yá. Te jniñu ndácu ya chi tú vēyi. ⁴ Chi tāca ñáyuu cúu sēhe Yaā Dios, cūndeyí i siquī jeneé íyó ini ñayīví. Te jeē candíje yó jēē cundáhú ni yā yohó, yūcuan cúu fuerza jeē sáha jeē cūndeyí yó. ⁵ Máá-ni ñayuu jeē candíje jeē Jesús cúu Sēhe Yaā Dios, máá i cúu jeē cūndeyí siquī jeneé íyó ini ñayīví.

Jñūhun cáhán ndaā siquī Séhe Yaā Dios

⁶ Te jeē ní quiji Jesucristo ini ñayīví, chi ni jendute ya jiín ndute, te ni jeti niñi yā jeē ni jíhi yā jehē yō. Te nasūu máá ñn-ni jeē ní jendute ya jiín ndute, chi suni ni jeti niñi yā. Te máá Espíritu Yaā Dios cahán ndaā siquī yā, chi nuū maá Espíritu vēji jñūhun ndaā. ⁷ Chi ini andiví íyó únī jeē cácahān ndaā siquī jñūhun yáha: máá Yaā cúu Tátá, jiín Yaā cúu Jñūhun, jiín Espíritu Santo. Te ndinúni yá, chi ñn-ni cúu ya. ⁸ Te ini ñayīví suni íyó únī jeē steén ndaā: máá Espíritu, jiín jēē ní jendute Jesús, jiín jēē ní jeti niñi yā. Te ndinúni yáha, chi inuú-ni steén siquī yā. ⁹ Te cájetáhú yó jñūhun cácahān ndaā tēe, te jéhu ga cúu jñūhun cáhán maá Yaā Dios. Te jñūhun ni cahán yā cúu jñūhun siquī Séhe ya. ¹⁰ Ñayuu cá candíje jeē Séhe Yaā Dios cúu Jesús, je ni cacundaā ni i jñūhun yáha jeē ni cáhān Yaā Dios. Te ñayuu jeē tu cá candíje jeē ni cáhān Yaā Dios, ná jñūhun cásáha i jeē Yaā stahú cúu ya, chi tu cá candíje i jñūhun ni cahán ndaā yā siquī Séhe ya. ¹¹ Te jñūhun ndaā un cúu jeē ni sáha ya jeē cótecu yō ní cáni, te Séhe ya ndíso jñūhun cotecu yō. ¹² Ñayuu jeē íyó Séhe ya jiín i, je ni nihīn tahú i cotecu i. Te

ñayuu jeē tu íyó Séhe ya jiín i, ma nihīn tahú i cotecu i.

Jñūhun consejo jeē sándihí

¹³ Jñūhun yáha tēe ri nuū rohó ñáyuu cá candíje Séhe Yaā Dios, návāha cucáhu ni rō jeē ni nihīn tahú rō cotecu rō ní cáni.

¹⁴ Te cúcahnu ni yō Yaā Dios, chi jíní yō jeē núu na vé jícan yō nuū yā jeē suni cúní maá yá, te jíní nahín yá jeē jícan yō. ¹⁵ Te núu jíní yō jeē jíní nahín yá jeē jícan yō, núu súcuan te suni jíní yō jeē sáha ya jeē jícan yō.

¹⁶ Núu ñn ñayuu jíní i jeē sáha jnáhan i cuēchi jeē násūu cuēchi jeē jnahnú ndetū i cúu, te na cácan tahú i nuū Yaā Dios, te cuāha ya jñūhun cotecu jnáhan i, te núu nasūu cuēchi jeē sáha jeē jnahnú ndetū i cúu. Iyó cuēchi jeē jnahnú ndetū i sáha, te tu cáhán rī jeē cacán tahú rō jehē ñayuu sáha cuēchi súcuan. ¹⁷ Tācá jniñu néé cúu cuēchi, te íyó cuēchi jeē násūu jēē jnahnú ndetū i cúu.

¹⁸ Te jíní yō jeē tāca ñáyuu cácuu sēhe Yaā Dios, tu jíca i jíin cuēchi. Chi Yaā cúu Séhe Yaā Dios, ndíto vāha ya i. Te tú na vé cúu sáha jexeén jíin i.

¹⁹ Te jíní yō jeē séhe Yaā Dios cácuu yó. Te ñayuu ní ñayīví yíhi i ndaha jexeén.

²⁰ Te suni jíní yō jeē ní quiji Séhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Séhe ya Jesucristo. Máá yá cúu ndije Yaā ndaā, te máá yá sáha jeē cótecu yō ní cáni. ²¹ Séhē jijnáhan ró, na cújiyo ró núu tāca jēē násūu Yaā ndaā cúu. Súcuan na cóo. Amén.

CARTA UU JEE NI TEE SAN JUAN APOSTOL

Jnūhun ndaā jín jnúhun cúndáhú ni

¹ Máá ná cúu tēe jéhu ndíso jníñu, te tēe ná carta yáha cuájeē nuū ni jéē cúu ní hermana ni nacāji Yaā Dios, jín nū séhe ní jínáhan i. Te manī na jín ní jijnáhan ní sáha jnūhun ndaā yā, te nasūu máá-ni ná, chi suni tāca ñayuu jiní jnūhun ndaā. ² Te manī na jín ní jijnáhan ní síquī jeē cácañíje yó jnúhun ndaā yā jeē iyó ini anuá yō, te coo jín yó ní cáni. ³ Te ñúhun ni na jéē Tatá yō Yaā Dios jín Séhe ya Jitoho yō Jesucristo, na sáha ga yā jeē váha níhín, te cundáhú ni yā nihín, te sáha ya jeē coo ndeyí coo sī ni ní, jín jnúhun ndaā jín jnúhun cúndáhú ni.

⁴ Yōhyo ni cusī ni ná, chi ni jini na jéē sava sēhe ní cájica i jín jnúhun ndaā, nájnūhun ni ndacu máá Tatá yō Yaā Dios jniñu nuū yō. ⁵ Hermana, cáhán ndahú ná jín ní jeē na cúndáhú ni yō jnáhan yó. Te jnūhun tēe ná yáha cuájeē nuū ní, nasūú ñn jniñu jéē sá ndacu ya cúu, chi jniñu ní ndacu ya nuū yō nde ná ni quejéé yó candíje yó cúu. ⁶ Te jeē cundáhú ni yō jnáhan yó cúu jeē caca yó nájnūhun ni ndacu ya jniñu nuū yō. Te jniñu ní ndacu ya cúu jeē caca ní jín jnúhun cúndáhú ni, nájnūhun ni cajini sōho ní ndé ná ni quejéé ní candíje ní.

Siquī tēe cástáhú

⁷ Chi cuehē tēe cástáhú ni canecoo de ní ñáyiví, te tu cájejnúhún de jeē ní quiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra síquī Cristo. ⁸ Coto ní jéē ma snáa ni táhū síquī jniñu váha ni casáha ní, chi sa suhva jeē na níhín ni ndíhi tahū ní.

⁹ Núu ndé ñayuu jní inga jnūhun, te tu quéndōo i jín jnúhun ni steén Cristo, núu súcuan te tu íyó Yaā Dios jín i. Te ñayuu quéndōo jín jnúhun ni steén Cristo, chi íyó Tatá yō jín i, te

suní íyó Séhe ya jín i. ¹⁰ Te núu jinū ñn ñayuu vehe ní, te núu tu quíjnáhan jnūhun steén i jín jnúhun yáha, te ma cuáha ní jnúhun condee i vehe ní, ni ma cahán ni jnúhun ndeyí ni jín i. ¹¹ Chi ñayuu cahán jnūhun ndeyí ni jín i, chíndéé ñájnáhan jín i síquī jniñu néé casáha i.

Jnūhun sandíhi

¹² Iyó cuehē gā jnūhun cahán na jín ní jijnáhan ní, te tu cúní na tee ná núu tútu jín tinta. Chi ñúhun ni na cuájeē ná coto jnáhan yó, te ndajnūhun yó, návāha cusī ndasí ni yō.

¹³ Tāca séhe cuhū ní, ñahan jeē suni ni nacāji ya, cácahán i jeē sándeeyí ni ní. Súcuan na cóo. Amén.

CARTA UNI JEE NI TEE SAN JUAN APOSTOL

Jeē jejnúhún de tēe nání Gayo

¹ Máá rí cúu tēe jéhnú ndíso jníñu, te tēe rí carta yáha cuájeē nuū rō, amigo Gayo, chi manī rī jíin ró sáha jnūhun ndaā.

² Nánī mánī, jícán tahu rī jeē vāha na quihín tǎcá jniñu sáha ró, jíin jéē na cóo vāha ró, nájnūhun íyó vāha ánuá rō jíin jnúhun ya. ³ Yōhyo ni cusī ni rī ná ni quecoo sava hermano te ni cacastūhún de nuū rī ndese vāha squícu ró tǎcá jniñu ndaā, chi jíca ndaā rō. ⁴ Tuá na inga sáha jeē cúsi gā ni rī, chi máni jeē nihín rī jnūhun jeē cájica ndaā ñayuu cácuu nájnūhun sēhe rí siquī jeē ni scándíje rí i.

⁵ Nánī mánī, yōhyo vāha sáha ró jéē chindéé ñáhán ró tǎcá hermano, te víhyá gā núu tēe ñuu jíca cácuu de. ⁶ Chi tēe un ní canacani de jnūhun nuū ñayuu cácandíje yāhá, ndese cúndáhú ni rō de. Te jícán rī jeē chindéé ñáhán gá rō de, núu na vé jíni ñúhún de jeē caca ga de ichi nuū quihín de, nájnūhun nújnahan ni Yaā Dios. ⁷ Chi tēe un ní quendacoo de cájica de siquī jniñu Jesucristo. Te tú na vé cáquihin de nuū ñayuu jeē tu jíni jnūhun Yaā Dios. ⁸ Jeē yúcuan cánuú coto yó de, chindéé ñáhán yó de jeē cánacani de jnūhun ndaā.

Siquī jeē tú vāha sáha Diótrefes

⁹ Je ni tee rí ñin carta nuū ñayuu cácandíje jíñā. Te Diótrefes, tu jétáhú de jnūhun cáhán rī, siquī jeē cuní de cujéhnú máá de nuū i. ¹⁰ Jeē yúcuan, núu na jéé rī te cahán rī nuū de siquī jniñu sáha de, chi yōhyo sájnúhún de te cáhán de jnūhun stáhú siquī rí jíjnahan rí. Te nasūu máá yúcuan-ni sáha de, chi suni tu jétáhú de tǎcá hermano jéngoo nuū de, te jési de jeē ma cuátáhú ñayuu nuū tǎcá hermano un. Te ñayuu cájetáhú nuū hermano un,

quénehen de i nuū cándutútú ñayuu cácandíje.

¹¹ Nánī mánī, ma ndácu ró ñayuu casáha jniñu néé, chi sa suhva ñayuu casáha jniñu vāha. Chi sēhe Yaā Dios cácuu ñayuu casáha jniñu vāha. Te ñayuu casáha jniñu néé, tu cájini i ndese Yaā cúu Yaā Dios.

Jeē cácahán i jeē vāha sáha Demetrio

¹² Tāca ñayuu chi cácahán i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni súcuan cácahán maá rí, te cájini rō jeē iyó ndaā jnūhun cáhán rī.

Jnūhun sandíhí

¹³ Iyó cuéhē gā jnūhun cahán rī jíin ró, te tu cuní rī tee rí jíin tinta jíin pluma. ¹⁴ Chi ñúhún ni rī cuajeē yachī rí coto jnahan yó, te ndajnūhun yó.

¹⁵ Te ñúhún ni rī jeē na cóo ndeyí coo sī ni rō. Tǎcá amigo yō yāha cácahán i jeē sándeyí ni rō. Te suni cahán rō jíin ñin ñin amigo jíñā jeē sándeyí ni i, áchí rí, te cocahán yō.

CARTA JEE NI TEE SAN JUDAS APOSTOL NUU ÑAYUU CACANDIJE

¹ Máá rí cúu Judas ñani Jacobo, te mozo Jesucristo cúu rí. Te tée rí carta yáha cuájeē nuū rohó ñáyuu jeē ní cana máá Tátá yō Yaā Dios, te ni sáha ya jeē iyó ndoo íyó íi rō nuū yā jeē cácuu ró ñáyuu manī yā jíin. Te Jesucristo ndíto vāha ya rohó jéē cáyihí ró ndaha ya. ² Te ñūhun ni rī jeē na cūndáhú gá ni yā rohó, te sáha ya jeē coo ndeyí coo sīi ni rō, te coo manī ndasí yá jíin ró, te na ndúcuehē gā tāca jéē yáha núū rō.

*Siquī tēe cástéén jnūhun stáhú
(2 Pedro 2.1-17)*

³ Ñánī mánī, yōhyo ní cuu ni rī tee rí nuū rō siquī jnūhun ni jnama ya rohó jíin rúhū jijnáhan yó. Te ni jini rī jeē cánuú gá tee rí carta jeē stihví ni rī rohó návāha nducú ndeyí ró jeē ma cási ñayuu nuū jnūhun cácandíje yó. Te jnūhun ún chi je ni jēhe ya ñi jinu-ni nuū tāca ñáyuu maá yá. ⁴ Chi sava tēe ni castáhú de rōhó ní quivícoo de mēhñu ró. Te tēe ún chi nde jenahán je cáhán tutu ñi jeē jnahnú ndetū de siquī jniñu cása ha de. Cácuu de tēe ndevāha, chi cácahān de jeē vāha ni Yaā Dios, te jeē yúcuan vetū-ni sáha de jniñu néé, cácahān de. Te tu cájejnūhún ndije de Jitoho yō Jesucristo jíin Yaā Dios, jeē mañúhún-ni ya kujénu nuū yō.

⁵ Te vijna chi vésú je cájini vāha ró, te cúní rī jeē na núcūhun ni rō ndese ni sáha máá Jitoho yō. Chi ni jnama ya ñayuu Israel jenahán, ni chindéé ñájna han ya i jeē ní jinu i ini ñuu tatú Egipto cuahān i. Te vésú súcuan te cuéé gá te ni snáa yā sava i jeē tu ní cácandíje i. ⁶ Te suni nucūhun ni rō siquī ndajéhé yā jeē ní castóo jniñu ndíso, te ni castóo nuū ní ndeē andiví. Te Yaā Dios ni chindihyū yā jijnáhan, te cándetu nde quiiji quiví cáhnu jeē

sándaā yā jniñu. Te cánuhnī jíin ca- dena, cáyūcu ní cáni nuū cunú núū néē. ⁷ Te suni ni stóho ya ñayuu ñuu Sodoma jíin ñuu Gomorra jíin sava ga ñuu jeē ní iyo yajni, chi suni ni casáha néé i nájnūhun ni casáha tācá ndajéhé un ndé jenahán gá. Te máá i ni cajica jnéni i te ni casáha i tāca cuéchi néé ndasí. Te ni canihīn i castigo ñuhūn jeē cayú ní cáni, te súcuan cúu i ñi ejemplo nuū ndihí ñayuu.

⁸ Te tēe cástáhú jeē ní quivícoo mēhñu ró, vésú cájini de jeē súcuan ni sáha ya, te cájeni cáhá ni de, te cása ha jnéhén de yiquí cúñu de, te cásquéhichí ni de tēe cándacu jniñu Ji- toho yō, te cácahān ndevāha de siquī tāca jéē cácujuhnu nuū sucún. ⁹ Te nasū súcuan ní sáha ndajéhé Miguel, vésú ndajéhé kujénu ga cúu ya. Chi tu ní cáhán ndevāha ya ni tu ní ndácunehen ya cuéchi siquī jexeén ná ni casásáhan jnáhan ya jíin jexeén un jeē siquí yiquí cúñu Moisés ná ni jihí de. Chi suhva-ni ni cahān yā: Máá Yaā Dios, Yaā cúu Jitoho, cuxeēn yā nuū rō, ni achi Miguel. ¹⁰ Te tēe cástáhú yáha chi cácahān neé de siquī tāca jéē tu cájecūhun ni de. Te tāca modo cánevāha de siquī jeē sá cáa de, nájnūhun quiti yúcú jéē sá cáa ti, suu yúcuan sáha jeē jnahnú ndetū de.

¹¹ Nacā xeēn ndoho de núu súcuan, chi tu cájetáhú de Yaā Dios, nájnūhun jeē tu ní jétáhú Caín. Te siquī jeē cácuni de nihīn de xūhún te cástéén de jnūhun stáhú, nájnūhun ni sáha Bal- aam. Te jnahnū ndetū de nájnūhun Coré, tēe ni jihí siquī jeē ní cunīhni ni de. ¹² Tēe yáha núu cándutútú de jíin ró jeē cáyeji manī rō, te cása ha de jniñu cúcanu rō. Chi cáyeji cájhi sīi ni de, te tu cása ha de cuenta ndese caji inga ñayuu, chi máni máá de ndihví ni de caji vāha de. Te cácuu de nájnūhun vicó íchi jéē stechí táchī. Te suni cácuu de nájnūhun yujnu jeē tu jéhe ndehē maá tiempo. Te cácuu de nájnūhun yujnu jeē ní quenda nde jíin yoho, te tú cuiti gā na modo nane numa. ¹³ Te nájnūhun jeē jisó cóyo ndute mar te cáne tiñu, súcuan jícu de jíin jniñu

néé jéé cúu jnūhun canu. Te cácuu de nájñūhun quīmi jeē ní sana ichi. Te je íyó túhva nuū néé nuū lúchi jnúú coyūcú de ní cáni.

¹⁴ Te jeē ní yāha iñū yucūn Adán, te ni cacu Enoc, te ni nacani de jnūhun jeē ni stéén Yaā Dios nuū de siquī tāca téé yāha, áchí de: Máá Jítóho yō ni steén yā nuū rī jeē iin quivī te quiji ya jíin cuéhē mil ñayuu maá yá. ¹⁵ Te sándaā yā jniñū tāca ñáyuu, te snáhnú ndetū yā tāca ñáyuu casáha néé. Chi máni jniñū néé cásáha i siquī jeē canéé máá i, te cácahān i cuehē jnūhun ndevāha siquī yā. Ni achi Enoc. ¹⁶ Tāca téé yāha máni cácahān sōó de, te cácahān de siquī ñayuu. Te máni jeē cúsiñ ní maá de cánducú de. Te cácahān de jeē téé téyí cácuu de, te cácahān yíñúhún de jíin ñáyuu návāha nihīn de jecu nuū i.

Jeē stihví ni Judas ñayuu cácaandíje

¹⁷ Te máá ró jijnáhan ró ñánī mánī, na núcūhun ní rō jnūhun jeē jé ní canacani tēe cácuu apóstol maá Jítóho yō Jesucristo. ¹⁸ Chí ni cacahān de: Nde nuū cuándihī quivī te quijicoo tēe sácatā siquī jnúhun ndaā yā, te sáha de tācá jniñū néé jéé ndíyo ní maá de. Súcuan ní cacastūhún apóstol. ¹⁹ Tēe un cúu jeē casásīn ñayuu. Te máni cándihví ní de tāca jéé cutíndí ní maá de, chí tu ndéé Espíritu yā jíin de.

²⁰ Te máá ró ñánī mánī, na íje vāha ní rō jíin jnúhun ndoo ndasí jéé cácaandíje ró. Te cacān tahu rō jíin fuerza Espíritu Santo. ²¹ Te quendōo níhin ró jíin jnúhun jeē cundáhú ní Yaā Dios rohó. Te condetu ró quivī jeē cótecu rō ní cáni sáha máá Jítóho yō Jesucristo siquī jeē cundáhú ní yā rohó.

²² Te sava ñayuu jeē cájeni siquí ní, nducú ró modo scandíje ró i. ²³ Te sava ga i chí nducú ndéyí ró jeē cácu i nuū cuéchi i, jeē nájñūhun stáa ró i nuū ñuhún. Te cundáhú ní rō i jnama ró i, te coto ró máá ró, te cuquini ní rō coto ró nde sahma i jeē ní cujnehén jíin jniñū néé cásáha i.

Jnūhun cújéhnū Yaā Dios ní cáni

²⁴ Te Yaā Dios chí máñúhún-ni máá yá cúu Yaā ndichí, Yaā jnáma yóhó. Te íyó poder yā jeē coto ya rohó jéé ma quivī ró cuéchi, jíin jéé sáha ya jeē cuíñi ró núū ndíndēe yá, te quivī ún coo ndoo ró núū yā, te cusīñ ndasí ní rō sáha ya. ²⁵ Te na cáhán yō jeē yóhoyo luu cújéhnū ya siquī jeē ní sáha ya jíin Jítóho yō Jesucristo. Te na cáhán yō jeē cujéhnū téyí yá, te ndácu ya jniñū jíin poder jeē ndíso ya nde jenahán ndasí jíin ndé vijna jíin ndé ní cáni. Súcuan na cóo. Amén.

JNIÑU QUIJI JEE NI JITO NDIJIN SAN JUAN

Jeē ni stéén Jesucristo tācá jniñu quiji

¹ Jnūhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñáyuu cávandíje jeē cácuu i mozo yā. Te stéén yā nuū i tācá jniñu jeē yachí coo. Te ni tají yá ndajéhé yā ni quiji ya ni steén ndijin yā jniñu un núu ruhū Juan jeē cúu ri mozo yā. ² Te máá rí cástūhun ndāā rī siquī tāca jéē ní jito ri ún, te nácani ndāā rī jnūhun Yaā Dios jíin jnúhun jeē ní cahān ndāā Jesucristo.

³ Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeē cáhu ñayuu tāca jnúhun yáha jeē ní cachi Yaā Dios, te chuhun ni i. Chi je cuacuyajni quiví coo tācá jniñu yósó núu tutu yáha.

Jeē té Juan carta nuū ndihúxá grupo ñayuu cávandíje

⁴ Máá rí cúu Juan, te té ri jnūhun yáha cuájeē nuū rohó, ndihúxá grupo ñayuu cávandíje jeē cáyūcu Asia. Te ñúhun ni rī jeē máá Yaā Dios na sáha ga yā jeē váha róhó jíinánhan ró, te sáha ya jeē coo ndeyí coo sī ni rō. Chi máá yá cúu Yaā iyó vijna, te ni iyo ya ní cáni, te coo ya ní cáni. Te ñúhun ni rī jeē suni súcuan sáha ndihúxá Espíritu jeē cáhīn ya yuhu mesa nuū ndácu Yaā Dios jniñu. ⁵ Te ñúhun ni rī jeē suni súcuan sáha Jesucristo, Yaā cahān ndāā tāca jnúhun. Te xīhna gā máá yá ni natecu mēhñu ndíyi. Te cújehnu ya nuū tāca rey jeē iyó ñayiví. Te máá yá cúndáhú ni yā yohó, te ni nacate ya yohó núu cuéchi yó jíin níñī yā. ⁶ Te ni sáha ya jeē ní nduu yó rey jíin sūtū cájejniñu nuū Tatá yā Yaā Dios. Te na cahān yō jeē yóhyo luu cújehnu ya te jnī ya poder ní cáni. Amén.

⁷ Cuni sōho jíinánhan ró, chi ndiji Cristo jíin vícō. Te ndivii ñayuu coto i

nuū yā, te nde jíin ñáyuu jeē ní castújí i ya. Te tāca raza ñayuu ní cáhnu ñayiví ndahyū i jeē tu ní cávandíje i ya. Súcuan nahín coo.

⁸ Suhva cáhán maá Jítóho yō, Yaā jnī ndihí poder: Máá rí cúu nájñūhun letra A xīhna ñúhún jíin letra Z jeē sándihí na, chi máá rí ni squejéé ndihí te máá rí sínu, áchí máá Yaā iyó vijna, te ni iyo ya ní cáni, te coo ya ní cáni.

Jeē ní jito Juan jeē cujéhu luu Cristo

⁹ Máá rí cúu hermano rō Juan jíinánhan ró. Te inuú-ni ndóho ri jnūndóho jíin ró siquī jeē cávandíje yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ni yō sáha Jesucristo. Te siquī jeē ní nacani ri jnūhun Yaā Dios jíin jéē ní cachi ndāā rī jnūhun Jesucristo, jeē yúcuan ní cajñī i ruhū cuenta preso, te ni cachune i ruhū isla jeē naní Patmos.

¹⁰ Te in domingo ni jito ndijin rī jeē ni stéén maá Espíritu Santo nuū rī. Te ni jini sōho ri in jeē cána jee níhin ichi yátá rī nájñūhun jeē tívi trompeta.

¹¹ Te ni cahān jíin rí:

Máá rí cúu nájñūhun letra A xīhna ñúhún jíin letra Z jeē sándihí na, chi máá rí cúu Yaā iyó ndé xīhna ñúhún te coo ri ní cáni. Te na té rō núu in tutu tāca jéē cóto ró, te tají ró quihīn nuū ndihúxá grupo ñayuu cávandíje jeē cáyūcú i ní cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

¹² Yūcuán na te ni ndicó cóto ri jeē cóto ri ndé in cúu jeē cahān jíin rí. Te ná ni ndicó cóto ri te ni jito ri uxā candelero oro. ¹³ Te mēhñú ndihúxá candelero un índichi máá Yaā ní nduu té. Te ñúhun ya in sahma cáni jeē jinú nde nuū jehé yā. Te núhni in cinturón oro jicā yā. ¹⁴ Te ixi xíní yā chi yaa nájñūhun ixi lánchi, nájñūhun yuhvā volcán. Te tinūu ya ndíndē nájñūhun yáñuhūn. ¹⁵ Te jehé yā xíñú jito nájñūhun cā cuaán jéē ni ndúhvā nuū horno. Te níhin ndasí cáhán yā, nájñūhun níhin cuehē yūte náhnu.

¹⁶ Te ndaváha ya jnī ya uxā quimi. Te yuhu ya quénda jeē cáa nájñūhun

espada jeē xeén ndindúú lado, te suu cúu jnūhun ya jeē niní sándaā yā siquī cuéchi. Te nuū yā cáa nájnūhun niāndii jeē nándii ndaxín.

¹⁷ Te ná ni jito ri yā te ni cotúú rí nuū jéhē yā nájnūhun jeē ni jíhī rī. Te ni soó yā ndaváha ya siquī rī, te ni cahān yā:

Ma yūhu ró. Máá rí cúu Yaā iyó ndé xīhna ñúhún te coo ri ní cáni. ¹⁸ Te Yaā técu cúu ri. Chi ni jihī rī te ni natecu rī, te vijna chi técu rī ní cáni. Te máá rí jnī poder siquī cuéhyī jéhni ñayuu jíin síquī lugar nuū cáyūcu ánuá ndīyī. ¹⁹ Núu súcuan te tee ró núu tútu tāca jēé ní jito ró, jeē cúu vijna jíin jēé cóo ichi núu. ²⁰ Te yāha cúu jnūhun sāhi síquī ndihúxá quīmi ni jito ró jnī ndaváha ri, jíin síquī ndihúxá candelero oro. Ndhúxá quīmi ún cúu nájnūhun ndihúxá jeē cácujeñnu nuū ndihúxá grupo ñayuu cácujeñnu. Te ndihúxá candelero cúu nájnūhun ndihúxá grupo ñayuu cácujeñnu.

Jnūhun cuahān nuū ndihúxá grupo ñayuu cacandíje:

Jnūhun cuahān ñuu Efeso

2

¹ Tee ró jnūhun yáha na quíhín nuū jeē cujeñnu nuū ñayuu cácujeñnu ñuu Efeso: Súcuan cáhán ruhū, Yaā jeē jnī ndihúxá quīmi jíin ndaváha ri, te jíca cuu ri méhñú ndihúxá candelero oro. ² Je jíin rī tāca jniñu váha cásaáha ró, jeē cándihvī ni rō siquī jnūhun rī, jíin jēé cájendeyí ni rō. Te jíin rī jeē tu cájēhe ró jnūhun quivicoo ñayuu casáha néé méhñu ró. Te jíin rī jeē ní cajito ndee rō tēe cástáhú jeē cácahān de jeē cúu de apóstol, te ni cajini rō jeē tēe stáhú cácuu de. ³ Te ni cajendeyí ni rō ni candoho ró jnūndóho, te tu ní ndínuu ni rō jeē cácuu ndasí ró jíin jniñu rī. ⁴ Te vésú súcuan te íyó jecu jeē cahán rī nuū rō, chi tuá cáhīyo manī váha ró jíin rí nájnūhun ni íyo manī rō jíin rí quivī jehé. ⁵ Núu súcuan te nucūhun ni rō ndese ni castóo ró jnūhun jeē ni íyo manī rō jíin rí, te nacani ni rō, te na sáha ró nájnūhun ni casáha ró ndé

quivī ún. Te núu ma nácani ni rō, te yachī jeē rī te stáa ri candelero rō nuū ín, cúu jeē ma cuíñi ga rō jíin ñayuu cácujeñnu. ⁶ Te vésú súcuan te íyó ñin jeē váha cásaáha ró, chi tu cánujnahān cuiti ni rō cájito ró jniñu néé cásaáha ñayuu cándiquín jnūhun jeē steén Nicolás. Te suni máá rí tu nújnahān cuiti ni rī jito ri. ⁷ Ñayuu iyó sóho na chúsóhó i jeē cahán maá Espiritu Santo jíin táca grupo ñayuu cácujeñnu. Tāca ñayuu jeē cūndeyí síquī jeneé, cuāha ri jnūhun caji i ndehē jeē cúun xinī yújnu jeē sáha jeē cótecu i ní cáni. Te yujnu un ín nuū jardín Yaā Dios nde andiví, áchí yá.

Jnūhun cuahān ñuu Esmirna

⁸ Tee ró jnūhun yáha na quíhín nuū jeē cujeñnu nuū ñayuu cácujeñnu ñuu Esmirna: Súcuan cáhán ruhū, Yaā jeē iyó ndé xīhna ñúhún te coo ri ní cáni, te ni jihī rī te ni natecu rī. ⁹ Je jíin rī tāca jniñu váha cásaáha ró, jíin jnūndóho cándoho ró, jíin jēé cándoho ndáhú ró. Te vésú súcuan te cúca ró ndihī jeē ndíso jnūhun rī. Te jíin rī jeē cácahān neé ñayuu siquī rō jijnáhan ró. Ñayuu un cácahān i jeē ñayuu hebreo, ñayuu maá Yaā Dios cácuu i, te tuú chi cástáhú-ni i, chi sa ñayuu yñi ndaha Satanás cácuu i. ¹⁰ Te ma yūhú cuiti rō tāca jēé ndoho ró. Chi jexeén je yajni sáha jeē quivicoo sava ró vecāa jeē cóto ndee rohó jijnáhan ró, te ndoho ró jnūndóho uxī quivī. Te na cuíñi nihin ró ndé cuu rō, te cuāha ri premio jeē cótecu rō ní cáni. ¹¹ Ñayuu iyó sóho na chúsóhó i jeē cahán maá Espiritu Santo jíin táca grupo ñayuu cácujeñnu. Tāca ñayuu jeē cūndeyí síquī jeneé, ma nihín i jnūndóho jeē jnahnú ndetū i cuu i vuelta uū, achí yá.

Jnūhun cuahān ñuu Pérgamo

¹² Tee ró jnūhun yáha na quíhín nuū jeē cujeñnu nuū ñayuu cácujeñnu ñuu Pérgamo: Súcuan cáhán ruhū, Yaā jeē névāha espada jeē xeén ndindúú lado, te suu cúu jnūhun ri jeē sándaā rī siquī cuéchi. ¹³ Je jíin rī tāca jniñu váha cásaáha ró, te jíin rī jeē cáyūcu ró

mēhñu ñáyuu jeē ndácu Satanás jniñu nuū. Te vēsú súcuan te cáhīn nīhin ró jíin jnúhun rī, te tu ní cányūhu ró jeē cáchandíje ró rúhū, ni quivī ni jíhī Antipas, tēe ni squícu vāha ni nacani ndaā jnúhun rī. Chi ñuu rō cáyūcu ñáyuu cájejniñu nuū Satanás, te ni cajehni i Antipas. ¹⁴ Te vēsú súcuan te íyó jecu jeē cahán rī nuū rō jíin náhan ró. Chi mēhñu rōhó ñáyuu ñuu Pérgamo iyó sava ñayuu cándiquīn jnúhun ni steén Balaam. Chi tēe un ní steén de nuū Balac ndese squívī de ñayuu Israel cuēchi jeē cáji i jeē ni sócō nuū ídolo jíin jéē cosíquí ndéē jnáhan i. ¹⁵ Te suni íyó sava ñayuu mēhñu ró jeē cáchandíje ga i jnúhun ni steén Nicolás, te jnúhun ún chi tu nújnahan cuítī ni rī. ¹⁶ Núu súcuan te nacani ni rō síquī cuéchi ró. Chi núu tuú te yachī jeē rī jíin espada jeē quénda yuhu rī, te suu cúu jnúhun rī jeē sándaā rī síquī cuéchi. Te jíin yúcuan te stóho rī ñayuu jeē candíje ga jnúhun néé un. ¹⁷ Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cáchandíje. Táca ñáyuu jeē cúndeyí síquī jeneé, scáji rī i maná jeē yísāhī ichī ándiví. Te suni cuāha rī ñn yuū cuijín núū i, te nuū ún condee ñn síhví jéé, te ni ñn ñayuu ma cúni síhví un, chi máá-ni i jeē nihín. Achí yá.

Jnúhun cuahān ñuu Tiatira

¹⁸ Te tee ró jnúhun yáha na quíhín nuū jeē kujéhnū nuū ñáyuu cáchandíje ñuu Tiatira: Súcuan cáhán ruhū, maá Séhe Yaā Dios jeē ndíndēe tñūu rī nájnūhun yáñuhūn. Te jehē rī xíñú jíto nájnūhun cāa cuaán jéē ni ndúhvā. ¹⁹ Je jíin rī táca jniñu váha cásáha ró, chi cákundáhú ni rō jnáhan ró, te cáchandíje nīhin ró rúhū, te cájejniñu ró núū rī, te cájendeyí ni rō. Te jíin rī jeē vihyá gā cásáha ró vijna vēsú nde quivī jehé. ²⁰ Te vēsú súcuan te íyó jecu jeē cahán rī nuū rō. Chi íyó ñn ñahan mēhñu ró jéē naní Jezabel, te cájēhe ró jnúhun stéén ña nuū rō. Te áchí ña jeē nácani ña jnúhun Yaā Dios. Te tuú chi jíin jnúhun stéén ña te stáhú ña ñayuu cáchandíje jeē cácuu i

mozo rī. Te sáha ña jeē casíquí ndéē jnáhan i, jíin jéē cáyeji i jeē ni sócō nuū ídolo. ²¹ Te ni jēhe rī tiempo jeē na nácani ni ña, te tu cúni ña nacani ni ña stóo ña jeē casíquí ndéē ña. ²² Núu súcuan te na sáha rī jeē jécava ña jíin cuéhyī. Te táca ñáyuu casíquí ndéē jíin ña, suni cuāha rī jnúndóho xeēn nuū i, te núu ma nácani ni i stóo i jniñu néé nájnūhun sáha ña. ²³ Te sáha rī jeē cúu ñayuu jeē ni scándíje ña. Te súcuan cuni táca grupo ñayuu cáchandíje jeē maá rī cúu Yaā jíin ndíhī ndese cáa jeē níjnūnī jíin ánuá ñayuu. Te cuāha rī yāhu ñn ñn ró núu ndese ni casáha ró. ²⁴ Te sava ga rō jeē cáyūcú ñuu Tiatira, jeē tu ní cájetáhú jnúhun stéén ñahan ún, ni tu ní cájni ró jnúhun jeē cácahān i jeē jnúhun sáhi gá Satanás cúu, jíin máá ró cahán rī jeē ma tēe ga rī ñga jniñu síquī rō. ²⁵ Chi máá-ni jeē na quéndōo nīhin ró jíin jnúhun ndaā cáchandíje ró, te quéndōo nīhin ró jíin ndé quivī ndíji rī. ²⁶ Táca ñáyuu jeē cúndeyí síquī jeneé, jíin jéē squícu vāha jniñu cúni rī nde vijna te nde quivī sándíhī, sáha rī jeē kujéhnū i ndacu i jniñu nuū táca nación, ²⁷ nájnūhun ni sáha Tátá rī jeē kujéhnū rī ndácu rī jniñu. Te ndacu nīhin i jniñu nuū táca nación. Te nájnūhun cúun yúu i quísi tahú, súcuan squéhichī i ñayuu tu cájendetū nuū rī. ²⁸ Te sáha rī jeē coto i ruhū jeē luu kujéhnū rī quenda ndíjin rī, nájnūhun jíto i lucero jeē cáne cúndíjin. ²⁹ Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cáchandíje. Achí yá.

Jnúhun cuahān ñuu Sardis

3

¹ Te tee ró jnúhun yáha na quíhín nuū jeē kujéhnū nuū ñáyuu cáchandíje ñuu Sardis: Súcuan cáhán ruhū, maá Yaā jeē névāha ndíhúxá Espíritu Yaā Dios jíin ndíhúxá quími. Je jíin rī táca jniñu cásáha ró, te cácahān ñayuu jeē cátecu rō, te nuū rī chi nájnūhun ndíyī cácuu ró. ² Na nátahū ni rō, te ndejéé nīhin ró jíin jniñu jeē jecu na

iyó te ndúcú naa. Chi je jíni rī jeē tu squícu vāha vāha ró núu Yaā Dios. ³ Te na núcūhun ni rō tāca jnúhun jeē ní castéén nuū rō. Te cuatáhú ró jnúhun ún te nacani ni rō síquī cuéchi ró. Chi núu tú natahū ni rō, te cuajeē rī nuū rō ñn sanaa-ni nájnūhun jeē ñn sanaa-ni te quíji ñacuīhná, te ma cūni rō na hora jinū rī nuū rō. ⁴ Te vēsú súcuan te íyó nahín jecu rō ñuu Sardis jeē tu ní cásaha ró cuéchi, jeē cúu nájnūhun jeē tu ní sájnéhén ró sahma ró. Jeē yúcuan cuijín yaa coo sahma ró caca ró jíin rí, chí ñayuu vāha cácuu ró. ⁵ Chi tāca ñáyuu jeē cúndeyí síquī jeneé, cuāha ri sahma cuijín yaa cūhun i. Te ma ndáhva rī síhví i nuū libro jeē yosó síhví ñáyuu cotecu ní cāni. Te cuajnúhún rí i nuū Tatá rī jíin núu tācá ndajéhé yā. ⁶ Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cácan díje. Achí yá.

Jnúhun cuahān ñuu Filadelfia

⁷ Te tee ró jnúhun yáha na quíhín nuū jeē cujéhnú nuū ñáyuu cácan díje ñuu Filadelfia: Súcuan cáhán ruhū, Yaā ndoo Yaā ndaā, te névāha ri ndacáa rey David. Te máá rí núne jeē quívi ñayuu nuū ndácu ri jniñu, te ni ñn ma cúu casi, te máá rí jési, te ni ñn ma cúu nune. ⁸ Je jíni rī tācá jniñu váha cásaha ró. Te ni nune ri nájnūhun ñn yéhyí quívicoo ró, te ni ñn ma cúu casi. Chi vēsú jecu-ni fuerza rō iyó, te ni cacandíje ró jnúhun ri, te tu cájesi rō yuhu ró jéē cácan díje ró rúhū. ⁹ Te íyó sava ñayuu yíhi ndaha Satanás, te cácahān i jeē ñáyuu hebreo, jíin ñáyuu maá Yaā Dios cácuu i, te tuú chí cástáhú-ni i. Núu súcuan te sáha ri jeē jécóo i nuū rō te jecuñí yití i nuū rō, te cuni i jeē maní rī jíin ró. ¹⁰ Te vāha ni casquícu ró jnúhun ní cahān rī jeē cuánde yí ni rō. Te jeē yúcuan jnama ri rohó quívi jeē quíji ñn jnúndóho xeēn síquī ñáyuu ní cáhnu ñayívi, jéē cóto ndee ún i jíjnáhan i. ¹¹ Te yachí ndiji ri. Núu súcuan te quendōo níhin ró jíin jnúhun cácan díje ró, návāha ni ñn ma quénde premio rō.

¹² Tāca ñáyuu jeē cúndeyí síquī jeneé, sáha ri jeē cuu i nájnūhun síhín yuū luu ini templo Yaā Dios maá rí. Te ma cújiyo i nuū ndeé yá un. Te tee ri síhví Yaā Dios maá rí jneē i, jíin síhví jéé máá rí, jíin síhví ñuu Yaā Dios maá rí. Te ñuu un cúu Jerusalén jeé, te cuun quíji ichi ándiví ndé nuū Yaā Dios maá rí. ¹³ Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cácan díje. Achí yá.

Jnúhun cuahān ñuu Laodicea

¹⁴ Te tee ró jnúhun yáha na quíhín nuū jeē cujéhnú nuū ñáyuu cácan díje ñuu Laodicea: Súcuan cáhán ruhū, maá Yaā cúu jnúhun ndaā, Yaā cúu testigo vāha jeē cahán ndaā. Te máá rí ní sáha ndíhi jeē ní cáhān Yaā Dios jeē na jécóo. ¹⁵ Je jíni rī tācá jniñu cásaha ró. Te cácuu ró nájnūhun jeē tú mījin ni tú jihní, cúu jeē jecu-ni cácan díje ró jnúhun ri, te ni tu cájito uhū rō ni tu cándihví ni rō síquī. Te nacā jeē váha núu jeē mījin ró chí jéē jihní ró nuū. ¹⁶ Te tuú chí máá yívíxí-ni ró, chí ni tu cájito uhū rō ni tu cándihví ni rō síquī. Te jeē yúcuan squéhichí rī rohó nájnūhun ñn jeē tésíhi rí jeē séyūhu rí jeē tu nújnahan ni rī. ¹⁷ Te cácahān rō jeē cucá ró, te quéndōo vāha ró, te tu cúmaní ni ñn nuū rō. Te tu cásaha ró cuenta jeē cuécá íi cándoho ró, te ndáhú ndasí ró, te cácuáá ró, te máá ññ lí rō. Te tāca jéē yáha cúní cahān jeē tu cácan díje vāha ró. ¹⁸ Núu súcuan te cáhán rī jíin ró jeē nuū rī cuaan ró oro jeē ní ndúhvā nuū ñuhún te ni nduu máá nene, te suu cúu jeē sáha ri jeē coo cucá ndije ró ndíhi jeē ndíso jnúhun ri. Te nuū rī cuaan ró sahma cuijín cūhun ró, návāha tú cucanu rō jeē máá ññ lí rō, cúu jeē quéndōo ndaā rō sáha ri. Te cuaan ró tájnā nuū rī, quívi tinūu ró, návāha ndundijin tinūu ró, cúu jeē jecūhun ni rō jnúhun ri. ¹⁹ Tāca ñáyuu jeē cundáhú ni rī, chí cáhán rī nuū i te stóho ri i, návāha na chūhun ni i. Núu súcuan te na cóndihví ni rō jíjnáhan ró, te nacani ni rō jeē stóo ró cuéchi ró. ²⁰ Cuni sóho, chí

iin ri yehyí ánuá rō te cáhán rī. Te núu ndé-ni rōhó cuni sōho te nune ró yehyí ánuá rō, te quívi ri caji rī stāa jíin ró, te suni caji maá ró jíin rí. Te suu cúu jeē cóndee rī anuá rō. ²¹ Tāca ñayuu jeē cóndeyí síquī jeneé, cuāha rī jnūhun conene i jíin rí nuū mesa nuū ndácu ri jniñu. Chi máa rí suni ni snāa rī poder jeneé, te ni cucōo ri jíin Tátá rī nuū mesa nuū ndácu ya jniñu. ²² Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácadíje. Achí yá.

Tāca jeē cáyucú andiví cáchiñúhún núu yā

4

¹ Yūcuán na te ni ndacoto ri, te ni jito ri jeē nune iin yehyí andiví, te máa Yaā jeē ni cáhán jíin rí jeē xíhna ñúhún, ni cahán tucu jíin rí nájnūhun jeē tívi trompeta. Te ni cahán:

Caa quiji ró yáha, te na stéén rī nuū rō táca jniñu jeē cóo ichi núu gā, achí yá.

² Te máa Espíritu Santo ni scóto-ni ya ruhū. Te ni jito ri jeē andiví iin iin mesa nuū ndácu jniñu, te néne máa yá nuū mesa un. ³ Te máa yá jeē néne yūcuan cáa ya nájnūhun ndíndēé iin yuū quiyí ndíi chí iin yuū cuehé ndíi. Te iin ticō vēhnde ní jicó ndúu yuhu mesa yā, te ndíndēe nájnūhun iin yuū cuí ndíi. ⁴ Te xiin mesa yā ni jito ri jeē ní jicó ndúu ocō cuūn gā mesa nuū ndácu jniñu. Te nuū mesa un néne ocō cuūn tēe jéhnú cándiso jniñu. Te cáñuhun de sahma cuijín yaa, te xiní de cáñuhun corona oro. ⁵ Te nde nuū mesa nuū ndácu ya jniñu ndíndēé taja te níhin te cáhán taja. Te ichi núu mesa yā iin ndihúxá Espíritu Yaā Dios, jeē cáa nájnūhun uxā yiti náhnú jeē cayú ñuhūn. ⁶ Te ichi núu mesa yā ún suni iyó nájnūhun iin mar jeē jito quiyí nájnūhun vidrio.

Te xiin mesa yā un ní jicó ndúu cuūn jeē técu. Te iyó cuéhē tñūu ní cáhnú ichi núu jíin ichi yátá un. ⁷ Te iin jeē técu un cáa nájnūhun ndicaha. Te inga cáa nájnūhun stiquí. Te jeē

uní chi née nuū tée. Te jeē cuún chi cáa nájnūhun yaha chócó jéé jicó núu tachí. ⁸ Te ndicúún jeē técu un iyó iñū ndijēn jeē iin iin. Te máni máa tñūu cúu ní cáhnú nde jíin ní chíji ndijēn. Te nduú ñuú tu jécuiñí cuiti jeē cahán: Yaā iñ Yaā ndoo ndasí cúu máa Jítoho yō Yaā Dios, Yaā jniñí ndíhi poder, Yaā iyó vijna, te ni iyo yá ní cáni, te coo ya ní cáni.

Achí.

⁹ Chi máni jeē cácahán ndicúún un jeē cujéhnú ndasí máa Yaā jeē néne nuū mesa, Yaā jeē técu ní cáni cuiti. Te yíñúhún cácahán un jíin yá, te nácuatáhu núu yā. ¹⁰ Te tāca jínu jeē casáha súcuan, te ndihócó cuūn tēe jéhnú cándiso jniñu, cájecuiñí yiti de nuū Yaā jeē técu ní cáni cuiti, cáchiñúhún de ya. Te cástaa de corona de, cájequin de ichi núu jehé mesa yā. Te cácahán de:

¹¹ Jítoho ná te Yaā Dios na cúu ní. Te vāha ndasí Yaā cúu ní jeē cácahán i jeē luu cújéhnú ní, te cáhiyo yíñúhún i nuū ní, te jniñí ndíhi poder.

Chi máa ní ni sáha ndíhi jeē iyó, te síquí jeē súcuan ni cuu ni maá ní te ni jecōo ndíhi.

Achí de jíjnáhan de.

Jeē ní nune Londe Yaā Dios tutu

5

¹ Yūcuán na te ni jito ri jeē Yaā néne mesa jeē ndácu jniñu, ndaváha ya jniñí ya iin tutu cáni jeē ní tuu. Te yósó jnúhun ndíndúú lado tutu ún, te ndíhyú jíin úxā sello. ² Te ni jito ri iin ndajéhé yā jeē ndíso poder, te ni cahán jee:

¿Ndé iin cúu tēe vāha ndasí jeē cóndiso jniñu cahnde sello te nune tutu yáha? achí ndajéhé yā.

³ Te ni andiví ni ñayiví ni jeē iyó chíji ñayiví, tu ní iyo ni iin jeē cóndiso jniñu nune tutu ún, ni jeē cóto nuū. ⁴ Te ni ndahyū ndasí rí, chi tu ní iyo ni iin jeē cóndiso jniñu nune te cahu tutu ún, ni jeē cóto nuū. ⁵ Yūcuán na te ni cahán iin tēe jéhnú un jíin rí:

Ma ndahyú rō, chi íyó ñn Yaā ndíso jníñu jeē cahnde yā ndihúxá sello ndihyú tutu, te nune ya. Te máá yá chi íyó cuéhē poder yā, nájñuhun jeē iyó cuéhē fuerza ñn ndicaha. Te ni cacu ya chíji yucūn Judá, jeē cúu yucūn rey David. Te ni snáa yā poder táca jéneé.

⁶ Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un ín ya nuū ín mesa Yaā Dios, mēhñú ndicúún jeē técu, jíin tēe jéhnú cándiso jníñu. Te íyó úxā ndiqui jíin úxā tinūú Londe ún. Te tinūú un cúu ndihúxá Espíritu Yaā Dios jeē ní tají yá ni jengoo ní cáhnu ñayíví. ⁷ Te Londe un ní jequihin ya tutu jeē jníñu ndaváha Yaā jeē néne nuū mesa. ⁸ Te ná ni quihin ya tutu ún, te ndicúún jeē técu jíin ndihóco cuūn tēe jéhnú cándiso jníñu, ni cajecuiñi yití nuū yā. Te ná ñn ná ñn tēe jéhnú un cándaha yaa jeē naní arpa, jíin cóhō cūu oro jeē ñuhun chítú súje cutú. Te súje cutú un cúu máá táca jnúhun jeē cájicān tahuñ ñayuu yíhi ndaha Yaā Dios. ⁹ Te ni cajita de ñn yaa jeé, te suhva cáhán:

Vāha ndasí Yaā cúu ní jéē quihin ní tutu te cahnde ni sello jeē ndihyú.

Chi ni cajehni i níhín, te jíin níñi ni ní nacuaan ní ñayuu mēhñu táca raza, táca yuhu, táca ñuu, táca nación, návāha cuu i ñayuu Yaā Dios.

¹⁰ Te ni sáha ní jéē cuu i rey jíin sūtū nuū Yaā Dios, te ndacu i jniñu ini ñayíví. Achí de cájita de.

¹¹ Te ni jito ga rī, te ni jini sōho ri jeē cácahān cuehē ndajéhé yā jeē ní cajicó ndúu xiin mesa yā, jíin xiin ndicúún jeē técu, jíin xiin tēe jéhnú cándiso jníñu. Te íyó cuéhē ndasí millón ndajéhé un. ¹² Te suhva ni cacahān jee ya:

Vāha ndasí Yaā cúu Londe jeē ní cajehni i.

Te jeē yúcuan jníñu ya poder, te yōhyo cúcá yá, te yōhyo ndíchí yá, te ndíso ya cuehē fuerza,

te cáhīyo yíñuhún ndihí nuū yā, te luu cújéhnú ya,

te cácahān i jeē váha ndasí Yaā cúu ya. Achí.

¹³ Te suni ni jini sōho ri jeē cácahān ndihí jeē ni sáha Yaā Dios jeē iyó ini andiví jíin ini ñayíví jíin chíji ñayíví jíin ini mar. Te ndivii un ní cacahān:

Cúsí ni yō cahán yō jeē yóhyo váha Yaā cúu máá Yaā néne mesa nuū ndácu ya jniñu,

jíin Yaā cúu Londe Yaā Dios.

Te na cóo yíñuhún yó nuū yā, chí cújéhnú luu ya,

te jníñu ya poder ní cáni cuítí.

Achí.

¹⁴ Te ni cacahān ndicúún jeē técu:

Súcuan na cóo, achí.

Te ndihóco cuūn tēe jéhnú cándiso jníñu ni cajecuiñi yití de, te ni cachiñuhún de nuū Yaā jeē técu ní cáni cuítí.

Siquí ndihúxá sello

6

¹ Yūcuán na te ni jito ri jeē Yaā cúu Londe Yaā Dios, ni jehnde yā ñn jeē uxá sello un. Te ni jini sōho ri jeē cahán ñn jnáhan ndicúún jeē técu ún, nájñuhun cáhán taja:

Nehen te cuni rō.

² Te ni ndacoto ri, te ni jito ri ñn caballo cuijín. Te jeē yosó síquī tī un ndáhá ñn arco jeē stáva nduva. Te ni jecūhun ñn corona xiní. Te ni quenda ni jecūhān, te ni cundeyí síquī ndihí.

³ Yūcuán na te Londe un ní jehnde yā sello uū. Te ni jini sōho ri jeē cahán inga jnáhan ndicúún jeē técu:

Nehen te cuni rō.

⁴ Te ni quenda ñn caballo cuehé, te jeē yosó síquī tī ndíso jníñu jeē snáa jnúhun cáyūcu mání ñayuu ñayíví, te quejéé i cahni jnáhan i. Te ni nihín ún ñn espada cáhnu.

⁵ Yūcuán na te Londe un ní jehnde yā sello uní. Te ni jini sōho ri jeē cahán inga jnáhan ndicúún jeē técu:

Nehen te cuni rō.

Te ni ndacoto ri, te ni jito ri ñn caballo jnuú. Te jeē yosó síquī tī ndáhá ñn balanza jeē chícuāha, chí

coo jnamā xeēn. ⁶ Te mēhñú ndicúún jeē técu un ní jini sōho ri ñn jeē cahán:

Máá ñn kilo-ni trigo nihñn i jíin yáhu i jeē sájniñu i ñn quiví. Te núu cebada, te uní-ni kilo nihñn i jíin yáhu i jeē sájniñu i ñn quiví. Te aceite jíin vino chi ma sáha ró jéē cúmaní. Achí.

⁷ Yūcuán na te Londe un ní jehnde yā sello cuūn. Te ni jini sōho ri jeē cahán tucu inga jnáhan ndicúún jeē técu:

Nehen te cuni rō.

⁸ Te ni ndacoto ri, te ni jito ri ñn caballo cuaán yaa, te jeē yosó síquī tī cúu máá cuéhyī jéñni ñayuu. Te ichi yátá un ndíquin máá jnúhun jeē quiví ñayuu lugar nuū cáyūcu ánuá ndíyī. Te ndíndúú un cándiso jníñu jeē ndónnda síquī ñn jeē ndicúún parte ñayiví, te cuu sáha jeē cúu ñayuu jíin guerra, jíin jnamā, jíin cuéhyī xeén, jíin táca quiti xeén jeē iyó ñayiví.

⁹ Yūcuán na te Londe un ní jehnde yā sello uhūn. Te chíji altar cáhnu ni jito ri anuá ñayuu jeē ní cacandíje jnúhun Yaā Dios te ni canacani ndaā i jnúhun ya, te síquī yūcuan ní cajehni ñayuu i. ¹⁰ Te ni cacana jee ánuá un:

Jitoho ná Yaā Dios, maá ní cúu Yaā ndoo te vāha squícu ní jéē ni jéjnūhun ní. ¿Te nasaa ga tiempo coo te sándaā ni jéhē ná, te nacuaña ní jéē ndútahū ñayuu ñayiví jéē ní cajehni sáñá? áchí.

¹¹ Yūcuán na te ni jēhe ya sahma cuijín cuhun i jíjnáhan i, te ni cahán yā jíin i jeē na ndétátú i jecu gā tiempo. Chi iyó gá hermano i jeē cájejniñu nuū yā, jeē suni jini ñúhún cuu i návāha jīnu número i, áchí yá.

¹² Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te ni cujnúú níñdii nájnūhun ñn sahma jnúú. Te ní yóo ni nduu nájnūhun niñí. ¹³ Te quimi andiví ní nngoyo nuū ñúhún nájnūhun nngoyo ndehē yihí yujnu higo sáha tachí níhin. ¹⁴ Te andiví ní cujiyo cuahán nájnūhun jeē nátuu ñn tutu cáhnu. Te táca yucu jíin táca isla ni cujiyo cuango inga lado. ¹⁵ Te táca rey ñayiví, jíin jéē cácujeñnu, jíin jéē cucá, jíin táca capitán, jíin jéē cándiso poder,

jíin mozo jeē ní cajeen ñayuu, jíin tée cásjniñu cuenta maá, ní cachisāhi máá ini yaū cava jíin méhñu cava chíji yucu. ¹⁶ Te ni cacahán i jíin yucu jíin cava:

Ndicó cáva síquī rī, na quisāhi rí návāha tú coto máá Yaā néne mesa ndácu jniñu, jíin Yaā cúu Londe jeē cuáha ya castigo xeén ruhū. ¹⁷ Chi ni quee maá quiví cáhnu jeē cuáha ya castigo, ¿te ndé ñn canda condichi nuū yā? achí i jíjnáhan i.

Ñayuu tāca yúcūn Israel jeē ni jécondee sello jneē

7

¹ Te ná ni cuu jniñu yáha, te ni jito ri cuūn ndajéhé yā jeē cáhñn ndicúún lado ñayiví. Te cájesi yā nuū ndicúún tachí, návāha ma quee nuū ñúhún ni nuū mar ni nuū ní ñn yujnu. ² Te suni ni jito ri inga ndajéhé yā, vēji ichi núu cáne niñdii. Te ndáhá yā sello Yaā Dios, Yaā técu. Te ni cahán jee ya jíin ndicúún ndajéhé un jéē ndíso jníñu jeē sáha daño nuū ñúhún íchi jíin núu mar:

³ Ma sáha ró daño nuū ñúhún ni nuū táca yujnu ni nuū mar, chí nde na tée yó sello jneē tāca ñayuu cájejniñu nuū Yaā Dios yō.

⁴ Te ni jini sōho ri jeē achí jéē iyó ciento uū xico cuūn mil ñayuu jeē ni jécondee sello jneē. Te ñayuu un cácuu tāca yúcūn ñayuu Israel. ⁵ Te iyó úxī uū mil ñayuu cácuu yucūn Judá jeē ni jécondee sello, jíin úxī uū mil yucūn Rubén, jíin úxī uū mil yucūn Gad, ⁶ jíin úxī uū mil yucūn Aser, jíin úxī uū mil yucūn Neftalí, jíin úxī uū mil yucūn Manasés, ⁷ jíin úxī uū mil yucūn Simeón, jíin úxī uū mil yucūn Leví, jíin úxī uū mil yucūn Isacar, ⁸ jíin úxī uū mil yucūn Zabulón, jíin úxī uū mil yucūn José, jíin úxī uū mil yucūn Benjamín. Ndihi yucūn yáha cúu jeē ni jécondee sello.

Ñayuu cuehē jeē cáñuhun sahma cuijín

⁹ Te ná ni cuu jniñu yáha te ni ndacoto ri, te ni jito ri cuehē ndasí ñayuu.

Te cúu i ñayuu t́acá nacíon jíin táca raza jíin táca yuhu jíin táca ñuu. Te cáhíin i nuū mesa nuū ndácu Yaā Dios jniñu jíin núu maá Yaā cúu Londe. Te siquī jeē cuehé ndasí i, te ni ñin ma cúu cahu nasaa i cúu. Te cáñuhun i sahma cuijín, te cándāhá i ñuū. ¹⁰ Te ni cacana jee i:

Yaā Dios maá yó cúu jeē ní jnama yóhó,

Yaā jeē néne nuū mesa jeē ndácu jniñu,

jíin Yaā cúu Londe Yaā Dios.

Achí i jíináhan i. ¹¹ Te ndihí ndajéhe ní cajicó ndúu yā cáhíin ya xiin mesa Yaā Dios, jíin xiin t́ee jéhnú cándiso jniñu, jíin xiin ndicúún jeē técu. Te ni cajecuiñi yiti yá ni cachiñúhún yá Yaā Dios ichi núu mesa yā. ¹² Te ni cacahán yā:

Amén. Cúsiñi ni yó cahán yó jeē yóhyo vāha Yaā cúu Yaā Dios maá yó.

Te luu cújéhnú ya te ndíchi yá.

Te na nácuatáhu yó nuū yā, te na cóo yíñúhún yó núu yā.

Chi jniñi ya poder, te ndíso ya cuehé fuerza jeē ñi cáni cuiñi. Amén.

Achí táca ndajéhe yā.

¹³ Yūcuán na te ni cahán ñin t́ee jéhnú un jíin rí:

¿Ndé ñayuu cúu yāha jéē cáñuhun sahma cuijín, te ndé chi véjicoo i?

¹⁴ Te ni cahán rí jíin de:

Maá ní cúu jeē jiní, Tátā.

Te ni cahán de jíin rí:

Yāha cácuu ñayuu jeē ní cayāha i jeē ní cajito i jnūndóho xeēn. Te ni canacate i sahma i jíin ñiñi maá Londe, te ni nduyaa vāha, cúu jeē ní ndundoo ánuá i ni sáha ya. ¹⁵ Jeē yúcuán cúu jeē cáhíin i nuū mesa nuū ndácu Yaā Dios jniñu, te cájejniñu i ini templo yā nduú ñuú. Te Yaā jeē néne nuū mesa, coto ya i jeē quéndōo vāha i nuū yā. ¹⁶ Te ma cúu gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihni. ¹⁷ Chi máá Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihín yā jíin i nuū cáne ndute jeē cótecu i sáha. Te Yaā Dios

nacuaa yā ndute núu i jíináhan i, te ma ndahyú gā i. Achí t́ee jéhnú ún.

Siquī sello uxā jíin cóhō cūu oro

8

¹ Te Londe un ní jehnde yā sello uxā jeē ndihyú tutu ún, te nayúu-ni ni Iyo ini andiví nájnūhun sava hora. ² Te ni jito ri ndihúxá ndajéhe jeē cáhíin nuū Yaā Dios. Te ni cajéhe uxā trompeta nuū ndajéhe un. ³ Yūcuán na te ni quee inga ndajéhe, ndáhá yá ñin cohō cūu oro, te ni jecuiñi yā nuū altar. Te ni jéhe cuehé sūje cutú núu yā, návāha socō yā jíin jnúhun cájicán tahu ndihí ñayuu cácandíje Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñu. ⁴ Te nuū cohō cūu jniñi ndajéhe un ní cane ñuhmā sūje cutú, ni caa nuū Yaā Dios nde jíin jnúhun cájicán tahu ñayuu cácandíje Yaā Dios. ⁵ Yūcuán na te ni quihín ndajéhe un cohō cūu un. Te ni scutú yá t́icua ñuhún jeē cayú nuū altar. Te ni jete yā nde ini ñayiví. Te ni sáha jeē ni cáhán taja, te ni ñihín, te ni ndindéé taja, te ni jnaa.

Jnúhun siquī trompeta

⁶ Yūcuán na te ndihúxá ndajéhe jeē cándāhá ndihúxá trompeta, ni casátūhva ya jeē tiví yā.

⁷ Te ndajéhe ñin ni tiví yā trompeta. Te ni cuun ñiñi ini ñayiví jíin ñuhún jeē ni sácā núu jíin ñiñi. Te ni cayú ñin jeē uní parte ñayiví, jíin ñin jeē uní parte yujnu, jíin ñin jeē uní parte ite cuiñi.

⁸ Te ndajéhe uū ni tiví yā trompeta. Te ñin nájnūhun ñin yucu cáhnu jeē cayú ñuhún ni ñingava cuahán nuū mar. Te ñin jeē uní parte mar ni nduu ñiñi. ⁹ Te ni jihí ñin jeē uní parte quiti ñuhún nuū mar. Te ni naa cuehé barco, chí ñin ñin jeē táca úní ni naa.

¹⁰ Te ndajéhe uní ni tiví yā trompeta. Te ni ñingava ñin quimi cáhnu ichi ándiví, te cáyú nájnūhun cáyú ñin yiti cáhnu. Te ni ñingava siquī ñin ñin jeē táca úní yūte jíin núu cáne ndute. ¹¹ Te quimi un nání quimi uvuā. Te ñin jeē uní parte ndute ni

cuu uvuā. Te ni cajihī cuehē ñayuu ni sáha jeē ní cuu uvuā ndute ún.

¹² Te ndajéhé cuūn ni tivī yā trompeta. Te ñin jeē uní parte niāndii jín yóo jín quími ni tiví. Te ni ndunee ñin jeē uní parte i, te tuá ni cúndijin ñin jeē uní parte nduú jín ñuú.

¹³ Te ni ndacoto ri, te ni jini sōho ri jeē cána jee ñin ndajéhé yā jeē ndáva cuahān sava andiví:

Nacā xeēn gā ndoho ñayuu cáyucú ini ñayiví, chi je yajni cuecu uní gā trompeta jeē tiví uní gā ndajéhé, achí yá.

9

¹ Te ndajéhé uhūn ni tiví yā trompeta. Te ni jito ri jeē ichi ándiví ní ningava ñin quími nde ini ñayiví. Te nuū quími un ní jēhe ndacáa jeē núne tūhñchi cúnú ndasí. ² Yūcuán na te ni nune un tūhñchi, te ni cane ñuhmā ni caa nájnūhun ñuhmā ñin ijnū cáhnu. Te ñuhmā un ní sáha jeē ní cunee niāndii jín ní núu tachí. ³ Te nuū ñuhmā un ní canecoo tíca ndicuéhyí, ni jitē núu ti ní cáhnu ñayiví. Te ni jēhe ya jnūhun jeē sáha ti nájnūhun cásáha tisuhma xeēn jeē iyó ini ñayiví. ⁴ Te ni ndacu ya jniñu nuū tī jeē ma sáha ti daño ite jín yúcū cuí jín yujnu, chi máni ñayuu jeē tu ndéé sello Yaā Dios jneē i cúu jeē tuu ti. ⁵ Te tu ní jēhe ya jnūhun jeē cáhni tī ñayuu, chi máni jeē stóho ti i uhūn yoō. Te sáha ti jeē jetú i nájnūhun jeē jetú ñayuu jeē túu tisuhma i. ⁶ Te quiví ún nducú ndasí ñayuu modo cuu i, te ma nihín i modo. Te vésú cuní i cuu i, te tú na modo cuu i.

⁷ Te tíca ndicuéhyí un cáa ti nájnūhun caballo jeē cáhīyo tūhva quingoo nuū cuájnahan. Te xinī tī ñūhun nájnūhun corona oro. Te née ti nuū té. ⁸ Te iyó ixi ti jeē cáa nájnūhun ixi xíní ñahan. Te jnūhun ti cáa nájnūhun jnūhun ndicaha. ⁹ Te ní tī ndihyú nájnūhun sahma cáa. Te níhin ndijēn tī nájnūhun níhin jeē cuángoo cuehē caballo nuū guerra cáñuhun ti carreta. ¹⁰ Te suhmā tī ndíso iñu nájnūhun tisuhma. Te jín súhmā tī cuu stóho ti ñayuu uhūn yoō.

¹¹ Te iyó ñin jeē cujéhnu nuū tī, te suu cúu ndajéhé jexeén jeē ndíto tūhñchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jēe snáā.

¹² Je ni yāha ñin jnūndóho, te iyó úu gā jnūndóho jeē quíji.

¹³ Te ndajéhé iñu ni tiví yā trompeta. Te ni jini sōho ri ñin jnūhun jeē ní cáhān nde mēhñú ndicúun yiquí altar oro jeē íin nuū Yaā Dios. ¹⁴ Te ni cahān un jín ndajéhé iñu jeē ndahá trompeta:

Nandají ró ndicúun ndajéhé jeē nuhñi yuhu yúte cáhnu jeē naní Eufraates, achí.

¹⁵ Te ni nandají ndicúun ndajéhé un, návāha cahñi ñin jeē uní parte ñayuu ñayiví. Chi je cáhīyo tūhva ndajéhé un jeē siquí maá hora jín quiví jín yóo jín cuíyā jeē cóo súcuan. ¹⁶ Te ni jini sōho ri jeē achí jēe iyó úu ciento millón soldado jeē cáyoso caballo.

¹⁷ Te ni steén gā yā nuū rī, te ni jito ndijin rī tācá caballo. Te tēe cáyoso siquí tī cáñuhun de camisa cáa jeē cuehé, jeē ndeé, jín jēe cuaán. Te xinī caballo un cándāa nájnūhun xinī ndicaha. Te yuhu ti quénda ñuhūn jín ñúhmā jín azufre. ¹⁸ Te jín úní jeē quénda yuhu caballo un, te ni jihí ñin jeē uní parte ñayuu, suu jín ñūhūn jín ñúhmā jín azufre. ¹⁹ Chi yuhu ti jín súhmā tī iyó fuerza jeē cáhni tī ñayuu. Chi suhmā tī cándāa nájnūhun coō, te iyó xíní, te jín yúcuan stóho ti ñayuu.

²⁰ Te sava ga ñayuu jeē tu ní jíhí jín táca jnūndóho yāha, tu ní nácani ni i stóo i ídolo jeē ní casáha i. Te tu ní stóo i jeē cáchiñúhún i tāca táchí jín ídolo jeē ní cuvāha jín oro jín plata jín cáa cuaán jín yúu jín yujnu. Te tācá un chi tu cúu coto, ni tu cúu cuni sōho, ni tu cúu caca. ²¹ Te ni tu ní cáncani ni i stóo i jeē jéhni i ndīyí, jín jēe satásí i, jín jēe jíca jnéni i, jín jēe sacuíhná i.

Ndajéhé jeē ndahá libro lulí

10

¹ Te ni jito ri inga ndajéhé yā jeē ndíso poder, ni cuun ya ichi ándiví. Te ñúsúcún yá vicō, te xiní yā ñúhun ticō vēhndé. Te nuū yā ndíndēe nájñūhun niāndii, te sīhin ya cáa nájñūhun uū sīhīn jeē cáa ná cáa ñuhūn. ² Te ndáhá yá ñn libro lulí jeē núne. Te ni jeni ya jehē váha ya nuū mar, te jehē jecó yá nuū ñúhun íchi. ³ Te ni cana jee téyí yá, nájñūhun jeē ndahyú ndicaha. Te ná ni cana jee ya, te ni cacahān uxā taja. ⁴ Te ná ni cacahān uxā taja, te je íyó túhva ri jeē tée ri jñūhun un núú. Te ni jini sōho ri ñn jñūhun ichi ándiví jeē ni cáhān jíin rí:

Chuvāha ró táca jñūhun jeē ní cacahān uxā taja ún, te ma steén rō, ni ma tée ró, áchí.

⁵ Yūcuán na te ndajéhé jeē ní jito ri jeē ín nuū mar jíin núú ñúhun, ni ndonehen ya ndaha váha ya ichi ándiví. ⁶ Te ni ndacunehen ya sīhví máá Yaā jeē técu ní cáni, Yaā ni sáha andiví jíin ñáyiví jíin mar jíin táca ndihí jeē iyó ini. Te jíin sīhví yá un ní cahān teyí ndajéhé:

Ma cucuéé gá jeē jínu ñayiví. ⁷ Chi núu na quéjéé ndajéhé uxā tiví yā trompeta, yūcuán na te squícu-ni Yaā Dios jñūhun sáhi yá, nájñūhun ni castūhun yá nuū táca mozo yā, tée ni canacani jñūhun ya nde jenahán, áchí ndajéhé.

⁸ Yūcuán na te máá jéé ní jini sōho ri jeē ni cáhān ichi ándiví, ni cahān tucu jíin rí:

Cuáhán te quihin ró libro lulí jéé núne jeē ndahá ndajéhé jeē ín nuū mar jíin núú ñúhun, áchí.

⁹ Te ni jehēn rī nuū ndajéhé un, te ni jicān rī jeē na cuáha ya libro lulí un núu rī. Te ni cahān yā:

Quihin te caji rō. Chi vixí sáha ini yuhu ró nájñūhun ndūxi, te chíji ró chí cuhiyá sáha, áchí yá.

¹⁰ Yūcuán na te ni quihin ri libro lulí jeē ndahá ndajéhé yā, te ni yeji rī. Te vixí ni sáha ini yuhu ri nájñūhun ndūxi. Te ná ni cuu ni yeji rī, te ni jité iyá ni rī. ¹¹ Te ni cacahān jíin rí:

Cánuú jéé nacani tucu ró jñūhun Yaā Dios, ndese coo síquī ñayuu cuehē ñuu jíin cuéhē nación jeē sīn sīn yuhu, jíin síquī cuehē rey cándacu jniñu, áchí jíin rí.

Siquī uū testigo yā

11

¹ Yūcuán na te ni cajēhe ñn yujnu nuū rī, jeē cúu ñn cūhva jeē chícuāha. Te ni cacahān jíin rí:

Ndocuñī te chícuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñúhún núu yā yūcuán. ² Te ma chícuāha ró patio yatā templo. Chi je ni jēhe ya nuū ñáyuu tācá ñuu jicá. Te coyūcú i ini ñuu ñi yāhá, te uū xico uū yoō cueñū i síquī ñuu. ³ Te tají rí uū testigo rī jeē nácani jñūhun ri mil uū ciento unī xico quiví. Te cuhun de sahma ndáyí jéé cácuuñhyá ni de síquī cuéchi ñayuu, áchí yá.

⁴ Te ndíndúú testigo un cúu nájñūhun ndíndúú yujnu olivo jíin ndíndúú candelero jeē ín nuū Yaā Dios, Yaā chíi ñayiví. ⁵ Te na-ni ñayuu núu nducú sáha ndevāha jíin ndíndúú testigo un, te quenda ñuhūn yuhu ndíndúú de, te cayū ndihí ñayuu cájito uhū i de. Te súcuān cuu táca ñayuu jeē nducú sáha ndevāha jíin de. ⁶ Te íyó poder ndíndúú testigo un jéé cási de jeē ma cúun saū ní tiempo jeē nácani de jñūhun ya. Te suni íyó poder de sáha de jeē nduu niñī tācá ndute. Te cuu stíví de ñayiví jíin ndínuū jñūndóho, núu nasaa jínu cácuñi de. ⁷ Te ná ni jínu ni canacani de jñūhun ya, yūcuán na te quenda quití xéén jeē néne túhnchi ún. Te cuajnáhan jíin ndíndúú de, te cundeyí jíin de, te cahni de. ⁸ Te ndíyí ún cava nuū yáhu ñuu cáhnu nuū ní cajehni i máá Jítoho yō jicá cruz. Te ñuu un cácahān yatá i jeē ñuu Sodoma jíin Egipto cúu, síquī jeē xeēn cuéchi íyó ñuu ún. ⁹ Te ñayuu tācá ñuu, táca yúcūn, táca yuhu, táca nación, chí coto i jeē cáva ndíndúú ndíyí un unī quiví yosáva, te ma cuáha i jñūhun jeē quíndūji. ¹⁰ Te ñayuu ní

cáhnū ñayīví cusī ndasí ni i jeē ní cajihī de, te sáha i vico, te cuāha i regalo nuū jnáhan i. Chi ndindúú téé ni canacani jnūhun ya ún, ní casáha de jeē ní candoho ndasí ñáyuu ñayīví. ¹¹ Te jeē yáha unī quivī yosáva ún, te Yaā Dios sáha ya jeē nastáa tachī de, te ndonda-ni de. Te yūhú ndasí ñáyuu coto i jeē ní canatecu de. ¹² Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, áchí.

Te ndaa de mēhñu vícō quingoo de andiví, cuni ñayuu cájito uhū i de. ¹³ Te máá hora un jnáa ndasí, te ndicó cáva naa ñn jeē uxí parte ñuu ún. Te jíin ñujnáa ún cuu uxā mil ñayuu. Te táca gá ñayuu jeē ndóo, yūhú ndasí i, te cahān i jeē kujéhnū Yaā Dios jeē ndeé andiví.

¹⁴ Súcuan yāha jnūndóho uū, te yachī coo jnūndóho unī.

Siquī trompeta uxā

¹⁵ Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān: Tācá nación ñayīví je ni nuquihī ndaha máá Jítoho yō Yaā Dios jíin Cristo jeē ní tají yá.

Te ndacu ya jniñu ñí cáni cuiti. Achí.

¹⁶ Yūcuán na te ndihócó cuūn tēe jéhnū cándiso jniñu jeē cánene de mesa de ichi núú Yaā Dios, ni cajecuiñī yití de, ni cachiñúhún de ya. ¹⁷ Te ni cacahān de:

Na cútahū na núú ní, Tátā Yaā Dios, chi máá ní jñí ndihí poder, te cúu ní Yaā iyó vijna, te ni iyo ní ñí cáni, te coo ní ñí cáni.

Te ni najñi ní ndivii jeē iyó, te jíin poder ni ní quejéé ní ndácu ní jniñu nuū.

¹⁸ Ñayuu tācá nación ni caquitī ni i siquī ní.

Te vijna chi ni quee quivī jeē cuáha ní castigo i,

jíin jéé sándaā ní jniñu tāca ndíyi.

Te cuáha ni táhū nuū tāca mozo ni jéé ní canacani jnūhun ní,

jíin núú tāca ñáyuu cájejniñu nuū ní, jíin ñáyuu cáchiñúhún núú ní,

cúu ñayuu cácujehnū jíin jéé tuú.

Te vijna te snáhnú ndetū ni ñáyuu castiví ñayīví.

Achí de jíjnáhan de.

¹⁹ Yūcuán na te ni nune templo Yaā Dios jeē iyó andiví. Te ni cajito ñayuu jeē yúcuan íne yejnū jeē ñúhun contrato yā. Te ni ndindéé taja, te ñhin, te cáhán taja, te ni jnáa, te ni cuun xeēn ñiñí.

Jnūhun ñahan jíin cóo cáhnū

12

¹ Yūcuán na te ini andiví ní cane ñn jeē nahán náā ni yō jíto yó: ñn ñahan jeē ñúhun ña niāndii nájnūhun sahma, te íin jehē ña siquī yoó, te ñúhun ñn corona xinī ña jeē ndeé uxí uū quimí.

² Te ñúhun sēhe ña. Te ni ndahyū cohó ña jeē ndóho ña jéhnū chīji ña jeē scácu ña i. ³ Yūcuán na te ini andiví

ní cane tucu inga jeē náā ni yō jíto yó: ñn coo cuehé cáhnū ndasí. Te iyó úxā xinī tī jíin úxí ndiquí tī. Te ndihúxá xinī tī ñúhun corona. ⁴ Te jíin súhmā tī ni stáa tī ñn jeē uní parte quimí jeē iyó andiví, te ni síngoo tī ini ñayīví.

Te ni ine tī nuū ñahan jeē scácu sēhe ún, ndétu tī cocó tī sēhe ña jeē jé yajni cacu i. ⁵ Te ni scácu ña ñn sēhe yí, te sūchi un ní jeconaā jeē ndácu ñhin i jniñu nuū ndivii nación. Yūcuán na te ni ndoñúhún sēhe yí ña ún, ni ndaa i cuahān i nde nuū íin mesa Yaā Dios nuū ndácu ya jniñu. ⁶ Te ñahan un ní jinu ña cuahān ña nde nuū ñúhun téhé núú iyó ñn lugar jeē ní sátúhva Yaā Dios. Te yūcuán condee ña ñhin ña jeē cáji ña mil uū ciento unī xico quiví.

⁷ Yūcuán na te ni cajejnáhan ini andiví. Chi ndajéhé jéhnū ga jeē naní Miguel jíin táca ndajéhé jeē cácu mozo nuū yā, ni cajejnáhan jíin cóo cáhnū. Te coo un jíin táca ndajéhé maá, ni cajejnáhan jíin yá. ⁸ Te tu ní cácuñdeyí tī, te tuá ní cúu coyūcu tī andiví. ⁹ Súcuan ni cuu jeē ní quenehen ya coo cáhnū un jéé iyó ndé jehán ndasí. Te nání tī jexeén jíin Satanás, te máá tī cúu jeē stahú ndihí ñayuu ñayīví. Te ni scáne ya tī nde ini ñayīví jíin táca ndajéhé tī.

10 Yūcuán na te ni jini sōho ri ñn jnūhun jeē cahán jee ichi ándiví:

Je ni quee quiví jeē jínu jnama ya yohó, jíin jéē steén ndijin yā jeē jnā ya poder, jíin jéē ndácu ya jniñu, jíin jéē ndáso jniñu máá Cristo jeē ní tají yá. Chi je ni quenehen ya maá jéē cahán cuēchi siquí tǎcá hermano yō. Chi nduú ñuú ni cahán cuēchi siquí i nuū Yaā Dios maá yó. 11 Te ni cacundeyí i siquí Satanás un, ní sáha jnūhun jeē ni jíin Yaā cúu Londe, jíin jéē ní cacahán ndaā i jnūhun Yaā Dios, jíin jéē tu ní cundáhú ni i máá i, chi ni jéhe i jnūhun candíje i vésú núu cuu i jeē siquí yā. 12 Núu súcuan te na cúsi ndasí ni tǎca rǎhó jéē cáyūcú andiví. Te nacā xeē ndoho tǎca rǎhó jéē cáyūcú ini ñayiví jíin núu mar. Chi ni cuun jexeén ni jinū nuū rǎ jijnáhan ró. Te quití xeē ni, chi jíin jeē tuá coo cuehē gā tiempo jeē stahú ñayuu. Achí.

13 Te ni jini coō cáhnu ún jéē ni scáne ya maá cuáhán ini ñayiví, te ni jinu ti jíin ñahan ní scácu sēhe yí, jeē xeēn sáha ti jíin ña núu. 14 Te ni cajéhe uū ndijēn yaha chócó cáhnu nuū ñahan ún, návāha ndava ña quihñ ña lugar ña nuū ñúhun téhé, te cācu ña nuū coō ún. Te yūcuán condee ña uní cuiyā yosáva, te nihñ ña jeē cáji ña. 15 Te yuhu cóo un ní cane ndute nájnūhun ñn yūte cáhnu, cuahán yatā ña návāha jneni ña. 16 Te máá ñuhun chi ni chindéé ñáhán ñahan ún, chi ni nune-ni, te ni nungoo yūte jeē ní cane yuhu cóo ún. 17 Yūcuán na te xeēn ni quití ni coō cáhnu ni jito ti ña. Te cuahán tǎ cuajnáhan ti jíin tǎca gá sēhe ña, suu ñayuu casquícu jniñu ndácu Yaā Dios te cá candíje vāha i jnūhun Jesucristo.

Jnūhun siquí uū quití xéén

13

1 Te ni indichi rǎ yumár. Te ni jito ri jeē ní cane ñn quití xéén ini mar. Te íyó úxā xiní tǎ jíin úxí ndiqui ti. Te ndihúxí ndiqui ti ñúhun corona. Te ndihúxá xiní tǎ ndeé ñn síhví néé jéē quití ni Yaā Dios sáha. 2 Te quití xéén

jeē ní jito ri ún, cáa ti nájnūhun cuiñí, te ndaha ti cáa nájnūhun ndaha oso, te yuhu ti cáa nájnūhun yuhu ndícaha. Te nuū quití un ní jéhe coō cáhnu poder maá jíin mesa nuū ndácu máá jniñu. Te ni sáha jeē cujéhnu ndasí quití ún. 3 Te ni jito ri jeē ni tújǎ ñn xiní tǎ, jeē jé yajni cuu tǎ nuú. Te ni nduvāha ti jeē ni tújǎ tǎ. Te nahán ní naa ni ñayuu ní cáhnu ñayiví ní jito i, te ni cajetáhú i nuū tǎ. 4 Te ni cachiñúhún i coō cáhnu siquí jeē ni sáha ti jeē cujéhnu ndasí quití xéén un, te suni ni cachiñúhún i quití xéén un. Te ni cacahán i:

Tú ni ñn jeē cujéhnu nájnūhun quití yáha, te tú ni ñn cundeyí cuajnáhan jíin tǎ, áchí i jijnáhan i.

5 Te tu ní jési ya jeē cahán tǎ jeē quití téyí cúu ti, jíin jéē cahán ndevāha ti siquí yā. Te ni nihñ jniñu ti jeē ndácu ti jniñu uū xico uū yoō. 6 Te ni quejéé ti ni cahán ndevāha ti siquí Yaā Dios, jíin siquí síhví yá, jíin siquí nuū ndeé yá, jíin siquí tǎca jéē iyó andiví. 7 Te tu ní jési ya jeē cuajnáhan ti jíin ñayuu maá Yaā Dios, te cundeyí tǎ jíin i. Te suni ni nihñ jniñu ti jeē ndácu ti jniñu nuū ñayuu tǎca yúcūn, tǎcá ñuu, tǎcá yuhu, tǎcá nación. 8 Te ñayuu ní cáhnu ñayiví jéē tu yósó síhví i nuū tútu, ni cachiñúhún i quití xéén un. Te Yaā cúu Londe jeē ní cajehni i, máá yá névāha tutu un jéē yósó síhví ñayuu cotecu ní cáni, te je yósó síhví i nde quiví ni jécōo ñayiví.

9 Ñayuu iyó sóho na chúsóhó váha i jnūhun cahán rǎ yāhá. 10 Tǎca ñayuu jeē sáha jeē quiví jnáhan vecāa, suni vecāa cone máá i. Te tǎca ñayuu jeē jéhni jnáhan jíin espada, suni jíin espada cuu maá i. Núu súcuan te ñayuu maá Yaā Dios chi jíin ñúhún cuandeyí ni i jíin jnúndóho te ma jécuiñí i candíje i jnūhun cundáhú ni yā i.

11 Yūcuán na te ni jito ri ñga quití xéén jeē ní cane chíji ñuhun. Te íyó úu ndiqui ti jeē cáa nájnūhun ndiqui lánchi. Te nájnūhun tachí coō cáhnu, súcuan tachí cahán tǎ. 12 Te nájnūhun ndácu quití xéén xǎhna ñúhún jniñu,

suní súcuan ndácu quití uū ún jniñu, ín tí nuū quití xíhna ñúhún. Te quití uū sáha tí jeē chiñúhún táca ñáyuu ní cáhnu ñayiví nuū quití xíhna ñúhún, quití ní tújī jeē jé yajni cuu tí te ní nduváha tí. ¹³ Te quití uū suní sáha táca jniñu jéhnu jeē nahán náā ní yō jíto yó. Chi ní scúun tí ñuhún ichi ándiví ní quiji ini ñayiví, ní cajito ñayuu. ¹⁴ Te ní stahú tí ñayuu ñayiví jíin táca jniñu jéhnu jeē ní níhín tí poder jeē sáha tí, jíto jínuū quití xíhna ñúhún. Te ní ndacu tí jniñu jeē na sáha ñayuu imagen quití xíhna ñúhún, quití ní tújī jíin espada, jeē jé yajni cuu tí te ní nduváha tí. ¹⁵ Te quití uū ní nihín tí poder jeē chutáchí tí xijni imagen quití xíhna ñúhún, náváha cuu cahán, te cahni táca ñáyuu jeē tu cájetáhú i chiñúhún i máá. ¹⁶ Te táca ñáyuu kujéhnu jíin ñáyuu tu cújéhnu, táca ñáyuu cucá jíin ñáyuu ndahú, táca ñáyuu sájniñu cuenta maá jíin mozo jeē ní cajeen ñayuu, ní sáha tí jeē ní jécondee ñn jnunī ndaváha i chí jnéē i. ¹⁷ Te ní ñn ñayuu ma cúu cuaan i xícó i te núu tu ndíso i jnunī jeē cúu síhví tí chí jnúni número jeē cúu síhví tí. ¹⁸ Jnūhun ndíchí cúu jeē cahán rī yáhá: Táca ñáyuu jécūhun vāha ní cuu tava i cuenta número quití xéén un, chí número un cúu síhví ñn tē. Te número un cúu íñu ciento unī xico íñu.

Yaa jeē cájita 144,000 ñayuu

14

¹ Yūcuán na te ní ndacoto ri, te ní jito ri jeē ín máá Yaā cúu Londe xinī yucu Sión. Te cáhīn ciento uū xico cuūn mil ñayuu jíin yá. Te jneē i ndéē síhví máá yá jíin síhví Tátá yā Yaā Dios. ² Te ní jini sōho ri jeē níhín ndasí ichi ándiví, nájnūhun jeē jíca cuehē yūte chí jéē cahán níhin taja. Te jeē níhín un sáha nájnūhun jeē cátee cuehē ñayuu yaa jeē naní arpa. ³ Te cáhīn i ichi núu mesa nuū ndácu Yaā Dios jniñu, jíin núu ndicúun jeē técu, jíin núu ndihóco cuūn tēe jéhnu cándiso jniñu. Te ní cajita i ñn yaa jeē. Te ní ñn ñayuu tu cúu cutūhva i yaa ún, chí máni máá ciento uū xico cuūn

mil ñayuu jeē ní jnama ya i ini ñayiví. ⁴ Te táca tēe yáha cácuu jeē tu ní casáha cuēchi jíin ñahan casáha néé, chí tēe ndoo ánuá cácuu de. Te cándiquīn de Londe ndé-ni cúu-ni nuū cuahán yā. Chi ní jnama ya de ini ñayiví, te máá de cácuu tēe jeē xíhna gā ní cacandíje nuū Yaā Dios jíin núu Yaā cúu Londe. ⁵ Te tú cuiti na jnūhun stáhú cácahān de, chí tēe ndoo ánuá cácuu de, cáhīn de nuū mesa Yaā Dios.

Jnūhun jeē ní cacahān ndinúni ndajéhé yā

⁶ Yūcuán na te ní jito ri inga ndajéhé yā jeē ndáva cuahān sava ándiví. Te ndíso ya jnūhun jeē jnama Yaā Dios ñayuu cotecu i ní cáni. Te ní nacani ya jnūhun un núu táca ñáyuu ní cáhnu ñayiví, nuū ñáyuu táca nación, táca yúcūn, táca yuhu, táca ñuu. ⁷ Te ní cahán jee ya:

Conso íyo ró núu Yaā Dios, te na cáhán rō jeē yóhoyo cújéhnu ya, chí je ní quee quiví jeē sándaā yā síquī rō ndese ní casáha ró. Te na chíñúhún ró yā, chí máá yá ní sáha ándiví jíin ñayiví jíin mar jíin táca núu cáne ndute, áchí ndajéhé yā.

⁸ Yūcuán na te ndíquīn inga ndajéhé yā vēji, te ní cahán yā:

Je ní naa íñu teyí Babilonia. Chi ní sáha jeē ñáyuu táca nación casíquí ndéē i Yaā Dios jeē ní castóo i ya te cándiquīn i ídolo jíin táca jniñu néé, áchí ndajéhé uū.

⁹ Yūcuán na te ndíquīn inga ndajéhé unī vēji, te ní cahán jee ya:

Xeēn coo síquī ñayuu cáchiñúhún quití xéén jíin imagen tí, te jéhe i jnūhun condee jnunī tí jneē i chí ndaha i. ¹⁰ Chi níhín i castigo xeēn síquī cuéchi ní casáha i, chí quití ní Yaā Dios nuū i, te tuá cone cáhnu ní yā. Te ndoho i nuū cayú ñuhún jíin azufre, coto táca ndajéhé Yaā Dios jíin Yaā cúu Londe. ¹¹ Te ñuhmā nuū cándoho i cánda ní cáni cuiti. Te nduú ñuú tu ndétátú ñayuu cándoho ún jeē ní cáchiñúhún quití xéén jíin imagen tí, jíin jéē ní jécondee jnunī síhví tí. ¹² Jeē yúcuan ñáyuu maá Yaā Dios jeē casquícu i jniñu ndácu ya te cándíje

vāha i Jesús, cánuú jéē cuándeyí ni i. Achí ndajéhé unī.

¹³ Yūcuán na te ni jini sōho ri ñn jnūhun ichi ándiví jéē ni cáhān jín rí:

Teé ró jnūhun jeē cahán rī jín ró yāhá: Nacā jeē ndetū tāca ñáyuu cá candije Jitoho yō jeē cájihī vijna jín ndé ní cuáhān yō. Jendaá chi ndetātú i jeē ní casáha i jniñu váha, te jniñu i un má nāá chi sáha jeē quendōo vāha i ní cáni, áchí Espíritu.

Jeē ní nastútú yá ñayuu ñayīví

¹⁴ Yūcuán na te ni ndacoto ri, te ni jito ri ñn vicō cuijín. Te nuū vicó un néne Yaā ní nduu tēe. Te xini yā ñūhun corona oro, te ndáhá yá ñn hoz xeēn.

¹⁵ Te ni quenda inga ndajéhé yā ini templo, te ni cana jee, te cáhān jín Yaā néne nuū vicó un:

Cahnde ni jín hoz ní, te nastútú ní ñayuu ñayīví. Chi je ni quee quiví jeē nastútú ní i nájnūhun táhndé trigo jeé jeé ni cuaan, áchí.

¹⁶ Yūcuán na te Yaā néne nuū vicó ni nastútú yá ñayuu váha ini ñayīví, nájnūhun táhndé trigo jín hoz.

¹⁷ Yūcuán na te ni quenda inga ndajéhé yā ini templo jeē iyó andiví, te suni ndáhá yá ñn hoz xeēn. ¹⁸ Te nde nuū altar ni quenda tucu inga ndajéhé, te ndíso jniñu ya síquī ñuhūn altar. Te ni cana jee ya, te cáhān yā jín ndajéhé jeé ndahá hoz xeēn:

Cahnde rō jín hoz xeēn rō, te nastútú ró ñayuu casáha néé ini ñayīví, nájnūhun jeé cájehnde i chutū ndehē uva jeé jeé ni jichi, áchí.

¹⁹ Te ndajéhé un ní jehnde yā jín hoz yā, te ni nastútú yá ñayuu casáha néé ini ñayīví, nájnūhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájnūhun jnáa i ndehē uva nuū taxín. ²⁰ Te ni jēhe ya castigo i yatā ñúū, te ni jica níñi i nájnūhun ndūxi uva. Te ni ndaa ni jinū cūhva jeé sucún yuhu caballo, te ni jica cuahān nde unī ciento kilómetro.

Ndihúxá ndajéhé jín ndihúxá jnūndóho jeé sándihí

15

¹ Te ni jito ri inga jniñu jéhnū ichi ándiví jéē nāá ni yō jito yó. Chi cáhān uxā ndajéhé yā jeē cuāha ndihúxá jnūndóho sándihí na. Te jeē jinu ndihúxá jnūndóho yāha, te jinu jeē cuāha Yaā Dios castigo xeēn síquī cuéchi.

² Te suni ni jito ri ñn jeē cáa nájnūhun mar, te cáa nájnūhun vidrio jeé ndíndēe nájnūhun ñuhūn. Te yumar un cáhān ñayuu ni cacundeyí síquī quiti xéén jín imagen tí, jín jéé tu ní cáquihin i jnunī número jeé cúu síhví tí. Te cándahá i yaa jeé naní arpa jeé ni jēhe Yaā Dios nuū i. ³ Te cájita i yaa jeé ní tava Moisés, tēe cúu mozo Yaā Dios, jín yaa maá Yaā cúu Londe. Te súcuan cáhān yaa ún:

Yōhyo nāá ni na cájito ná ndihí jniñu jéhnū teyí jéé sáha ní,

Tátā Yaā Dios, chi jniñí ní ndihí poder. Te máni jniñu ndaá jniñu váha sáha ní, jeé cúu ní Rey nuū táca nación.

⁴ Tú ni ñn i iyó jéé ma cónso iyo i nuū ní, Tátā Yaā Dios.

Te ndihí i cahān nahín i jeé yóhyo cújéhnū ní.

Chi máñuhún ni máá ní cúu Yaā ndoo Yaā í.

Te quijócoo ñayuu táca nación, chíñuhún i níhín,

chi je ni cajini i jeé ndaá vāha sáha ní táca jniñu.

Achí i cájita i.

⁵ Yūcuán na te ni ndacoto ri, te ni jito ri jeé ini andiví núne cuarto íi ini templo nuū íne tabla yuū jeé yosó ley yā. ⁶ Te ini templo un ní quenda-coo ndihúxá ndajéhé jeé cándiso jniñu síquī ndihúxá jnūndóho. Te cáñuhun ya sahama fino iyó ndoo te xíñú. Te núhni cinturón oro jicā yā. ⁷ Te ñn jnáhan ndicúún jeé técu ni jēhe ñn ñn cohō oro nuū ndihúxá ndajéhé un. Te ini cohō un ñūhun chitú castigo xeēn jeé ni jēhe Yaā Dios, Yaā técu ní cáni.

⁸ Te ni chitú ndí ñuhmā ini templo, te suu ni steén jeé yóhyo cújéhnū Yaā Dios jín poder jniñí ya. Te ni ñn tu ní cúu quiví ini templo, chi nde na ndihí

ndihúxá jnūndóho jeē cuáha ndihúxá ndajéhé yā.

Siqui ndihúxá cohō jeē ñúhun castigo

16

¹ Yūcuán na te ini templo ni jini sōho ri ñn jnūhun cáhán jee jíin ndihúxá ndajéhé yā:

Cuangoo te cati ró síquī ñayīví ndihúxá cohō jeē ñúhun castigo xeēn jeē ni jéhe Yaā Dios, achí.

² Te cuahān ndajéhé ñn, te ni jeti ya cohō yā síquī ñayīví. Te tāca ñáyuu jeē ndeé jnunī quiti xéén un jíin jéē cáchiñúhún imagen tī, ni canecoo ndíhyi xeēn jeē jetú ndasí.

³ Te ndajéhé uū ni jeti ya cohō yā nuū mar, te ndute mar ni nduu nájnūhun niñi ndíyi. Te ni cajihī tāca quiti jeē ñúhun ini mar.

⁴ Te ndajéhé unī ni jeti ya cohō yā ini tāca yúte jíin tāca núū cáne ndute, te ni nduu niñi. ⁵ Te ni jini ri jeē cahán ndajéhé jeē ndíso jniñu síquī ndúte:

Tátā Yaā Dios, maá ní cúu Yaā ndoo Yaā iī, Yaā iyó vijna, te ni iyo ní ní cáni. Te ndaā sáha ní jeē súcuan ni ndonda ní síquī cuéchi i. ⁶ Chi ni casáha i jeē ní jeti niñi ñáyuu ndoo ní jíin ñáyuu ní canacani jnūhun ní. Te vijna chi ni sáha ní jéē cájhi i niñi, chi ñáyuu casáha jniñu néé cácuu i, jeē cánuú ndoho i súcuan.

⁷ Te ni jini sōho ri jeē cahán ñnga nde nuū altar:

Tátā Yaā Dios, maá ní cúu jeē jniñi ndíhi poder. Te jniñu váha jniñu ndaā ni sáha ní jéē ní ndonda ní síquī cuéchi i. Achí.

⁸ Te ndajéhé cuūn ni jeti ya cohō yā síquī níandii, te ni jéhe Yaā Dios jnūhun jeē ndujíhni ndasí níandii návāha cayū ñáyuu. ⁹ Te xeēn ndasí ní cayū tāca ñáyuu. Te vésú súcuan te tu ní cánacani ni i stóo i cuéchi i, ni tu ní cácahān i jeē cujéhnu Yaā Dios. Chi sa suhva ni cacahān ndevāha i síquī yā jeē ni jéhe ya tāca castigo yáha nuū i.

¹⁰ Te ndajéhé uhūn ni jeti ya cohō yā nuū mesa nuū ndácu quiti xéén jniñu. Te ni cunee ní cáhnu nuū ndácu

ti jniñu. Te cánacayíhi ñáyuu yuhu i jeē cájetū ndasí i. ¹¹ Te vésú súcuan te tu ní cánacani ni i stóo i jniñu néé casáha i. Chi sa ni cacahān ndevāha i síquī Yaā Dios andívi síquī jeē cájetū ndasí i jíin ndíhyi xeēn cándoho i.

¹² Te ndajéhé iñu ni jeti ya cohō yā síquī yúte cáhnu jeē naní Eufrates. Te ni ichi ndíhi ndute yúte ún, návāha nune ñn ichi jeē quíjicoo tāca rey ichi núū cáne niāndii.

¹³ Te ni jito ri jeē ini yuhu coō cáhnu jíin ini yuhu quiti xéén jíin ini yuhu máá téé nácani jnūhun stáhú ní canecoo unī tachī jeē cáca nájnūhun sáhvá. ¹⁴ Te tachī ún chi ndajéhé jexeén cácuu, te casáha jniñu jéhnu jeē náa ni ñáyuu cájito i. Te ni quendacoo tachī un jéē nastútú tāca rey ní cáhnu ñayīví, jéē cuajnáhan de síquī Yaā Dios quiví jeē ndíji ya. Te máá yá cúu jeē jniñi ndíhi poder. ¹⁵ Cuni sōho jíjnáhan ró, chi sanaa ni rō te ndíji ri, nájnūhun jeē ñn sanaa-ni te quíji ñacuíhna. Te nacā jeē ndetū ñáyuu jeē ndito ni i, te ndíto yúcún i sahma i, návāha ma cáca vichí lí i, cúu jeē tú na cuéchi coo síquī i jeē cucanu i nuū tāca ñáyuu, achí yá. ¹⁶ Te ni canastútú táchī un táca rey, ni candutútú ñn lugar jeē yuhu hebreo naní Armagedón.

¹⁷ Te ndajéhé uxā ni jeti ya cohō yā nuū tachí. Te ini templo andívi jíin núū mesa nuū ndácu ya jniñu, ni cane ñn jnūhun jeē ni cáhān jee:

Je ni jīnu, achí.

¹⁸ Yūcuán na te ni ndindēé taja, te níhin, te cáhān taja, te ni jnāa ndasí. Chi nde ní cáni jeē iyó ñáyuu ñayīví, tu ní jnāa níhin ndasí nájnūhun jeē ní jnāa ni jito ri. ¹⁹ Te máá ñuu cujéhnu Jerusalén, ni cusín ni nduu unī parte, te ní cáhnu ñayīví ni naa tāca ñuu. Te ñuu teyí Babilonia, chi ni sáha nahín yá jeē ní ndutahū i castigo xeēn, chi ni quiti ndasí ni yā síquī cuéchi i. ²⁰ Te ni naa tāca isla, te suni yucu tuá gā. ²¹ Te ichi ándívi ní cuun níñi náhnu síquī ñáyuu, jeē véyi nde uū xico kilo. Te ni cacahān ndevāha ñáyuu síquī Yaā

Dios jeē ní cuun ndasí ñíñí, chi ñn jnūndóho xeēn ni cuu.

Jeē ndonda ya siquī ñuu neé Babilonia

17

¹ Yūcuán na te ni quiji ñn jnáhan ndihúxá ndajéhé jeē ní candāhá ndihúxá cohō ún, te ni cahān yā jíin rí:

Nehen, te na stéén rī nuū rō ndese coo castigo siquī maá ñahan jnéni jeē cúu ñuu cujéhnú íne nuū iyó cuéhē ndute. ² Chi tāca rey ñayīví nájñuhun ni casiquí ndéē de jíin ñahan ún, cúu jeē ní castóo de Yaā Dios te cándiquīn de jñuhun néé ní steén ña. Te ni sáha ña jeē ñayuu ní cáhnu ñayīví, nájñuhun nájñi i te casiquí ndéē i Yaā Dios cúu jeē ní castóo i ya te cásáha ndasí i cuēchi. Achí ndajéhé yā.

³ Te ni sáha ga Espíritu Santo jeē ní jito ndijin rī, te ndajéhé yā un cuáhān yā jíin rí nde nuū ñuhun téhé. Te ni jito ri ñn ñahan, yósó ña ñn quiiti xéén cacuéhé. Te ní cáhnu ti ndeé jñuhun néé jéē quiiti ni Yaā Dios sáha. Te iyó úxā xinī tī jíin úxī ndiqui ti. ⁴ Te ñahan un ñuhun ña sahma ndihí jíin sahma cuehé, te suni ñuhun ña siquī oro jíin yūu luu jíin perla jeē ndeé yahu. Te ndáhá ña ñn cohō oro jeē ñuhun chitú jíin jñiñu néé ndasí jíin jñiñu jnehén jéē jíca jnéni ña. ⁵ Te jneē ña ndeé ñn síhví jéē cúu ñn jñuhun sáhi, te suhva cáhān: Yāha cúu ñuu teyí Babilonia, jeē cúu nájñuhun náná tāca jéē cájica jnéni jíin jéē casáha néé ndasí ini ñayīví, áchí. ⁶ Yūcuán na te ni jini rī jeē ñahan un nájñi ña jeē nájñuhun ni jihí ña ñiñí ñayuu maá Yaā Dios jíin níñí ñayuu ni cajihí siquī jeē ní canacani ndaā i jñuhun Jesús. Te nahán ní naa ni rī ni jito ri ña. ⁷ Yūcuán na te ni cahān ndajéhé un jíin rí:

¿Naun náā ni rō jíto ró? Na cástuhun rí nuū rō ndese cúní cahān jñuhun sáhi siquī ñahan un jíin quiiti xéén yósó ña, jeē iyó úxā xinī tī jíin úxī ndiqui ti. ⁸ Quiiti xéén jeē ní jito ró, chi ni cotecu tī, te vijna chi tuá tī. Te ndenda tucu tī ini tūhnchi cúnú, te yūcuán na

te quihīn tī nuū jnahnú ndetū tī. Te ñayuu cáyūcu ní cáhnu ñayīví, naa ni i coto i nuū quiiti un jéē ní cotecu tī te ni jihí tī, te natecu tucu tī. Te cácuu i ñayuu jeē tu yósó síhví i nuū tútu jeē yósó síhví ñayuu cotecu ní cáni jeē ní jécósó síhví i nde quiiví ni jécóo ñayīví.

⁹ Tāca ñayuu jécūhun vāha ni, cuu tava i cuenta ndese cúu: Ndhúxá xinī tī cácuu nájñuhun uxā yucu nuū néne ñahan ún. ¹⁰ Te ndihúxá xinī tī suni cácuu nájñuhun uxā rey. Te uhūn rey un je ni naa jeē ndácu de jñiñu, te ñn de ndácu jñiñu vijna, te inga de chí ná tu quiji de. Te núu na quiji de te jecu-ni tiempo coo de. ¹¹ Te quiiti xéén jeē ní cotecu te tuá iyó tī vijna, máá tī cuu rey unā. Te ñn jnáhan ndihúxá rey un cúu tī. Te suni quihīn tī nuū jnahnú ndetū tī.

¹² Te ndihúxí ndiqui jeē ní jito ró cúu nájñuhun uxī rey, te ná tu ndacu de jñiñu jíjñahan de. Te máá de jíin quiiti xéén un, chi nihīn jñiñu de cuu de rey jecu-ni tiempo. ¹³ Te ndihúxí rey un chi squíjñahan de jñuhun, te nacūāha de poder de jíin jñiñu ndíso de nuū quiiti xéén un návāha ndacu tī jñiñu. ¹⁴ Te cuajñahan de jíin Yaā cúu Londe. Te Yaā cúu Londe quende yā poder de jíjñahan de. Chi máá yá cúu jítoho nuū tāca jítoho, te máá yá cúu Rey nuū tāca rey. Te ñayuu cáhīn jíin yá, chi ni nacāji Yaā Dios i te ni cana ya i, te cásquícu vāha i. Achí ndajéhé un.

¹⁵ Te ni cahān gā yā:

Cuehē ndute jeē ní jito ró núu néne ñahan jíca jnéni, suu cúu ñayuu cuehē tācá ñuu, tācá yuhu, tācá nación. ¹⁶ Te ndihúxí ndiqui jeē ní jito ró jéē névāha quiiti xéén un, suu cácuu rey jeē coto uhū de ñahan jíca jnéni un. Te sáha de jeē quendōo ndáhú ña te quendōo vichí lí ña. Te caji de cūñu ña te cahmu de ña nuū ñuhún. ¹⁷ Chi Yaā Dios scānda ya ini de jeē na sáha de jñiñu cúní yā. Te squíjñahan de jñuhun jeē nacūāha de jñiñu ndíso de nuū quiiti xéén un, ndacu tī jñiñu nde na squícu tāca jñuhun ni cahān Yaā Dios. ¹⁸ Te ñahan jeē ní jito ró cúu máá ñuu

teyí jéē cujéhnū nuū tāca rey ñayīví. Achí ndajéhé un.

Siquí jeē naa ñuu Babilonia

18

¹ Yūcuán na te ni jito ri jeē ní cuun inga ndajéhé yā ni quiji ichi ándiví. Te cújéhnū ndasí yá. Te jeē ndíndēe yá te ni ndíndēe núū ñayīví. ² Te ni cana jee ya:

Je ni naa iī ñuu teyí Babilonia. Te ni nduu vehe tāca táchī, nuū ñúhun ndínū tachī neé, jíín táca téji, quiti quíni jeē tu nújnahan ni yō. ³ Chi ñuu un cúu nájnūhun ññ ñahan ndevāha, te ni sáha ña jeē ñáyuu tācá nación, nájnūhun nájini i te cásiquí ndēē i Yaā Dios, cúu jeē ní castóo i ya te cásáha ndasí i cuéchi. Te tāca rey ñayīví, nájnūhun ni casíquí ndēē de jíín ñahan ún jeē ní cajetáhú de jnūhun neé ní steén ña. Te ñayuu ññ ñayīví jéē cájeen caxícó, ní cacucúca i jíín cuéhē jeneé jeē ní nevāha ña.

⁴ Yūcuán na te ni jini sōho ri inga jnūhun jeē ni cáhān ichi ándiví:

Máá ró jeē cácuu ró ñáyuu maá rí, quendacoo ró ini ñuu jiñā, návāha ma quívi nduu rō jíín táca cuéchi jeē sáha ña, te návāha ma ndóho ró jnūndóho xeēn jeē ndoho ña. ⁵ Chi ni cayā cuehē ndasí cuéchi ña, nájnūhun ññ montón cáhnu ndasí jéē ní cusúcún ndé ándiví. Te vijna te nduxeēn Yaā Dios siquí cuéchi ña. ⁶ Stóho ró ña nájnūhun ni sáha ña jeē ní ndoho sava ga ñayuu. Te nachunaa rō nuū ña doble jnūndóho jeē ni jéhe ña nuū inga ñayuu. Te sáha ró jeē nandicó cóo doble siquí ña vésú jeē ni sáha ña siquí inga ñayuu. ⁷ Te yōhyo ni satéyí ña máá ña, te cúca ndasí ní cotecu ña. Te suni jíín cúhva yúcuan nacuāha ró jéē ndóho xeēn ndasí ña. Chi jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuiti jnūndóho ndoho ri, achí ña. ⁸ Jeē yúcuan cúu jeē ññ quívi-ni te quiji cuehē jnūndóho siquí ña. Chi cuu ndīyí, te cucuíhyá ndasí ni ña, te coo jnamā, te cayū ña nuū ñuhún. Chi yōhyo íyó poder

maá Jítóho yō Yaā Dios, Yaā ní ndonda siquí cuéchi ña, achí.

⁹ Te tāca rey ñayīví jéē ní casíquí ndēē de jíín ña te ni cotecu cúca ndasí de jíín ña, ndahyū de te ndahyū cohó de coto de jeē cánda ñuhmā cayú ña. ¹⁰ Te cuiñi jícá de chi yūhú de coto de jeē súcuan ndoho ña castigo. Te cahān de jíínahan de:

Nacā jeē xeēn ndóho ró, ñuu cujéhnū Babilonia, chi yá-ni ñuu teyí ní cuu ró núú. Te vijna chi ññ núnúu-ni te ni quee castigo jeē náā rō, achi de jíínahan de.

¹¹ Te tāca téē ñayīví jéē cájeen caxícó ñuu ún, ndahyū de te ndahyū cohó de jehē. Chi tuá ndé ññ cuaan ndajniñu caxícó de. ¹² Te ndajniñu caxícó de un cúu oro, plata, yuū luu jíín perla jeē ndeé yahu, jíín sahma fino jíín sahma seda jeē ndihí jíín jéē cuehé. Te suni táca yujnu jeē asñ jéen xicō, jíín táca ndajniñu luu jeē ni sáha jíín marfil jíín yujnu lúu jeē ndeé yahu jíín cáa cuaán jíín cáa hierro jíín yúu cuijín luu. ¹³ Te suni caxícó de canela jíín táca jíhyo asñ jíín súje cutú jíín súje uvuā jíín táca perfume jíín vino jíín aceite jíín harina fina jíín trigo. Te suni caxícó de quiti ndiso jíín lanchi jíín caballo jíín carreta, te nde ñayuu caxícó de jeē sájniñu sáa-ni i. ¹⁴ Te cahān de jíín ñuu ún:

Ni cujiyo ndihí ndajniñu cúca jeē ní nujnahan ndasí ni rō. Te tāca jéē lúu jeē váha jeē ní cotecu cúca ró, chi ni naa ndihí, te ma nánihñ cuiti gā rō, achi de jíínahan de.

¹⁵ Te tāca téē ni cajeen ni caxícó ní cacucúca jéē siquí ndajniñu ñuu ún, chi cuiñi jícá de jeē yūhú de coto de castigo coo ñuu ún. Te ndahyū de te ndahyū cohó de. ¹⁶ Te cahān de jíínahan de:

Nacā jeē xeēn ndóho ñuu teyí yáha. Chi ni cuu nájnūhun ññ ñahan jeē ni ñúhun sahma fino, sahma ndihí jíín jéē cuehé. Te ni ñuhun ña siquí oro jíín yúu luu jíín perla jeē ndeé yahu. ¹⁷ Te vijna te ññ núnúu-ni te ni naa

ndihi tācá ndajniñu váha ún, achi de jíjnáhan de.

Te cuiñi jícá táca tée cáscaca barco, jíin ñáyuu cuángoo nuū barco, jíin tée cásajniñu ini barco, jíin táca gá tée cásajniñu nuū mar. ¹⁸ Chi coto de ñuhmā jeē cayú ñuu ún, te cana jee de jíjnáhan de:

¿Ndé íne ga ñuu teyí jeē cujéhu nájñuhun ni iyo ñuu yáha? achi de.

¹⁹ Te cosō de ticachā ñuhun xinī de jeē cácuuhyá ni de. Te ndahyū de te ndahyū cohó de. Te cana jee de jíjnáhan de:

Nacā jeē xeēn ndóho ñuu teyí yáha. Chi jíin ndajniñu cúca jeē ni iyo ñuu un ní cacucúca táca ñáyuu cánevāha barco cájica nuū mar. Te vijna te ñn núnúu-ni te ni naa ndihi-ni, achi de.

²⁰ Te na cúsiñi ni tāca róhó jeē cáyucú andiví, síquī jeē ní naa ñuu ún. Te na cúsiñi ni rohó, táca tée apóstol, jíin tée cánacani jñuhun Yaā Dios, jíin ñáyuu maá Yaā Dios. Chi ni sáha néé ñuu un síquī rō jíjnáhan ró, te jeē yúcuan ní ndonda Yaā Dios síquī, achi de.

²¹ Yūcuán na te ñn ndajéhé ndíso poder, ni quihin ya ñn yuū cáhnu nájñuhun ñn yōso cáhnu, te ni scáne ya ini mar. Te ni cahān yā:

Nájñuhun ni naa yōso yáha, suni súcuan naa Babilonia, ñuu cujéhu téyí. Te ma núcoo cuiti gā jeē cóto yó núu. ²² Te ni cahān yā jíin ñuu ún: Ini calle rō ma cúni sōho cuiti gā ñayuu jeē scáta i yaa arpa jíin flauta jíin trompeta. Te suni ma cóo cuiti gā ñayuu casáha tācá ndajniñu. Te suni ma cúni sōho ga i jeē níhin tācá molino rō. ²³ Te ni ñn lámpara ma sáha ga jeē cundijin nuū rō. Te ni ma cúni sōho ga i vico jeē cácusñi ni ñahan tēe nándāha mēhñu ró. Te ñayuu ní cajeen ni caxícó nuū rō, ni cacujéhu ndasí i ini ñayiví. Te ni stahú ró ñayuu tācá nación jíin jniñu tasí jíin jniñu mágica. Achí ndajéhé un.

²⁴ Te ñuu un ní nihñ castigo xeēn, chi síquī ñuu un ndéé cuēchi jeē ní jeti niñi tāca tée ní canacani jñuhun Yaā Dios, jíin táca ñáyuu maá yá, jíin táca gá ñayuu ní cajehni i ní cáhnu ñayiví.

19

¹ Te ná ni cuu tāca jéē yáha, te ni jini sōho ri jeē cahán jee cuehē ndasí ñáyuu ini andiví:

Yōhyo cújéhu Yaā Dios. Chi Yaā Dios maá yó cúu jeē ní jnama yóhó.

Te máá yá cujéhu ndasí, te máá yá jñi ndihi poder.

² Te ndaā te váha sándaā yā tācá jniñu, chi ni ndonda ya síquī cuēchi ñuu neé cújéhu ún.

Chi ni stiví un ñáyuu ní cáhnu ñayiví jíin jñuhun cásiquí ndéē Yaā Dios.

Te ni sáha ya jeē ní ndutahū ñuu un síquī jeē ní jehni tāca mozo yā.

Achí i jíjnáhan i.

³ Te ni cacahān tucu i:

Yōhyo cújéhu ya. Chi ní cáni canda ñuhmā ñuu un jéē cayú, achí.

⁴ Te ndihócó cuūn tēe jéhu cándiso jniñu, jíin ndicúun jeē técu, ni cajúcuñi yití de, te ni cachiñuhún de Yaā Dios, Yaā néne nuū mesa ndácu jniñu. Te ni cacahān:

Amén. Súcuan na cóo. Yōhyo cújéhu ya.

⁵ Te nde nuū mesa nuū ndácu ya jniñu ni cahān ñn jñuhun:

Róhó jéē cájejniñu nuū Yaā Dios, jíin róhó jéē cándiso iyo nuū yā, jeē cácujehu jíin jéē tu cácujehu, na cáhán rō jeē yóhyo váha Yaā cúu ya. Achí.

Vico jeē nándāha Yaā cúu Londe

⁶ Te ni jini sōho ri jeē cacahān ñayuu cuehē ndasí, te níhin nájñuhun níhin cuehē yūte, te nájñuhun jeē cahán níhin taja. Te ni cacahān:

Yōhyo cújéhu ya. Chi Jitoho yō Yaā Dios, Yaā jñi ndihi poder,

vijna te ndácu níhin ya jniñu.

⁷ Te na cúsiñi ni yō, te siñ ndasí na cóo ni yō,

te na cáhán yō jeē yóhyo cújéhu ya.

Chi ni quee quiví jeē nándāha máá Yaā cúu Londe.

Te je iyó túhva ñahan nándāha jíin yá, te suu cúu ñayuu maá Yaā Dios.

⁸ Te ni nihñ ña jñuhun cuhun ña sahma fino jeē ndóo ndasí te xíñu.

Achí i jíjnáhan i. Te sahma fino un cúu tãcã jniñu ndaã jeë casãha ñayuu maã Yaã Dios.

⁹ Te ni cahãn ndajéhé yã jíin rí:

Tee ró jnúhun yãha: Nacã jeë ndetũ tãca ñáyuu jeë ní cana ya quingoo vico nãndãha Yaã cúu Londe.

Te ni cahãn gã ndajéhé un jíin rí:

Tãca jnúhun yãha cúu jnúhun ndaã ni cahãn Yaã Dios, achí yã.

¹⁰ Te ni jecuiñi yití rí nuũ jehé ndajéhé un jéë chiñúhún rí yã nuú. Te ni cahãn yã jíin rí:

Ma sãha ró súcuan. Chi ruhũ suni mozo Yaã Dios cúu ri, nãjnũhun maã ró jíin tãca hermano rã jeë cácan díje vãha jnúhun Jesús. Sa suhva nuũ maã Yaã Dios chiñúhún ró. Achí yã.

Chi jnúhun siquĩ Jesús cúu jeë cácahãn ndaã ñayuu cáncani jnúhun Yaã Dios.

Yaã yosó siquĩ caballo cuijín

¹¹ Yũcuán na te ni jito ri jeë núne andiví. Te ni cane ñn caballo cuijín, te Yaã yosó siquĩ tĩ naní yã Yaã ndaã, Yaã squĩcu, chi squĩcu ya jeë ni jéjnũhun ya. Te ndaã sãndaã yã jniñu te ndaã ndónnda ya siquĩ tãca jéneé. ¹² Te tinũu yã ndíndēe nãjnũhun yãñuhũn. Te xinĩ yã ñuhun cuehē corona. Te yósó ñn síhví yã jeë maã-ni ya cúu jeë jiní.

¹³ Te ñuhun ya ñn sahma jeë ni ñũndaji nuũ ñiñí, te naní yã Jnúhun Yaã Dios.

¹⁴ Te tãcã ndajéhé yã jeë iyó andiví, cáyosõ caballo cuijín, cándiquĩn yata yã. Te cáñuhun sahma fino cuijín iyó ndoo. ¹⁵ Te ini yuhu maã Yaã jeë yosó siquĩ caballo, quẽnda jeë cáca nãjnũhun ñn espada xeẽn. Te espada un cúu jnúhun ya jeë stóho ya ñayuu tãcã naciõn. Te nĩhin ndacu ya jniñu nuũ i. Te sãndaã yã siquĩ cuéchi i nãjnũhun jeë jeñú siquĩ ndehē uva cájexĩn. Te cuãha ya castigo xeẽn ndoho i jeë quití ni yã siquĩ cuéchi i. Chi maã yã jniñi ndihĩ poder. ¹⁶ Te sahma ya jíin síhin ya yosó jnúhun yãha: Rey nuũ tãca rey jíin Jítoho nuũ tãca jítoho, achí.

¹⁷ Yũcuán na te ni jito ri ñn ndajéhé yã jeë ín nuũ níandii. Te ni cana jee ya xinĩ tãcã quití ndãva nuũ tachí:

Ndutútú ró quijicoo ró cuxini ró ñn vico cáhnu sãha Yaã Dios. ¹⁸ Te caji rã cúñu tãca rey jíin capitãn jíin tée téyí, jíin cúñu tãcã caballo jíin tée ni cayosõ siquĩ tĩ. Te suni caji rã cúñu tãca gã ñayuu, cúu ñayuu casãjniñu cuenta maã jíin mozo jeë ní cajeen ñayuu, cúu ñayuu cácujeñnu jíin ñáyuu tu cácujeñnu. Achí ndajéhé yã.

¹⁹ Yũcuán na te ni jito ri maã quití xeẽn jíin tãca rey ñayiví jíin cuehē soldado de. Te ni candutútú de jeë cuajnáhan de jíin maã Yaã yosó caballo jíin tãca ndajéhé yã. ²⁰ Te ni jniñi ya quití xeẽn cuahãn tĩ preso jíin tée ni nacani jnúhun stáhú jeë ní sãha tãcã jniñu jéñnu jeë ní jito jínũu quití xeẽn. Chi jíin jniñu jéñnu un cúu jeë ní stáhú de tãca ñáyuu jeë ní cajēhe jnúhun condiso jnunĩ quití xeẽn, jíin jéë ní cachiñúhún imagen tĩ. Te quití xeẽn un jíin tée ni nacani jnúhun stáhú un, cátecu ndíndúú te ni scãne ya nuũ laguna ñuhũn jeë cayú jíin azufre. ²¹ Te jíin espada jeë cáne yuhu Yaã yosó caballo ni cajihĩ tãcã soldado quití xeẽn un. Te tãcã quití ndãva nuũ tachí ni candutú chíji tĩ ni cayeji tĩ cúñu de jíjnáhan de.

Siquĩ mil cuiyã

20

¹ Te ni jito ri jeë ní cuun ñn ndajéhé yã ichi ándiví. Te ndáhã yã ndacãa jeë núne tũhchi cúnú ndasí. Te suni ndáhã yã ñn cadena cáhnu. ² Te ni jniñi ya maã cóõ cáhnu jeë iyó ndé jenahãn ndasí, te naní tĩ jexeẽn jíin Satanás. Te ni jihni yã jeë conuhnĩ mil cuiyã. ³ Te ni scãne ya ini tũhchi cúnú ndasí. Te ni jesi vãha ya, te ni sãcutú yã yuyáú, návãha ma stahú gã un ñáyuu tãcã naciõn, chi nde na jínu mil cuiyã. Te jeë yãha mil cuiyã ún, yũcuán na te cánuú jéë ndajĩ caca cuu jecu na tiempo.

⁴ Te ni jito ri tãca mesa nuũ ndácu jniñu, te yũcuan cáyũcu tãca ñáyuu jeë ní canihĩn jniñu i sãndaã i jniñu. Te suni ni jito ri anuã tãca ñáyuu jeë ní cajehnde xinĩ i siquĩ jeë ní canacani

i jnūhun Jesús jín jnúhun Yaā Dios. Te tu ní cáchiñúhún i quití xéén jín imagen tī, ni tu ní cájēhe i jnūhun jeē cóndee jnunī tī jneē i chí ndaha i. Te ni jito ri jeē ní natecu i te ni candacu i jniñu jín Cristo mil cuiyā. ⁵ Yaā cúu ndīyí jeē nátecu xīhna gā. Te tāca gā ndīyí, tu ní cánatecu i, chí nde jeē jínu mil cuiyā. ⁶ Te nacā jeē ndetū tāca ñáyuu ndoo ánuá jeē nátecu xīhna gā. Chí ma cúu cuiṭi i vuelta uū. Te cuu i sutū nuū Yaā Dios jín núu Cristo, te ndacu i jniñu jín yá mil cuiyā.

⁷ Te jeē jínu mil cuiyā ún, te ndaji Satanás te quenda nuū yíndihyū. ⁸ Te stáhú tucu ñayuu tācá nación ní cáhnu ñayíví. Te stáhú ñayuu ñuu Gog jín Magog. Te sáha jeē ndutútú táca soldado ñuu un jéē cuajnáhan de. Te coo cuehē ndasí de nájnūhun ñíṭí yumar. ⁹ Te cuitē núu de quingoo de ní cáhnu ñayíví. Te cuicó ndúu de ñuu nuū cáyūcu ñáyuu maá Yaā Dios, ñuu jeē maní yā jín. Te Yaā Dios chí scúun ya ñuhūn ichi ándiví, te cayū ndíhi de. ¹⁰ Te jexeén jeē ni stáhú táca ñáyuu ún, chí scáne ya quihīn nuū laguna ñuhūn jeē cayú jín azufre. Te yūcuán chí xīhna gā ni scáne ya quití xéén jín téé ni nacani jnūhun stáhú. Te yūcuán ndoho nduú ñuú ní cáni cuiṭi.

Jeē sándaā yā jniñu nuū mesa cuijín

¹¹ Yūcuán na te ni jito ri ñn mesa cuijín cáhnu, te néne maá Yaā ndácu jniñu. Te ñayíví jín andiví ni ndoñúhún cuáhān jeē ní jito ya nuū, chí tuá ni cúu quendōo nuū yā. ¹² Te ni jito ri tāca ndīyí, jeē ní cujéhnu jín jéé tu ní cujéhnu, cáhīn nuū Yaā Dios. Te ni sáha ya jeē nune tāca libro, te suni ni nune inga libro jeē yosó sīhví ñáyuu cotecu ní cáni. Te ni sándaā yā síquī tāca ndīyí ún, núu ndese jniñu ni casáha i jín ndese yosó núu tāca libro un. ¹³ Te tāca ndīyí jeē ní cajihī nuū mar, ni nanecoo. Te suni ni nanecoo tāca ndīyí jeē ní cajihī i, jeē íne i maá lugar nuū cáyūcu ánuá ndīyí. Te ni sándaā yā síquī, núu ndese ni casáha ñn ñn i. ¹⁴ Yūcuán na te cuehyí jéhni ñayuu jín lugar nuū cáyūcu ánuá

ndīyí, ni snáā yā ni scáne ya cuangoo nuū laguna ñuhūn. Te jeē ndóho ñayuu nuū laguna ñuhūn, yūcuán cúu jeē cúu i vuelta uū. ¹⁵ Te yūcuán ní scáne ya tāca ñáyuu ni casáha jniñu néé jéé tu yosó sīhví i nuū libro jeé yosó sīhví ñayuu cotecu ní cáni.

Andiví jéé jín ñáyíví jéé

21

¹ Yūcuán na te ni jito ri andiví jéé jín ñáyíví jéé. Chí andiví jín ñáyíví xīhna ñúhún ni naa. Te suni tuá mar. ² Te ruhū Juan, ni jito ri ñuu ñn jeé cúu Jerusalén jeé. Te ñuu un ní cuun vēji ichi ándiví núu néne Yaā Dios. Te ñuu ún luu cáa nájnūhun ñn ñahan jeé ni sātūhva ña ni cucutú ña jeé nándāha ña jín yí ña. ³ Te ni jini sōho ri ñn jnūhun jeé ni cáhān jee ichi ándiví:

Condēhé, chí vijna te ndéé Yaā Dios mēhū ñáyuu. Te condee yā jín i jínáhan i, te cuu i ñayuu maá yá. Te maá yá condee yā jín i jeé cúu ya Yaā Dios i. ⁴ Te nacuaa yā ndute tñúú i jínáhan i. Te ma cúu gā ñayuu, ni ma ndahyú gā i, ni ma cucuíhyá gā ni i, ni ma jetú gā i. Chí je ni yāha tāca jnúndóho jeé ni íyo, áchí.

⁵ Yūcuán na te ni cahān maá Yaā néne nuū mesa:

Condēhé, chí nasáha jeé rí tāca jéé iyó, áchí yá.

Te suni ni cahān yā:

Tee ró jnúhun yáha. Chí tāca jnúhun yáha cúu jnūhun jeé jiní ndije ró jéé ndaā cúu.

⁶ Te ni cahān gā yā:

Je ni jīnu. Máá rí cúu nájnūhun letra A xīhna ñúhún jín letra Z jeé sándīhí na, chí máá rí ni squejéé ndíhi te máá rí sínu. Te tāca ñáyuu cájichī, súcuán-ni cuāha ri coho i ndute cáne jeé cótecu i ní cáni. ⁷ Tāca ñáyuu jeé cúndeyí síquī jéneé, nihīn i ndíhi jeé yáha cuu tahū i. Te cuu ri Yaā Dios i, te cuu i sēhe ri. ⁸ Te tāca ñáyuu jeé cáyūhú ndoho síquī jnúhun ri, jín ñáyuu tu cá candíje, jín ñáyuu casáha jniñu néé, jín ñáyuu cájehni ndīyí, jín ñáyuu cájica jnéni, jín ñáyuu casáha tásí, jín ñáyuu cáchiñúhún ídolo, jín táca ñáyuu

castáhú, ñayuu ún chi quívicoo i laguna ñuhún jeē cayú jíin azufre. Te yūcuan cúu jeē cúu i vuelta uū.

Jerusalén jeé

⁹ Yūcuán na te ni quiiji ñn jnáhan ndihúxá ndajéhé jeē ní candāhá ndihúxá cohō jeē ni ñúhun chitú ndihúxá jnūndóho sandíhí. Te ni cahān yā jíin rí:

Nehen, te na steén rī nuū rō ñahan jeē nándāha ña cuu ña ñasihí Yaā cúu Londe, áchí yá.

¹⁰ Te ni sáha ga Espíritu Santo jeē ní jito ndijin rī, te ndajéhé un ní jeca ya ruhū cuahān yā jíin rí xinī ñn yucu cáhnu súcún. Te ni steén yā nuū rī maá ñuu ñi cujéhnu jeē cúu Jerusalén, te ni cuun vēji nde andiví núū néne Yaā Dios. ¹¹ Te ndíndēé ndasí ñuu un nájnūhun ndíndēé Yaā Dios. Te xíñú nájnūhun xíñú ñn yuū luu jeē ndeé yahu ndasí, nájnūhun yuū cuijín jeē quiyi nájnūhun vidrio. ¹² Te yuhu ñúū un ní jicó ndúū ñn jeē cáhnu súcún ndihyú ñuu ún. Te íyó úxī uū yehyí. Te tāca yéhyí un ñn ñn ndajéhé yā. Te tāca yéhyí un yósó síhví ndihúxí uū yucūn Israel. ¹³ Te lado nuū cáne niāndii iyó únī yehyí. Te lado norte suni íyó únī yehyí. Te lado sur suni íyó únī yehyí. Te lado nuū quée niāndii suni íyó únī yehyí. ¹⁴ Te íyó úxī uū yuū náhnu jeē cúu cimientu maá jéē ndihyú ñuu ún. Te tāca yūū un yósó síhví ndihúxí uū apóstol maá Yaā cúu Londe.

¹⁵ Te ndajéhé jeē ni cáhān jíin rí, ndáhá yá ñn yujnu oro jeē chícuāha yá ñuu un jíin tāca yéhyí jíin maá jéē ndihyú ñuu ún. ¹⁶ Te ñuu ún chi ñn cūhva-ñi cúu ndicúún lado. Chi jeē cáni jíin jéē jité, inuú-ñi cúu. Te ndajéhé un ní chicuāha yá ñuu un jíin yujnu ún. Te née uū mil uū ciento kilómetro jeē ñn ñn lado. Te inuú-ñi cūhva jeē cáni, jeē súcún, jíin jéē jité. ¹⁷ Te suni ni chicuāha yá maá jéē ndihyú ñuu ún, te née unī xico cuūn metro jeē súcún. Te yūcuan cúu cūhva jejníñu ñayuu, jeē suni jéjníñu ndajéhé un.

¹⁸ Te maá jéē ndihyú ñuu un ní cuvāha jíin yūū cuijín quiyi. Te ñuu ún

chi maá nene oro cúu, te cáa nájnūhun vidrio quiyi. ¹⁹ Te tāca yūū jeē cúu cimientu maá jéē ndihyú ñuu ún, ní cucutú jíin ndinuū yuū luu jeē ndeé yahu. Yuū ñn cúu yuū cuijín quiyi. Te jeē uú cúu yuū ndeé ndíí. Te jeē uní cúu yuū pinto. Te jeē cuún cúu yuū cuí ndíí. ²⁰ Te jeē uhún cúu yuū pinto jeē ñúhun raya. Te jeē inú cúu yuū cuehé pinto. Te jeē uxá cúu yuū cuaán quiyi. Te jeē uná cúu yuū cuí ndeé. Te jeē ñn cúu yuū cuaán ndíí. Te jeē uxí cúu yuū cuí cuijín. Te jeē uxí ñn cúu yuū cuehé cuaán. Te jeē uxí uū cúu yuū ndihí ndíí. ²¹ Te ndihúxí uū yehyí un cácuu uxí uū perla jeē ndeé yahu. Te ñn ñn yéhyí cúu ñn ñn perla. Te maá nene oro cúu calle cáhnu ñuu ún, te quiyi nájnūhun vidrio.

²² Te tú na templo ni jito ri ini ñuu ún, chi ní cáhnu ñuu un ndeé maá Jítoho yō, Yaā jnāí ndihí poder, jíin Yaā cúu Londe. ²³ Te ñuu ún tu jíin ñúhún cundijin jíin luz niāndii jíin yōō. Chi jeē ndíndēé maá Yaā Dios cúu jeē cundijin ñuu ún. Te luz ñuu un cúu maá Yaā cúu Londe. ²⁴ Te ñayuu tācá nación ñayiví jéē ní jnama ya, caca i jeē cundijin luz ñuu un núū i. Te tāca rey ñayiví quijicoo de ñuu ún, quindecas de tācá ndajníñu jeē ndeé yahu jíin jéē cujéhnu de sáha. ²⁵ Te tāca yéhyí ñuu ún ma cóndihyū cuiti nduú, chi tú na jecuāa coo. ²⁶ Te ini ñuu ún quijicoo ñayuu tācá nación, quindecas i tācá ndajníñu jeē ndeé yahu jíin jéē cujéhnu i sáha. ²⁷ Te ma quívicoo cuiti ni ñn jeē jnehén. Ni ma quívicoo ñayuu casáha jniñu néé jíin jéē castáhú. Chi quívicoo máni maá ñayuu jeē yósó síhví i nuū libro jeē yósó síhví ñayuu cotecu ní cáni, jeē névāha Yaā cúu Londe.

22

¹ Yūcuán na te ndajéhé yā ni steén yā nuū rī ñn yūte íyó ndoo. Te ndute un sáha jeē cótecu yō ní cáni. Te xíñú nájnūhun vidrio, te cáne nuū mesa nuū ndácu Yaā Dios jniñu jíin Yaā cúu Londe. ² Te jica yūte ún sava mēhñu calle cáhnu ñuu ún. Te ndíndúú lado

yuyúte un yíhi yujnu jeē cótecu yō ní cáni sáha. Te yujnu un jéhe ndehē uxī uū jínu jeē ñn cuiyā, chí tāca yóo cúun ndehē. Te ndaha yúcu i cúu tajná jeē ndúvāha ñayuu tācá nación. ³ Te tācá-ni jeē ni cáhān yā jeē násūu jéē váha cúu, ma cóo ini ñuu ún. Te ini ñuu ún cuiñi máá mesa nuū ndácu Yaā Dios jniñu jíin Yaā cúu Londe. Te ñayuu cácanđije jeē cácuu i mozo yā, chiñúhún i ya. ⁴ Te coto i nuū yā, te condee síhví yá jneē i. ⁵ Te ma cóo ga jecuāā ñuu ún. Te ñayuu cáyūcu yúcuu tuá jíni ñúhún i jeē cúndijin lámpara nuū i, ni jeē cúndijin niāndii. Chí jeē ndíndēe máá Jítoho yō Yaā Dios cúu jeē cúndijin nuū i. Te ndacu i jniñu ní cáni cuiti.

Jeē cuácuyajni ndiji Cristo

⁶ Yūcuán na te ni cahān ndajéhé un jíin rí:

Tāca jnúhun yáha cúu jnúhun jeē jini ndije ró jéē ndaā cúu. Te Jítoho yō Yaā Dios, máá yá sáha jíin téé cánacani jnúhun ya jeē jíin Espíritu yā cánacani de. Te suu máá yá ni tají yá ndajéhé yā návāha stéén nuū ñáyuu cácuu mozo yā tācá jniñu jeē yachí coo.

⁷ Ndiji yachí rí, achí yá.

Te nacā jeē ndetū ñayuu chusóhó jnúhun Yaā Dios jeē yosó núu tútu yáha.

⁸ Te ruhū Juan, ni jini sōho ri tāca jnúhun yáha, te ni jito ri tācá jniñu yáha. Te ná ni jini sōho ri ni jito ri, yūcuán na te ni jecuñi yití rí nuū jehé maá ndajéhé jeē ni stéén tācá jniñu yáha núu rí, jeē chiñúhún rí yā nuū.

⁹ Te ni cahān ndajéhé un jíin rí:

Ma sáha ró súcuu. Chí ruhū suni mozo Yaā Dios cúu ri, nájnūhun máá ró jíin táca hermano rō jeē cánacani jnúhun ya, jíin ndihi ñayuu cájetáhú jnúhun yosó nuū tútu yáha. Sa suhva nuū maá Yaā Dios chiñúhún ró. Achí yá.

¹⁰ Te ni cahān gā ndajéhé un jíin rí:

Ma chísāhi ró táca jnúhun Yaā Dios jeē yosó núu tútu yáha, chí je cuacuyajni tiempo jeē cúndaā ndihi. ¹¹ Te ñayuu casáha jniñu néé, na sáha ga

máá i jniñu néé. Te ñayuu jnehén ánuá, na quéndōo máá i súcuu. Te sa ñayuu casáha jniñu ndaā, na sáha ga i jniñu ndaā. Te ñayuu cáhīyo ndoo ánuá, na cáca ndoo ga i súcuu. Achí ndajéhé un.

¹² Jendaá jeē ndiji yachí rí, achí Jesús. Te quiji ri jíin táhū cuāha ri nuū ñn ñayuu, núu ndese jniñu ni casáha i. ¹³ Máá rí cúu nájnūhun letra A xīhna ñúhún jíin letra Z jeē sándihí na, chí íyó rí nde xīhna ñúhún te coo ri ní cáni.

¹⁴ Nacā jeē ndetū ñayuu jeē jéhe i jnúhun ndundoo ánuá i nájnūhun ndúndoo sahma. Chí cuu caji i ndehē yujnu jeē sáha jeē cótecu i ní cáni, te cuu quívicoo i yéhyí ñuu i ún.

¹⁵ Te ichi fuera ñuu ún cuiñi ñayuu tu cácanđije, jíin ñáyuu casáha tásí, jíin ñáyuu cájica jnéni, jíin ñáyuu cájehni ndíyí, jíin ñáyuu cáchiñúhún ídolo, jíin ñáyuu cácusí ni stahú jnáhan.

¹⁶ Máá rúhū Jesús, ni tají rí ndajéhé rí návāha castúhun yá tāca jnúhun yáha nuū tāca grupo ñayuu cácanđije. Te máá rí ni sáha jeē ni íyo rey David, te ni quiji ri nuū yucún David. Te cúu ri nájnūhun lucero ndíndēe cáne cúndijin. Achí yá.

¹⁷ Te máá Espíritu Santo jíin máá ñahan jeē nándaā jíin Yaā cúu Londe, cácahān:

Nehen, quívicoo ró ndaha ya, achí.

Te tāca ñáyuu jeē jíni sōho, suni na cáhān i:

Nehen, quívicoo ró ndaha ya.

Te tāca ñáyuu cájichí jeē cácuu i coho i, na quívicoo i ndaha ya, te súcuu-ni na cóho i ndute jeē cótecu i ní cáni sáha.

¹⁸ Te tāca ñáyuu jíni sōho jnúhun Yaā Dios jeē yosó núu tútu yáha, cáhān níhin ri jíin i: Núu ndé ñáyuu chisóo i nuū jnúhun cáhān tutu yáha, te Yaā Dios chisóo yá jnúndóho cáhān tutu yáha, ndoho i. ¹⁹ Te núu ndé ñáyuu quende i jecu jnúhun cáhān tutu yáha, te Yaā Dios quende yā tahū i jeē yosó núu libro jeē yosó síhví ñayuu cotecu ní cáni, te ma nihín i tahū i ini ñuu i

ún. Te tutu yáha cúu jeē cahán siquī
tācá un.

²⁰ Te Yaā jeē ni cáhān tāca jnúhun
yáha, suhva cáhān yā:

Jendaá jeē ndiji yachī rī, achí yá.

Amén. Súcuan na cóo. Jítoho ná
Jesús, jícán tahu na jéē ndiji yachī ní.

²¹ Te ñúhun ni rī jeē Jítoho yō Je-
sucristo na sáha ga yā jeē váha róhó
jínáhan ró. Amén.